

Alkitab Ledo Kaili

Ledo Kaili 1999 Edition

Wycliffe Bible Transla-
tors, Inc.

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at dbs.org/bibles.

Matius.....	4
Markus	44
Lukas	69
Yohanes.....	108
Suro-Suro	138
Roma	176
1 Korintus.....	195
2 Korintus.....	213
Galatia	225
Efesus	233
Filipi	240
Kolose.....	245
1 Tesalonika	250
2 Tesalonika	255
1 Timotius	258
2 Timotius	264
Titus	268
Filemon	271
Ibrani.....	273
Yakobus.....	287
1 Petrus.....	292
2 Petrus.....	298
1 Yohanes.....	302
2 Yohanes.....	307
3 Yohanes.....	308
Yudas.....	310
Pompakita.....	312

Matius

Vamba nu Tesa

Kareba Belo hitu nitulisi i Matius, saito lako sapulu randua anaguru i Pue Yesus. Dopame ia nangoseaka i Yesus, ia topesingara balasitee. Ri Kareba Belo anu nitulisi i Lukas bo i Markus, i Matius hitu niuli muni i Lewi (Lukas 5:27-32; Markus 2:14-17). I Matius notulisi Kareba Belo hitu ala mompakalanto i Yesus mpuu-mpuu Magau Topepakasalama anu nijanji nu Alatala nggaulu. Nadea nggani i Matius nompakalanto berimba katuvu i Pue Yesus nompakadupa tesa nu nabi-nabi nggaulu. (Peinta 1:23; 2:6,15,17-18,23; 3:3; 4:14-16; 8:17; 12:17-21; 13:35; 21:4,5; 27:9-10.) Nau i Yesus nipoanaka ri ngata ntoYahudi bo natuvu nangoseaka agama Yahudi, Kareba Belo ledo aga ka toYahudi, tapi ka pura-pura manusia (13:38; 28:18-20).

Buku hitu nisunju nangoseaka alima pepatuduki ndoe. Ri kolu sangu-sangu pepatuduki nitesa bara sako-ngaya kajadia anu rapakalanto ngena ri pepatuduki. Iveimo sunjuna: (1) Pepatuduki ka todea tempo Ia ri bulu (Pasal 5-7), (2) Pepatuduki ka anaguruNa dopame nituduNa ira hau mompatolele Kareba Poparenta nu Alatala (Pasal 10), (3) Porapa-porapa anu nompakalanto Poparenta nu Alatala (Pasal 13), (4) Pepatuduki ka anaguruNa berimba mangoseaka Ia (Pasal 18), bo (5) Pepatuduki ri Bulu Zaitun nombaboto kajadia-kajadia ri tempo maka-va (Pasal 24-25).

Isi nu Buku

Sunju sanga ntotua i Yesus, tesa pompoanaka Ia bo tesa tempo kanganaNa (Pasal 1-2)

Pamulana pokarajaa i Yesus (3:1-4:11)

Pokarajaa i Yesus ri bagia Galilea (4:12-14:12)

I Yesus nompamula pokarajaaNa ri Galilea bo nompelisi anaguruNa pamulana (4:12-25)

I Yesus nompatuduki todea ri bavo nu bulu (Pasal 5-7)

Kabaraka-kabaraka nipovia i Yesus (8:1-9:34)

I Yesus nompatuduki anaguruNa (9:35-11:1)

Kajadia-kajadia ri bagia Galilea anu nompakalanto i Yesus mpuu-mpuu Magau Topepakasalama (11:2-12:50)

Porapa-porapa mompakalanto Poparenta Alatala (13:1-52)

ToNazaret ledo nantarima i Yesus (13:53-58)

Kamate i Yohanes Topediu (14:1-12)

Pokarajaa i Yesus ri ngata-ngata napara bagia Galilea (14:13-17:21)

Pokarajaa i Yesus kaupuna ri bagia Galilea (17:22-18:35)

Polipa i Yesus hau ri ngata Yerusalem (Pasal 19-20)

I Yesus ri ngata Yerusalem (Pasal 21-28)

Panggavia bo pepatuduki i Yesus ri ngata Yerusalem (Pasal 21-22)

I Yesus nangonteaka pakeni agama Yahudi (Pasal 23)

Pepatuduki i Yesus ri Bulu Zaitun (Pasal 24-25)

I Yesus nisaka, nitangara bo nipatesi (Pasal 26-27)

I Yesus natuvu mpanjili (28:1-15)

I Yesus nombatudu anaguruNa manggeni Kareba Belo (28:16-20)

Sunju nu muli ntotua i Yesus Kristus

Lukas 3:23-38

1 Iveimo sunju nu muli ntotua i Yesus Kristus, muli Magau Daud, muli i Abraham:

² i Abraham nomulika i Ishak, i Ishak nomulika i Yakub,

i Yakub nomulika i Yehuda ntali sampesuvu,

³ i Yehuda nomulika i Peres bo i Zerah (tinara i

Tamar),

i Peres nomulika i Hezron, i Hezron nomulika i Ram,

⁴ i Ram nomulika i Aminadab, i Aminadab nomulika i

Nahason,

i Nahason nomulika i Salmon,⁵ i Salmon nomulika i Boas (tinana i Rahab),
 i Boas nomulika i Obed (tinana i Rut), i Obed nomulika i Isai,⁶ i Isai nomulika Magau Daud, Magau Daud nomulika i Salomo (tinana timbala i Uria),
⁷ i Salomo nomulika i Rehabeam, i Rehabeam nomulika i Abia,
 i Abia nomulika i Asa,⁸ i Asa nomulika i Yosafat, i Yosafat nomulika i Yoram, i Yoram nomulika i Uzias,⁹ i Uzias nomulika i Yotam, i Yotam nomulika i Ahas, i Ahas nomulika i Hizkia,¹⁰ i Hizkia nomulika i Manasye,
 i Manasye nomulika i Amon, i Amon nomulika i Yosias,
¹¹ i Yosias nomulika i Yekhonya ntali sampesuvuna napara tempona toYahudi nidagi bo niken i mpalai hau ri tana Babel.
¹² Nakava ri tana Babel, i Yekhonya nomulika i Sealtiel,
 i Sealtiel nomulika i Zerubabel,¹³ i Zerubabel nomulika i Abihud,
 i Abihud nomulika i Elyakim, i Elyakim nomulika i Azur,
¹⁴ i Azur nomulika i Zadok, i Zadok nomulika i Akhim, i Akhim nomulika i Eliud,¹⁵ i Eliud nomulika i Eleazar, i Eleazar nomulika i Matan, i Matan nomulika i Yakub,
¹⁶ i Yakub nomulika i Yusuf berei i Maria, bo i Maria noanaka i Yesus anu niuli i Kristus, haitumo Magau Topepakasalama anu nijanji nu Alatala.
¹⁷ Jadi lako nte i Abraham sampe Magau Daud naria sapulu pata-ntapi mulina. Bo lako ri Daud sampe ri tempo toYahudi niken i mpalai hau ri tana Babel naria sapulu pata-ntapi muni. Bo lako ri tempo toYahudi niken i hau ri tana Babel sampe pompoanaka i Kristus naria sapulu pata-ntapi muni.

Tesa pompoanaka i Yesus bo kanganaNa (1:18-2:23)

Tesa pompoanaka i Yesus Kristus

Lukas 2:1-6

¹⁸ Iveimo tesa pompoanaka i Yesus Kristus. TinaNa i Maria anu nijanji moberei ante langgai nosanga i Yusuf. Tapi dopame ira noberei, natianamo i Maria lako ri kuasa Nosa Gasa nu Alatala. ¹⁹ I Yusuf, tenggeana, tona natutu nangoseaka atura agama. Haitu sampe ia nonia mombabole tenggeana i Maria. Tapi ledoda ia mompakaeya i Maria ri ngayo nte. Jadi patujuna mombabole i Maria nggalinolino.

²⁰ Tempo i Yusuf da nompekiri patujuna haitu, malae-ka nTupu nakava riarang pangipina bo nanguli ka ia,

“Yusuf, muli i Daud, nee makini raramu mompoberei i Maria, sabana ngana nikatianakana najadi lako ri kuasa Nosa Gasa nu Alatala. ²¹ I Maria mompoanaka saito ngana langgai, bo ngana haitu kana mupoposanga Yesus † sabana Iamo mompakasalama todeana lako ri dosara.”

²² Haitu pura-pura najadi ala madupa tesa nTupu anu nipasimbayu nabiNa nggaulu ivei:

²³ “Saito randaa †† matiana bo mompoanaka saito ngana langgai. Bo ngana haitu rapoposanga i Imanuel.”

Yesaya 7:14

(Immanuel riarabasa Ibrani batuana: “Alatala mosang-gani ante kita.”)

²⁴ Jadi nembangupa i Yusuf, nipovianamo anu niuli nu malaeka ka ia. Nipobereinamo i Maria, ²⁵ tapi ira dopa nosampaturu dopame i Maria moanaka anana langgai haitu. Bo i Yusuf nompoposanga ngana haitu i Yesus.

Topande nanggita betue nakava mombasomba i Yesus

2 I Yesus nipoanaka ri ngata Betlehem ri bagia Yudea. Tempo haitu Magau Herodes noparenta. Naupu pompoanaka i Yesus, nakavamo topande nanggita betue. Ira nakava lako ri mpandakena hau ri ngata Yerusalem, ² bo nekutanamo ira, “Ri umba Ia, anu majadi Magau ntoYahudi, anu dako nipoanaka? Nikita kami betueNa nebonda ri mpandakena bo kami nakava mombasomba Ia.”

³ Nangepe tesa haitu natekajamo bo nasesa rara Magau Herodes, bo ivesia muni pura-pura tupu ngata Yerusalem. ⁴ Jadi nipasiromu Magau Herodes puramo balengga-balengga ntopanggeni pesomba bo guru-guru agama bo nipekutanana, “Ri umba ngata rapompoanaka Magau Topepakasalama anu nijanji nu Alatala?”

⁵ Nesana ira, “Ri ngata Betlehem ri bagia Yudea, sabana naria tesa nTupu nitulisi nu nabi nggaulu ivei:

⁶ ‘Iko, ngata Betlehem ri bagia Yudea,

Nau ngata kodi, iko ngata nelabi nopoko ri panggita nu pakeni ntoYudea.

Sabana lako nte iko kana meumba saito pakeni anu moevu todeaku toIsrael.’”

Mikha 5:2

⁷ Naupu haitu Magau Herodes nompokio tona lako ri mpandakena haitu mosintomu nggalino ante ia, bo nipekutanana pakabelo-belo tempo peonga betue nipeintara haitu. ⁸ Naupu haitu nitudunamo ira hau ri ngata Betlehem. Niulikana ira, “Koimo komiu hau ri ngata haitu bo elo pakabelo-belo ngana haitu. Bo ane

† Yesus: batuana “Alatala Nompakasalama”. †† randaa: batuana, randaa anu dopa nosampaturu nte langgai.

rakavamiu ia, uli ka yaku, ala yaku muni hau mombasomba Ia.”

⁹ Naupupa nangepe tesa magau haitu, nalaimo ira. Bo betue nipeintara ri mpandakena nokolu ka ira sampe nenonto ri toto nu banua niponturo nu ngana kodi haitu. ¹⁰ Tempo nikitara betue haitu, nadamba mpuumo rarara. ¹¹ Bo nesuamo ira riaru nu banua bo nikitara ngana kodi haitu ante tinana i Maria. Bo nantaputumo ira nombasomba Ia. Naupu haitu nibukaramo peti pomboli kakalumanara, bo nidekeira ka Ia pedekei-pedekeira, haitumo bulava, bo rongaya lana dupa nasuli mpuu alina, haitumo kemenyan bo mur.

¹² Naupu haitu, Alatala nompopainga ira riaru pangipira, ala nee manjili hau nte Magau Herodes. Jadi nalaimo ira hau manjili ri ngatara mboto nangoseaka dala ntanina.

I Yusuf bo i Maria nalai nanggeni i Yesus hau ri tana Mesir

¹³ Nalaipa tona lako ri mpandakena, nakavamo saito malaeka nTupu riaru pangipi i Yusuf bo nanguli, “Pembangumo, kenimo ngana ntali tina haitu masalisa hau ri tana Mesir, sabana Magau Herodes mangelo ngana haitu rapatesina. Ponturomo hamai sampe yaku makava vai nte iko.”

¹⁴ Jadi nembangumo i Yusuf bo bongi haitu nikenina ngana ntali tina nalai hau ri tana Mesir. ¹⁵ Bo ira nonturo hamai sampe namate Magau Herodes. Ivesiamo kadupana tesa nTupu nipasimbayu nu nabi nggaulu ivei: “Yaku nompokio anaKu mesuvu lako ri tana Mesir.” †

Pompatesi ngana-ngana ri ngata Betlehem

¹⁶ Nisani Magau Herodespa ia niakalani ntopande nanggita betue haitu, nagigi mpuumo rarana. Bo nituduna tantarana hau mompatesi pura-pura ngana langgai noumuru rompae bo anu dopa nagana rompae ri ngata Betlehem bo ri ngata-ngata ri sinjorina. Umuru nu ngana nipatesi nangoseaka kasaena peonga betue nipeinta ntopande nanggita betue pangane. ¹⁷ Ante kajadia haitu nadupamo tesa nTupu nipasimbayu Nabi Yeremia nggaulu ivei:

¹⁸ “Ri ngata Rama †† niepe suara ntopotumangi nabuku mpuu rarana.

Haitumo i Rahel nantangisi ana-anana.

Ledo nadota ia rapakavoe rarana sabana anana domo naria.”

Yeremia 31:15

† Hosea 11:1 †† Ngata Rama napara ngata Betlehem.

I Yusuf bo i Maria nanggeni i Yesus manjili hau ri ngata Nazaret

¹⁹ Naliu Magau Herodes namate, i Yusuf da nonturo ri Mesir. Nakavamo saito malaeka nTupu riaru pangipina ²⁰ nanguli, “Pembangumo! Kenimo ngana ntali tina haitu hau manjili ri tana Israel, sabana namatemo tona madota mompatesi Ia.”

²¹ Jadi nembangumo i Yusuf bo nikeninamo i Maria ntali ana manjili hau ri tana Israel. ²² Tapi niepenapa i Arkelaus, ana Magau Herodes nanjambei tuamana nompamenta bagia Yudea, naekamo rarana mapola. Alatala notesa vai ka ia riaru pangipina, jadipa napolamo ira hau ri bagia Galilea. ²³ Bo nonturomo ira ri ngata nosanga Nazaret. Ivesiamo kadupana tesa nTupu nipasimbayu nabi-nabi nggaulu ivei: “Ia rauli ntona toNazaret.”

Pamulana pokarajaa i Yesus (3:1-4:11)

Tesa i Yohanes Topediu

Lukas 3:1-20; Markus 1:1-8; Yohanes 1:19-28

3 Bara sakuya mpae kaliuna haitu, nompamulamo i Yohanes Topediu nompatuduki ri karava bai ri bagia Yudea. ² Niulina, “Kajeamo lako ri dosamiu sabana naparamo tempona Alatala mompamula mompamenta mpo Magau!” ³ I Yohanes hitumo niuli Nabi Yesaya riaru Buku Gasa ivei:

“Naria tona nongare-ngare ri karava bai ivei:

Pakasadiamo dala ka Tupu! Pakanoa dala raoseNa!”

Yesaya 40:3

⁴ I Yohanes haitu nopakea baju nitanu lako ri bulu unta. Ia nosulepe kulimba bo kandeanu nggaboro bo manisa. ⁵ Nadeamo tona nakava nte ia lako ri ngata Yerusalem bo njumangu bagia Yudea bo pura-pura bagia napara Binangga Yordan. ⁶ Ira nompangaku dosara bo ira nidiuna ri Binangga Yordan tanda najeamo lako ri dosara. ⁷ Nadea toFarisi bo toSaduki nakava mekidu nte i Yohanes. Tapi tempo i Yohanes nanggita ira, nanguli ia, “Komio noakala nasimbayu eva ule! Nisarumakamiu ane komio radiu, komio ledo rapambela pehuku nu Alatala bara maipia! Tapi ledo nakana! ⁸ Ane mpuu-mpuu komio najea lako ri dosamiu, popakitamo ante pokainggu nabelo. ⁹ Nee rapekirimiu, ‘Kami hii muli i Abraham. Pehuku nu Alatala ledo rapambela ka kami.’ Haitu ledo muni nakana! Kuuli ka komio, ane Alatala madota, nau vatuvatu hitu mamala rapajadiNa muli i Abraham. ¹⁰ Pehuku nu Alatala nasimbayu eva baliu, nasadiamo rapotovo kayu sampe ri kalena ane ledo naria vuana nabelo. Kayu ledo nabelo vuana ratovosi bo ratedaka ri mata nu apu.

¹¹ Yaku mombadiu komiu ante uve, tandana najeamo komiu lako ri dosamiau. Tapi da nariapa saito ngena tona meonga nelabipa kakuasaNa pade yaku. Naogepa Ia pade yaku sampe nau manggeni sapatuNa ledo masipato yaku. † Ia mombadiu komiu ante Nosa Gasa nu Alatala bo apu. ††¹² Ia nasimbayu eva tona no-varo pae. Nasadiamo Ia ante tapi ri paleNa bo ravarona paeNa sampe magasa. Pae naisi raboliNa riarara gampiriNa, tapi meena rapalabusiNa riarara apu anu ledo mapaya-paya.”

I Yesus nidiu i Yohanes

Lukas 3:21-22; Markus 1:9-11; Yohanes 1:29-34

¹³ Tempo haitu nakavamo i Yesus lako ri bagia Galilea hau ri Binangga Yordan ala radiu i Yohanes. ¹⁴ Tapi i Yohanes madota mompoara perapiNa haitu. Niulina, “Kakanana yakumo anu masipato radiuMiu. Berimba sampe Komiu makava mekidu nte yaku?”

¹⁵ Tapi nangulimo i Yesus ka ia, “Diumo Yaku, sabana ivesiamo kita mompakadupa pura-pura anu nipodota nu Alatala.” Nangepe pesanaNa haitu, nadota mpu-umo i Yohanes nombadiu i Yesus. ¹⁶ Naupu nidiu, nesoremo i Yesus lako ri uve. Bo eva nisuka tempona haitu muni langi natebuka bo nikitaNa Nosa Gasa nu Alatala nolenje mpo tonji banggebodo nanau bo netuu nte Ia. ¹⁷ Bo naria suara lako ri suruga nanguli, “Hitumo AnaKu nipotoveKu. Iamo nompakadamba raraKu.”

I Yesus nipesori Magau nu Seta ri karava bai

Markus 1:12-13; Lukas 4:1-13

4 ¹¹ Naupu haitu i Yesus niken Nosa Gasa nu Alatala hau nantende ri karava bai ala rapesori Magau nu Seta. ² Hamai patapulu eo bo patapulu mbongi i Yesus nopuasa. Naupu haitu naara mpuumo taiNa. ³ Bo nakavamo Magau nu Seta nanggaparai Ia bo nanguli, “Ane Komiu Ana nu Alatala, tudumo vatu-vatu hitu majadi kandeal!”

⁴ Tapi nesana i Yesus, “Naria nitulisi riarara Buku Gasa ivesi: ‘Ledo aga kandeal mompakatuvu manusia. Tapi pangoseakara pura-pura tesa nisovadaka nu Alatala, haitumo mompakatuvu manusia.’”[‡]

⁵ Naupu haitu i Yesus niken nu Magau Setamo hau ri ngata Yerusalem, ngata nagasa[‡], bo nituuna ri vumbu Banua nu Alatala. ⁶ Bo niulina ka i Yesus, “Ane Komiu mpuu Ana nu Alatala, potingganavumo Komiu lako rahitu hau ri tana. Ledo makuya Komiu sabana riarara Buku Gasa nitulisi ivesi:

† Bago nu batua mombavole sapatu madikana. †† Mombadiu ante apu: apu haitu nirapaka apu pehuku nu Alatala, atau kuasa Nosa Gasa anu nompegasa kita ala domo movia dosa. ‡ Ulangan 8:3 †† Yerusalem, ngata nagasa. Niuli nagasa apa ri sia naria Banua nu Alatala.

‘Alatala mombatudu malaekana mombasaliku Komiu. Ratandera mpale Komiu ala nau kadaMiu ledo mam-bela vatu.’”

Mazmur 91:11-12

⁷ Nesana i Yesus, “Naria muni nitulisi riarara Buku Gasa ivesi: ‘Nee mupesori Alatala, Tupumu!’”[‡]

⁸ Naupu haitu, Magau nu Seta nanggeni i Yesus hau ri tutu nu bulu nelabi kalangana. Bo nipopakitana ka Ia pura-pura kamagaua bo poparenta naria riarara dunia hitu ante mpengaya-ngaya kagayana bo kakalumanana. ⁹ Bo niulina ka Ia, “Pura-pura haitu kudekei ka Komiu ane Komiu mantaputu mombasomba yaku.”

¹⁰ Tapi nesanamo i Yesus ka ia, “He, Magau nu Seta! Palaimo iko lako ri sii. Sabana nitulisi riarara Buku Gasa ivesi: ‘Komiu kana mombasomba Alatala, Tupumiu. Aga Iamo masipato rapetupumiu.’”^{‡‡}

¹¹ Naliu haitu, nalaimo Magau nu Seta lako nte i Yesus, bo nakavamo malaekana-malaekana nTupu mom-patala Ia.

Pokarajaa i Yesus ri bagia Galilea (4:12-14:12)

I Yesus nompamula pokarajaaNa ri bagia Galilea

Markus 1:14-15; Lukas 4:14-15

¹² Naupu sia i Yohanes Topedi nitarunggu. Niepe i Yesuspa karebana, nanjilimo Ia hau ri bagia Galilea.

¹³ Nakava ri bagia Galilea nolinjamo Ia lako ri ngata Nazaret hau nonturo ri ngata Kapernaum ri bivi Rano Galilea ri tana muli i Zebulon bo i Naftali. ¹⁴ NipoviaNa ivesia ala madupamo tesa nTupu nipasimbayu Nabi Yesaya nggaulu ivesi:

¹⁵ “Komiu toponturo ri tana muli i Zebulon bo i Naftali, ri dala hau ri rano ri sambote Binangga Yordan!

Komiu toponturo ri bagia Galilea^{‡‡}, ngata ntona ledo toYahudi!

¹⁶ Bara ipia komiu nonturo ri kalandana bo dosa, tapi sii-sii nikitamiumo reme nu Alatala.

Bara ipia komiu natuvu naeka ka kamatea, tapi sii-sii komiu nivanta nu rememo.”

Yesaya 9:1-2

¹⁷ Lako ri tempo haitu nompamulamo i Yesus nompatolele ka tona ivesi: “Kajeamo lako ri dosamiau, sabana naparamo tempona Alatala moparenta mpo Magau.”

‡‡ Ulangan 6:16 ‡‡‡ Ulangan 6:13 ‡‡‡ I Yesus nompamula pokarajaaNa ri bagia Galilea. Bagia Galilea haitumo tana nibagi ka muli i Zebulon bo i Naftali nggaulu. Ri tempo katuvu i Pue Yesus nadea tona ledo toYahudi nonturo hamai muni.

I Yesus nompelisi anaguruNa pamulana

Markus 1:16-20; Lukas 5:1-11

¹⁸ Naria sanggani i Yesus nolipa ri tinggi Rano Galilea. NikitaNa hamai randua tona ntali sampesuvu, haitumo i Simon, anu nidae i Petrus, ante tueina i Andreas. Tempo haitu ira nantendeaka jala mompemala bau ri rano haitu sabana ira topebau mami. ¹⁹ Nanguli i Yesus ka ira, "Kamaimo, oseakamo Yaku, bo Kapatuduki komiu mangelo tona ntanina majadi topan-goseaka Yaku." ²⁰ Nangepe haitu, kaliu-liu nipalaisiramo jalara ri sia bo hau nioseakaramo i Yesus.

²¹ Lako ri situ napolamo i Yesus sampe nikitaNa randuapa tona ntali sampesuvu, haitumo i Yakobus bo i Yohanes, ana-ana i Zebedeus. Tempo haitu ira nompakabelo jalara riar sakaya nosanggani ante tuamara i Zebedeus. I Yesus nompokio ira randua mangoseaka Ia. ²² Nangepe haitu, kaliu-liu nipalaisiramo sakayara ante tuamara bo hau nioseakaramo i Yesus.

I Yesus nompatuduki bo nompakabelo todea nadua

Lukas 6:17-19

²³ I Yesus hau nompebutu ngata ri bagia Galilea. Ri ngata-ngata haitu Ia nompatuduki tona ri banua-banua petupu ntoYahudi bo nipatoleleNa Kareba Belo, anu notesaki Poparenta nu Alatala. Bo nipakabeloNa tona nadua mpengaya-ngaya. ²⁴ Kareba povia i Yesus haitu natolele ri umba-umba bagia Siria, sampe tona nanggeni ka Ia pura-pura roara nambela dua mpen-gaya, tona nipesua nu seta, torompate bo tona nakoyo. Bo i Yesus nompakabelo ira pura-pura bo nipopalaiNa puramo seta. ²⁵ Nadea mpuu tona nantuntuni Ia. Naria tona lako ri bagia Galilea, bagia Sapulu Ngata †, ngata Yerusalem, bagia Yudea bo naria muni tona lako ri sambote Binangga Yordan.

Pepatuduki i Yesus ri bavo nu bulu (Pasal 5-7)**Nabelo mpuu tona anu nantuntuni dota nu Alatala**

Lukas 6:20-26

5 Tempo i Yesus nanggita todea haitu, nantendemo Ia hau ri bulu. Nonturopa Ia ri sia, nakavamo topangoseaka Ia. ² Pade nompamulamo Ia nompatuduki ira ivei:

³ "Nabelo mpuumo tona nisanina ledo rapakulena mompakasalama karon mboto bo aga nanjarumaka Tupu, sabana iamo najadi todea riar Poparenta nu Alatala.

⁴ Nabelo mpuumo tona nabuku rarana, sabana Alatala mompakavoe rarana.

⁵ Nabelo mpuumo tona naede rarana, sabana ia mantarima pura-pura anu nijanji nu Alatala ka todeaNa.

† Sapulu Ngata riar basa Yunani "Dekapolis".

⁶ Nabelo mpuumo tona naino rarana matuvu manoa ri panggita nu Alatala, sabana Alatala mbotomo mompopapakule ia matuvu manoa.

⁷ Nabelo mpuumo tona naasi matana nanggita roana, sabana iamo rapoasi nu Alatala.

⁸ Nabelo mpuumo tona nagasa bo naliangu rarana, sabana iamo manggita Alatala.

⁹ Nabelo mpuumo tona nompoposinggabelo roa, sabana iamo rauli nu Alatala anaNa.

¹⁰ Nabelo mpuumo tona nipandasa sabana novia anu nanao ri panggita nu Alatala. Iamo majadi todea riar Poparenta nu Alatala.

¹¹ Nabelo mpuumo ane komiu rasalai atau rapandasa atau rarai ntona sabana komiu topangoseaka Yaku.

¹² Ivesia muni nipoviara ka nabi-nabi nggaulu. Jadi kadamba-dambamo raramiu ane tutu majadi nte komiu sabana naoge mpuu belo nipakasadia ka komiu ri suruga."

Topomparasaya i Yesus nipakasimbayu eva gara bo reme ri dunia hitu.

Markus 9:50; Lukas 11:33-36; 14:34-35

¹³ "Komiun nasimbayu eva gara ri dunia. Tapi ane gara mamolimo, domo mapaga mpanjili! Natantu gara haitu domo ria gunana, bo aga ratedaka bo rajeje-jeje ntona.

¹⁴ Komiun nasimbayu eva reme nombavanta dunia. Ngata ri bavo bulu ledo namala ratabuniaka. ¹⁵ Ivesia muni ante poindo. Ledo ria tona nombatunju poindo bo niloduna ntonda! Natantu poindo haitu rabolina ri kalangana, ala pura-pura tona riar banua ravanta nu remena. ¹⁶ Ivesia muni reme anu naria riar ntaimiu, nee ratabuniaka! Komiun kana matuvu ante pokainggu nabelo ala tona ntanina mamala manggita pokainggu haitu bo mantoiya Tuamamiu ri suruga."

Pepatuduki i Yesus nanguli Atura-atura agama Yahudi

¹⁷ "Nee rapekirimiu Yaku hii nakava mompakaropu Atura-atura agama nitulisi i Musa bo pepatuduki nu nabi-nabi. Yaku ledo nakava mompakaropuna tapi ala mompopakita kadupana. ††¹⁸ Pariaramo tesaKu hitu! Ane da maria langi bo tana, ledo ria malipo sambelaa lako ri Atura-atura haitu, nau sangu hurupu atau santi-ti ledo ntoto. Kana madupa puramo. ¹⁹ Jadi, isema-sema nombaliunaka nau aga sambela lako ri parenta riar Atura-atura haitu, nau parenta anu nakodi ntoto, bo mompatuduki tona ntanina nombaliunaka muni, ia rareke tona nelabipa kakodina riar Poparenta nu Alatala. Tapi isema-sema nangoseaka Atura-atura haitu bo nipatudukina ka tona ntanina mangoseakana muni, iamo rareke tona nelabi kaogena riar

†† Yaku ledo nakava mompakaropuna tapi ala mompopakita kadupana ATAU: Yaku nakava ala mompatuduki ka komiu batuana kakanana anu nitulisi bara ipia.

Poparenta nu Alatala. ²⁰ Pariaramo tesaKu hitu! Komiu kana matutupa nangoseaka dota nTupu pade guru-guru agama bo toFarisi. Ane ledo, komiu ledo ntoto mamala majadi todea riaru Poparenta nu Alatala.”

Nee marau rara

Lukas 12:57-59

²¹ “Natantu niepemiumpo pepatuduki ntotuata nggaulu ivei: ‘Nee mepatesi! Isema-sema mepatesi masipato ratangara.’ ^{†22} Tapi Kuuli ka komiu, isema-sema narau rarana nte sampesuvuna masipato ratangara. Bo isema-sema nanjalai sampesuvuna masipato raposintingayo ri Polibu Mbaso Agama. Tapi isema-sema manguli ka sampesuvuna, ‘Kanavumo ri narakaa iko!’ ia haitumo masipato ratedaka riaru apu narakaa.

²³ Sabana haitu, ane rapana komiu hau ri lanta pesomba manggeni pesombamiu ka Alatala, bo ratoramiu naria sampesuvumi nua dua rarana nte komiu, ²⁴ boli ntanimo ruru pesombamiu haitu ri ngayo lanta pesomba, bo koimo mosinggabelo ante sampesuvumi. Maupu haitu pade manjili komiu mombadekei pesombamiu ka Alatala.

²⁵ Ane maria tona mompangadu komiu, masalisa mosinggabelo mpanjili ante ia dopame komiu makava ri ngayo ntopotangara. Sabana, ane komiu ledo mosinggabelo ante ia, natantumo ia mompangadu komiu nte topotangara, bo topotangara haitu mombadekei komiu ka polisi, bo polisi mombasuaraka komiu riaru ntarunggu. ²⁶ Pariaramo tesaKu hitu! Natantumo komiu ledo rasuvuraka lako riaru ntarunggu haitu ane dopa nibayarimiu pura vayamiu.”

Pasimbukumo ala nee mogau sala

²⁷ “Natantu niepemiumpo pepatuduki ntotuata nggaulu ivei: ‘Nee mobualo.’ ^{††28} Tapi Kuuli ka komiu, isema-sema mombalele mata manggita mombine bo madota mompogau ia, natantu tona haitu nireke nombabualoni mombine haitu riaru pekirina. ²⁹ Ane mata ngganamu manggeni iko movia dosa, suimo bo tedakamo matamu haitu. Aginapa sangu sipa nu karomu malipo pade njumangu karomu ranavusaka riaru narakaa. ³⁰ Bo ane pale ngganamu manggeni iko movia dosa, tampasimo bo tedakamo palem haitu. Aginapa sangu sipa nu karomu malipo pade njumangu karomu ranavusaka riaru narakaa.”

Pepatuduki i Yesus ane topoberei mogaa

Markus 10:11-12; Lukas 16:18

³¹ “Naria muni pepatuduki nggaulu nanguli ivei: ‘Isema-sema madota mompogaaka bereina mombine, ia kana mombadekei ka bereina sura kaupu poberei.’

^{‡32} Tapi Kuuli ka komiu, ane komiu mompogaaka

† Pesuvu 20:13; Ulangan 5:17 †† Pesuvu 20:14; Ulangan 5:18

bereimiu mombine, tano ledo ria ia nosipogau nte langgai ntanina, batuana komiu nompobualo ia. Bo isema-sema mompoberei mombine nipogaaka haitu, ia muni nobualo.”

Nee mosumpa

³³ “Niepemiumpo pepatuduki ntotuata nggaulu ivei: ‘Nee mombaleva janjimi. Anu nijanjimi nte nosumpa ri ngayo nu Alatala, kana rapoviamiu.’ ^{‡34} Tapi Kuuli ka komiu, nemo ntoto mosumpa ante manguli langi, sabana langi gadera nu Alatala. ³⁵ Nee mosumpa ante manguli dunia, sabana dunia hitu polampi kada nu Alatala. Nee mosumpa ante manguli Yerusalem, sabana Yerusalem ngata nu Magau anu nambaso kuasaNa. ³⁶ Bo nee mosumpa ante manguli vuvumi mboto, sabana ledo rapakulemiu mombabaliki nau sambesa buluamiu majadi mabula bara mavuri. ³⁷ Tapi ane patujumi iyo, ulimo iyo, bo ane patujumi ledo, ulimo ledo. Ledo nabelo mompakaroso tesa ante mosumpa sabana pokainggu eva haitu nopuna lako ri Magau nu Seta.”

Nee rabalasi kadaa

Lukas 6:29-30

³⁸ “Niepemiumpo pepatuduki ntotuata nggaulu ivei: ‘Mata rasambe mata, ngisi rasambe ngisi.’ ^{‡39} Tapi Kuuli ka komiu, nee rapesavamiu. Ane maria tona mombasapa kalimpi ngganamiu, dekei muni sabingga kalimpi njidimiu rasapana. ⁴⁰ Bo ane maria tona manggeni komiu ri ngayo ntopotangara sabana madota mangala buyamiu, dekei ka ia muni bajumi. ⁴¹ Ane maria tona mompasuu komiu manggala mbara-mbarana sangu kilo kakavaona, kalamo mbara-mbara haitu rokilo kakavaona. ⁴² Dekeimo ka tona nerapi nte komiu, bo nee mompoara tona makava manginda anumi.”

Potovemo balimu

Lukas 6:27-28, 32-36

⁴³ “Niepemiumpo pepatuduki nggaulu nanguli ivei: ‘Potovemo roami bo povuu matamo balimiu.’ ^{‡†44} Tapi Kuuli ka komiu, potovemo balimiu bo posambayaka tona nompandasa komiu. ⁴⁵ Ane komiu mokainggu ivehaitu, komiu majadi ana-ana nu Alatala, Tuamamiu ri suruga. Apa nipotoveNa pura-pura tona bo nipobondana mata nu eo ka tona nadaa bo ka tona nabelo. Bo nidekeiNa uda ka tona nanao bo ka tona natenggo muni. ⁴⁶ Ane komiu aga mompotove tona nompotove komiu, natantumo komiu ledo masipato ratoiya nu Alatala. Apa nau topesingara balasitee nadaa ingguna, nompotove tona anu nompotove ira.

‡ Ulangan 24:1-4 †† Imamat 19:12; Bilangan 30:2 ‡‡ Pesuvu 21:24; Imamat 24:20; Ulangan 19:21 ††† Imamat 19:18

⁴⁷ Bo ane komiu aga nabelo nte roamiu mboto, natan-tumo pokainggumiu haitu ledo mbeki ratoiya. Nau tona ledo nosisani nte Alatala nabelo nte roara mboto!
⁴⁸ Jadi komiu kana mokainggu mabelo ante mpuum-puu raramiu, nasimbayu eva pokainggu nu Alatala, Tuamata ri suruga.”

Ane mombadekei petulungi ka tona, nee rasarumaka petoiya

6 “Toramo, ane komiu movia ada-ada nu agama, nemo rapopakita ri ngayo ntodea. Apa ane ivesia pokainggumiu, komiu ledo ntoto manggava belo lako nte Alatala, Tuamamiu ri suruga. ² Rapana ane komiu mombadekei petulungi ka tona napakasi, nee rapatolele poviamiu haitu eva povia ntona anu aga nabelo ri sumba. Ira nombadekei ka tona napakasi ri ngayo ntodea riaru banua-banua petupu bo ri dala riaru ngata ala rakita bo ratoiya ntona. Pariaramo tesaKu hitu! Petoiya ntona haitumo tambo nitarimara. Domo ria ntanina. ³⁻⁴ Tapi ane komiu mombadekei petulungi ka tona napakasi, dekei nggalinomo, nee rapatolele poviamiu haitu. Bo Alatala, Tuamamiu ri suruga, manggita poviamiu nggalino haitu bo Ia mombadekei tambo ka komiu.”

Pokainggu masipato ane mosambaya

Lukas 11:2-4

⁵ “Ane komiu mosambaya, nee moinggu eva tona aga nabelo ri sumba. Nipokonora neangga mosambaya riaru banua-banua petupu bo ri tatanga nu dala ala rakita ntodea. Pariaramo tesaKu hitu! Nitari-maramo petoiya ntona bo haitumo tambo nu posambayara. Domo ria ntanina. ⁶ Tapi ane komiu mosambaya, pesuamo riaru ntombimiu, upimo vamba, bo posambayamo ka Alatala, Tuamamiu anu ledo nikita. Bo Alatala anu nanggita poviamiu nggalino haitu, mombadekei tambo ka komiu.

⁷ Bo ane komiu mosambaya, nee mompakandoe posambayamiu bo mombasili-sili tesa eva kabiasa ntona ledo nosisani nte Alatala. Nisarumakara ane posambayara mandoe, Alatala kana mompetalingai ira. ⁸ Nee mompasiara pokainggura haitu! Apa nisani nu Alatala mamimo nuapa niparaluumiu dopame komiu merapi lako nte Ia. ⁹ Jadi posambaya ivei: Alatala, Tuama kami ri suruga, Aga komiu masipato rapetupu bo rapakaoge. Komiumo Magau kami. ¹⁰ Perapi komiu momparenta ri dunia hitu, bo dotaMiu majadi raturusi ntona ri dunia nasimbayu eva ri suruga.

¹¹ Dekei ka kami kandeana niparaluu kami eo hitu.

¹² Bo ampungi sala kami, nasimbayu eva kami muni nombaampungi tona novia sala nte kami.

¹³ Nee rapalamba kami rapesori bo kabasakamo kami lako ri kuasa Magau nu Seta. [Sabana Komiumo Magau nakuasa bo nipokumaaka sampe ri kasae-saena. Amin.]

¹⁴ Ane komiu mombaampungi tona novia sala nte komiu, Alatala Tuamamiu ri suruga, muni mombaampungi komiu. ¹⁵ Tapi ane komiu ledo mombaampungi tona novia sala nte komiu, Alatala Tuamamiu ri suruga, ledo muni mombaampungi salamiu.”

Pokainggu anu masipato ane mopusasa

¹⁶ “Ane komiu mopusasa nee molenje naburu eva kabiasa ntona aga nabelo ri sumba. Nitunggaira nompakaburu lenjera ala rasani ntodea ira nopuasa. Pariaramo tesaKu hitu! Nikavaramo pura-pura tambo nu puasara haitu. Domo ria ntanina. ¹⁷ Tapi ane komiu mopusasa, pendoumo bo salagamo buluamiu ¹⁸ ala ledo rasani ntona ntanina komiu nopuasa. Aga Alatala, TuamaMiu ri suruga, anu ledo nikita, mangisanina. RakitaNa poviamiu anu ledo nisani ntona ntanina haitu bo radekeiNa tambo ka komiu.”

Pokainggu masipato ante kakalumana

Lukas 12:33-34; 11:34-36; 12:22-34

¹⁹ “Nee mompasiromu kakalumana dunia ka karomiu mboto. Apa kakalumana dunia namala rakande nu ane atau tagara, bo rapangangga ntona. ²⁰ Agina mompasiromu kakalumana ri suruga apa hamai kakalumana ledo rakande nu ane atau tagara, bo ledo rapangangga ntona. ²¹ Nee mompasiromu kakalumana ri dunia, apa ri umba kakalumanamiu, ri sia muni pekirimiu.

²² Mata nirapaka poindo nu karo. Ane matata nabelo, tantu nalanto pekitata. ²³ Tapi ane navurau matata, ledo nalanto nikitata nuapa-nuapa. Ivesia muni pekiri rara ntaita. Alatala nompakareme rara ntaita, jadi ane reme nidekei nu Alatala ka kita majadi malanda, malanda mpuumo kalandana haitu! †

²⁴ Ledo rapakule ntona saito matundu nte madika randua. Apa saito raportovena bo saitopa ledo rapeilina. Saito raoseakana parentana bo saitopa rapoarana. Ivesia muni ante komiu. Ane komiu mompotove mbara-mbara ri dunia hitu, ledo rapakulemiu mpuum-puu mangoseaka dota nu Alatala.”

Nee makini rara mompekirika katuvumiu ri dunia

Lukas 12:22-34; 16:13

²⁵ “Haitu sampe Kuuli ka komiu, nee makini raramiu mompekirika katuvumiu, bara nuapa rakandemiu atau rainumiu. Nee makini mompekirika baju nuapa rapa-

† *Basa Yunani: Mata poindo nu karo. Ane mata mabelo, mareme njumanggaro. Tapi ane ledo nabelo mata, malanda njumangu karo. Jadi ane reme anu naria rara ntaimiu malanda, nalanda mpuumo kalandana haitu!*

suamiu. Apa katuvuta nopokopa pade kande bo karota nopokopa pade pakea. ²⁶ Peintamo tonji-tonji ri laerava! Ira ledo notuda pae, ledo nokato bo ledo muni nomboli pae riaru gampiri. Tapi naupa ivesia, Alatala, Tuamamiu ri suruga, nombadekei kande ka ira. Nemopa komiu! NipotoveNapa komiu pade tonji-tonji. ²⁷ Nuapa gunana makini raramiu? Nau damo makini njuu raramiu, ledo ria saitoa komiu mompakule mantambai umurumiu, nau aga sambongi.

²⁸ Bo nuapa gunana makini raramiu mompekirika baju? Pekirimo sese nu bunga ranggavoko. Bunga haitu natuvu nau ledo nokarajaa atau nantanu. ²⁹ Tapi naupa ivesia, Kuuli ka komiu, Magau Salomo anu nakalumana mpuu ledo ria pakeana nagaya eva sese nu bunga haitu! ³⁰ Jadi ane Alatala nompakagaya bunga-bunga ranggavoko anu aga natuvu sampalai bo maile rapalabusi, nemopa komiu! Natantu Ia mombadekei ka komiu pakea niparaluumiu. Nakura mpuu pomparasayamiu! ³¹ Nee makini raramiu bo manguli, 'Nuapa rakandeta, nuapa rainuta, bara pakea nuapa rapaketa?' ³² Haitu puramo nielo ntona anu ledo nosisani ante Alatala. Tapi ledo paraluu makini raramiu sabana pura-pura anu niparaluumiu haitu nisani nu Alatala, Tuamamiu ri suruga. ³³ Jadi pasimbuku ntanimoruru ala Alatala momparenta riaru katuvumiu bo oseakamo dotaNa, bo pura-pura ntanina haitu radekeiNa muni ka komiu.

³⁴ Jadi nee masesa raramiu nompekirika bara nuapa majadi maile, sabana maile maria kasusana mboto. Naganamo kasusa eo hitu rapekirita *nee ratambai anu majadi maile!*

Nee mompakasala tona ntanina

Lukas 6:37-38; 41-42

7 "Nee mompakasala tona ntanina ala komiu ledo rapakasala nu Alatala. ² Apa komiu ratangara nu Alatala nangoseaka kabiasamiu mboto mombatangara tona ntanina. Posuka nipakemiu mosuka ka tona ntanina, haitu muni rapake nu Alatala mosuka ka komiu. ³ Nakuya komiu namala manggita dosa roamiu nakodi eva garupu ri matana, tapi dosamiu mboto nambaso eva baloti ri matamiu mboto ledo nikitamiu? ⁴ Berimba komiu manguli ka roamiu, 'Mai, kulelaka garupu ri matamiu,' iyapa ri matamiu mboto naria baloti! ⁵ Komiu aga tobelo ri sumba! Lelaka ntani ruru baloti lako ri matamiu mboto ala matamiu malanto mekita bo komiu mamala mombalelaka garupu ri mata nu roa."

I Yesus nombatagi ira nompatolele pepatuduki lako nte Alatala ka tona aga nompoarana

⁶ Naupu haitu, nanguli i Yesus, "Nee radekei ka asu anu nagasa mbelaka asu aga megoli mombalopo

komiu! Bo nee radekei mutiara ka bavu, apa bavu aga mombajeje bayangi mutiara haitu."

Perapi nte Alatala

Lukas 11:9-13

⁷ "Perapimo nte Alatala bo radekeiNa ka komiu. Elo-mo bo rakavamiu. Tanedemo vamba bo vamba raunggeNa ka komiu. ⁸ Apa isema-sema merapi, kana radekei ka ia. Isema-sema mompaelo kana rakavana. Bo isema-sema mantanede vamba, kana raungge ka ia.

⁹ Natantu ledo ria saitoa komiu mombadekei vatu ka anamiu ane roti raperapina! ¹⁰ Bara ane anamiu merapi bau ntasi, natantu ledo ule radekeimiu. ¹¹ Nau komiu tona nadosa, nisanimiu nombadekei anu nabelo ka anamiu. Nemopa Alatala, Tuamamiu ri suruga! Natantu Ia muni mombadekei anu nabelo ka isema-sema merapi nte Ia."

Dala nakana

Lukas 13:24

¹² "Jadi nuapa-nuapa rapodotamiu rapovia ntona ka komiu, ivesia muni rapoviamiu ka tona. Sabana parenta haitumo isi nu Atura agama bo pepatuduki nu nabi-nabi nggaulu.

¹³ Pesuamo ri bobaa napii, sabana naluo bobaa bo nabelo dala hau ri narakaa, bo nadea muni tona nangosena. ¹⁴ Tapi napiimo vamba bo nakaja dala manggava katuvua nabelo bo ledo nadea tona nangosena."

Nabi-nabi mpodava nalanto rasani lako ri pokainggura

Lukas 6:43-44; 13:25-27

¹⁵ "Komiu kana mainga nte tona nanguli karora nabi tano aga nodava. Ira nakava nte komiu netibelo rara eva bimba nanondo, tano rara ntaira nadaa mpuu eva asulaku nasoa. ¹⁶ Rasanimiu ira lako ri pokainggura. Vua anggur ledo nipupu lako ri lemo ntasi bo vua ara ledo nipupu lako ri kavoko nggarui. ¹⁷ Ivesia muni kayu naboya novua nabelo, tapi kayu nangguru ledo novua nabelo. ¹⁸ Ledo ria kayu nabelo novua nadaa. Bo ledo muni naria kayu nangguru novua nabelo. ¹⁹ Pura-pura kayu ledo nabelo vuana kana ratovo bo ratedeaka riaru apu. ²⁰ Jadi ivesia muni ante nabi-nabi mpodava. Lako ri pokainggura rasanimumo isema ira.

²¹ Ledo pura-pura tona nanguli Yaku Tupura majadi todea riaru Poparenta nu Alatala. Aga tona anu novia dota nu Alatala, TuamaKu ri suruga, masipato mesua riarana. ²² Ri Eo Potangara bara maipia madea tona manguli ka Yaku, 'Pue, Pue! Kami nompasimbayu tesaMiu ka tona ntanina ante kuasaMiu bo ante kuasaMiu muni kami nompopalai seta-seta lako nte tona. Bo nadeamo kabaraka nipovia kami nte kuasaMiu!'

²³ Tapi Kupesanaka ira, 'Ledo nisaniKu komiu! Palaimo lako ri sii, komiu topokainggu nadaa!' "

Porapa topande bo todayo novia banua

Lukas 6:47-49

²⁴ "Jadi isema-sema mangepe tesaKu bo mangoseakana, ia nasimbayu ante topande novia banuana ri bavo vatu. ²⁵ Nauda romba bo nakava lono ante poiri nombaburu banua haitu, tapi banua haitu ledo nagero sabana nipovia ri bavo vatu.

²⁶ Tapi isema-sema mangepe tesaKu bo ledo nioseakana, ia nadoyo nasimbayu eva tona novia banuana ri bavo bone. ²⁷ Naromba uda, bo nalono, bo poiri narimboso nombaburu banua haitu sampe banua haitu naombo bo narupusaka."

²⁸ Naupu i Yesus nompatuduki haitu pura-pura ka todea, nokumaa mpuumo ira nangepena. ²⁹ Apa Ia ledo nompaguru eva guru-guru agama. Ia nompatuduki eva tona mpuu-mpuu nakuasa.

Kabaraka-kabaraka nipovia i Yesus mompopakita kuasaNa (8:1-9:34)

I Yesus nompakabelo saito tona nadua oge

Markus 1:40-45; Lukas 5:12-16

8 Notuamo i Yesus lako ri bulu, nadea mpuu tona nantuntuni Ia. ² Tempo haitu nakavamo saito tona nadua oge nantaputu ri ngayo i Yesus, bo nanguli, "Pue, ane madota Komiu, Komiu nompakule mompakabelo yaku."

³ Nangepe haitu, i Yesus nombadika paleNa ri karo ntona haitu bo nanguli, "Madota Yaku. Mabelomo iko!" Kaliu-liu nabelomo tona haitu. ⁴ Bo nanguli i Yesus ka ia, "Nee mutesa ka tona anu najadi ri karomu. Tapi koimo hau nte topanggeni pesomba bo popakitamo karomu ka ia ala rakitana nabelomo karomu. Bo dekeimo pesombamu ka Alatala, nangoseaka parenta Nabi Musa ala mompopakita ka todea iko mpuu-mpuu nabelomo."

I Yesus nompakabelo dua nu batua nu balengga ntantara

Lukas 7:1-10

⁵ Tempo i Yesus nesua ri ngata Kapernaum nakavamo saito balengga ntantara nte Ia. Ia nerapi mpuu-mpuu nte i Yesus, ⁶ "Tua, batuaku nadua ntamo ria ri banuaku. Ia aga naturu ria, ledo nipakulena nembanggu, bo nandasa mpuu nirasaina."

⁷ Nanguli i Yesus ka ia, "Tuou Yaku mompakabelo ia."

⁸ Tapi nesana balengga ntantara haitu, "Tua, yaku hii ledo masipato mantarima Komiu riara banuaku. Nau aga rauliMiu sambela rombela, mabelomo batuaku.

⁹ Nisaniku ia mabelo sabana yaku muni natundu ri

parenta nu tuaku. Bo naria muni tantara-tantara natundu nte parentaku. Ane kuuli ka saito tantara, 'Koimo!' ia kana hau. Bo ane kuuli ka tantara ntanina, 'Katumai!' ia kana tumai. Bo ane kuuli ka batuaku, 'Povia haitu', kana rapoviana haitu."

¹⁰ Nangepe tesana haitu, nokumaamo i Yesus, bo niuliNa ka todea anu nantuntuni Ia, "Natantu mpuu pomparasaya ntona hitu! Nau todea toYahudi, muli Israel, dopa ria nikavaKu pomparasaya ntona naroso eva pomparasaya ntona hitu! ¹¹ Pariaramo! Tempo bara maipia madea tona ledo toYahudi majadi todea nu Alatala. Ira makava lako ri mpandakena bo mpanauna mosusa madamba-damba ri Poparenta nu Alatala singgani-nggani ante i Abraham, i Ishak bo i Yakub. ¹² Tapi toYahudi mboto anu masipato majadi todea riara Poparenta nu Alatala ledo mamala. Ira aga ratedaka ri kalandana makavao lako nte Alatala, bo hamai ira aga motumangi-mangi bo masinggiki baga ante kasusa rara."

¹³ Bo i Yesus nanguli ka balengga ntantara haitu, "Panjilimo. Mabelomo batuamu eva anu niparasayamu majadi." Bo eva nisuka, nabelomo batuana.

I Yesus nompakabelo matua i Petrus mombine

Markus 1:29-34; Lukas 4:38-41

¹⁴ Naupu sia i Yesus hau ri banua i Petrus. Hamai nikitaNa matua i Petrus mombine aga naturu sabana nakokora. ¹⁵ Jadi i Yesus nanggungisi pale nu mombine haitu bo kaliu-liu nabelomo ia. Naupu haitu nembangungo mombine haitu mombakadambanaka ira.

¹⁶ Nanggoviapa, nakavamo tona nte i Yesus, nanggeni roara anu nipesua seta. I Yesus nompopalai seta-seta haitu ante sambela tesa. Bo nipakabeloNa muni pura-pura tona nadua. ¹⁷ Haitu najadi ala madupa tesa nu Alatala anu nipasimbayu Nabi Yesaya nggaulu ivei:

"Iamo nomparikaro kasusata bo nompakabelo kita nadua."

Yesaya 53:4

Tona nadota majadi topangoseaka i Yesus

Lukas 9:57-62

¹⁸ Naria saeo nadea gaga tona nantagui i Yesus. Nanggita tona dea haitu, nanguli i Yesus ka anaguruNa, "Hau kita ri sambote rano." ¹⁹ Tempo haitu naria saito guru agama nakava nte i Yesus bo nanguli, "Guru, yaku madota mantuntuni Komiu. Nau damo ri umba rakalauMiu kuoseaka Komiu."

²⁰ Nesana i Yesus, "Asulaku naria bolona rapaturuna bo tonji naria jumuna, tapi Yaku, Ana nu Manusia, ledo ria ponturoKu natantu Kupaturu."

²¹ Naupu haitu nanguli saitopa topangoseaka Ia, "Pue, paloga ntanimo ruru yaku manjili nte tuamaku.

Mamate tuamaku pade tumai yaku mangoseaka Komiu."

²² Tapi nanguli i Yesus ka ia, "Oseakamo Yaku! Palambakamo tona namate mombatana tona namate. †"

I Yesus nompopenonto poiri narimboso bo balumba nambaso

Markus 4:35-41; Lukas 8:22-25

²³ Naliu haitu nesavi sakayamo i Yesus nosangganingani ante anaguruNa, bo haumo ira. ²⁴ Tempo ira nosakaya sampesani nakavamo poiri narimboso nompakambaso balumba ri rano. Sakidepa natala sakayara nitompe balumba mbaso. Tempo haitu i Yesus naluru namonjo. ²⁵ Hau anaguruNa nombalike Ia bo nanguli, "Pue, tulungimo! Mamatemo kita!"

²⁶ Nangulimo i Yesus ka ira, "Nakuya komiu naeka? Nakura mpuu pomparasayamiu!" Naupu haitu neangga Ia nombatudu poiri bo balumba mbaso metaa. Bo kaliu-liu netaa mpuumo poiri bo nalinomo uve.

²⁷ Nanggita kajadia haitu nokumaa puramo anaguruNa. Niulira, "Tonuapa hitu tano sampe nau poiri bo balumba nangoseaka parentaNa?"

I Yesus nompakabelo randua tona nipakagila nu seta

Markus 5:1-20; Lukas 8:26-39

²⁸ Naupu haitu nakavamo ira ri sambote rano ri bagia ntoGadara. Nakavapa ira hamai, nesuvumo randua tona lako ri podayo mosintomu ante i Yesus. Ira randua haitu nipesua seta-seta sampe nagila mpuu ira bo ledo ria tona nabia noliu ri sia. ²⁹ Nongare-ngaremo ira nanguli, "He, Ana nu Alatala! Nakuya tano Komiu tumai? RakuyaMiu kami? RapandasaMiumo kami nau dopa tempona?"

³⁰ Napara ri sia nadea bavu nangelo kandeara. ³¹ Jadi seta-seta nesua nte tona randua haitu nerapi nte i Yesus, "Ane Komiu mompopalai kami lako ri tona hitu, palambakamo kami mesua nte bavu-bavu gahaitu!"

³² Nangulimo i Yesus ka seta-seta gahaitu, "Koimo!" Jadi nesuvumo seta-seta lako ri tona randua bo nolinja nesua nte bavu. Eva nisuka, nipesua seta-seta, nangova puramo bavu haitu notingganavu lako ri tinggi bingge hau riana rano sampe namate nalodo riana nu uve.

³³ Sampanggita kajadia haitu, nangova nalaimo topojaga bavu hau riana ngata. Bo nitesara pura anu najadi nte bavura bo nte tona randua anu nipesua nu seta pangane. ³⁴ Nangepe haitu, hau puramo tupu ngata mosintomu nte i Yesus. Nakava nte i Yesus niperapira ante mpuu-mpuu rara ala Ia mompalaisi ngatara haitu.

† Palambamo tona namate mombatana tona namate Batuana: Palambamo tona ledo nomparasaya mombatana roara ledo nomparasaya.

I Yesus nompakabelo topunggu ala rasani ntopanggeni agama Yahudi Ia nakuasa nombaampunggi dosa

Markus 2:1-12; Lukas 5:17-26

⁹ Naupu haitu nesavi sakayamo i Yesus ante anaguruNa nanjili hau ri sambote rano, sampe nakava ri ngata niponturora. ² Hamai naria bara sako-ndua tona nombakova roara hau nte i Yesus. Roara haitu napunggu bo naturu ri ompa paturuna. Nanggita karoso nu pomparasayara, nangulimo i Yesus ka topunggu haitu, "AnaKu, pakaroso raramu. Dosamu niampungimo."

³ Bara sako-ndua guru agama hamai nompekiri riana ntaira, "Nadaa mpuu tona hitu! Ia nompakasimbayu karoNa ante Alatala, *apa aga Alatala namala nombaampunggi dosa!*"

⁴ Tapi nisani i Yesusmo pekirira. Haitu sampe niuliNa ka ira, "Nakuya rara ntaimiu nompekiri nadaa?"

⁵ Natantum ledo nakaja manguli 'Dosamu niampungimo.' Nakajapa manguli 'Peanggamo bo poli-pamo!' †⁶ Tapi Kupopakita ka komiu Yaku, Ana nu Manusia, nakuasa ri dunia hitu nombaampunggi dosa nu manusia." Jadi nituduNa topunggu haitu, "Peanggamo! Anggataka ompa paturumu bo panjilimo!"

⁷ Nangepe haitu neangga mpuumo topunggu haitu, bo nanjilimo ia ri banuana mboto.

⁸ Nanggita kajadia haitu naekamo rara ntodea ri sia. Bo nitoyara Alatala sabana nidekeiNa kuasa nambaso eva haitu ka manusia.

I Yesus nompokio i Matius majadi anaguruNa

Markus 2:13-17; Lukas 5:27-32

⁹ Naupu haitu nalaimo i Yesus lako ri sia. Nolipa-li-pamo Ia, nikitaNa saito topesingara balasitee nonturo riana kantoro ntopesingara balasitee. Sangana i Matius. Nanguli i Yesus ka ia, "Kaimo! Oseakamo Yaku!" Nangepe haitu neanggamo i Matius bo hau nangoseaka i Yesus.

¹⁰ Naupu haitu i Yesus ante anaguruNa hau nangande ri banua i Matius. Bo nadea topesingara balasitee bo tona ntanina anu nireke ntoYahudi tona nadosa ‡, nakava nangande nosangganingani ante ira.

¹¹ Sampanggita haitu, nangulimo bara sako-ndua to-Farisi ka anaguru i Yesus, "Nakuya gurumiu nangande nosangganingani ante topesingara balasitee bo tona nadosa?"

¹² Niepe i Yesus tesara haitu. Jadi niulikaNa, "Tona ledo nadua ledo nomparaluu pakuli nu dokutoro. Aga

†† Namura nanguli 'dosamu niampunggi' apa ledo rakita ntona bara majadi bara ledo. Tapi ane rauli 'Peanggamo bo polipamo!' rakita ntonamo bara majadi bara ledo. ‡ tona nadosa: tona ledo nangoseaka Atura-atura agama Yahudi niuli ntoYahudi tona nadosa.

tona nadua paraluu rapakulisi. ¹³ Koi pegurumo batua-na tesa nu Alatala anu nanguli ivei:

'Nipokonokupa maasi matamiau manggita roamiu pade manggeni binata-binata rapesomba ka Yaku.'

Hosea 6:6

Yaku nakava ri dunia ledo mompokio tona anu nanguli karora nanao, [†] tapi mompokio tona nadosa majea lako ri dosara."

Anaguru nompekutana popuasa

Markus 2:18-22; Lukas 5:33-39

¹⁴ Naupu sia, bara sako-ndua topangoseaka i Yohanes Topediu nakava nte i Yesus. Nekutanamo ira, "Kami bo toFarisi nasaro nopuasa *nangoseaka ada-ada agamata*. Nuapa sabana anaguruMiu ledo nopuasa?"

¹⁵ Nesanamo i Yesus ka ira, "Ledo masipato torata ri posusa poboti masusa rara bo mopuasa tempo boti langgai da mosangganani ante ira. Tapi kana makava tempona boti langgai raala lako nte ira. Tempo haitu-mo pade mopuasa ira. *Ivesia muni anaguruKu masusa rara bo mopuasa ane Yaku raala lako nte ira.*"

Rongaya porapa mompakalanto pepatuduki i Yesus nabaru ledo mamala raposigalo ante ada-ada agama Yahudi

¹⁶ Nanguli munimo i Yesus, "Ledo ria tona notampala baju naranta ante kae nabaru. Sabana kae baru haitu mekonjo bo mombabitesi baju ranta sampe mantambai kabitena baju haitu. ¹⁷ Ivesia muni ante uve anggur. Ledo ria tona nombaisi uve anggur nabaru rira kuli njae anu domo nagini. ^{††} Sabana ane radika ri pomboli njae, uve anggur baruna morende bo mevoya mompakapasa pombolina haitu sampe mabubu uve anggur, bo marugi pombolina. Uve anggur nabaru kana raisi rira pomboli baruna muni. Ane ivesia mabelo puramo uve anggur bo pombolina."

Tesa ngana mombine nipakatuvu mpanjili bo mombine nadua anu nanggabe baju i Yesus

Markus 5:21-43; Lukas 8:40-56

¹⁸ Da notesa i Yesus, nakavamo saito pakeni ri banua petupu ntoYahudi. Nantaputumo ia ri ngayo i Yesus bo nerapi tulungi ante mpuu-mpuu rara. Niulina, "Dako namate anaku mombine. Kamai, kita hau ri banuaku. Tuu paleMiu ri karonala ala matuvu mpanjili ia."

¹⁹ Nangepe haitu, neanggamu i Yesus hau mantuntuni tuama nu ngana haitu. Bo anaguruNa muni hau nosangganani nte Ia.

[†] tona nanao: nantuntuni panggava ntodea toYahudi, tona nanao haitumo tona anu nangoseaka atura-atura agama Yahudi. ^{††} Pomboli uve anggur nipake tempo haitu nipovia lako ri kuli binata, eva kulimba ntovau. Ane natuamo, nakaa kuli, domo nagini.

²⁰ Ri tatanga dala naria saito mombine anu sapulu rompaemo nasimbunga njuu. Ia nanggaparai puri i Yesus bo nikabena doe baju i Yesus, ²¹ apa nipekirina, "Nau aga doe nu bajuNa kukabe, tantu mabelomo duaku hitu."

²² Neilimo i Yesus nompeinta mombine haitu. Bo niuliNa ka ia, "Anaku, pakaroso raramu! Mabelomo iko sabana iko nomparasaya." Bo eva nisuka, nabelo mpuumo mombine haitu.

²³ Naupu sia napolamo i Yesus hau ri banua nu pakeni ri banua petupu pangane. Nakava hamai nikitaNa nadea tona nantavusi suli bo notumangi ka tomate ante suara namangga. ²⁴ Nanguli i Yesus ka ira, "Palaimo komiu pura-pura. Ngana haitu ledo namate. Ia aga namonjo." Nangepe tesa haitu, aga nipongirikara i Yesus. ²⁵ Naupu ira nipopalai, nesuamo i Yesus rira tombi nu ngana mombine. NikangisiNa pale nu ngana bo kaliu-liu nembangumo ia. ²⁶ Naupu haitu, kajadia haitu natolele sampe ri pura-pura ngata ri njumangu bagia haitu.

Randua toburo nipakabelo i Yesus

²⁷ Tempo i Yesus nompapola polipana, naria randua toburo nantuntuni Ia bo nongare-ngare, "Muli Magau Daud! Poasimo kami!"

²⁸ I Yesus nesua rira banua, bo nesua munimo toburo randua haitu bo nanggaparai Ia. Nekutanamo Ia "Niparasayamiu Yaku nakuasa mompakabelo matamiau?"

Nesana ira, "Iyo, Pue. Niparasaya kami."

²⁹ Jadi i Yesus nombatui matara bo nanguli, "Mabelomo matamiau, eva niparasayamiu majadi!" ³⁰ Kaliu-liu nabelomo matara randua. Bo i Yesus nantagi ira ante mpuu-mpuu. NiuliNa, "Nee ntoto ratesa ka tona ntanina anu najadi nte komiu hitu." ³¹ Tapi nalaimo ira bo nompatolele kareba i Yesus ri pura-pura ngata ri njumangu bagia haitu.

I Yesus nompakabelo tobobo

³² Dako nalai toburo randua pangane, naria saito tobobo niken ntona hau nte i Yesus. Tona haitu nabobo sabana nipesua nu seta. ³³ Jadi tempo seta haitu nipopalai i Yesus lako nte ia, namalamo ia notesa. Nanggita kajadia haitu nokumaa mpuumo todea. Nanguli ira, "Dopa sangganani nikita kami kajadia eva hitu ri tana Israel!" ³⁴ Tapi nanguli toFarisi hamai, "Bai! Tona hitu aga nompopalai seta ante kuasa lako nte Magau nu Seta mboto!"

I Yesus nompatuduki anaguruNa (9:35-11:1)

Naasi mata i Yesus nanggita todea anu ledo nomparsaya

³⁵ I Yesus hau nompesayoki ngata dea. Ia nompatuduki ri banua-banua petupu bo nompatolele kareba Poparenta nu Alatala. Bo nipakabeloNa tona nadua mpengaya-ngaya. ³⁶ Nanggita todea, naasi mpuumo mataNa, sabana nasesamo ira bo ledo ria tona nantulungi ira, nasimbayu eva bimba ledo ria topoevuna. ³⁷ Bo nanguli i Yesus ka anaguruNa, "Nadeamo tona nasadia mantarima Kareba Belo. Ira nasimbayu eva pae natasamo, nasadiamo rakato. Nadea mpuu pae nasadiamo rakato, tapi topokato ledo nadea. ³⁸ Jadi perapimo nte Alatala tupu ntalua, ala ratuduNa tona hau mokato ri taluaNa."

I Yesus nombadekei kuasa ka ana-anaguruNa

Markus 3:13-19; Lukas 6:12-16

10 I Yesus nompasiromu ana-anaguruNa, bo nidekeiNa ka ira kuasa mompopalai seta-seta bo mompakabelo tona nadua mpengaya-ngaya. ²⁴ Sanga sapulu randua anaguru anu nisuroNa haitumo, Pamulana i Simon anu nosanga muni i Petrus; bo i Andreas, tui i Petrus; i Yakobus bo i Yohanes ana-ana i Zebedeus; i Filipus; bo i Bartolomeus; i Tomas; bo i Matius † topesingara balasitee; i Yakobus ana i Alfeus; i Tadeus; i Simon, saito lako ri partai Zelot, haitumo partai maradeka ntoYahudi; bo i Yudas Iskariot anu nompobalu i Yesus ka baliNa.

I Yesus nombasuro anaguruNa manggeni Kareba Belo

Markus 6:6b-13 Lukas 9:1-6

⁵ Ira sapulu randua nisuro i Yesus hau manggeni Kareba Belo bo nitevaiNa ivei: "Nee hau ri ngata-ngata ntona ledo toYahudi bara ngata-ngata ntoSamaria. ⁶ Koimo ruru nte toYahudi muli i Israel anu nasimbayu eva bimba-bimba nalipo. ⁷ Koimo bo patolele ka ira ivei: 'Naparamo tempona Alatala momparenta mpo Magau.' ⁸ Pakabelo tona nadua, pakatuvu mpanjili tona namatemo, pakabelo tona nadua oge, popalai seta-seta anu nesua ri karo ntona. Kuasa haitu nidekei bayangi ka komiu, ledo nialimiu. Jadi dekeimiu bayangi muni ka tona ntanina.

† i Matius notulisi buku hitu.

⁹ Nee rakenimiu doi bulava bara doi salaka bara doi tambaga riara karepemiu. ¹⁰ Nee rakenimiu batutu rapomboli baku. Nee rakenimiu rontonga baju, sapatu atau toko polipa, sabana topokarajaa masipato ratande ntona nitulungina.

¹¹ Ane komiu mesua riara ngata, elomo saito tona nabelo rarana mantarima komiu riara banuana. Bo ponturomo hamai nte ira sampe komiu mompalaisi ngata haitu. ¹² Tempo komiu mesua riara banua ntona, ulika tupu banua, 'Perapi Alatala mombadekei belo ka komiu!' ¹³ Ane mabelo rara ntupe banua haitu bo ratarimara komiu, belo niperapimiu lako nte Alatala kana mambela nte ira. Tapi ane ledo mabelo rarara bo ledo ratarimara mabelo komiu, belo niperapimiu ka ira haitu ledo mambela nte ira. ¹⁴ Ane tupu banua bara tupu ngata ledo madota mantarima komiu atau ledo madota mangepe tesamiu, palaimo komiu lako nte ira bo tapaimiu sovu lako ri kadamiu. †¹⁵ Pariaramo tesaKu hitu! Ri Eo Potangara ri kaupu nu dunia melabi-pa kadaana pehuku nu Alatala ka ira pade pehuku rapambela ka tupu ngata Sodom bo Gomora anu nadaa mpuu pokainggura!"

Kita kana maroo momparasaya tempo rapandasa

Markus 13:9-13; Lukas 12:8-12; 21:12-17

¹⁶ "Pariaramo tesaKu hitu! Komiu Kusuro hau ri tatanga ntona nadaa nasimbayu eva bimba ri tatanga asulaku. Jadi komiu kana matau eva ule bo malusu rara eva tonji togou. ¹⁷ Komiu kana mainga apa komiu rasaka ntona bo rakeni rapangadu ri ngayo ntopotangara. Bo komiu raboba riara banua-banua petupu. ¹⁸ Komiu rakeni ri ngayo gubernur-gubernur bo magau-magau sabana komiu momparasaya Yaku. Haitumo loga nabelo ka komiu motesa momparasayamiu Yaku ka ira bo ka tona ntanina anu ledo toYahudi. ¹⁹ Ane komiu rakeni ri ngayora, nee makini raramiu mompekirika nuapa raulimiu bara berimba komiu mesana ka ira. Apa ri tempo haitu radekei ka komiu tesa-tesa masipato raulimiu ka ira. ²⁰ Bo tesa-tesa raulimiu ledo tesa lako ri pekirimiu mboto, tapi tesa lako nte Nosa Gasa nTuamamiu Alatala. Iamo mokerajaa riara ntaimiu mompakalanto tesa nuapa masipato ratesamiu.

²¹ Makava tempona maria tona mombadekei sampe-suvuna mboto rapatesi sabana sampesuvuna momparasaya Yaku. Bo maria muni totua mombadekei anana mboto rapatesi. Bo ngana-ngana mangeva tina tuamara mboto bo mombadekei ira rapatesi. ²² Komiu rapovuu mata ntodea sabana komiu nangoseaka Yaku. Tapi isema-sema maroo momparasaya sampe ri

†† Ane toYahudi nanjili lako ri ngata ntona ledo toYahudi, nipegasa bajura bo sapatu, apa niulira tona ledo toYahudi nte ngatara naruto. I Yesus nombatudu anaguruNa motapai sovu lako ri kadara ka toYahudi anu nompoara Poparenta nu Alatala rapopakita ka ira, iramo naruto ri panggita nu Alatala.

kaupuna rapakasalama nu Alatala. ²³ Ane komiu rapandasa ntona ri sangu ngata, palaimo hau ri ngata ntanina. Pariaramo tesaKu hitu. Yaku, Ana nu Manusia kana makava mpanjili dopame maupu rakenimiu Kareba Belo ka pura-pura ngata ri tana Israel.

²⁴ Anaguru ledo naogepa pade guruna. Batua ledo naogepa pade madikana. ²⁵ Kana maosa rara anaguru ane ia manjava guruna bo kana maosa rara batua manjava madikana. Iyapa Yaku Gurumiu, niuli ntona i Beelzebul, Magau nu Seta, nemopa komiu anu najadi ana-ana riara banuaKu. Komiu muni kana rasalaira."

Kita kana maeka nte Alatala, ledo nte manusia

Lukas 12:2-7

²⁶ "Tapi nau rasalai ntona komiu, nee maeka nte tona mangeva komiu. Apa pura-pura anu nakana, anu nitabuniaka sii-sii kana malanto rakita ngena. Pura-pura rahasia sii-sii kana rasani ntonamo bara maipia.

²⁷ Pura-pura anu nitesaKu nggalino ka komiu, kana ratesamiu ri ngayo ntodea, bo anu nipanggalivayaKu ri talingamiu kana rapatolelemiu ka todea! ²⁸ Nee maeka nte tona madota mompatesi komiu. Ira mamala mompatesi karomiu tapi ledo ria kuasara mombanavusaka komiu ri narakaa. Aginapa komiu maeka nte Alatala sabana Iamo nakuasa mompatesi karomiu bo Ia muni nakuasa mombahuku komiu riara narakaa. ²⁹ Natantu nisanimiu tonji rone rombaa nipobalu sampeka doi kodi. Tapi nau ledo noali ri panggita manusia, ledo ria sambaa tonji rone mamate ane ledo dota nTuamamiu Alatala. ³⁰ Tapi komiu nelabipa noali ri panggita nu Alatala. Nau buluamiu nirekeNa bo nisanina puramo. ³¹ Jadi nee maeka, apa nipotove nu Alatala komiu pade tonji rone nadea.

³² Isema-sema manguli ri ngayo ntona ntanina, ia topangoseaka Yaku, Yaku muni manguli ri ngayo nTuamaKu Alatala ri suruga, ia topangoseaka Yaku. ³³ Tapi isema-sema manguli ri ngayo ntona ntanina, ledo nisanina Yaku, Yaku muni manguli ri ngayo nTuamaKu ri suruga, ledo nisaniku ia."

Kakava i Yesus ri dunia nompopeumba posinggarau

Lukas 12:51-53; 14:26-27

³⁴ "Nee rapekirimiu kakavaKu hii manggeni posinggabelo ri dunia. Ledo nakana! Tapi kakavaKu hii nanggeni posieva. ³⁵ Lako ri kakavaKu, ngana langgai mangeva tuamana mboto, bo ngana mombine mangeva tinana, bo mania mombine mangeva matuana mombine.

³⁶ Tona nangoseaka Yaku raeva nu roara sambanua mboto.

Mikha 7:6

³⁷ Isema-sema nipotovenapa tina-tuamana pade Yaku, ledo masipato rauli topangoseaka Yaku. Bo tona

nipotovenapa anana pade Yaku, ledo muni masipato rauli topangoseaka Yaku. ³⁸ Bo tona ledo nanjimbuaka kayu salibna bo nangoseaka Yaku, ia ledo masipato rauli topangoseaka Yaku. ³⁹ Isema-sema batena nangoseaka dota rarana mboto, ledo manggava katuvu mabelo sampe ri kasae-saena. Tapi isema-sema nombakabasaka pura-pura dota rarana mboto sabana nioseakana Yaku, iamo manggava katuvu mabelo sampe ri kasae-saena.

⁴⁰ Isema-sema nantarima komiu, nitarimana muni Yaku. Bo isema-sema nantarima Yaku, nitarimana Alatala anu nombasuro Yaku. ⁴¹ Isema-sema nantarima saito suro nu Alatala sabana ia mpuu-mpuu suro nu Alatala, tona haitu manggava tambo nasimbayu eva anu radekeika suro haitu. Bo isema-sema nantarima saito tonoa sabana ia mpuu-mpuu nanoa, tona haitu manggava tambo nasimbayu eva tambo radekeika tona nanoa haitu. ⁴² Bo isema-sema nombatulungi topangoseaka Yaku sabana ia mpuu-mpuu nangoseaka Yaku, tona haitu manggava tambona bara maipia. Pariaramo tesaKu hitu, nau aga mombadekei uve ranindi ka saito topangoseaka Yaku anu ledo ria nturona, ia kana manggava tambona."

Kajadia-kajadia ri bagia Galilea anu nompakalanto i Yesus Magau Topepakasalama anu nijanji nu Alatala (11:2-12:50)

I Yesus ante anaguru i Yohanes Topediu

Lukas 7:18-35

11 Naupupa i Yesus nompatuduki anaguruNa sapulu randua, nalaimo Ia lako ri sia bo hau mompatuduki tona bo mompatolele Kareba Belo ri ngatanga ngata napara sia.

² Tempo haitu i Yohanes Topediu nitarunggu. Ri tarunggu niepena lelana mpengaya-ngaya anu nipovia i Kristus. Jadi nituduna bara sako-ndua anaguruna hau mompekutana nte i Yesus ivei: ³ "Tua, Komiumo hii Magau Topepakasalama anu makava nangoseaka pojanji nu Alatala? Atau bara da mariapa tona ntanina rapopea kami?"

⁴ Nesana i Yesus, "Panjilimo komiu hau nte i Yohanes bo ulika ia pura-pura anu niepemiu bo nikitamiu ri sii: ⁵ tona naburo nekita, tona napunggu nolipamo, tona nadua oge nipakabelomo, tona nabongo neepemo, tona namate natuvu mpanjilimo, bo Kareba Belo lako nte Alatala nipatolele munimo ka tona napakasi. ⁶ Nabelo mpuu tona ledo noura nomparasaya Yaku."

⁷ Nalaipa tona nitudu i Yohanes haitu, nitesaNamo katuvu i Yohanes ka todea. NiuliNa, "Nuapa patujumiu

† ATAU: Bo ia kana masadia majadi nasimbayu eva topanjimbuaka kayu salib anu nasadia rapandasa atau rapatesi sabana ia nangoseaka Yaku. Ane ledo, ia ledo masipato rauli topangoseaka Yaku.

hau ranggarava bai nompeinta i Yohanes bara ipia? Hau manggita *tona nonggai rarana eva* kavoko niburu mpoiri hau tumai? Natantu ledο ivesia. ⁸Jadi nuapa patujumiu hau? Hau manggita tona nopakea nagaya? Natantu ledο muni, apa tona nopakea ivesia aga nonturo ri banua magau. ⁹Jadi nuapa patujumiu hamai? Tantumo hau manggita nabi. Tapi pariaramo! I Yohanes naogepa pade nabi ntanina, ¹⁰sabana iamο suro nitesaki nu Alatala riara Buku Gasa ivei: 'Pariaramo! Kutudu suroKu mokolu ka Iko, ala ia mompakasadia dala ka Iko.'"

Maleakhi 3:1

¹¹ Nanguli munimo i Yesus, "Pariaramo, lako ri pura-pura tona nipoanaka ri dunia hitu ledο naria saitoa naogepa pade i Yohanes Topedi. Tapi nau tona ledο ria nturona ri Poparenta nu Alatala, naogepa ia pade i Yohanes. ¹² Lako ri pamula nu pokarajaa i Yohanes Topedi sampe sii-sii, Poparenta nu Alatala nieva ntona nadaa bo nasese anu madota mombadagina. ^{†13} Nompamula lako ri nabi-nabi nggaulu sampe i Yohanes sii-sii, pura-pura nabi bo Buku Atura Agama nombaboto tempo hitu *haitumo Poparenta nu Alatala*. ¹⁴ Bo ane raparasayamiu anu nipopaisanira, rasanimiu i Yohanes hitu nasimbayū ante Nabi Elia, anu nibotora makava mpanjili. ^{††15} Isema-sema naria talingana, pariaramo tesaKu hitu!

¹⁶ Yaku motesa mompakalanto ka komiu inggu ntona nadaa anu natuvu sii-sii. Ira nasimbayū nte ngana-ngana nonturo ri potomu sangaya-sangaya niulika ledο niosera. Ira nipongare roara ntanina ivei: ¹⁷ 'Kami nosuli bo nodade mompakadamba raramiu, tapi komiu ledο nadamba. Kami nodade nasusa eva ri tempo kamate tapi ledο notumangi komiu.' ¹⁸ Ivesia muni najadi nte kami bo i Yohanes. I Yohanes nakava, nopuasa bo ledο nanginu uve anggur, bo niuli ntona ia nipesua nu seta! ¹⁹ Yaku, Ana nu Manusia nakava nangande bo nanginu uve anggur eva tona biasa, tapi niuli ntona, 'Peintamo tona haitu! Nadoko, nalangu, vega ntopesingara balasitee bo vega ntodosa! Tapi nau ivesia, nisanita kanoto nia nu Alatala sabana ase-lena nikita ri pokainggu ntopangoseaka Ia."

I Yesus nangonteaka toYahudi ri bagia Galilea anu ledο nomparasaya

Lukas 10:13-15

²⁰ Naupu haitu i Yesus nangonteaka tupu ngata ledο najea lako ri dosara naupa nadeapa kabaraka nipoviaNa ri ngatara haitu. ²¹ NiuliNa, "Mandasa mpuumo komiu, toponturo ri ngata Korazim! Bo mandasa mpuumo komiu toponturo ri ngata Betsaida, sabana

† Naria pompaha santanina ivei: Lako ri pamula nu pokarajaa i Yohanes Topedi, nadea mpuu tona nompasimbuku majadi todea riara Poparenta nu Alatala, tapi tona nadaa bo nasese nompasimbuku mombadagina. †† Maleakhi 4:5

komiu ledο najea. Ane rapana kabaraka-kabaraka nipoviaKu ri ngatamiu Kupovia ri ngata Tirus bo Sidon, natantu nasaemo kajeara, nau ira ledο toYahudi. Bo natantu nasae munimo popakeara karu bo podikara sovu ri balenggara, † tandana nabuku rarara bo nanjosomo nokainggu nadaa. Komiu toYahudi nanggita kabaraka-kabaraka haitu, tapi komiu ledο ntoto najea! ²² Pariaramo! Tempo Alatala mombatangara manusia bara maipia, pehuku ka komiu melabipa kantamona pade pehuku ka toponturo ri ngata Tirus bo Sidon.

²³ Heh, komiu toponturo ri ngata Kapernaum! Nisarumakamiu komiu raore hau ri suruga! Tapi ledο nto-to nakana! Komiu aga ranavusaka ri narakaa! Apa ane rapana kabaraka-kabaraka nipoviaKu ri ngatamiu Kupovia ri ngata Sodom anu nadaa mpuu, natantu ngata haitu ledο rapakaropu nu Alatala bo ngata haitu batena maria sampe sii-sii. ²⁴ Jadi pariaramo! Ri Eo Potangara bara maipia mandasapa pehuku rapambela ka komiu pade pehuku rapambela ka tupu ngata Sodom!"

I Yesus nombagaga tona makava nte Ia

Lukas 10:21-22

²⁵ Tempo haitu nosambayamo i Yesus. NiuliNa, "Tata, Komiumo Tupu nu langi bo tana. Yaku nosukuru nte Komiu sabana nipopaisaniMiu pura-pura anu pangane ka tona ledο natau. Tapi nitabuniakaMiu ka tona nangisani bo tona napande, ²⁶ apa ivesiamo dotaMiu."

²⁷ Naupu haitu, i Yesus notesa ka tona ri sia, "Pura-pura nidekei nTuamaKu ka Yaku. Ledο ria tona mpuu-mpuu nosisani ante Yaku, Ana nu Alatala, aga TuamaKu Alatala. Bo ledο ria tona mpuu-mpuu nosisani ante TuamaKu aga Yaku, AnaNa, bo isema-sema Kupodota, Kupopaisanika TuamaKu ka ia.

²⁸ Isema-sema nalenge bo nantamo panggenina, kamaimo nte Yaku! Yaku mompakangaa ia. ²⁹ Paritundu pasanga Kudika ka komiu bo pegurumo nte Yaku, apa Yaku nalusu bo naede raraKu bo Kupakatinonto raramiu. ³⁰ Nakana suka pasanga Kudika, bo panggeni Kudekei nangaa rasimbuakamiu."

ToFarisi nangonteaka i Yesus sabana anaguruNa nokarajaa ri eo penonto

Markus 2:23-28; Lukas 6:1-5

12 Naria saeo, i Yesus ante anaguruNa noliu ri talua gando ri eo penonto. Tempo ira noliu ri sia, anaguru i Yesus nokaleti gando sakide bo niontara sabana naaramo taira. ² Naria bara sako-ndua toFarisi nanggita poviara haitu. Nanguli ira ka i Yesus, "Peinta vei! AnaguruMu nombaliunaka atura agamata! Nitagi nu agama mokaarajaa ri eo penonto!"

‡ ToYahudi nggaulu nobaju kae karu bo nombadika sovu ri balenggara tempo nabuku mpuu rarara, mompopakita kabuku rarara.

³ Tapi nesana i Yesus ka ira, "Dopa nibacamiu anu nipovia Magau Daud nggaulu? Tempo ia ante roa-roana naara taira, ⁴ ia nesua riara Banua nu Alatala bo nikandena roti nipesomba ka Alatala. Kakanana nangoseaka Atura-atura agamata, ledo masipato i Daud ante roana mangande roti haitu, aga topanggeni pesomba masipato mangandena. Tapi naupa ivesia, i Daud ledo nisalai. ¹⁵ Bara dopa muni nibacamiu anu nitulisi riara Buku Atura Agama. Ri eo penonto topanggeni pesomba nokarajaa ri Banua nu Alatala tapi ira ledo nireke nasala. ⁶ Pariaramo anu Kuuli ka komiu hitu: Ri sii naria saito naogepa pade Banua nu Alatala. ⁷⁻⁸ Apa Yaku, Ana nu Manusia, anu nakuasa manguli nuapa masipato rapovia ri eo penonto. Nitulisi riara Buku Gasa ivei:

'Nipokonokupa maasi matamiu manggita roamiu pade manggeni binata-binata rapesomba ka Yaku.'

Hosea 6:6

Ane nisanimiu mpuu-mpuu batuana tesa haitu, natan-tu ledo rapakasalamiu tona ledo nasala."

ToFarisi nonia mompatesi i Yesus sabana Ia nompakabelo tona nakoyo palena sabingga ri eo penonto

Markus 3:1-6; Lukas 6:6-11

⁹ Naupu haitu, i Yesus nompalaisi ponturo haitu bo nesuamo Ia riara banua petupu ntoYahudi. ¹⁰ Ri sia naria saito tona nakoyo sabingga palena. Naria toFarisi hamai madota mangelo sala i Yesus ala rapan-gadura. Haitu sampe nipekutanara Ia, "Nangoseaka atura-atura agamata, mamala kita mompakabelo tona nadua ri eo penonto atau ledo?"

¹¹ Nesana i Yesus, "Ane rapana maria bimbamiu man-avu ralovu ri eo penonto, nuapa rapoviamiu? Natantu rasoreakamiu ri eo haitu muni! ¹² Tapi manusia nelabi noali pade bimba. Jadi namala kita mombatulungi tona ri eo penonto!" ¹³ Naupu haitu nanguli Yesus ka tona nakoyo palena haitu, "Odomo palemu!" Tona haitu nangodo palena, bo kaliu-liu nabelomo, nasimbayu eva palena sabinggapa. ¹⁴ Tapi toFarisi pangane nompalaisi banua petupu bo nolibu mangelo dala mompatesi i Yesus.

I Yesus nisuro nu Alatala

¹⁵ Nisani i Yesusmo patuju ntoFarisi nadaa haitu nte Ia. Jadi nalaimo Ia lako ri ponturo haitu hau ri ponturo ntanina. Nadea mpuu tona nantuntuni Ia bo isema-sema nadua, nipakabeloNamo. ¹⁶ Bo niulikaNa ira, "Nee ntoto ratesamiu ka tona ntanina anu nipoviaKu ka komiu. ¹⁷ Ivesiamo kadupana Tesa nu Alatala anu nipasimbayu Nabi Yesaya nggaulu ivei:

¹⁸ 'Siimo BatuaKu nipelisiKu.

† *Haitu najadi dopame i Daud najadi magau. Peinta 1 Samuel 21:1-6.*

Iamo anu nipotoveKu bo nipodamba raraKu.

Nosa Gasa Kudekei ka Ia

Bo Ia mompatolele poparentaKu nanao ka pura-pura tona.

¹⁹ Ia ledo mesanai, bo ledo muni mongare-ngare,

Bo Ia muni ledo motesa mompakalanga rara ri ngayo ntodea.

²⁰ Tava natetilu ledo rapakakotoNa, *batuana, Ia nabelo nte tona nalente pomparasayana*

bo sumbu poindo aga nompida-mpida vayana ledo rapepayaNa; *batuana, nalusu raraNa nte tona nau pomparasayana ledo naroo.*

Ia bate-batena mompasimbuku sampe kanoa nu poparenta nu Alatala majadi ri dunia, ²¹ Bo pura-pura manusia manjarumaka Ia.' "

Yesaya 42:1-4

ToFarisi nanjalai i Yesus nanguli Ia nompopalai seta ante kuasa Magau nu Seta

Markus 3:20-30; Lukas 6:43-45; 11:14-23; 12:10

²² Naupu haitu naria saito tona nikeni hau nte i Yesus. Tona haitu naburo bo nabobo sabana ia nipesua nu seta. I Yesus nompopalai seta lako ri tona haitu sampe ia namalamo notesa bo nekita. ²³ Nanggi-ta kajadia haitu, nokumaa mpuumo todea hamai sampe nosimpekutana ira, "Bara tona hitumo Muli Magau Daud *anu nijanji nu Alatala nggaulu!*"

²⁴ Tapi tempo toFarisi nangepe tesa ntodea haitu, nesana ira, "Bai! Kuasa ntona haitu lako nte i Beelzebul, Magau nu Seta. Haitu sampe Ia nakuasa nompopalai seta-seta."

²⁵ Tapi nisani i Yesus pompekirira. Jadi niuliNa ka ira, "Ane maria saito magau bo todeana bate-batena mosipobali, natantu kamagauana haitu magero. Bo ane tona sangata bara sambanua bate-batena mosipobali, natantu ira aga masimpotare. ²⁶ Ivesia muni ante Magau nu Seta. Ane Magau nu Seta mompopalai seta-seta ntanina, batuana seta mosimpobali ante seta ntanina. Ane ivesia, natantu poparenta Magau nu Seta haitu ledo maroso, aga magero nggoomo.

²⁷ Pangulimiu Yaku nompopalai seta ante kuasa i Beelzebul, Magau nu Seta. Tapi naria muni ana-anagurumiu mboto nompopalai seta-seta. Uli ka Yaku, ante kuasa isema nipopalaira seta-seta? Natantu ante kuasa nu Alatala! Jadi povia nu anagurumiu mboto nompakalanto peraimiu tutu nasala! ²⁸ Yaku nompopalai seta-seta ante kuasa Nosa Gasa nu Alatala. Bo haitu nompopakita ka komiu Alatala nompamulamo nomparenta ri tatangamiu!

²⁹ Berimba tona namala mombasuaki banua ntona naroso mangagosi mbara-mbarana? Natantum kana ratipungguna ntani ruru tupu nu banua haitu pade mamala mangagosi mbara-mbarana. *Ivesia muni Yaku*

namala nompopalai seta sabana Yaku nokolu nompopalai Magau nu Seta.

³⁰ Isema-sema ledo nosabingga ante Yaku, iamo nangeva Yaku. Isema-sema ledo nantungi riar pokarajaaKu, iamo nompakagero pokarajaaKu. ³¹ Jadi Kuuli ka komiu, pura-pura dosa bo tesa nesalai mamala raampung. Tapi isema-sema nombasalai Nosa Gasa nu Alatala ledo ntoto raampung. ³² Isema-sema nombasalai Yaku, Ana nu Manusia mamala raampung. Tapi isema-sema nombasalai Nosa Gasa nu Alatala, ledo ntoto raampung, lako ri eo hitu sampe ri kasae-saena.

³³ Ane kayu nabelo, nabelo muni vuana. Ane kayu ledo nabelo, ledo muni nabelo vuana. Kabelo nu kayu nikita ri vuana. ³⁴ Komiu tano tona nadaa mpuu eva ule! Ledo ntoto nipakulemiu notesa anu nabelo, sabana nadaa mpuu raramiu! Apa tesa nisovadakata ag nangoseaka anu naria riar naita. ³⁵ Tona nabelo rarana nombatesa anu nabelo, sabana anu niboli riar ntaina nabelo. Bo tona nadaa rarana nombatesa anu nadaa sabana anu niboli riar ntaina aga anu nadaa. ³⁶ Jadi pariaro! Ri Eo Potangara bara maipiapa, pura-pura tona kana ratanggana mboto pura-pura tesana ledo noguna niulira. ³⁷ Apa tesamiu mboto rapake nu Alatala mombatangara komiu bara nasala bara ledo."

Guru agama bo toFarisi nerapi i Yesus movia tanda nipokumaaka

Markus 8:11-13; Lukas 11:29-32

³⁸ Naupu haitu bara sako-ndua guru agama bo toFarisi nanguli ka i Yesus, "Guru, kami madota manggita Komiu movia tanda nabaraka, ala rasani kami Komiu mpuu-mpuu niposumba nu Alatala."

³⁹ Tapi nesana i Yesus, "Nadaa mpuu komiu natuvu sii-sii! Komiu ledo natutu nangoseaka Alatala! Komiu nerapi Kupovia tanda nabaraka. Tapi ledo maria tanda ntaina rapopakita ka komiu, aga tanda eva anu najadi nte Nabi Yunus nggaulu. ⁴⁰ Talu-mbongi bo talu-eo kasaena Nabi Yunus riar ntai bau mbaso. † Ivesia muni Yaku, Ana nu Manusia, kana riar dayo talu-mbongi talu-eo kasaena. ⁴¹ Ri Eo Potangara bara maipia, tupu ngata Niniwe rapakatuvu mpanjili mosanggani-nggani ante komiu anu natuvu sii-sii. Bo ira nombasalai pokainggumiu sabana ira najeamo nangepe tesa Nabi Yunus. Sii-sii naria saito ri tatangamiu naogepa pade Nabi Yunus tapi ledo nadota komiu momparasaya tesaNa. ⁴² Ivesia muni ri Eo Potangara, magau mombine tana Syeba ri sabingga puluna rapakatuvu mpanjili mosanggani-nggani ante komiu anu natuvu sii-sii. Bo ia muni nombasalai pokainggumiu, sabana ia nakava lako ri ngata nakavao ala mangepe pepatuduki

† Yunus 1:17

Magau Salomo anu nanoto mpuu. Tapi sii-sii naria ri tatangamiu saito anu naogepa bo nanotopa pade Magau Salomo tapi ledo nadota komiu momparasaya tesaNa."

Porapa seta nompalaisi tona bo nisilikina mpanjili

Lukas 11:24-26

⁴³ I Yesus nompapola tesaNa ante porapa ivei: "Ane seta nesuvu nompalaisi saito manusia, ia nolilive hau tumai ri ponturo nangau mangelo ponturo rapan-gosanakana, tapi ledo nikavana. ⁴⁴ Pade niulina, 'Aginapa yaku manjili hau ri tona nipalaisiku ria.' Makava ia ri sia, rakavana tona haitu eva banua boa, ledo ria toponturona, bo banua haitu naupu nipegasa bo nipakasiayu. ⁴⁵ Jadi seta haitu hau nompokio papitu seta ntaina anu nadaapa pade ia mboto. Bo nakavamo ira nesua nte tona haitu bo nonturo ri sia. Kaupuna katu-va ntona haitu tantu melabipa kadaana pade ri pamulana bara ipia. Ivesia muni anu majadi nte tona nadaa anu natuvu sii-sii *sabana ira ledo nadota nomparasaya tesaKu.*"

Tona novia dota nu Alatala nipakasimbayu ante tina bo sampesuvu i Yesus

Markus 3:31-35; Lukas 8:19-21

⁴⁶ Tempo i Yesus da notesa-tesa ka todea haitu, nakavamo tinaNa bo sampesuvuNa. Ira neangga ri savalikuna madota motesa ante Ia. ⁴⁷ Bo hau tona nanguli ka i Yesus, "Peinta! Naria tinaMiu bo sampesuvu-sampesuvuMiu ri savalikuna. Ira madota motesa nte Komiu."

⁴⁸ Nesana i Yesus, "Isema kakanana tinaKu bo sampesuvuKu?" ⁴⁹ Nituduakana ana-anaguruNa bo niulina, "Tona hitumo tinaKu bo sampesuvuKu. ⁵⁰ Apa, isema-sema novia dota nTuamaKu ri suruga, ia hitumo nireke sampesuvuKu bo tinaKu."

Porapa-porapa anu nompakalanto Poparenta nu Alatala (13:1-57)

Porapa toposavu

Markus 4:1-9; Lukas 8:4-8

13 Ri eo haitu muni i Yesus nesuvu lako ri banua hau ri tinggi Rano *Galilea* bo nonturo ri sia.

² Mpalunu-lunu tona nakava nantagui Ia sampe Ia hau nesavi sakaya bo nonturo riarana, bo todea neangga ri talinti. ³ Bo nadea ngayana anu nipepatudukikana ante nompake porapa.

Niulina, "Naria saito toposavu. ⁴ Tempo ia nosavu, naria savua nanavu ri dala. Bo nakavamo tonji-tonji nanteosi savua haitu sampe naupu. ⁵ Naria muni sanu savua nanavu ri tana navatu. Savua haitu nasalisa natuvu sabana tanana ledo nakumba. ⁶ Tapi napanepa

eo, nalelemo bo nangaumo savua haitu sabana ledο nandala kalena. ⁷ Naria muni savua nanavu ranggarui. Karui natuvu sanggani-nggani nte savua. Nasae-sae, karui nangupisi savua haitu sampe namate. ⁸ Bo naria muni savua nanavu ri tana naboya. Savua haitu natuvu sampe novua. Naria saatu-nggani kadeana, naria onopulu-nggani, bo naria muni talupulu-nggani kadeana. ⁹ Isema-sema naria talingana, pariaramo porapa hitu.”

Patuju i Yesus nompake porapa

Markus 4:10-12; Lukas 8:9-10

¹⁰ Naupu sia, ana-anaguru i Yesus nanggaparai Ia bo nompekutana, “Guru, nuapa sabana Komiu nompake porapa ane nompatuduki todea?”

¹¹ Nesana i Yesus, “Bara ipia dopa nisani nu manusia berimba Poparenta nu Alatala. Sii-sii Alatala nompaisanina ka komiu, tapi ledο nipopaisaniNa ka todea. ¹² Apa isema-sema mantarima bo mangoseaka Tesa nu Alatala, kana ratambaika pangisanina sampe rasanina mpuu patuju nu Alatala. Tapi tona ledο nadota mantarima bo mangoseaka Tesa nu Alatala, masae-sae anu sakide nisanina haitu ralelakasi lako nte ia.

¹³ Haitumo sampe nipakeKu porapa ane notesa nte todea, apa nau niepera ledο nipariarara. Nau nikitara ledο nisanira batuana anu nikitara. ¹⁴ Jadi, pokainggu-
ra nompakadupa Tesa nu Alatala anu nipasimbayu Nabi Yesaya nggaulu ivei:

‘Tona gahaitu batena mangepe tapi ledο ntoto rasanira batuana.

Ira batena manggita tapi ledο ntoto rasanira nuapa najadi.

¹⁵ Sabana tona gahaitu nakaa bagara, bo ira aga netibongo, bo matara nipiriramo. Ane ledο nipoviara ivehaitu rakita nu matara anu najadi, raepe ntalingara bo rasanira batuana, rapahara anu nakana bo manjili nte Yaku, ala Kupakabelo ira.’”

Yesaya 6:9-10

¹⁶ Bo napolamo tesa i Yesus ka anaguruNa, “Tapi ane komiu, Alatala mpuu-mpuu nombadekei belo ka komiu, sabana matamiu nanggita anu nipoviaKu, bo talingamiu nangepe tesaKu. ¹⁷ Pariaramo tesaKu hitu, nadea nabi bo tona nanao ntanina anu natuvu nggaulu madota manggita anu nikitamiu, tapi ledο nikitara. Ira mpuu-mpuu madota mangepe anu niepemiu, tapi ledο niepera.”

I Yesus nompakalanto batuana porapa toposavu

Markus 4:13-20; Lukas 8:11-15

¹⁸ “Jadi, epemo batuana porapa toposavu nitesaKu pangane: ¹⁹ Savua nanavu ri dala nirapaka tona

nangepe tesa Poparenta nu Alatala tapi ledο nisanira batuana. Bo nakavamo Magau nu Seta mangagosi tesa haitu lako riana ntaira.

²⁰ Savua nanavu ri tana navatu nirapaka tona anu nangepe Tesa nu Alatala bo kaliu-liu nadamba nantari-
ma tesa haitu. ²¹ Tapi ledο naroso pomparasayara, nasimbayu eva tuda-tuda ledο naroso pokalena. Tempo ira nipandasa bo nipakasusa sabana nompasaya Tesa haitu, kaliu-liu nouramo pomparasayara.

²² Savua nanavu ranggarui nirapaka tona nangepe Tesa nu Alatala bo niparasayara. Tapi ira aga nasesa nompekirika katuvura mboto riana dunia hitu, bo ira aga naino ka doi. Haitu pura-pura nangupi Tesa nu Alatala sampe ledο ria aselena riana nggatuvura.

²³ Tapi savua nanavu ri tana naboya nirapaka tona nangepe Tesa nu Alatala bo nipariarara sampe naria mpuu-mpuu asele riana nggatuvura. Naria sanu asele-
na saatu-nggani kadeana, naria onopulu-nggani kadeana bo naria talupulu-nggani kadeana.”

Porapa kavoko jono natuvu rampae

²⁴ Naria porapa ntanina nitesa i Yesus ka todea haitu ivei: “Poparenta nu Alatala nirapaka tona hau nosavu savua tobelona ri taluana. ²⁵ Tapi naria sambongi tempo pura-pura tona naturumo, nakavamo balina nombakamburaka vua jono ri talua haitu pade nalaimo ia. ²⁶ Natuvumo pae haitu sampe nesuvumo vulina, bo nikita muni jono natuvu ri tatanga mpae haitu. ²⁷ Jadi tona nigaji ntupu ntalua haitu hau nompekutana tupu ntalua, ‘Tua, savua tobelona nitudamiu ri talua hitu. Lako ri umba tano kavoko haitu?’

²⁸ Nesanamo tupu ntalua, ‘Haitu pokarajaa nu bali-
liku.’

Naupu haitu nanguli vaimo topokarajaa, ‘Tua, ane rapokonomiu, kami hau mombarebu jono haitu.’

²⁹ Tapi nanguli tupu ntalua, ‘Nee! Ane rarebumiu jono haitu, bara maria muni pae materebu sanggani nte jono. ³⁰ Palambamo jono matuvu mosanggani ante pae sampe makava tempona mokato. Damo kuuli ka topokato ngena, pasiromu ntani ruru jono-jonona, pade rapou bo rapalabusi. Naupu sia, pade rapasiromu pae bo raboli riana gampiriku.’”

Randua porapa mompakalanto Poparenta nu Alatala mantambai

Markus 4:30-32; Lukas 13:18-21

³¹ Pade naria porapa ntanina nitesa i Yesus ka todea ivei: “Poparenta nu Alatala namala nirapaka batu mandoe † anu niala ntona bo nitudana ri taluana. ³² Nau batu mandoe haitu nakodi ntoto, tapi ane natuvumo,

† Mandoe nitesara ri sii sangaya mandoe nambaso, sampe talu-
metere kalangana.

najadi sampuu kayu nambasopa pade uta-uta ntanina, sampe tonji-tonji nakava novia jumuna ri tingguna.”

³³ Naupu sia nitesa i Yesus vaimo sangu porapa ntanina. NiuliNa, “Poparenta nu Alatala nasimbayu eva raga niala nu mombine bo niposigalona ante talu-njuka labu nu gando. Naupu nipasigalona, nenggamba puramo labu gando haitu.”

³⁴ Pura-pura pepatuduki pangane nitesa i Yesus ka todea ante nompake porapa. Ledo ria Ia nompatuduki ledo nompake porapa. ³⁵ Ivesiamo kadupana tesa nu Alatala nipasimbayu nabi nggaulu ivei:

“Yaku mompake porapa ane motesa ka ira.

Ivesiamo Kutesa anu nitabuniaka lako ri pompajadi dunia.”

Mazmur 78:2

I Yesus nompakalanto batuana porapa jono nosigalo ante pae

³⁶ Naupu haitu i Yesus nompalaisi todea haitu bo nanjili hau ri banua. Pade nakava anaguruNa nanguli ka Ia, “Guru, tulungi tesa pakalanto ka kami batuana porapa pangane, jono natuvu ri talua pae.”

³⁷ Nesana i Yesus, “Yaku, Ana nu Manusia, nirapaka toposavu pae tobelona. ³⁸ Dunia nirapaka talua haitu. Tona anu najadi todea riaru Poparenta nu Alatala nirapaka savua tobelona. Bo topangoseaka Magau nu Seta nirapaka jono. ³⁹ Magau nu Seta nirapaka bali anu nokamburaka vua jono. Kaupu nu Dunia nirapaka tempo nokato bo malaeka-malaeka nu Alatala nirapaka topokato. ⁴⁰ Eva jono nipasiromu bo nipalabu riaru apu, ivesia muni anu majadi ri Kaupu nu Dunia.

⁴¹ Yaku, Ana nu Manusia mombatudu malaeka-malaekaKu hau nte todea ri PoparentaKu mompasiro-mu pura-pura tona anu nompakanavu roa riaru dosa bo pura-pura tona ntanina anu novia nadaa. ⁴² Ira pura-pura ratedeaka riaru apu naraka anu navaya-vaya. Ri situmo ira aga motumangi-mangi bo masinggiki baga ante kasusa rara. ⁴³ Tapi tona nanao pokaingguna kana mareme eva mata eo riaru Poparenta nTumara Alatala. Isema-sema naria talinga, pariaramo tesaKu hitu!”

Porapa kakalumana nitabuniaka ri tana

⁴⁴ Nanguli i Yesus, “Kabelona majadi todea riaru Poparenta nu Alatala nasimbayu eva bulava nitabuniaka ri tana. Naria tona nanggava bulava haitu bo nadamba mpuu rarana. Jadi niivuna mpanjili bo hau nipobaluna pura-pura mbara-mbarana. Bo ali mbara-mbarana haitu nipakena nangali tana nipanggavana bulava haitu.”

Porapa mutiara nagaya mpuu

⁴⁵ “Ivesia muni kabelona majadi todea riaru Poparenta nu Alatala nasimbayu ante mutiara nagaya mpuu ri porapa hitu: Naria topopagoli mutiara anu nangelo-ngelo mutiara anu nasuli alina. ⁴⁶ Nikavanapa sangu mutiara anu nagaya mpuu bo nelabi kasuli nu alina, haumo ia nompobalu pura-pura mbara-mbarana bo ali mbara-mbarana haitu nipakena mangali sangu mutiara pangane.”

Porapa jala nompemala bau

⁴⁷ “Poparenta nu Alatala nirapaka jala ri porapa hitu: Sangu jala bau nitendeaka ntopobau riaru ntasi, bo nompengaya lenje bau nesua riarana. ⁴⁸ Naponupa jala, niangataka ntopompemala baumo bo nitajara hau ri kabatana, pade nonturomo ira nompelisi bau haitu. Bau tobelona nidika riaru tonda, tapi bau ledo nabelo nitedeakara. ⁴⁹ Ivesia muni majadi ri Kaupu nu Dunia. Malaeka-malaeka nTupu kana hau mombatani-aka tona nadaa lako ri tona nanao. ⁵⁰ Tona nadaa rat-edeaka riaru apu naraka anu navaya-vaya, bo ri situmo ira motumangi-mangi bo masinggiki baga ante kasusa rara.”

Porapa mbara-mbara nabaru bo mbara-mbara nasae

⁵¹ Naupu haitu nekutana i Yesus, “Nisanimiu puramo batuana porapa-porapa pangane?”

Nesano ira, “Iyo, nisani kami puramo.”

⁵² Jadi nanguli i Yesus ka ira, “Ane guru agama Yahudi majadi topangoseaka Yaku riaru Poparenta nu Alatala, *nisanina pepatuduki nu Atura nu Alatala nasae bo nisanina muni pepatuduki nabaru*. Ia nasimbayu eva tupu banua anu nombasuvuraka lako ri kakalumana mbara-mbara nabaru bo mbara-mbara nasae.”

I Yesus ledo nitarima ntupu ngata Nazaret

Markus 6:1-6; Lukas 4:16-30

⁵³ Naupu i Yesus nombatesa porapa-porapa haitu, nipalaisiNamo ponturo haitu bo ⁵⁴ hau ri ngataNa mboto. Ri sia Ia nompaguru tona ri banua petupura. Natekaja ira nangepe tesaNa, sampe ira nosimpekutana, “Lako ri umba tano nikavaNa noto eva haitu? Bo lako ri umba muni nikavaNa kuasa novia kabaraka-kabaraka? ⁵⁵ Apa ledo Ia haitu ana i Yusuf pande kayu? Apa ledo i Maria tinana? Bo sampesuvuNa langgai i Yakobus, i Yusuf †, i Simon bo i Yudas? ⁵⁶ Bo sampesuvuNa mombine nonturo muni ri ngatata hitu! Lako ri umba pura nikavaNa noto bo kuasa haitu?” ⁵⁷ Bo nadu-amo rarara nanggita Ia bo nipoarara pepatudukiNa.

† Yusuf: Riaru bara sakuya naskah njae nitulisi Yoses. Sanga “Yusuf” riaru basa Ibrani, niuli “Yoses” riaru basa Yunani. Peinta munimo Matius 27:56; Markus 6:3; 15:40, 47.

Tapi nanguli i Yesus ka ira, "Saito nabi nibila ntona ri umba-umba ngata rakalauna, tapi ri ngatana mboto bara ri banuaNa mboto ia ledo nibila." ⁵⁸ Bo sia sampe ledo nadea kabaraka nipovia i Yesus ri sia, apa ledo ni-parasayara.

Kamate i Yohanes Topediu

Markus 6:14-29; Lukas 9:7-9

14 Tempo haitu topoparenta ri bagia Galilea, Magau Herodes Antipas. Niepena kareba i Yesus ² bo niulina ka pangga-pangga mbaso anu nantulungi ia, "Natantumo Ia haitu i Yohanes Topediu! Natuvu mpanjilimo lako ri kamatena! Sia sampe Ia nakuasa novia kabaraka-kabaraka!" ³⁻⁴ Iveimo tesa kamate i Yohanes Topediu: Bara sakuya kasaena dopame haitu, Magau Herodes nangagosi berei sampesuvuna mboto, haitumo i Herodias, berei i Filipus. I Yohanes Topediu nasaro nangonteaka Magau Herodes nanguli, "Ledo masipato komiu mompoberei eramiu mboto! Pokaingumiu haitu nombaliunaka Atura nu Alatala." Jadi i Herodes nantudu tona mombasaka i Yohanes bo mombatipunggu ia bo mombasuaraka ia riaran tarunggu. ⁵ Kakanana Magau Herodes madota mompatesi i Yohanes, tapi naeka ia ante todea, sabana i Yohanes nirekera nabi.

⁶ Naria saeo nipoviara posusa eo jadi i Herodes. Kamanana, haitumo ngana randaa i Herodias, nolodi ri ngayo ntoposusa haitu. Nadamba mpuumo rara i Herodes nanggita ia nolodi ⁷ sampe ia nojanji bo nosumpa ka kamanana haitu. Niulina, "Nuapa-nuapa muperapi kudekei ka iko!"

⁸ Nangepe tesa i Herodes haitu, i Herodias nantudu anana merapi ivei: "Keni ka yaku ri sii balengga i Yohanes Topediu nituu ri dula."

⁹ Nangepe perapi haitu, nasusa mpuumo rara i Herodes. Tapi naupa ivesia, nituduna tona novia anu niperapi nu randaa pangane, sabana ia nojanji bo nosumpa ri ngayo ntoposusa. ¹⁰ Nitudunamo tantarana hau ri tarunggu mombatampa balengga i Yohanes. ¹¹ Balengga haitu nituura ri bavo dula niken i bo nidekei ka randaa haitu. Naliutaka sia, randaa pangane nanggeni balengga haitu ka tinana. ¹² Nangepe kajadia haitu, nakavamo ana-anaguru i Yohanes mangala karobata i Yohanes, bo nitanara ri dayo. Naupu sia, hau ira nopakilu ka i Yesus namatemo i Yohanes.

Pokarajaa i Yesus ri ngata-ngata bagia Galilea (14:13-17:21)

I Yesus nombadekei kande a ka lima-njobu tona

Markus 6:30-44; Lukas 9:10-17; Yohanes 6:1-14

¹³ Tempo i Yesus nangepe kareba i Herodes nangelo Ia, nipalaisiNa ponturo haitu. NipesaviNa sakaya bo

hau saitoNa ri ponturo kalinona. Tapi niepe ntodea nalaimo i Yesus, ira muni nompalaisi ngata-ngatara bo hau nolipa ri kabatana mantuntuni Ia. ¹⁴ Tempo i Yesus nanau lako ri sakaya, nikitaNa nadea mpuu tona nompopea Ia. Naasi mpuumo mataNa nanggita ira, bo nipakabeloNamo tona nadua.

¹⁵ Nanggoviamo, domo masae mabongimo, anaguru i Yesus nangaparai Ia bo nanguli, "Guru, mabongimo, bo ponturo hitu nakalinoa. Agina ratuduMiu todea haitu hau ri ngata-ngata napara ri sii ala ira mamala mangali kande a."

¹⁶ Tapi nanguli i Yesus ka ira, "Ledo paraluu ira malai. Komiumo mombadekei kande a ka ira."

¹⁷ Nesana ana-anaguruNa, "Anu naria nte kami hitu aga lima-angu roti bo rombaa bau."

¹⁸ Nanguli i Yesus, "Keni tumai kande a tutu."

¹⁹ Naupu haitu nituduNa todea monturo ri kavoko. Bo nialaNamo lima-angu roti bo rombaa bau haitu bo nitingoaNamo langi bo nosambaya nanguli tarima kasi ka Alatala. Naupu nosambaya, nitubi-tubiNa roti pangane bo nidekeiNa ka ana-anaguruNa ala rabagibagira ka todea. ²⁰ Nangande puramo ira sampe nabosu. Naupu haitu anaguruNa nompasiromu mpanjili labi kande a naboli, sapulu rotunda ponupa kadeana. ²¹ Kadea ntopangande hamai nitasere lima-njobu langgai, ledo nibila mombine ante ngana-ngana.

I Yesus nolipa ri bavo uve rano

Markus 6:45-52; Yohanes 6:15-21

²² Naupu haitu nitudu i Yesusmo ana-anaguruNa mesavi sakaya mokolu ka Ia hau ri sambote rano. Apa Ia da mompopanjili todea manjili hau ri ngatara mboto. ²³ Naupu Ia nompopanjili todea, nantendemo Ia saitoNa mosambaya ri bulu. Nabongimo, da ri bulu Ia saitoNa.

²⁴ Tapi tempo haitu, sakaya anu nipesavi nu ana-anaguruNa nakavaomo lako ri kabatana, ri tatanga ranomo. Sakaya haitu ntompe-ntompena niken i balumba mbaso sabana piori mbaso nantomu sakayara haitu. ²⁵ Nitasere tinti tatalu bobaya haitu, i Yesus nakava nte ira nolipa ri bavo nu uve. ²⁶ Tempo ana-anaguruNa nanggita Ia nolipa ri bavo nu uve naekamo rarara. Nanguli ira, "Mboa tutu, le!" Bo nongare-ngaremo ira, navangгаа puramo ira.

²⁷ Tapi kaliu-liu nanguli i Yesus ka ira, "Nee maeka! Pakaroso raramiu! Yaku hii!"

²⁸ Bo nanguli i Petrus, "Pue, ane Komiu mpuu tu, ronedemo yaku tou nte Komiu molipa ri bavo nu uve."

²⁹ Nesanamo i Yesus, "Kamaimo!" Jadi nanaumo i Petrus lako riarasakaya, bo nolipamo ia ri bavo nu uve mangaparai i Yesus.

³⁰ Tapi nikitana karimbo nu piori mbaso, naekamo rarana. Nompamulamo ia malodo riarasakaya uve rano haitu. Bo nongare ia, "Pue, tulungi yaku!"

³¹ Jadi kaliu-liu niodo i Yesus paleNa mombasaka i Petrus. Bo niuliNa ka i Petrus, "Nakura mpuu pom-parasayamu! Nakuya iko nolengga-lengga?" ³² Tempo ira randua nompene riara sakaya, kaliu-liu nenontomo poiri mbaso pangane. ³³ Bo ana-anaguruNa riara sakaya haitu nantaputu nombasomba Ia. Nanguli ira, "Nakana mpuumo! Komiumo Ana nu Alatala!"

I Yesus nompakabelo tona nadua ri ngata Genesaret

Markus 6:53-56

³⁴ Nakava ri sambote rano nesampomo ira ri bagia Genesaret. ³⁵ Tempo nisani ntupu ngata hamai tona nakava haitu i Yesus, nipatolelera kareba haitu hau ri umba-umba ngata ri bagia haitu sampe pura-pura tona nadua hamai nikeni hau nte i Yesus. ³⁶ Niperapira nte i Yesus ala ira rapaloga nau aga mombakabe doe bajuNa. Bo pura-pura tona nanggabe bajuNa, kaliu-liu nabelo.

I Yesus nangonteaka toFarisi aga nangoseaka ada-ada ntotua ledo nangoseaka parenta nu Alatala

Markus 7:1-13

15 Naliutaka haitu bara sako-ndua toFarisi bo guru-guru agama Yahudi lako ri ngata Yerusalem nakava nte i Yesus, bo nekutana, ² "Nakuya anaguru-Miu nombaliunaka ada-ada ntotuata nggaulu? Tempo nangande, ira ledo nemanjo ntani ruru nangoseaka ada-adata!"

³ Nesana i Yesus, "Nakuya komiu mboto nombaliunaka parenta-parenta nu Alatala bo aga nangoseaka ada-ada ntotuamiu nggaulu? ⁴ Alatala nanguli, 'Bilamo tina-tuamamu', † bo niuliNa muni, 'isema-sema nantajalai tuamana bara tinana, ia kana rahuku mate.' ^{††56} Tapi komiu nompatuduki, kita domo paraluu mombabila bo mombatulungi tina tuamata asaa raulita ka ira ivei: 'Anu masipato kudekei ka komiu totua, naupumo nipesombaku ka Alatala!' Jadi ante mompribavo ada-adamiu ivesia, komiu nompandaente tesa nu Alatala! ⁷ Komiu tano aga tona nabelo ri sumba! Nakana ntotomo Tesa nu Alatala anu nipasimbayu Nabi Yesaya nggaulu ivei:

⁸ 'Tona hitu nombasomba Yaku aga ri sumba tapi riara ntaira ledo nipeilira Yaku.

⁹ Ledo ntoto ria gunana ira mombasomba Yaku sabana pepatuduki anu nipepatudukikara niulira Atura-aturaKu, tano aga ada-ada nu manusia.'"

Yesaya 29:13

Anu nompakaruto manusia ri panggita nu Alatala

Markus 7:14-23

¹⁰ Naupu haitu, i Yesus nompokio todea bo nanguli ka ira, "Epemo ala rasaniamiu. ¹¹ Anu nesua ri sumba le-

do mompakaruto manusia ri panggita nu Alatala. Tapi anu nesuvu lako ri sumba, haitumo anu nompakaruto manusia ri panggita nu Alatala!"

¹² Naupu haitu nakavamo ana-anaguruNa nanggaparai Ia bo nanguli, "Pue, nisaniMiu toFarisi nakodi rarara nangepe tesaMiu pangane?"

¹³ Nesana i Yesus, "Pura-pura tuda-tuda anu ledo nituda nTuamaKu anu naria ri suruga, kana rarebu ante kalena. ¹⁴ Jadi palambakamo toFarisi haitu. Ira eva pakeni naburo. Ane tona naburo mombanini toburo ntani-na, natantu ira randua manavu mpasanggani riara lovu."

¹⁵ Bo i Petrus nanguli ka i Yesus, "Guru, tulungi pakalanto ka kami batuana porapa pangane."

¹⁶ Nesana i Yesus, "Heh! Dopa muni tano nipahamiu?"

¹⁷ Dopa nisaniamiu kandeana anu nesua ri sumba napola hau ri tai likota bo naupu haitu aga nesuvu bayangimo? ¹⁸ Tapi tesa nadaa anu neumba lako riara ntai bo lako ri sumba, haitumo anu nompakaruto manusia ri panggita nu Alatala. ¹⁹ Apa lako riara ntai neumba mpengaya pekiri nadaa, anu nanggeni tona nepatesi, nobualo, nogau nabuga, nangangga, nosabi dava, bo nesalai. ²⁰ Pokainggu haitumo nompakaruto manusia ri panggita nu Alatala. Tapi nangande ante ledo emanjo ntani ruru, haitu ledo nompakaruto tona ri panggita nu Alatala."

Saito mombine ledo toYahudi nekitulungi nte i Yesus

Markus 7:24-30

²¹ Naliu haitu, i Yesus nompalaisi ponturo haitu bo hau ri bagia napara ngata Tirus bo ngata Sidon. ²² Naria saito mombine toKanaan, tona ledo toYahudi, nonturo ri bagia haitu. Ia nakava nte i Yesus bo nongarengare ivei: "Pue, Muli Magau Daud! Poasimo yaku hii! Anaku mombine nipesua seta sampe nandasa mpuumo ia!"

²³ Tapi i Yesus ledo notingo. Bo ana-anaguruNa nanggaparai Ia bo nerapi nte Ia, "Guru, agina popalai haumo mombine haitu! Ia ledo naupu-upu nongarengare bo nantuntuni purita."

²⁴ Nesana i Yesus, "Yaku hii aga nitudu mantulungi muli Israel, anu nasimbayu eva bimba nalipo."

²⁵ Naupu sia, nakavamo mombine haitu nantaputu ri ngayo i Yesus, bo nanguli, "Pue, tulungimo yaku!"

²⁶ Nesana i Yesus, "Kana Kutulungi ntani ruru toYahudi. Ledo masipato kandeana nu ngana bo ratedaka ka asu."

²⁷ Nanguli mombine haitu, "Nakana niuliMiu, Pue. Tapi asu muni nabiasa nangande labi-labi kandeana anu nanavu lako ri meja ntupuna."

²⁸ Naupu haitu nanguli i Yesus, "Ina, naroso mpuu pomparasayamu! Jadi, kajadimo anu niperapimu tutu!" Bo eva nisuka, tempo haitu muni nabelo mpanjilimo anana mombine haitu.

† Pesuvu 20:12; Ulangan 5:16 †† Pesuvu 21:17

Nadea tona nadua nipakabelo i Yesus

²⁹ Naupu haitu nalaimo i Yesus lako ri ponturo haitu, bo hau noliu ri tinggi Rano Galilea. Bo nantendemo Ia hau ri bulu bo nonturo ri sia. ³⁰ Nakavamo todea nte Ia nanggeni roara napunggu, tona naburo, nakejo bo nakoyo, tona nabobo bo nadea tona ntanina anu nadua. Ira nikenri ri ngayo i Yesus bo nipakabeloNa pura. ³¹ Nanggita haitu nokumaa mpuumo todea sabana tona nabobo namala notesa, tona nakejo bo nakoyo nipakabelo, tona napunggu namala nolipa bo tona naburo namala nekita. Jadi todea nombabila bo nantoiya Alatala anu nisomba ntoYahudi.

I Yesus nombadekei kande ka pata-njobu tona

Markus 8:1-10

³² Naliutaka haitu i Yesus nompokio ana-anaguruNa bo nanguli ka ira, "Naasi mpuumo mataKu nanggita todea hitu, apa talu-eomo kasaena ira nosanggani-nggani ante Yaku bo sii-sii domo naria kandeana. Ledo madota Yaku mantudu ira manjili ante ara ntai. Nee-nee ira maletu ri dala."

³³ Nesana anaguruNa, "Lako ri umba rapanggavata kande magana radekeita ka tona damo nadea eva hitu? Bo ponturo hitu muni nakalinoa."

³⁴ Nekutana i Yesus, "Sako-angu roti naria nte komiu?"

Nesana ira, "Pitu-angu, bo naria bara sako-mbaa bau kodi."

³⁵ Jadi i Yesus nombatudu todea monturo ri tana pu-ramo. ³⁶ Bo nialaNa roti bo bau-bau kodi haitu bo nitingoana ri laerava, niuliNa tarima kasi ka Alatala. Naupu haitu nitubi-tubiNa roti bo bau haitu bo nidekeikaNa ka anaguruNa. Bo ira nombatibo-tibo kande haitu ka todea. ³⁷ Pura-pura tona haitu nangande sampe nabosu. Naupu ira nangande, anaguru i Yesus nompasiromu labina nikande ntodea pangane, pitu-tonda ponupa kadeana. ³⁸ Langgai nangande tempo haitu pata-njobu kadeana, ledo nibila mombine bo ngana-ngana. ³⁹ Naupu haitu, i Yesus nombatudu todea manjili. Bo Ia mboto nesavi sakaya lako ri sia hau ri bagia Magadan.

ToFarisi bo toSaduki nerapi i Yesus movia tanda nipokumaaka

Matius 12:38-42; Markus 8:11-13; Lukas 12:54-56

16 Naria bara sako-ndua toFarisi bo toSaduki nakava nte i Yesus madota mombaopa tesaNa. Jadi niperapira i Yesus movia tanda nipokumaaka, haitumo tandana Ia mpuu-mpuu niposumba nu Alatala.

² Nesana i Yesus, "Ane nasolo eo bo nalei langi komiu nanguli, 'Marava luona bo mapane eo maile.' ³ Bo ane kabobayana langi nalei bo ravana nakulimu, komiu

nanguli 'Maudamo ngena.' Natau komiu nombatasere ravana tapi ledo natau komiu nombatasere tanda-tanda nipokumaaka anu nipovia nu Alatala sii-sii. ⁴ Nadaa mpuu komiu natuvu sii-sii! Komiu ledo natutu nangoseaka Alatala. Komiu nerapi ala Kupovia tanda rapokumaaka ntona. Tapi ledo ria sangua tanda rapopakita ka komiu, aga tanda eva anu najadi nte Nabi Yunus nggaulu. [†] Naupu haitu, nipalaisiNamo ira.

Pepatuduki ntoFarisi bo toSaduki nipakasimbayu ante ragi

Markus 8:14-21

⁵ Tempo ana-anaguruNa hau ri sambote rano, nalinga rarara manggeni baku. ⁶ I Yesus nanguli ka ira, "Pakabelo-belo. Komiu kana mainga nte ragi ntoFarisi bo toSaduki."

⁷ Nangepe haitu nosimpotesa anaguruNa, "NiuliNa ivesia sabana kita ledo nanggeni roti bara."

⁸ Tapi nisani i Yesus anu nitesara. Haitu sampe niuliNa ka ira, "Nakuya komiu aga notesa roti ledo naria? Nakura mpuu pomparasayamiu! ⁹ Dopa nipahamiu? Ledo nitoramiu lima-njobu tona nipakande ante lima-angu roti? Ledo nitoramiu sako-tondapa labina nipasiromumiu? ¹⁰ Ledo nitoramiu pata-njobu tona nipakande ante pitu-angu roti? Ledo nitoramiu sako-tondapa labina nipasiromumiu? ¹¹ Tempo Yaku nanguli ka komiu mainga nte ragi ntoFarisi bo toSaduki, ledo nipatujuKu roti mpuu! Nakuya bo ledo nipahamiu?"

¹² Lako rahaitu pade nanoto rarara i Yesus ledo nompopainga ira ka ragi nu roti tapi nipopaingaNa ka pepatuduki ntoFarisi bo toSaduki.

I Petrus nompangaku i Yesus Magau Topepakasalama anu nijanji nu Alatala

Markus 8:27-30; Lukas 9:18-21

¹³ I Yesus bo anaguruNa hau ri bagia napara ngata Kaisarea Filipi. Nakava hamai, i Yesus nompekutana anaguruNa, "Nangoseaka panggava ntodea, isema Yaku, Ana nu Manusia?"

¹⁴ Nesana ira, "Naria tona nanguli Komiumo i Yohanes Topediu. Naria muni sanu nanguli Komiu Nabi Elia, bo naria muni tona nanguli Komiu Nabi Yeremia atau nabi ntanina."

¹⁵ Nekutana vai i Yesus, "Jadi, ane komiu, berimba panggavamiu? Isema Yaku hii?"

¹⁶ Nesana i Simon Petrus, "Komiu Magau Topepakasalama anu nijanji nu Alatala. Komiu Ana nu Alatala anu natuvu sampe ri kasae-saena."

¹⁷ Nanguli i Yesus, "Mabelo mpuu iko, Simon, ana i Yunus! Sabana, ledo manusia nompopaisani haitu ka komiu. TuamaKu ri suruga nompopaisani ka iko isema

[†] tanda eva anu najadi nte Nabi Yunus nggaulu. Peinta Matius 12:39.

Yaku. ¹⁸ *Pomparasayamu tutu tuu* sampe sangamu i Petrus—batuana 'vatu'. Bo Yaku mompakajadi iko pak-
eni ntodea anu nomparasaya Yaku, ala iko mom-
pakaroso rarara, masimbayu eva pandasi vatu nom-
pakaroso banua. Bo ledo maria nuapa-nuapa mamala
mombadagi todeaKu, nau kuasa kamatea. ¹⁹ Yaku
mombadekei ka iko gunji Poparenta nu Alatala, haitu-
mo, kuasa manggeniaka todea anu nomparasaya
Yaku. Nuapa-nuapa mutagi ri dunia, haitu muni anu
nitagi nu Alatala ri suruga. Bo nuapa-nuapa mudekei
rapovia ntona ri dunia, haitu muni anu nidekei nu
Alatala ri suruga." ²⁰ Naupu haitu, niuliNa ka anagu-
ruNa, "Nee ratesamiu ka tona Yaku hii Magau
Topepakasalama."

I Yesus notesa kamateNa bara maipia

Markus 8:31-9:1; Lukas 9:22-27

²¹ Nompamula lako rahaitu, i Yesus nompakalanto ka
ana-anaguruNa Ia kana hau ri ngata Yerusalem, bo
hamai Ia rapandasa ntotua ntoYahudi, balengga-
balengga ntopanggeni pesomba, bo guru-guru aga-
ma Yahudi. Bo Ia rapatesi, bo ri eo katataluna Ia ra-
pakatuvu mpanjili lako ri kamateNa.

²² Nangepe tesa haitu, i Petrus nompakeni i Yesus
notesa ri sabbingana. Pade nionteakana i Yesus bo
nanguli, "Nee! Nee, Pue! Nee sampe anu haitu majadi
nte Komiu!"

²³ Tapi i Yesus neili bo nanguli ka ia, "Palaimo lako ri
sii, Magau Seta! Iko, Petrus, aga nombabonto Yaku *ala
ledo Kuoseaka dota nTuamaKu!* Pekirimu tutu pekiri
nu manusia, ledo pekiri lako nte Alatala!" ²⁴ Naupu sia
pade niulikaNa ana-anaguruNa, "Isema-sema madota
mangoseaka Yaku, ia kana mombakabasaka dotana
mboto bo mpuu-mpuu mangoseaka Yaku. Ia kana ma-
jadi nasimbayu eva tona nanjimbua kayu salibna,
*haitumo, ia kana masadia rapandasa nau ia rapatesi
sabana nangoseaka Yaku.*" ²⁵ Isema-sema mantaamaka
dota rarana mboto bo matuvu ka karon mboto, ia le-
do manggava katuvua nabelo sampe ri kasae-saena.
Tapi isema-sema mombakabasaka dota rarana mboto
bo mamate sabana ia nangoseaka Yaku, ia matuvu
mabelo sampe ri kasae-saena. ²⁶ Nuapa gunana
rakavamiu pura-pura anu naria ri dunia tapi ledo
manggava katuvua nabelo sampe ri kasae-saena? Le-
do ria nuapa-nuapa namala rasulamiu ka katuvua
nabelo haitu. ²⁷ *Jadi, oseakamo Yaku nau sampe ma-
mate.* Apa domo masae Yaku, Ana nu Manusia makava
lako ri suruga ante kuasa bo reme lako nte TuamaKu,
mosangani-nggani ante malaeka-malaekaNa. Bo
tempo haitu Kubalasi pura-pura tona nangoseaka
pokaingguna. ²⁸ Pariaramo tesaKu hitu! Naria bara

† Secara harfiah: NiuliKu ka iko, ikomo Petrus bo ri bavo vatu hi-
tu Kupopeangga todeaKu. Bo vamba naraka/dunia ntomate ledo
mombadagina.

sako-ndua komiu ri sii ledo mamate ane dopa rakitara
Yaku, Ana nu Manusia, makava ri dunia hitu eva Mag-
au."

I Yesus nipakaoge ri bavo nu bulu

Markus 9:2-13; Lukas 9:28-36

17 Ono-mbongi kaliuna haitu, i Yesus nanggeni i
Petrus, i Yakobus ante tueina i Yohanes hau
nantende bulu nalanga. Aga i Yesus ante ira tatalu
naria hamai. ² Tempo ira hamai, nabalimo lenje i Yesus
ri ngayora. LenjeNa nareme mpuu eva kareme nu ma-
ta eo, bo bajuNa nabula damo nenggila. ³ Sampesani-
ka nikita nu anaguru i Yesus haitu randua nabi ng-
gaulu notesa nte i Yesus. Nabi randua haitu i Musa bo
i Elia. ⁴ Nanggita haitu, i Petrus nanguli ka i Yesus,
"Pue, nabelo mpuu kita naria ri sii. Ane madota Komiu,
kupovia tatalu sou ri sii, sanganu ka Komiu, sanganu ka i
Musa bo sanganu ka i Elia."

⁵ Da notesa i Petrus, nakavamo kulimu nareme nom-
babungu ira, bo lako riara kulimu haitu niepera suara
nanguli, "Hitumo AnaKu nipotoveKu. Iamo nom-
pakadamba raraKu. Pariaramo tesaNa!"

⁶ Nangepe suara haitu naeka mpuumo rara nu
anaguru i Yesus, sampe notungga narapa ri tana.

⁷ Tapi i Yesus nanggaparai ira bo nikingisiNa bo niu-
likaNa, "Pembangumo. Nee maeka!" ⁸ Nitingoara, niki-
tara aga i Yesus saitoNa. Ledo ria tona ntanina.

⁹ Notua lako ri buluna haitu, i Yesus nombatagi ira,
"Ane Yaku, Ana nu Manusia dopa rapakatuvu mpanjili
lako ri kamateKu, nepa ratesamiu ruru ka tona anu
dako nikitamiu pangane."

¹⁰ AnaguruNa nompekutana nte Ia, "Nuapa sabana
guru-guru agama nanguli Nabi Elia kana makava ntani
mokolu ka Magau Topepakasalama?"

¹¹ Nesana i Yesus, "Nakana tesara haitu. Nabi Elia
kana mokolu makava apa iamo mompakasadia pura-
pura. ¹² Tapi Kuuli ka komiu, nakavamo Nabi Elia, aga
ledo nisanira isema ia. Ira aga nangeva bo nom-
pakadaa ia. Bo ivesia muni rapandasara Yaku, Ana nu
Manusia." ¹³ Lako rahaitu pade nisani anaguruNa Ia
nombatesaki i Yohanes Topediu.

I Yesus nompakabelo saito ngana nipesua seta

Markus 9:14-29; Lukas 9:37-43a

¹⁴ Tempo i Yesus ante tatalu anaguruNa nanjili bo
nosinggava ante todea, nakavamo saito langgai nan-
taputu ri ngayo i Yesus bo nanguli, ¹⁵ "Pue, poasimo
anaku! Ia natorompate, nandasa mpuu ia. Ia nasaro
nadungga ri apu atau ri uve. ¹⁶ Nikeniku ia nte anagu-
ruMiu tapi ledo nipakulera mompakabelo ia."

¹⁷ Nanguli i Yesus ka pura-pura tona hamai, "Natantu
mpuu komiu natuvu sii-sii! Komiu nesapuaka mpuu bo
ledo nomparasaya! Sakuyapa kasaena Yaku kana

mosanggani-nggani ante komiu bo mosabara nte komiu pade raparasayamiu! Kenimo tumai ngana tutu!"¹⁸ Bo i Yesus nompopalai seta anu nompakadua ngana haitu, bo nalai mpuumo seta haitu. Bo kaliu-liu nabelomo ngana.

¹⁹ Naliu haitu, ana-anaguru nanggaparai i Yesus tempo ira domo ri tatanga ntodea, bo nekutana, "Guru, nuapa sabana ledo nipakule kami nompopalai seta pangane?"

²⁰ Nesana i Yesus, "Sabana nakura pomparasayamiu. Pariaramo tesaKu hitu. Nau pomparasayamiu aga nakodi eva batu mandoe, mamala komiu mangulika bulu moitu, 'Polinja haumo!' bo bulu moitu molinja mpuu. Ledo ria sangaya anu ledo mamala rapoviamiu.²¹ Tapi seta eva haitu pangane aga namala rapopalai ane komiu nosambaya bo nopusasa."

Pokarajaa i Yesus kaupuna ri bagia Galilea (17:22-18:35)

Karongganina i Yesus notesa kamateNa

Markus 9:30-32; Lukas 9:43b-45

²² Tempo i Yesus bo anaguruNa nosanggani-nggani ri bagia Galilea, nanguli Ia ka ira, "Domo masae, Yaku, Ana nu Manusia, radekei riaru kuasa manusia nadaa,²³ bo rapatesira. Tapi ri eo katataluna Yaku rapakatuvu mpanjili." Nangepe tesaNa haitu, nasusa mpuumo rara anaguruNa pura-pura.

I Yesus nombabayari balasitee ka Banua nu Alatala

²⁴ Nakavapa i Yesus bo anaguruNa ri ngata Kaper-naum, naria saito topesingara balasitee ka Banua nu Alatala. Ia nanggaparai i Petrus bo nekutana, "Gurumu nombabayari balasitee ka Banua nu Alatala atau ledo?"

²⁵ Nesana i Petrus, "Iyo, nibayariNa."

Naupu haitu nanjilimo i Petrus hau ri banua niponturora. Nakava hamai, dopame ia notesa nuapa-nuapa nekutana i Yesus, "Simon, berimba panggavamu? Isema kakanana masipato mombabayari balasitee ka magau-magau ri dunia hitu? Todeana mboto atau tupu ngata ntanina anu nidagina?"[†]

²⁶ Nesana i Petrus, "Tantu tupu ngata anu nidagina masipato mombabayari."

Nanguli i Yesus, "Ane ivesia, todeana mboto ledo paraluu mombabayari balasitee haitu. *Ivesia muni kita anu najadi todea nu Alatala ledo paraluu mombabayari balasitee ka Banua nu Alatala.*²⁷ Tapi nau ivesia, nee kita mompakakodi rara ntona haitu. Agina komiu hau momeka ri rano. Alamo bau pamulana

† *Magau-magau nggaulu ledo nangala balasitee lako ri todeara mboto, tapi lako ri tupu ngata-ngata nidagira atau nijajara.*

ramekamiu. Riaru ngangana mukava sampeka doi anu magana rapombayari balasiteeta randua. Kenimo doi haitu bo bayarimo balasiteeta ka Banua nu Alatala."

Isema naogepa ri Poparenta nu Alatala

Markus 9:33-37, 42-50; Lukas 9:46-48; 17:1-2

18 Ri tempo haitu, anaguru i Yesus nakava nte Ia nompekutana, "Pue, isema naogepa riaru Poparenta nu Alatala?"

² Nangepe haitu, i Yesus nompokio saito ngana kodi bo nipopeanggaNa ri tatanga nu anaguruNa,³ bo nanguli, "Pariaramo tesaKu hitu! Ane komiu ledo mombabali inggumiu bo majadi nasimbayu eva ngana kodi hitu, komiu ledo majadi todea riaru Poparenta nu Alatala.⁴ Jadi tona anu mompakaede rarana bo majadi eva ngana kodi hitu, iamo naogepa riaru Poparenta nu Alatala.⁵ Bo isema-sema nantarima saito ngana kodi eva hitu sabana pomparasayana Yaku, nitarimana muni Yaku.

⁶ Tapi isema-sema mompakanavu saito ngana kodi anu nomparasaya Yaku sampe ia domo momparasaya, nabelopa ane sangu vatu mbaso rapantoesi ri tambolona bo ia rapakalodo rantasi nandala.⁷ Mandasamo tona ri dunia sabana mpengaya-ngaya anu mompakanavu ira riaru dosa. Kana maria tona manavu, tapi mandasa mpuumo topompakanavuna!

⁸ Ane rapana palemiu atau kadamiu manggeni komiu movia dosa, agina pale atau kadamiu haitu ratampasi bo ratedeaka. Aginapa komiu mapudu pale atau mapudu kada asaa komiu matuvu mabelo nte Alatala ri suruga. Aginapa ivehaitu pade maria robingga pale bo robingga kada tapi kaupuna aga ratedaka riaru apu anu navaya sampe ri kasae-saena.⁹ Bo ane rapana matamiu manggeni komiu movia dosa, agina rasuisi bo ratedeaka. Aginapa komiu matuvu ante Alatala ri suruga ante matamiu sabingga. Aginapa ivehaitu pade komiu ratedeaka riaru apu narakaa ante matamu robingga.

¹⁰ Jadi pakabelo-belo, nee mompandaente ngana kodi eva ngana hitu. Sabana Kuuli ka komiu, malaekamalaeka anu nombajagai ira, bate-batena naria ri ngayo nTuamaKu ri suruga.¹¹ Bo Yaku, Ana nu Manusia, nakava ri dunia ala mompakasalama tona nasalandala lako ri dala nTupu."

Porapa bimba nalipo

Lukas 15:3-7

¹² "Berimba panggavamiu? Rapana naria tona nompiara bimbana saatu anguna bo naria sangu nasalandala sampe nalipo. Nuapa rapoviana? Natantumo rapalaisina bimbana siopulu bo sasio ri bulu bo hau raelona sangu bimbana nalipo haitu.¹³ Pariaramo tesaKu hitu! Ane rakavana mpanjili bimbana haitu,

madambapa ia manggita sangu bimbana haitu pade manggita siopulu bo sasio bimbana anu ledo nalipo. ¹⁴ Ivesia muni Tuamamiu ri suruga. Ia ledo madota saitoa lako ri ngana kodi hitu malipo pomparasayana.”

Nuapa masipato rapoviata ane sampesuvuta movia madaa nte kita.

¹⁵ “Ane sampesuvumiu sampomparasaya movia dosa nte komiu, koi hau nte ia bo uli ka ia salana. Tapi potesa nggalinomo ruru komiu randua. Ane ratarimana tesamiu, mabelo mpanjili posampesuvumiu. ¹⁶ Tapi ane ledo madota ia mantarima tesamiu, keni saito atau randua tona ntanina majadi sabi ntesamiu ante ia. Povia ivesia sabana riaru Buku Gasa nitulisi ivei: ‘Ane maria tona rapangadu, kana maria randua atau tatalu sabi ala malanto ia mpuu-mpuu nasala.’

Ulangan 19:15

¹⁷ Ane ia ledo madota mantarima tesara, popaisanimo ka todea topomparasaya. Bo ane ledo madota ia mantarima tesa belo lako nte todea haitu, ia kana rarekemiu nasimbayu eva tona ledo nosisani ante Alatala bo eva topesingara balasitee nadaa.

¹⁸ Pariaramo tesaKu hitu! Nuapa-nuapa nitagimiu ri dunia hitu, haitu anu nitagi muni ri suruga. Bo nuapa-nuapa radekemiu rapovia ntona ri dunia hitu, haitu muni nidekei nu Alatala ri suruga. ¹⁹ Pariara munimo tesaKu hitu! Nau aga nte randua komiu, ane mosangu raramiu mosambaya merapi sangaya, anu niperapimiu haitu tantu radekei nTuamaKu ri suruga ka komiu. ²⁰ Apa ri umba-umba tona nasiromu sabana Yaku, nau aga randua atau tatalu, Yaku mboto naria hamai nosanggani-nggani ante ira.”

Porapa batua ledo nadota mombaampungi roa

Lukas 17:1-4

²¹ Naupu haitu nakava i Petrus nompekutana nte i Yesus, “Pue, ane maria sampesuvuku sampomparasaya ledo naupu-upu madaa nte yaku, sampe sako-nggani ntoto yaku kana mombaampungi ia? Bara sampe pitu-nggani?”

²² Nesana i Yesus, “Ledo aga pitu-nggani, tapi sampe moatu-atu nggani! ²³ NiuliKu ivesia, sabana Poparenta nu Alatala namala rarapaka ivei: Naria saito magau anu madota momparesa doi nipake nu tomaoge. ²⁴ Tempo ia nompamula momparesa doira, naria saito tomaoge niken mantingayo ia. Tomaoge haitu nadea ntoto indana ^{††} nte magau haitu. ²⁵ Tapi ledo nipakule ntomaoge mombabayari indana haitu. Jadi magau nomparenta ala tomaoge haitu rapobalu mosanggani ante bereina, ana-anana, bo pura-pura mbarambarana rabayarika indana haitu.

[†] Basa Yunani: 70 kali 7 nggani. ^{††} 10.000 talenta, haitumo gaji ntona nokarajaa nelabi 15 mpa!

²⁶ Nangepe haitu, nantaputumo tomaoge ri ngayo nu magau nerapi ante mpuu-mpuu rarana, ‘Tua, posabara ntanimo ruru nte yaku. Pura-pura indaku haitu kubayari pakaupu!’

²⁷ Nangepe haitu, naasimo mata magau nanggita tomaoge haitu. Jadi nikabasakana tomaoge bo indana nipakalalinamo.

²⁸ Tempo tomaoge haitu nesuvu ri savalikuna, ia nosintomu ante roana anu noinda sakide nte ia. [‡] Nikojenamo tambolo roana haitu bo nanguli, ‘Bayari puramo indamu nte yaku!’

²⁹ Bo nantaputumo roana ri ngayona nerapi ante mpuu-mpuu rarana, ‘Posabara ntanimo ruru, le. Indaku pura-pura kubayari pakaupu.’ ³⁰ Tapi ledo nadota tomaoge mangepe perapi roana. Ia aga nombasuaraka roana riaru ntarunggu sampe pura-pura indana haitu rabayarina.

³¹ Nasusa mpuumo rara ntomaoge ntanina nanggita anu nipovia ntomaoge pangane ka roana. Jadi hau ira nte magau motesa ka ia pokainggu ntomaoge pangane. ³² Nangepe pangadu haitu, magau nompokio tomaoge anu nadaa poviana bo nanguli, ‘Iko nadaa mpuu! Pura-pura indamu nadea ntoto haitu nilalisikumo sabana iko nerapi nte yaku. ³³ Nakuya iko ledo naasi matamu nanggita roamu nasimbayu eva yaku naasi matakun nanggita iko?’ ³⁴ Jadi nagigi mpuu rara magau nanggita tomaoge anu nadaa poviana haitu. Nidekeina tomaoge haitu riaru kuasa nu topojava tarunggu rapandasa, sampe rabayarina pakaupu pura-pura indana.”

³⁵ I Yesus nompakaupu porapaNa bo nanguli, “Ivesia muni TuamaKu ri suruga movia ka komiu ane ledo raampungimiu sampesuvumiu ante mpuu-mpuu raramiu!”

Polipa i Yesus hau ri ngata Yerusalem (Pasal 19-20)

I Yesus nompatuduki posompo poberei

Markus 10:1-12; Lukas 16:18

¹⁹ Naupu i Yesus nanguli pura-pura anu pangane, nalaimo Ia lako bagia Galilea hau ri bagia Yudea ri sambote Binangga Yordan. ² Nadea mpuu tona nantuntuni Ia bo ri sia Ia nompakabelo tona nadua.

³ Bara sako-ndua toFarisi nakava nte i Yesus mange-lo saba nte Ia. Nekutana ira, “Berimba panggavaMiu? Nangoseaka Atura-atura agamata, mamala langgai mogaaka bereina mombine ante sambara tanje?”

⁴ Nesana i Yesus, “Apa ledo nibacamiu anu nitulisi riaru Buku Gasa? Ri lamba pamulana Alatala nompajadi manusia langgai bo mombine. ⁵ Naupu haitu niuliNa,

[‡] 100 dinar, gaji saatu eo pokarajaa atau gaji pata-mbula.

'Langgai kana mompalaisi tina tuamana bo matuvu mosanggani nte bereina bo ira randua kana majadi saito.' ¹⁶Jadi ri panggita nu Alatala topoberei domo randua tapi saito. Sabana haitu, anu nipakasangu nu Alatala, nee rapopogaa nu manusia."

⁷ Bo nekutana vaimo toFarisi nte Ia, "Ane ivehaitu tano, nuapa sabana i Musa nompaloga langgai mombadekei sura pogaa ka bereina mombine ni-pogaakana?" †

⁸ Nesana i Yesus, "I Musa nompaloga komiu mogaa-ka bereimiu sabana komiu nakaja nipangajari. Tapi ri lamba pamulana ledos ivesia. ⁹Jadi epemo tesaKu hitu. Isema mogaaka bereina mombine anu ledos ria nosipogau nte langgai ntanina, bo mompoberei mombine ntanina, ia nobualo."

¹⁰ Naupu haitu ana-anaguru i Yesus nanguli ka Ia, "Ane ivesia kasusana atura poberei, aginapa ledos moberei!"

¹¹ Nesana i Yesus, "Ledos pura-pura tona mompakule ledos moberei, aga ira anu nipakatantu nu Alatala.

¹² Apa naria tona ledos noberei sabana ivesia mamimo pantuu ka ia lako ri pompoanaka. Naria muni tona ledos noberei sabana anu nipovia ntona ka ia. Bo naria muni tona ledos noberei sabana dotana mboto, ala ia malogapa mantui pokarajaa nTupu. Isema mompakule matuvu maloa, domo moberei."

I Yesus nerapi belo ka ngana-ngana

Markus 10:13-16; Lukas 18:15-17

¹³ Naria sanggani tona nanggeni ana-anara hau nte i Yesus ala radikaNa paleNa ri karora bo mosambaya ka ira. Tapi ana-anaguru i Yesus nompokarau tona gahaitu. ¹⁴ Nanguli i Yesus ka ana-anaguruNa, "Palambakamo ngana-ngana gahitu makava nte Yaku. Nee ratagi ira. Apa aga tona nasimbayu ingguna eva ngana-ngana gahitu masipato majadi todea riaro Poparenta nu Alatala." ¹⁵ Bo nidikaNa paleNa ri balengga ngana-ngana gahaitu merapi belo ka ira. Naupu haitu nalaimo Ia lako ri sia.

Nakaja tona nanjarumaka mbara-mbarana majadi todea riaro Poparenta nu Alatala

Markus 10:17-31; Lukas 18:18-30

¹⁶ Naria saeo saito kabilasa nakava nte i Yesus bo nekutana, "Guru, pokainggu belo mbana kupovia ala kukava katuvua mabelo sampe ri kasae-saena?"

¹⁷ Nesana i Yesus, "Nakuya tano iko nompekutana pokainggu tobelona nte Yaku? Aga Alatala nabelo, ledos ria ntanina. Ane iko madota manggava katuvua nabelo sampe ri kasae-saena, oseakamo parenta-parenta nu Alatala."

¹⁸ Bo nekutana vaimo tona haitu, "Parenta-parenta umbana?"

Nesana i Yesus, "Nee mepatesi, nee mobualo, nee mangangga, nee mosabi dava, ¹⁹ bilamo tina tuamamu, bo potovemo singgamanusiamu nasimbayu eva pompotovemu karomu mboto." ‡

²⁰ Nanguli kabilasa haitu ka i Yesus, "Parenta-parenta tutu nioseakaku puramo. Nuapapa masipato kupovia?"

²¹ Nesana i Yesus, "Ane iko mpuu-mpuu madota majadi mabelo bo masipato manggava katuvua nabelo sampe ri kasae-saena, koimo pobalu puramo kakalumanamu bo dekei alina haitu ka tona napakasi ala mukava kakalumana ri suruga. Maupu haitu oseakamo Yaku!"

²² Nangepe tesa i Yesus, nalaimo kabilasa haitu ante nasusa rarana, sabana nadea mpuu kakalumanana.

²³ Bo nanguli i Yesus ka ana-anaguruNa, "Pariaramo tesaKu hitu! Nakaja mpuu tona nakalumana matundu nte Alatala bo majadi todeaNa. ²⁴ Bo Kuuli muni ka komiu, namurapa unta mesua ri puki jaru pade tona nakalumana matundu nte Alatala bo majadi todeaNa."

²⁵ Nangepe tesa i Yesus haitu, natekaja mpuumo anaguruNa sampe niulira, "Ane ivesia, isema tano mamala rapakasalama?"

²⁶ I Yesus nangganoto ira bo nanguli, "Ane aga lako ri mompakule manusia, natantu ledos ntoto maria saitoa rapakasalama. Tapi ane lako ri mompakule nu Alatala pura-pura mamala majadi."

²⁷ Bo nanguli i Petrus, "Peintamo, Pue! Kami mompalaisi pura-pura anu kami bo nangoseaka Komiu. Nuapa rakava kami bara maipia?"

²⁸ Nesana i Yesus ka ira, "Pariaramo tesaKu hitu. Yaku, Ana nu Manusia momparenta ante kuasa bara maipia tempo Alatala mompakabarum pengaya-ngaya. Bo komiu topangoseaka Yaku momparenta mosanggani-nggani nte Yaku bo monturo ri sapulu randua gadera magau bo mombatangara todea Israel, haitumo muli nu sapulu randua ana i Israel. ²⁹ Isema-sema mompalaisi banuana bara sampesuvuna bara tina tuamana, bara ana-anana, bara taluana sabana ia nangoseaka Yaku, tona haitu radekei saatu-nggani kadeana. Bo ia muni radekei katuvua mabelo sampe ri kasae-saena. ³⁰ Tapi nadea tona narikolu sii-sii, majadi maripuri bara maipia. Bo nadea muni tona anu naripuri sii-sii, majadi marikolu bara maipia."

Porapa tona nigaji nokarajaa ri talua ntona

20 I Yesus nanguli, "Tempo Alatala momparenta mpo Magau bo mombabalasi pokainggu ntodeaNa bara maipia masimbayu eva porapa hitu: Naria saito tona notalua anggur. Nasadondo mpuu ia

† Kajadia 2:24 †† Ulangan 24:1

‡ Pesuvu 20:12-16; Ulangan 5:16-20; Imamat 19:18

nesuvu lako ri banuana hau mangelo tona ragajina mokarajaa ri taluana. ² Nikavana bara sako-ndua topokarajaa bo nasitujumo ira simbo sampeka doi salaka gajira saeo. Naupu sia nituduna ira hau mokarajaa ri taluana. ³ Tinti sasio mpadondona, hau vaimo tupu ntalua mangelo topokarajaa hanupa. Niki-tana bara sako-ndua tona ri potomu aga nonturo-nturo bayangi. ⁴ Niulina ka ira, 'Koimo komiu mokarajaa ri taluaku ria, damo kubayari gaji masipato ka komiu.' Jadi hau mpuumo ira nokarajaa. ⁵ Tinti sapulu randua hau vai tupu ntalua haitu mangelo topokarajaa hanupa. Niulina ka ira nasimbayu eva niulina ka tona pangane. Bo ivesia muni nipoviana tinti tatalu nggoviana.

⁶ Nitasere tinti alima nggoviana, hau vaimo tupu ntalua haitu mangelo topokarajaa hanupa. Niposing-gavakana bara sako-ndua tona aga nonturo-nturo ledo ria pokarajaa. Nipekutanana, 'Nokuya komiu nju-maeo aga nonturo, ledo nokarajaa?'

⁷ Nesana ira, 'Ledo naria tona nombagaji kami.'

Bo nanguli tupu ntalua haitu, 'Ane ivesia, koimo pokarajaa ri taluaku.' Bo hau mpuumo ira.

⁸ Nasolopa eo, nanguli tupu ntalua haitu ka mandorona, 'Pokia puramo topokarajaa bo bayari puramo gajira mompamula nte tona dako nompamula nokarajaa tinti alima sampe ira anu nokarajaa lako ri mpadondona.'

⁹ Nakavamo topokarajaa anu nompamula tinti alima nggoviana, bo ira nidekei simbo sampeka doi salaka.

¹⁰ Ivesiamo sampe nakava nte topokarajaa anu nokarajaa lako ri mpadondona. Nisarumakara ira rabayari melabipa pade tona dako nesua nokarajaa nggoviana, tano gaji nidekei ka ira nasimbayu ante tona ntanina haitu, aga simbo sampeka doi salaka.

¹¹ Naupu ira nantarima gajira, nongaumo ira ka tupu ntalua ivei: ¹² 'Topokarajaa anu nakava nggoviana aga sajaa nokarajaa. Kami hii nokarajaa ntamo njumaeo ri kapane nu eo, tapi komiu nombadekei ka ira gaji nasimbayu ante kami!'

¹³ Nanguli tupu ntalua ka topotesa haitu, 'Sampesuvu, yaku ledo nasala nte komiu. Botuta gajimiu sampeka doi salaka saeo. ¹⁴ Jadi alamo gajimiu bo palaimo. Dotaku mombadekei gaji ka tona anu nakava ri puri nasimbayu eva nidekeiku ka komiu. ¹⁵ Ledo mamala yaku movia anu nipodotaku ante doiku mboto? Bara nasiriati komiu nanggita yaku movia nabelo ka tona ntanina?'

¹⁶ Bo i Yesus nompakaupu porapa haitu ante nanguli, 'Ivesia muni bara maipiapa, tona naede panggana siii-sii majadi tona malanga panggana. Bo nadea muni tona nalanga panggana siii-sii majadi tona maede panggana.'

Katalu-ngganina i Yesus notesa kamateNa

Markus 10:32-34; Lukas 18:31-34

¹⁷ Tempo haitu i Yesus bo anaguruNa hau ri ngata Yerusalem. Riara polipara nipokioNa sapulu randua anaguruNa masiromu nompatani lako ri todea bo niuliNa ka ira, ¹⁸ "Epemo pakabelo-belo! Sii-sii kita mantende hau ri ngata Yerusalem. Hamai ngena Yaku, Ana nu Manusia, radekeika balengga-balengga ntopanggeni pesomba bo guru-guru agama, bo Yaku rahukura mate. ¹⁹ Maupu haitu Yaku radekeira ka tona ledo toYahudi. Bo Yaku rapongei-ngeikara bo racambu pakandasa, bo kaupuna Yaku rapaku ri kayu salib sampe mamate. Tapi ri eo katataluna Yaku rapakatuvu mpanjili."

Pomperapi tina i Yakobus bo i Yohanes

Markus 10:35-45

²⁰ Naliu haitu berei i Zebedeus nakava nte i Yesus niporoa anana randua *haitumo i Yakobus bo i Yohanes*. Nantaputumo mombine haitu ri ngayo i Yesus sabana naria anu raperapina. ²¹ Nekutana i Yesus, "Ina, nuapa nipodotamu?"

Nesana totua mombine haitu, "Yaku madota ala anaku randua hitu monturo ri sinjoriMiu tempo Komiu mompamenta eva Magau, saito ri sabingga njidiMiu bo saito ri sabingga ngganaMiu."

²² Tapi nanguli i Yesus ka anana, "Ledo nisanimiu nu-apa niperapimiu. Rapakulemiu mombarasai pepandasa anu Kurasai?"

Nesana ira, "Rapakule kami!"

²³ Bo nanguli i Yesus ka ira, "Nakana mami komiu mombarasai pepandasa eva pepandasa Kurasai. Tapi ledo Yaku nakuasa mompakatantu isema masipato monturo ri sabingga ngganaKu bara ri sabingga njidiKu. Ponturo haitu aga bagia ntona anu nipakatantu nTuamaKu."

²⁴ Tempo sapulu anaguru i Yesus ntanina nangepe perapi roara randua, naraumo rarara. ²⁵ Tapi i Yesus nombaronde ira pura-pura bo niuliNa ka ira, "Nisanimiu mbotomo ane todea-todea anu ledo nosisani nte Alatala, topoparentara nompandasa todeara, bo pakeni-pakenira nompatundu todeara. ²⁶ Tapi ledo mamala ivesia ante komiu. Isema-sema komiu madota majadi pakenimiu, ia kana majadi topotulungimiu. ²⁷ Bo isema-sema madota majadi marikolu, ia kana majadi batuamiu ²⁸ masimbayu eva Yaku, Ana nu Manusia. Yaku ledo nakava ri dunia hitu ala ratande ntona, tapi ala mombatulungi tona, bo mombadekei karoKu rapatesi mantolo dosa ntona dea."

I Yesus nompakabelo randua tobuoro

Markus 10:46-52; Lukas 18:35-43

²⁹ Tempo i Yesus ante ana-anaguruNa nompalaisi ngata Yerikho, nadea mpuu tona nantuntuni Ia. ³⁰ Ri sia naria randua tona naburo nonturo ri soso dala. Nangepe kareba i Yesus noliu ri dala haitu, nongarengaremo ira, "Muli Magau Daud! Poasimo kami!"

³¹ Tapi todea ri sia narau ka ira randua bo nongonteaka ira, "Nee makanano! Kalinomo!" Tapi tobuoro haitu aga nantambai nongare ante suara namangga, "Muli Magau Daud! Poasimo kami!"

³² Bo netaamo i Yesus bo nombaronde ira. Nekutana Ia, "Nuapa rapokonomiu Kupovia ka komiu?"

³³ Nesana ira randua, "Pue, kami madota mekita!"

³⁴ Naasi mpuu mata i Yesus nanggita ira, jadi nituiNa matara bo kaliu-liu namalamo nekita. Bo hau ira randua nantuntuni i Yesus.

Povia bo pepatuduki i Yesus ri ngata Yerusalem (Pasal 21-22)

I Yesus nesua ri ngata Yerusalem eva magau

Markus 11:1-11; Lukas 19:28-40; Yohanes 12:12-19

21 Tempo naparamo ngata Yerusalem, ira nakava ri ngata Betfage ri kente nu Bulu Zaitun. Ri sia i Yesus nantudu randua anaguruNa mokolu. ² NiulikaNa ira, "Koimo pokolu rangata moitu. Makava hamai, kaliu-liu rakavamiu sangu keledai besina nitataka nosanggani-nggani ante anana. Volemo kaloro nu keledai ntali ana bo umbu tumai. ³ Ane maria tona mompekutana komiu, ulika ira, 'I Pue madota mompake keledai hitu sampalai bo rapopanjiNa vai ngena.' †"

⁴ Haitu najadi ala madupa tesa nu Alatala anu niboto nu nabi nggaulu ivei:

⁵ Ulimo ka tupu ngata Sion ††,

"Peinta! Ritumo magaumiu makava nte komiu!

Ia naede rarana, Ia nesavi keledai, ‡
ana nu keledai."

Yesaya 62:11; Zakharia 9:9

⁶ Jadi hau randua anaguru i Yesus novia anu nitevaiNa ka ira. ⁷ Niumburamo keledai ntali ana hau nte i Yesus. Nakava hamai nidikara baju-baju ndoera ri bengo nu keledai haitu bo nesavimo i Yesus. ⁸ Tempo i Yesus noliu ri dala jama, nadea mpuu tona nombavo keledai baju ndoera ri dala, bo naria sanu nangala tava-tava kayu nitalera ri dala *mombabila i Yesus*. ⁹ Bo

† 'I Pue madota mompake keledai hitu.' Bo kaliu-liu radekeina komiu mangeni binata haitu tumai. †† Sion sanga nu bulu ri ngata Yerusalem. Jadi ngata Sion nasimbayu nte ngata Yerusalem. ‡ Ia nesavi keledai: Tempo haitu, ane magau nakava nesavi jara, batuan ia nakava meeve. Tapi ane magau nakava nesavi keledai, batuan ia nakava mosinggabelo.

todea ri kolu i Yesus ante topetuntuni ri puri nongarengare,

"Hosana! Ratoiyamo Muli Magau Daud!

Maoge belo ka Magau anu nakava niposumba nu Alatala!

Ratoiyamo Alatala ri suruga!"

Mazmur 118:25-26

¹⁰ Tempo i Yesus nesua ri ngata Yerusalem, nagado puramo tona ri sia. Ira nosimpekutana-tanamo, "Isema tano tona hitu?"

¹¹ Nesana todea nantuntuni Ia, "Tamo i Yesus, nabi lako ri ngata Nazaret ri bagia Galilea!"

I Yesus nompopalai tona nobalu-balu riaru Banua nu Alatala

Markus 11:15-19; Lukas 19:45-48; Yohanes 2:13-22

¹² Hau i Yesus nesua ri doyata Banua nu Alatala bo nipopalaiNa pura-pura tona nobalu-balu ri sia. NisumbolinakaNa meja-meja ntoposula doi †† bo bangku-bangku ntopobalu tonji banggebodo. ¹³ NiulikaNa ira, "Riaru Buku Gasa nitulisi ivei: 'BanuaKu kana rauli banua posambaya.' †† Tapi komiu ri sii nompajadi Banua nu Alatala hitu petabuni ntopeago!"

¹⁴ Naliu haitu tona naburo bo tona nakejo bo nakoyo nakava nte i Yesus ri Banua nu Alatala. Bo nipakabeloNamo ira. ¹⁵ Tapi balengga-balengga ntopanggeni pesomba bo guru-guru agama naraumo rarara nanggita kabaraka-kabaraka nipovia i Yesus. Bo nagigimo rarara nangepe ngana-ngana ri Banua nu Alatala nongarengare, "Hosana! Ratoiyamo Muli Magau Daud!"

¹⁶ Niulikara i Yesus, "Ledo niepeMiu anu niuli ngana-ngana hitu? Nakuya bo ledo nitagiMiu?"

Nesana i Yesus, "NiepeKumo. Nakuya tano? Ledo nibacamiu anu nitulisi riaru Buku Gasa ivei:

Ngana-ngana bo ngana da netomi nipatudukiMiu mantoiya Komiu."

Mazmur 8:3

¹⁷ Naupu haitu i Yesus nompalaisi ira, pade nesuvu Ia lako ri ngata Yerusalem hau ri ngata Betania. Bo natu-rumo Ia sambongi hamai.

I Yesus nompindasi sanggayu kayu ara

Markus 11:12-14, 20-24

¹⁸ Naeo mpadondo i Yesus ante anaguruNa nanjili hau ri ngata Yerusalem. Naaramo taiNa. ¹⁹ Ri soso dala nikitaNa sanggayu kayu ara. Jadi hau Ia nanggaparai kayu haitu, tapi nau aga sangu vuana ledo ria nika-vana, aga tavana bayangi. Jadi niuliNa ka kayu haitu, "Mompamula eo hitu, domo movua iko!" Bo kaliu-liu nalemo kayu haitu.

†† Toposula doi tona anu nanjula doi lako ri ngata ntanina ala tona mamala mombayari balasitee Banua nu Alatala bo mangali binata rapesomba. †† Yesaya 56:7

²⁰ Nokumaamo rara nu ana-anaguruNa. Nipekuta-nara nte Ia, "Berimba sampe kayu ara haitu kaliu-liu namate ivehaitu?"

²¹ Nesana i Yesus, "Pariaramo tesaKu hitu. Ane komiu momparasaya, bo ledo molengga-lengga raramiu, komiu muni mamala movia anu nipoviaKu ka kayu haitu. Bo ledo aga ivesia, komiu mamala mangulika bulu hitu, 'Kateunggatakamo! Katedaka rantasi!', bo majadi mpuu. ²² Ane komiu momparasaya Alatala, nu-apa-nuapa raperapimiu riaro mposambayamiu majadi mpuu."

Pakeni agama Yahudi ledo momparasaya kuasa i Yesus lako nte Alatala

Markus 11:27-33; Lukas 20:1-8

²³ I Yesus nesua riaro doyata Banua nu Alatala bo mompaguru. Da ranja mompaguru Ia, nakavamo balengga-balengga ntopanggeni pesomba bo totua-totua ntoYahudi. Ira madota mangelo saba, jadi nipekutanara nte i Yesus, "Ante kuasa nuapa nipovi-aMiu pura-pura haitu ri Banua nu Alatala? Isema nombadekei kuasa haitu ka Komiu?"

²⁴ Nesana i Yesus, "Kupekutana muni nte komiu. Ane rapesanakamiu, Kuuli isema nombadekei kuasa ka Yaku movia anu haitu. ²⁵ Uli ka Yaku, isema nombadekei kuasa ka i Yohanes mombadiu tona? Alatala atau manusia?"

Jadi nosiulikamo pakeni ntoYahudi, "Berimba kita mesana ka Ia? Ane raulita i Yohanes mombadiu ante kuasa lako nte Alatala, rauliNa vai ka kita, 'Ane ivesia, nakuya ledo niparasayamiu i Yohanes?' ²⁶ Tapi ane raulita kuasana lako nte manusia, naeka kita nte todea, sabana ira pura-pura momparasaya i Yohanes mpuu-mpuu nabi nTupu." ²⁷ Jadi nesana ira ka i Yesus, "Ledo nisani kami lako ri umba kuasana."

Jadi i Yesus nanguli ka ira, "Ane ivesia, ledo muni Kuuli ka komiu isema nombadekei kuasa ka Yaku movia mpengaya-ngaya hitu."

I Yesus nangonteaka pakeni ntoYahudi ante sangu porapa randua ngana

²⁸ I Yesus nompekutana pakeni ntoYahudi, "Berimba panggavamiu? Naria saito tuama, randua anana langgai. Nanguli ia ka anana lumbua, 'Anaku, koimo iko mokaarajaa ri talua.' ²⁹ Bo nesana ana lumbua, 'Ledo yaku hau!' Tapi naliu haitu nanjoso raramo ia bo kana hau mpuumo ia nokarajaa ri talua. ³⁰ Hau vai tuamana nte anana karanduana bo niulikana, 'Anaku, koimo iko mokaarajaa ri talua.'

Tapi nesana ngana haitu, 'Iyo, Tata. Hau yaku.' Tano mai, ledo hau ia." ³¹ Nanguli i Yesus ka pakeni ntoYahudi haitu, "Jadi lako ri ngana randua haitu, isemana nangoseaka dota nuamana?"

Nesana ira, "Ngana paratamana."

Nanguli i Yesus ka ira, "Nakana pesanamiu. Tapi pariaramo tesaKu hitu, tona nadaa eva topesingara bala-sitee bo bajinga-bajinga mokolu majadi todea riaro Poparenta nu Alatala, ledo komiu. ³² Sabana, i Yohanes Topediu neonga mompatuduki dala nanao ka komiu, tapi ledo niparasayamiu ia. Tapi topesingara balasitee bo bajinga momparasaya ia. Bo nau nikitamiu pura-pura anu nikitara, ledo najea komiu, bo ledo ntoto niparasayamiu."

I Yesus nangonteaka pakeni ntoYahudi vai ante mompakasimbayu ira ante topokarajaa ledo novia dotantupu talua

Markus 12:1-12; Lukas 20:9-19

³³ I Yesus mompapola tesaNa ka pakeni-pakeni ntoYahudi. NiuliNa, "Epe porapa ntanina. Naria saito tupu ntalua nombatuda anggur ri taluana. Nivalana ntiku talua haitu bo nikaena lovu ri vatu rapompea vua anggur. Bo nipoviana sou pojaga ri talua haitu. Naupu haitu nibolina talua haitu nte bara sako-ndua topokarajaa momjangina, damo rabagi aselena, bo hau ia ri ngata nakavao. ³⁴ Nakavapa tempona mompupu vua anggur, nitudunamo bara sakuya-ndua batua-hau nte topokarajaa talua ala mantarima bagiana lako ri vua anggur. ³⁵ Tapi topokarajaa talua haitu nombasaka batua nituduna, saito nibobara, saito nipatesira, bo saito nirempera ante vatu. ³⁶ Jadi tupu ntalua nombatudu batua ntanina hau nte topokarajaa taluana. Nadeapa ira haitu pade ira pamulana, tapi ira muni nipovia ntopokarajaa talua nasimbayu mpo batua-batua pamulana. ³⁷ Kaupuna nituduna anana mboto apa nipekirina, 'Natantumo kana rabilara anaku!' ³⁸ Tapi tempo topokarajaa talua haitu nanggita ana ntupu ntalua tumai, nosiulikamo ira, 'Eh! Tumaimo ana ntupu ntalua anu rakaboli mbara-mbara ntotuana. Anumo! Rapatesitamo ia ala talua hitu raalata majadi bagiata.' Jadi nisakaramo ana ntupu ntalua haitu bo nikenira hau ri savaliku ntalua bo nipatesira."

⁴⁰ I Yesus mompekutana pakeni ntoYahudi haitu, "Berimba panggavamiu? Ane tupu ntalua haitu manjili ngena, nuapa rapoviana ka topokarajaa haitu?"

⁴¹ Nesana ira, "Natantumo rapatesina ira nadaa haitu bo rabolina taluana ka tona ntanina anu madota mombadekei ka ia bagiana lako ri asele ntalua ri tempona."

⁴² Nanguli i Yesus ka ira, "Natantu nibacamiumo tesa riaro Buku Gasa anu *nombatesa Magau Topepakasalama* ivei:

Vatu nitedeaka ntopovia banua vatu haitumo anu nopokopa ka banua haitu. Haitu nipovia nTupu, bo nabelo mpuu ri panggitata!"

Mazmur 118:22-23

⁴³ Nanguli muni i Yesus ka ira, “*Ivesia muni sanu komiu nompoara Yaku*. Jadi Kuuli ka komiu, bagiamiu riaru Poparenta nu Alatala raala lako nte komiu bo radekei ka tona ntanina anu mangoseaka dota nu Alatala. ⁴⁴ Bo isema-sema manavu ri watu haitu marupusaka, bo isema-sema rarumpi nu watu haitu maoya mpeje.”

⁴⁵ Tempo balengga-balengga ntopanggeni pesomba bo toFarisi nangepe porapa i Yesus haitu, nisanira porapa-porapa gahaitu nipambela ka ira. ⁴⁶ Jadi nipasimbukura mombasaka i Yesus. Tapi naeka ira magado todea apa nangoseaka panggava ntodea i Yesus haitu nabi.

I Yesus nangonteaka pakeni ntoYahudi ante porapa posusa poberei

Lukas 14:15-24

22 I Yesus nombatesa porapa ntanina ka pakeni ntoYahudi. NiuliNa, ² “Poparenta nu Alatala nasimbayu nte porapa hitu. Naria saito magau novia posusa poboti ka anana langgai. ³ Nituduna batua-batua hau mompokio pura-pura tona anu nigagana makava ri posusa haitu Tapi ira nigaga haitu, ledo ria saitoa nadota hau. ⁴ Jadi magau nombatudu batua-batua ntanina ante tevai ivei: ‘Koi ulika ira nigagaku, nasadia puramo. Japi bo ana-ana japi toboyana naupumo nisambale, bo nasadia puramo. Kamaimo tumai ri posusa!’ ⁵ Tapi tona nigaga ledo ntoto nipeilira pegaga haitu. Ira aga hau nantui bagora mboto. Naria hau ri taluana bo naria hau nombaurusi pogadena, ⁶ roara ntanina aga nosaka batua-batua nitudu nu magau haitu pade nibobara bo nipatesira. ⁷ Nangepe anu najadi haitu, nagigi mpuumo rara magau. Nituduna tantara-tantarana hau mompatesi topepatesi haitu bo mombatunju ngatara.

⁸ Naliutaka haitu nipokiona vai batua-batuana bo nanguli ka ira, ‘Nasadio posusa poboti, tapi tona nigagaku ledo masipato makava. ⁹ Jadi koimo hau ri dala-dala jama bo isema-sema raposinggavakamiu, gagamo ira tumai ri posusata hitu.’ ¹⁰ Jadi haumo batua-batuana mompasirumu pura-pura tona raposinggavakara ri dala-dala jama, tona nabelo, bo tona nadaa sampe naponu pura banua posusa haitu ante torata.

¹¹ Bo nesuamo magau manggita torata-torata. Ri tatanga ntorata hamai nikitana saito tona ledo nompake pakea posusa. ¹² Nipekutana nu magaumo tona haitu, ‘Vega, nakuya tano komiu nesua ri sii ledo nopakea anu masipato rapake niposusa?’ Tapi tona haitu ledo notingo. ¹³ Bo nanguli magau ka batuana, ‘Soomo palena bo kadana bo tedeakamo ia hau ri savalikuna ri ponturo nalanda. Hamai ia motumangi bo masinggiki ante kasusa.’”

¹⁴ Bo i Yesus nompakaupu porapaNa ivei: “Nadea tona nipokio, tapi aga sakide nipelisi.”

ToFarisi nompasimbuku mombaopa tesa i Yesus ante nekutana pombayari balasitee

Markus 12:13-17; Lukas 20:19-26

¹⁵ Naupu haitu bara sako-ndua toFarisi nasiromu notesaki anu rapoviara ala mamala raopara i Yesus motesa. ¹⁶ Nitudura bara sako-ndua ana-anagurura bo bara sako-ndua tona nosabingga nte Magau Herodes † hau nte i Yesus bo manguli ivei: “Guru, nisan kamimo Komiu tona nanao. Komiu nompatuduki pakalanto dota nu Alatala ka manusia. Komiu ledo naeka ante isema-sema sabana Komiu ledo nompelenje. ¹⁷ Jadi uli ka kami panggavaMiu. Nangoseaka Atura-atura agamata, masipato kita mombabayari balasitee ka Magau Mbaso Kaisar atau ledo?”

¹⁸ Tapi nisan i Yesusmo patujura nadaa. Haitu sampe niuliNa, “Komiu tobelo ri sumba! Nakuya komiu nompasimbuku mombaopa tesaKu? ¹⁹ Popakita ka Yaku sampeka doi salaka anu nipakemiu mombayari balasitee.” Jadi nipopakitara ka Ia sampeka doi haitu. ²⁰ Nekutana i Yesus, “Lenje bo sanga isema nigambara ri doi hitu?”

²¹ Nesana ira, “Lenje bo sanga Magau Mbaso Kaisar.”

Jadi nanguli i Yesus ka ira, “Ane ivesia, dekei ka Magau Mbaso anu masipato radekei ka Magau Mbaso, bo dekei ka Alatala anu masipato radekei ka Alatala!”

²² Nangepe pesana i Yesus haitu, nokumaa mpuumo ira. Jadi kaupuna nalaimo ira.

ToSaduki nekutana bara matuvu mpanjili tona namate

Markus 12:18-27; Lukas 20:27-40

²³ Eo haitu muni naria bara sako-ndua toSaduki nakava netingu nte i Yesus. ToSaduki nomparasaya tona namate ledo matuvu mpanjili bara maipia.

²⁴ Nipekutanara nte i Yesus, “Guru, Nabi Musa nompatuduki ivei: Ane maria langgai namate ledo noana, sampesuvuna langgai kana mompoberei timbalana haitu ala moana bo ana haitu rareke muli nu sampesuvuna anu namate. ²⁵ Naria nte kami tona nosampesuvu papitu langgai bayangi. Lumbuana noberei tapi dopame ira njamboko noana, namatemo ia. Naupu haitu timbala haitu nipoberei ntuei nu langgai.

²⁶ Dopame noana, namate munimo tueina haitu. Bo ivesia muni najadi ante tuei katataluna sampe ri tuei kapapituna. ²⁷ Kaupuna namate munimo mombine haitu. ²⁸ Jadi tempo bara maipiapa, ane tona namate matuvu mpanjili, mombine haitu majadi berei isema, apa ia nipobereira pura-pura?”

† ToFarisi nanguli nasala nombayari balasitee ka Magau Mbaso Kaisar. Tapi tona nosabingga ante Magau Herodes nanguli balasitee haitu masipato rabayari. †† Ulangan 25:5

²⁹ Nesana i Yesus, “Nasala mpuu komiu sabana ledo nisanimiu isi Buku Gasa, bo ledo muni nisanimiu kuasa nu Alatala. ³⁰ Tempo tona namate matuvu mpanjili bara maipia, katuvura masimbayu eva malaeka-malaeka ri suruga, ira domo moberei. ³¹ Berimbamo? Natantu nibacamiu anu nitesa nu Alatala riaru Buku Gasa, haitumo tona namate matuvu mpanjili. ³² *Nau nasaemo kamate i Abraham, i Ishak bo i Yakub, Alatala nanguli, ‘Yakumo Alatala nisomba i Abraham, i Ishak bo i Yakub.’* [†] Batuana, ira da natuvu bo nombasomba Alatala. Apa nisanita Alatala ledo nisomba ntona namate tapi Ia nisomba ntona natuvu.” ³³ Nangepe pesana i Yesus haitu, nokumaamo todea ka pepatudukiNa.

ToFarisi nombaoapa tesa i Yesus ante nompekutana Parenta nu Alatala mbana nopoko ntoto

Markus 12:28-34; Lukas 10:25-28

³⁴ Tempo toFarisi nangepe kareba toSaduki domo nokanano sabana nidagi i Yesus, nasiromumo ira. ³⁵ Bo saito ira guru agama nompasimbuku mombaopa tesa i Yesus. Nipekutanana ivei: ³⁶ “Guru, lako ri pura-pura parenta ri Atura agama, umbana nopoko ntoto?” ³⁷ Nesana i Yesus, “Potovemo Alatala Tupumiu ante mpuu-mpuu raramiu, ante pura-pura noto mpekirimiu, bo ante pura-pura pokainggumiu. ^{†38} Haitumo parenta pamulana anu nopoko ntoto. ³⁹ Bo parenta karanduana nasimbayu ante parenta pamulana ivei: Potovemo singgamanusiamiu nasimbayu eva komiu nompotove karomiu mboto. ⁴⁰ Pura-pura Atura agama bo pepatuduki nu nabi-nabi nggaulu nopuna lako ri randua parenta haitu.”

I Yesus nompekutana toFarisi isema Magau Topepakasalama

Markus 12:35-37; Lukas 20:41-44

⁴¹ Tempo toFarisi da nasiromu hamai, i Yesus nompekutana ira, ⁴² “Berimba panggavamiu? Muli isema Magau Topepakasalama anu nijanji nu Alatala nggaulu?”

Nesana ira, “Muli Magau Daud nggaulu.”

⁴³ Nanguli i Yesus, “Ane ivesia, nuapa sabana Magau Daud nanguli Topepakasalama haitu Puena? Apa ante pekeniaka Nosa Gasa nu Alatala, i Daud nanguli ivei:

⁴⁴ Tupu nanguli ka Pueku, [‡]

‘Kaimo, ponturomo ri sablingga ngganaKu sampe pura-pura baliMu Kupopekou nte Iko.’

Mazmur 110:1

⁴⁵ Jadi ane i Daud mboto nanguli Magau Topepakasalama haitu Puena, berimba sampe rauli Ia muli Magau Daud?”

[†] Pesuvu 3:6,15 ^{††} Ulangan 6:5 [‡] Imamat 19:18 ^{‡‡} Alatala notesa ka Magau Topepakasalama anu nijanjiNa makava bara ipia.

⁴⁶ Ledo ria saitoa tona namala nompesanaka i Yesus. ^{‡‡} Bo nompamula lako ri eo haitu, domo naria tona nabia nombaoapa tesaNa.

I Yesus nangonteaka pakeni agama Yahudi

Matius 12:38-40; Lukas 11:37-54; 20:45-47

23 Naupu haitu i Yesus nanguli ka todea bo ananaguruNa ivei: ² “Guru-guru agama bo toFarisi nipakakuasa mompatuduki Atura-atura agama nipapola Nabi Musa. ³ Haitu sampe komiu masipato mangoseaka bo matundu ri pura-pura anu nipatudukira ka komiu. Tapi nee rapasiala pokainggura, sabana ira mboto ledo nangoseaka pepatuduki nipatudukira ka komiu. ⁴ Ira aga nompakadea atura-atura bo ada-ada nakaja raoseaka bo ira nompasuu tona mangoseakana. Tapi ira mboto ledo nadota nombatulungi tona mangoseaka atura bo ada haitu. ⁵ Pura-pura poviara aga nipovia ala rakita ntona. Peinta pomboli Tesa Gasa anu nipou ri kirera! ^{‡‡‡} Bo peinta, nandoe vera ri bivi bajura ^{‡‡‡} *mompopakita katutura nangoseaka parenta nTupu!* ⁶ Nipokonora nonturo ri ponturo tobelona ri posusa bo ponturo nibila ri banua petupu. ⁷ Nipokonora rabila ntona ri potomu bo nadambalarara ane tona nanggasangai ira ‘Guru’.

⁸ Tapi komiu, aga saito Gurumiu bo komiu pura-pura nosampesuvu. Jadi nee radekei tona mombabila komiu bo manggasangai komiu ‘guru’. ⁹ Bo nee mompakalanga tona ri dunia hitu ante manggasangai ia ‘Tuama’, sabana aga saito masipato rakasangai ‘Tuama’, Iamo Alatala, Tuamamiu ri suruga. ¹⁰ Bo nee radekei tona manggasangai komiu ‘tua’ sabana aga saito masipato rakasangai ‘Tua’, Iamo Yaku, Topepakasalama anu nijanji nu Alatala. ¹¹ Isema-sema majadi tomaoge ri tatangamiu, ia kana majadi potudumiamiu. ¹² Isema-sema mompakaoge karonu mboto, kana rapakaede nu Alatala, bo isema-sema mompakaede rarana mboto, kana rapakaoge nu Alatala.

¹³ Tapi mandasa mpuumo komiu guru-guru agama bo toFarisi! Komiu aga nabelo ri sumba tapi nadaa riaru. Komiu nombalava tona ntanina majadi todea riaru Poparenta nu Alatala. Komiu mboto ledo madota raparenta nu Alatala bo ledo nidekeimiu tona ntanina anu madota raparentaNa.

¹⁴ Mandasa mpuu komiu guru-guru agama bo toFarisi! Komiu aga nabelo ri lenje tapi nadaa riaru!

^{‡‡} *Batuana tesa i Yesus, Iamo Topepakasalama bo naogepa Ia pade Magau Daud. Nisani ntoFarisi batuana haitu tapi ledo ni-parasayara Ia. Sia sampe ledo nipesanakara Ia. ‡‡† Pomboli Tesa Gasa: pomboli ayat-ayat lako ri Buku Gasa. Biasa nipou ntoYahudi ri kire atau ri kabosu mompopatora ira kana mangoseaka Atura agama. Peinta Ulangan 6:6-9. ‡‡‡ Nandoe vera ri bivi bajura: ToYahudi nombavera bivi pata-mbivi baju ndoera mompopakita pangoseakara Alatala bo mompopatora ira kana matundu nte parentaNa. ToFarisi bo guru agama nompake vera nandoe mpuu ala rasarumaka ntona tona nabelo mpuu. Peinta Bilangan 15:38-40.*

Komiu nombabagiu timbala-timbala ala raalasimiu banuara. Bo nitabuniakamiu pokainggumiu nadaa haitu ante nosambaya pakandoe. Haitu sampe mantamo mpuu pehuku rapambela ka komiu bara maipia!

¹⁵ Mandasa mpuu komiu guru-guru agama bo to-Faris! Komiu aga nabelo ri lenje tapi nadaa riar! *Nakadiki mpuu komiu mompatuduki tona ntanina mangoseaka pepatudukimiu.* Komiu hau nevote tasi bo nolipa nakavao mangelo nau aga saito tona mesua agamamiu. Bo nesuapa ia, komiu nanggeni ia majadi rongganipa kadaana pade komiu mboto!

¹⁶ Mandasa mpuu komiu pakeni-pakeni anu naburo! Komiu nompatuduki ivei: 'Ane tona mosumpa ante manggasangai Banua nu Alatala, ia ledo rapou sumpana haitu. Tapi ane ia mosumpa ante manggasangai bulava riar Banua nu Alatala, ia rapou nu sumpana haitu.' ¹⁷ Nadoyo mpuu komiu! Komiu eva tona naburo! Nisumboliakamiumo! Umbana naogepa, bulava atau Banua nu Alatala anu nompakagasa bulava anu naria riarana? Natantumo Banua nu Alatala naogepa! ¹⁸ Komiu muni nompatuduki tona ivei: 'Isema-sema mosumpa ante manggasangai lanta pesomba ri Banua nu Alatala, ia ledo rapou sumpana haitu. Tapi ane ia mosumpa ante manggasangai pesomba nipesomba ri bavo lanta pesomba haitu, ia rapou sumpana haitu.' ¹⁹ Komiu mpuu-mpuu eva tobuoro! Umbana naogepa, pesomba ka Alatala atau lanta pesomba? Natantumo lanta pesomba ri Banua nu Alatala haitumo naogepa apa lanta haitu nompakagasa pesomba nipesomba ri bavona. ²⁰ Sabana haitu, ane tona mosumpa ante manggasangai lanta pesomba, batuanya ia nosumpa ante nanggasangai lanta pesomba haitu bo muni ante pura-pura anu nipesomba ri bavona. ²¹ Bo ane tona nosumpa ante manggasangai Banua nu Alatala, haitu nasimbayu mpo ia nojanji ante manggasangai Banua nu Alatala bo muni Alatala anu nonturo ri banua haitu! ²² Bo ane tona nosumpa ante manggasangai suruga, haitu nasimbayu mpo ia nosumpa ante manggasangai gadera nu Alatala ri suruga bo muni Alatala anu nonturo ri bavona!

²³ Mandasa mpuu komiu guru-guru agama bo to-Faris! Komiu aga nabelo ri lenje tapi nadaa riar! Komiu nombadekei ka Alatala sabagia lako ri sapulu bagia pura-pura aselemiu, nau sampe rampa-rampa. Tapi parenta Atura-atura agama anu nambaso, evamo pokainggu nanao, mompoasi roa, bo mompakadupa pojanji, haitu ledo nipoviamiu. Kakanana parenta mbase haitu anu nopoko raoseakamiu, nee muni rakalingasi atura-atura ntanina. ²⁴ Komiu nasimbayu mpo tobuoro nombanini tona ntanina! Komiu nasimbayu mpo tona nombasaringa kanjio lako ri panginuna, tapi unta niomena!

²⁵ Mandasa mpuu komiu guru-guru agama bo to-Faris! Komiu aga nabelo ri lenje tapi nadaa riar.

Komiu nasimbayu eva tona notoposi boda bo tubu ri savalikuna tapi riarana batena natagara. Komiu nangoseaka ada-ada agama anu nikita ntona, tapi riar ntaimiu komiu aga nasese bo ledo ria kabasamiu naino ka mbara-mbara ntona. ²⁶ Komiu mpuu-mpuu eva tona naburo! Pegasa ntanimo ruru rara nu boda ala bagia savalikuna muni majadi magasa!

²⁷ Mandasa mpuu komiu guru-guru agama bo to-Faris! Komiu aga nabelo ri lenje tapi nadaa riar! Komiu nasimbayu mpo dayo nicee naputi. Ri savalikuna nagaya mpuu, tapi riarana aga buku ntomate bo matepudu anu navau. ²⁸ Ivesia muni komiu. Ri panggita ntona komiu nireke tonoa. Tapi kakanana komiu aga nabelo ri lenje tapi riar ntaimiu nadaa!

²⁹ Mandasa mpuu komiu guru-guru agama bo to-Faris! Komiu aga nabelo ri sumba! Komiu nompakabelo dayo nabi-nabi nu Alatala bo nombavera pakagaya dayo ntonoa. ³⁰ Bo niulimiu, 'Ane kamimo natuvu tempo totuata nggaulu, kami ledo ntoto masituju mompatesi nabi-nabi!' ³¹ Tapi ante tesamiu haitu, komiu mboto nompangaku komiu muli ntopopatesi nabi-nabi, *bo komiu mpuu-mpuu nanjava totuamiu!*³² Jadi povia-viamo dosa nasimbayu ante dosa ntotuamiu nggaulu haitu!

³³ Komiu tona nadaa bo muli ntona nadaa! Nisarumakamiu komiu ledo rapambela pehuku riar narakaa? ³⁴ Pariaramo! Kutudu nabi-nabi bo tona nantoto bo guru-guru tou mompatuduki tesaKu ka komiu. Sanu rapatesimiu, sanu rapakumiu ri kayu salib, bo sanupa racambumiu riar banua-banua petupumiu. Bo sanupa raraga-ragamiu lako ri sangu ngata hau ri ngata ntanina. ³⁵ Haitumo sampe komiu natuvu sii-sii mombatanggu pura-pura raa ntonoa nipatesi, nompamula lako ri pompatesi i Habel anu ledo nasala, sampe pompatesi i Zakharia, ana i Berekia. Ia nipatesi ntotuamiu ri olo Banua nu Alatala bo lanta pesomba. ³⁶ Pariaramo tesaKu hitu! Komiu natuvu sii-sii rahuku sabana pura-pura anu nadaa nipovia ntotuamiu nggaulu!"

I Yesus nantangisi tupu ngata Yerusalem sabana ira ledo nadota mantarima Ia

Lukas 13:34-35

³⁷ "Heh, komiu toYerusalem! Komiu nompatesi nabi-nabi bo tona nisuro nu Alatala nirempemiu vatu sampe namate! Nadea ngganimo Yaku madota mombasaliku komiu pura-pura, nasimbayu mpo manu tina nombarumutasi anana, tapi ledo nadota komiu. ³⁸ Epe-mo! Banua nu Alatala rapalaikaNa bo domo Ia momporoa komiu. ³⁹ Kuuli ka komiu, domo rakitamiu Yaku sampe makava tempona komiu manguli, 'Maoge belo ka Ia anu nakava nipo-sumba nu Alatala!' [†]"

† Mazmur 118:26

Pepatuduki i Yesus ri Bulu Zaitun (Pasal 24-25)

I Yesus nombaboto kagero Banua nu Alatala

Markus 13:1-2; Lukas 21:5-6

24 Naupu haitu i Yesus nompalaisi Banua nu Alatala. Tempo Ia nalai, nekaparaimo anaguruNa nombatuduaka ka Ia kagaya nu Banua nu Alatala bo tombi-tombi ri doyatana. ² Nanguli i Yesus ka ira, "Iyo, peintamo kagayana! Tapi pariaramo tesaKu hitu! Makava tempona bara maipia, magero puramo. Domo maria sangua watu potembona mosisunju ri bavo watu ntanina, sabana pura-pura watu haitu radurasi."

Tanda naparamo kakava i Yesus mpanjili

Markus 13:3-13; Lukas 21:7-19

³ Naupu haitu hau ri Bulu Zaitunmo i Yesus. Tempo Ia da nonturo hamai, ana-anaguruNa nakava motesa nggalino nte Ia. Niulira, "Guru, uli ka kami, maipia majadi pura-pura anu nitesaMiu pangane, bo berimba tandana kakavaMiu bo kaupnu dunia hitu?"

⁴ Nesana i Yesus, "Pakabelo-belo! Nee sampe komiu rabagiui! ⁵ Apa madea tona makava mompobalu sangaku. Raulira, iramo Magau Topepakasalama anu nijanji nu Alatala! Bo madea tona rabagiura. ⁶ Raepemiu kareba posieva napara nte komiu, bo raepemiu muni kareba posieva ri ngata nakavao. Nee maeka raramiu, sabana haitu pura-pura kana majadi, tapi dopa nakava mpuu kaupnu dunia. ⁷ Apa tempo haitu tona sangata mosieva nte toangatana, bo magau simbo magau mosieva muni. Ri umba-umba ri dunia maria kamate ara bo lingu-lingu. ⁸ Tapi kajadia haitu pura-pura aga kasusa pamulana, eva dua kole nirasai mombine tempo moana.

⁹ Tempo haitu komiu rasaka bo radekei ka tona anu mompandasa komiu bo mompatesi komiu. Komiu rapovuu mata ntona lako ri umba-umba ngata sabana komiu topangoseaka Yaku. ¹⁰ Bo madea topangoseaka Yaku moura pomparasayara, bo mosipobalu ntali roara sampomparasaya, bo mosipovuu matamo ira. ¹¹ Bo madea nabi mpodava meumba bo madea tona rabagiura. ¹² Tempo haitu kadaa ntona mantambai, sampe madea tona domo mosimpotove. ¹³ Tapi tona maroo mangoseaka Yaku sampe ri kaupuna, iramo rapakasalama. ¹⁴ Bo Kareba Belo nu Poparenta nu Alatala kana rapatolele ri njumangu dunia ala pura-pura manusia mamala mangepena. Maupu haitu, pade makava kaupnu dunia."

I Yesus notesa tempo pepandasa ntamo bara maipia

Markus 13:14-23; Lukas 17:20-37; 21:20-24

¹⁵ I Yesus nompapola pepatudukiNa ka anaguruNa ivei: "Nabi Daniel nggaulu nombaboto 'Toperopu anu Nompakarunggu rara nu Alatala.' [†] (Topombaca tesa hitu kana pariaramo batuana!)

Ane rakitamiu anu niboto Nabi Daniel haitu neangga ri Banua nu Alatala, ¹⁶ haitumo tandana tona ri bagia Yudea kana mangova malai hau ri bulu ala masalama.

¹⁷ Isema-sema nangosanaka ri savaliku nu banuana, ^{††} tumo mesua rabanua mangala bara nuapa-nuapa.

Palaimo masalisa! ¹⁸ Isema-sema nokarajaa ri talua, nee manjili ri banua mangala pakeana. Palaimo masalisa!

¹⁹ Ri eo haitu mandasa mpuu mombine natiana bo mombine da nompatomi anana apa makaja mpuu malai.

²⁰ Perapi nte Alatala ala tempo komiu mangova malai haitu ledo mambela tempo naranindi bara eo penonto.

²¹ Niuliku ivesia sabana ri eo haitu madaa mpuu pepandasa rapambela ka manusia. Dopa sanggani najadi pepandasa eva haitu, nompamula lako ri lamba pamulana sampe sii-sii, bo domo majadi hanupa ri tempo makava.

²² Rapana tempo pepandasa haitu ledo rapakambuku, natantu nau saitoa tona ledo maria matuvu. Tapi lako ri tove nu Alatala ka todea topomparasaya anu nipelisiNa, tempo pepandasa haitu kana rapakambukuNa.

²³ Ri tempo haitu, ane maria tona manguli ka komiu, 'Peintamo! Siimo Magau Topepakasalama anu nijanji nu Alatala!' Bara maria tona manguli, 'Hamaimo Ia!'

Nee raparasayamiu tesara. ²⁴ Apa kana meumba topodava manguli iramo Magau Topepakasalama, bo meumba muni nabi-nabi mpodava anu movia tandatanda nipokumaaka bo kabaraka-kabaraka mombabagiui tona.

Ane mamala, nau tona nipelisi nu Alatala rabagiura muni! ²⁵ Toramo! Lave nipopaisaniKu mamimo ka komiu dopame majadi haitu pura-pura, jadi nee rabagiui!

²⁶ Jadi ane maria tona manguli ka komiu, 'Peintamo! Magau Topepakasalama naria hamai ri karava bai,' [‡] nee hau! Ane raulira, 'Peintamo! Ritu rabanuamo Ia,' nee raparasayamiu tesara!

²⁷ Sabana tempo Yaku, Ana nu Manusia, makava mpanjili, kakavaKu malanto rakitari umba-umba ri dunia, nasimbayu mpo kila novende ri mpandakena bo nevanta sampe ri ka-

[†] Tesa Nabi Daniel ri Daniel 9:27; 11:31; 12:11. Nitasere 168 mpae dopame nipoanaka i Yesus, naria lanta pesomba nipovia ka i Zeus, viata ntoYunani. Lanta haitu nipovia ri Banua nu Alatala bo narunggu mpuu rara Alatala nanggitana. Sanu tona nanguli haitumo nompakadupa poboto Nabi Daniel. Jadi, batuana tesa i Yesus ri sii: Banua nu Alatala rapakaruto vai nasimbayu mpo anu najadi bara ipia. ^{††} Basa Yunani: Isema-sema ri ata nu banuana—Ata banua ntoYahudi tempo haitu nalumbu mpo tambale. Nasaro ira nangosanaka ri sia. [‡] ToYahudi nanjarumaka Magau Topepakasalama meonga lako ri karava bai, nasimbayu eva i Musa anu nombajagai bimba 40 mpae dopame ia hau ri tana Mesir manggeniaka todea.

^{††} Basa Yunani: Isema-sema ri ata nu banuana—Ata banua ntoYahudi tempo haitu nalumbu mpo tambale. Nasaro ira nangosanaka ri sia. [‡] ToYahudi nanjarumaka Magau Topepakasalama meonga lako ri karava bai, nasimbayu eva i Musa anu nombajagai bimba 40 mpae dopame ia hau ri tana Mesir manggeniaka todea.

[†] Tesa Nabi Daniel ri Daniel 9:27; 11:31; 12:11. Nitasere 168 mpae dopame nipoanaka i Yesus, naria lanta pesomba nipovia ka i Zeus, viata ntoYunani. Lanta haitu nipovia ri Banua nu Alatala bo narunggu mpuu rara Alatala nanggitana. Sanu tona nanguli haitumo nompakadupa poboto Nabi Daniel. Jadi, batuana tesa i Yesus ri sii: Banua nu Alatala rapakaruto vai nasimbayu mpo anu najadi bara ipia. ^{††} Basa Yunani: Isema-sema ri ata nu banuana—Ata banua ntoYahudi tempo haitu nalumbu mpo tambale. Nasaro ira nangosanaka ri sia. [‡] ToYahudi nanjarumaka Magau Topepakasalama meonga lako ri karava bai, nasimbayu eva i Musa anu nombajagai bimba 40 mpae dopame ia hau ri tana Mesir manggeniaka todea.

^{††} Basa Yunani: Isema-sema ri ata nu banuana—Ata banua ntoYahudi tempo haitu nalumbu mpo tambale. Nasaro ira nangosanaka ri sia. [‡] ToYahudi nanjarumaka Magau Topepakasalama meonga lako ri karava bai, nasimbayu eva i Musa anu nombajagai bimba 40 mpae dopame ia hau ri tana Mesir manggeniaka todea.

[†] Tesa Nabi Daniel ri Daniel 9:27; 11:31; 12:11. Nitasere 168 mpae dopame nipoanaka i Yesus, naria lanta pesomba nipovia ka i Zeus, viata ntoYunani. Lanta haitu nipovia ri Banua nu Alatala bo narunggu mpuu rara Alatala nanggitana. Sanu tona nanguli haitumo nompakadupa poboto Nabi Daniel. Jadi, batuana tesa i Yesus ri sii: Banua nu Alatala rapakaruto vai nasimbayu mpo anu najadi bara ipia. ^{††} Basa Yunani: Isema-sema ri ata nu banuana—Ata banua ntoYahudi tempo haitu nalumbu mpo tambale. Nasaro ira nangosanaka ri sia. [‡] ToYahudi nanjarumaka Magau Topepakasalama meonga lako ri karava bai, nasimbayu eva i Musa anu nombajagai bimba 40 mpae dopame ia hau ri tana Mesir manggeniaka todea.

^{††} Basa Yunani: Isema-sema ri ata nu banuana—Ata banua ntoYahudi tempo haitu nalumbu mpo tambale. Nasaro ira nangosanaka ri sia. [‡] ToYahudi nanjarumaka Magau Topepakasalama meonga lako ri karava bai, nasimbayu eva i Musa anu nombajagai bimba 40 mpae dopame ia hau ri tana Mesir manggeniaka todea.

[†] Tesa Nabi Daniel ri Daniel 9:27; 11:31; 12:11. Nitasere 168 mpae dopame nipoanaka i Yesus, naria lanta pesomba nipovia ka i Zeus, viata ntoYunani. Lanta haitu nipovia ri Banua nu Alatala bo narunggu mpuu rara Alatala nanggitana. Sanu tona nanguli haitumo nompakadupa poboto Nabi Daniel. Jadi, batuana tesa i Yesus ri sii: Banua nu Alatala rapakaruto vai nasimbayu mpo anu najadi bara ipia. ^{††} Basa Yunani: Isema-sema ri ata nu banuana—Ata banua ntoYahudi tempo haitu nalumbu mpo tambale. Nasaro ira nangosanaka ri sia. [‡] ToYahudi nanjarumaka Magau Topepakasalama meonga lako ri karava bai, nasimbayu eva i Musa anu nombajagai bimba 40 mpae dopame ia hau ri tana Mesir manggeniaka todea.

^{††} Basa Yunani: Isema-sema ri ata nu banuana—Ata banua ntoYahudi tempo haitu nalumbu mpo tambale. Nasaro ira nangosanaka ri sia. [‡] ToYahudi nanjarumaka Magau Topepakasalama meonga lako ri karava bai, nasimbayu eva i Musa anu nombajagai bimba 40 mpae dopame ia hau ri tana Mesir manggeniaka todea.

[†] Tesa Nabi Daniel ri Daniel 9:27; 11:31; 12:11. Nitasere 168 mpae dopame nipoanaka i Yesus, naria lanta pesomba nipovia ka i Zeus, viata ntoYunani. Lanta haitu nipovia ri Banua nu Alatala bo narunggu mpuu rara Alatala nanggitana. Sanu tona nanguli haitumo nompakadupa poboto Nabi Daniel. Jadi, batuana tesa i Yesus ri sii: Banua nu Alatala rapakaruto vai nasimbayu mpo anu najadi bara ipia. ^{††} Basa Yunani: Isema-sema ri ata nu banuana—Ata banua ntoYahudi tempo haitu nalumbu mpo tambale. Nasaro ira nangosanaka ri sia. [‡] ToYahudi nanjarumaka Magau Topepakasalama meonga lako ri karava bai, nasimbayu eva i Musa anu nombajagai bimba 40 mpae dopame ia hau ri tana Mesir manggeniaka todea.

^{††} Basa Yunani: Isema-sema ri ata nu banuana—Ata banua ntoYahudi tempo haitu nalumbu mpo tambale. Nasaro ira nangosanaka ri sia. [‡] ToYahudi nanjarumaka Magau Topepakasalama meonga lako ri karava bai, nasimbayu eva i Musa anu nombajagai bimba 40 mpae dopame ia hau ri tana Mesir manggeniaka todea.

[†] Tesa Nabi Daniel ri Daniel 9:27; 11:31; 12:11. Nitasere 168 mpae dopame nipoanaka i Yesus, naria lanta pesomba nipovia ka i Zeus, viata ntoYunani. Lanta haitu nipovia ri Banua nu Alatala bo narunggu mpuu rara Alatala nanggitana. Sanu tona nanguli haitumo nompakadupa poboto Nabi Daniel. Jadi, batuana tesa i Yesus ri sii: Banua nu Alatala rapakaruto vai nasimbayu mpo anu najadi bara ipia. ^{††} Basa Yunani: Isema-sema ri ata nu banuana—Ata banua ntoYahudi tempo haitu nalumbu mpo tambale. Nasaro ira nangosanaka ri sia. [‡] ToYahudi nanjarumaka Magau Topepakasalama meonga lako ri karava bai, nasimbayu eva i Musa anu nombajagai bimba 40 mpae dopame ia hau ri tana Mesir manggeniaka todea.

^{††} Basa Yunani: Isema-sema ri ata nu banuana—Ata banua ntoYahudi tempo haitu nalumbu mpo tambale. Nasaro ira nangosanaka ri sia. [‡] ToYahudi nanjarumaka Magau Topepakasalama meonga lako ri karava bai, nasimbayu eva i Musa anu nombajagai bimba 40 mpae dopame ia hau ri tana Mesir manggeniaka todea.

solona. ²⁸ Ane rakitamiu tonji kalikoa masiromu, tantu naria matepudu ri sia. †

Tanda anu nompakalanto kakava Ana Nu Manusia

Markus 13:24-27; Lukas 21:25-28

²⁹ “Maupu tempo pepandasa nadaa haitu, ‘mata eo majadi malanda bo bula domo ntoto mareme.

Betue-betue manavu lako ri langi bo mpengaya-ngaya anu nakuasa ri langi ragoya.’

Yesaya 13:10; 34:4

³⁰ Ri tempo haitu meumba tanda ri langi mompakalanto kakavaKu, Ana nu Manusia. Bo pura-pura manusia ri dunia motumangi ante eka nu rara, ane rakitara Yaku, Ana nu Manusia, manau riaru kulimu ante kuasaKu bo kaogeKu nipokumaaka. ††³¹ Tabue nambaso rapopomoni bo Kutudu malaeka-malaekaKu hau mompasiromu tona nipelisiKu lako ri umba-umba ri dunia.”

Pepatuduki lako ri kayu ara

Markus 13:28-31; Lukas 21:29-33

³² “Pariaramo pepatuduki lako ri kayu ara. Ane rakitamiu tinggu-tingguna naramata bo tavana nompamula noroya, nisanimiu naparamo tempo mapane. ³³ Ivesia muni ane rakitamiu pura-pura kajadia nitesaKu pangane, rasanimiu domo mpuu masae makavamo Yaku. ³⁴ Pariaramo tesaKu hitu! Dopame mamate pura-pura tona natuvu sii-sii, kajadia-kajadia nitesaKu pangane majadimo. ³⁵ Langi bo tana malipo, tapi tesaKu batebatena sampe ri kasae-saena.”

Kita kana mainga mompopea kakava i Yesus mpanjili

Markus 13:32-37; Lukas 17:26-30, 34-36

³⁶ “Ane eo bo jaa kakavaKu ngena, aga TuamaKu ri suruga, nangisanina. Ledo ria saitoa nangisanina, ledo nisani nu malaeka ri suruga bo Yaku mboto, Ana nu Alatala, ledo nisaniKu. ³⁷ Tempo Yaku, Ana nu Manusia, makava bara maipia pokainggu nu manusia masimbayau mpo pokainggu ntona tempo Nabi Nuh nggaulu. ³⁸ Dopame uve oge nanggabuntu ri njumangu dunia, manusia aga natuvu ivesia-siamo. Ira aga nangande nangingu bo noberei eva biasa, sampe Nabi Nuh nesua riaru kapala. ³⁹ Ledo nisani ntona nuapa rapambela ka ira sampe uve oge nanggabuntu sanggani bo ira naonga puramo. Ivesia muni tempo Yaku, Ana nu Manusia, makava. ⁴⁰ Jonjona, ane maria randua langgai mokratjaa mosanggani ri talua, saito raala, bo saito maboli. ⁴¹ Bo ane maria randua mombine mogili mosanggani-nggani, saito raala bo saito maboli.

† Batuana, ivesia muni kakavaNa. Ia ledo makava nggalino-lino, tapi natantu rasani ntona. †† Daniel 7:13 ‡ Anu nipatuju ri sii bara tempo ngata Yerusalem nigerosi ntoRoma 70 mpae naliu pompoanaka i Yesus.

⁴² Haitu sampe Kuuli, komiu kana mainga, apa ledo nisanimiu maipia makava Tupumiu.”

Porapa tupu nu banua mainga

⁴³ “Pariaramo! Ane rasani ntupu banua tinti sakuya bongina topangangga makava, natantumo mainga-inga ia bo ledo rapalambana topangangga mesua rara banuana. ⁴⁴ Ivesia muni komiu kana mainga mompopea kakavaKu, apa ledo nisanimiu tempona Yaku, Ana nu Manusia, makava.”

Porapa batua tobelona anu natutu nangoseaka dota madikana

Lukas 12:41-48

⁴⁵ “Rapana naria batua anu nanoto bo natutu neoseaka, iamo raanggataka nu madikana majadi topompasiayu pura-pura batua ntanina riaru nu banua. Iamo mompasiayu kande ka batua-batua ntanina eo-eo. ⁴⁶ Mabelo mpuu batua haitu ane tempo madikana manjili lako ri polipana, nipovianamo bago niparasaya ka ia. ⁴⁷ Pariaramo tesaKu hitu. Madika haitu manganggataka ia majadi topompasiayu pura-pura mbara-mbarana.

⁴⁸ Tapi mandasa mpuu ane batua haitu madaa pokaingguna bo nipekirina riaru ntaina ivei: ‘Wee! Da masaepa pade manjili madikaku.’ ⁴⁹ Bo ia aga nombaboba batua-batua ntanina bo aga nangande nangingu mpassangani-nggani ante tona nalangu. ⁵⁰ Tapi tempo batua haitu movia madaa ivesia, sampesanika madikana manjili ri eo bo jaa ledo nisani. ⁵¹ Bo batua haitu rapatesi. Ia ratedeaka riaru narakaa, ponturo ntona aga nabelo ri sumba. Hamai ira motumangimangi bo masinggiki baga ante masusa mpuu rara.”

Porapa alima randaa nainga bo alima randaa nalinga

25 “Tempo Yaku makava mpo Magau, maria tona mainga bo maria tona ntanina malinga nasimbayau nte porapa hitu: Naria sapulu randaa hau mantomunaka boti langgai, simbo nanggeni poindona. ² Alima ira nadoyo, bo alima nanoto. ³ Randaa nadoyo nanggeni poindo tapi ledo nipakasadiara lana raisi ri poindora ane maotimo lanana. ⁴ Tapi randaa nanoto, nanggeni poindo bo nipakasadiara munimo lana raisi ri poindora ane maoti ngena lanana. ⁵ Nasae mpuu nipopeara, dopa-dopa nakava boti langgai sampe naroyo matara bo namonjo puramo.

⁶ Natanga bongi naria tona nongare, ‘Ritumo boti langgai! Kamaimo kadambanaka ia!’ ⁷ Nangepe haitu, kaliu-liu nembangumo sapulu randaa haitu bo simbo nompakasadia poindona. ⁸ Bo nanguli randaa-randaa anu nadoyo ka roara nanoto, ‘Lea, dekei ka kami sakide lanamiu. Mapayamo poindo kami!’

⁹ Nesana randaa nanoto, 'Ledo magana ngena lana raisi ri poindo kami ane radekei ka komiu sanu. Aginapa komiu mangali lana nte topobalu lana.' ¹⁰ Jadi hau-mo randaa-randaa nadoyo mangali lana. Tapi tempo ira da ri tatanga dala hau mangelo lana, nakavamo boti langgai. Bo randaa-randaa anu nasadia poindona, nesua rabanua posusa nosangani-nggani ante boti langgai. Naupu haitu niupimo vamba.

¹¹ Naupu sia nakava munimo alima randaa nadoyo pangane. Bo nongaremo ira lako ri savalikuna, 'Tua! Tulungi, buka ka kami vamba!'

¹² Tapi nesana boti langgai, 'Ledo nisaniku komiu!'

¹³ I Yesus nompakaupu porapana iveri: "Haitu sampe komiu kana mainga-inga, apa ledo nisanimiu eona atau jaana Yaku makava."

Porapa randua batua nadota bo saito batua nasanda

Lukas 19:11-27

¹⁴ "Tempo Yaku makava mpanjili masimbayu nte porapa hitu: Saito madika nopatuju hau ri ngata nakavao. Dopame ia hau, nirondena batua-batuana bo niparasayana ka ira kakalamanana. ¹⁵ Saito niparasayana ka lima-njobu mpeka doi bulava, † saitopa niparasayana ka ronjobu mpeka doi bulava, †† bo saitopa niparasayana ka sanjobu mpeka doi bulava. ‡ Ira niparasaya ka doina nangoseaka pompakulera mompopogoli doi. Naupu haitu hau ia ri polipana. ¹⁶ Tona niparasayaka lima-njobu mpeka doi bulava kaliu-liu hau nompagoli doi haitu sampe nikavana anana lima-njobu mpeka muni. ¹⁷ Ivesia muni tona anu niparasayaka ronjobu mpeka doi bulava hau nipagolina doina haitu sampe nikavana anana ronjobu mpeka muni. ¹⁸ Tapi tona niparasayaka sanjobu mpeka doi bulava haitu, hau nikaena lovu bo nitabuniakana doi nu madikana.

¹⁹ Naliu haitu nasae mpau pade nanjili madika. Nanjilipa ia, nirondenamo batuana ala rakitana berimba ira nombaurusi doina. ²⁰ Nakavamo batua niparasayaka lima-njobu mpeka doi bulava haitu nanggeni doi bo anana lima-njobu mpekapa anu nikavana. Bo niulina, 'Pua, komiu nomparasaya ka yaku lima-njobu mpeka doi bulava bara ipia. Peintamo! Nipagoliku doi haitu sampe nanggava anana lima-njobu mpeka muni.'

²¹ Nanguli madika, 'Nabelomo! Komiu batua nabelo, natutu nantui bago anu niparasayaka komiu. Komiu namala niparasaya ante mbara-mbara sakide. Sabana haitu, mbara-mbara nadea kuparasayaka komiu. Kamaimo madamba mosangani ante yaku.'

²² Bo nakava munimo batua anu niparasayaka ronjobu mpeka doi bulava. Nanguli ia, 'Pua, komiu nomparasaya ka yaku ronjobu mpeka doi bulava bara ipia.'

† 5.000 doi bulava = 5 talenta = gaji 75 mpae †† 2.000 doi bulava = 2 talenta = gaji 30 mpae ‡ 1.000 doi bulava = 1 talenta = gaji 15 mpae

Peinta vei. Nipagoliku doi haitu sampe nanggava anana ronjobu mpeka.'

²³ Nanguli madika, 'Nabelomo! Komiu batua nabelo, bo natutu nantui bago niparasayaka komiu. Komiu namala niparasaya ante mbara-mbara sakide. Sabana haitu, madea kuparasayaka komiu. Kamaimo madamba mosangani ante yaku.'

²⁴ Naupu haitu nakavamo batua niparasayaka sanjobu mpeka doi bulava. Nanguli ia, 'Pua, nisaniku komiu tona nasoa. Komiu nangala asele ntalua anu ledopotudamiu bo komiu nosombe anu ledopotavumiu. ²⁵ Naeka raraku, jadi nitabuniakaku ralovu doimiu. Peintamo! Hitumo doimiu, Pua.'

²⁶ Bo nanguli madika, 'Iko batua nadaa bo nasanda! Nisanimiu yaku nangala asele ntalua anu ledopotudaku, bo nosombe anu ledopotavuku. ²⁷ Ane ivesia, nakuya tano ledonidekeimu doiku ka tona mompopoana doi ala tempo yaku makava, mamala kuala mpanjili doiku ante anana?' ²⁸ Bo niuli madika ka batuana ntanina, 'Alamo doi bulava sanjobu mpeka haitu lako nte ia, bo dekei ka batua pangane, anu naria sapulu-njobu mpeka! ²⁹ Apa isema naria madea, kana ratambai ka ia sampe madea mpau nte ia. Tapi isema naria aga sakide, raalasi puramo lako nte ia. ³⁰ Botedeakamo batua anu ledoria gunana haitu hau ri savalikuna ri kalandana. Hamai ia bate-batena motumangi bo masinggiki ante susa rara.'

Ri Eo Potangara Ana nu Manusia mombagaaraka tona nadaa bo tona nanoa

³¹ "Tempo Yaku, Ana nu Manusia makava mpanjili ri dunia ante reme bo kuasaKu, nosangani-nggani ante malaeka-malaekaKu, Yaku monturo ri Gadera PoparentaKu mombatangara mpo Magau. ³² Bo purapura manusia rapasiromu ri gayoKu bo Yaku mogaaraka ira majadi rolunu, nasimbayu mpo topoevu nogaaraka bimbana bo tovauna. ³³ Bimba, *haitumo tona novia dota nu Alatala* rapatani ri sabingga ngganaKu, bo tovau, *haitumo tona nadaa* rapatani ri sabingga njidiKu.

³⁴ Bo Kuuli ka ira ri sabingga ngganaKu iveri: 'Kamaimo komiu nipobelo nTuamaKu. Pesuamo riaraka magauKu, naria ponturo ri sii nipakasadia ka komiu lako ri lamba pamulana. ³⁵ Sabana tempo naara taiKu, nipakandemiu. Tempo nabai tamboloKu, nipainumiu. Nau Yaku tosangatana, nitarimamiu ri banuamiu. ³⁶ Tempo Yaku ledoria pakeaKu, nidekeimiu ka Yaku pakea. Tempo Yaku nadua komiu nompelioda Yaku. Tempo Yaku nitarunggu komiu nakava nanggita Yaku.'

³⁷ Bo ira ri sabingga ngganaKu maingu rarara bo manguli, 'Pue, ipia nikita kami naara taiMiu bo nipakande kami? Ipia nikita kami Komiu nabai tambolo bo nipainu kami? ³⁸ Ipia Komiu tosangatana bo kami

nantarima Komiu ri banua kami? Ipia nikita kami Komiu ledo nopakea bo nidekei kami pakea ka Komiu? ³⁹ Ipia nikita kami Komiu nadua? Ipia Komiu nitarunggu bo kami hau nompelioda Komiu?’

⁴⁰ Bo Yaku, Magau, mesana, ‘Pariaramo tesaKu hitu! Belo nipoviamiu ka sampesuvu-sampesuvuKu hitu, nau tona naede panggana, haitu nasimbayu mpo belo nipoviamiu ka Yaku.’

⁴¹ Maupu haitu Kuuli ka ira ri sabingga njidiKu, ‘Palaimo lako nte Yaku, komiu anu nihuku nTuamaKu! Koi hau riaru apu anu navaya sampe ri kasae-saena nipakasadia ka Magau nu Seta ante malaeka-malaeka anu nangoseaka ia. ⁴² Apa tempo naara taiKu, ledo nipakandemiu. Tempo nabai tamboloKu ledo nipainumiu. ⁴³ Yaku tosangatana tapi ledo nitarimamiu Yaku ri banuamiu. Yaku ledo nopakea tapi ledo nidekeimiu pakea ka Yaku. Yaku nadua bo nitarunggu, tapi komiu ledo nakava nompelioda Yaku.’

⁴⁴ Bo ira manguli ka Yaku, ‘Pue, ipia nikita kami naara taiMiu, atau nabai tamboloMiu, atau Komiu tosangatana atau ledo nopakea, atau nadua, atau nitarunggu bo kami ledo nantulungi Komiu?’

⁴⁵ Bo Yaku mesana ka ira, ‘Pariaramo tesaKu hitu! Tempo komiu ledo nadota nantulungi sampesuvu-sampesuvuKu hitu anu naede panggana, batuana komiu ledo nadota nantulungi Yaku.’” ⁴⁶ Bo i Yesus nompakaupu tesaNa ante nanguli, “Pura-pura tona nadaa haitu rahuku sampe ri kasae-saena. Tapi tona nanao, matuvu mabelo sampe ri kasae-saena.”

I Yesus nisaka, nitangara bo nipatesi (Pasal 26-27)

Topanggeni agama Yahudi nasintuvu mompatesi i Yesus

Markus 14:1-2; Lukas 22:1-2; Yohanes 11:45-53

26 Naupu i Yesus nompatuduki pura-pura haitu, niulikaNa ana-anaguruNa, ² “Nisanimiumo roeopa Eo Mbaso Paskahmo. Bo Yaku, Ana nu Manusia, radekei ka baliKu bo rapakura ri kayu salib.”

³ Tempo haitu balengga-balengga ntopanggeni pesomba bo totua-totua ntoYahudi nasiromu ri banua nu Pakeni nTopanggeni Pesomba anu nosanga i Kayafas. ⁴ Ira nonia mombasaka i Yesus nggalino ala mamala Ia rapatesi. ⁵ Tapi nosiulika ira, “Nee kita movia haitu tempo Eo Mbaso Paskah ala todea ledo magado.”

Mombine nantoli lana dupa ri balengga i Yesus, mombabila Ia

Markus 14:3-9; Yohanes 12:1-8

⁶ Tempo i Yesus ante ana-anaguruNa naria ri ngata Betania ira nesai ri banua ntona nosanga i Simon anu nadua oge bara ipia. ⁷ Da nangande ira hamai, nakava-

mo saito mombine nanggeni sangu botolo nipovia lako ri vatu pualam anu noisi lana dupa nasuli mpuu alina. Mombine haitu nombatoli lana dupa ri balengga i Yesus, tandana pebilana ka Ia. ⁸ Tapi nanggita anu nipovia mombine haitu, naraumo rara ana-anaguru i Yesus bo nanguli, “Nakuya lana dupa haitu aga nipakarugi bayangi? ⁹ Lana dupa nasuli haitu masipato rapobalu bo alina radekei ka tona napakasi!”

¹⁰ Nisani i Yesusmo pekirira, jadi niulikaNa ira, “Nakuya komiu nompakasusa mombine hitu? Anu nipoviana ka Yaku nabelo. ¹¹ Apa tona napakasi batebatena maria ri tatangamiu, tapi Yaku ledo. ¹² Ante nombatoli lana hitu nte Yaku, ia nompakasadia karoKu ratana bara maipia. ¹³ Pariaramo tesaKu hitu! Ri umba-umba ri dunia Kareba Belo rapatolele, povia nu mombine hitu ratesa muni ala ratora ia.”

I Yudas nonia mompobalu i Yesus ka baliNa

Markus 14:10-11; Lukas 22:3-6

¹⁴ Naupu haitu, i Yudas, saito lako ri sapulu randua anaguru i Yesus, hau nte balengga-balengga ntopanggeni pesomba ¹⁵ bo nanguli, “Ane kupobalu i Yesus ka komiu, nuapa radekeimiu ka yaku?” Jadi nibilaramo talupulu mpeka doi salaka bo nidekeira ka i Yudas. ¹⁶ Nompamula lako ri eo haitu i Yudas nangelo loga nabelo mombadekei i Yesus ka baliNa.

I Yesus nangande ri Posusa Paskah nosanggeni-nggani ante ana-anaguruNa

Markus 14:12-21; Lukas 22:7-13, 21-23; Yohanes 13:21-30

¹⁷ Ri eo pamulana Posusa Roti Ledo Noragi, nakavamo ana-anaguru i Yesus nompekutana Ia, “Pue, ri umba rapodotaMiu rapompakasadia kami kande Paskah ka kita?”

¹⁸ Nesana Ia, “Koimo hau ri ngata Yerusalem nte i Yanu, bo uli ka ia ivei: ‘I Guru nanguli, naparamo gantana makava nte Ia. Ia madota mangoseaka Eo Mbaso Paskah ri banuamu mosanggeni-nggani ante ana-anaguruNa.’” ¹⁹ Bo haumo ana-anaguruNa novia anu nitudu i Yesus ka ira, bo nipakasadiaramo kande Posusa Paskah.

²⁰ Nabongipa, nonturomo i Yesus nangande nosanggeni-nggani ante ana-anaguruNa. ²¹ Da nangande ira, nangulimo i Yesus, “Pariaramo tesaKu hitu. Saito komiu mompobalu Yaku ka baliKu.”

²² Nangepe haitu, nasusa mpuumo rarara, bo saito-saito nanguli ka Ia, “Pue, tantu ledo yaku niuliMiu.”

²³ Nesana i Yesus, “Tona notula roti ri uta nosanggeni-nggani ante Yaku, iamo mompobalu Yaku.

²⁴ Yaku, Ana nu Manusia, kana mamate nangoseaka anu nitulisi riaru Buku Gasa. Tapi mandasa mpuu tona mompobalu Yaku! Aginapa tona haitu ledo nipoanaka ntinana.”

²⁵ Naupu haitu nanguli i Yudas, anu mompobalu i Yesus ngena, "Guru, tantu ledo yaku niuliMiu."

Nesana i Yesus, "Tesamu mboto tu!"

I Yesus nompakatantu ada rapombatora Ia

Markus 14:22-26; Lukas 22:14-20; 1 Korintus 11:23-25

²⁶ Tempo ira da nangande, i Yesus nangala roti bo nosambaya nanguli tarima kasi ka Alatala. Naupu haitu nitubiNa roti haitu bo nibagiNa ka ana-anaguruNa bo nanguli, "Alamo roti hitu, bo kandemo. Hitumo karoKu." ²⁷ Naupu haitu nialaNa muni saboda uve anggur. NiuliNa tarima kasi ka Alatala pade nidekeiNa ka ira bo nanguli, "Panginu puramo komiu ²⁸ sabana hitumo raaKu rapatiti ka todea ngena ala mompakaasa Pojanji nu Alatala nabaru. RaaKu hitu rapatiti ka todea ala dosa-dosara raampung. ²⁹ Toramo tesaKu hitu. Domo Kuinu sanupa uve anggur sampe makava tempona bara maipia Alatala, TuamaKu, momparenta mpo Magau. Ri Poparenta haitumo pade Kuinu uve anggur nabaru mosangani-nggani ante komiu." ³⁰ Naupu haitu ira nodade sanggayu dade mombatoiya Alatala, pade nalai hau ri Bulu Zaitunmo ira.

I Yesus nombaboto i Petrus mombasapu Ia ngena

Markus 14:27-31; Lukas 22:31-34; Yohanes 13:36-38

³¹ Bo i Yesus nanguli ka ana-anaguruNa, "Bongi hitu komiu pura-pura moleju pomparasayamiu bo rapalaisimiu Yaku, sabana nitulisi riaru Buku Gasa ivei: 'Kupatesi topoevu bo bimba-bimbana masimpotare.'

Zakharia 13:7

³² Tapi tempo Yaku matuvu mpanjili, Yaku mokolu ka komiu hau ri bagia Galilea."

³³ Nanguli i Petrus, "Nau ira pura-pura moura mompalaisi Komiu, yaku ledo ntoto moura!"

³⁴ Nanguli i Yesus, "Petrus, pariaramo tesaKu hitu. Bongi hitu dopame manu mototoroko, talu-ngganimo iko mombasapu Yaku."

³⁵ Nesana i Petrus, "Nau yaku mamate mosangani ante Komiu, ledo ntoto kusapu Komiu!" Bo ivesia muni niuli nu ana-anaguruNa pura-pura ntanina.

I Yesus nosambaya ri Getsemani

Markus 14:32-42; Lukas 22:39-46

³⁶ Naupu sia i Yesus ante ana-anaguruNa hau ri sanggu pampa niuli Getsemani. † Nanguli Ia, "Ponturomo ri sii. Haunapa Yaku mosambaya." ³⁷ NikeniNa i Petrus bo randua ana i Zebedeus †† nosangani nte Ia. Hamai nompamulamo i Yesus nasusa bo napari raraNa. ³⁸ Bo niulikaNa gi Petrus, "Nasusa mpuumo raraKu. Nira-

† *Getsemani: batuana, pompea lana zaitun. Jadi Getsemani haitu bara pampa kayu zaitun ri Bulu Zaitun napara Yerusalem.* †† *Ana-ana i Zebedeus haitumo i Yakobus bo i Yohanes.*

saiKu eva mamate Yaku! Popea ri sii ruru. Mainga-ingamo bo posambayakamo Yaku!"

³⁹ Naupu haitu, i Yesus napola haunapa sakide lako nte ira tatalu bo notungga sampe ri tana nosambaya. NiuliNa, "Tata, ane mamala, Kuperapi ala peparajea anu rapambela ka Yaku, nee rapambela ka Yaku. Tapi nee dotaKu majadi, damo aga dotaMiu majadi!"

⁴⁰ Naupu haitu Ia nanjili hau nte anaguruNa tatalu haitu. NikavaNa namonjo puramo ira. NiulikaNa i Petrus, "Ha! Ledo nipakulemu mainga bo mosambaya ka Yaku nau aga sajaa? ⁴¹ Komiu kana mainga pura bo mosambaya ala komiu ledo mambela pesori! Komiu madota movia anu mabelo, tapi ledo nipakulemiu sabana komiu manusia nalente."

⁴² Naupu haitu, hau vaimo i Yesus saitoNa nosambaya. NiuliNa, "Tata, ane peparajea hitu ledo mamala raala lako nte Yaku, palambamo, damo dotaMiu majadi." ⁴³ Naupu haitu nanjili vaimo Ia nte anaguruNa. Namonjo vaimo ira sabana naroyo gagamo matara.

⁴⁴ Bo sangganipa vai Ia nompalaisi ira bo hau nosambaya katalu-ngganina. PosambayaNa nasimbayau ante posambayaNa pangane. ⁴⁵ Naupu nosambaya, nanjili vai Ia hau nte anaguruNa bo nanguli, "Berimba komiu? Da namonjo bo da nangosanakapa komiu? Epemo! Nakavamo gantana Yaku, Ana nu Manusia, rapobalu ka tona nadosa. ⁴⁶ Pembangumo! Peinta, nakavamo topompobalu Yaku! Haumo kita mosintomuka ia."

I Yesus nisaka

Markus 14:43-50; Lukas 22:47-53; Yohanes 18:3-11

⁴⁷ Da notesa i Yesus, nakavamo i Yudas, saito lako ri sapulu randua anaguruNa. Ia nakava nosangani nte todea nantipale guma bo pato, tona nitudu nu balengga-balengga ntopanggeni pesomba bo totua-totua ntoYahudi. ⁴⁸ Lave niuli i Yudas mamimo ka ira tandana ala rasanira umbana i Yesus. Niulina, "Tona kueki, iamo i Yesus. Sakamo Ia!" ⁴⁹ Jadi nakava hamai, i Yudas nanggaparai i Yesus bo nanguli, "Tabe, Guru!" Bo niekina i Yesus.

⁵⁰ Nanguli i Yesus, "Tutu sampe tumai iko?" ‡ Bo kaliuliu todea haitu nanggaparai i Yesus bo nisakara Ia.

⁵¹ Nanggita haitu, saito lako ri anaguru anu nosangani ante i Yesus, nangosu gumana bo nitimbena batua nu Pakeni nTopanggeni Pesomba sampe napudu talingana. ⁵² Nanguli i Yesus ka anaguruNa haitu, "Pasuamo gumamu! Apa isema-sema metimbe ante guma, ia muni rapatesi nu guma. ⁵³ Nisarumakamiu ledo mamala Yaku merapi tulungi nte TuamaKu Alatala? Ane mekitulungi Yaku, masalisa ratuduNa melabi sapulu randua lunu †† malaekana mantulungi Yaku!"

‡ *Tutu sampe tumai iko? ATAU: Poviama masalisa anu nipatujumu!* †† *Salunu tantara Magau Roma biasana nte 6.000 tona. Jadi ane 12 lunu nitasere 72.000 malaeka.*

⁵⁴ Tapi ane ivesia, ledo madupa tesa riaru Buku Gasa anu nanguli pura-pura hitu kana majadi nte Yaku.”

⁵⁵ Pade nanguli i Yesus ka todea ri sia, “Berimbamo? Yaku hii topeago sampe komiu kana tumai ante guma bo pato mombasaka Yaku? Eo-eo Yaku nonturo nom-paguru ri doyata Banua nu Alatala, tapi ledo nisakamiu Yaku! ⁵⁶ Tapi domo. Kana majadi ivesia mamimo ala madupa tesa nitulisi nabi-nabi nggaulu ri Buku Gasa.” Naupu haitu nipalaika nu anaguruNa puramo Ia.

I Yesus ri ngayo Polibu Mbaso Agama Yahudi

Markus 14:53-65; Lukas 22:54-55, 66-71; Yohanes 18:12-14, 19-24

⁵⁷ Bo toposaka i Yesus nanggeni Ia hau ri banua i Kayafas, Pakeni nTopanggeni Pesomba. Tempo haitu, guru-guru agama bo totua-totua ntoYahudi lave nasiromu hamai mamimo. ⁵⁸ I Petrus netuntuni nggavao lako ri puri, sampe nakava ri doyata nu banua Pakeni nTopanggeni Pesomba. Nakava hamai, nesuamo ia rara doyata bo nonturo nosanggeni-nggani ante topojava-topojava ala rasanina nuapa majadi ante i Yesus.

⁵⁹ Tempo haitu balengga-balengga ntopanggeni pesomba bo pura-pura topolibu ntanina ri Polibu Mbaso Agama Yahudi nompasimbuku mangelo tona nasadia mosabi dava ala i Yesus mamala rahuku mate.

⁶⁰ Nadea tona nakava nosabi dava tapi ledo nikavara salaNa sampe Ia masipato rahuku mate. Kaupuna naria randua sabi nantingayo Polibu Mbaso haitu ⁶¹ bo nanguli, “Naria sanggeni tona hitu nanguli ivei: Yaku nompakule mombagerosi Banua nu Alatala bo mombabanguna mpanjili riaru talu-eo.”

⁶² Naupu haitu neanggeni Pakeni nTopanggeni Pesomba bo nanguli ka i Yesus, “Berimba? Ledo Nupe-sanaka pangadura haitu?” ⁶³ Tapi nau ledo nasala, i Yesus ledo notingo. Bo sangganipa Pakeni nanguli ka Ia, “Ulimo ri ngayo nu Alatala anu Natuvu, uli ka kami ane Iko mpuu-mpuu Magau Topepakasalama, Ana nu Alatala!”

⁶⁴ Nesana i Yesus, “Nakana niulimiu tu. Pariaramo! Kana makava tempona bara maipia rakitamiu Yaku, Ana nu Manusia, monturo ri sabingga nggana nu Alatala toNeliu KakuasaNa, bo rakitamiu Yaku manau lako ri suruga riaru kulimu.” †

⁶⁵ Nangepe haitu nagigimo rara nu Pakeni nTopanggeni Pesomba sampe nibitesina mboto bajuna. Niulina, “Ia mboto nompakasimbayu karoNa ante Alatala! Niepemi mboto tesaNa nanjalai Alatala! Domo paraluu sabi-sabi ntanina! ⁶⁶ Berimba panteseremi?”

Nesana ira, “Ia masipato rahuku mamate!”

† Mazmur 110:1; Daniel 7:13

⁶⁷ Naupu haitu naria sanu nantaveulusi lenje i Yesus bo nombaboba Ia. Naria sanupa nosapa Ia ⁶⁸ bo nanguli, “He, Magau Topepakasalama anu nijanji nu Alatala! Boto vei, isema nombasapa Iko?”

I Petrus nombasapu i Yesus

Markus 14:66-72; Lukas 22:56-62; Yohanes 18:15-18; 25-27

⁶⁹ Tempo haitu i Petrus da nonturo ri savalikuna ri doyata banua haitu. Saito batua mombine anu nokarajaa ri banua Pakeni nTopanggeni Pesomba nanggaparai ia bo nanguli, “Iko muni roa i Yesus toGalilea haitu!”

⁷⁰ Tapi i Petrus nesapu ri ngayora pura-pura, “Ledo nakana! Ledo nisaniku nuapa niulimu!”

⁷¹ Naupu haitu i Petrus hau ri bobaa nu doyata. Ri sia saito batua mombine ntanina nanggita ia bo nanguli ka tona hamai, “Tona hitu muni nosanggeni-nggani ante i Yesus, toNazaret haitu.”

⁷² Tapi i Petrus nesapu vaimo ante nopinda bo nanguli, “Ledo nisaniku tona haitu!”

⁷³ Dopa nasae, tona neangga hamai nanggaparai i Petrus bo nanguli, “Natantumoko iko muni topangoseaka i Yesus, apa nalanto lako ri enggo ntesamu iko toGalilea!”

⁷⁴ Bo nopinda vaimo i Petrus bo nanguli, “Ledo ntoto nisaniku tona haitu!” Bo eva nisuka, nototorokomo manu. ⁷⁵ Bo nitora i Petrusmo tesa i Yesus pangane nanguli, “Dopame manu mototoroko ngena, talu-ngganimo iko mombasapu Yaku.” Bo nesuvumo i Petrus notumangi nonjodu-njodu ante nasusa mpuu rarana.

I Yudas nompatesi karona mboto

Markus 15:1; Lukas 23:1-2; Yohanes 18:28-32

27 Naeo mpadondo, nasadondo mpuu, balengga-balengga ntopanggeni pesomba bo totua-totua ntoYahudi nasiromu nompakatantu i Yesus kana rapatesi. ² Nitipunggura Ia bo nikenira hau nte Gubernur Pilatus.

³ Naupu i Yudas nompobalu i Yesus ka baliNa, niepena i Yesus nihuku mate, nanjoso raramo ia. Hau ia nte balengga-balengga ntopanggeni pesomba bo nipopanjinina ka ira talupulu mpeka doi salaka nitari mana. ⁴ Niulikana ira, “Nadosamo yaku! Yaku nompobalu tona ledo nasala bo Ia nihuku mate!”

Nesana ira, “Haitu ledo urusa kami! Urusamu mboto!” ⁵ Nangepe haitu, nitedaka i Yudas doi salaka haitu hau riaru Banua nu Alatala bo nalaimo ia noloe sampe namate. ⁶ Balengga-balengga ntopanggeni pesomba nantidurunaka doi haitu bo nanguli, “Doi hitu doi nisulaka raa. Nantuntuni atura agamata, doi eva hitu ledo namala rapake ri Banua nu Alatala.” ⁷ Jadi nasintuvu ira doi haitu rapake mangali salimpu tana anu niuli “Tana Ntopomandu Kura” majadi tana rapo-

dayo ntona ledo toYahudi anu mamate ri ngata Yerusalem. ⁸ Haitu sampe tana haitu niuli "Tana Raa" sampe sii-sii.

⁹⁻¹⁰ Ivesiamo kadupana tesa nu Alatala nipapola Nabi Yeremia nggaulu anu nanguli ivei:

"Ali katuvumu nipakatantu ntoIsrael
aga talupulu mpeka doi salaka.

Doi haitu nipakera mangali tana ntopomandu kura.
nangoseaka anu niparenta nTupu ka yaku."

Zakharia 11:12-13

I Yesus ri ngayo Gubernur Pilatus

Markus 15:2-5; Lukas 23:3-5; Yohanes 18:33-38

¹¹ Tempo i Yesus nangingayo Gubernur Pilatus nekutana Gubernur nte Ia, "Mpuu-mpuu Iko Magau ntoYahudi?"

Nesana i Yesus, "Nakana niulimiu."

¹² Tapi tempo balengga-balengga ntopanggeni pesomba bo totua-totua ntoYahudi nompangadu Ia, nau ledo nasala ledo notingo Ia. ¹³ Haitu sampe Gubernur Pilatus nekutana nte Ia, "Ledo niepeMu pura-pura pangadu ntona ka karoMu?" ¹⁴ Tapi i Yesus ledo notingo nau sambela, sampe nokumaa mpuu rara Gubernur.

I Yesus nitangara kana rapatesi, i Barabas kana rakabasaka

Markus 15:6-15; Lukas 23:13-25; Yohanes 18:39-19:16

¹⁵ Mpaep-mpae ri Eo Mbaso Paskah, biasana Gubernur nombakabasaka saito tona nitarunggu nangoseaka pompelisi ntodea. ¹⁶ Mpaep haitu naria saito tona nitarunggu nisani ntodea nadaa mpuu, sangana i Yesus Barabas. ¹⁷ Tempo i Pilatus nombatangara i Yesus, todea nasiromu. Jadi i Pilatus nekutana nte ira, "Isema rapodotamiu kukabasaka ka komiu mpaep hitu? I Yesus Barabas atau i Yesus anu niuli Magau Topepakasalama anu nijanji nu Alatala?" ¹⁸ I Pilatus nanguli ivesia apa nisaninamo pakeni ntoYahudi nombadekei i Yesus ka ia sabana nasiriati.

¹⁹ I Pilatus da nonturo ri Ponturo Potangara haitu, nakavamo saito tona nanggeni petevai nu berei i Pilatus, nanguli ivei: "Nee ratangara parakara ntona ledo nasala haitu! Iamo sampe pangipiku nadaa ibongi."

²⁰ Tapi balengga-balengga ntopanggeni pesomba bo totua-totua ntoYahudi nompakapane rara ntodea ala raperapira i Pilatus nombakabasaka i Barabas ka ira, bo i Yesus rahuku mate. ²¹ Nekutana i Pilatus nte todea, "Lako ri ira randua, isema rapodotamiu kukabasaka ka komiu?"

Nesana ira, "Barabas!"

²² Bo nekutana vaimo i Pilatus, "Ane ivesia, nuapa kupovia ante i Yesus, anu niuli Magau Topepakasalama anu nijanji nu Alatala?"

Nesana ira, "Pakumo Ia ri kayu salib!"

²³ Nekutana vai i Pilatus, "Nakuya? Nuapa salaNa?"

Tapi ira aga nongare ante suara neliu kamanggana, "Paku Ia ri kayu salib!"

²⁴ Kaupuna nalantomo ka i Pilatus ledo ria gunana mompapola motesa ka ira, sabana ira aga nantambai nongare-ngare, sakidepa majadi kagado. Jadi nialana uve, nitoposina palena ri ngayo ntodea, bo niulina ka ira, "Yaku ledo manjimbuka sala lako ri kamate ntona nanao hitu. Komiumo manjimbukana."

²⁵ Nesana todea, "Ivesia mamimo! Damo kami bo muli-muli kami manjimbuka kamateNa!"

²⁶ Naupu haitu i Pilatus nombakabasaka i Barabas ka ira. Bo nituduna tantarana mombacambu i Yesus bo mombapaku Ia ri kayu salib.

I Yesus nipongei-ngeika ntantara

Markus 15:16-20; Yohanes 19:2-3

²⁷ Naupu sia tantara nu Gubernur nanggeni i Yesus hau ri tombi potangara riaru Banua Gubernur bo nirondera pura-pura roara nasiromu nantagui i Yesus.

²⁸ Nivonjuramo pakea i Yesus bo nipasuaraka Ia baju ndoe nalei-lei mpo baju magau. ²⁹ Nipoviara songgo nu magau lako ri valaa nggarui bo nidikara ri balenggaNa. Nidekeira ka Ia sangu toko ri pale ngganaNa mpo toko nitipale nu magau-magau. Bo nantaputumo ira ri ngayoNa nompongei-ngeika Ia ante nanguli, "Tabe, Magau ntoYahudi!" ³⁰ Nitaveulusira Ia bo toko ri paleNa nialara bo nibobakara balenggaNa. ³¹ Naupupa nipongei-ngeikara ivesia, nivonjuramo baju magau haitu bo nipopasuakara mpanjilimo pakeaNa mboto. Naliu haitu nikenira hau ri savaliku ngata rapaku ri kayu salib.

I Yesus nipaku ri kayu salib

Markus 15:21-32; Lukas 23:26-43; Yohanes 19:17-27

³² Ri tatanga dala tantara-tantara nosintomuka saito langgai lako ri ngata Kirene anu nosanga i Simon. Ia nibarusura manjimbuka kayu salib i Yesus. ³³ Ledo nasae, nakavamo ira ri ponturo nosanga Golgota, batuan "Bulu Banga Balengga." ³⁴ Nakava hamai, nipaynura uve anggur nigalo pakuli napai ka i Yesus. Tapi nipetamiNa sakide, ledomo nadota Ia nanginu hanupa.

³⁵ Ri siamo ira nombapaku i Yesus ri kayu salib. Naupu haitu, nibagira pakeaNa ante notende lamoro. Isema nambela lamoro, ia manggava pakea haitu.

³⁶ Naupu haitu nonturomo ira ri sia nombajagai Ia.

³⁷ Ri toto balenggaNa ri kayu salib haitu nipatakara dopi nitulisi pangadura ivei:

HITUMO I YESUS, MAGAU NTOYAHUDI.

³⁸ Tempo haitu naria muni randua topeago nipaku ri kayu salib ntanina, saito ri sabingga nggana i Yesus, bo saitopa ri sabingga njidiNa.

³⁹ Tona nolitu ri sia nolito-lito balenggara † bo nombadee Ia. ⁴⁰ Nanguli ira, "NiuliMu Iko mamala mombagerosi Banua nu Alatala bo mombabanguna mpanjili riara talu-eo! Ane Iko mpuu-mpuu Ana nu Alatala, pakasalama karoMu mboto! Panaumo lako ri kayu salib tutu!"

⁴¹ Ivesia muni balengga-balengga ntopanggeni pesomba bo guru-guru agama bo totua-totua ntoYahudi nombadee-dee Ia. Niulira, ⁴² "Tona ntanina nipakasalamanaNa. Tapi peinta vei! KaroNa mboto ledona namala nipakasalamanaNa! Ane Ia mpuu-mpuu Magau ntoYahudi, agina Ia manau lako ri kayu salib bo kami momparasaya Ia!" ⁴³ Ia nanjarumaka Alatala bo niuliNa Iamo Ana nu Alatala! Jadi hitupa rapeintakata ane Alatala madota mompakasalama Ia!" ⁴⁴ Bo ivesia muni i Yesus nidee ntopeago-topeago anu nipaku ri kayu salib ri sinjoriNa.

Kamate i Yesus

Markus 15:33-41; Lukas 23:44-49; Yohanes 19:28-30

⁴⁵ Natongo eo, sampesanika nalandamo njumangata haitu sampe tinti tatalu nggoviana. ⁴⁶ Nitasere tinti tatalu nggoviana i Yesus nongare ante suara namangga, "Eli, Eli, lama sabakhtani?" Batuana "Alatala TupuKu, nakuya nipalaisikaMiu Yaku?" ††

⁴⁷ Bara sako-ndua tona anu neangga ri sia nangepe Ia bo nanguli, "Ia nompokio Nabi Elia!" ⁴⁸ Saito ira haitu nasalisa hau nangala sangaya eva lomo bo nibanggana riara uve anggur napoi. Naupu haitu nitatakana ri vuntu kayu bo nijujukakana ri sumba i Yesus. ⁴⁹ Tapi tona ntanina nanguli, "Nepa! Popea ntani ruru. Rakitata ane Nabi Elia mpuu-mpuu makava mantulungi Ia!"

⁵⁰ Naupu haitu i Yesus nongare vai ante suara namangga, bo naponjimo nosaNa. ⁵¹ Ri tempo haitu muni kae povombo ri Banua nu Alatala nabite ‡ rombite lako ri bavona sampe ri tambena. Bo naria muni lingu mbaso bo vatu-vatu mbaso natebingga. ⁵² Nadea dayo natebuka bo nadea tona nanao anu namatemo natuvu mpanjili ⁵³ bo nesuvu lako riara dayo-dayo haitu. Bo naupu i Yesus natuvu mpanjili nesuamo ira ri ngata Yerusalem ‡‡, bo nadea tona ntanina nanggita ira.

† nolito-lito balengga ivesiamo toYahudi nombadee-dee tona
 †† Mazmur 22:1 ‡ Kae povombo ri Banua nu Alatala nombagi Tombi Nagasa bo Tombi Nelabi Kagasana. Tombi Nelabi Kagasana nireke ponturo nu Alatala. Dopame i Yesus namate nombatolosi dosa manusia aga Pakeni nTopanggeni Pesomba namala nesua Tombi Nelabi Kagasana sanggani sampae bo nanggeni pesomba todea ka Alatala. Kabite kae povombo haitu, tandana kita namalama mosinggava nte Alatala riara posambayata bo domo paraluu tona ntanina mombatarioloki. ‡‡ Yerusalem: basa Yunani "ngata nipatani ka Alatala".

⁵⁴ Tempo balengga ntantara nu Magau Mbaso bo tantara-tantarana anu nombajagai i Yesus ri sia, nombarasai lingu mbaso haitu bo nanggita mpengaya-ngaya anu najadi, naeka mpuumo rarara. Niulira, "Tona hitu mpuu-mpuu Ana nu Alatala!"

⁵⁵ Nadea mombine neangga nakavao sakide nantara kajadia-kajadia haitu. Iramo mombine-mombine anu nangoseaka i Yesus bo nantulungi Ia nompamula lako ri pokarajaaNa ri bagia Galilea. ⁵⁶ Saito nosanga i Maria Magdalena. Saitopa nosanga i Maria, tina i Yakobus bo i Yusuf. Saitopa berei i Zebedeus.

I Yesus nitana

Markus 15:42-47; Lukas 23:50-56; Yohanes 19:38-42

⁵⁷ Nasolopa eo, nakavamo saito tona nakalumana nosanga i Yusuf. I Yusuf mai lako ri ngata Arimatea bo ia muni topangoseaka i Yesus. ⁵⁸ Hau ia nte Gubernur Pilatus nerapi karobata i Yesus. Nangepe perapina haitu, i Pilatus nantudu tantarana nombadekei karobata i Yesus ka i Yusuf. ⁵⁹ Bo i Yusuf nangala karobata i Yesus haitu, nisompuna ante kae gandisi nalusu anu da nabaru, ⁶⁰ bo nidikana riara dayo nipoviana ka karona mboto anu dako nipaa ri vatu nobunti. Naupu haitu nidulina vatu mbaso mombaupi vamba dayo haitu, bo nalaimo ia. ⁶¹ Tapi i Maria Magdalena ante i Maria ntanina, nonturo ri sia nantingayo dayo haitu.

Dayo i Yesus nijagai nu tantara-tantara

⁶² Naeo mpadondona ri eo penonto, balengga-balengga ntopanggeni pesomba bo toFarisi hau nosinggava nte Gubernur Pilatus. ⁶³ Nakava hamai, nanguli ira, "Pua, nitora kami tesa ntopebagiu haitu tempo Ia da natuvu. NiuliNa, 'Maliu talu-mbongi Yaku matuvu mpanjili.' ⁶⁴ Jadi haitu sampe kami merapi ala komiu mombatudu tantara-tantara hau mombajaga dayoNa ria sampe eo katataluna ala ledona maria loga anaguruNa hau mangala karobataNa bo manguli ka todea, 'Natuvu mpanjili Ia!' Ane majadi ivesia, pebagiu kaupuna madaapa pade pebagiuNa pamulana."

⁶⁵ Nesana i Pilatus, "Siimo tantara-tantara. Kenimo ira bo jagaimo dayo pakabelo-belo." ⁶⁶ Jadi hau ira nombamere vatu poupi dayo ala ledona rabuka ntona. Bo nitudura tantara-tantara mombajagai dayo ala ledona maria tona mombabuka dayo haitu.

I Yesus natuvu mpanjili

Markus 16:1-11; Lukas 24:1-12; Yohanes 20:1-18

28 Naliu eo penonto, dopame nebonda eo, ri eo Aka hau i Maria Magdalena bo i Maria ntanina manggita dayo i Yesus. ² Sampesani naria lingu mbaso sabana malaeka nTupu nanau lako ri suruga nombaduliaka vatu poupi dayo. Naupu haitu nonturomo ia ri bavona. ³ Lenjena nenggila mpo kila, pakeana na-

puti mpuu. ⁴ Tantara-tantara anu nojaga ri sia naeka mpuu sampe nolete-lete njumanggaro. Nadunggamu ira najadi eva tomate.

⁵ Bo nanguli malaeka haitu ka mombine-mombine, "Nee maeka. Nisaniku komiu nangelo i Yesus anu namate nipaku ri kayu salib. ⁶ Ia domo ria ri sii. Natuvu mpanjilimo Ia nangoseaka anu niuliNa bara ipia. Kamaimo peinta ponturo nipomboli karobataNa. ⁷ Bo koimo masalisa ulika ana-anaguruNa natuvu mpanjilimo Ia. Ia mokolu ka komiu hau ri bagia Galilea. Hamai rakitamiu Ia. Toramo anu nitesaku ka komiu!"

⁸ Jadi nalaimo ira nasalisa lako ri dayo. Naeka ira tapi nadamba muni rarara. Nangovamo ira hau manguli anu najadi ka ana-anaguru i Yesus. ⁹ Sampesani nariamo i Yesus nosintomuka ira bo nanguli, "Tabe." Ira nanggaparai Ia bo nanggapui kadaNa mombasomba Ia. ¹⁰ Nanguli i Yesus ka ira, "Nee maeka. Koi ulika sampesuvu-sampesuvuKu hau ri Galilea. Hamai rakitara Yaku."

Tesa nipatolele tantara-tantara anu nombajagai dayo i Yesus

¹¹ Nalaipa mombine-mombine pangane, bara sako-ndua tantara topojava dayo haitu hau ri ngata nombatesaki ka balengga-balengga ntopanggeni pesomba anu najadi ri dayo pangane. ¹² Balengga-balengga ntopanggeni pesomba nasiromu nolibu ante totua-totua ntoYahudi. Bo ira nasituju mombapepe doi dea ka tantara-tantara haitu. ¹³ Niulira ka tantara haitu, "Ulim-

iu ivei: 'Tanga bongi pangane nakavamo topangoseaka i Yesus nangangga karobataNa tempo kami namonjo.' ¹⁴ Ane Gubernur mangepe tesa haitu, damo kami motesa ka ia komiu ledo nasala, ala ledo makuya-kuya komiu." ¹⁵ Jadi tantara-tantara nangala doi haitu bo nitesa-tesara anu nitudu ka ira. Bo tesa tantara-tantara haitu batena nipatolele ri tatanga ntoYahudi sampe sii-sii.

I Yesus nantudu anaguruNa mompatolele Kareba Belo
Markus 16:14-18; Lukas 24:36-49; Yohanes 20:19-23; Suro-Suro 1:6-8

¹⁶ Bo haumo sapulu saito anaguru i Yesus ri sangu bulu ri bagia Galilea anu nipakatantu i Yesus ka ira. ¹⁷ Hamai nikitara mpuu Ia bo nantaputu ira mombasomba Ia. Tapi naria sanu nonggai rarara. ¹⁸ I Yesus nanggaparai ira bo nanguli, "Pura-pura kuasa ri suruga bo ri dunia nidekei ka Yaku. ¹⁹ Jadi koimo komiu, hau ri umba-umba ri dunia, mompatuduki tona lako ri umba-umba ngata majadi topangoseaka Yaku. Diumo ira ante kuasa nTuamata Alatala, Yaku AnaNa, bo Nosa Gasa. ²⁰ Patudukimo ira ala raoseakara pura-pura anu niparentaKu ka komiu. Bo toramo! Yaku bate-batena mosanggani-nggani ante komiu sampe ri kaupu dunia."

19-May-2009@12:42, Backup Description=19-May-2009@09:53, snave - 26-May-2009@11:04, Backup Description=26-May-2009@11:03, B Altork - ❖❖❖

Markus

Vamba nu Tesa

Buku hitu nitulisi i Markus. Ia toYahudi anu nomporoa i Petrus anaguru i Pue Yesus riara polipana nanggeni Kareba Belo. Tesa niepe i Markus lako nte i Petrus nitulisina riara buku hitu. Buku hitu nitulisi ka tona ledo toYahudi ala rasanira muni Kareba Belo lako nte Alatala.

Isi buku hitu notesa pokarajaa i Pue Yesus bo pepatudukiNa ka topangoseaka Ia. I Yesus nompatolele Kareba Belo anu nanguli Alatala nompamula noparenta mpo Magau ri dunia hitu (1:14-15). I Yesus nakuasa nompakabelo tona nadua bo nompopalai seta-seta lako nte tona nipesua seta. Tapi naupa ivesia, pakeni ntoYahudi nangeva i Yesus, bo kaupuna ira nasintuvu mompatesi Ia (3:6). Tapi I Yesus ledo nalai lako nte ira. NisaniNa Ia kana rapatesira (8:31; 9:31; 10:33-34). NipakatantuNa hau ri ngata Yerusalem sabana patuju kakavaNa ri dunia ala mombadekei karoNa rapatesi mantolo dosa manusia (10:45). Naupu i Yesus nipatesi Ia natuvu mpanjili pade neore hau ri suruga.

Patuju i Markus notulisi buku hitu ala mompakalanto i Yesusmo Magau Topompakasalama bo Ana nu Alatala. (Peinta 1:1, 11, 24; 3:11; 5:7; 8:29; 9:7; 14:61-62; 15:39).

Isi nu Buku

Pamulana pokarajaa i Yesus (1:1-13)

I Yesus nompamula nompatuduki todea bo nompopakita kuasaNa ri bagia Galilea (1:14-3:6)

I Yesus nompapola pokarajaaNa ri Galilea (3:7-6:13)

Pokarajaa i Yesus ri savaliku bagia Galilea (6:14-8:30)

Polipa i Yesus hau ri ngata Yerusalem (8:31-10:52)

Povia bo pepatuduki i Yesus ri ngata Yerusalem (11:1-13:37)

I Yesus nisaka bo nipatesi (14:1-15:47)

I Yesus natuvu mpanjili (16:1-20)

I Yohanes Topediu nompakadia todea mantarima i Yesus Kristus

Matius 3:1-12; Lukas 3:1-20; Yohanes 1:19-28

1 Hitumo tesa Kareba Belo, tesa i Yesus Kristus, Ana nu Alatala. ²Tesa hitu nompamula ante kaka-va i Yohanes Topediu nangoseaka anu nitulisi ri buku Nabi Yesaya nggaulu. Ante sumba nu nabi, Alatala nanguli ka AnaNa ivei: <<Pariaramo! Kutudu batuaKu mokolu ka Iko ala ia mompakadia dala ka Iko.>>

Maleakhi 3:1

³<<Naria saito tona nongare-ngare ri karava bai ivei: <Pakasadiamo dala ka Tupu! Pakanoa dala raoseNa!>>

Yesaya 40:3

⁴Evamo anu nitulisi pangane, ivesiamo i Yohanes Topediu neumba ri karava bai. I Yohanes nompatolele kareba lako nte Alatala ivei: <<Kajeamo lako ri dosamiu bo radiu, ala komiu raampungu nu Alatala.>>

⁵Bo nakavamo tona lako ri njumangu bagia Yudea bo lako ri ngata Yerusalem mangepe ia. Ira nompangaku

dosa-dosara bo i Yohanes nombadiu ira ri Binangga Yordan, tandana najeamo ira lako ri dosara.

⁶I Yohanes nompake pakea nitanu lako ri bulu unta. Ia nosulepe kulimba [†] bo kandeanana nggaboro bo manisa. ⁷Ia nompatolele tesa hitu ka todea ivei: <<Ri puriku ngena kana meonga saito anu nelabipa kakuasaNa pade yaku. Nau aga motungga mombavole lui sapatuNa, ledo masipato yaku. ⁸Yaku nombadiu komiu ante uve. Tapi Ia mombadiu komiu ante Nosa Gasa nu Alatala.>>

I Yesus nidiu i Yohanes ri Binangga Yordan

Matius 3:13-17; Lukas 3:21-22; Yohanes 1:29-34

⁹Tempo haitu nakavamo i Yesus lako ri ngata Nazaret ri bagia Galilea, bo i Yohanes nombadiu Ia ri Binangga Yordan. ¹⁰Tempo i Yesus neumba lako ri uve, kaliu-liu nikitaNa langi natebuka bo Nosa Gasa nu Alatala, nolenje mpo tonji banggebodo, nanau bo netuu nte Ia. ¹¹Bo naria suara lako ri suruga nanguli,

[†] Pakea i Yohanes Topediu nasimbayu mpo pakea Nabi Elia nggaulu. Peinta 2 Raja 1:8.

<<Ikomo AnaKu nipotoveKu. Ikomo nompakadamba raraKu.>>

I Yesus nipesori Magau nu Seta ri karava bai

Matius 4:1-11; Lukas 4:1-13

¹² Naupu haitu, Nosa Gasa nu Alatala kaliu-liu nompakeni i Yesus hau ri karava bai. ¹³ Ia nonturo hamai patapulu mbongi kasaena nipesori nu Magau Seta *ala Ia domo matundu nte Alatala tapi matundu nte Magau nu Seta*. Ia nosangani-nggani ante binata-binata vura hamai, bo malaeka-malaeka nTupu nakava nompatala Ia.

I Yesus nompokio ampa topebau mangoseaka Ia

Matius 4:12-22; Lukas 4:14-15; 5:1-11

¹⁴ Naliu i Yohanes Topedi nisuaraka riarar ntarungu, haumo i Yesus ri bagian Galilea mompatolele Kareba Belo lako nte Alatala. ¹⁵ NiuliNa, <<Nakavamo tempo nipakatantu nu Alatala. Naparamo tempona Alatala moparenta mpo Magau. Kajeamo komiu bo parasayamo Kareba Belo lako nte Alatala!>>

¹⁶ Tempo i Yesus noliu ri tinggi Rano Galilea, nikitaNa i Simon ante tueina i Andreas nombatendeaka jala mompemala bau ri rano haitu, apa ira topebau mami. ¹⁷ Nanguli i Yesus ka ira, <<Kamaimo, oseakamo Yaku, bo Kupatuduki komiu mangelo tona ntanina majadi topangoseaka Yaku.>> ¹⁸ Nangepe tesa haitu, kaliu-liu nipalaisiramo jalara ri sia bo hau nioseakaramo i Yesus.

¹⁹ Napolamo i Yesus sakidepa, bo nikitaNa i Yakobus, ana i Zebedeus, ante tueina i Yohanes riarar sakayara nompakabelo jalara. ²⁰ Nanggita ira, nanguli i Yesus, <<Kamaimo! Oseakamo Yaku.>> Nangepe haitu, nipalaisiramo tuamara ranjakaya nosangani-nggani ante topokarajaana bo hau nioseakaramo i Yesus.

I Yesus nompopalai seta lako nte tona nipesua nu seta

Lukas 4:31-37

²¹ I Yesus ante topangoseaka-topangoseaka Ia hau ri ngata Kapernaum. Ri eo penonto nesuamo Ia ri banua petupu ntoYahudi bo nompamulamo nompaguru.

²² Nokumaa mpuu tona nangepe pepatudukiNa, apa Ia ledo nompaguru mpo guru-guru agama. Ia nompaguru mpo tona nakuasa mpuu. ²³ Riarar banua petupu tempona haitu, naria langgai nipesua nu seta. Sampesanika nongaremo ia ante suara namangga, ²⁴ <<He, Yesus toNazaret! RakuyaMiu kami? Komiu nakava mompakaropu kami? Nisaniku Komiu. Komiu mo toGasa nitudu nu Alatala!>>

²⁵ I Yesus nanguli ka seta haitu, <<Kalinomo! Palaimo lako ri karo ntona tutu!>> ²⁶ Jadi nasinggikimo tona haitu, bo nongaremo seta pakamangga bo nalaimo. ²⁷ Nanggita haitu, nokumaa puramo todea ri sia

sampe ira nosimpekutana, <<Hama! Nuapa tano hitu? Sangaya pepatuduki nabaru! Ante kuasaNa nituduNa seta malai bo nalai mpuumo!>> ²⁸ Naliu haitu, nantolemo nasalisa kareba i Yesus ri njumangu bagian Galilea.

I Yesus nompakabelo nadea tona anu nadua

Matius 8:14-17; Lukas 4:38-41

²⁹ I Yesus ante topangoseaka-topangoseaka Ia nompalaisi banua petupu haitu bo kaliu-liu hau ri banua i Simon bo Andreas. I Yakobus bo i Yohanes muni hau nosangani nte ira. ³⁰ Tempo haitu matua i Simon mombine naturu ri paturuna sabana nakokora, bo nilirakamo i Yesus. ³¹ Jadi haumo i Yesus nanggaparai totua mombine haitu. NikingisiNa pale nu mombine bo nitulungiNa ia membangu. Kaliu-liu nabelomo ia, bo hau nombakadambanaka ira.

³² Nasolopa eo, nakavamo tona dea nanggeni roaroara nadua bo tona nipesua seta. ³³ Pura-pura tupu ngata haitu nasiromu ri ngayo banua niponturo i Yesus. ³⁴ Bo i Yesus nompakabelo nadea tona anu nadua mpengaya-ngaya, bo nadea seta nipopalaiNa muni. Ledo nidekeiNa seta-seta haitu motesa sabana nisani- ra Iamo toGasa lako nte Alatala.

I Yesus hau nompaguru ri ngata-ngata ntanina ri bagian Galilea

Lukas 4:42-44

³⁵ Nasadondo mpuu, da naruyona, nembangumo i Yesus bo nompalaisi banua. Ia hau ri ponturo nakalinoa bo nosambaya hamai. ³⁶ Tapi i Simon ante roaroana nangelo Ia. ³⁷ Niposinggavakarapa i Yesus, niuliramo ka Ia, <<Guru, nadea tona nangelo Komiu.>>

³⁸ Nesana i Yesus ka ira, <<Anumo, kita mompapola polipata hau ri ngata-ngata ntanina ala mamala Kupatuduki muni tona hamai, sabana haitumo patuju kakavaKu ri dunia.>> ³⁹ Jadi i Yesus hau nompatolele Kareba Belo ri banua-banua petupu ri njumangu ngata ri bagian Galilea. Bo Ia muni nompopalai seta-seta lako nte tona nipesua seta.

I Yesus nompakabelo saito tona nadua oge

Matius 8:1-4; Lukas 5:12-16

⁴⁰ Naria saito tona nadua oge nakava nte i Yesus. Ia nantaputu bo nerapi nte rarana mpuu-mpuu nangulika i Yesus, <<Pue, ane madota Komiu, Komiu nompakule nompakabelo yaku.>>

⁴¹ Naasi mpuu mata i Yesus nanggita tona haitu. Jadi nidikaNa paleNa ri karo ntona nadua haitu, bo niulikaNa, <<Madota Yaku. Mabelomo komiu!>> ⁴² Kaliu-liu nalipo dua ntona haitu bo nabelomo karona. ⁴³ Naliu haitu, i Yesus nombatudu ia malai bo nipopaingana ivei: ⁴⁴ <<Nee mutesa ka tona anu najadi ri karomu.

Tapi koimo hau nte topanggeni pesomba bo popakitamokaromu ka ia ala rakitana nabelomokaromu. Bo dekeimo pesombamu ka Alatala nangoseaka anu nipakatantu ri atura Nabi Musa, ala mompopakita ka todea iko mpuu-mpuu nabelomo.>>

⁴⁵ Tapi nau nitagi, kana hau nipatolelena kajadia pangane. Nitesana ka tona ri umba-umba sampe i Yesus domo namala nesua rangata. Ia nonturo ri savaliku ngata ri kalinona. Tapi naupa ivesia, todea lako ri umba-umba nakava njuu nte Ia.

I Yesus nompakabelo saito topunggu

Matius 9:1-8; Lukas 5:17-26

2 Bara sako-eo kaliuna haitu, nesua vaimo i Yesus ri ngata Kapernaum. Bo natolele karebana Ia naria ri banuaNa. ² Nangepe haitu, nadeamo tona nakava nasiromu ri banua haitu sampe domo nasuka, nau ri ngayo vamba domo ria ponturo. Ri sia i Yesus nompatolele Tesa nu Alatala ka ira. ³ Tempo haitu nakavamo ampa tona nombakova roara napunggu. ⁴ Ledo namala ira nanggaparai i Yesus sabana tona ri sia nadea nosimpai gaga. Jadi hau ira nompene ri bavo ata banua haitu, † bo nitonggara ata ri toto i Yesus. Naliu haitu, niuluramo topunggu nte ompana. ⁵ Tempo i Yesus nanggita karoso pomparasayara haitu, niulikaNamo topunggu haitu, <<AnakKu, dosamu niampungimo.>>

⁶ Bara sako-ndua guru agama nonturo hamai nompekiri, ⁷ <<Berimba bo nabia Ia notesa ivesia? Ia nanjalai Alatala *apa nipakasimbayuNa kuasaNa ante kuasa nu Alatala!* Ledo ria saitoa manusia namala mombaampung dosa, aga Alatala!>>

⁸ Kaliu-liu nisani i Yesusmo anu nipekirira. Jadi niulikaNa ira, <<Nakuya komiu nompekiri ivesia riarantaimiu? ⁹ Ledo nakaja manguli ka topunggu, <Dosamu niampungimo>. Nakajapa manguli <Peanggamo, alamo ompamu bo polipamo>! ††¹⁰ Tapi Kupopakita ka komiu, Yaku, Ana nu Manusia, nakuasa mombaampung dosa manusia ri dunia.>> Bo nituduNamo topunggu haitu, ¹¹ <<Peanggamo! Alamo ompamu bo panjilimo!>> ¹² Bo kaliu-liu neangga mpuumo topunggu haitu ri ngayora pura-pura. Nialanamo ompana bo nanjilimo ia. Nanggita haitu, nokumaa puramo tona ri sia, bo ira nombatoiya Alatala. Niulira, <<Dopa naria nikitata kajadia ivehaitu!>>

I Yesus nompokio i Lewi majadi topangoseaka Ia

Matius 9:9-13; Lukas 5:27-32

¹³ Naliu haitu, hau vai sangganipa i Yesus ri tinggi rano. Nadea mpuu tona nakava nte Ia, bo Ia nompatuduki ira. ¹⁴ Naupu haitu, tempo i Yesus noliu ri

† *Ata ntona hamai nalumbu sampe namala nipompene.* †† *Namura nanguli <dosamu niampungimo> apa ledo rakita ntona bara majadi mpuu bara ledo. Tapi ane rauli <Peanggamo bo polipamo> rakita ntona bara majadi mpuu bara ledo!*

ngata haitu, nikitaNa saito topesingara balasitee nosanga i Lewi, ana i Alfeus, nonturo ri kantoro ntopesingara balasitee. Nanguli i Yesus ka i Lewi, <<Kamaimo, oseakamo Yaku.>> Kaliu-liu neangga i Lewi bo hau nangoseaka i Yesus.

¹⁵ Naliu haitu, haumo i Yesus nangande ri banua i Lewi nosanggani-nggani ante anaguruNa. Nadea topesingara balasitee bo tona niuli ntona nadea dosara nangande nosanggani-nggani ante ira, apa nadeamo tona ivehaitu nantuntuni i Yesus. ¹⁶ Tempo guru-guru agama anu nangoseaka pepatuduki nto-Farisi nanggita i Yesus nangande nosanggani-nggani ante topesingara balasitee bo tona nadosa, niulikara anaguru i Yesus, <<Nakuya gurumiu nangande nosanggani-nggani ante topesingara balasitee bo tona nadosa?>>

¹⁷ Nangepe pepekutanara haitu, i Yesus norapa ka ira ivei: <<Tona ledo nadua ledo paraluu rapakulisi nu dokutoro, aga tona nadua. Patuju kakavaKu hitu mompokio tona nadosa mangoseaka Yaku, ledo mompokio tona nanoa.>>

Anaguru i Yesus ledo nopuasa ane da naria i Yesus nte ira

Matius 9:14-15; Lukas 5:33-35

¹⁸ Naria sanggani topangoseaka i Yohanes Topediu bo toFarisi nopuasa. Tempo haitu naria tona nakava nte i Yesus bo nekutana nte Ia, <<Nakuya ana-anaguru i Yohanes bo topangoseaka toFarisi nopuasa, tapi topangoseaka Komiu ledo nopuasa?>>

¹⁹ Nesana i Yesus ante porapa. NiuliNa ivei: <<Ledo masipato torata mopuasa tempo ponika ane boti langgai da nosanggani ante ira. ²⁰ Tapi makava tempona boti langgai raala lako nte ira. Tempo haitumo pade mopuasa ira.>>

Pepatuduki i Yesus nabaru bo ada-ada agama Yahudi ledo namala raoseaka sanggani

Matius 9:16-17; Lukas 5:36-39

²¹ I Yesus nompapola tesaNa, <<Ledo ria tona nontampala baju rantana ante kae nabaru. Apa kae nabaru mekonjo mombabitesi baju ranta haitu. Kaupuna mantambai kaluona bite nu baju. ²² Ivesia muni ante uve anggur. Ledo ria tona nombaisi uve anggur nabaru ri pomboli ‡ njae anu domo nagini. Sabana, uve anggur da nabaru morende bo mevoya mompakapasa pomboli njae haitu. Kaupuna uve anggur mabubu puramo. Jadi uve anggur nabaru kana raboli ri pomboli nabaru muni.>>

‡ *Pomboli uve anggur tempo haitu nipovia lako ri kulimba bina-ta.*

**ToFarisi nangonteaka i Yesus sabana anaguruNa
nokarajaa ri eo penonto**

Matius 12:1-8; Lukas 6:1-5

²³ Tempo eo penonto ntoYahudi, i Yesus ante anaguruNa noliu ri talua gando. Ana-anaguruNa nombakaleti gando sakide pade nitiera *bo niontara*. ²⁴ Jadi nanguli toFarisi, <<Peinta vei! Nakuya anaguruMu nombaliunaka atura agamata? Apa nitagi nu agama nokarajaa ri eo penonto.>>

²⁵⁻²⁶ Nesana i Yesus, <<Dopa nibacamiu anu nipovia Magau Daud nggaulu? Tempo i Abyatar najadi Pakeni nTopanggeni Pesomba, i Daud ante roa-roana naara taira bo ledo ria kandeara. Jadi i Daud nesua riaru Banua nu Alatala bo nikandena roti nipesomba ka Alatala. Bo nidekeina muni ka roa-roana, naupa nangoseaka atura-atura agama aga topanggeni pesomba namala mangande roti haitu. *Tapi naupa ivesia, i Daud ledo nisalai.*>> †

²⁷ Pade i Yesus nompakaupu tesaNa ivei: <<Eo penonto nipakatantu nu Alatala ala mantulungi manusia. Manusia nipajadi nu Alatala ledo ala rapandasa mangoseaka ada-ada eo penonto. ²⁸ Jadi Yaku, Ana nu Manusia, nakuasa manguli nuapa masipato rapovia ri eo penonto.>>

**Tona nakoyo palena sabingga nipakabelo i Yesus ri eo
penonto**

Matius 12:9-14; Lukas 6:6-11

3 Naupu sia i Yesus nesua vai ri banua petupu. Ri sia naria saito langgai nakoyo palena sabingga. ² Bara sako-ndua toFarisi ri sia nompariara pakabelo-belo ala rakitara i Yesus mompakabelo tona haitu ri eo penonto, ala mamala rapangadura. ³ Nanguli i Yesus ka tona nakoyo palena haitu, <<Kaimo!>> ⁴ Pade i nipekutanaNa toFarisi naria ri sia, <<Nangoseaka atura-atura agama nuapa nipaloga ka kita ri eo penonto, movia mabelo atau madaa? Mompakasalama tona atau mompatesi?>>

Tapi ira ledo nadota nesana. ⁵ Jadi i Yesus neili nangganoto tona ri sia. Narau mpuu raraNa tapi nabuku muni raraNa nanggita ira nakaa gaga bagara. Ledo ntoto naasi matara nanggita tona nakoyo palena. Bo nanguli Ia ka tona haitu, <<Odomo palemu!>> Niodo ntona haitu mpuumo palena, bo nabelomo.

⁶ Naupu haitu nesuvumo toFarisi lako ri banua petupu haitu bo hau nosimpotesa ante tona nosabingga ka Magau Herodes, mangelo dala mompatesi i Yesus.

**I Yesus nompatuduki todea bo nompakabelo tona
nadua**

⁷ I Yesus ante anaguruNa hau ri Rano Galilea. Nadea mpuu tona lako ri bagia Galilea nantuntuni ira. Nadea muni tona nakava lako ri bagia Yudea, ⁸ lako ri Yerusalem, lako ri bagia Idumea, lako ri bagia sambote Binangga Yordan, bo lako ri ngata Tirus bo Sidon. Ira nakava nte i Yesus sabana niepera i Yesus novia kabaraka-kabaraka. ⁹ Nadea mpuu tona nasiromu ri sia sampe i Yesus nombatudu ana-anaguruNa mompakasadia sangu sakaya ka Ia ala nee sampe Ia raposiupisira. ¹⁰ Nadea mpuu tona nipakabeloNa bara ipia sampe pura-pura tona nadua nosimpago nompasimbuku mompakapara nte Ia ala ira mamala manggabe Ia. ¹¹ Tona nipesua nu seta, nggani-nggani nanggita i Yesus, kana nantaputu ira ri ngayoNa bo nongarengare, <<Komiumo Ana nu Alatala!>>

¹² Tapi i Yesus nombatagi ira, <<Nee mpuu ratesamiu isema Yaku!>>

I Yesus nompelisi sapulu randua anaguruNa

Matius 10:1-4; Lukas 6:12-16

¹³ Naupu haitu nantendemo i Yesus hau ri bulu, pade nipokioNa isema-sema nipodotaNa mangoseaka Ia, bo hau mpuumo ira. ¹⁴ Nakavapa ira, nipelisiNamo sapulu randua majadi suroNa ala ira momporoa Ia bo ratuduNa hau mompatolele Kareba Belo. ¹⁵ Bo nidekeiNa kuasa ka ira mompopalai seta-seta.

¹⁶ Hitumo sangara sapulu randua haitu:

i Simon anu nipoposangaNa i Petrus,

¹⁷ i Yakobus

bo tueina i Yohanes, ana-ana i Zebedeus. Ira randua nidaeNa Boanerges, batuana <<Ana-ana nu guru kede>>.

¹⁸ Naria muni i Andreas,

i Filipus,

i Bartolomeus,

i Matius,

i Tomas,

i Yakobus ana i Alfeus,

i Tadeus,

i Simon lako ri partei Zelot,

¹⁹ bo i Yudas Iskariot anu mompobalu i Yesus.

**Guru-guru agama nanguli i Yesus nompopalai seta
ante kuasa Magau nu Seta**

Matius 12:22-32; Lukas 11:14-23; 12:10

²⁰ Naupu sia i Yesus nanjili hau ri banua. Tapi nakava vai sanupa tona dea nasiromu, sampe Ia ante anaguruNa ledo nakapo nangande. ²¹ Sampesuvu i Yesus nangepe anu nipoviaNa haitu bo nisarumakara nabayamo Ia. Jadi nakavamo ira mangala Ia.

† *Haitu najadi dopame i Daud najadi magau. Peinta 1 Samuel 21:1-6.*

²² Nangulimo guru-guru agama nakava lako ri ngata Yerusalem ivei: <<Ia nipesua i Beelzebul, Magau nu Seta. Magau nu Seta haitumo nombadekei kuasa ka Ia nompopalai seta!>>

²³ Jadi i Yesus nombaronde todea haitu bo notesa porapa ka ira ivei: <<Berimba Magau nu Seta mompopalai setana mboto? ²⁴ Ane maria saito magau bo todeana bate-batena nosipobali, ledo masae magero mo kamagaua haitu. ²⁵ Bo ane tona sambanua ledo maria posintuvura bo aga mosipobali, ira sambanua haitu aga masimpotare. ²⁶ Ivesia muni ante Magau nu Seta. Ane Magau nu Seta mompopalai roana bo seta-setana mosipobali, natantumo kamagauana ledo ntoto maroso, aga magero.

²⁷ Ledo ria saitoa tona mamala mesua riarabania ntona naroso bo mangago mbara-mbarana ane tona naroso haitu ledo ratipungguna ntani ruru. Malihaitu haitu pade mamalamo isi banua raalasina. *Ivesia muni Yaku namala nompopalai seta, sabana Yaku nokolu nombadagi Magau nu Seta.*²⁸ Pariaramo tesaKu hitu! Pura-pura dosa manusia bo tesa-tesa nesalai, mamala raampung. ²⁹ Tapi isema-isema nombasalai Nosa Gasa, ledo raampung. Sabana, pesalaina haitu mai dosa sampe ri kasae-saena.>> ³⁰ I Yesus nanguli ivesia sabana naria tona nanguli Ia nipesua nu seta *tano mai, kuasaNa lako ri Nosa Gasa.*

Tona nangoseaka dota nu Alatala nipakasimbayu ka tina bo sampesuvu i Yesus

Matius 12:46-50; Lukas 8:19-21

³¹ Naupu haitu nakavamo tina i Yesus bo sampesuvu-sampesuvuNa. Ira nepopea ri savalikuna bo nitudura tona hau mombaronde i Yesus. ³² Tempo haitu tona dea nonturo nantagui i Yesus. Niulikara Ia, <<Guru, naria tinaMiu bo sampesuvuMiu ri savalikuna. Nielora Komiu.>>

³³ Nesanamo i Yesus, <<Isema kakanana tinaKu bo sampesuvuKu?>> ³⁴ Pade nikanotoNa pura-pura toponuro ri sinjoriNa bo niuliNa, <<Komiumo hii tinaKu bo sampesuvu-sampesuvuKu! ³⁵ Apa isema-sema nangoseaka dota nu Alatala, iamo sampesuvuKu bo tinaKu.>>

Porapa toposavu

Matius 13:1-9; Lukas 8:4-8

4 Naria saeo i Yesus nompaguru ri tinggi rano Galilea. Nadea mpuu tona nombatagui Ia. Jadi Ia nesavi bo nonturo riarasakaya bo todea neangga ri kabatana ri tinggi rano. ² Nadea ngayana nipepatudukikaNa ante nompake porapa ivei:

³ <<Epemo! Naria saito toposavu. ⁴ Tempo ia nosavu, sanu savua nanavu ri dala. Bo tonji-tonji nakava nanteosi savua haitu sampe naupu. ⁵ Naria muni sanu

savua nanavu ri tana navatu. Savua haitu nasalisa natuvu sabana tanana ledo nakumba.

⁶ Tapi napanepa eo, nalelemo bo nangaumo sabana ledo nandala kalena. ⁷ Bo naria muni sanu savua nanavu ranggarui. Karui haitu natuvu bo nangupisi savua sampe ledo nabelo katuvuna bo ledo novua. ⁸ Bo naria muni sanu savua nanavu ri tana naboya. Savua haitu natuvu sampe nambaso bo novua nabelo. Savua haitu novua talupulu-nggani kadeana, naria sanu onopulu-nggani bo naria muni sanu saatu-nggani kadeana vuana.>>

⁹ Bo nanguli munimo i Yesus ka ira, <<Isema-sema naria talingana, pariaramo porapa hitu.>>

Nuapa sabana i Yesus nompatuduki tona dea ante porapa

Matius 13:10-17; Lukas 8:9-10

¹⁰ Tempo i Yesus damo saitoNa, nakavamo ananaguruNa sapulu randua nosangani-nggani ante tona ntanina anu nangepe porapa niuliNa pangane bo nipekutanara batuana porapa haitu. ¹¹ Nangulimo i Yesus ka ira, <<Bara ipia dopa nisani nu manusia berimba Poparenta nu Alatala. Alatala nompopaisanina ka komiu, tapi tona ledo najadi todea riaraparenta nu Alatala kana rapatuduki ante porapa-porapa, ¹² ala madupa tesa ri Buku Gasa ivei:

<Tona gahaitu masaro manggita tapi ledo rasanira batuana.

Raepera tapi ledo rasanira batuana.

Mbelaka ira majea bo raampung. nu Alatala.>>

Yesaya 6:9-10

I Yesus nompakalanto batuana porapa toposavu

Matius 13:18-23; Lukas 8:11-15

¹³ Naupu sia nangulimo i Yesus ka ira, <<Ane ledo nisanimiu batuana porapa pangane, berimbamo rasanimiu porapa-porapa ntanina? ¹⁴ Toposavu haitu nirapaka tona nompatolele Tesa nu Alatala. ¹⁵ Savua nanavu ri bivi dala, nirapaka tona anu nangepe Tesa nu Alatala, tapi Magau nu Seta nakava nangala tesa dako nesua riarantaira. ¹⁶ Savua nanavu ri tana navatu nirapaka tona anu nangepe Tesa nu Alatala bo kaliuli nadamba nantarima tesa haitu. ¹⁷ Tapi ledo naroso pomparasayara, nasimbayu mpo tuda-tuda ledo naroso pokalena. Tempo ira nipandasa bara nipakasusa sabana nomparasaya Tesa haitu, kaliuli-nouramo rarara. ¹⁸ Savua nanavu ranggarui nirapaka tona anu nangepe Tesa nu Alatala, ¹⁹ tapi nabago gagarana nompekirika katuvura mboto. Ira aga naino ka doi bo nadidi ka mbara-mbara mpengaya-ngaya ri dunia. Haitu pura-pura nangupi Tesa nu Alatala sampe ledo ria aselena riaranggatuvura. ²⁰ Savua nanavu ri tana naboya nirapaka tona anu nangepe Tesa nu

Alatala bo nantarima Tesa haitu. Kaupuna naria asele lako ri Tesa haitu riar nggatuvura, naria sanu talupu-lu-nggani kadeana, naria onopulu-nggani kadeana bo naria sanupa saatu-nggani kadeana.>>

Porapa poindo

Lukas 8:16-18

²¹ Bo nanguli munimo i Yesus ka ira, <<Natantumo ane kita motunju poindo, ledo rataloduta ntonda atau radikata ri tambe mpaturu! Tantu poindo haitu radikata ri kalangana. ²² Haitu nogambara ka kita, pura-pura anu nitabuniaka sii-sii kana rapakalanto ngena, bo pura-pura anu dopa nisani ntona sii-sii kana rasani ntona pura bara maipia. ²³ Isema-sema naria talingana kana rapariarana TesaKu hitu!>>

²⁴ Pade i Yesus nompapola tesaNa ivei: <<Pariaramo tesaKu hitu! Posuka nipakemiu nosuka ka tona ntanina, haitu muni rapake nu Alatala mosuka ka komiu, bo ratambaikiNa melabipa vai. ²⁵ Isema-sema mantarima bo mangoseaka Tesa nu Alatala, kana ratambaika pangisanina Tesa haitu. Tapi isema-sema ledo mantarima bo mangoseaka Tesa nu Alatala, pangisani anu naria nte ia ralelakasi lako nte ia.>>

Pantambai kadea ntona riar poparenta nu Alatala lako ri Alatala mboto, ledo lako ri manusia

²⁶ Bo nangulimo i Yesus, <<Ane Alatala momparenta mpo Magau, kajadina nasimbayu mpo anu najadi nte toposavu ri taluana. ²⁷ Bongina toposavu haitu namonjo, eona ia nemata. Savua haitu bate-batena natuvu sampe nambaso. Ledo nisani ntupu ntalua berimba sampe savua haitu natuvu. ²⁸ Tana mbotomo mompakatuvu pae haitu. Pamulana nesuvu kadana. Naupu haitu novua pae, bo kaupuna naisimo pae. ²⁹ Ane natasamo pae, haumo tona mokato apa nakavamo tempona mokato.>>

Porapa batu mandoe

Matius 13:31-32,34; Lukas 13:18-19

³⁰ Nanguli muni Yesus, <<Nuapa mamala rapasimbayuka Poparenta nu Alatala? Porapa nuapa rapaketa? ³¹ Poparenta nu Alatala namala nirapaka batu mandoe †, anu nakodi ntoto. ³² Tapi ane rasavu mandoe haitu, matuvu, mambasopa pade uta-uta ntanina bo motinggu mbaso, sampe tonji-tonji ri laerava namala moju-mu bo mekanaluu ri sia.>>

³³ Ivesiamo i Yesus nompaguru todea ante nompake mpengaya-ngaya porapa, nangoseaka pompakulera mombapaha. ³⁴ Ia bate-batena nompake porapa ane notesa ka todea. Tapi ane nosanggani-nggani ante

† *Mandoe nitesara ri sii sangaya mandoe nambaso, sampe talu-metere kalangana.*

ana-anaguruNa, ledo nipakeNa, bo pura-pura tesaNa nitenteiNa pakalanto ka ira.

I Yesus nompopenonto poiri narimboso bo balumba-balumba nambaso

Matius 8:23-27; Lukas 8:22-25

³⁵ Nggoviana haitu muni, i Yesus nangunaka ana-anaguruNa, <<Anumo! Hau kita mosakaya mevote rano.>> ³⁶ I Yesus da nonturo riar sakaya, jadi ana-anaguruNa nompalaisi todea bo hau nesavi sakaya nte i Yesus bo nalaimo ira. Naria muni tona ri bara sako-angu sakaya ntanina nantuntuni sakayara.

³⁷ Dopa nasae ntoto polipara, sampesanika nakavamo poiri narimboso nompakambaso balumba nu rano. Balumba-balumba haitu nombarumpa sakayara sampe uve rano nesua riar sakayara, bo sakidepa natala. ³⁸ Tempo haitu i Yesus namonjo ri luna ri puri nu sakaya. Jadi hau ana-anaguruNa mombalike Ia bo nanguli, <<Guru, ledo napari raraMiu kita malodo nte sakaya?>>

³⁹ Jadi nembangumo i Yesus bo nompopetaa poiri bo nanguli ka balumba-balumba mbaso, <<Penontomo! Kalinomo!>> Bo nenonto mpuumo poiri bo nalino munimo uve rano haitu. ⁴⁰ Nangulimo i Yesus ka anaguruNa, <<Nakuya komiu naeka? Nakuya bo dopa niparasayamiu Yaku?>>

⁴¹ Jadi naeka bo nokumaa mpuumo ana-anaguruNa. Nosimpekutanamo ira, <<Isema tano tona hitu sampe nau poiri bo balumba natundu nanturusi parentaNa?>>

I Yesus nompakabelo tona nipesua nu seta

Matius 8:28-34; Lukas 8:26-39

5 Naupu haitu i Yesus ante ana-anaguruNa nakava ri sambote Rano Galilea ri bagia Gerasa. ² Tempo i Yesus nanau lako ri sakaya nakavamo saito langgai nesuvu lako ri podayo. Tona haitu nipesua nu seta. ³ Ia nonturo ri tatanga nu podayo, bo domo naria saitoa tona nompakule mantipunggu ia, naupa ante rante. ⁴ Nadea ngganimo kadana bo palena nirante ntona, tapi rante haitu nipudusina bo ase nitipungguka kadana namala nikotosakana. Ledo ria saitoa nompakule nombataamaka ia. ⁵ Eo bongi ia aga nanjayo hau-tumai ri podayo bo ri bunti-buntina, nongarengare bo nombabakasi karon mboto ante watu.

⁶ Da nggavaona nikitano i Yesus. Jadi nangovamo ia hau mosinggavaka i Yesus bo nantaputu ri ngayoNa. ⁷ Namangga mpuu ia nongare, <<He! Yesus, Ana nu Alatala anu Neliu KalangaNa! RakuyaMiu yaku? Ri panggita nu Alatala kuperapi nee rapandasaMiu yaku!>> ⁸ Niulina ivesia sabana lave nitudu i Yesus mamimo seta haitu ivei: <<He, Seta! Palaimo lako ri tona hitu!>>

⁹ Pade nipekutana i Yesusmo tona haitu, <<Isema sangamu?>>

Nesanamo seta haitu, <<Sangaku Njobu-njobu, sabana nadea mpuu kami.>> ¹⁰ Seta-seta haitu nerapi njuu nte i Yesus, nee mpuu rapopalai ira lako ri bagia haitu.

¹¹ Napara ri sia, nadea mpuu bavu nangelo kandeara ri kente nu bulu. ¹² Jadi seta-seta nesua nte tona haitu nerapi nte i Yesus, <<Palogamo kami mesua riaru bavu-bavu gahaitu!>> ¹³ Jadi i Yesus nombadekei seta-seta gahaitu hau nte bavu dea. Jadi seta-seta gahaitu nesuvu mpuumo bo nesua riaru bavu dea. Bavu gahaitu nte ronjobu kadeana, nipesua nu setapa, notinganavu puramo lako ri dapala hau rarano bo nalodo puramo.

¹⁴ Jadi nangovamo topojava bavu haitu bo nombatesa kajadia haitu ka tona riaru ngata bo ri buluna napara ngata haitu. Pade nesuvumo tona nompeintaka anu najadi. ¹⁵ Nakavapa ira nte i Yesus, nikitara tona nipesua nu seta pangane nonturomo. Ia nobajumo bo nanotomo pekirina. Jadi naeka puramo ira nanggita ia. ¹⁶ Tona nanggita kajadia haitu notesa anu najadi nte tona nipesua nu seta, bo nitesara muni anu najadi nte bavu dea. ¹⁷ Naupu haitu todea nombasaravi i Yesus malai lako ri bagia haitu.

¹⁸ Tempo i Yesus nesavi sakaya vaimo, tona nipesua nu seta pangane nerapi nte mpuu-mpuu ala ia rapaloga mantuntuni i Yesus.

¹⁹ Tapi i Yesus nombatagi ia ivei: <<Nee. Panjilimo iko hau nte sampesuvumu bo uli ka ira anu nipovia nu Alatala ka iko bo pomposiNa iko.>>

²⁰ Jadi haumo tona haitu bo nompamulamo ia nompatolele anu nipovia i Yesus ka ia ri bagia Sapulu Ngata. Nangepe tesana haitu, nokumaa puramo tona.

I Yesus nompakabelo mombine nombakabe bajuNa bo nompakatuvu mpanjili ana i Yairus

Matius 9:18-26; Lukas 8:40-56

²¹ Naupu sia, i Yesus nesavi sakaya hau ri sambotero. Nakava hamai, nadea mpuu tona nasiromu nte Ia. ²² Da ri tinggi rano Ia, nakavamo saito pakeni ri banua petupu ntoYahudi nosanga i Yairus. Tempo nikitana i Yesus, nantaputumo ia ri kadaNa ²³ bo nerapi ante rarana mpuu-mpuu, <<Guru, anaku mombine nadua ntamo, damo kamatena. Tulungi! Hau kita ri banuaku bo dika paleMiu ri karonu ala mabelo mpanjili bo nepa mamate!>>

²⁴ Jadi haumo i Yesus nosanggani-nggani ante i Yairus. Nadea mpuu tona nantuntuni ira bo nompasimpai i Yesus.

²⁵ Ri sia naria saito mombine sapulu rompaemo naraa njuu. ²⁶ Mpendua ngganimo ia nipakulisi ante

† naraa njuu. Haitumo, nasimbunga.

mpengaya-ngaya pakuli nu dokutoro, sampe naupumo doina nipombayarina, ledo nabelo duana aga nantambai kadaana. ²⁷ Mombine haitu nangepe kareba i Yesus, jadi hau ia ri tatanga ntodea, nangga-parai puri i Yesus bo nombakabe bajuNa, ²⁸ sabana nipekirina, <<Nau aga bajuNa kukabe mabelomo yaku.>> ²⁹ Sanggaupu nikabena, nenontomo raana bo nirasaina nabelomo.

³⁰ Tempo mombine haitu nanggabe bajuNa, i Yesus kaliu-liu nombarasai kuasaNa nesuvu lako ri karonu. Jadi neilimo Ia ri tatanga ntodea haitu bo nanguli, <<Isema nanggabe bajuKu pangane?>>

³¹ Nesanamo ana-anaguruNa, <<NikitaMiu mbotomo tona dea damo nosimpai. Bo Komiu nekutana isema nanggabe Komiu?>>

³² Tapi i Yesus nombalele mata nangelo topanggabe bajuNa. ³³ Nisani nu mombine haitu anu najadi ri karonu. Jadi noletemo ia naeka, bo nantaputu ri ngayo i Yesus bo nenoa iamo nanggabe baju i Yesus pangane.

³⁴ Nangepe haitu, nangulimo i Yesus, <<AnaKu, nabelomo iko sabana iko nomparasaya Yaku. Panjilimo. Damo Alatala mompakatinonto raramu. Nabelomo iko! Domo murasai dua haitu hanupa.>>

³⁵ Da notesa i Yesus, nakavamo bara sako-ndua tona lako ri banua i Yairus, pakeni ri banua petupu pangane. Nangulimo ira ka i Yairus, <<Tua, namatemo anamio. Tumo mompakalenge i guru hau ri banuamio.>>

³⁶ Tapi i Yesus ledo nompariara tesara haitu. Niu-likaNa i Yairus, <<Nee maeka. Parasayamo Yaku!>>

³⁷ Bo ledo nidekei i Yesus tona dea mantuntuni Ia hau ri banua i Yairus. Aga i Petrus, i Yakobus bo i Yohanes nidekeiNa hau mosanggani nte Ia.

³⁸ Tempo ira nakava ri banua i Yairus, nikita i Yesusmo tona nakanano mpuu. Naria tona notumangi mpojea ante suara namangga. ³⁹ Nesuamo i Yesus hau riaru banua bo nanguli ka ira, <<Nakuya komiu nakanano bo notumangi-mangi mpojea ivehitu? Ngana haitu ledo namate aga namonjo!>>

⁴⁰ Nangepe i Yesus nanguli ngana haitu aga namonjo, nipongirikaramo. Jadi i Yesus nompopalai pura-pura ira haitu, pade nikenina tina tuama ngana nadua haitu bo anaguruNa hau nosanggani-nggani nte Ia riaru tombi nu ngana. ⁴¹ Naupu sia, nikingisiNa pale ngana haitu bo niuliNa, <<Talita kum,>> batuanu: <<Ana, Kuuli ka iko, pembangumo!>>

⁴² Kaliu-liu nembangu mpuumo ngana mombine haitu bo nolipamo. Umuru nu ngana haitu sapulu rompaemo. Pura-pura tona nanggita kajadia haitu nokumaa mpuu. ⁴³ I Yesus nombatagi ira, <<Nee mpuu ratesa ka tona ntanina anu najadi ri sii!>> Bo nituduNa ira mompakande ngana haitu.

I Yesus nipoara ntoNazaret

Matius 13:53-58; Lukas 4:16-30

6 Naupu haitu, i Yesus nompalasi ngata haitu bo nanjili hau ri ngataNa mboto nosangani-nggani ante ana-anaguruNa. ² Ri eo penonto, Ia nompaguru ri banua petupu. Todea hamai nokumaa mpuu nangepe pepatudukiNa. Nanguli ira, <<Lako ri umba ni-pangisaniNa pura-pura haitu? Noto nuapa nidekei ka Ia? Berimba sampe nipakuleNa novia kabaraka-kabaraka? ³ Apa ledo Ia aga pande kayu, ana i Maria bo tuaka i Yakobus, Yoses, Yudas bo i Simon? Bo tueiNa mombine naria muni ri tatangata ri sii!>> Jadi naduamo rarara bo nipoarara pepatudukiNa.

⁴ Pade nangulimo i Yesus ka ira, <<Saito nabi nibila ntona ri umba-umba. Tapi ri ngatana mboto bo ri tatanga nu sampesuvu-sampesuvu bo tina tuamaNa, Ia ledo nibila.>>

⁵ Ri ngata haitu ledo nadea kabaraka nipovia i Yesus, aga nompakabelo bara sako-ndua tona nadua ante nombadika paleNa ri karora. ⁶ Bo nahera mpuu i Yesus nanggita ira ledo nomparasaya.

I Yesus nombasuro sapulu randua anaguruNa manggeni Kareba Belo

Matius 10:5-15; Lukas 9:1-6

Naupu haitu haumo i Yesus nompesayoki ngata-ngata ntanina ri bagia haitu, bo nompatolele Tesa nu Alatala. ⁷ NirondeNa sapulu randua anaguruNa bo nituduNa ira randua-randua hau nompatolele Kareba Belo. NidekeiNa kuasa ka ira mompopalai seta-seta. ⁸ I Yesus nompatotosi ka ira ivei: <<Nee madea anu rakenimiu riaru mpolipamiu. Nee manggeni baku atau batutu, atau doi. Aga toko polipa namala rakenimiu. ⁹ Komiu mamala mosandale, tapi nee manggeni rontonga baju.>> ¹⁰ Bo niuliNa muni, <<Ane komiu ratari- ma ntona riaru banuara, ponturomo ri sia sampe makava gantana komiu nompalasi ngata haitu. ¹¹ Tapi ane maria tupu ngata ledo madota mantarima komiu ri ngatara bo ledo rapokonora mangepe pepatudukimiu, tapaimo sovu lako ri kadamiu [†] tempo komiu nompalasi ngata haitu, *tandana Alatala mompoara ira.*>>

¹² Naupu haitu, haumo ira sapulu randua nompatolele ka todea kana majea lako ri dosara. ¹³ Bo nadea seta nipopalaira lako ri karo ntona nipesua nu seta, bo nigesera lana tona nadua bo nipakabelora.

Tesa kamate i Yohanes Topediu

Matius 14:1-12; Lukas 9:7-9

¹⁴ Magau Herodes muni nangepe kareba i Yesus, sabana sanga i Yesus natolelemo ri umba-umba. Naria sanu tona nanguli, <<Ia haitu i Yohanes Topediu natuvu mpanjili! Haitu sampe Ia nakuasa novia kabaraka-kabaraka ivesia!>>

¹⁵ Naria sanu tona ntanina nanguli, <<Iamo mai, Nabi Elia natuvu mpanjili.>> Bo naria muni nanguli, <<Ia haitu nabi nasimbayu nte nabi-nabi nggaulu.>>

¹⁶ Tapi tempo Magau Herodes nangepe tesa-tesa haitu niulina, <<Natantumo Ia haitu i Yohanes Topediu. Bara ipia nituduku tona nombatampa balenggana. Tapi sii-sii ia natuvu mpanjili!>> ¹⁷⁻¹⁸ Magau Herodes nanguli ivesia sabana anu najadi bara ipia nte i Herodias. Magau Herodes nompoberei i Herodias, nau kakanana i Herodias berei i Filipus, tuaka Magau Herodes mboto. Mpendua nggani i Yohanes Topediu nangonteaka Magau Herodes ivei: <<Nangoseaka Atura-atura nu Alatala, ledo masipato komiu mompoberei eramiu mboto!>> Jadi Magau Herodes nombatudu tona nombasaka i Yohanes, bo nirantera ia bo nisuarakara riaru ntarunggu. ¹⁹ Bo nadua mpuumo rara i Herodias nanggita i Yohanes. Ia madota i Yohanes rapatesi tapi ledo najadi, ²⁰ sabana Magau Herodes naeka rarana nte i Yohanes. Nisanina i Yohanes tona nanao bo nagasa rarana. Jadi nisalikuna i Yohanes bo ledo nidekeina rapatesi. Ane niepena tesa i Yohanes, domo nasilonga pekirina, tapi nasana muni rarana nangepe tesana.

²¹ Kaupuna i Herodias nanggava loga nabelo ala i Yohanes mamala rapatesi. Ri eo pombatoraki Magau Herodes, nipoviana posusa bo nigagana pura-pura tomaoge, tadulako-tadulako bo totua-totua lako ri njumangu bagia Galilea. ²² Ri posusa haitu ana i Herodias randaa nesua nolodi nabelo ri ngayora pura-pura. Randaa haitu mpuu-mpuu nompakadamba rara Magau Herodes bo toratana haitu. Jadi nangulimo i Herodes ka randaa haitu, <<Ulimo nuapa-nuapa mupodota, kana kudekei ka iko.>> ²³ Magau nojanji bo nosumpa ka randaa haitu, <<Nuapa-nuapa muperapi kana kudekei ka iko, nau sampe santanga lako ri pura-pura bagia Poparentaku!>>

²⁴ Nangepe haitu, nesuvumo randaa hau nekutana nte tinana, <<Ina, nuapa masipato kuperapi nte Magau?>>

Nesanamo tinana, i Herodias, <<Perapimo balengga i Yohanes Topediu!>>

²⁵ Jadi nasalisa-lisamo randaa haitu nanjili hau nte Magau bo nerapi, <<Yaku merapi balengga i Yohanes Topediu ratuu ri dula bo rakeni ka yaku hitu-hitu!>>

²⁶ Nangepe perapi randaa haitu, nasusa mpuumo rara i Herodes. Tapi ledo nabia ia mompoara perapi

[†] tapaimo sovu lako ri kadamiu: batuana, nipoara. Tupu ngata haitu nompoara Tesa nu Alatala. Jadi Alatala muni mompoara ira bo mombahuku ira.

haitu sabana ia nojanji bo nosumpa ri ngayo ntoratana. ²⁷ Jadi nitudunamo nasalisa saito topojaga hau mompatesi i Yohanes. Hau mpuumo tona haitu mombatampa balengga i Yohanes ri tarunggu. ²⁸ Pade nikeninamo balengga i Yohanes nituu ri dula bo nidekeina ka randaa haitu, pade randaa haitu nombadekei ka tinana. ²⁹ Sampangepe kajadia haitu, nakavamo anaguru i Yohanes mangala karobatana ri tarunggu bo nitanara ri dayo.

I Yesus nombadekei kandeana ka lima-njobu tona

Matius 14:13-21; Lukas 9:10-17; Yohanes 6:1-14

³⁰ Anaguru i Yesus nanjili lako nompatolele Kareba Belo, bo nasiromu mpanjili nte i Yesus bo notesa pura-pura anu nipoviara bo nipatudukikara. ³¹ Pade nangulimo i Yesus ka ira, <<Anumo, kita hau ri kalinona mangosanaka!>> NiuliNa ivesia sabana nadea mpuu tona damo nosinjambeiki nakava sampe nau nangande ledo nakapo.

³² Jadi nosakayamo ira hau ri ponturo kalinona.

³³ Tapi nadea tona nanggita ira bo nisani ntodea patujura. Jadi, nadea tona lako ri pura-pura ngata ri bagia haitu, nompari-mpari hau nangose dala ri kabatana mompasintou i Yesus ante anaguruNa ri ponturo rakalaura.

³⁴ Tempo i Yesus nanau lako ri sakaya, nikitaNa nadea mpuu tona nompopea Ia. Naasi mpuu mataNa nanggita ira apa ira nasimbayu mpo bimba-bimba ledo ria topoevuna. Jadi Ia nompatuduki mpengayangaya pepatuduki ka ira.

³⁵ Nauru nggoviapa, nangulimomo anaguruNa, <<Guru, domo masae mabongimo bo ponturo hitu nakalinoa. ³⁶ Agina rapopanjiliMiumo todea gahaitu ala ira mamala mangali kandeana ri ngata-ngata napara ri sii.>>

³⁷ Tapi nesana i Yesus, <<Komiumo nombadekei kandeana ka ira.>>

Nanguli vai anaguruNa, <<Hee, berimbamo? Hau raalika? Ane raalika roti rakande ntona ivehaitu gaga kadeana, bara aga gaji ntona valu-mbula pade magana!>> †

³⁸ Nekutanamo i Yesus, <<Sakuya kadeana roti naria nte komiu? Paresa ntani ruru!>>

Naupu niparesara niuliramo ka i Yesus, <<Lima-angupa roti bo rombaapa bau.>>

³⁹ Pade nitudu i Yesusmo ira mompasiayu todea ala ira motagu-tagu monturo ri kavoko naramata. ⁴⁰ Jadi nonturomo ira notagu-tagu, naria saatu santagu, naria limapulu santagu. ⁴¹ I Yesus nangala lima-angu roti bo rombaa bau haitu, pade nitingoaNa langi bo nosambaya, nanguli tarima kasi ka Alatala. Naupu haitu, nitubi-tubiNa roti bo nidekeiNa ka ana-anagu-

† *Basa Yunani: alina roatu dinar. Sangu dinar gaji ntopokarajaa saeo. Jadi ane tona mokaarajaa roatu eo, gajina roatu dinar.*

ruNa mompalele ka todea gahaitu. Ivesia muni nipoviaraNa ante bau rombaa. ⁴² Ira pura-pura nangande sampe nabosu. ⁴³ Naupupa todea nangande, haumo anaguruNa nompasiromu roti bo bau labina nikande ntodea. Sapulu rotondapa tubi-tubi roti bo bau naboli. ⁴⁴ Kadea langgai nangande, nitasere lima-njobu.

I Yesus nolipa ri bavo nu uve

Matius 14:22-33; Yohanes 6:16-21

⁴⁵ Naupu haitu, kaliu-liu nitudu i Yesusmo anaguruNa mesavi sakaya, mokolu hau ri ngata Betsaida ri sambote rano. Apa Ia da mompopanjili todea hau ri ngatara mboto. ⁴⁶ Nogaapa nte todea, haumo Ia mosambaya ri bulu.

⁴⁷ Nabongipa, ri tatanga ntasimo sakayara, tapi i Yesus da naboli ri kabatana. ⁴⁸ NikitaNa nandasamo anaguruNa nombavose sakayara sabana poiri narimboso nantomunaka ira. Nitasere tinti tatalu bobayana, nakavamo i Yesus nolipa ri bavo nu uve bo Ia madota mombaliunaka ira. ⁴⁹ Nikitarapa Ia nolipa ri bavo nu uve, nisarumakara bara mboa, ⁵⁰ jadi nongare-ngare ira sabana navanggaa puramo. Tapi i Yesus kaliu-liu nanguli ka ira, <<Nee maeka! Pakaroso raramiu! Yaku hii.>> ⁵¹ Pade nesavimo Ia riara sakaya nosinggani nte ira, bo nenontomo poiri mbaso. Nokumaa bo naingu mpuu rarara. ⁵² Naupa nikitaramo kajadia ante roti pangane, ledo nisanira isema kakanana i Yesus, sabana da nakumba pompahara.

I Yesus nompakabelo todea nadua ri Genesaret

Matius 14:34-36

⁵³ Sanggavote i Yesus bo anaguruNa ri tinggi rano napara bagia Genesaret, nesampomo sakayara.

⁵⁴ Dako nesuvu lako ri sakaya, kaliu-liu nisani ntonamo i Yesus. ⁵⁵ Jadi nangova ira hau ri ngata-ngata napara ri sia bo nikovara tona nadua ante ompa paturuna hau ri ngata nikakava i Yesus. ⁵⁶ Ri umba-umba ngata nikalau i Yesus, kana naria tona nanggeni tona nadua hau ri potomu. Bo niperapira nte i Yesus ante mpuu-mpuu ala tona nadua haitu mamala manggabe bajuNa, nau aga doena. Bo isema-sema nanggabe doe nu bajuNa, kana nabelo.

I Yesus nangonteaka toFarisi sabana ira nomparibavo ada-ada ntotua bo nomparitambe atura-atura nu

Alatala

Matius 15:1-9

7 Naria saeo, salunu toFarisi bo bara sako-ndua guru agama lako ri ngata Yerusalem nakava mosinggava nte i Yesus. ² Nikitara bara sako-ndua anaguru i Yesus nangande mpale, bo palera nireke naruto apa ledo nemanjo nantuntuni ada ntoFarisi. ³ ToFarisi bo nadea toYahudi ntanina natutu mpuu nangoseaka ada

haitu, ira ledo nangande ane dopa nemanjo nantuntu-ni ada-ada ntotuaru. ⁴ Ivesia muni ane ira manjili lako ri potomu. Dopame ira nangande, kana nipegasara ntani karora pade mamala mangande. Bo nadea muni ada-ada ntanina nioseakara. Evamo, cara motoposi boda, jolo, kura, bo paturu.

⁵ Haitu sabana toFarisi bo guru-guru agama haitu nekutana nte i Yesus, <<Nakuya ana-anaguruMiu ledo nangoseaka ada-ada ntotuata? Nakuya ira nangande bo ledo nemanjo ntani ruru?>>

⁶ Nangulimo i Yesus ka ira, <<Komiu aga tona nabelo ri sumba! Nakana mpuu tesa nu Alatala niboto Nabi Yesaya nggaulu, notesa komiu!

<Tona hitu nombasomba Yaku aga ri sumba, tapi riaru ntaira ledo nipeilira Yaku.

⁷ Ledo ntoto ria gunana ira mombasomba Yaku sabana pepatuduki nipepatudukikara niulira atura-at-uraKu

tano aga ada-ada nu manusia.>

Yesaya 29:13

⁸ Parenta nu Alatala nipoaramiu bo ada-ada nu manusia nikangisimiu pakaroso.>>

⁹ Bo nanguli munimo i Yesus ka ira, <<Natau mpuu komiu nompoara parenta nu Alatala ala komiu mompakasisi ada-adamiu mboto. ¹⁰ Jonjona, Nabi Musa nanguli ivei: <Bilamo tina tuamamu!> † Bo niulina muni, <Isema-sema mombapindasi tuamana atau tinana, kana rapatesi.> ††¹¹ Tapi komiu nompatuduki ivei: Domo paraluu kita mombabila tina tuamata asaa raulita ivei: <Nuapa masipato kudekei ka komiu totua, naupumo nisombaku ka Alatala.> ¹² Jadi domo ni-palogamiu ia mantulungi tina tuamana. ¹³ Ante pepatuduki ivehaitu, domo niparibavomiu Tesa nu Alatala, damo aga ada-adamiu nioseakamiu. Bo da nadeapa muni anu ntanina ivehaitu nipoviamiu.>>

Pekiri nadaa anu nompakaruto manusia

Matius 15:10-20

¹⁴ Naupu sia, i Yesus nombaronde todea vai bo niulikaNa, <<Epemo, ala rasanimiu! ¹⁵ Ledo ria sangaya nuapa-nuapa lako ri savalikuna mesua riaru ntai manusia mamala mompakaruto ira. Tapi pokainggu nadaa anu nopuna lako riaru ntai nu manusia, haitumo nompakaruto ira. ¹⁶ Isema-sema naria talingana kana rapariarana pakabelo-belo tesaKu hitu.>>

¹⁷ Naupu haitu, i Yesus nompalaisi todea bo nesua hau rabanua. Pade nekutanamo anaguruNa nuapa batuana porapa nitesaNa pangane. ¹⁸ Nangulimo i Yesus ka ira, <<Hee! Dopa muni nipahamiu? Ledo ria sangaya kande nikande nu manusia mamala mompakaruto ia. ¹⁹ Sabana kande haitu ledo nesua riaru pekirina, tapi aga nesua riaru ntai likona, bo lako ri tai

† *Pesuvu 20:12; Ulangan 5:16* †† *Pesuvu 21:17; Imamat 20:9*

likona aga nesuvu mpanjili.>> Ante nanguli tesa haitu, i Yesus nompakatantu mpengaya-ngaya kande ma-mala rakande, bo ledo ria nipopali.

²⁰ Pade nanguli vai i Yesus, <<Anu nesuvu lako ri pekiri nu manusia, haitumo nompakaruto ia. ²¹ Apa lako riarana haitumo neumba pekiri-pekiri nadaa, anu nanggeni ia mogau nabuga, mangangga, mepatesi, ²² mobualo, madoko ka mbara-mbara, movia anu nadaa, mebagiu, majampa, masiriati, mesalai, malanga rara, bo metidoyo. ²³ Pokainggu nadaa ivehaitu neumba lako riaru ntai manusia bo haitumo nompakaruto ira.>>

Pomparasaya saito mombine ledo toYahudi

Matius 15:21-28

²⁴ Naupu haitu i Yesus hau ri bagia napara ngata Tirus. Nakava hamai nesuamo Ia rabanua. PatujuNa ala ledo rasani ntodea, tapi kakavaNa haitu ledo namala nitabuniaka. ²⁵⁻²⁶ Ri sia naria saito mombine ledo toYahudi lako ri bagia Fenisia. Anana mombine nipesua nu seta. Jadi niepenapa kareba i Yesus naria ri ngata haitu, nakavamo ia nantaputu ri ngayo i Yesus bo nerapi ante rarana mpuu, <<Tulungimo yaku, popalaimo seta lako nte anaku!>>

²⁷ Tapi nanguli i Yesus ka ia, <<Yaku kana mantulungi toYahudi ntani ruru. Apa ledo masipato roti nipasadia ka ngana aga radekeika asu.>> ‡

²⁸ Nangulimo mombine haitu, <<Nakana, Pue. Tapi asu-asu ri tambe meja muni nangande vero-vero nu roti nanavu lako nte ngana-ngana.>>

²⁹ Bo nangulimo i Yesus ka mombine haitu, <<Nakana tesamu. Jadi, panjilimo! Lako ri pomparasayamu tutu nalaimo seta lako nte anamu.>> ³⁰ Jadi nanjilimo mombine haitu hau ri banuana. Nikavana anana naturu bo nabelomo, bo nalai mpuumo seta.

I Yesus nompakabelo tobongo ledo nasova notesa

³¹ Naupu haitu nalaimo i Yesus lako ri bagia Tirus, bo nipapolaNamo polipana noliu ngata Sidon hau ri Rano Galilea pade noliu ri bagia Sapulu Ngata. ³² Nakava hamai naria bara sako-ndua tona nanggeni ka Ia saito tobongo ledo nasova notesa. Bo ante mpuu-mpuu rarara, niperapira ala i Yesus mombadika paleNa bo mompakabelo talinga ntobongo haitu.

³³ I Yesus nombataniaka tobongo haitu hau santani-na, bo nidikaNa koya mpaleNa ri bolo ntalinga ntona haitu ntimali-mali. Pade niveulusiNa bo nituiNa dila ntona haitu. ³⁴ Naupu haitu nitingoaNamo langi bo nosuu nosaNa bo nanguli, <<Efata!>> Batuana, <<katebukamo>>. ³⁵ Eva nisuka, nabelo mpuumo talinga ntona haitu bo nasovamo notesa.

‡ *Ane toYahudi mompandaente tona ledo toYahudi, biasa niulira <<asu>>.*

³⁶ I Yesus nombatagi tona gahaitu, nee rapatolele kaja dia haitu ka tona ntanina. Tapi nggosena nitagi, nggosenamo nipatolelera. ³⁷ Bo pura-pura tona nokumaa ntoto nangepe kajadia haitu. Bo niulira, <<Pura-pura anu nipoviaNa nabelo! Tona nabongo najadi neepe bo tona nabobo najadi notesa!>>

I Yesus nompakande pata-njobu tona

Matius 15:32-39

8 Naria vai saeo nadea mpuu tona nasiromu. Ledo ria anu rakandera jadi nironde i Yesusmo anaguruNa bo niulikaNa, ² <<Naasi mpuumo mataKu nanggita todea gahitu apa talu-eomo kasaena ira nosang-gani nte Yaku, bo domo ria kandeara. ³ Ane Kutudu ira manjili nte ara, natantu maleto ri dala. Apa sanu ira nakava lako ri ngata nakavao.>>

⁴ Nesanamo anaguruNa, <<Kita ri kataolosana ivehitu, ri umba rapangalata kande rapakandeka tona damo nadea ivehitu sampe mabosu?>>

⁵ Nekutanamo i Yesus, <<Sako-angu roti nte komiu?>>

Nesana ira, <<Pitu-angu.>>

⁶ Nangepe haitu i Yesus nantudu todea monturo ri tana puramo. Nonturopa todea, nialaNa roti pitu-angu haitu bo niuliNa tarima kasi ka Alatala. Pade nitubitubiNa roti haitu bo nidekeiNa ka ana-anaguruNa mompalele ka todea. Jadi anaguruNa nangala roti haitu bo nibagi-bagira ka todea. ⁷ Naria muni bau kodi bara sako-mbaa nte ira. Bo naupu i Yesus nosambaya nanguli tarima kasi, nituduNamo anaguruNa mombabagi bau haitu muni ka todea. ⁸ Pura-pura tona nangande sampe nabosu. Naupu haitu anaguru i Yesus nompasiromu labi-labi nu roti bo bau nikandera haitu, pitu-tonda ponupa kadeana. ⁹ Topangande haitu naria pata-njobu kadeana. Naupupa ira nangande nituduNa nanjilimo. ¹⁰ Nalaipa todea haitu, nesavi sakayamo i Yesus ante anaguruNa hau ri bagia Dalmanuta.

ToFarisi nerapi i Yesus movia tanda nipokumaaka

Matius 16:1-4; 12:38-42; Lukas 11:29-32

¹¹ Naria bara sako-ndua toFarisi nakava nosinjanai nte i Yesus ala mombaopa tesaNa. Niperapira Ia movia tanda nabaraka, haitumo tandana Ia mpuu-mpuu ni-posumba nu Alatala. ¹² Nasau rara i Yesus nangepe perapira, jadi nosuu nosaNa bo nanguli, <<Nakuya komiu natuvu sii-sii nangelo tanda nabaraka? Pariaramo tesaKu hitu! Ledo ntoto maria tanda Kupopakita ka komiu!>> ¹³ Naupu haitu nalaimo i Yesus lako nte todea gahaitu bo nesavi sakaya hau ri sambote rano.

I Yesus nompopaisani ka anaguruNa nee mangoseaka pokainggu ntoFarisi

Matius 16:5-12

¹⁴ Tempo nesavi sakaya, ledo nitora nu anaguru i Yesus manggeni baku. Aga sangu roti naria riar sakaya haitu. ¹⁵ Nangulimo i Yesus ka ira, <<Pakabelo-belo! Komiu kana mainga nte ragi ntoFarisi bo ragi Magau Herodes.>> †

¹⁶ Nangepe i Yesus notesa ivehaitu, *ledo nisanira ledo roti mpuu nitesaNa*. Jadi nosiulikamo ira, <<Niu-likaNa ivesia sabana ledo ria roti nte kita bara.>>

¹⁷ Tapi nisani i Yesus anu nitesara haitu. Jadi niu-likaNa ira, <<Nakuya komiu aga notesa roti ledo naria? Dopa nanoto raramiu? Dopa nisanimiu batuana? Nakumba mpuu pompahamui! ††¹⁸ Komiu nomata tapi nakuya komiu ledo nekita? Komiu notalinga, tapi nakuya komiu ledo neepe? Ledo nitoramiu anu nipoviaku pangane? ¹⁹ Tempo Yaku nombatubi-tubi lima-angu roti ka lima-njobu tona, sako-tondapa labina nipasiromumiu?>>

Nesana ira, <<Sapulu rotondapa.>>

²⁰ Bo nanguli Ia, <<Tempo pitu-angu roti nitubiKu ka pata-njobu tona, sako-tondapa labina nipasiromumiu?>>

Nesana ira, <<Pitu-tondapa.>>

²¹ Bo nanguli i Yesus, <<Jadi dopa nipahamui?>>

I Yesus nompakabelo mata ntoburo ri ngata Betsaida

²² Naupu sia, hau ira sampe nakava ri ngata Betsaida. Hamai naria tona nanggeni saito langgai naburo ka i Yesus. Ira nerapi mpuu ala i Yesus mantui mata ntoburo haitu bo mompakabelo matana. ²³ I Yesus nanggingisi pale ntoburo haitu bo nombanini ia hau ri savaliku ngata. Pade nitoveulusiNa mata ntona haitu bo niramuna ante paleNa bo nanguli, <<Nikitamumo luona?>>

²⁴ Tona haitu nompeintaka luona bo nanguli, <<Iyo, nikitakumo tona, tapi aga mpo kayu-kayu nolipa hau tumai.>>

²⁵ Nidika i Yesus vai paleNa sangganipa ri mata ntoburo haitu. Bo mata ntoburo nabelomo. Jadi nekitamo ia, bo nalanto ntotomo nikanotona luona. ²⁶ Naupu haitu nangulimo i Yesus ka ia, <<Koimo panjili ri banuamu, nee mesua rangata.>>

† ragi ntoFarisi bo ragi Magau Herodes batuana pepatudukira atau pokainggura nadaa. Peinta Matius 16:12. †† Nakumba mpuu pompahamui Batuana, ledo paraluu makini rarara ka kande apa i Yesus nompakule mompajadi roti. Tapi ira paraluu mombajagai ala ledo mangoseaka pokainggu ntoFarisi.

I Petrus nompangaku i Yesus Magau Topepakasalama anu nijanji nu Alatala

Matius 16:13-20; Lukas 9:18-21

²⁷ Naupu haitu i Yesus ante anaguruNa hau ri ngatana ngata napara ngata Kaisarea Filipi. Da ranja mpolipara nekutanamo i Yesus, <<Ane panguli ntona, isema kakanana Yaku hii?>>

²⁸ Nesana ira, <<Naria tona nanguli Komiu i Yohanes Topedi, bo naria sanupa nanguli Komiu Nabi Elia. Bo naria muni tona nanguli Komiu nabi nggaulu.>>

²⁹ Bo nekutana vai i Yesus, <<Tapi ane pangulimiu, isema Yaku hii?>>

Nesana i Petrus, <<Komiu Magau Topepakasalama anu nijanji nu Alatala!>>

³⁰ Nangepe pesana haitu, nangulimo i Yesus, <<Nee ratesa ka tona ntanina isema Yaku.>>

I Yesus nombatesa kasuana bo kamateNa ngena

Matius 16:21-28; Lukas 9:22-27

³¹ Naliu haitu, nompamulamo i Yesus nompatuduki anaguruNa. <<Yaku, Ana nu Manusia, kana mombarasai mpengaya kasusa, Yaku kana rapoara ntotua ntoY-ahudi bo balengga-balengga ntopanggeni pesomba bo guru-guru agama. Yaku kana rapatesi bo ri eo katataluna, Yaku kana matuvu mpanjili.>> ³² Haitu pura-pura nitesana pakalanto ka ira.

Nangepe haitu, i Petrus nompakeni i Yesus hau ri sabinggana bo niulikana, <<Guru, nee motesa ivesia!>>

³³ Tapi i Yesus neili nangganoto anaguruNa pura-pura, bo nituduNa i Petrus, <<Palai haumo, Magau nu Setta! Pekirimu tu pekiri nu manusia, ledo pekiri nu Alatala!>>

³⁴ Naliu haitu, nirondeNamo todea bo anaguruNa bo niulikaNa, <<Isema-sema madota mangoseaka Yaku, kana rakabasakana dotana mboto bo manjimbuka kayu salibna bo mpuu-mpuu mangoseaka Yaku. *Haitumo, ia kana masadia rapandasa nau sampe rapatesi sabana ia nangoseaka parentaKu.*³⁵ Apa isema-sema aga nangoseaka dota rarana mboto bo natuvu ka karona mboto, kana mamate bo ledo manggava katuvua nabelo sampe ri kasae-saena. Tapi isema-sema mombakabasaka dota rarana mboto sabana ia nangoseaka Yaku bo nanggeni Kareba Belo, nau ia rapatesi, iamoo matuvu mabelo sampe ri kasae-saena. ³⁶ Nuapa gunana ane rakavamiu pura-pura anu naria ri dunia hitu tapi ledo manggava katuvua nabelo sampe ri kasae-saena? ³⁷ Ledo ria nuapa-nuapa anu namala rasulamiu ka katuvua nabelo haitu. ³⁸ Isema-sema maeya matana manguli ia topangoseaka Yaku bo maeya matana nte pepatudukiKu ri tatanga ntodea anu nadosa bo ledo natutu nangoseaka Alatala, Yaku

muni maeya mataKu manguli ia topangoseaka Yaku tempo Yaku makava mpanjili. Apa Yaku, Ana nu Manusia, makava mpanjili ri dunia hitu ante reme bo kuasa nTuamaKu, mosanggani-nggani ante malaeka-malaeka nagasa!>>

⁹ I Yesus nanguli ka ira, <<Pariaramo tesaKu hitu! Naria bara sako-ndua komiu ri sii, dopa mamate ane dopa rakitara Alatala mompamenta ante kuasaNa.>>

I Yesus nipakareme nu Alatala ri bavo nu bulu

Matius 17:1-13; Lukas 9:28-36

² Ono-mbongi kaliuna haitu, i Yesus nanggeni i Petrus, i Yakobus bo i Yohanes nosanggani-nggani nantende hau ri bulu nalanga. Aga i Yesus ante ira tatalu hamai. Tempo ira hamai, nikitara nabalimo lenje i Yesus ri ngayora. ³ PakeaNa naramputi bo nenggila. Ledo ria saitoa tona ri dunia mamala mompakaputi mpo kaputi bajuNa haitu. ⁴ Nikitara muni Nabi Elia bo Nabi Musa notesa-tesa nte i Yesus.

⁵ Jadi nangulimo i Petrus ka i Yesus, <<Guru, nasana mpuu kita ri sii. Nabelopa kami mompovia tatalu sou ri sii. Sangu ka Komiu, sangu ka Nabi Musa bo sangu ka Nabi Elia.>> ⁶ I Petrus nanguli ivesia, sabana naeka mpuu rarara tatalu bo domo nisanina nuapa masipato rauli.

⁷ Naupu sia, nakavamo kulimu nombabungu ira bo niepera suara lako ri kulimu haitu nanguli, <<Hitumo AnaKu nipotoveKu. Epemo tesaNa!>>

⁸ Sampesanika nilele matara bo nipeintara domo naria tona randua pangane, damo i Yesus saitoNa naria. ⁹ Tempo ira notua lako ri bulu haitu, i Yesus nompainga ira, <<Nepa ratesamiu ka tona anu nikitamiu hitu dopame Yaku, Ana nu Manusia, matuvu mpanjili lako ri kamateKu.>>

¹⁰ Niturusira pepaingaNa haitu, tapi ira mboto nosimpekutana nuapa patuju i Yesus nanguli matuvu mpanjili lako ri kamateNa. ¹¹ Bo nipekutanara ka i Yesus, <<Nuapa sabana guru-guru agama nanguli Nabi Elia kana makava mokolu ka Magau Topepakasalama?>>

¹² Nesana i Yesus, <<Nabi Elia kana mokolu mami ala mompakasadia mpengaya-ngaya. Tapi berimba Yaku, Ana nu Manusia? Ri Buku Gasa niuli muni Ana nu Manusia kana mombarasai madea kasusa bo rapoara ntona. ¹³ Tapi Kuuli ka komiu, kakanana nakavamo Nabi Elia, bo tona nompovia ia nangoseaka dotara mboto, evamo nitulisi riaru Buku Gasa. †>>

† I Yesus notesa i Yohanes Topedi. Peinta Matius 17:12-13.

I Yesus nompakabelo ngana nipesua nu seta

Matius 17:14-21; Lukas 9:37-43a

¹⁴ Tempo i Yesus, ante i Petrus, i Yakobus bo i Yohanes nanjili hau mosinggava nte anaguruNa ntani-na, nikitara nadea tona nantagui anaguruNa. Bo naria bara sako-ndua guru agama nosinjanai ante ira.

¹⁵ Tempo todea nanggita i Yesus, nokangaa ira bo nompari-mparimo nanggadambanaka Ia.

¹⁶ Nekutanamo i Yesus, <<Nuapa niposinjanaikamiau pangane?>>

¹⁷ Nesanamo saito lako ri tatanga ntodea, <<Guru, nikeniku ka Komiau anaku nabobo apa nipesua nu seta.

¹⁸ Nggani-nggani ia nipesua nu seta, kana nadungga ri tana, ngangana nobura, nasinggamu bo nakoyo karon. Niulikumo ka anaguruMiu mompopalai seta haitu, tapi ledo nipakulera.>>

¹⁹ Jadi nanguli i Yesus ka ira, <<Komiau natuvu sii-sii ledo mpuu nomparasaya! Sakuyapa kasaena Yaku kana mosanggani-nggani nte komiu pade raparasayamiau? Keni tumaimo ngana tutu!>>

²⁰ Jadi nikenira mpuumo ngana haitu ka i Yesus. Tempo seta riara ngana haitu nanggita i Yesus, kaliu-liu nasinggamu ngana haitu sampe ia nadungga bo nokaduli-duli ante ngangana nobura.

²¹ Pade nekutanamo i Yesus nte tuama nu ngana haitu, <<Sakuyamo kasaena anamu nombarasai dua hitu?>>

Nesana tuamana, <<Lako ri kakodiname. ²² Nadea ngganimo ia nipakadungga nu seta haitu riara apu atau ri uve ala ia mamate. Ane rapakuleMiu mompakabelo duana, poasimo kami! Tulungimo kami!>>

²³ Nangulimo i Yesus ka ia, <<Nuapa sabana niulimu ane Kupakule? Tantu mami Kupakule! Pura-pura namala majadi ka tona nomparasaya!>>

²⁴ Kaliu-liu nongaremo tuama nu ngana haitu, <<Pue, niparasayaku Komiau! Tapi pomparasayaku da nakura, tulungimo ala maroso pomparasayaku!>>

²⁵ I Yesus nanggita kasae-sae nantambaimo kadea ntona netagui, jadi nisalarakanaNamo seta ante suara namangga ivei: <<Heh, iko seta nompakabobo bo nompakabongo ngana hitu! Palaimo lako ri karon bo tumo mesua nte ia.>>

²⁶ Seta haitu nongare nompakasinggiki pakaroo ngana haitu bo nesuvu mpuumo. Ngana haitu eva namatemo nikita, sampe nadeamo tona nanguli, <<Namatemo ia.>> ²⁷ Tapi i Yesus nanginggisi pale nu ngana haitu bo nombatulungi ia nembangu bo neangga mbotomo ngana haitu.

²⁸ Tempo i Yesus nesua rabanua ante anaguruNa, nekutanamo ira, <<Pue, nakuya sampe ledo nipakule kami mompopalai seta pangane?>>

²⁹ Nesanamo i Yesus, <<Aga posambaya mompakule mompopalai seta ivehaitu.>> †

I Yesus notesa kamateNa bara maipia

Matius 17:22-23; Lukas 9:43b-45

³⁰ I Yesus ante anaguruNa nompalaisi ponturo haitu noliu ri bagia Galilea. Patuju i Yesus ala ledo rasani ntona ri umba Ia, ³¹ sabana Ia da nompatuduki anaguruNa. NipatudukiNa ira ivei: <<Yaku, Ana nu Manusia, kana radekei riara kuasa nu manusia bo rapatesira. Tapi ri eo katataluna Yaku matuvu mpanjili.>> ³² Tapi ledo nisanira batua ntesana haitu, bo naeka rarara mompekutana batuana nte Ia.

Anaguru i Yesus nosimpekutana, isema ira nalangapa panggana

Matius 18:1-5; Lukas 9:46-48

³³ I Yesus bo anaguruNa nakava ri ngata Kapernaum. Sampesua Ia riara banua, nipekutanaNamo anaguruNa, <<Nuapa niposimpekutanakamiau ri dala pangane?>> ³⁴ Tapi ira ledo notingo, apa ira nosimpekutanaka isema ira nalangapa panggana. ³⁵ Naliu haitu, nonturomo i Yesus bo nirondeNamo anaguruNa sapulu randua haitu, bo nanguli, <<Isema-sema madota malanga panggana, ia kana majadi batua bo potudua nu roana.>> ³⁶ Naliu i Yesus notesa ivesia, nialaNamo saito ngana kodi bo nidikaNa ri tangara pade nikapuiNa bo niulikaNa ira, ³⁷ <<Isema-sema nantarima ngana kodi eva hitu sabana pomparasayana Yaku, nitarimana muni Yaku. Bo isema-sema nantarima Yaku, ledo aga Yaku nitarimana, tapi nitarimana muni TuamaKu anu nantudu Yaku tumai.>>

Isema-sema ledo nangeva kita, nosabingga nte kita

Lukas 9:49-50

³⁸ Nangulimo i Yohanes ka Yesus, <<Guru, nikita kami tona mompopalai seta ante kuasa lako ri sangaMiu. Tona haitu nitagi kami sabana ia ledo nosamporoa ante kita.>>

³⁹ Tapi nangulimo Yesus, <<Nee ratagimiu ia! Apa ane tona novia kabaraka ante kuasa lako ri sangaKu, ledo rapakulena kaliu-liu manjalai Yaku. ⁴⁰ Apa isema-sema ledo nangeva kita, ia nosabingga ka kita. ⁴¹ Pararamo tesaKu hitu! Isema-sema mombadekei uve inu ka komiu sabana komiu topangoseaka Yaku, ia kana manggava tambona bara maipia.>>

Kabasakamo pura-pura anu nanggeni komiu movia dosa

Matius 18:6-9; Lukas 17:1-2

⁴² <<Isema-sema mompakanavu saito ngana kodi sampe ngana haitu domo nomparasaya Yaku, agina rapantoesi vatu mbaso ri tambolona bo ratedeaka rantasi. ^{††} Ane rapana palemiau manggeni komiu

† mosambaya. Riara naskah kuno sanu nitulisi <<mosambaya bo mopuasa>>. Peinta Matius 17:21. †† Agina rapantoesi vatu mbaso

movia dosa, tampasimo palemiu haitu! Aginapa komiu matuvu nte Alatala ri suruga ante palemiu sabingga, pade komiu ratedaka ante pale robingga hau ri narakaa, riaru apu anu ledo mapaya-paya. ⁴⁴ [Hamai tona bate-batena rakande nggaule bo rapandasa nu apu.] ⁴⁵ Bo ane rapana kadamiu manggeni komiu movia dosa, tampasimo kadamiu haitu! Aginapa komiu matuvu nte Alatala ri suruga ante kada sanggada pade ratedeaka riaru narakaa ante kadamiu ronggada. ⁴⁶ [Hamai tona bate-batena rakande nggaule bo rapandasa nu apu.] ⁴⁷ Bo ane rapana matamiu manggeni komiu movia dosa, suimo matamiu haitu! Aginapa komiu majadi todea nu Alatala riaru PoparentaNa ante mata sabingga, pade ratedaka riaru narakaa ante matamiu robingga. ⁴⁸ Hamai tona bate-batena rakande nggaule bo rapandasa nu apu. ⁴⁹ Nantuntuni atura i Musa, pura-pura pesomba ka Alatala kana ragarai. * † Ivesia muni pura-pura tona kana rapegasa ante kasusa bo kapari. * ††

⁵⁰ Gara nabelo mami, tapi ane gara mamolimo, berimba mapaga mpanjili? Ivesia muni komiu, topan-goseaka Yaku. Komiu kana masimbayu mpo gara bo nee rapalamba pomparasayamiu malente. Komiu kana matuvu mosinggabelo nte roa ntanina.>>

Pepatuduki i Yesus notesa pogaa ntopoberei

Matius 19:1-12, Lukas 16:18

10 Naupu haitu i Yesus ante anaguruNa nompalaisi ponturo haitu bo hau ri bagia Yudea bo nombavote Binangga Yordan. Hamai nadea vai tona nakava nte Ia bo nipatudukiNa vai ira, nangoseaka kabiasaNa.

² Tempo Ia nompatuduki, naria bara sako-ndua to-Farisi nanggaparai Ia mombaopa tesaNa bo nekutana, <<Berimba panggavaMiu? Nangoseaka Atura-atura agamata, mamala langgai mogaaka bereina?>>

³ Nesanamo i Yesus, <<Berimba parenta niuli Nabi Musa ka komiu?>>

⁴ Nesana ira, <<I Musa nompaloga langgai movia sura posompo upu poberei bo mogaa nte bereina mombine.>> †

⁵ Nanguli vai i Yesus ka ira, <<Atura haitu nitulisi i Musa ka komiu sabana komiu nakaja nipangajari.

⁶ Tapi ri lamba pamulana tempo Alatala nompajadi dunia, Ia nompajadi manusia langgai bo mombine.

⁷ Haitu sampe langgai kana mompalaisi tina tuamana bo matuvu mosangganin nte bereina, ⁸ bo ira randua kana majadi saito. Jadi domo rareke randua, tapi saito.

ri tambolona bo ratedaka rantasi sabana pehuku nu Alatala ka tona haitu mantamo mpuu. † Nantuntuni atura Nabi Musa, pura-pura kande nipesomba ka Alatala kana nigarai. Peinta Imamat 2:13. Kalimat hitu ledo nikava ri pura-pura naskah nggaulu.

†† Ivesia muni pura-pura tona kana rapegasa ante kasusa bo kapari. Basa Yunani: Pura-pura manusia kana ragarai ante apu.

‡ Ulangan 24:1,3

‡⁹ Sabana haitu, anu nipakasangu nu Alatala, ledo namala rapopogaa nu manusia!>>

¹⁰ Tempo i Yesus ante anaguruNa nesua riaru banua, nekutana vaimo anaguruNa, nuapa niuliNa pangane.

¹¹ Nesana i Yesus, <<Isema-sema mompogaaka bereina mombine bo mompoberei mombine ntanina, ia nobualoni bereina paratama. ¹² Bo ane bereina mombine mompogaaka bereina langgai bo mompoberei langgai ntanina, ia muni nobualo.>>

I Yesus nerapi belo ka ngana-ngana

Matius 19:13-15; Lukas 18:15-17

¹³ Naria saeo, tona nanggeni ana-anara hau nte i Yesus ala radikaNa paleNa ri karora bo merapi Alatala mombadekei belo ka ira. Tapi anaguruNa nompokarau tona gahaitu. ¹⁴ Nanggita haitu naraumo rara i Yesus sampe niulikaNa anaguruNa, <<Dekeikamo ngana-ngana gahitu makava nte Yaku! Nee ratagi ira, apa aga tona noinggu mpo ngana gahitu majadi todea riaru Poparenta nu Alatala. ¹⁵ Pariaramo tesaKu hitu! Isema-sema ledo natundu nte Alatala nasimbayu mpo ngana kodi natundu nte totuana, ia ledo mamala majadi todea riaru Poparenta nu Alatala.>> ¹⁶ Naliu nanguli ivehaitu, nikapuiNamo ngana-ngana gahaitu bo nidikaNa paleNa nte ngana gahaitu saito-saito bo niperapiNa belo ka ira.

Nakaja mpuu tona nakalumana majadi todea riaru Poparenta nu Alatala

Matius 19:16-30; Lukas 18:18-30

¹⁷ Tempo i Yesus mompapola polipana, naria saito tona nangova mosinggavaka Ia. Tona haitu nantaputu ri ngayo i Yesus bo nanguli, <<Guru belo, nuapa masipato kupovia ala kukava katuvua mabelo sampe ri kasae-saena?>>

¹⁸ Nesanamo i Yesus, <<Nakuya niulimuka Yaku nabelo? Ledo ria saitoa tona nabelo, aga Alatala.

¹⁹ Tantu nisanimu parenta-parenta nu Alatala anu nanguli, nee mepatesi, nee mobualo, nee mangangga, nee mosabi dava, nee mebagiu, bo bilamo tina tuamu.>> ‡

²⁰ Nesana tona haitu, <<Guru, pura-pura parenta haitu nioseakakumo lako ri kakodiku.>>

²¹ Naasi mata i Yesus nangganoto tona haitu bo niuliNa, <<Sangupa vai paraluu mupovia. Koimo pobalu pura-pura kakalumanamu bo dekei alina haitu ka tona napakasi, ala mukava kakalumana ri suruga. Maupu haitu, oseakamo Yaku.>>

²² Nangepe tesa i Yesus, nakurumo kire ntona haitu bo nalaimo ia ante susa rara, sabana nadea mpuu kakalumanana.

²³ Naupu haitu i Yesus neili nompeinta anaguruNa, bo nanguli ka ira, <<Nakaja mpuu tona nakalumana matundu nte Alatala bo majadi todeaNa!>> ²⁴ Nahera mpuu anaguruNa nangepe tesaNa haitu. Tapi Ia nompapola tesaNa ka ira, <<Ana-anaKu, nakaja mpuu majadi todea riaru Poparenta nu Alatala. ²⁵ Namurapa unta mesua ri puki jaru pade tona nakalumana matundu nte Alatala bo majadi todeaNa.>>

²⁶ Nangepe tesaNa haitu nantambai kahera nu anaguruNa sampe ira nosimpekutana, <<Ane ivesia, isema tano mamala rapakasalama?>>

²⁷ I Yesus nangganoto ira bo nanguli, <<Ane aga pompakule nu manusia, ledo majadi. Tapi ane pompakule nu Alatala, pura-pura mamala majadi.>>

²⁸ Jadi nangulimo i Petrus, <<Peintamo, Pue! Kami nompalaisi pura-pura anu kami bo nangoseaka Komiu.>>

²⁹ Nangulimo i Yesus, <<Pariaramo! Tona nompalaisi banuana bo sampesuvuna, bara tina tuamana, bara anana, bara taluana sabana ia nangoseaka Yaku, bo nompatolele Kareba Belo, ³⁰ ia kana mantarima melabi kadeana sii-sii. Ia manggava saatu nggani kadeana banua, sampesuvu, tina, ana, bo talua. Bo rakavana muni pepandasa. Bo ri tempo makava, ia matuvu mabelo sampe ri kasae-saena. ³¹ Tapi nadea tona narikolu sii-sii kana majadi tona maripuri. Bo tona naripuri sii-sii kana majadi tona marikolu.>> †

Katalu-ngganina i Yesus notesa kamateNa ngena

Matius 20:17-19; Lukas 18:31-34

³² I Yesus ante anaguruNa da ranja mpolipa hau ri ngata Yerusalem. I Yesus nokolumo. Jadi nahera mpuu rara anaguruNa nompekirika anu majadi hamai ngena. Tona ntanina anu netuntuni ri purira naeka. I Yesus nombaronde sangganipa vai anaguruNa sapulu randua bo notesa ka ira anu majadi ri karoNa ngena. ³³ NiuliNa, <<Epero! Sii-sii kita mantende hau ri ngata Yerusalem. Hamai Yaku, Ana nu Manusia, radekei ka balengga-balengga ntopanggeni pesomba bo guruguru agama, bo rahukura mate. Bo Yaku radekeira ka tona ledo toYahudi. ³⁴ Yaku kana rapongei-ngeikara bo ratoveulusira. Bo Yaku racambura bo rapatesira. Tapi ri eo katataluna Yaku matuvu mpanjili.>>

Topangoseaka i Yesus kana maede rara

Matius 20:20-28

³⁵ Naupu haitu i Yakobus bo i Yohanes, ana-ana i Zebedeus, nanggaparai i Yesus bo nanguli, <<Guru, kami madota ala rapoiyoMiu anu raperapi kami hitu.>>

³⁶ I Yesus nanguli, <<Nuapa nipokonomiu Kupovia ka komiu?>>

† *Batuana, panggita nTupu ledo nasimbayu nte panggita nu manusia.*

³⁷ Nesanamo ira, <<Ane temponamo Komiu momparenta ante kuasa mpo Magau, palogamo saito kami monturo ri sabingga ngganaMiu bo saitopa ri sabingga njidiMiu.>>

³⁸ Nanguli i Yesus ka ira, <<Ledo nisanimiu anu niperapimiu. Rapakulemiu mombarasai pepandasa anu Kurasai, bo masadia komiu mamate mpo Yaku? †>>

³⁹ Nesana ira, <<Rapakule kami!>>

Nangulimo Yesus ka ira, <<Natantu mamimo komiu kana mombarasai pepandasa bo kamate anu Kurasai.

⁴⁰ Tapi ledo Yaku nakuasa mompakatantu isema masipato monturo ri sabingga ngganaKu bo ri sabingga njidiKu. Aga Alatala nompakatantu isema masipato monturoka ponturo haitu.>>

⁴¹ Nangepe perapira haitu, naraumo ira sapulu ka i Yakobus bo i Yohanes. ⁴² Jadi i Yesus nombaronde ira bo nanguli, <<Nisanimiu todea-todea anu ledo no-sisani nte Alatala, topoparentara nompandasa todeara, bo pakeni-pakenira nompatundu todeara.

⁴³ Tapi ledo mamala ivesia nte komiu! Isema-sema komiu madota majadi pakenimiu, ia kana majadi topotulungimiu. ⁴⁴ Bo isema-sema komiu madota majadi marikolu, ia kana majadi batua ntodea. ⁴⁵ Sabana nau Yaku, Ana nu Manusia, ledo nakava ratande ntona tapi ala mantulungi tona bo mombadekei karoKu rapatesi mantolo dosa ntodea.>>

I Yesus nompakabelo mata i Bartimeus

Matius 20:29-34; Lukas 18:35-43

⁴⁶ I Yesus ante anaguruNa nakava ri ngata Yerikho. Tempo i Yesus ante anaguruNa nalai lako ri Yerikho, nadea mpuu tona ntanina nosangganin nte ira. Naria saito toburo nosanga i Bartimeus, ana i Timeus, nonturo ri soso dala bo nerapi-rapi. ⁴⁷ Niepena kareba i Yesus toNazaret noliu ri sia, nongaremo ia, <<He Yesus, Muli Magau Daud, poasimo yaku!>>

⁴⁸ Nadea tona nombasalaraka ia ala malino. Tapi aga nitambainapa kamanggana nongare, <<He, Muli Magau Daud, poasimo yaku!>>

⁴⁹ Nangepe pepongare haitu netaamo i Yesus, bo nanguli ka tona hamai, <<Rondemo ia tumai!>>

Jadi nironderamo toburo haitu bo niulira, <<Pakaroo raramu! Peanggamo! NirondeNa iko.>> ⁵⁰ Nangepe haitu, nitedakana ntalikumo baju ndoena bo neangga nasalisa bo nompari-mpari hau nte i Yesus.

⁵¹ Nekutanamo i Yesus, <<Nuapa mupodota Kupovia ka iko?>>

Nesana toburo haitu, <<Guru, yaku madota meki-ta!>>

⁵² Pade nangulimo i Yesus, <<Panjilimo, nabelomo matamu sabana iko nomparasaya Yaku!>> Kaliu-liu

†† *Basa Yunani: rapakulemiu manginu panginu napai anu kana Kuinu bo mantarima pediu anu kana Kutarima?*

nekitamo mata ntona haitu, bo nituntuninamo i Yesus riara mpolipana.

I Yesus nesua ri ngata Yerusalem mpo Magau

Matius 21:1-11; Lukas 19:28-40; Yohanes 12:12-19

11 Tempo i Yesus ante anaguruNa naparamo ngata Yerusalem, ira nakava ri ngata Betfage bo ngata Betania ri kente nu Bulu Zaitun. I Yesus nombatudu randua anaguruNa mokolu. ² NiuliNa, <<Koimo, pokolu hau ri ngata napara moitu. Tempo komiu mesua rangata, rakavamiu sangu ana keledai nitataka anu dopa sanggani nipesavi ntona. Volemo ana keledai haitu bo umbumo tumai. ³ Bo ane maria tona mompekutana nuapa sabana nivolekamiu keledai tutu, uli ka ia, <I Pue madota mompake keledai hitu sampalai bo rapopanjiNa ri sii ngena.>>

⁴ Jadi haumo ira randua bo nikavara mpuu sangu ana keledai nitataka ri soso dala ri bobaa nu banua. Nivoleramo kaloro nu ana keledai haitu. ⁵ Bara sako ndua tona neangga ri sia nompekutana, <<Nakuya nivolekamiu keledai tutu?>>

⁶ Anaguru haitu nesana ante pesana niuli i Yesus ka ira. Jadi nidekei ntonamo keledai haitu rakenira. ⁷ Ni-umburamo ana keledai haitu hau nte i Yesus. Nakava hamai, nilampira ante baju ndoera bengo nu keledai pade nipesavi i Yesus. ⁸ Nadea tona hamai nombavoke baju ndoera ri dala mombabila Ia bo naria muni tona nombatale tava-tava nialara ri talua. ⁹ Tona ri kolu bo ri puri, nongare-ngare puramo,

<<Hosana! Ratoiyamo Alatala! Maoge belo ka Ia anu nakava niposumba nu Alatala!

¹⁰ Perapi Tupu mompakaroso poparenta nu Magau anu nakava hitu, poparenta muli ntotuata Magau Daud.

Ratoiyamo Alatala ri suruga!>>

Mazmur 118:25-26

¹¹ Nakava ri ngata Yerusalem, nesuamo i Yesus ri Banua nu Alatala. Naupu nipeintaNa pura anu naria hamai, nalaimo Ia ante anaguruNa sapulu randua haitu manjili hau ri ngata Betania, apa nanggoviamo.

I Yesus nopindasi sanggayu kayu ara

Matius 21:18-19

¹² Naeo mpadondo, tempo ira nalai lako ri ngata Betania, naaramo tai i Yesus. ¹³ Da nggavaona niki-taNama sanggayu kayu ara nagumbu tavana. Jadi haumo Ia nanggaparai kayu haitu mompeintaka bara maria vuana. Nakava hamai, aga tavana bayangi niki-taNa. Nau sangu vuana ledo ria nikavaNa apa dopa tempo mpovuana. ¹⁴ Pade niuliNa ka kayu ara haitu, <<Nompamula eo hitu domo maria tona mangande vuamu hanupa!>> AnaguruNa nangepe Ia nombapindasi kayu ara haitu.

I Yesus nompopalai tona nobalu-balu riara Banua nu Alatala

Matius 21:12-17; Lukas 19:45-48; Yohanes 2:13-22

¹⁵ Pade napolamo ira ri ngata Yerusalem. Nakava hamai i Yesus nesua ri doyata nu Banua nu Alatala. Bo nipopalaiNa tona nobalu-balu hamai. NisumbolinakaNa meja-meja ntoposula doi bo bangku-bangku ntopobalu-balu tonji banggebodo. ¹⁶ Bo ledo nidekeiNa tona manggeni gade nuapa-nuapa molu ri doyata Banua nu Alatala. ¹⁷ I Yesus nompatuduki todea ri sia. Nanguli Ia, <<Riara Buku Gasa nitulisi ivei: <BanuaKu rauli banua posambaya ka tona njumangata. Tapi komiu nompajadi Banua nu Alatala hitu petabuni ntopeago!>>

Yesaya 56:7; Yeremia 7:11

¹⁸ Balengga-balengga ntopanggeni pesomba bo guru-guru agama nangepe anu najadi haitu. Jadi nieloramoda dala mompatesi i Yesus. Naeka rarara nanggita Ia, sabana pura-pura tona nokumaa nangepe pepatudukiNa.

¹⁹ Nggoviana i Yesus ante anaguruNa nesuvu hau ri savaliku kota haitu.

Pepatuduki lako ri kayu ara nipindasi—nakuasa mpuu posambaya ntopomparasaya

Matius 21:20-22

²⁰ Naeo mpadondo sanggaeo mpisina, noliumo ira ri kayu ara anu nipindasi i Yesus. Nikitara kayu haitu namate sampe ri kalenamo. ²¹ Jadi nitora i Petrusmo kajadia riavi. Niulina ka Yesus, <<Guru, peinta vei! Kayu ara nipindasiMiu riavi namatemo!>>

²² Nangulimo i Yesus, <<Parasayamo Alatala! ²³ Pariaramo tesaKu hitu: mamala komiu manguli ka bulu hitu, <Kateunggatakamo bo katedaka hau rantasimo!> Bo anu haitu mpuu-mpuu rapovia ka komiu, asaa raparasayamiu anu niulimiu haitu majadi mpuu bo ledo morompenga pekirimiu. ²⁴ Jadi Kuuli ka komiu, nuapa-nuapa raperapimiu riara posambayamiu, parasayamo pomperapimiu haitu nipooyo nu Alatalamo, bo ratarimamiu mpuu. ²⁵ Bo ane komiu mosambaya, ampungi ntani tona novia sala nte komiu, ala komiu muni raampungi nTuamamiu ri suruga. ²⁶ [Tapi ane komiu ledo mombaampungi tona novia sala nte komiu, natantum Tuamamiu ri suruga ledo muni raampungiNa kasalamiu].>>

Pakeni ntoYahudi nompekutana kuasa i Yesus

Matius 21:23-27; Lukas 20:1-8

²⁷ I Yesus ante anaguruNa nanjili vai hau ri ngata Yerusalem. Tempo i Yesus nolipa-lipa ri doyata Banua nu Alatala, nakavamo balengga-balengga

ntopanggeni pesomba, guru-guru agama bo totua-totua ntoYahudi. ²⁸ Nekutanamo ira nte i Yesus, <<Ante kuasa lako ri umba nipoviaMiu pura-pura hitu ri Banua nu Alatala? Isema nombadekei kuasa haitu ka Komiu?>>

²⁹ Nesana i Yesus, <<Kupekutana muni nte komiu. Ane rapesanakamiu, Kuuli isema nombadekei kuasa ka Yaku novia anu haitu. ³⁰ Uli ka Yaku, isema nombadekei kuasa ka i Yohanes nombadiu tona? Alatala atau manusia?>>

³¹ Jadi nosiulikamo ira, <<Ane raulita i Yohanes nombadiu ante kuasa nu Alatala, tantu i Yesus mompekutana nuapa sabana ledo niparasayata i Yohanes.

³² Tapi nakaja muni ane raulita i Yohanes aga nombadiu ante kuasa nu manusia.>> Niulikara ivesia sabana ira naeka ka todea apa nadea tona nomparasaya i Yohanes mpuu-mpuu nabi nu Alatala. ³³ Jadi nesanamamo ira, <<Ledo nisani kami.>>

Jadi nangulimo i Yesus ka ira, <<Ane ivesia, ledo muni Kuuli ka komiu isema nombadekei kuasa ka Yaku novia mpengaya-ngaya hitu.>>

Porapa topokarajaa ri talua

Matius 21:33-46; Lukas 20:9-19

12 I Yesus notesa ka ira ante nompake porapa ivei: <<Naria saito langgai notuda anggur ri taluana. Talua haitu nivalana ntiku-ntiku bo nikaena lovu rapompea uve anggur bo nipoviana sou pojaga. Naupu haitu, nibolinamo taluana haitu nte bara sako-ndua topokarajaa mojangpangina damo rabagi asele-na, bo nalaimo ia hau ri ngata nakavao. ² Nakavapa tempona mompupu vuana, nitudunamo saito batua hau nte topojangpangi talua mombatarima bagiana lako ri asele ntalua haitu. ³ Nakavapa batua haitu, ledo nidekeikara asele ntalua aga nisakara bo nibobara. Naupu haitu nipopalaira boamo. ⁴ Naliu haitu, nitudu ntupu ntalua vai saitopa batua ntanina hau nte topo-jiangpangi talua. Tapi tona haitu muni aga nibobara sampe nabere balenggana, bo nipakaeyara. ⁵ Pade nitudu ntupu ntalua vai saito batua ntanina. Tapi batua haitu nipatesira. Bo ivesia muni nipoviara ante batua-batua ntanina. Naria aga nibobara, bo naria ntanina nipatesira.

⁶ Kaupuna damo saito naboli nte tupu ntalua, haitumo anana nipotovena. Nituduna muni anana haitu hau nte topojangpangi talua apa nipekirina, <Natantumorabilara anaku.>

⁷ Tapi nikitara ana ntupu ntalua nakava, nosiulikamo ira, <Tumaimo anana anu rakaboli mbarambara ntotuana. Anumo, rapatesita ia ala taluana hitu majadi bagiata.> ⁸ Jadi ana ntupu ntalua haitu nisakara bo nipatesira, bo karobatana nitedeakara ri savaliku ntalua anggur haitu.>>

⁹ Bo nekutanamo i Yesus ka pakeni ntoYahudi haitu, <<Jadi nuapa rapovia ntupu ntalua anggur haitu? Natantumoa ia kana makava mompatesi topokarajaa talua haitu bo nombadekei taluana ka tona ntanina. ¹⁰ Natantu nibacamiumo tesa riaru Buku Gasa anu nanguli ivei:

<Vatu anu nitedeaka ntopovia banua vatu haitumo nopokopa ka banua haitu. ¹¹ Haitu nipovia nTupu, bo nabelo mpuu ri panggitata!> >>

Mazmur 118:22-23

¹² Naupu haitu, pakeni ntoYahudi nompasimbuku mombasaka i Yesus, sabana nisanira iramo nipambela ri porapaNa pangane. Tapi naeka ira ka todea. Jadi nalaimo ira.

ToFarisi nompasimbuku nombaoapa tesa i Yesus ante nekutana pombabayari balasitee

Matius 22:15-22; Lukas 20:19-26

¹³ Naupu haitu pakeni-pakeni ntoYahudi haitu nantudu bara sako-ndua toFarisi ante tona nosabingga ka Magau Herodes hau mombaoapa tesa i Yesus. ¹⁴ Nakava nte i Yesus, niuliramo, <<Guru, nisani kami Komiu tona nanoa. Komiu ledo naeka nte isema-sema sabana Komiu ledo nompelenje. Komiu mpuu-mpuu nanoa nompatuduki pakalanto dota nu Alatala ka manusia. Jadi berimbamo? Nangoseaka Atura-atura agamata, mamala kita mombabayari balasitee ka Magau Mbaso Kaisar atau ledo? ¹⁵ Paraluu kita mombayari atau ledo?>>

Tapi nisani i Yesus patujura nombaoapa tesaNa. Jadi nanguli Ia, <<Nakuya komiu nompasimbuku mombatoliani Yaku? Keni tumai sampeka doi salaka Kupeinta.>> ¹⁶ Jadi nikenira mpuumo. Bo nekutanamo Ia, <<Lenje bo sanga isema ri doi hitu?>>

Nesanamamo ira, <<Lenje bo sanga Magau Mbaso Kaisar.>>

¹⁷ Pade nanguli i Yesus ka ira, <<Ane ivesia, dekei ka Magau Mbaso anu masipato radekei ka Magau Mbaso, bo dekeimo ka Alatala anu masipato radekei ka Alatala!>>

Nokumaa mpuumo ira nangepe pesanaNa.

ToSaduki nompekutana nte i Yesus berimba tomate matuvu mpanjili

Matius 22:23-33; Lukas 20:27-40

¹⁸ Naliu haitu nakavamo bara sako-ndua toSaduki netingu nte i Yesus. Ira toYahudi anu nomparasaya tona namate ledo matuvu mpanjili bara maipia. Jadi nekutanamo ira nte i Yesus, ¹⁹ <<Guru, Nabi Musa noutulisi atura hitu ka kita: Ane maria langgai noberei bo dopame ira noana namatemo ia, sampesuvuna mboto kana mompoberei timbalana haitu ala momuli bo ana

haitu rareke muli nu langgai anu namatemo pangane. †²⁰ Jadi papitu ira nosampesuvu aga langgai bayangi. Lumbuana nobereimo tapi dopame noana ira, namatemo ia. ²¹ Bo tueina karanduana nompoberei timbalana haitu, tapi dopame noana, namate munimo ia. Bo ivesia muni najadi ante sampesuvuna katataluna ²² sampe sampesuvuna kapapituna. Ledo ria saitoa ira nomuli. Kaupuna, mombine haitu namate munimo. ²³ Tempo tona namatemo matuvu mpanjili bara maipia, isema kakanana berei nu mombine haitu? Apa ia nipobereira papitu.>>

²⁴ Nesanamo i Yesus, <<Nasala mpuu komiu, sabana ledo nisanimiu isi nu Buku Gasa bo ledo muni nisanimiu kuasa nu Alatala. ²⁵ Tempo tona namate matuvu mpanjili bara maipia, katuvura masimbayu mpo malaeka-malaeka ri suruga. Ira domo moberei.

²⁶ Berimbamo? Tantu nibacamiu anu nitulisi riara Buku Nabi Musa, tona namatemo matuvu mpanjili. Tora ngena tesa kajadia santungu gumbu navaya tapi ledo napapu. *Nau nasaemo kamate i Abraham, i Ishak bo i Yakub*, tempo haitu Alatala nanguli ka i Musa, <Yakumo Alatala nisomba i Abraham, i Ishak, bo i Yakub.> ††²⁷ Batuana, ira da natuvu bo nombasomba Alatala. Apa nisanita ledo tomate nombasomba Alatala, tapi tona natuvu. Komiu mpuu-mpuu nasala!>>

Saito guru agama nekutana umbana parenta nu Alatala nopokopa

Matius 22:34-40; Lukas 10:25-28

²⁸ Tempo haitu nakavamo saito guru agama nantalingai i Yesus ante toSaduki haitu. Niepena pesana i Yesus nabelo, jadi nipekutanamo i Yesus, <<Parenta umbana nopoko ntoto lako ri pura-pura parenta naria?>>

²⁹ Nesana i Yesus, <<Parenta anu nopoko ntoto iamo ivei: <Epero toIsrael! Alatala Tupu nisombata, bo Ia aga saito-itoNa. ³⁰ Potovemo Tupu ante mpuu-mpuu raramiu, bo ante pura-pura noto mpekirimiu, bo pura-pura pokainggumiu bo pura-pura pompakulemiu.> †

³¹ Bo Parenta karanduana, <Potovemo singgamanusiamiu nasimbayu mpo pompotovemi karomiu mboto.> †† Ledo naria parenta ntanina nopokopa pade parenta randua hitu.>>

³² Nangulimo guru agama haitu, <<Nakana mpuu niulimiu, Guru. Ledo ria Alatala ntanina, aga Ia saito-itoNa. †††³³ Kita manusia kana mompotove Alatala ante mpuu-mpuu rarata bo ante pura-pura pompahata bo ante pura-pura pompakuleta. Bo kita muni kana mompotove singgamanusiata nasimbayu mpo pompotoveta karota mboto. Haitu nelabipa nopoko pade nombadekei mpengaya-ngaya pesomba nipalabu atau pesomba-pesomba ntanina ka Alatala.>>

† Ulangan 25:5 †† Pesuvu 3:6,15 † Ulangan 6:4-5 †† Ulangan 19:18 †† Ulangan 4:35; 6:4

³⁴ I Yesus nompeinta guru agama haitu nabelo pesanana. Jadi nangulimo i Yesus, <<Iko naparamo majadi todea riara Poparenta nu Alatala.>> Naliu haitu, domo naria sanupa tona nabia nekutana nte i Yesus.

I Yesus nompekutana isema Topepakasalama

Matius 22:41-46; Lukas 20:41-44

³⁵ Tempo i Yesus nompaguru ri doyata Banua nu Alatala, nipekutanaNa nte todea, <<Berimba sampe guru-guru agama nanguli Magau Topepakasalama muli Magau Daud? ³⁶ Magau Daud mboto notesaki Magau Topepakasalama ante pekeniaka Nosa Gasa, ivei:

Tupu nanguli ka Pueku,
<Kamaimo, ponturomo ri sabingga ngganaKu
Sampe Kupopekou pura-pura baliMu nte Iko.>

Mazmur 110:1

³⁷ Magau Daud mboto nanguli Magau Topepakasalama haitu Puena, jadi berimba sampe rauli Ia muli Magau Daud?>>

Nadamba mpuu todea nangepe i Yesus nompaguru ira.

I Yesus nepopatora ala nee mangoseaka pokainggu nu guru agama

Matius 23:1-36; Lukas 11:37-54; 20:45-47

³⁸ Tempo i Yesus da nompaguru, niulikaNa todea, <<Komiu kana mainga ante guru-guru agama. Nipokonora nolipa-lipa ante baju nandoe bo nipokonora rabila ntona ri potomu. ³⁹ Nipokonora nonturo ri ponturo anu nibila riara banua-banua petupu bo ri ponturo nabelo ri posusa. ⁴⁰ Nibagiura timbala-timbala ala mangalasi banuara. Bo nitabuniakara pokainggura nadaa haitu ante nosambaya pakandoe. Mantamo mpuu pehuku ka ira ngena!>>

I Yesus nombatoiya timbala napakasi

Lukas 21:1-4

⁴¹ I Yesus hau nonturo nantingayo peti pomboli doi pedekei ri doyata Banua nu Alatala. NipariaraNa tona nombasuaraka doira riara peti haitu. Nadea tokalumana nombasuaraka doi dea riara mpeti haitu. ⁴² Bo nakava muni saito timbala napakasi mpuu bo ia nombasuaraka rompeka doi kodi. †††⁴³ Pade nironde i Yesusmo anaguruNa, bo niulikaNa, <<Pariaramo! Nadeapa pedekei ntimbala napakasi haitu pade pedekei ntona ntanina. ⁴⁴ Ira nombadekei lako ri labi nu kakalumanara, tapi nau timbala haitu napakasi mpuu, nidekeina pura-pura doi naria nte ia, anu niparaluuna ka katuvuna mboto.>>

††† Basa Yunani: rompeka doi tambaga. Doi tambaga haitumo doi ledo nadea alina.

I Yesus notesa kagero Banua nu Alatala bara maipia

Matius 24:1-2; Lukas 21:5-6

13 Tempo i Yesus nesuvu lako ri doyata Banua nu Alatala, naria saito anaguruNa nanguli ka Ia, <<Guru, peinta kagayana Banua nu Alatala bo tombi-tombi ri doyata hitu! Nagaya mpuu, vatuna singga mbaso bo naroso!>>

² Nesana i Yesus, <<Iyo, peintamo banua-banua na-gaya haitu. Tapi nggapurinapa, domo maria sangua watu potembona mosisunju ri bavo watu ntanina, sabana pura-pura watu haitu radurasi.>>

I Yesus nombatesa kasusa bo pepandasa

Matius 10:16-25; 24:3-14; Lukas 21:7-19

³ I Yesus nonturo ri Bulu Zaitun nosintingayoka Banua nu Alatala. Tempo haitu i Petrus, i Yakobus, i Yohanes bo i Andreas nekutana nte Ia nggalino-lino, ⁴ <<Guru, uli ka kami maipia majadi anu niuliMiu pangane? Nuapa tandana mompakatantu naparamo kaja-dia nitesaMiu pangane?>>

⁵ Nesana i Yesus, <<Pakabelo-belo, nee sampe komiu rabagi. ⁶ Madea tona makava mompobalu sangaKu. Raulira iramo Magau Topepakasalama! Bo madea tona rabagiura. ⁷ Ane raepemiu kareba posieva napara nte komiu bara nakavao nte komiu, nee maeka! Pura-pura haitu kana majadi ntani ruru, tapi haitu dopa nakava mpuu kaupu nu dunia. ⁸ Tempo haitu tona sangata mosieva nte tosangatana, bo magau simbo magau mosieva muni. Bo ri umba-umba ri dunia kana maria lingu bo maria muni kamate ara. Pura-pura haitu da kasusa pamulana, eva dua kole nirasai mombine tempo noana.

⁹ Komiu kana mainga-inga sabana komiu rasaka bo rakeni rapangadu ri ngayo ntopotangara. Komiu raboba riara banua-banua petupu bo rakeni rapoposintingayoka gubernur-gubernur bo magau-magau sabana komiu nomparasaya Yaku. Bo haitumo loga ka komiu motesa pomparasayamiu Yaku ka ira. ¹⁰ Bo Kareba Belo kana rapotolele ka pura-pura manusia ri dunia dopame makava kaupu nu dunia. ¹¹ Ane komiu rasaka bo rakeni ratangara, nee makini raramiu mompekirika anu raulimiu. Ane makavamo gantana motesa, ulimo anu radekei ka komiu raulimiu. Sabana tesa-tesa raulimiu haitu ledo mopuna lako nte komiu mboto, tapi lako ri Nosa Gasa nu Alatala.

¹² Bo tempona haitu muni maria tona mombadekei sampesuvuna mboto rapatesi sabana sampesuvuna nomparasaya Yaku. Bo maria totua mombadekei anana mboto rapatesi. Ngana-ngana mangeva tina tuamara mboto bo mombadekei ira rapatesi. ¹³ Komiu rapovuu mata ntodea sabana komiu nangoseaka

Yaku. Tapi isema-sema naroo pomparasayana sampe ri kaupuna, ia kana rapakasalama nu Alatala.>>

Tesa kasusa bo kapari anu majadi dopame i Yesus makava mpanjili

Matius 24:15-28; Lukas 21:20-24

¹⁴ <<Nabi Daniel nggaulu nombaboto kakava <Toper-opu anu nompakarunggu rara nu Alatala>. (Isema-sema mombabaca tesa hitu kana rapariana batuana.)[†] Jadi ane rakitamiu anu niboto Nabi Daniel neangga ri ponturo anu ledo masipato rapeanggana, haitumo tandana tona nonturo ri bagia Yudea kana mangova malai hau ri bulu ala masalama. ¹⁵ Isema-sema nanggosanaka ri savaliku nu banuana, tumo mesua rabanua mangala nuapa-nuapa. Palaimo masalisa! ¹⁶ Isema-sema nokarajaa ri talua, tumo manjili ri banua mangala pakeana. Palaimo masalisa! ¹⁷ Ri eo haitu mandasa mpuu mombine natiana bo mombine da nompatomi anana apa makaja malai! ¹⁸ Posambayamo ala pepandasa haitu ledo majadi ri tempo ranindi. ¹⁹ Apa ri tempo haitu maria pepandasa anu nadaa mpuu, anu dopa naria nirasai manusia lako ri pamulana dunia nipajadi nu Alatala. Bo domo majadi hanupa ri tempo makava. ²⁰ Rapana tempo pepandasa haitu ledo rapakambuku nTupu, natantu nau saitoa tona ledo ria matuvu. Tapi lako ri tove nu Alatala ka todea topomparasaya anu nipelisiNa, tempo pepandasa haitu kana rapakambukuNa.

²¹ Ri tempona haitu ane maria tona manguli ka komiu, <Peintamo! Siimo Magau Topepakasalama!> bara raulira <Hamaimo Ia!> nee raparasayamiu tesara haitu. ²² Sabana meumba topodava manguli iramo Magau Topepakasalama, bo meumba muni nabi-nabi mpodava. Ira pura-pura movia tanda-tanda nipokumaaka bo kabaraka-kabaraka mombabagi tona. Ane mamala, nau damo tona nipelisi nu Alatala rabagiura muni. ²³ Tapi komiu kana mainga sabana dopame majadi, lave nipopaisaniKu mamimo pura-pura hitu ka komiu.>>

Kakava Ana nu Manusia

Matius 24:29-31; Lukas 21:25-28

²⁴⁻²⁵ <<Maupu tempo pepandasa nadaa haitu, kuasa-kuasa ri langi ragoya pura, mata nu eo majadi malanda, bula domo mareme, bo betue-betue manavu lako ri langi. ²⁶ Bo ri tempo haitu pura-pura manusia ri dunia manggita Yaku, Ana nu Manusia, manau riara kulimu. ^{††} Bo rakitara kaogeKu bo kuasaKu nipokumaaka. ²⁷ Maupu haitu, Kutudu malaeka-malaekaKu hau mompasiromu tona nipelisiKu lako ri umba-umba ri dunia.>>

[†] Peinta Matius 24:15. ^{††} Daniel 7:13

Pepatuduki lako ri kayu ara

Matius 24:32-35; Lukas 21:29-33

²⁸ <<Pariaramo pakabelo pepatuduki lako ri kayu ara. Ane nikitamiu tunggu-tunggu naramata bo tavana noroyamo, nisanimumo naparamo tempo mapane. ²⁹ Ivesia muni ane rakitamiu pura-pura kajadia pangane, rasanimumo domo mpuu masae makavamo Yaku. ³⁰ Pariaramo tesaKu hitu! Dopame mamate pura-pura tona natuvu tempo haitu, pura-pura kajadia nitesaKu pangane majadimo. ³¹ Langi bo tana malipo, tapi tesaKu bate-batena sampe ri kasae-saena.>>

Kita kana mainga mompopea kakava i Yesus

Matius 24:36-44; Lukas 17:26-30, 34-36

³² <<Ane eo bo jaa kakavaKu ngena, aga TuamaKu ri suruga nangisanina. Ledo ria saitoa tona ntanina nangisanina. Ledo nisani nu malaeka ri suruga bo Yaku mboto, Ana nu Alatala, ledo nisaniKu. ³³ Jadi mainga-ingamo bo jagaimo, apa ledo nisanimumo maipia Yaku makava. ³⁴ Haitu nasimbayu nte porapa hitu: Naria saito tona hau ri ngata nakavao. Dopame ia hau, nidekeina mami kuasa ka batua-batuana mombaurusi banuana. Saito-saito nipakatantuna pokarajaa ka ira. Bo topo jagai vamba nitevaina mainga-inga ante kakavana. ³⁵ Jadi, ivesia muni komiu kana mainga mompopea kakavaKu, apa ledo nisanimumo maipia Yaku, tupu banua, manjili, bara nggoviana, bara tanga bongi, bara bobayana, atau bara mebonda eo. ³⁶ Ane sampesanika Yaku makavamo, nee sampe Kukava komiu da namonjo. ³⁷ Anu nitesaKu hitu ka komiu, Kutesa muni ka pura-pura tona. Komiu kana mainga mompopea kakavaKu!>>

Pakeni agama Yahudi nonia mompatesi i Yesus

Matius 26:1-5; Lukas 22:1-2; Yohanes 11:45-53

14 Tempo haitu da rombongipa pade Eo Mbaso Paskah bo Posusa Roti Ledo Noragi. Balengga-balengga ntopanggeni pesomba bo guru-guru agama nangelo dala mombasaka i Yesus nggalino bo mompatesi Ia. ² Tapi niulira, <<Nee rasakata Ia tempo eo posusa haitu, ala nee magado todea.>>

Saito mombine nombatoli lana dupa ri karo i Yesus mombabila Ia

Matius 26:6-13; Yohanes 12:1-8

³ Tempo i Yesus naria ri ngata Betania, Ia hau ri banua i Simon anu nadua oge bara ipia. Da nonturo nangande ri sia, nakavamo saito mombine nanggeni sangu botolo nipovia lako ri vatu pualam. Botolo haitu noisi lana dupa nasuli mpuu alina anu nipovia lako ri

† Basa Yunani: <domo mpuu masae anu haitu majadi>. Sanu nanguli batuana <anu haitu> kakava i Yesus. Sanu nanguli tempo kagero nu Banua nu Alatala nitesaNa ri ayat 13:1.

kale navangi. Mombine haitu nombakotosaka tambolo botolo haitu bo nitolina lana dupa ri balengga i Yesus, tandana pebilana ka Ia.

⁴ Nanggita haitu, naria bara sako-ndua tona hamai narau bo nosiulika, <<Nakuya nipakarugika lana nasuli? ⁵ Lana haitu mamala rapobalu ante alina melabi taluatu doi salaka ^{††} bo doi haitu namala radekei ka tona napakasi.>> Jadi nipokauramo mombine haitu.

⁶ Tapi nanguli Yesus ka ira, <<Palambamo ia! Nakuya komiu nompakasusa ia? Ia novia anu nabelo ka Yaku. ⁷ Tona napakasi nasaro naria ri tatangamiu bo komiu mamala mantulungi ira maipia tempo rapodotamiu. Tapi Yaku hii, ledo bate-batena mosangganin ante komiu. ⁸ Mombine hitu novia anu nipakulena. Ia nombatoli lana dupa ka Yaku mompakasadia karoKu ratana. ⁹ Pariaramo tesaKu hitu. Ri umba-umba ri dunia Kareba Belo rapatolele, povia nu mombine hitu kana ratesa muni ala ratora ia.>>

I Yudas nompobalu i Yesus ka balengga-balengga ntopanggeni pesomba

Matius 26:14-16; Lukas 22:3-6

¹⁰ Naupu sia, i Yudas, saito lako ri sapulu randua anaguru i Yesus, hau nte balengga-balengga ntopanggeni pesomba. Patujuna mompobalu i Yesus ka ira. ¹¹ Tempo niepera tesa i Yudas haitu, nadamba mpuumo rarara bo nojanji mombadekei doi ka ia. Naupu haitu nompamulamo i Yudas mangelo loga nabelo mombadekei i Yesus ka baliNa.

Ana-anaguru i Yesus nompakasadia kande Paskah

Matius 26:17-25; Lukas 22:7-13, 21-23; Yohanes 13:21-30

¹² Nakavamo eo matana Posusa Roti Ledo Noragi, haitumo tempo toYahudi nosambale ana bimba rakande ri posusa Paskah. Eo haitu nakavamo anaguru i Yesus mompekutana, <<Pue, ri umba ponturo rakalau kami mompakasadia kande posusa Paskah ka Komiu?>>

¹³ Jadi nitudu i Yesusmo randua anaguruNa, <<Koimo komiu randua hau ri ngata Yerusalem. Hamai raposintomukamiu saito langgai nanggeni gumba noisi uve. Tuntunimo ia ¹⁴ hau ri banua rapesuana bo ulimo ka tupu nu banua hamai, <I Guru nanguli ivei: ri umba tombi Kupangande kande Paskah mosangganin-gganin ante ana-anaguruKu?> ¹⁵ Bo tupu banua haitu mombatuduaka ka komiu sangu tombi mbaso ri kalangana. Tombi haitu nasiayumo, naria puramo gana. Pasadiamo kande Paskah hamai ka kita.>>

¹⁶ Jadi haumo randua anaguruNa ri kota. Bo nikavara nasimbayu mpuu mpo anu niuli i Yesus ka ira pangane. Nakava hamai, nipasadiaramo kande Paskah Posusa Paskah.

†† taluatu doi salaka, haitumo gaji ntona saito sampae kasaena.

¹⁷ Nabongipa, nakavamo i Yesus nosangani-nggani ante anaguruNa sapulu randua bo hau nesua riaratombi nipompasadia kandeaitu. ¹⁸ Tempo ira da nangande, nangulimo i Yesus ka ira, <<Pariaramo! Saito komiu anu nosangani-nggani nangande nte Yaku hitu, mompobalu Yaku ka baliKu.>>

¹⁹ Nangepe haitu nasusa mpuumo rarara, bo neku-tanamo ira saito-saito nte i Yesus, <<Pue, tantu ledo yaku niuliMiu.>>

²⁰ Nesana i Yesus, <<Iamo mai saito lako ri komiu sapulu randua hitu, anu nombatula roti ri uta nosangani-nggani nte Yaku. ²¹ Yaku, Ana nu Manusia, kana mamate, nangoseaka anu nitulisi riaratombi Buku Gasa. Tapi mandasa mpuu tona mompobalu Yaku! Aginapa ia ledo nipoanaka ntinana.>>

I Yesus nompakatantu ada posusa mombatora Ia

Matius 26:26-30; Lukas 22:14-20; 1 Korintus 11:23-25

²² Tempo ira da nangande, i Yesus nangala roti bo nosambaya nanguli tarima kasi ka Alatala. Naupu haitu nitubiNamo roti haitu pade nidekeiNa ka anaguruNa bo niuliNa, <<Alamo roti hitu bo kandemo, hitumo karoKu.>>

²³ Naupupa haitu nialaNa munimo saboda uve anggur bo niuliNamo tarima kasi ka Alatala, pade nidekeiNa ka anaguruNa. Bo niinura pura-pura.

²⁴ Naupu haitu niuliNamo, <<Hitumo raaKu ngena anu mompakaasa Pojanji nu Alatala nabaru. RaaKu hitu rapatiti ala madea tona rapakasalama. ²⁵ Pariaramo! Domo Kuinu uve anggur hanupa sampe makava tempona bara maipia Alatala moparenta mpo Magau. Ri Poparenta haitumo pade Kuinu uve anggur nabaru.>>

²⁶ Naupu ira nodade sanggayu dade nombatoiya Alatala, nalaimo ira lako ri ngata haitu hau ri Bulu Zaitun.

I Yesus nombaboto i Petrus mombasapu Ia ngena

Matius 26:31-35; Lukas 22:31-34; Yohanes 13:36-38

²⁷ Nangulimo i Yesus ka ana-anaguruNa, <<NisaniKu, moleju pura-pura pomparasayamiu ngena. Apa tesa nu Alatala nitulisi ri Buku Gasa nanguli ivei:

<Kupatesi topoevu bo bimba-bimbana masimpotare.>

Zakharia 13:7

²⁸ Tapi tempo Yaku matuvu mpanjili, Yaku mokolu ka komiu hau ri bagia Galilea.>>

²⁹ Nangulimo i Petrus, <<Naupa ira pura-pura mompalaisi Komiu, yaku ledo moura!>>

³⁰ Pade nangulimo i Yesus ka ia, <<Pariaramo tesaKu hitu! Dopame rombati manu mototoroko bongi hitu, talu-ngganimo iko mombasapu Yaku.>>

³¹ Tapi nangasabia vai i Petrus nanguli, <<Ledo! Nau yaku mamate mosangani ante Komiu, ledo ntoto

kusapu Komiu!>> Bo ivesia muni niuli nu anaguruNa pura-pura ntanina.

I Yesus nosambaya ri Getsemani

Matius 26:36-46; Lukas 22:39-46

³² Nakavamo ira ri pampa nosanga Getsemani. † Nanguli i Yesus ka anaguruNa, <<Ponturomo ri sii. Yaku da hau mosambaya.>> ³³ NikeniNa i Petrus, i Yakobus bo i Yohanes hau mosangani nte Ia. Nasusa bo napari mpuu raraNa. ³⁴ Jadi niulikaNamo ira, <<Nabuku mpuu raraKu, nirasaiKu eva mamatemo. Popea ri siimo bo mainga-inga!>>

³⁵ I Yesus napola haunapa sakide lako nte ira tatalu, pade notungga Ia ri tana bo nosambaya. NiperapiNa ante TuamaNa, ane mamala rakabasaka Ia lako ri preparajea haitu. ³⁶ NiuliNa, <<Tata! Ledo ria anu ledo rapakuleMiu movia. Ane mamala, preparajea anu rapambela ka Yaku hitu nee rapambela ka Yaku! Tapi nee dotaKu majadi, damo aga dotaMiu majadi.>>

³⁷ Naupu haitu nanjilimo i Yesus nte anaguruNa. NikavaNa namonjo puramo ira tatalu. Bo niulikaNa i Simon Petrus, <<Simon! Namonjomo iko? Ledo nipakulemu mainga-inga nau aga sajaa? ³⁸ Komiu kana mainga pura bo mosambaya ala komiu ledo mambela pesori! Komiu madota movia anu nabelo, tapi ledo nipakulemiu sabana komiu manusia nalente.>>

³⁹ Naliu haitu, hau vai Ia nosambaya sangganipa mpo posambayaNa pangane. ⁴⁰ Naupu nosambaya, nanjilimo Ia hau nte anaguruNa. NikavaNa namonjo vaimo ira sabana naroyo gagamo matara. Bo domo nisanira nuapa raulira ka i Yesus.

⁴¹ Tempo i Yesus nanjili katalu-ngganina, nipekutanana vaimo ira, <<Da namonjo bo da nangosanaka pa komiu? Naganamo! Nakavamo gantana Yaku, Ana nu Manusia, radekei riaratombi kuasa tona nadosa. ⁴² Pembangumo! Haumo kita. Peinta! Nakavamo tona mompobalu Yaku!>>

I Yesus nisaka

Matius 26:47-56; Lukas 22:47-53; Yohanes 18:3-11

⁴³ Da notesa i Yesus, nakavamo saito anaguruNa nosanga i Yudas, nituntuni ntodea nanggeni guma bo pato. Ira nitudu nu balengga-balengga ntopanggeni pesomba, guru-guru agama, bo totua-totua ntoYahudi. ⁴⁴ Dopame ira hau, lave nipakatantu i Yudas mamimo tandana ka ira ala rasanira umbana i Yesus. Niulina, <<Tona kueki ngena, Iamo i Yesus. Sakamo bo kenimo Ia bo jagai pakabelo.>>

⁴⁵ I Yudas kaliu-liu nanggaparai i Yesus bo nombatabe Ia nanguli, <<Guru!>> pade niekina. ⁴⁶ Bo todea nikenina nekaparai munimo bo nisakara i Yesus.

⁴⁷ Tapi saito anaguruNa anu napara ri sia, nobitu gu-

† *Getsemani: batuana <<pompea lana zaitun>>. Peinta Matius 26:36.*

mana bo nitimbena batua nu Pakeni nTopanggeni Pesomba, napudu talingana sabingga. ⁴⁸ Nangulimo i Yesus ka todea haitu, <<Nisarumakamiu Yaku topeago sampe komiu kana tumai ante guma bo pato mombasaka Yaku? ⁴⁹ Eo-eo Yaku nompaguru ri doyata Banua nu Alatala bo komiu naria ri sia muni, tapi ledo nisakamiu Yaku! Tapi ivesia mamimo kana majadi ala madupa tesa nitulisi riara Buku Gasa.>>

⁵⁰ Naupu haitu nipalaika nu anaguruNa puramo Ia.

⁵¹ Naria saito kabilasa aga nompake kae linen sabala, nolipa ri puri i Yesus. Todea nombasaka ia, ⁵² tapi nivonjusina kae haitu, bo nangova novuloa.

I Yesus ri ngayo Polibu Mbaso Agama Yahudi

Matius 26:57-68; Lukas 22:54-55, 66-71; Yohanes 18:12-14, 19-24

⁵³ I Yesus nikenira hau ri banua Pakeni nTopanggeni Pesomba. Pura-pura balengga-balengga ntopanggeni pesomba, guru-guru agama, bo totua-totua ntoYahudi lave nasiromu mamimo hamai. ⁵⁴ I Petrus netuntuni nggavao ri puri i Yesus bo todea sampe nesua riara doyata nu banua nu Pakeni nTopanggeni Pesomba. Nakava hamai, nonturomo ia nanderu nosangani-ngani ante topojava.

⁵⁵ Tempo haitu balengga-balengga ntopanggeni pesomba ante pura-pura topolibu ntanina ri Polibu Mbaso Agama Yahudi nompasimbuku mangelo tona mosabi dava ala i Yesus mamala rahuku mate. Tapi ledo ntoto nikavara salaNa. ⁵⁶ Nadea tona nipokiora nosabi dava ka i Yesus, tapi pangadura ledo nasimbayu, saitona sangayana.

⁵⁷ Neanggamo bara sako-ndua tona ntanina nompangadu Ia ivei: ⁵⁸ <<Niepe kami tona hitu nanguli, <Kugerosi Banua nu Alatala hitu anu nipovia mpale manusia, bo riara tempo talu-eo Kubangu banua ntanina anu ledo rapovia mpale nu manusia.>> ⁵⁹ Tapi pangadura haitu muni ledo nasimbayu, aga nosisala ante tesa nu roara.

⁶⁰ Jadi Pakeni nTopanggeni Pesomba neangga ri ngayora pura-pura nompekutana i Yesus ivei: <<Ledo Mupesanaka pangadura?>> ⁶¹ Tapi i Yesus ledo notingo. Nau ledo nasala, Ia ledo ntoto nesana.

Jadi nekutana vai Pakeni nTopanggeni Pesomba, <<Ikomo Magau Topepakasalama, Ana nu Alatala Ni-toiya?>>

⁶² Nesanamo i Yesus, <<Yakumo hia. Bo rakitamiu pura-pura Yaku, Ana nu Manusia, monturo ri pangana nu Alatala toNeliu KakuasaNa, bo rakitamiu Yaku manau riara kulimu lako ri suruga.>> †

⁶³ Nangepe haitu, nagigimo rara nu Pakeni nTopanggeni Pesomba sampe nibitesina mboto baju-na bo nanguli, <<Domo kita paraluu sabi hanupa!

† Mazmur 110:1; Daniel 7:13

⁶⁴ Niepeta mbotomo tesaNa nanjalai Alatala! Berimba pantaseremi?>>

Nesana puramo ira, <<Ia masipato rahuku mate!>>

⁶⁵ Bo naria bara sako-ndua ira nompamula nantoveulusi i Yesus. Ira nombabonggo mataNa bo nombajaguru Ia ante nanguli, <<Heh nabi! Boto vei, isema nombajaguru Iko!>> Bo topojava muni nangala Ia bo nibo-bara.

I Petrus nombasapu i Yesus

Matius 26:69-75; Lukas 22:56-62; Yohanes 18:15-18, 25-27

⁶⁶ Tempo i Petrus da naria ri doyata nu banua haitu, nakavamo saito mombine. Mombine haitu batua Pakeni nTopanggeni Pesomba. ⁶⁷ Nikitana i Petrus nonturo nanderu ri sia. Nikanotosina pakabelo lenje i Petrus bo niulina, <<Iko muni saito tona nomporea i Yesus toNazaret haitu!>>

⁶⁸ Tapi i Petrus nesapu. Niulina, <<Ledo! Ledo nisaniku nuapa niulimu bo ledo muni nisaniku batua ntesamu!>> Naupu haitu nalaimo i Petrus hau ri bobaa banua. Eva nisuka tempona haitu, nototorokomo manu.

⁶⁹ Tempo i Petrus da naria ri sia, nikita nu batua mombine pangane vai ia. Jadi niulinamo ka tona neangga ri sia, <<Langgai haitu muni saito roaNa.>> ⁷⁰ Tapi nesapu vai i Petrus.

Ledo nasae kaliuna haitu, nangulimo tona neangga ri sia ka i Petrus, <<Natantumoko iko muni saito roaNa, apa iko muni toGalilea!>>

⁷¹ Tapi nopinda-pindamo i Petrus. Ia nosumpa bo nanguli, <<Ledo ntoto nisaniku tona niulimu tutu!>>

⁷² Bo eva nisuka, nototorokomo manu karongganina. Bo nitora i Petrusmo tesa i Yesus pangane ka ia nanguli, <<Dopame rombati manu mototoroko, talu-ngganimo iko mombasapu Yaku.>> Jadi nonjodu-njodumo i Petrus notumangi.

I Yesus nikenri ri ngayo Gubernur Pilatus

Matius 27:1-2, 11-14; Lukas 23:1-5; Yohanes 18:28-38

15 Sanggaeo mpisina, pura-pura balengga-balengga ntopanggeni pesomba ante guru-guru agama, totua-totua, bo topolibu ntanina lako ri Polibu Mbaso Agama, nasintuvu bo nosangu patujumo. Nitipungguramo i Yesus pade nikenira hau nte Gubernur Pilatus.

² Nekutanamo i Pilatus nte i Yesus, <<Nakana mpuu Iko Magau ntoYahudi?>>

Nesana i Yesus, <<Nakana niulimiu.>>

³ Balengga-balengga ntopanggeni pesomba nompangadu i Yesus ante mpengaya-ngaya pangadua.

⁴ Bo i Pilatus nekutana vai hanupa nte i Yesus, <<Ledo madota Iko mesana ka tesara? Epemo nadea mpuu

peraira ka Iko.>> ⁵ Tapi i Yesus ledo nesana nau aga sambela sampe nokumaa mpuu rara i Pilatus.

I Yesus nihuku mate, i Barabas rakabasaka

Matius 27:15-26; Lukas 23:13-25; Yohanes 18:39-19:16

⁶ Mpaem-paem ri Eo Mbaso Paskah, kabiasa nu Gubernur nombakabasaka saito tona nitarunggu, nangosea-ka pomperapi ntodea. ⁷ Tempona haitu naria bara sako-ndua tona nitarunggu sabana nompatesi tona tempo nangeva pomarenta. Saito ira nosanga i Barabas. ⁸ Jadi nakavama todea nte i Pilatus nerapi ala rakabasakana ka ira saito tona nitarunggu nangosea-ka kabiasana. ⁹ Jadi nesana i Pilatus, <<Madota komiu ane kukabasaka Magau ntoYahudi ka komiu?>> ¹⁰ Niulina ivesia sabana nisaninamo balengga-balengga ntopanggeni pesomba nanggeni i Yesus ka ia sabana nasiriati.

¹¹ Tapi balengga-balengga ntopanggeni pesomba nompakapane rara ntodea ala i Barabasm rakabasaka ka ira. ¹² Nekutana vaimo i Pilatus nte ira, <<Ane ivesia, nuapa kupovia nte tona hitu anu niulimiu Magau ntoYahudi?>>

¹³ Nongaremo ira, <<Pakumo Ia ri kayu salib!>>

¹⁴ Nekutana vai i Pilatus nte ira, <<Sala nuapa nipoviaNa?>>

Tapi ira aga nantambai nongare ante suara namangga mpuu, <<Pakumo Ia ri kayu salib!>>

¹⁵ I Pilatus madota mompakasana rara ntodea. Jadi nikabasakanamo i Barabas ka ira, bo nitudunamo tantarana mombacambu i Yesus, pade nidekeinamo i Yesus rapatesi rapaku ri kayu salib.

I Yesus nipongei-ngeika nu tantara-tantara

Matius 27:27-31; Yohanes 19:2-3

¹⁶ Tantara-tantara nanggeni i Yesus hau ri tombi potangara riaru banua Gubernur Pilatus. Bo nirondera pura-pura roara masiromu. ¹⁷ Nipasauakara baju magau nakamao ka i Yesus, bo nipoviara muni songgo nu magau lako ri karui bo nipoposonggokara. ¹⁸ Naupu haitu, nipongei-ngeikaramo Ia bo nitabera, <<Tabe, Magau ntoYahudi!>> ¹⁹ Naupu haitu nibobara ntokomo balenggaNa bo nitoveulusiramo. Pade nantaputumo ira ri ngayoNa bo nongei-ngei nombasomba Ia. ²⁰ Naupupa nipongei-ngeikara ivesia, nivonjuramo baju nakamao haitu bo nipopasuakara mpanjili pakeaNa mboto. Pade nikenira hau ri savaliku ngata rapaku ri kayu salib.

I Yesus nipaku ri kayu salib

Matius 27:32-44; Lukas 23:26-43; Yohanes 19:17-27

²¹ Ri tatanga dala, nibarusuramo saito tona nosanga i Simon mombasimbuaka kayu salib i Yesus. I Simon haitu tuama i Aleksander bo i Rufus lako ri ngata

Kirene, bo tempo haitu ia da ri polipana hau ri ngata Yerusalem. ²² Napolamo ira sampe nakava ri ponturo anu niuli <<Golgota,>> batuana <<Bulu Banga Balengga>>. ²³ Ira nombadekei uve anggur anu nigalo ante pakuli mur ka i Yesus, tapi ledo nadota Ia manginuna. ²⁴ Pade nipakuramo Ia ri kayu salib. Naupu haitu niposibagi-bagiramo pakeaNa ante notende lamoro ala matantu isema rakamalakana.

²⁵ Tempo i Yesus nipakura ri kayu salib, nitasere tinti sasio mpadondona. ²⁶ Ri kayu salibNa naria dopi nitulisi anu nipangadu ka Ia ivei:

MAGAU NTOYAHUDI.

²⁷ Naria muni randua topeago nipaku ri kayu salib ntanina nosangani-nggani ante i Yesus, saito ri pang-ganaNa bo saitopa ri panggaiNa. ²⁸ Ivesiamo kadupa tesa nitulisi ri Buku Gasa nanguli, <<Ia nireke tona nadaa.>> †

²⁹ Tona noliu ri sia noundu-undumo balenggara nombadee Ia. Niulira, <<He! Iko madota mombagerosi Banua nu Alatala bo mombabanguna mpanjili riaru talu-eo! ³⁰ Anumo, panaumo lako ri kayu salib tutu bo pakasalama karoMu mboto!>>

³¹ Ivesia muni balengga-balengga ntopanggeni pesomba bo guru-guru agama nombadee Ia. Nosiulikamo ira saito-saito, <<Tona ntanina nipakasalamana. Tapi karoNa mboto ledo namala nipakasalamana! ³² Ane Ia mpuu-mpuu Magau ntoIsrael, Magau Topepakasalama, agina Ia manau lako ri kayu salib ala rakitata bo raparasayata Ia!>>

Bo tona nipaku ri kayu salib ri sinjori i Yesus muni nombadee Ia.

Kamate i Yesus

Matius 27:45-56; Lukas 23:44-49; Yohanes 19:28-30

³³ Natongo eo, njumangu bagia haitu nitaulandana talu-jaa kasaena, nompamula lako ri tinti sapulu randua sampe tinti tatalu nggoviana. ³⁴ Tinti tatalu nggoviana, nongaremo i Yesus ante suara namangga, <<Eloi, Eloi, lama sabakhtani?>> batuana, <<Alatala, TupuKu! Nakuya nipalaisikaMiu Yaku?>> ††

³⁵ Nangepe Ia nongare, nangulimo bara sako-ndua tona ri sia, <<Epe! Ia nompokio Nabi Elia!>> ³⁶ Bo nangovamo saito tona nangala sangaya eva lomo bo nitomena ri uve anggur napoi bo nidikana ri vuntu kayu pade nijujukana ri sumba i Yesus ante nanguli, <<Rapopeata bo rapeintata bara makava mpuu Nabi Elia mantoraka Ia lako ri kayu salib!>>

³⁷ Naupu haitu nongare vaimo i Yesus sangganipa ante suara namangga ntoto bo naponjimo nosaNa.

³⁸ Bo tempo haitu muni, nabitemo kae povombo riaru Banua nu Alatala. Kae haitu nabite rombitemo lako ri bavona sampe ri tambena.

† Peinta Yesaya 53:12. †† Mazmur 22:2

³⁹ Naria balengga ntantara neangga ri ngayo kayu salib i Yesus. Tempo niepena pongare i Yesus bo nikitana kamateNa ivehaitu, nangulimo ia, <<Tona hitu mpuu-mpuu Ana nu Alatala!>>

⁴⁰ Naria muni bara sako-ndua mombine neangga nompeintaka nggavao. Ri tatangara muni naria i Maria Magdalena, i Maria tina i Yoses bo i Yakobus muda. Bo naria muni i Salome. ⁴¹ Iramo mai mombine anu nangoseaka bo nantulungi i Yesus tempo Ia ri bagia Galilea. Bo ri sia nadea muni mombine ntanina anu nosinggani nte Ia hau ri ngata Yerusalem.

I Yesus nitana

Matius 27:57-61; Lukas 23:50-56; Yohanes 19:38-42

⁴² Eo haitu nambela eo pompasadia ka eo penonto, apa mailena eo penontomo. Uru nggovia haitu, ⁴³ nakavamo saito toArimatea nosanga i Yusuf. Ia saito lako ri Polibu Mbaso Agama Yahudi bo nibila ntoodea. Ia muni nantongoraka tempona Alatala moparenta mpo Magau. Ia nompebia hau mantingayo i Pilatus merapi karobata i Yesus. ⁴⁴ Nahera mpuu i Pilatus nangepe i Yesus nasalisa namate. Jadi nirondeba balengga ntantara bo nipekutanana, <<Nakana mpuu i Yesus namatemo?>> ⁴⁵ Niepenapa tesa nu balengga ntantara nanguli namate mpuumo i Yesus, nipaloganamo i Yusuf mangala karobata i Yesus. ⁴⁶ Jadi niali i Yusufmo kae gandisi nalusu raposompu, bo nitaurakana karobata i Yesus lako ri kayu salib pade nisompuna ante kae nialina haitu. Bo nidikana karobata i Yesus haitu ri bolo watu anu nipaa rapodayo. Naupu haitu niduliakanamo sangu watu mbaso rapombatutui vamba dayo haitu. ⁴⁷ Tempo haitu i Maria Magdalena bo i Maria tina Yoses nanggita ponturo nipombaboli karobata i Yesus.

I Yesus natuvu mpanjili

Matius 28:1-8; Lukas 24:1-12; Yohanes 20:1-9

16 Naliupa eo penonto, hau i Maria Magdalena, i Maria tina Yakobus, nosanggani ante i Salome nangali rampa-rampa navangi rakenira rapolanaira karobata i Yesus. ² Bo ri eo Aka mpadondo mpisina, eo paratama minggu haitu dako nebonda eo, hau ri dayomo mombine tatalu pangane. ³ Ri tatanga mpolipara nosimpekutanamo ira, <<Isema mombaduliaka watu potutui dayo haitu ka kita?>>

⁴ Tapi nakavapa ri dayo, nikitara nateduliakamo watu mbaso haitu. ⁵ Pade nesuamo ira riaro bolo watu nipajadi dayo. Nikitara saito kabilasa nobaju bula nonturo ri sabingga ngganara. Natekaja bo naeka mpuu rarara.

⁶ Tapi nangulimo kabilasa haitu ka ira, <<Nee maeka! Nisaniku komiu nangelo i Yesus toNazaret anu namate nipaku ri kayu salib. Ia natuvu mpanjilimo, domo ria Ia

ri sii! Peintamo! Hitu paturu nipombaboli ntona karobataNa. ⁷ Tapi koimo komiu bo uli ka ana-anaguruNa bo ka i Petrus. Ia mokolu ka komiu hau ri bagia Galilea. Hamai rakitamiu Ia nangoseaka anu niuliNa ka komiu bara ipia.>>

⁸ Jadi nesuvumo ira lako ri dayo bo nangova nalai, sabana natekaja bo naeka mpuumo rarara. Ira ledo notesa nuapa-nuapa ka isema-sema sabana naeka.

[Mombine gahaitu hau nte i Petrus bo roa-roana, bo kaliu-liu nitesara pura-pura anu niuli nu kabilasa haitu ka ira. Naupu sia i Yesus nantudu anaguruNa hau ri umba-umba ri dunia lako ri mpanauna sampe ri mpandakena mompatolele Kareba lako nte Alatala anu notesaki katuvua nabelo sampe ri kasae-saena. Kareba haitu nagasa bo ledo nabali-bali sampe ri kasae-saena.]

I Yesus nompopakita karoNa ka i Maria Magdalena bo anaguruNa

Matius 28:9-10; Lukas 24:13-35; Yohanes 20:10-18

⁹ [Eo Aka mpadondona, naliu i Yesus natuvu mpanjili lako ri kamateNa, nipopakitaNamo karoNa ka i Maria Magdalena. I Maria haitumo mombine anu nikabasa-ka i Yesus lako ri kuasa nu seta papitu bara ipia.

¹⁰ Nanggitapa i Yesus, haumo i Maria mosinggava nte roa-roa i Yesus anu da notumangi-mangi sabana nabuku rarara. ¹¹ Tapi tempo niepera tesana nanguli i Yesus natuvu mpanjili bo nikitano Ia, ledo ntoto ni-parasayara tesa haitu.

¹² Naliu haitu i Yesus nompopakita karoNa ante lenje ntanina ka randua roaNa tempo ira nolipa hau ri ngata ntanina. ¹³ Naupu sia, nanjilimo ira randua bo notesa kajadia haitu ka roa-roara ntanina. Tapi roara haitu ledo muni nomparasaya tesara.

I Yesus nompopakita karoNa ka ana-anaguruNa

Matius 28:16-20; Lukas 24:36-49; Yohanes 20:19-23; Suro-suro 1:6-8

¹⁴ Naupu haitu, i Yesus nompopakita karoNa ka sapulu saitopa anaguruNa tempo ira nonturo nangande nosanggani-nggani. NionteakaNa ira sabana nakura pomparasayara bo nakaa bagara sampe ledo nadota nomparasaya tesa nu roara anu nanggita Ia natuvu mpanjili.

¹⁵ NiulikaNa ira, <<Koimo komiu, hau ri njumangu dunia, mompatolele Kareba Belo ka pura-pura tona ri dunia. ¹⁶ Isema-sema ledo momparasaya Kareba Belo haitu, kana rahuku. Tapi isema-sema momparasaya Yaku bo radiu tandana ia topangoseaka Yaku, ia rapakasalama. ¹⁷ Tona momparasaya radekeika kuasa movia kabaraka-kabaraka, evamo mompopalai seta-seta ante kuasaKu. Ira motesa ante basa-basa anu ledo nipegurura. ¹⁸ Ane ira rateo nu ule atau manginu panginu naracu, ledo makuya-kuya ira. Bo radikara

palera ri karo ntona nadua bo tona haitu mabelo-
mo.>>

I Yesus neore hau ri suruga

Lukas 24:50; Suro-suro 1:9-11

¹⁹ Naupu i Yesus notesa ivesia ka ira, neoremo Ia hau
ri suruga bo nonturo ri sabingga nggana nu Alatala.

²⁰ Naupu haitu, haumo ana-anaguruNa nompatolele

Kareba Belo ka tona ri umba-umba, bo Tupu mboto
nokarajaa nosanggani-nggani ante ira. Ia nombadekei
ka ira kuasa movia kabaraka-kabaraka ala mom-
pakaroso tesa nipatolelera haitu.]

19-May-2009@12:42, Backup Descrip-

tion=19-May-2009@09:53, snave -

26-May-2009@11:04, Backup Descrip-

tion=26-May-2009@11:03, B Altork - ❖❖❖

Lukas

Vamba nu Tesa

Buku hitu nitulisi i Lukas. I Lukas hii dokutoro anu nasaro nomporea i Paulus hau ri polipana nompatolele Kareba Belo (Kolose 4:14; 2 Timotius 4:11; Filemon 24). I Lukas nomparesa kajadia-kajadia riara katuvu i Yesus lako nte tona mpuu-mpuu nisanira katuvu i Pue Yesus. Naupu sia nisunju-sunjuna pakabelo, nompamula lako ri pantepuuna sampe i Yesus neore hau ri suruga.

Ri buku hitu i Lukas nombatesa i Yesus Magau Topepakasalama anu nijanji nu Alatala ka toIsrael bo muni ka pura-pura manusia ntanina (2:10,30-32; 3:6; 24:47). Patuju i Yesus makava ri dunia hitu ala mangelo bo mompakasalama tona nasalandala (19:10). Ri Kareba Belo hitu nibacata pepotove i Yesus ka tona napakasi (rapana ri 6:20; 7:22; 14:12-13; 21:1-4) bo ka tona nadosa (rapana 5:30; 7:37-50; 15:1-2). Nikitata muni pepotoveNa ka mombine (rapana 7:11-17; 8:2-3; 10:38-42; 13:10-13; 21:1-4; 23:27-31) bo pepotoveNa ka ngana (rapana: 8:41-42, 54-55; 9:38-42, 46-48; 18:15-17).

Isi nu Buku

Patuju nu buku (1:1-4)

Tesa Pompoanaka i Yohanes Topediu bo i Yesus (1:5-2:52)

Pokarajaa i Yohanes Topediu (3:1-20)

I Yesus nidiu bo nipesori (3:21-4:13)

Pokarajaa i Yesus ri tatanga ntodea ri bagia Galilea (4:14-9:50)

Pokarajaa i Yesus ri polipana hau ri ngata Yerusalem (9:51-19:27)

Minggu kaupuna ri ngata Yerusalem (19:28-23:56)

I Yesus natuvu mpanjili bo neonga nte topangoseaka Ia pade neore hau ri suruga (Pasal 24)

Pantepuuna

1 Teopilus nibilaku:

Nadeamo tona nompasimbuku notulisi nakana sunju pura-pura anu nipovia i Yesus ri tatangata. ² Nitulisira nangoseaka tesa nipatolele ka kita, haitumo tesa ntona nanggita kajadia haitu ante matara mboto lako ri pamulana. ³ Jadi naupu yaku nomparesa pura-pura kajadia haitu pakabelo-belo, nompamula lako ri pantepuuna, nipekiriku nabelopa ane yaku muni motulisi makana sunju ka komiu. ⁴ Nitulisiku buku hitu, ala rasanimiu anu nipatuduki ka komiu mpuu-mpuu nakana.

Pompoanaka i Yohanes Topediu nipopaisani

⁵ Tempo Magau Herodes nomparenta ri bagia Yudea, naria saito topanggeni pesomba ntoYahudi nosanga i Zakharia. Ia mai saito lako ri lunu ntopanggeni pesomba nipoposanga lunu muli i Abia. Bereina nosanga Elisabet. Ia muni muli ntopanggeni pesomba. ⁶ Katuvura njamboko mpuu-mpuu nompakadamba rara nu Alatala, sabana ira njamboko natundu ri pura-pura

parenta bo atura nu Alatala. ⁷ Ira ledo noana sabana Elisabet nagampa, bo ira njamboko muni natuamo.

⁸ Naria sanggani, tempo lunu muli i Abia nanggava lelen, i Zakharia nobago nanggeni pesomba ri Banua nu Alatala. ⁹ Nipoviara lamoro nangoseaka kabiasara, rapompakatantu isema motunju dupa ri ngayo nu Alatala. Lamoro haitu nambela i Zakharia, jadi iamo nesua motunju dupa riara Banua nu Alatala. ¹⁰ Tempo ia da notunju dupa, todea nosambaya ri savalikuna. ¹¹ Tempo haitu saito malaeka nu Alatala neonga nte i Zakharia. Malaeka haitu neangga ri panggana nu meja potunju dupa. ¹² Natekaja bo naeka mpuu rara i Zakharia nanggita malaeka. ¹³ Tapi nanguli malaeka, "Nee maeka, Zakharia. Nitarima nu Alatalamo posambayamu. Bereimu i Elisabet moana saito ngana langgai, bo mupoposanga Yohanes. ¹⁴ Madamba mpuu raramiu bo madea tona ntanina madamba muni tempo ngana haitu rapoanaka. ¹⁵ Ia majadi tomaoge ri panggita nu Alatala. Ia ledo manginu anu nepakalangu. Lako ri pompoanakame, ia rakuasai Nosa Gasa nu Alatala. ¹⁶ Madea toYahudi rakenina mpanjili ka Tupura, Alatala. ¹⁷ Ia majadi suro nu Alatala, naroso bo nakuasa mpo Nabi Elia nggaulu. Ia mompoposinggabelo ana-ana nte tuamara bo tona ledo nangoseaka

Alatala rakenina mpanjili ri dala nakana. Pura-pura anu pangane rapoviana ala mompakasadia rara ntoodea mantarima Alatala.”

¹⁸ Nangepe tesa nu malaeka, nekutanamo i Zakharia, “Berimba kusani anu tutu majadi? Yaku natuamo, bo bereiku natua munimo.”

¹⁹ Nesana malaeka, “Yakumo hii Gabriel. Yaku nasaro nipojoa ri ngayo nu Alatala! Yaku niposumbaNa mompasimbayu kareba belo hitu ka iko. ²⁰ Anu niuliku pangane majadi mpuu ri tempo nipakatantu nu Alatala! Tapi ledo niparasayamu tesaku, jadi domo mamala iko motesa. Iko mabobo sampe rapoanaka anamu!”

²¹ Tempo haitu nadea tona ri savalikuna nompopea i Zakharia. Nahera ira, nakuya nasae gaga ia riaru Banua nu Alatala? ²² Nesuvupa ia, domo namala notesa ka ira. Damo palena niviatkana notesa ka ira, apa ia nabobomo. Nanggita ia nabobomo, nisani ntonamo naria bara nuapa nipeintana riaru Banua nu Alatala.

²³ Naupupa bago i Zakharia ri Banua nu Alatala, nalaimo ia lako ri Yerusalem bo nanjili hau ri ngatana mboto. ²⁴ Ledo sakuya kasaena naliu haitu, natianamo bereina i Elisabet. Lima-mbula kasaena ledo nesuvusuva ia lako rabanuana. ²⁵ I Elisabet nanguli, “Ivesia tano kabelo i Pue nte yaku. Ia nompakalipo eya nu matakulako ri kagampaku.”

Pompoanaka i Yesus nipopaisani ka i Maria

²⁶ Tempo i Elisabet ono-mbulamo katianana, Alatala nantudu malaekana i Gabriel, hau ri ngata Nazaret ri bagia Galilea. ²⁷ Malaeka Gabriel nitudu hau mangulika saito randaa, nosanga i Maria. Randaa haitu notengea nte langgai nosanga i Yusuf, muli Magau Daud. ²⁸ Malaeka haitu neonga ri ngayo i Maria bo nanguli, “Heh, Maria. Iko tona nipotove nTupu! Tupu momporoa iko!”

²⁹ Natekaja i Maria nangepe tesa nu malaeka, bo nipekirina riaru ntaina, “Nuapa batuana tesa haitu?”

³⁰ Nanguli malaeka ka i Maria, “Nee maeka, Maria, sabana naoge belo nidekei nu Alatala ka iko. ³¹ Iko matiana bo mompoanaka saito ngana langgai bo kana mupoposanga Ia i Yesus. ³² Ia rapakaoge nu Alatala bo rakasangai Ana nu Alatala, toNeliu Kaogena. Alatala mompajadi Ia magau mpo totuana nggaulu, Magau Daud. ³³ Ia momparenta toYahudi mpo Magau sampe ri kasae-saena. Bo poparentana haitu ledo maupu-upu.”

³⁴ Nanguli i Maria ka malaeka Gabriel, “Yaku hii da narandaa. Berimba anu tutu majadi ri karoku?”

³⁵ Nesana malaeka, “Nosa Gasu makava nte iko, bo kuasa nu Alatala toNeliu Kaogena, maria nte iko. Haitumo sabana ngana mupoanaka rakasangai Nagasa, Ana nu Alatala. ³⁶ Tora ngena i Elisabet, sampesuvumu. Ono-mbulamo ia natiana. Tano natuamo ia bo niuli

ntona nagampa. ³⁷ Pura-pura anu niuliku ka iko kana majadi, apa ledo ria tesa nu Alatala ledo madupa.”

³⁸ Pade nangulimo i Maria, “Yaku hii batua i Pue, radupaiNamo anu niulimiu tutu ri karoku.” Naupu sia nalaimo malaeka.

I Maria hau mompeinta i Elisabet

³⁹ Ledo nasae kaliuna haitu, haumo i Maria ri sango ngata ri buluna ri bagia Yudea. ⁴⁰ Ia hau ri banua i Zakharia. Tempo ia nesua rabanua, nitabenamo i Elisabet. ⁴¹ Nangepe petabe i Maria, nokalelomo ngana riaru i Elisabet. Bo i Elisabet nipesua Nosa Gasu nu Alatalamo, ⁴² bo notesa ante suara namangga ivei: “Ikomo nipotove nu Alatala nelabipa pade pura-pura mombine ntanina, bo Alatala mompotove ngana mupoanaka.

⁴³ Yaku mpuu-mpuu nibila nu Alatala, apa tina nTupuku nakava ri banuaku mboto. ⁴⁴ Niepekupa petabemu, nadamba ngana riaraku, sampe nokalelo ia. ⁴⁵ Nabelo mpuu iko, sabana niparasayamu anu niuli nTupu ka iko mpuu-mpuu majadi.”

Dade posukuru i Maria

⁴⁶ Nanguli i Maria, “Ante raraku mpuu kutoiya Tupu, ⁴⁷ bo nadamba mpuu raraku, sabana Alatalamo Magau nompakasalama yaku.

⁴⁸ Yaku aga batuaNa napakasi, tapi ledo nalinga raranantora yaku.

Mompamula sii-sii, pura-pura manusia manguli yakumo nipotove nu Alatala.

⁴⁹ Raulira ivesia sabana Alatala toNeliu KakuasaNa, novia anu nabelo ka yaku. Nagasa mpuu Ia!

⁵⁰ Alatala nompoasi tona natundu nte parentana, sampe ri muli nu mulira.

⁵¹ NipoviaNa tanda-tanda nipokumaaka ante kuasaNa bo nipakagarona tona nasombo sampe niara ledo najadi. ⁵² Magau-magau nakuasa nilelakaNa panggara, bo tona naede rara nipakaogena.

⁵³ Tona naara, nipakabosuna sampe nabasa ante mpengaya anu nabelo.

Bo tona nakalumana nipopalaiNa ante pale boa.

⁵⁴⁻⁵⁵ Alatala nantulungi todeana toIsrael, sabana ledo nalinga raranantora pojanjiNa nte Nabi Abraham, totuata nggaulu.

Haitumo, Ia nojanji mompoasi i Abraham ante pura-pura mulina sampe ri kasae-saena.”

⁵⁶ Nitasere talu-mbula kasaena i Maria nonturo nosanggani ante i Elisabet, pade nanjili hau ri banuana mboto.

Pompoanaka i Yohanes Topediu

⁵⁷ Nakavamo tempona i Elisabet moana, nipoanakana saito ngana langgai. ⁵⁸ Tempo roana bo sampesuvuna nangepe kabelo nu Alatala nte i Elisabet, ira pura-pura nadamba sanggani nte ia. ⁵⁹ Nagana valu-eo umuru nu ngana haitu, nakavamo ira mombasuna bo mompoposanga ngana haitu. Ira madota mompoposanga ia i Zakharia, nantuntuni sanga ntua-mana, ⁶⁰ tapi nanguli tinana, "Nemo! Ia kana rapoposanga i Yohanes."

⁶¹ Tapi nanguli ira, "Ledo ria saitoa lako ri sampesuvumiu nosanga Yohanes!" ⁶² Jadi niviatakaramo palera bo nipekutanara i Zakharia, "Isema kakanana rapoposanga ka ngana hitu?"

⁶³ I Zakharia nerapi sampeka vatu tulisi pade nitulisi-na, "Sangana i Yohanes." Nanggita haitu, nokumaa puramo ira. ⁶⁴ Naupu i Zakharia notulisi haitu, kaliu-liu namalamo ia notesa bo nitoiyana Alatala. ⁶⁵ Nanggita kajadia pangane, nokumaa pura-pura tona nonturo ri sia. Bo kareba haitu natolelemo ri njumangata ri bulu ri bagia Yudea. ⁶⁶ Pura-pura tona nangepe anu najadi haitu nompekiri riarantaira, "Majadi nuapa ngana haitu ngena?" Niulira ivesia sabana nikitara kuasa nu Alatala naria ante ngana haitu.

I Zakharia nompasimbayu tesa lako nte Alatala

⁶⁷ Tempo haitu i Zakharia, tuama nu ngana haitu, nikuasai Nosa Gasu nu Alatala sampe nipasimbayuna tesa nTupu ka ira, haitumo anu rapovia nTupu ngena.

⁶⁸ Niulina,

"Ratoyatamo Alatala, Tupu ntoIsrael!

Nakavamo Ia mantulungi kita todea nipelisiNa bo nombakabasaka kita lako ri balita.

⁶⁹ NidekeiNa ka kita saito Magau naroso anu mompakasalama kita.

Magau haitu muli Magau Daud, anu natundu nte parenta nu Alatala nggaulu.

⁷⁰ Alatala notesa ka nabi-nabi nipelisiNa nggaulu, bo nijanjiNa ⁷¹ mompakasalama kita lako ri balita, bo lako ri kuasa ntona nompovuu mata kita.

⁷² NijanjiNa muni mompoasi totuata nggaulu, bo mompakadupa pojanjiNa naroso ka ira.

⁷³⁻⁷⁵ PojanjiNa nggaulu ka totuata i Abraham naroso mpuu.

Alatala nojanji nombakabasaka kita muli i Abraham lako ri balita,

ala kita mamala metupu nte Ia, ante ledo ria ekata.

NijanjiNa ka kita ala mamala kita metupu nte Ia, ante rara magasa bo manoa sampe ri kaupungu ngatuvuta ri dunia."

⁷⁶ Pade nanguli i Zakharia ka anana,

"Iko, anaku, rakasangai nabi nu Alatala toNeliu Kao-geNa, sabana iko majadi suro nTupu.

Iko manguli ka topangoseaka Tupu, ira kana masadia mantarima Ia.

⁷⁷ Iko mompopaisani ka todea nTupu ira rapakasalama ane dosara niampungi nu Alatala.

⁷⁸⁻⁷⁹ Alatala mpuu-mpuu nompoasi kita. Eva mata nu eo nebonda mpadondona mompakareme dunia, ivesia muni peongaNa mompakasalama kita.

Apa Ia makava mompakareme pekiri ntona natuvu ri kalandana bo naeka mamate.

Ia makava mompakasalama kita bo manggeni kita hau ri dala kabelona."

⁸⁰ Ana i Zakharia haitu, kasae-sae kambaso-mbaso karonu bo kanoto-noto rarana. Nambasopa, haumo ia nonturo ranggarava bai, nantongoraka gantana ia mompamula mompatolele tesa nu Alatala ka toYahudi.

Pompoanaka i Yesus

Matius 1:18-25

2 Tempo haitu Magau Mbaso Kaisar Agustus nomparenta ala pura-pura sanga ntona riaraparentana ratulisi riarabuku sensus ri ngata ntotura mboto. ² Sensus pamulana haitu nipovia tempona i Kirenius najadi gubernur ri propinsi Siria. ³ Pura-pura tona hau ri ngata ntotura mboto ala sangara ratulisi riarabuku sensus.

⁴ Ivesia muni i Yusuf. Ia nalai lako ri ngata Nazaret ri bagia Galilea, hau ri ngata Betlehem ri bagia Yudea, ngata pompoanaka Magau Daud, sabana i Yusuf muli Magau Daud. ⁵ I Yusuf hau nosanggani-nggani nte tegeana i Maria anu da natiana, ala sangara ratulisi hamai.

⁶ Tempo ira naria ri ngata Betlehem, nakavamo tempona i Maria moana. ⁷ Ia noanaka saito ngana langgai, ana lumbua. Ngana haitu nibunguna ante kae lampi, pade nidulina riarapotande kanda binata, sabana ledo ria paturu ka ira ri banua pesaira haitu.

Malaeka neonga nte topoevu

⁸ Bongi pompoanaka i Yesus, naria topoevu nojagai bimbara ranggarava napara ngata haitu. ⁹ Sampesani-ka neongamo saito malaeka nu Alatala ri sinjorira, bo reme nu Alatala nombavanta ira. Nanggita haitu naeka mpuu ira. ¹⁰ Tapi nanguli malaeka ka ira, "Nee mae-ka, apa yaku nakava nanggeni kareba belo ka komiu pura-pura, bo kareba haitu mompakadamba pura-pura tona. ¹¹ Bongina hitu ri ngata pompoanaka Magau Daud, nipoanakamo saito magau mompakasalama komiu. Iamo i Pue, anu nipelisi nu Alatala. ¹² Hitumo tandana ala rasaniamiu nakana tesaku; ngana haitu ni-

bungu ante kae lampi bo nidulina ri potande kande binata.”

¹³ Sampesanika nadeamo roa nu malaeka neonga bo nombatoiya Alatala ivei:

¹⁴ “Ratoiyamo Alatala ri suruga! Bo ri dunia, tona nipokonoa nu Alatala manggava katuvua nabelo!”

¹⁵ Naupu haitu malaeka pangane nompalaisi ira bo nanjili hau ri suruga. Nosiunakamo topoevu, “Kaimo, kita hau ri Betlehem manggita anu najadi, anu nitesa i Pue ka kita.”

¹⁶ Ira nompari-mpari hau. Nikavara i Maria bo i Yusuf ante ngana nidulina riaru potande kande binata.

¹⁷ Nikitarapa ngana haitu, nitesaramo anu niuli nu malaeka ka ira, haitumo, anu majadi nte ngana haitu ngena. ¹⁸ Pura-pura tona nangepe tesa ntopoevu pangane nokumaa. ¹⁹ Tapi i Maria nompariara pura-pura anu niepena, bo nitanondoakana. ²⁰ Naupu sia topoevu notingguli hau ri karava nipombolira bimbara. Nitoiyara Alatala, sabana pura-pura anu niepera bo nikitara nakana mpuu nangoseaka anu nitesa malaeka ka ira.

I Yesus nipoposanga

²¹ Nagana valu-eo umuru nu ngana, nipoviaramo ada posuna. Pade nipoposangara ngana haitu i Yesus, nangoseaka tesa nu malaeka ka i Maria, dopame i Yesus nikatianaka ntinaNa.

I Yesus niken napatani ka Alatala

²² Nakavamo tempona, i Yusuf bo i Maria hau ri Banua nu Alatala ri ngata Yerusalem movia ada pompakagasa karo i Maria naupu noana, nangoseaka Atura agama nipapola Nabi Musa. Ngana haitu niken muni hau ri ngata Yerusalem ala rapovia ada popatani Ia ka Alatala. ²³ Haitu nipoviara nangoseaka anu nitulisi ri Buku Atura Agama ivei: “Pura-pura ngana langgai lum-bua, kana rakeni rapatani ka Alatala.” ^{†24} I Yusuf bo i Maria nanggeni pesomba sabana, nangoseaka atura nitulisi ri Buku Atura Agama, ira kana manggeni rombaa tonji togou atau rombaa ana ntonji bangebodo. ^{††}

²⁵ Tempo haitu ri ngata Yerusalem naria langgai nosanga i Simeon. Ia tona nanoa, anu natundu nte parenta nu Alatala bo nantongoraka tempona Alatala mompakasalama todea toIsrael. Nosa Gasa nu Alatala naria nte ia. ²⁶ Nosa Gasa haitu nompopaisani ka ia, dopa ia mamate ane dopa rakitana Magau Topepakasalama anu nijanji nu Alatala. ²⁷ I Simeon nipakeni Nosa Gasa nu Alatala mesua ri Banua nu Alatala. Tempona haitu muni, i Yusuf bo i Maria nanggeni i Yesus ala rapoviaka ada niparenta ri Atura agama ni-

papola Nabi Musa. ²⁸ Jadi niala i Simeon ngana haitu bo nisalungguna pade nitoiyana Alatala, ivei:

²⁹ “Pue, nadupamo pojanjiMiu. Sii-sii yaku, batuaMiu hitu, mamala mamate masana,

³⁰ apa matak mbotomo nanggita Topepakasalama lako nte Komiu

³¹ Iamo Magau Topepakasalama nidekeiMiu ka pura-pura manusia.

³² Iamo reme nombavanta rara ntai manusia pura-pura anu dopa nosisani nte Komiu, ala raparasayara Komiu.

Bo Iamo sabana todeaMiu toIsrael rabila nu manusia pura-pura.”

³³ Nangepe i Simeon nombatesa anu majadi nte Anara haitu, nokumaamo tina tuamaNa. ³⁴ I Simeon nosambaya merapi Alatala mombadekei belo ka ira. Niulikana i Maria, tina nu Ngana haitu, “Ngana hitu mpuu-mpuu nipelisi nu Alatala ala madea toIsrael manavu sabana Ia, tapi madea toIsrael ntanina rapakasalamaNa. Ia majadi tanda lako nte Alatala tapi madea tona mangeva Ia. ³⁵ Ivesiamo rapakalantoNa pekiri rara ntaira. Bo masusa muni raramiu. Peparajeamiu masimbayu mpo guma mantosu rara ntaimiu.”

³⁶ Naria muni saito nabi mombine natua mpuumo. Sangana i Hana, ana i Panuel muli i Asyer. Nagana pitu-mpae ia noberei, ³⁷ natimbalamo ia. Nau natimbalamo, ledo nipalaisina Banua nu Alatala. Eo bongi ia netupu nte Alatala ante nosambaya bo nopuasa. Tempo haitu i Hana noumuru valupulu bo pata-mpaemo. ³⁸ Jadi tempo i Yesus niken ri Banua nu Alatala, eva nisuka, neonga muni i Hana, bo nikitano i Yesus. Jadi nitoiyana Alatala, bo nitesana Ngana haitu ka pura-pura tona nantongoraka tempona Alatala mombakabasaka toYerusalem lako ri balira.

³⁹ Naupu pura-pura anu niparenta nu Alatala riaru AturaNa nipovia i Yusuf bo i Maria, nanjilimo ira hau ri ngata Nazaret ri bagia Galilea. ⁴⁰ Ngana haitu nantambai kambasona, bo nantambai karosona. Napore katauna bo ia nipotove nu Alatala.

I Yesus ri Banua nu Alatala

⁴¹ Mpaempae tina tuama i Yesus hau ri ngata Yerusalem nantuntuni posusa eo mbaso ntoYahudi anu niuli Posusa Paskah. ⁴² Kasapulu-rompaekana umuru i Yesus, haumo ira ri Yerusalem nangoseaka kabiasara. ⁴³ Naliutakapa posusa haitu, notinggulimo tina tuamaNa. I Yesus netiboli ri ngata Yerusalem, tapi ledo nisani ntina tuamaNa. ⁴⁴ Nisarumakara Ia nolipa nosanggani-nggani ante todea. Saeo ntuamo kakavaona polipara haitu, pade nielora i Yesus ri tatanga nu sampesuvura bo vegara. Tapi ledo nikavara i Yesus. ⁴⁵ Jadipa, notingguli vai ira hau ri ngata Yerusalem mompaelo Ia.

† Pesuvu 13:2,12,15 †† Imamat 12:8

⁴⁶ Nagana katalu-mbongina pade nikavara Ia ri Banua nu Alatala. Ia nonturo ri sia nangepe guru agama notesa bo nipekutana-tanaNa ira. ⁴⁷ Pura-pura tona nangepe Ia nokumaa, sabana natau mpuu Ia nesana-ka guru agama. ⁴⁸ Tina tuamaNa muni nokumaa nang-gita ia ri sia. Nanguli tinaNa ka Ia, "Yesus, nakuya Iko nompovia kami ivehitu? Yaku nte tuamaMu nasesa mpuu nompaelo Iko!"

⁴⁹ Nesana Ia, "Nakuya nielokamiu Yaku? Ledo nisanimiu Yaku kana maria ri banua nTuamaKu?" ⁵⁰ Tapi ledo nisani ntina-tuamaNa nuapa batuana pesana i Yesus.

⁵¹ Naupu haitu, notinggulimo i Yesus nosanggani-nggani nte tina tuamaNa hau ri ngata Nazaret, bo natundu nte totuaNa. Pura-pura anu najadi haitu, niboli ntinaNa riarantaina. ⁵² Kasae-sae nantambaimo kambaso i Yesus bo nantambaimo katauNa, bo nantambai nipotove nu Alatala bo manusia.

Tesa i Yohanes Topediu

Matius 3:1-12; Markus 1:1-8; Yohanes 1:19-28

3 Ri kasapulu lima-mpaena poparenta Magau Mbaso Kaisar Tiberius, i Pontius Pilatus najadi gubernur ri bagia Yudea, bo i Herodes noparenta ri bagia Galilea. I Filipus, tuaka i Herodes, noparenta ri propinsi Iturea bo propinsi Trakhonitis, bo i Lisantias noparenta ri bagia Abilene. ² I Hanas bo i Kayafas najadi Pakeni nTopanggeni Pesomba ntoYahudi. Tempo haitu muni i Yohanes, ana i Zakharia, nonturo ri karava bai. Alatala nangulika i Yohanes mompatolele tesaNa ka todea. ³ Jadi, haumo i Yohanes ri bagia napara Binangga Yordan, nompatolele tesa nu Alatala ka pura-pura tona hamai ivei: "Kajeamo lako ri dosa-dosamiu, bo dekeimo karomiu radiu, ala komiu raampungu nu Alatala." ⁴ Papatuduki i Yohanes haitu nompakadupa anu nitulisi riarabuku Nabi Yesaya nggaulu, ivei:

"Naria tona nongare-ngare ri karava bai:
'Domo masae makava i Pue. Pakasadiamo dala ka Ia. Pakanoa dala raoseNa.

⁵ Lembana kana raisi, bulu bo bunti-buntina kana rapakaranano.

Dala noleko-leko kana rapakanoro bo lovu-lovu kana raivu pakarata.

⁶ Pura-pura tona ri njumangu ngata mompeinta Alatala mompakasalama manusia.'"

Yesaya 40:3-5

⁷ Nadea tona neonga mekidu nte i Yohanes. Niu-likana ira, "Komiu noakala nasimbayu mpo ule! Nisaru-makamiu ane komiu radiu, komiu ledo rapambela pehuku nu Alatala bara maipia! Haitu ledo nakana! ⁸ Ane komiu mpuu-mpuu majea, popakitamo ante pokainggu nabelo. Nee rapekimiu, 'Kita hii muli Nabi Abraham, jadi pehuku nu Alatala ledo rapambela ka kita! Haitu muni ledo nakana! Kuuli ka komiu, ane Alatala

madota, nau vatu-vatu hitu mamala rapajadiNa muli i Abraham. ⁹ Pehuku nu Alatala nasimbayu mpo baliu, nasadiamo rapotovo kayu sampe ri kalena ane ledo naria vuana nabelo. Kayu ledo nabelo vuana haitu ratovosi bo ratedaka ri mata nu apu."

¹⁰ Pade nekutana todea, "Ane ivesia, nuapa masipato rapovia kami?"

¹¹ Nesana i Yohanes, "Tona rontonga bajuna, kana radekeina santonga ka tona ledo ntoto naria bajuna. Tona nokandea kana radekeina sanu ka roana ledo riekandea."

¹² Naria muni topesingara balasitee nakava mekidu nte i Yohanes bo nekutana, "Guru, nuapa masipato rapovia kami?"

¹³ Nesana i Yohanes, "Nee raperapimiu melabi lako ri kadea balasitee nipakatantu pomarentamiu."

¹⁴ Naria muni tantara-tantara nakava nekutana nte i Yohanes, "Berimba nte kami? Nuapa masipato rapovia kami?"

Nesana i Yohanes, "Tumo momparangga tona bo nee raagosimiu doina. Nee raelomiu nelabi lako ri gajimiu. Naganamo gajimiu."

¹⁵ Tempo haitu todea nompekutana-tana bara i Yohanes hitumo Magau Topepakasalama nijanji nu Alatala, anu nipopeara. ¹⁶ Nisani i Yohanes pompekirira. Jadi niulikana ira pura-pura, "Yaku mombadiu komiu ante uve, tandana najeamo komiu. Tapi da nari-apa saito ngena meonga nelabipa kakuasaNa pade yaku. Naogepa Ia pade yaku sampe nau mombavole lui nu sapatuNa, ledo masipato yaku. Ia mombadiu komiu ante Nosa Gasa, bo apu. ¹⁷ Ia nasimbayu mpo tona novaro pae. Nasadiamo Ia ante tapi ri paleNa mombavaro pura-pura paena sampe magasa. Pae naisi raboliNa riaragampiri, tapi meena rapalabusiNa ri mata nu apu ledo mapaya-paya." ¹⁸ Ivesiamo i Yohanes nompatuduki tona bo mpengaya-ngaya pepatuduki nipakena tempo nompatolele Kareba Belo.

¹⁹ Naria sanggani i Yohanes nangonteaka Magau Herodes anu noparenta ri bagia Galilea, sabana mpengaya-ngaya anu nadaa nipoviana. Nionteakana apa i Herodes nangala i Herodias bo nipobereisina. I Herodias erana mboto, berei ntuakana. ²⁰ Tapi Magau Herodes ledo najea, ia aga nantambai kadaana bo nitarungguna i Yohanes.

I Yesus nidiu

Matius 3:13-17; Markus 1:9-11; Yohanes 1:29-34

²¹ Dopame i Yohanes nisuaraka riarantarunggu, naria saeo ia nombadiu todea. Naupu todea nidiuna, i Yesus muni nidiuna. Tempo i Yesus nosambaya, natebukamo langi ²² bo Nosa Gasa nolenje mpo tonji banggebodo, netuu nte Ia. Pade naria suara lako ri su-

† Mombadiu nte apu: apu haitu nirapaka apu pehuku nu Alatala, atau kuasa Nosa Gasa anu nompegasa kita ala domo movia dosa.

ruga nanguli, "Ikomo AnaKu nipotoveKu. Ikomo nom-pakadamba raraKu."

Tutura muli ntotua i Yesus

Matius 1:1-17

²³ Tempo i Yesus nompamula pokarajaaNa, umuruNa nitasere talupulu mpaemo. Nangoseaka panggava ntodea, Ia ana i Yusuf,

Yusuf ana i Eli; ²⁴ Eli ana i Matat;
Matat ana i Lewi; Lewi ana i Malkhi;
Malkhi ana i Yanai; Yanai ana i Yusuf;
²⁵ Yusuf ana i Matica; Matica ana i Amos;
Amos ana i Nahum; Nahum ana i Hesli;
Hesli ana i Nagai; ²⁶ Nagai ana i Maat;
Maat ana i Matica; Matica ana i Simeii;
Simeii ana i Yosekh; Yosekh ana i Yoda;
²⁷ Yoda ana i Yohanan; Yohanan ana i Resa;
Resa ana i Zerubabel; Zerubabel ana i Sealtiel;
Sealtiel ana i Neri; ²⁸ Neri ana i Malkhi;
Malkhi ana i Adi; Adi ana i Kosam;
Kosam ana i Elmadam; Elmadam ana i Er;
²⁹ Er ana i Yesua; Yesua ana i Eliezer;
Eliezer ana i Yorim; Yorim ana i Matat;
Matat ana i Lewi; ³⁰ Lewi ana i Simeon;
Simeon ana i Yehuda; Yehuda ana i Yusuf;
Yusuf ana i Yonam; Yonam ana i Elyakim;
³¹ Elyakim ana i Melea; Melea ana i Mina;
Mina ana i Matata; Matata ana i Natan;
Natan ana i Daud; ³² Daud ana i Isai;
Isai ana i Obed; Obed ana i Boas;
Boas ana i Salmon; Salmon ana i Nahason;
³³ Nahason ana i Aminadab; Aminadab ana i Admin;
Admin ana i Arni; Arni ana i Hezron;
Hezron ana i Peres; Peres ana i Yehuda;
³⁴ Yehuda ana i Yakub; Yakub ana i Ishak;
Ishak ana i Abraham; Abraham ana i Terah;
Terah ana i Nahor; ³⁵ Nahor ana i Serug;
Serug ana i Rehu; Rehu ana i Peleg;
Peleg ana i Eber; Eber ana i Salmon;
³⁶ Salmon ana i Kenan; Kenan ana i Arpakhsad;
Arpakhsad ana i Sem; Sem ana i Nuh;
Nuh ana i Lamekh; ³⁷ Lamekh ana i Metusalah;
Metusalah ana i Henokh; Henokh ana i Yared;
Yared ana i Mahalaleel; Mahalaleel ana i Kenan
³⁸ Kenan ana i Enos; Enos ana i Set;
Set ana i Adam; Adam ana nu Alatala.

I Yesus nipesori Magau nu Seta

Matius 4:1-11; Markus 1:12-13

4 Naupu i Yesus nidiu, Ia nikuasai Nosa Gasa nu Alatala. Ia nompalaisi Binangga Yordan, pade nikeni Nosa Gasa hau ranggarava bai. ² Patapulu-mbongi kasaena Ia nonturo sumai bo nipesori Magau

nu Seta. Patapulu-mbongi Ia sumai ledo ria nuapa-nu-apa nikandeNa sampe naara mpuu taiNa.

³ Nanguli Magau nu Seta ka Ia, "Ane Komii mpuu-mpuu Ana nu Alatala, tudumo vatu hitu majadi kan-dea!"

⁴ Nesana i Yesus, "Naria nitulisi riaru Buku Gasa ivei: 'Ledo aga kande mompakatuvu manusia.' †"

⁵ Naupu haitu nikenina vai i Yesus hau ri bulu nalan-ga. Aga sampida mata nipopakita Magau nu Setamo ka i Yesus pura-pura kamagauana ri dunia. ⁶ Pade nanguli Seta ka i Yesus, "Kuasa mompamenta pura-pura kamagaua, bo pura-pura kakalumanara kudekei ka Komii, sabana pura-pura hitu yaku tupuna bo namala kudekei ka isema-sema kupodota. ⁷ Pura-pura majadi bagiaMiu ane rasombaMiu yaku."

⁸ Pade nesana i Yesus, "Riaru nu Buku Gasa nitulisi ivei: 'Komii kana mombasomba Alatala, Tupumii. Aga Iamo masipato rapetupumii.' ††"

⁹ Naupu haitu nikeni Magau nu Seta vaimo i Yesus hau ri ngata Yerusalem bo nituuna ri vumbu Banua nu Alatala pade niulina, "Ane Komii mpuu-mpuu Ana nu Alatala, potingganavumo Komii lako rahitu. ¹⁰ Ledo makuya Komii, sabana riaru Buku Gasa nitulisi ivei: 'Alatala mombatudu malaekana mombasaliku Komii. ¹¹ Ratandera mpale Komii ala nau kadaMiu ledo mam-bela vatu.' ††"

¹² Nesana i Yesus, "Naria Tesa nu Alatala nanguli ivei: 'Nee mupesori Alatala, Tupumu.' ††"

¹³ Naupu Magau nu Seta nompesori i Yesus ante mpengaya akala, nipalaisinamo i Yesus bo nantongo-raka loga mabelo mompesoriNa mpanjili.

I Yesus nompamula pokarajaaNa ri bagia Galilea

Matius 4:12-17; Markus 1:14-15

¹⁴ Naupu sia i Yesus nikuasai Nosa Gasa bo noting-gulimo Ia hau ri bagia Galilea. Tona ri umba-umba ngata hamai notesaki anu nipovia i Yesus. ¹⁵ Ia nompaguru ri banua petupu ntoYahudi bo pura-pura tona nombatoiya Ia.

I Yesus ledo nitarima ri ngata Nazaret

Matius 13:53-58; Markus 6:1-6

¹⁶ I Yesus hau ri Nazaret, ri ngata pompakambaso Ia. Nangoseaka kabiasana ri eo penonto, Ia nesua ri banua petupu, bo neangga nombabaca isi Buku Gasa.

¹⁷ Buku Nabi Yesaya nidekei ka Ia. NitimpaNa, nika-vaNa bagia hitu pade nibacana ivei:

¹⁸ "Nosa Gasa nu Alatala naria nte Yaku, sabana Iamo nompelisi Yaku manggeni Kareba Belo ka tona napakasi.

Ia nompesumbu Yaku mangulika tona nitavani, rak-abasaka.

† Ulangan 8:3 †† Ulangan 6:13 † Mazmur 91:11-12 †† Ulangan 6:16

NituduNa Yaku mangulika tona naburo, mamala mekita mpanjili.

NituduNa Yaku mombakabasaka tona nipobatusa.

¹⁹ NituduNa muni Yaku mompasimbayu ka komiu kakava nu Alatala mompakasalama todeaNa."

Yesaya 61:1-2

²⁰ Naupu nibacana, nitutuiNamo bo nipopanjiNamo ka topojava ri sia. Naupu haitu nonturomo Ia bo pura-pura tona riana banua petupu haitu nompeintaka Ia, mangepe anu rauliNa. ²¹ I Yesus nompamulamo nompatuduki ira. NiuliNa, "Anu nibacaKu pangane, dako nipakadupa eo hitu ante peongaKu."

²² Pura-pura tona ri sia nokumaa nangepe Ia, sabana nabelo mpuu anu niuliNa. Niulira, "Nabelo mpuu anu nitesaNa! Berimba bo mamala Ia motesa ivehaitu? Ia aga ana i Yusuf!"

²³ Nanguli i Yesus ka ira, "Natantu raulimiu porapa hitu ka Yaku: 'Dokutoro, pakabelo karomu mboto. Ane Komiu mpuu-mpuu nabi, popakitaMiu muni kabarakaMiu ri ngataMiu mboto mpo anu niepe kami nipoviaMiu ri ngata Kapernaum.' ²⁴ Pariaramo tesaKu hitu! Ledo ria saitoa nabi nipakaoge ntona ri ngatana mboto! ²⁵ Tora anu najadi tempo Nabi Elia nggaulu. Talu-mpae santanga kasaena kapane nu eo, ledo ria uda, najadimo kaara mpai neliu gantana ri njumangata. Tempo haitu nadea timbala ri ngata ntoYahudi.

²⁶ Naupa ivesia, Nabi Elia ledo nitudu nu Alatala hau mantulungi timbala ntoYahudi. Aga nituduNa hau ri ngata Sarfat napara ngata Sidon mantulungi saito timbala ledo toYahudi. ²⁷ Ivesia muni najadi tempo Nabi Elisa natuvu, nadea toYahudi nadua oge. Tapi ledo naria saitoa toYahudi nipakabelo Nabi Elisa. Aga i Naaman toSiria nipakabelona. Sia sampe niuliKu, ledo ria saitoa nabi nipakaoge ntona ri ngatana mboto!"

²⁸ Nieperapa tesa i Yesus, narau mpuu rara ntona riana banua petupu haitu. ²⁹ Jadi neangamo ira nompopalai i Yesus mesuvu lako ri ngatara, bo nikenira Ia hau ri tinggi nu bingge nipongatara haitu. Patujura mombajunuaka Ia lako ri tinggi bingge langa haitu.

³⁰ Tapi i Yesus noliu ri tatangara, bo kapola-pola nalai.

I Yesus nompakabelo tona nipesua nu seta

Markus 1:21-28

³¹ I Yesus hau ri ngata Kapernaum ri bagia Galilea. Ri sia Ia nompaguru ri banua petupu ri eo penonto.

³² Nokumaa pura ira ri sia nangepe pepatudukiNa, apa Ia notesa mpo tona nakuasa. ³³ Riana banua petupu haitu, naria saito langgai nipesua nu seta. Ia nongare ante suara namangga, ³⁴ "He, Yesus, toNazaret! RakuyaMiu kami? Komiu nakava mompakaropu kami? Nisaniku isema Komiu. Komiumo ToGasa nitudu nu Alatala!"

³⁵ I Yesus nanguli ka seta haitu, "Kalinomo! Palaimo lako ri karo ntona hitu!" Seta haitu nombadungganaka

tona haitu ri tatanga ntodea bo nalaimo ia, bo ledo nipakaduana.

³⁶ Nanggita kajadia pangane nokumaa puramo tona ri sia, bo notesamo ira, "Natantu mpuu tesa ntona haitu! Ante kuasaNa nipopalaiNa seta, bo nalai mpuumo!"

³⁷ Naupu haitu natolelemo kareba i Yesus ri njumangu bagia haitu.

I Yesus nompakabelo nadea tona anu nadua

Matius 8:14-17; Markus 1:29-39

³⁸ Nesuvumo i Yesus nompalaisi banua petupu haitu, hau ri banua i Simon. Matua i Simon mombine nakokora ntamo bo tona hamai nerapi ala i Yesus mantulungi ia. ³⁹ Jadi hau i Yesus neangga ri sinjori mombine haitu, pade nipopalaiNa dua kokora haitu. Jadi nabelo mpuumo matua i Simon, bo kaliu-liu nembangu ia hau mombakadambanaka ira.

⁴⁰ Nasolo eo, nadeamo tona nanggeni roara nadua mpengaya ka i Yesus. Jadi i Yesus nombadika paleNa ri karo ntona saito-saito, bo nompakabelo ira.

⁴¹ NipopalaiNa muni seta lako ri tona nipesua nu seta. Seta-seta haitu nesuvu bo nongare-ngare, "Komiu Ana nu Alatala!"

Tapi i Yesus nangulika seta-seta haitu, "Kalino!" Ledo nidekeiNa ira notesa, sabana nisanira Iamo Magau Topepakasalama anu nijanji nu Alatala.

⁴² Sanggaeona nalaimo i Yesus lako ri ngata haitu hau ri kalinona. Todea nangelo Ia sampe nikavara. Nipasimbukura nompataeta i Yesus ala Ia ledo nompalaisi ngatara.

⁴³ Tapi nanguli i Yesus ka ira, "Yaku niposumba nu Alatala mompatolele Kareba Belo ka todea. Jadi Yaku kana hau muni ri ngata ntanina mompatolele Kareba Belo anu notesaki Poparenta nu Alatala."

⁴⁴ Jadi haumo Ia mompatolele Kareba Belo ri banua petupu ri njumangata ri bagia Yudea.

I Yesus nompakabita kabarakaNa ri tinggi Rano Genesaret

Matius 4:18-22; Markus 1:16-20

5 Naria sanggan i Yesus neangga nompaguru ri tinggi Rano Genesaret. Nadea tona nosiaso madota mangepe tesa nu Alatala. ² NikitaNa randua sakaya ri bivi rano. Tempo haitu topompemala bau nanaumo lako ri sakayara bo notoposi jalara. ³ I Yesus hau nesavi sakaya, haitumo sakaya i Simon, bo nituduNa i Simon mombasoro sakaya haitu makavao sakide lako ri bivi rano. I Yesus nonturo riana sakaya, bo lako ranjakaya Ia nompaguru todea.

⁴ Naupu Ia nompaguru todea, niulikaNamo i Simon, "Vose hau ri kandalana sakidepa sakayamiu pade tendeaka jalamiu mosaka bau."

⁵ Nesana i Simon, "Guru, sambongi ntuamo kami nompemala bau tapi nau sambaa ledo ntoto naria nikava kami. Tapi apa Komiu netudu, jadi ratendeaka kami sangganipa jala mompemala bau." ⁶ Jadi naupu nitendeakara jalara pangane, nadea mpuu bau nikavara. Naponu jalara, sampe jalara nompamula mabite. ⁷ Sabana haitu, ira nekitulungi nte roara ri sakaya ntanina, "Kamai ruru, le! Tulungimo kami!" Nakavamo roara bo nosanggani-nggani nombakosini bau riar sakaya randua haitu. Naponu pura sakaya randua nikosinira bau sampe sakaya sakidepa natala.

⁸ Tempo i Simon Petrus nanggita haitu, nantaputumo ia ri ngayo i Yesus bo nanguli, "Nee mapara nte yaku, Pue, apa yaku tona nadosa!" ⁹ Niulina ivesia sabana ia ante roana nokumaa mpuu nanggita kadea nu bau namala nijalara. ¹⁰ Ivesia muni roa i Simon, haitumo i Yakobus bo i Yohanes, ana i Zebedeus.

Nanguli i Yesus ka i Simon, "Nee maeka. Komiu topebau mami, tapi nompamula sii-sii komiu mompaelo tona bo mompatuduki ira mangoseaka Yaku."

¹¹ Naupu nangepe tesa i Yesus, nikeniramo sakaya randua haitu hau ri kabatana. Pade nipalaisira purapuramo anura bo hau nioseakara i Yesus.

I Yesus nompakabelo saito langgai nadua oge

Matius 8:1-4; Markus 1:40-45

¹² Naria sanggani i Yesus ri sangu ngata. Ri ngata haitu naria saito langgai nadua oge njumanggaro. Nikitanapa i Yesus, notunggammo ia sampe ri tana ri ngayo i Yesus bo mpuu-mpuu nerapi, "Pue, ane mado-ta Komiu, Komiu nompakule mompakabelo yaku."

¹³ Nangepe tesa ntona haitu, i Yesus nombadika paleNa ri karo ntona haitu bo nanguli, "Madota Yaku. Mabelomo iko!" Kalii-liu nabelo mpuumo tona haitu.

¹⁴ I Yesus nombatagi tona haitu, "Nee mutesa ka tona anu najadi ri karomu. Koimo hau nte topanggeni pesomba bo popakitamo karomu ka ia ala rakitana nabelomo karomu. Bo dekeimo pesombamu ka Alatala nangoseaka parenta Nabi Musa, ala mompopakita ka todea iko mpuu-mpuu nabelomo."

¹⁵ Tapi kareba povia i Yesus natolele ri umba-umba sampe nadea mpuu tona neonga mangepe tesaNa bo nekipakabelo. ¹⁶ Tapi i Yesus nasaro hau ri kalinona nosambaya.

I Yesus nompakabelo langgai napunggu

Matius 9:1-8; Markus 2:1-12

¹⁷ Naria sanggani i Yesus nompaguru bo naria bara sako-ndua toFarisi ante guru agama nonturo ri sia nangepe Ia. Ira lako ri mpengaya-ngaya ngata ri bagia Galilea bo Yudea bo lako ri ngata Yerusalem muni. Alatala nombadekei kuasa ka i Yesus mompakabelo tona nadua. ¹⁸ Tempo haitu bara sako-ndua tona nom-

bakova topunggu naturu ri ompa. Nipasimbukura manggeni topunggu haitu hau mesua rabanua bo ratuu ri ngayo i Yesus. ¹⁹ Tapi ledo nipakulera nesua, sabana nosimpai gaga tona ri sia. Jadipa nikeniramo topunggu haitu hau nompene ri bavo nu ata ntalumbu. Nibonggara ata haitu pade niulura topunggu ante ompana hau ri ngayo i Yesus ri tatanga ntodea. ²⁰ I Yesus nanggita karoso pomparasayara, jadi niuli-Namo, "Sampesuvu, dosamu niampungimo."

²¹ Nangepe haitu guru agama bo toFarisi ri sia nompékiri, "Isema ntoto tona hitu sampe nabia nompasimbayu karoNa nte Alatala! Ledo ria manusia nompakule mombaampungi dosa manusia, aga Alatala!"

²² Nisani i Yesus pekiri nu guru agama bo toFarisi haitu. Jadi niulikaNa ira, "Nakuya komiu nompékiri ivesia riar ntaimiu?" ²³ Ledo nakaja manguli 'Dosamu niampungimo.' Nakajapa manguli 'Peanggammo bo polipamo!' ²⁴ Tapi Kupopakita ka komiu Yaku, Ana nu Manusia, nakuasa mombaampungi dosa manusia ri dunia." Pade nituduNa topunggu haitu, "Peanggammo, alamo ompa paturumu bo potinggulimo!"

²⁵ Nangepe haitu, neangga mpuumo topunggu ri ngayo ntodea. Nialanamo ompa paturuna bo nanjili hau ri banuana nantoiya Alatala.

²⁶ Nanggita haitu, ira pura-pura nokumaa mpuu bo nitoyara Alatala. Naeka munimo rarara bo niulira, "Nabaraka mpuu kajadia nikitata eo hitu!"

I Yesus nangulika i Lewi mangoseaka Ia

Matius 9:9-13; Markus 2:13-17

²⁷ Naliu haitu, i Yesus nesuvu lako ri banua bo nikitana saito topesingara balasitee nosanga i Lewi, nonturo riar kantor topesingara balasitee. I Yesus nangulika ia, "Oseakamo Yaku!" ²⁸ Nangepe haitu neanggammo i Lewi bo nipalaisinamo pura-pura bagona bo hau nioseakana i Yesus.

²⁹ Naupu sia, i Lewi novia posusa ka i Yesus ri banuana. Nadea topesingara balasitee ante tona ntanina nangande nosanggani-nggani nte ira ri posusa haitu.

³⁰ Naria bara sako-ndua toFarisi ante guru agamara. Ledo nadamba rarara nanggita i Yesus hau ri posusa. Niulikara topangoseaka i Yesus, "Nakuya komiu nangande bo nanginu nosanggani-nggani ante topesingara balasitee bo tona nadosa?"

³¹ Nesana i Yesus, "Tona ledo nadua, ledo paraluu rapakulisi nu dokutoro, aga tona nadua. ³² Ivesia muni Yaku. Yaku ledo nakava mompokio tona nanao, tapi mompokio tona nadosa majea lako ri dosara."

† Ledo nakaja manguli 'dosamu niampungimo' apa ledo rakita ntona bara majadi bara ledo. Tapi ane rauli 'peanggammo bo polipamo' rakita ntona bara majadi mpuu bara ledo.

Anaguru i Yesus ledo nopuasa ane da naria Ia nte ira

Matius 9:14-15; Markus 2:18-20

³³ ToFarisi ante guru-guru agama pangane nanguli ka i Yesus, "Anaguru i Yohanes nasaro nopuasa † bo nosambaya. Ivesia muni anaguru ntoFarisi. Tapi anaguruMiu aga nangande bo nanginu. Nakuya ira ledo nopuasa?"

³⁴ Nanguli i Yesus ka ira, "Ane da naria boti langgai ri posusa ponika, ledo masipato torata mopuasa. ³⁵ Tapi makava tempona boti langgai raala lako nte ira. Tempo haitu pade mopuasa ira."

Porapa: ledo nabelo pepatuduki i Yesus ragalo nte ada agama Yahudi

Matius 9:16-17; Markus 2:21-22

³⁶ Naliu haitu naria porapa niuli i Yesus ka ira. Niulina, "Ledo ria tona mombabitesi baju nabaru bo raalana sambite ratampalakana baju naranta. Apa ane ivesia, tantu baju nabaru haitu mabite, bo kae nipotampala haitu ledo muni mabelo rakita ri baju ranta. ³⁷ Ivesia muni ante uve anggur. Ledo ria tona mombaisi uve anggur nabaru ri pomboli njae ††, apa uve anggur nabaru morende mompakapasa pombolina. Ane mapasa pombolina, mabubusaka sanggani uve anggur. Jadi mageromo pombolina bo marugimo uve anggur. ³⁸ Kakanana, uve anggur nabaru kana raboli ri pomboli nabaru muni. ³⁹ Maupu manginu uve anggur njae ledo rapokono ntona manginu uve anggur nabaru, sabana raulira, 'Narasapa uve anggur njae.'"

I Yesus notesa eo penonto

Matius 12:1-8; Markus 2:23-28

6 Naria saeo, nambela eo penonto, i Yesus ante ana-anaguruNa noliu ri talua gando. Ana-anaguruNa nokaleti gando, nitiera bo niontara. ² Nanggita poviara haitu, bara sako-ndua toFarisi ri sia nangonteaka ira, "Nakuya komiu nombaliunaka atura agamata? Nitagi nu agama mokarajaa ri eo penonto!"

³ Nesana i Yesus, "Dopa nibacamiu anu nipovia Magau Daud nggaulu? Tempo ia ante roa-roana naara taira, ⁴ ia nesua riara Banua nu Alatala bo nialana roti nipesomba ka Alatala. Nikandena roti haitu bo nidekeina muni ka roana. Kakanana, nangoseaka atura agamata, aga topanggeni pesomba masipato mangande roti haitu. *Tapi naupa ivesia, i Daud ledo nislai.*³⁵ *Bo ledo muni masipato komiu mombasalai*

† ToYahudi nopuasa tandana nanjoso rarara bo ala mompakaede rarara ri ngayo nu Alatala. †† Pomboli uve anggur nipake ntoYahudi nggaulu nipovia lako ri kuli binata. Ane nasaemo, kuli haitu najadi nakaa bo domo nagini. ‡ Haitu najadi dopame i Daud najadi magau. Peinta 1 Samuel 21:1-6.

Yaku, Ana nu Manusia. Yaku nakuasa manguli nuapa masipato rapovia ri eo penonto."

I Yesus nompakabelo pale ntona nakoyo sabingga

Matius 12:9-14; Markus 3:1-6

⁶ Ri eo penonto ntona, i Yesus hau nompaguru ri banua petupu ntoYahudi. Ri sia naria saito tona nakoyo pale ngganana. ⁷ Bara sako-ndua guru agama ante toFarisi nangganotosi i Yesus pakabelo-belo ala rakitara bara mompakabelo tona nadua haitu Ia ri eo penonto. Ira madota mangelo sala i Yesus rapangadura. ⁸ Tapi nisaniNa pekirira. Jadi niulikaNa tona nakoyo palena haitu, "Kaimo, peangga ri sii!" Bo hau mpuumo tona haitu neangga ri sia. ⁹ I Yesus nekutana nte ira pura-pura, "Nangoseaka atura agamata, nuapa nipaloga ka kita rapoviata ri eo penonto? Movia anu nabelo atau movia anu nadaa? Mantulungi tona atau mompatesi?" ¹⁰ Naupu i Yesus nanguli ivesia, neilimo Ia nangganoto pura-pura tona ri sia, pade niulikaNa tona nakoyo palena, "Odomo palemu!" Niodona palena, nabelo mpuumo.

¹¹ Nanggita haitu nagigi mpuu rara nu guru-guru agama bo toFarisi haitu. Jadi nolibu ira nuapa mamala rapoviara nte i Yesus.

I Yesus nompelisi sapulu randua anaguruNa

Matius 10:1-4; Markus 3:13-19

¹² Tempo haitu, i Yesus ante topangoseaka Ia hau nantende ri bulu. Nakava sumai Ia nosambaya ka Alatala njambongi ntua. ¹³ Naeo mpadondo, nipasiromuNa puramo tona nangoseaka Ia, pade nipelisiNa sapulu randua lako nte ira majadi anaguruNa, ala ira mompapola tesa nu Alatala ka todea. ¹⁴⁻¹⁶ Tona nipelisiNa haitu iamo:

i Simon nidaeNa i Petrus,
i Andreas tuei i Simon,
i Yakobus,
i Yohanes,
i Filipus,
i Bartolomeus,
i Matius,
i Tomas,
i Yakobus ana i Alfeus,
i Simon lako ri partai Zelot, *haitumo partai Maradeka ntoYahudi,*
i Yudas ana i Yakobus, ante
i Yudas Iskariot, anu nompobalu i Yesus.

I Yesus nompatuduki bo nompakabelo tona nadua

Matius 4:23-25

¹⁷ Naupu i Yesus nompelisi anaguruNa, notuamo Ia nosanggani-nggani ante ana-anaguruNa lako ri bulu haitu. Tempo ira natudu ri lembana, nadea mpuu

topeoseaka ntanina nompopea ri sia bo nadea muni tona neonga lako ri umba-umba ri bagia Yudea, lako ri ngata Yerusalem, lako ri ngata Tirus bo Sidon ri tinggi ntasi. ¹⁸ Ira nakava mangepe tesa i Yesus bo rapakabeloNa. Tona nipesua nu seta nakava muni bo nipakabeloNa. ¹⁹ Nadea tona nompasimbuku manggabe karo i Yesus sabana naria kuasa nu Alatala nesuvu lako nte Ia anu nompakabelo pura-pura ira.

Tona mabelo bo tona mandasa

Matius 5:1-12

²⁰ I Yesus nangganoto ana-anaguruNa bo niulikaNa, "Nabelo mpuu komiu tona napakasi, sabana komiu-mo majadi todea riaru Poparenta nu Alatala.

²¹ Nabelo mpuu komiu anu naara sii-sii, sabana komiu rapakabosu.

Nabelo mpuu komiu nasusa rara sii-sii, sabana raramiu rapakasana.

²² Nabelo mpuu komiu ane rapovuu mata ntona, rasuko ntona, rasalai ntona bo sangamiu rapakadaa ntona sabana komiu nangoseaka Yaku, Ana nu Manusia. ²³ Apa ivesia muni nipovia ntotuara nggaulu ka nabi-nabi nu Alatala. Jadi ane rapoviara ivehaitu muni komiu, kana madamba mpuu raramiu, sabana naoge belo ri suruga nipakadia nu Alatala ka komiu.

²⁴ Mandasa mpuu komiu anu nakalumana sii-sii, sabana nikavamiu puramo anu nompakasana raramiu.

²⁵ Mandasa mpuu komiu anu nabosu sii-sii, sabana komiu maara ngena.

Mandasa mpuu komiu anu nadamba sii-sii, sabana komiu masusa bo motumangi ngena.

²⁶ Mandasa mpuu komiu ane pura-pura tona nombatoiya komiu, sabana ivesia muni totuamiu nggaulu nombatoiya nabi mpodava."

Potovemo balimiu

Matius 5:38-48; 7:12a

²⁷ "Tapi Kuuli ka komiu topangepe tesaKu sii-sii: Potovemo balimiu, povia anu nabelo ka tona navuu matana nte komiu. ²⁸ Perapi belo ka topompindasi komiu bo posambayaka tona novia nadaa ka komiu. ²⁹ Ane rasapa ntona sabingga kalimpimiu, nee rapesava. Taa ka ia vai sabinggapa rasapana. Ane raalasi ntona buyamiu, dekeika muni bajumiu. ³⁰ Ane tona merapi nte komiu, dekeimo ka ia. Bo ane mbarambaramiu raalasi ntona, nee raperapimiu mpanjili anu nialana. ³¹ Nuapa-nuapa rapodotamiu rapovia ntona ka komiu, ivesia muni rapoviamiu ka tona.

³² Ane komiu mompotove tona anu nompotove komiu, nee rasarumakamiu Alatala mombatoiya komiu. Nau tona nadosa nipotovera muni tona anu nompotove ira. ³³ Ane komiu aga mokainggu nabelo nte tona anu nokainggu nabelo nte komiu, nee rasaru-

makamiu Alatala mombatoiya komiu, sabana tona nadosa nokainggu ivesia muni. ³⁴ Bo ane komiu mompopainda doimiu ka tona nompakule mompopanjili doimiu, nee rasarumakamiu Alatala mantoiya komiu, sabana tona nadosa muni nompopainda doira ka tona nadosa ntanina ane rasanira tona haitu nompakule mompopanjili doira. ³⁵ Kakanana ledo ivesia! Komiu kana mompotove balimiu, bo povia anu nabelo ka ira. Ane tona meada nte komiu, dekei ka ia bo nemo rapopea rapopanjinina. Ane ivesia pokainggumiu, naoge mpuu belo radekei ka komiu bo komiu majadi ana-ana nu Alatala toNeliu KaogeNa, apa Ia muni novia anu nabelo ka tona nadaa bo tona ledo nisanina notarima kasi. ³⁶ Komiu muni kana mepotove nasimbayu eva pepotove nu Alatala, Tuamamiu."

Nee rapakasalamiu tona ntanina

Matius 7:1-5

³⁷ "Nee rapakasalamiu tona ala komiu ledo rapakasala nu Alatala. Nee mompakatantu sala ntona kana rahuku, ala komiu ledo rahuku nu Alatala. Ampungimo tona ntanina ala komiu muni raampungi nu Alatala. ³⁸ Dekei ka tona ntanina ala Alatala muni mombadekei ka komiu. Bo pedekei nu Alatala nabelo mpuu, kadeana nasimbayu mpo posuka naponu nipa-roo bo nigoya ala namala raisi vai sampe maponu suu. Apa posuka nipakemiu ka tona ntanina, haitu muni raposuka ka komiu."

³⁹ I Yesus notesa sangu porapa ka topangoseaka Ia. "Ledo masipato toburo mombanini toburo ntanina. Natantu ira randua aga manavu mpasangani riaru lovu. ⁴⁰ Ledo ria ngana sikola naogepa pade guruna. Tapi ane matamamo posikolana, masimbayumo ia nte guruna.

⁴¹ Nakuya komiu namala nanggita dosa nu roamiu nakodi mpo garupu ri matana, tapi dosamiu mboto nambaso mpo baloti ri matamiu ledo nikitamiu?

⁴² Berimba komiu mamala manguli ka roa, 'He, sampe-suvu, mai kulelaka garupu ri matamu,' iyapa baloti ri matamiu mboto ledo nikitamiu! Komiu aga tobelo ri sumba! Lelaka ntani ruru baloti ri matamiu ala mamala komiu mekita bo mombalelaka garupu ri mata nu sampesuvumiu!"

Isi rara ntai nikita ri pokainggu

Matius 7:16-20; 12:33-35

⁴³ "Ledo naria kayu nabelo novua nadaa. Ledo muni naria kayu nadaa novua nabelo. ⁴⁴ Pura-pura kayu nisani lako ri vuana. Vua ara ledo nipupu lako ri lemo ntasi bo anggur ledo nipupu lako ri valaa karui.

⁴⁵ Ivesia muni manusia. Tona nabelo, nabelo muni pokaingguna bo potesana, sabana pekiri rara ntaina nabelo. Bo tona nadaa, pokaingguna bo potesana mu-

ni nadaa sabana pekiri rara ntaina nadaa. Apa tesa nisovadakana nopuna lako ri pekiri rara ntaina.”

Porapa banua nipandasi bo banua ledo nipandasi

Matius 7:24-27

⁴⁶ Nangulimo i Yesus, “Nakuya komiu noronde Yaku ‘Pue, Pue’ tapi ledo nioseakamiu parentaku? ⁴⁷ Tona nakava nte Yaku nangepe bo nangoseaka tesaKu, ⁴⁸ ia nasimbayu mpo topovia banua. Nikaena pakandala tana bo nipoviana pandasi watu. Tempo lono bo uve bi-nangga nanggabuntu nodala ri banua, banua haitu ledo nogoya sabana pandasina naroso. ⁴⁹ Tapi isema-ise-ma aga niepena bayangi tesaKu bo ledo nioseakana, ia nasimbayu mpo tona novia banua ledo nipandasi. Tempo lono oge nodala ri banua, banua haitu kaliu-liu naombo bo nagero ntotomo.”

I Yesus nompakabelo batua nu balengga ntantara

Matius 8:5-13

7 Naupu i Yesus notesa ka todea, haumo Ia ri ngata Kapernaum. ² Hamai naria saito balengga ntantara nu Magau Roma bo naria muni batua nipotovena. Batua haitu nadua ntamo, damo kamatena. ³ Tempo balengga ntantara haitu nangepe kareba i Yesus, nituduna bara sako-ndua totua ntoYahudi hau merapi tulungi nte i Yesus makava mompakabelo batuana nadua. ⁴ Tempo totua ntoYahudi nakava ri ngayo i Yesus, ira mpuu-mpuu nerapi tulungi nte i Yesus ivei: “Tadulako haitu tona masipato ratulungiMiu, ⁵ sabana nipotovena kita toYahudi bo nidekeina muni doi rapombangu banua petuputa.”

⁶ Jadi hau mpuumo i Yesus nosanggani-nggani ante ira. Naparapa i Yesus ri banuana, nitudu nu balengga ntantaramo bara sako-ndua roana hau mantomunaka i Yesus bo manguli, “Pue, ledo paraluu Komiu makava ri banuaku, sabana yaku ledo toYahudi. Ledo masipato yaku mantarima Komiu ri banuaku. ⁷ Ledo masipato yaku mosintomu nte Komiu. Nau aga rauliMiu sambela rombela, mabelomo batuaku. ⁸ Nisaniku ia mabelo sabana yaku muni natundu ri parenta nu tuaku. Bo naria muni tantara-tantara natundu nte parentaku. Ane kuulika saito tantara, ‘Koimo’, ia kana hau. Ane kuulika tantara ntanina, ‘Katamai,’ ia kana tumai. Ane kuulika batuaku, ‘Povia anu haitu,’ kana rapoviana.”

⁹ Nokumaa mpuu i Yesus nangepe tesa nu balengga ntantara haitu. Jadi neili Ia bo nangulika todea nangoseaka Ia, “Natantu mpuu pomparasaya ntona hitu! Nau todea toYahudi, muli i Israel, dopa ria nikavaKu pomparasayana naroso mpo pomparasaya ntona hitu.”

¹⁰ Tempo tona nitudu gahaitu nanjili ri banua, nikavara batua haitu nabelo mpuumo.

† Ane toYahudi hau ri banua ntona ledo toYahudi, ira majadi maruto.

I Yesus nompakatuvu mpanjili saito ana ntimbala

¹¹ Naliutaka haitu, i Yesus hau ri ngata Nain. AnaguruNa hau nosanggani-nggani nte Ia bo nadea muni tona ntanina nantuntuni Ia. ¹² Tempo i Yesus napara ri bobaa mesua rangata, nikitaNamo topokova tomate nesuvu lako riarangata haitu. Tomate haitu ngana langgai, saito-itona ana ntimbala. Nadea muni tona lako ri ngata haitu nomporoa timbala haitu. ¹³ Tempo i Yesus nanggita ia, naasi mpuumo mataNa. NiulikaNa, “Nee motumangi, Ina.” ¹⁴ Pade hau i Yesus nanggaparai tomate nikova ntona haitu bo nikingginisiNa pokova. Jadi, topokova tomate haitu nenonto. Nanguli i Yesus, “He, kabilasa, Kuuli ka iko, pembangumo!”

¹⁵ Pade nembangu mpuumo tomate haitu. Ia nonturo bo nompamulamo notesa. Naupu haitu i Yesus nangu-lika tinana, “Siimo anamu, Ina.”

¹⁶ Tona nanggita kajadia haitu, naeka puramo bo nitoyara Alatala ivei: “Nabi nakuasa neumba ri tatangata! Alatala mpuu-mpuu nakavamo mombatulungi todeaNa!” ¹⁷ Kareba haitu natolelemo ri njumangu bagia Yudea, bo muni ri ngata-ngata napara Yudea.

I Yesus nantoiya i Yohanes Topediu

Matius 11:2-19

¹⁸ Ana-anaguru i Yohanes Topediu notesa ka i Yohanes pura-pura anu nipovia i Yesus. Nangepe haitu, nirondena randua anaguruna, ¹⁹ bo nituduna hau mompekutana i Yesus ivei: “Komiumo hii Magau Topepakasalama anu makava nangoseaka pojanji nu Alatala? Atau bara da mariapa tona ntanina rapopea kami?”

²⁰ Jadi haumo randua anaguruna mompekutana i Yesus, ivei: “I Yohanes nombatudu kami mekutana nte Komiu ivei: ‘Komiumo hii Magau Topepakasalama anu makava nangoseaka pojanji nu Alatala, atau bara da mariapa tona ntanina rapopea kami?’ ”

²¹ Tempo haitu i Yesus nompakabelo todea bo nompopalai seta lako ri karo ntona, bo nadea muni toburo nipakabeloNa sampe namala ira nekita mpanjili. ²² Jadi, nesanamo i Yesus ka tona nitudu i Yohanes, “Panjilimo komiu, bo ulika i Yohanes pura-pura anu nikitamiu bo niepemiu: tona naburo nekitamo, tona napunggu nolipamo, tona nadua oge nabelomo, tona nabongo neepemo, tona namate natuvu mpanjilimo, bo Kareba Belo lako nte Alatala nipatolele munimo ka tona napakasi. ²³ Nabelo mpuu tona ledo noura nomparasaya Yaku.”

²⁴ Nalaipa tona nitudu i Yohanes pangane, nitesaNamo katuvu i Yohanes ka todea ivei: “Nuapa patujumiu hau ranggarava bai nompeinta i Yohanes bara ipia? Hau nanggita tona nonggai rarana, eva jono niburu mpoi ri hau tumai? ²⁵ Tantu ledo! Jadi hau

manggita nuapa komiu? Bara manggita tona nobaju nagaya? Tantu ledo, apa tona nobaju nagaya bo nagana mpengaya katuvuna, aga nonturo ri banua magau. ²⁶ Jadi, hau manggita nuapa komiu? Tantumo hau manggita nabi. Tapi pariaramo! I Yohanes naogepa pade nabi ntanina. ²⁷ Iamo topompakasadia rara ntodea mantarima Yaku, nangoseaka anu nitulisi ri Buku Gasa nggaulu. Alatala nanguli ivei: 'Pariaramo! Kutudu suroKu mokolu ka Iko, ala ia mompakasadia dala ka Iko.' "

Maleakhi 3:1

²⁸ Nanguli i Yesus, "Toramo! Lako ri pura-pura tona nipoanaka ri dunia hitu, ledo ria saitoa tona naogepa pade i Yohanes. Tapi nau tona ledo ria nturona ri Poparenta nu Alatala, naogepa ia pade i Yohanes."

²⁹ Tempo todea bo topesingara balasitee nangepe i Yesus notesaki i Yohanes, nipokonoramo nia nu Alatala bo ira madota radiu i Yohanes, tandana ira najea lako ri dosara. ³⁰ Tapi toFarisi ante guru-guru agama ledo nadota nantarima nia nu Alatala ka ira. Ira ledo nadota radiu i Yohanes.

³¹ Pade nanguli i Yesus, "Kuuli pakalanto ka komiu inggu ntona nadaa anu natuvu sii-sii. ³² Ira nasimbayu mpo ngana-ngana nonturo ri potomu, sangaya-sangaya niulika, ledo nioseakara. Ira aga nosipongare nte roara, 'Kami nantavusi suli bo nodade-dade mompakadamba raramiu tapi ledo nadamba komiu. Kami nodade nasusa mpo tempo kamate tapi ledo notumangi komiu.' ³³ Ivesia muni najadi nte kami bo i Yohanes. I Yohanes nakava, nopuasa ledo nangande, bo ledo muni nanginu uve anggur, bo niulimiu ia nipesua nu seta! ³⁴ Yaku, Ana nu Manusia nakava nangande bo nanginu mpo tona biasa, bo niulimiu ivei: 'Peintamo tona haitu! Nadoko, nalangu, vega ntopesingara balasitee bo vega ntodosa!' ³⁵ Tapi naupa ivesia, rasanita kanoto nia nu Alatala apa aselena raki-ta ri pokainggu ntopangoseaka Ia."

I Yesus ri banua i Simon

³⁶ Naria saito toFarisi nosanga i Simon. Nigagana i Yesus mangande ri banuana. Jadi haumo i Yesus ri banuana, nonturo bo nangande. ³⁷ Ri ngata haitu naria saito mombine nadosa, pokaingguna ledo masipato. Niepena i Yesus ria nangande ri banua ntoFarisi haitu, hau ia nanggeni botolo kodi nipovia lako ri vatu pualam. Botolo haitu noisi lana vangji. ³⁸ Ia nakava nangaparai kada i Yesus bo notumangi. Uve matana nombabanggasi kada i Yesus jadi nipaisina buluana sampe nabai, bo niekina bo nitolina lana vangji kada i Yesus.

³⁹ Nanggita haitu, nompekirimo i Simon, "Tona hitu ledo nabi. Ane rapana Ia nabi, tantu rasaniNa isema

mombine nanggansi Ia haitu, apa mombine haitu nadosa."

⁴⁰ Nanguli i Yesus ka i Simon, "Simon, naria sangaya Kuuli ka iko."

Nesana i Simon, "Iyo, ulimo, Guru."

⁴¹ Pade nanguli i Yesus, "Naria randua tona noinda nte topompainda doina. Saito noinda limaatu doi salaka bo saito limapulu doi salaka. ⁴² Randua topanginda doi haitu, ledo nipakulera nombabayari pakaupu indara. Nanguli tupu nu doi ka ira randua ivei: 'Doiku niindamiu randua, domo kusingara nte komiu.' " Pade nanguli i Yesus ka i Simon, "Lako nte ira randua haitu, isema nipotovenapa tupu nu doi?"

⁴³ Nanguli i Simon, "Panggavaku, tona nadeapa indana haitu nipotovenapa tupu nu doi."

Nesana i Yesus, "Nakana panggavamu tutu."

⁴⁴ Pade neili i Yesus nompeinta mombine pangane bo niulikaNa i Simon, "Peintamo mombine hitu! Yaku nakava ri banuamu, ledo nipakasadiamu uve Kupotoposi kadaKu nangoseaka adata ka torata. Tapi mombine hitu notoposi kadaKu ante uve matana bo nipakabaina ante buluana. ⁴⁵ Iko ledo nikadambanakamu nte peeki tempo Yaku dako nakava ri banuamu, tapi mombine hitu ledo ria kabasana nombaeiki kadaKu lako ri lamba kakavaKu sampe ri sii. ⁴⁶ Iko ledo nombatoli lana vangji ri balenggaKu, nangoseaka adata ka torata tapi mombine hitu nombatoli lana vangji ri kadaKu. ⁴⁷ Jadi Kuuli ka iko, Simon, dosana nadea haitu niampungi nu Alatalamo, sabana nambaso mpuu pepotovena. Tapi ane tona aga sakide dosana niampungi, aga sakide muni pepotovena."

⁴⁸ Pade nanguli i Yesus ka mombine haitu, "Dosamu niampungi puramo."

⁴⁹ Tona ntanina nonturo nangande nosangani ante i Yesus nosimpekutana, "Isema ntoto Ia sampe nisaru-makaNa Ia namala mombaampungi dosa?"

⁵⁰ Tapi i Yesus nanguli ka mombine haitu, "Iko nipakasalama sabana iko nomparasaya Yaku. Panjilimo, damo Alatala mompakatinonto raramu!"

Mombine nantulungi i Yesus

8 Naupu sia, i Yesus hau nompebutu ngata nompatolele Kareba Belo, anu notesaki Poparenta nu Alatala. AnaguruNa sapulu randua hau nosangangi ngani ante Ia, ² bo naria muni bara sako-ndua mombine nompoko ira. Mombine gahaitu nipakabelo i Yesus lako ri duara bo seta-seta nipopalaiNa lako ri karora. Saito roara nosanga i Maria Magdalena. Naria papitu seta nipopalai i Yesus lako ri karona bara ipia.

† *Notoposi kada, nombaeiki, nombatoli lana vangji ri balengga. Biasa torata nidekeika uve rapotoposi kadara apa deanapa tona aga nosandale atau ledo nosapatu jadi kadara nasovu. Biasa muni torata nikadambanaka ante peeki ri kalimpi. Ane torata nibila, nitoli lana vangji ri balenggana.*

³ Naria muni i Yohana, berei i Khuza tona nipomboli doi Magau Herodes. Bo naria muni i Susana bo da nadeapa mombine ntanina. Mombine gahaitu nom-pake doira mboto nantulungi i Yesus bo ana-anaguruNa.

Porapa toposavu

Matius 13:1-9; Markus 4:1-9

⁴ Ledo naupu-upu tona lako ri mpengaya-ngaya ngata nakava nte i Yesus. Nadeapa ira nasiromu, nitesaNamo porapa ka ira ivei: ⁵ "Naria tona hau nosavu. Tempo ia nosavu, naria sanu savua nanavu ri bivi dala, sanu nijejesi ntona bo sanu niteosi ntonji sampe naupu. ⁶ Naria muni savua nanavu ri tana navatu. Savua haitu natuvu tapi ledo nasae nalelemo sabana ledo naria uve nombabanggasi kalena. ⁷ Naria muni savua nanavu ranggarui. Savua haitu natuvu singgani ante karui, tapi kaupuna namatemo savua haitu sabana niposiuipisi nggarui. ⁸ Bo naria muni savua nanavu ri tana naboya, bo nabelo mpuu katuvuna sampe vuana saatu-nggani kadeana."

Naupu notesa ivehaitu, nangulimo i Yesus, "Isema-sema naria talingana, pariaramo porapa hitu!"

I Yesus nompakalanto batuana porapa toposavu

Matius 13:10-23; Markus 4:10-20

⁹ Ana-anaguruNa nekutana nte Ia, "Nuapa batuana porapa pangane?"

¹⁰ Nesana i Yesus, "Bara ipia dopa nisani nu manusia berimba Poparenta nu Alatala. Sii-sii Alatala nompopaisanina ka komiu. Tapi tona ntanina aga nipatuduki ante porapa ala rapariara, tapi nau rapeintara ledo rasanira nuapa najadi, bo nau raepera ledo rasanira batuana." ¹¹ Ivei batuana porapa pangane: savua nirapaka Tesa nu Alatala. ¹² Savua nanavu ri dala, nirapaka tona nangepe Tesa nu Alatala tapi nakava Magau nu Seta nangalasi Tesa haitu lako nte ira ala domo raparasayara bo rapakasalama. ¹³ Savua nanavu ri tana navatu, nirapaka tona nangepe Tesa nu Alatala bo nitarimara nte damba rara. Tapi ledo naroso pomparasayara, nasimbayu nte tuda-tuda ledo naroso pokalena. Tempo ira nipesori, nouramo rarara bo domo nomparasaya. ¹⁴ Savua nanavu ranggarui, nirapaka tona nangepe Tesa nu Alatala bo niparasayana. Tapi ira aga nompekirika katuvura ri dunia, ira madota makalumana bo madota matuvu masana ri dunia. Pura-pura haitu nompakabago ira sampe ira ledo napola nangoseaka Tesa nu Alatala bo katuvura ledo naria gunana. ¹⁵ Savua nanavu ri tana naboya, nirapaka tona nanao bo nabelo rarara. Niepera Tesa nu Alatala bo nipariarara. Ira bate-batena nangoseaka Tesa nu Alatala sampe noguna mpuu katuvura."

† Yesaya 6:9-10

Porapa poindo

Markus 4:21-25

¹⁶ "Ledo ria tona nombatunju poindo bo nitaungona ntonda bara nidikana ri tambe mpaturu. Tantu rabolina ri kalangana ala pura-pura topesua rabanua manggita karemena. ¹⁷ Pura-pura anu nitabuniaka sii-sii kana rapopakita ngena, bo anu dopa nisani sii-sii kana rapopaisani ngena. ¹⁸ Jadi pariara pakabelo-belo Tesa nu Alatala niepemi, sabana isema-sema mantarima bo mangoseaka Tesa haitu kana ratambaika pangisana Tesa haitu. Tapi isema-sema ledo ratarimana bo ledo raoseakana Tesa nu Alatala, pangisani sakide naria nte ia ralelakasi lako nte ia."

Tina i Yesus ante sampesuvu-sampesuvuNa

Matius 12:46-50; Markus 3:31-35

¹⁹ Naria sanggani tina i Yesus ante sampesuvu-sampesuvuNa nakava madota mosinggavaka Ia. Ledo namala sabana nadea gaga tona nombatagui Ia. ²⁰ Naria saito tona nanguli ka i Yesus, "Guru, tinaMiu ante sampesuvu-sampesuvuMiu ria ri savalikuna. Ira madota mosinggava nte Komiu."

²¹ Tapi nanguli i Yesus ka todea, "Isema-sema nangepe bo nangoseaka Tesa nu Alatala, tona haitumo nireke tinaKu bo sampesuvuKu."

I Yesus nompopenonto poiri narimboso bo balumba mbaso

Matius 8:23-27; Markus 4:35-41

²² Naria sanggani i Yesus ante anaguruNa nesavi sakaya. I Yesus nanguli ka ira, "Hau kita ri sambote rano." Jadi haumo ira. ²³ Tempo ira da ranja mpopajala sakaya, namonjomo i Yesus. Sampesanika, narimbosomo poiri bo balumba mbaso nombarumpa sakayara. Uve nesua riara sakaya, sakidepa matala. ²⁴ Jadipa haumo anaguruNa nombalike i Yesus, "Guru, Guru! Mamatemo kita!"

Nangepe topelike, nembangumo i Yesus. NipopetaaNa poiri bo balumba mbaso, netaa mpuumo! Bo rano haitu natinontomo.

²⁵ Nangulimo i Yesus ka ana-anaguruNa, "Nakuya komiu ledo nomparasaya Yaku?"

Nokumaa bo naeka anaguruNa. Ira nosimpekutana, "Hee! Isema ntoto tano tona hitu? NiparentaNa poiri bo uve bo niouseakara mpuu!"

I Yesus nompakabelo tona nipakabaya nu seta

Matius 8:28-34; Markus 5:1-20

²⁶ Naupu haitu i Yesus ante anaguruNa napola nosakaya sampe nakava ri bagia Gerasa, nosinjam-bote ante bagia Galilea. ²⁷⁻²⁹ Hamai naria saito langgai lako ri kota nipesua nu seta. Nasaemo ia nabaya, ledo

nobaju bo ledo nadota nonturo ri banua. Ia aga nonturo ri podayo. Ia nasaro nipesua nu seta. Nau nirante palena bo kadana, bo nijagai mpuu-mpuu, da namalapa rante haitu nirantasina, bo nipakeni nu seta-seta hau ranggarava bai.

Tempo i Yesus nanau ri tana, haumo tona nipesua nu seta haitu mompasintou i Yesus. Nongare ia bo nekadungga ri ngayoNa. I Yesus nantudu seta haitu malai lako ri karo ntona haitu. Jadi nongaremo tona nipesua nu seta haitu ante suara namangga, "Yesus, Ana nu Alatala anu Neliu KaogeNa! RakuyaMiu yaku? Kuperapi, nee mpuu rapandasaMiu yaku!"

³⁰ Nipekutana i Yesus tona haitu, "Isema sangamu?"

Nesana tona haitu, "Sangaku Njobu-njobu." Niulina ivesia sabana nadea mpuu seta nombakuasai ia. ³¹ Setasetahaitu mpuu-mpuu nerapi nte i Yesus, "Nee ratudu kami hau rapandasa nu Alatala ri lovu ledo rapakule mantuvu kandalana!"

³² Ledo nakavao lako ri sia, naria bavu dea nangelo kandeara ri kente-kente nu bulu. Seta-seta haitu mpuu-mpuu nerapi nte i Yesus, "Palogamo kami mesua riaru bavu gahaitu." Jadi nipalogaNamo. ³³ Jadi seta-seta nesuvu mpuu lako ri tona haitu bo nolinja nesua riaru nu bavu dea. Naupu sia, nangovamo bavu dea haitu notingganavu lako ri tinggi dapala hau riaru rano bo nalodomo.

³⁴ Tempo topojava bavu haitu nanggita bavu nija-gaira namate puramo, nangovamo ira hau nombatesa kajadia haitu ka tona rangatara bo ri ngata ntanina napa ri sia. ³⁵ Nangepe tesa ntopojava bavu, hau puramo ira manggita anu najadi. Tempo ira nakava nte i Yesus, nikitara tona nipesua nu seta pangane nakabasakamo lako ri seta-seta bo nonturo ri sinjori i Yesus. Nopakeamo ia bo nanotomo rarana. Nanggita haitu, naeka puramo ira. ³⁶ Tona nanggita kajadia haitu notesa ka tona ntanina berimba tona nipesua nu seta nipakabelo i Yesus. ³⁷ Pade pura-pura tona ri bagia Gerasa haitu nerapi nte i Yesus ante mpuu-mpuu rarara ala rapalaisiNa ngatara haitu, sabana naeka mpuu ira. Jadi i Yesus nesavi sakaya hau manjilimo. ³⁸ Tona nikabasaka lako ri seta haitu nerapi ante mpuu-mpuu rarana ala ia muni mamala mantuntuni i Yesus.

Tapi i Yesus nantudu ia, ³⁹ "Panjilimo, tesa ka tonamo anu nipovia nu Alatala ka iko." Jadi hau mpuumo tona haitu ri njumangu ngatana bo nitesanamo pura-pura anu nipovia i Yesus ka ia.

Ana i Yairus nipakabelo, bo mombine nanggabe baju i Yesus

Matius 9:18-26; Markus 5:21-43

⁴⁰ Tempo i Yesus nanjili lako ri sambote rano, Ia nito-munaka ntona ante damba rara, apa ira nompopea kakavaNa. ⁴¹ Ri sia, naria saito pakeni ri banua petupu

nosanga i Yairus. Nantaputu ia ri kada i Yesus bo nerapi nte rarana mpuu-mpuu ala i Yesus hau ri banuana, ⁴² apa anana saito-itona, ana mombine noumuru sapulu rompae, nadua ntamo, damo kamatena. Nangepe haitu, haumo i Yesus ri banuana.

Tempo ira da ranja mpolipa hau ri banua i Yairus, todea nomposimpilii i Yesus. ⁴³ Ri sia naria saito mombine sapulu rompaemo naraa † njuu. [Naupu puramo doina nekipakulisi nte dokutoro tapi ledo nabelo bo] ledo ria tona nompakule mompakabelo ia. ⁴⁴ Mombine haitu nanggaparai puri i Yesus bo nikabena doe baju i Yesus. Kalii-liu netaa raana. ⁴⁵ Nekutanamo i Yesus, "Isema nanggabe Yaku pangane?"

Pura-pura tona nesapu, bo i Petrus nanguli, "Guru, ri sii nadea tona nosiaso ri sinjoriMiu bo nomposimpilii Komii."

⁴⁶ Tapi nanguli i Yesus, "Naria mpuu tona nanggabe Yaku pangane. NisaniKu naria kuasa nesuvu lako nte Yaku."

⁴⁷ Mombine haitu nombarasai poviana pangane domo namala ratabuniaka, nisani i Yesusmo. Jadi nakavamo ia nte eka bo nantaputu ri ngayo i Yesus. Bo niulina ri ngayo ntona ri sia nuapa sabana sampe nikabekana baju i Yesus. Bo niulina muni kalii-liu nabelomo ia.

⁴⁸ Pade nangulimo i Yesus ka ia, "AnaKu, nabelomo iko sabana iko nomparasaya. Panjilimo iko. Damo Alatala mompakatinonto iko."

⁴⁹ I Yesus da notesa ka mombine haitu, nakavamo tona lako ri banua i Yairus. Nanguli ia ka i Yairus, "Tua, namatemo anamu. Tumo mompakalenge i Guru hau ri banuamii."

⁵⁰ Tapi niepe i Yesus tesa haitu bo niulikaNa i Yairus, "Nee maeka. Parasayamo Yaku, mabelo ngena anamu."

⁵¹ Nakava ira ri banua i Yairus, ledo nidekei i Yesus sambara tona mesua riarana mosanggani nte Ia. Aga i Petrus, i Yohanes, bo i Yakobus ante tina tuama nu ngana haitu nidekeiNa mesua mosanggani ante Ia.

⁵² Tempo haitu, pura-pura tona nasiromu ri sia nantete notumangi sabana ngana haitu namatemo. Tapi i Yesus nanguli ka ira, "Tumo motumangi! Ngana haitu ledo namate, aga namonjo."

⁵³ Nangepe tesa i Yesus, aga nipongirikara apa nisanira ngana mombine haitu namate mpuumo.

⁵⁴ Tapi i Yesus hau nesua riaru ntombi bo nikangisiNa pale nu ngana haitu. Pade niuliNa, "Ana, pembangu-mo!" ⁵⁵ Nyawa nu ngana haitu naria mpanjili. Jadi kalii-liu nembangu ngana haitu. Pade nitudu i Yesusmo ira mombadekei kande ka ngana. ⁵⁶ Nanggita kajadia haitu nokumaa mpuu tina tuamana. I Yesus nombatagi ira, "Nee ratesa ka tona ntanina anu najadi ri sii."

† Naraa njuu: batuana, nasimbunga.

I Yesus nombatudu sapulu randua anaguruNa

Matius 10:5-15; Markus 6:6b-13

9 I Yesus nompasiromu sapulu randua anaguruNa bo nidekeiNa kuasa ka ira mompopalai seta bo mompakabelo tona nadua mpengaya-ngaya. ² NituduNa ira hau mompakabelo tona nadua bo mompatolele kareba Poparenta nu Alatala. ³ Dopame ira nalai, i Yesus nanguli ka ira, "Nee manggeni nuapa-nuapa rirara polipamiu. Nee manggeni toko polipa bara batutu, bara baku, bara doi, bara rontonga baju. ⁴ Ane ratari-ma ntona komiu, ponturomo ri sia sampe komiu malai lako ri ngata haitu. ⁵ Ane ledo ratarima ntona komiu, palaikamo ngata haitu bo tapaimiu sovu lako ri kadamiu †, *tandana Alatala mompoara ira.*"

⁶ Naupu sia, hau ira nompebutu ngata mompatolele Kareba Belo, bo mompakabelo tona nadua ri umba-umba.

Magau Herodes naingu

Matius 14:1-12; Markus 6:14-29

⁷ Magau Herodes Antipas anu nomparenta ri bagia Galilea, nangepe lenea pura-pura kajadia haitu. Naingu rarana, sabana tona nanguli i Yohanes Topediu natuvu mpanjilimo. ⁸ Naria muni sanu tona nanguli Nabi Elia nggaulu neumba mpanjili. Bo tona ntanina nanguli bara nabi ntanina natuvu mpanjili.

⁹ Nanguli i Herodes, "Nitudukumo tona nombatampa balengga i Yohanes bara ipia. Jadi i Yesus hii, isema kakanana Ia? Nadeamo lenea Ia niepeku." Haitu sampe i Herodes nompasimbuku mosinggava nte i Yesus.

I Yesus nompakande lima-njobu tona

Matius 14:13-21; Markus 6:30-44; Yohanes 6:1-14

¹⁰ Naupu ana-anaguru i Yesus nompatolele Kareba Belo bo mompakabelo tona nadua, nanjilimo ira. Bo pura-pura anu nipoviara hamai, nitesara ka i Yesus. Naupu haitu, ira niunaka i Yesus hau nompatani ri sangu ngata nosanga Betsaida. ¹¹ Tapi nisani ntodea patuju i Yesus, jadi nituntuniramo Ia. I Yesus nantarima ira bo nipatudukiNa ka ira Poparenta nu Alatala. Bo nipakabeloNa muni tona nadua.

¹² Domo masae masolomo eo, anaguru i Yesus sapulu randua nakava nangulika Ia, "Guru, agina ratudumiu tona gahaitu hau mangelo kande bo ponturo ri ngata-ngata napara ri sii, apa ponturo hitu nakalinoa."

¹³ Tapi nanguli i Yesus ka ira, "Komiumo mompakande ira."

Nesanamo anaguruNa, "Hee! Berimbamo? Aga lima-angu roti bo rombaa bau naria nte kami. Paralu kami

† *Tapai sovu lako ri kadamiu batuana, nipoara. Tupu ngata haitu nompoara Tesa nu Alatala. Jadi Alatala muni mompoara ira bo mombahuku ira.*

hau mangali roti ka tona damo nadea hii?" ¹⁴ [Kadeana ira ri sia nitasere lima-njobu langgai.]

Nanguli i Yesus ka anaguruNa, "Uluka ira monturo motagu-tagu, limapulu tona santagu."

¹⁵ Anaguru i Yesus nanturusi anu niuliNa ka ira.

¹⁶ Naupu sia i Yesus nangala lima-angu roti bo rombaa bau pangane, pade nitingoaNa langi bo niuliNa tarima kasi ka Alatala. Nitubi-tubiNamo roti ante bau haitu pade nidekeiNa ka anaguruNa mombabagi-bagi ka todea. ¹⁷ Ira pura-pura nangande sampe nabosu. Naupu nangande, anaguruNa nompasiromu labi nu kande, sapulu rotonda ponupa naboli.

I Petrus nangaku i Yesus Magau Topompakasalama manusia

Matius 16:13-19; Markus 8:27-29

¹⁸ Naria sanggani, i Yesus da nosambaya saitoNa, nakavamo anaguruNa nte Ia. I Yesus nekutana nte ira, "Nantuntuni tesa ntodea, isema Yaku hii?"

¹⁹ Nesana ira, "Naria tona nanguli Komiu i Yohanes Topediu. Naria muni nanguli Komiu Nabi Elia nggaulu. Naria muni tona nanguli Komiu bara nabi ntanina natuvu mpanjili."

²⁰ I Yesus nekutana vai, "Tapi nantuntuni pang-gavamiu, isema Yaku?"

Nesana i Petrus, "Komiu Magau Topepakasalama anu nijanji nu Alatala!"

I Yesus notesa kamateNa

Matius 16:21-28; Markus 8:31-9:1

²¹ Naupu sia, i Yesus nombatagi ira ivei: "Nee mpuu raulimiu ka isema-sema, Yaku Magau Topepakasalama anu nijanji nu Alatala! ²² Yaku, Ana nu Manusia, kana rapandasa bo rapoara ntotua ntoYahudi ante balengga-balengga ntopanggeni pesomba bo guru-guru agama. Yaku rapatesi tapi ri eo katataluna Yaku rapakatuvu mpanjili."

²³ Naupu sia niulikaNa todea ri sia, "Isema-sema madota mangoseaka Yaku, kana rakabasakana dotana mboto. Ia kana manjimbuaka kayu salibna eo-eo. Haitumo, ia kana masadia rapandasa nau sampe rapatesi bo mpuu-mpuu mangoseaka parentaKu. ²⁴ Isema-sema aga nangoseaka dota nu rarana mboto bo natuvu ka karon mboto, ledo manggava katuvu nabelo sampe ri kasae-saena. Tapi isema-sema mombakabasaka dotana mboto sabana nangoseaka Yaku, nau ia rapatesi, iamo matuvu mabelo sampe ri kasae-saena. ²⁵ Nuapa gunana rakavamiu pura-pura anu naria ri dunia, tapi ledo rakavamiu katuvua nabelo sampe ri kasae-saena? ²⁶ Isema-sema maeya matana manguli ia topangoseaka Yaku bo maeya matana nte pepatudukiKu, Yaku muni maeya mataKu manguli ia topangoseaka Yaku tempo Yaku meonga lako ri suru-

ga. Yaku, Ana nu Manusia, manau ante reme bo kuasaKu bo kuasa nTuamaKu bo malaeka-malaekaNa nagasa. ²⁷ Pariaramo! Naria bara sako-ndua komiu ri sii dopa mamate ane dopa rakitara Alatala moparenta mpo Magau."

I Yesus ri bulu

Matius 17:1-8; Markus 9:2-8

²⁸ Nitasere saminggu kaliu i Yesus nombadekei pangajari ka ira, nikenina i Petrus, i Yohanes ante i Yakobus hau nantende ri bulu, mosambaya. ²⁹ Da nosambaya i Yesus, nabalimo lenjeNa bo bajuNa najadi naramputi bo nenggila. ³⁰ Sampesanika, neumbamo tona randua notesa ante Ia, haitumo i Musa bo i Elia, nabi nu Alatala. ³¹ Ira randua neonga riaru reme lako ri suruga. Ira notesa kamate i Yesus anu domo masae rapakadupa ri ngata Yerusalem.

³² Tempo haitu, i Petrus bo roana randua naluru namonjo. Nematapa ira, nikitara i Yesus nareme bo randua tona neangga ri sinjoriNa. ³³ Tempo tona randua haitu mompalaisi i Yesus, nangulimo i Petrus, "Guru, nasana mpuu kita ri sii. Agina kami movia tatalu sou ri sii, sangu ka Komiu, sangu ka Nabi Musa bo sangu ka Nabi Elia." Ledo nisani i Petrus batua nu tesa niso-vadakana.

³⁴ Da ranja mpotesa i Petrus, nakavamo kulimu nombabungu ira pura-pura, sampe naeka mpuu anaguruNa tatalu haitu. ³⁵ Lako riaru kulimu naria suara nanguli, "Hitumo AnaKu nipelisiKu. Epero tesaNa!"

³⁶ Nalino suara haitu, nikitara damo i Yesus saitoNa ri sia. Tesa niepera haitu nipariarara bo anu nikitara ledo kaliu-liu nitesara ka tona ntanina.

I Yesus nompopalai seta lako ri karo nu ngana

Matius 17:14-18; Markus 9:14-27

³⁷ Kamailena, i Yesus ante anaguruNa notua lako ri bulu haitu. Nakava ri lembana nadea mpuu tona neonga mosinggava nte i Yesus. ³⁸ Naria saito langgai lako ri tatanga ntodea haitu nompongare i Yesus, "Guru! Tulungi peinta ruru anaku, anaku langgai aga saito-itona. ³⁹ Ane nesua seta ri karonu, kaliu-liu nongare ia bo karonu nanggaradii sampe ngangana nobura. Seta haitu ledo nenonto-nonto nompandasa ia, bo ledo nadota nesuvu lako nte ia. ⁴⁰ Niulikukamo anaguruMiu mompopalai seta haitu, tapi ledo nipakulera."

⁴¹ Nangepe haitu, nangulimo i Yesus ka ira, "Natantu mpuu komiu natuvu sii-siii! Komiu nesapuaka mpuu bo ledo nomparasaya! Sakuyapa kasaena Yaku kana mosanggani nte komiu bo mosabara nte komiu pade raparasayamiu?" Pade nituduNa tuama nu ngana nadua haitu, "Keni tumai anamu!"

⁴² Tempo ngana haitu nolipa hau ri ngayo i Yesus, nidungganaka nu setamo ia bo karonu nanggaradii-

dii. Tapi i Yesus nompopalai seta bo nipakabeloNamo ngana haitu. Nabelopa ngana haitu, niulina ka tuama nu ngana, "Siimo anamu." ⁴³ Nanggita kambaso kabaraka nu Alatala haitu, nokumaa mpuu todea ri sia.

I Yesus notesa kamateNa

Matius 17:22-23; Markus 9:30-32

Todea da nokumaapa nanggita pura-pura anu nipoviaNa. Jadi niulikaNa anaguruNa, ⁴⁴ "Pariaramo tesaKu hitu: Yaku, Ana nu Manusia nitoiya ntona sii-sii, tapi makava tempona Yaku radekei riaru kuasa nu manusia." ⁴⁵ Tapi ledo nisani nu anaguruNa batua notesaNa. Batua nu tesa haitu nitabuniaka ala ledo rapahara. Bo ledo muni nabia ira nompekutana nuapa batua notesaNa.

Anaguru i Yesus nosinggarauka isema nalangapa panggana

Matius 18:1-5; Markus 9:33-37

⁴⁶ Anaguru i Yesus nosinggarauka isema ira haitu nalangapa panggana. ⁴⁷ Nisani i Yesus pekirira. Jadi nialaNa saito ngana kodi bo nipopeanggaNa ri sinjoriNa, ⁴⁸ bo niulikaNa ira, "Isema-sema nantarima ngana hitu sabana pomparasayana Yaku, nasimbayu mpo nitarimana muni Yaku. Bo isema-sema nantarima Yaku, nitarimana muni Alatala anu nantudu Yaku. Jadi isema-sema naede rarana, iamo nalangapa panggana ri panggita nu Alatala."

Tona ledo nangeva komiu, ia roamiu

Markus 9:38-41

⁴⁹ Nanguli i Yohanes ka i Yesus, "Guru, nikita kami tona nompopalai seta ante kuasaMiu. Tona haitu nita-gi kami, apa ia ledo samporoa nte kita."

⁵⁰ Tapi nanguli i Yesus ka ia, "Nee ratagimiu ia, sabana isema-sema ledo nangeva komiu, ia nosabingga ka komiu."

ToSamaria ledo nadota nantarima i Yesus

⁵¹ Naparamo tempona i Yesus meore hau ri suruga, nipakatantuNamo Ia kana hau ri ngata Yerusalem. ⁵² NituduNa bara sako-ndua topangoseaka Ia mokolu ka Ia ala mompakasadia mpengaya-ngaya ka Ia. Jadi hau ira nesua rangata ntoSamaria. ⁵³ Tapi tona ri ngata haitu ledo nadota nantarima i Yesus sabana nisanira patujuNa hau ri posusa ntoYahudi ri ngata Yerusalem. ⁵⁴ Niepe i Yakobus bo i Yohanespa tona ri ngata haitu ledo nadota mantarima i Yesus, niulira ka i Yesus, "Pue, ane rapodotaMiu, raperapi kami apu lako ri langi manau mompalabu ira."

⁵⁵ Tapi i Yesus nompeili ira randua bo nangonteaka ira. ⁵⁶ Naupu sia, napolamo ira hau ri ngata ntanina.

Tona madota mangoseaka i Yesus

Matius 8:19-22

⁵⁷ I Yesus ante anaguruNa nompapola polipara bo naria tona nanguli ka Ia, "Guru, yaku madota mantuntuni Komiu. Nau damo ri umba rakalauMiu, kuoseaka Komiu!"

⁵⁸ Pade nesana i Yesus, "Asulaku naria bolona bo tonji naria jumuna, tapi Yaku, Ana nu Manusia ledo ria banuaKu Kupaturu."

⁵⁹ I Yesus nanguli ka tona ntanina, "Kamaimo, os-eakamo Yaku!"

Tapi nesana tona haitu, "Guru, paloga ntanimo ruru yaku manjili nte tuamaku. Mamate tuamaku pade tumai yaku mangoseaka Komiu."

⁶⁰ Nesana i Yesus, "Palambakamo tona namate mombatana tona namate. Tapi komiu, koimo hau ri umba-umba mompatolele kareba Poparenta nu Alatala." †

⁶¹ Naria muni tona ntanina nanguli ka i Yesus, "Guru, yaku muni madota mangoseaka Komiu. Tapi pakaloga ntani ruru yaku hau mopalakana nte kami sambanua."

⁶² Nanguli i Yesus ka ia, "Ledo nabelo ane topopajeko nasaro meili ri puri. Ivesia muni tona nasaro nantora anu nipalaisina, ledo masipato majadi topokarajaa ri Poparenta nu Alatala."

I Yesus nombatudu pitupulu topangoseaka Ia

10 Naliutaka haitu, i Pue Yesus nompelisi pitupulu topangoseaka Ia ntanina. Tona pitupulu haitu nituduNa randua-randua samporoa mokolu ka Ia hau ri pura-pura ngata rakalauNa. ² Dopame ira hau, niuliNa ka ira, "Nadea tona nasadia mantarima Kareba Belo. Ira nasimbayu mpo pae natasa, nasadiamo rakato. Nadea mpuu pae nasadiamo rakato, tapi topokato ledo nadea. Jadi, perapimo nte Alatala tupu ntalua, ala ratuduNa tona hau mokato ri taluaNa. ³ Jadi, koimo komiu, tapi pakabelo! Apa komiu Kutudu hau ri tatanga ntona nadaa. Komiu masimbayu ante ana nu bim-ba nipopalai ri tatanga nu asulaku. ⁴ Nee manggeni doi bara batutu rapomboli baku, bara sapatu ropasa. Nee mokalera gaga ri dala motesa-tesa ka tona. ⁵ Ane komiu mesua ri banua ntona uli ntani ruru, 'Kuperapi Alatala mombadekei belo ka komiu sambanua!' ⁶ Ane ratarima ntupu banua mabelo, Alatala mpuu-mpuu mombadekei belo ka ira. Tapi ane tupu banua ledo madota mantarima komiu, Alatala ledo mombadekei belo ka ira. ⁷ Ane ratarima ntupu banua komiu, ponturo ri siamo. Inumo bo kandemo anu radekeina ka komiu, sabana topokarajaa masipato mantarima tambona. Nee molinja-linja hau ri banua ntanina. ⁸ Ane komiu makava ri sangu ngata bo ratarima nu baleng-

† *Palambakamo tona namate mombatana tona namate. Batuana: dekeikamo tona ledo nompapasaya mombatana tona ledo nompapasaya.*

ga ngata mabelo, kandemo kande anu radekeina ka komiu. ⁹ Pakabelomo tona nadua ri ngata haitu bo ulika ira, 'Naparamo tempona Alatala moparenta mpo Magau ri tatangamiu.'

¹⁰ Tapi ane komiu makava ri sangu ngata bo ledo ratarima ntona ri ngata haitu, koi hau ri dala mbaso riarara ngata haitu bo uli ivei: ¹¹ 'Komiu nompoara tesa kami, jadi sovu lako ri ngatamiu anu nekantaka ri kada kami ratapai kami ri ngayomiu. Haitu majadi pepatora ka komiu Alatala mompoara komiu. Tapi naupa ivesia, pariaramo! Naparamo tempona Alatala moparenta mpo Magau.' ¹² Pade nanguli i Yesus ka ira pitupulu, "Pariaramo! Ri Eo Potangara ri kaupu dunia, melabipa kadaana pehuku nu Alatala ka tona haitu pade pehuku rapambela ka toSodom nadaa mpuu."

I Yesus nangonteaka toYahudi ri Galilea anu ledo nompapasaya Ia

Matius 11:20-24

¹³ I Yesus nompapola tesaNa ivei: "Mandasa mpuu komiu toponturo ri ngata Korazim! Bo mandasa mpuu komiu toponturo ri ngata Betsaida, sabana komiu ledo najea! Ane rapana kabaraka nipoviaKu ri ngatamiu, Kupovia ri ngata Tirus bo ngata Sidon natantu nasaemo kajeara, nau ira ledo toYahudi! Bo tantu nasae munimo popakeara karu bo podikara avu ri balenggara, tandana nabuku rarara bo nanjosomo nokainggu nadaa. Komiu toYahudi nikitamiu kabarka-kabaraka haitu, tapi komiu ledo ntoto najea. ¹⁴ Jadi tempo Alatala mombatangara manusia ngena, pehuku ka komiu toYahudi melabipa kantamona pade pehuku ka toponturo ri ngata Tirus bo Sidon. ¹⁵ Komiu toponturo ri ngata Kapernaum! Nisarumakamiu komiu raore hau ri suruga! Tapi ledo ntoto nakana! Komiu aga ranavusaka ri narakaa!"

¹⁶ Pade nanguli i Yesus ka topangoseaka Ia, "Isema-sema nantarima tesamiu, nitarimana muni tesaKu. Isema-sema nompoara komiu, nipoarana muni Yaku. Bo isema-sema nompoara Yaku, nipoarana muni Alatala anu nombatudu Yaku."

Pitupulu topangoseaka i Yesus nanjili lako ri ngata nikalaura

¹⁷ Bara sakuya kasaena naliu haitu, pitupulu topangoseaka i Yesus nanjili lako ri ngata-ngata nikalaura pangane. Nadamba mpuu rarara bo niulira, "Pue, nau seta natundu nte kami bo nalai tempo nipopalai kami nte kuasaMiu!"

¹⁸ Nanguli i Yesus ka ira, "NikitaKu Magau nu Seta nanavu lako ri langi eva kila. ¹⁹ Jadi, pariaramo! Yaku mombadekei kuasa ka komiu ala rapakulemiu mombajeje ule bo supitole bo mombadagi pura-pura karoso nu balita, bo ledo ria nuapa-nuapa mamala

mombakuyasi komiu. ²⁰ Naupa ivesia, nee madamba raramiu sabana seta-seta natundu nte komiu. Agina madamba sabana sangamiu nitulisi riara buku nu Alatala ri suruga.”

Nadamba rara i Yesus

Matius 11:25-27; 13:16-17

²¹ Tempo haitu muni Nosa Gasa nu Alatala nom-bakuasai i Yesus bo Ia nosambaya nte damba raraNa ivei: “Tata, Komiu Tupu nu langi bo tana! Nosukuru mpuu Yaku sabana nipopaisaniMiu pura-pura anu pangane ka tona ledo natau. Tapi nitabuniakaMiu ka tona nangisani bo tona napande, apa ivesiamo dotaMiu.”

²² Pade nanguli i Yesus ka tona ri sia, “Pura-pura nidekei nTuamaKu ka Yaku. Ledo ria tona mpuu-mpuu nosisani nte Yaku Ana nu Alatala, aga TuamaKu Alatala. Bo ledo ria tona mpuu-mpuu nosisani ante TuamaKu, aga Yaku, AnaNa mboto bo isema-sema Kupodota, Kupopaisanika TuamaKu ka ia.”

²³ Naupu haitu i Yesus neili nompeintaka anaguruNa bo notesa ala ledo raepe ntona ntanina. NiuliNa ka ira ivei: “Nabelo mpuu komiu sabana komiu nanggita pura-pura anu nipoviaKu. ²⁴ Pariaramo! Tempo nggaulu nadea nabi bo magau madota manggita anu nikitamiu sii-sii, tapi ledo nikitara. Naoge rarara mangepe anu niepemi u sii-sii, tapi ledo niepera.”

Porapa toSamaria nabelo rarana

²⁵ Naria saito guru agama ntoYahudi neangga ri sia. Ia madota mombaopa tesa i Yesus. Jadi nekutana ia, “Guru, nuapa masipato kupovia ala yaku mamala matuvu sampe ri kasae-saena?”

²⁶ Nesana i Yesus, “Nuapa nitulisi riara Buku Atura Agama? Nuapa nibacamiu ri sia?”

²⁷ Nesana tona haitu, “Anu nitulisi ri sia: Potovemo Tupumu, Alatala ante mpuu-mpuu raramu, ante pura-pura pekirimu, pura-pura pokainggumu bo pura-pura pompakulemu. Potovemo singgamanusiamu mpo pompotovemu karomu mboto.” †

²⁸ Nanguli i Yesus ka ia, “Nambelamo pesanamu tutu. Poviamo mpo anu niulimu tutu ala iko matuvu mabelo sampe ri kasae-saena.”

²⁹ Tapi guru agama haitu ledo nadota radagi, nisarumakana nanoamo pokaingguna. Jadi nekutana vai ia nte i Yesus, “Isema singgamanusiaku kana kupotove?”

³⁰ Nesana i Yesus ante porapa hitu; “Naria saito toYahudi notua lako ri ngata Yerusalem hau ri ngata Yerikho. Ri tatanga polipana, ia nosinggavaka topeago, bo pura-pura pakeana ante mbara-mbarana naupu niagora. Ia nibobara sakidepa namate, bo nipalaisira bayangimo. ³¹ Dopa nasae kaliutakana haitu,

† *Ulangan 6:5; Imammat 19:18*

naria saito topanggeni pesomba ntoYahudi noliu ri sia. Nikitanapa tona niboba haitu, netalilimo ia bo napo-lamo. ³² Ivesia muni toLewi anu nokarajaa ri Banua nu Alatala. Ia muni noliu ri sia. Nikitanapa tona niboba ntopeago pangane, aga nipetalilikana muni bo napo-lamo ia. ³³ Naupu haitu, naria saito toSamaria noliu ri sia muni. Nikitanapa tona niboba haitu, naasi mpuu matana. ³⁴ Hau ia nombatotoaka tona haitu.

Nipegasana uve anggur belana bo nipakulisina ante lana pade nibonggona kae. Naupu haitu nisavirakana ri keledai, pade nikenina ri banua ponturo ntorata bo nipiara ri sia.

³⁵ Naeo mpadondo toSamaria haitu nombasuvuraka rompeka doi salaka †† bo nidekeina ka tupu banua nipesaira haitu, pade niulina, ‘Jagai ruru tona nadua hitu. Ane ledo magana, damo manjili yaku pade kuba-yari.’ ”

³⁶ I Yesus nompakaupu tesaNa bo nekutana nte guru agama anu madota mombaopa tesaNa, ivei: “Nantuntuni panggavamiu, lako ri tona tatalu haitu, isema nompotove tona niago pangane?”

³⁷ Nesana guru agama, “Tona naasi matana nantulungi tona haitu.”

Nanguli i Yesus, “Koimo, bo povia ivesia muni!”

I Yesus hau nanggita i Marta bo i Maria

³⁸ Naupu haitu i Yesus ante anaguruNa nompapola polipara, nesai ri sangu ngata. Ri sia naria saito mombine nosanga i Marta nogaga i Yesus hau ri banuana.

³⁹ Naria saito sampesuvuna mombine, nosanga i Maria. I Maria haitu nakava nonturo napara kada i Yesus bo nompetalingai pepatudukiNa. ⁴⁰ Tapi i Marta nasesa katoratana haitu. Jadi hau i Marta nanguli ka i Yesus, “Guru, nabelo tano nipekiriMiu sampesuvuku nompalamba yaku nokarajaa saitoku? Tudumo ia tumai mantulungi yaku.”

⁴¹ Nesana i Yesus, “Heh, Marta, nikitaKu iko nabago bo nasesa raramu nompekirika mpengaya-ngaya.

⁴² Tano mai aga sangaya nopoko, haitumo mangepe tesa nu Alatala. I Maria nompelisi tobelona, anu ledo mamala raalasi ntona lako nte ia.”

I Yesus nompatuduki anaguruNa mosambaya

Matius 6:9-13; 7:7-11

11 Naria sanggani i Yesus hau nosambaya. Naupu Ia nosambaya, nangulimo saito anaguruNa, “Pue, patuduki muni kami mosambaya mpo i Yohanes Topedi nompatuduki anaguruNa nosambaya.”

² Nanguli i Yesus ka ira, “Ane komiu mosambaya, ulimiu ivehitu:

‘Tata, aga Komiu masipato rapetupu bo rapakaoge.

†† *Rompeka doi salaka gaji roeo topokarajaa, magana rabayari ponturo talu-minggu kasaena.*

Komiumo Magau kami. Perapi Komiu momparenta ri dunia hitu.

³ Dekei ka kami kande niparaluu kami eo-eo.

⁴ Ampungimo dosa kami mpo kami muni nombaampungungi pura-pura tona nasala nte kami.

Bo nee rapalamba kami rapesori.' "

⁵ Naliu haitu, i Yesus nanguli ka anaguruNa, "Rapana saito komiu hau ri banua nu roamiu tanga bongi bo manguli ka ia, 'Sampesuvu, mai sakide kandeamiu,

⁶ naria roaku da ri polipana dako nesai ri banuaku.

Tapi ledo naria anu kupakande ka ia.' ⁷ Rapana roamiu mesana ivei: 'Nee rabato yaku! Vamba nikapukumo bo kami ntali ana naturumo. Domaku membangu mombadekei ka iko anu niperapimu.'

⁸ Jadi berimbamo? Kuuli ka komiu, naupa komiu novega rapa, ledo madota roamiu membangu bo mombadekei anu niperapimiu. Tapi, kaupuna ia kana membangu mombadekei ka komiu anu niparaluumiu, sabana komiu ledo naeya matamiu nerapi njuu nte ia.

⁹ Jadi, Kuuli ka komiu, perapimo nte Alatala bo radekeiNa ka komiu. Elomo, bo rakavamiu. Tanedemo vamba bo vamba raunggeNa ka komiu. ¹⁰ Apa isema-sema merapi, kana radekei ka ia. Isema-sema mompaelo, kana rakavana. Bo isema-sema mantanede vamba, kana raungge ka ia. ¹¹ Ane anamiu merapi bau ntasi, ule radekeimiu? ¹² Ane anamiu merapi ntalu, supitole radekeimiu? Tantu ledo! ¹³ Naupa komiu tona nadosa, nisanimiu mombadekei anu nabelo ka anamiu. Nemopa Tuamata ri suruga. Ia mpuu-mpuu mombadekei Nosa Gasana ka isema-sema merapi nte Ia."

Tona nanjalai i Yesus, niulira kuasaNa lako ri Magau nu Seta

Matius 12:22-28; Markus 3:20-26

¹⁴ Naria sanggani i Yesus nompopalai seta lako nte tona nipakabobo nu seta. Nalaipa seta, namalamo tobobo haitu notesa. Nanggita haitu nokumaa puramo todea ri sia. ¹⁵ Tapi naria muni sanu nanguli, "Ia namala nompopalai seta ante kuasa lako nte i Beelzebul, Magau nu Seta." ¹⁶ Naria muni tona madota mombaopa tesa i Yesus. Jadi niperapira tanda nabaraka rapopakitaNa ka ira, ala rasanira Ia mpuu-mpuu niposumba nu Alatala. ¹⁷ Tapi nisani i Yesus patujura. Jadi niulikaNa ira, "Ane maria saito magau bo todeana bate-batena mosipobali, natantu kamagauana haitu magero. Bo ane tona sambanua bate-batena mosipobali, tantu magaro pobanuara. ¹⁸ Ivesia muni Magau nu Seta. Ane seta-setana mosipobali, tantu mageromo kamagauana. NiuliKu ivesia, sabana niulimiu Yaku nompopalai seta ante kuasa lako nte i Beelzebul, Magau nu Seta. Tapi ledo nakana. *Natantu Magau nu Seta ledo madota nompopalai seta-setana mboto.* ¹⁹ Naria muni ana-anagurumiu mboto nompopalai seta-seta. Uli ka Yaku, ante kuasa isema

nipopalaira seta-seta? Natantu ante kuasa nu Alatala! Jadi povia nu anagurumiu mboto nompokalanto peraimiu tutu nasala! ²⁰ Yaku nompopalai seta-seta ante kuasa nu Alatala. Jadi haitu nompopakita ka komiu, Alatala nompamulamo momparenta ri tatangamiu!"

Magau nu Seta nirapaka tona naroso

Matius 12:29-30; Markus 3:27-30

²¹ "Ane maria tona maroso mombajagai banuana bo magana pura-pura pareva posievana, ledo makuya mbara-mbarana. ²² Tapi ane tona narosopa makava mangeva tupu banua haitu, radagina bo raalasina puramo pareva posieva anu nisarumaka ntupu banua haitu. Bo mbara-mbara rabanua haitu rapobagina nte roana. *Jadi Yaku nompopalai seta-seta apa Yaku nakuasapa.*"

²³ Nanguli munimo i Yesus, "Isema ledo nosabingga nte Yaku, iamo nangeva Yaku. Bo isema ledo nantulungi riar pokarajaaKu, iamo nompakagero pokarajaaKu."

Seta-seta mombasiliki ponturona bara ipia

Matius 12:43-45

²⁴ I Yesus nompakasimbayu manusia ante banua, niuliNa, "Ane seta nesuvu bo nompalaisi saito manusia, ia nolilive hau tumai ri ponturo nangau mangelo ponturo rapangosanakana. Bo ane ledo rakavana raulina, 'Aginapa yaku manjili hau nte tona nipalaisiku ria.'

²⁵ Makava ia ri sia, rakavana tona haitu eva banua boa, ledo ria toponturona bo banua haitu naupu nipegasa bo nipasiayu. ²⁶ Jadi ia hau mompokio papitu seta ntanina anu nadaapa pade ia mboto. Bo ira makava mesua bo monturo riar ntona haitu. Kaupuna katuvu ntona haitu melabipa kadaana pade pamulana bara ipia."

Tona mpuu-mpuu nabelo

²⁷ Naupu i Yesus nanguli haitu, naria saito mombine ri olo ntodea nanguli ka Ia nte suara namangga, "Nabelo mpuu mombine anu nompoanaka Komiu bo nompotomi Komiu!"

²⁸ Tapi nesana i Yesus, "Nakana, tapi nabelopa tona nangepe tesa nu Alatala bo nioseakana."

Tona nerapi i Yesus movia kabaraka

Matius 12:38-42; Markus 8:11-13

²⁹ Todea da nombatagui i Yesus, jadi nipapolaNamo tesaNa ivei: "Nadaa mpuu tona natuvu sii-sii! Niperapira Yaku movia tanda nabaraka *ala rasanira Yaku mpuu-mpuu niposumba nu Alatala.* Tapi ledo ria tanda rapopakita ka ira. Aga tanda mpo anu najadi nte Nabi Yunus nggaulu rapopakita ka ira. ³⁰ Anu najadi ri karo

Nabi Yunus najadi tanda nipokumaaka ntona ri ngata Niniwe nggaulu. Ivesia muni Yaku, Ana nu Manusia. Anu majadi ri karoKu ngena majadi tanda rapokumaaka ntona tempo sii-sii.³¹ Ri Eo Potangara bara maipia, magau mombine tana Syeba rapakatuvu mpanjili mosanggani-nggani ante komiu anu natuvu sii-sii. Bo ia mombasalai pokainggumiu sabana ia nakava lako ri ngata nakavao mangepe pepatuduki Magau Salomo, anu nanoto mpuu pekirina. Tapi sii-sii naria saito ri tatangamiu naogepa bo nanotopa pade Magau Salomo, tapi ledo nadota komiu nomparasaya tesaNa.³² Ivesia muni ri Eo Potangara tupu ngata Niniwe rapakatuvu mpanjili mosanggani-nggani nte komiu anu natuvu sii-sii. Bo ira mombasalai pokainggumiu sabana ira najeamo nangepe tesa Nabi Yunus. Sii-sii naria saito ri tatangamiu naogepa pade Nabi Yunus, tapi ledo nadota komiu nomparasaya tesaNa.”

Pepatuduki nakana nirapaka reme

Matius 5:15; 6:22-23

³³ “Ledo naria tona mombatunju poindo bo ratabuniakana ranggapeo bara rataungona ntonda. Natantu poindo haitu kana raboli ri kalangana ala pura-pura topesua rabanua manggita karemena.^{†34} Mata nirapaka poindo nu karo. Ane matata nabelo, nalanto pekita. Tapi ane navurau matata, ledo malanto rakitata nu apa-nuapa. Ivesia muni pekiri rara ntaita.³⁵ Jadi, pakabelo-belo! Nee sampe pekiri rara ntaita majadi malanda.³⁶ Ane pekiri rara ntaita nareme bo ledo naria nuapa-nuapa nalanda, pura-pura katuvuta mareme mpuu mpo anu nivanta mpoindo.” * ††

I Yesus nompakasala toFarisi bo guru-guru agama

Matius 23:1-36; Markus 12:38-40

³⁷ Naupu i Yesus notesa, naria saito toFarisi nombagaga Ia hau mangande ri banuana, jadi hau mpuumo Ia.³⁸ ToFarisi haitu nahera nanggita i Yesus ledo nantuntuni ada ntoFarisi nemanjo ntani pade nangande.³⁹ Haitu sampe i Yesus nanguli ka ia, “Komiu toFarisi nangoseaka ada-ada agama anu nikita ntona, tapi raramiu nadaa bo nainoka mbara-mbara ntona ntanina. Komiu nasimbayu mpo tona notoposi boda bo suraya ri savalikuna tapi riarana bate-batena natagara!⁴⁰ Nadoyo mpuu komiu! Alatala ledo aga nompajadi karomiu tapi nipajadiNa muni rara ntaimiu!⁴¹ Dekeimo ka tona napakasi ante belo rara bo ivesiamo pura-pura majadi magasa ka komiu.

⁴² Mandasa mpuu komiu toFarisi! Komiu nombadekei ka Alatala sabagia lako ri sapulu bagia pura-

pura asele panggaviamiu, sampe nau rampa-rampa nakodi mpo tumbavani, kula, bo rampa-rampa ntanina. Nabelo poviamiu tutu, tapi parenta anu nantudu kita mokainggu manoa bo mompotove Alatala, ledo nipeilimiu! Tano haitumo parenta nopoko raoseakamiu bo nee muni rakalingasimiu parenta ntanina.

⁴³ Mandasa mpuu komiu toFarisi! Nipokonomiu nonturo ri ponturo nabelo ri banua petupu, bo nipokonomiu muni rabila ntona ri potomu.⁴⁴ Mandasa mpuu komiu! Komiu nasimbayu mpo dayo ledo naria tandana. Tona nojeje dayo haitu tapi ledo nisanira naria anu naruto riarana. Komiu nabelo ri savalikuna tapi rara ntaimiu nadaa.” ‡

⁴⁵ Naria saito lako ri guru-guru agama ri sia nanguli ka i Yesus, “Guru, ante tesaMiu tutu, nislaiMiu muni kami!”

⁴⁶ Nesana i Yesus, “Mandasa muni komiu guru-guru agama! Komiu nompakadea atura bo ada nakaja raoseaka ntona bo nipasuumiu tona mangoseakana. Tapi komiu mboto ledo nantulungi ira mangoseakana!

⁴⁷ Mandasa mpuu komiu! Komiu nompakabelo dayo nabi-nabi nu Alatala, tano totuamiu mboto nompatesi nabi-nabi haitu!⁴⁸ Pokainggumiu nompakalanto komiu nasintuvu nte pokainggu ntotuamiu. Ira nompatesi nabi-nabi bo komiu nompakaramba dayora!⁴⁹ Sabana haitu, Noto nu Alatala nanguli pakalanto ivei:

‘Nabi-nabi bo suro-suroKu Kutudu hau nte ira gahaitu. Sanu rapatesira, bo sanu rapandasara.’

*Alatala nanguli ivesia sabana nisaniNa komiu anu natuvu sii-sii nasimbayu kadaamiu ante totuamiu nggaulu.*⁵⁰ Jadi komiu anu natuvu sii-sii rahuku nu Alatala sabana kamate nu nabi pura-pura anu nipatesi lako ri pompajadi duniame.⁵¹ Nompamula lako ri nompatesi i Habel sampe ri nompatesi i Zakharria anu najadi ri doyata Banua nu Alatala ri olo nu lanta pesomba bo Banua nu Alatala. Parasayamo! Komiu natuvu sii-sii mpuumpuu rahuku sabana pokainggu ntotuamiu! ††

⁵² Mandasa mpuu komiu guru-guru agama! Kakanana komiumo masipato mompatuduki tona mosisani nte Alatala. Tapi komiu mboto ledo nadota mosisani nte Alatala, bo komiu nombalava tona ntanina anu madota mosisani nte Alatala.”

⁵³ Naupu notesa ivesia nalaimo i Yesus. Nompamula lako ri tempo haitu, nadua mpuu rara nu guru-guru agama bo toFarisi nte Ia. Nipasimbukura mangopa tesa i Yesus ala ratesaNa mpengaya-ngaya,⁵⁴ bo nikanotosira njuu Ia mbelaka masala anu rauliNa bo mamala rapangadura.

† I Yesus ledo aga notesa pompake poindo. NitesaNa muni pepatuduki nakana anu nombatesa Ia. Pepatuduki haitu ledo nitabuniaka. †† Batua ntesa i Yesus, kita kana mompariara mpuu pepatuduki nakana nipatoleleNa ala mareme pikiri rara ntaita bo katuvuta bate-batena mabelo.

‡ ToYahudi nombadika tanda ri dayora ala ledo rajeje ntona, apa niparasayara ane tona mombatui tomate atau dayo, ia majadi naruto bo ledo mamala metupu singgani nte toYahudi ntanina. †† Ira rahuku sabana ira nasimbayu kadaana ante totuara.

I Yesus nangulika anaguruNa nee mangoseaka
pokainggu ntoFarisi

Matius 10:26-27

12 Nonjobu-njobu tona nasiromu ri sia mompeinta i Yesus, sampe nosimpilii nosijeje-jeje kada. I Yesus nangulika anaguruNa, "Pakabelo! Komiu kana mainga nte ragi ntoFarisi. Batuana, nee sampe komiu mompasiara pokainggura aga nabelo ri lenje tapi rarara nadaa! ² Tapi pokainggu nitabuniakara kana rasani ntona, sabana pura-pura anu nitabuniaka sii-sii kana malanto rakita ngena, bo pura-pura rahasia kana rasani ntodea ngena. ³ Jadi anu nitesamiu bongina, raepe ntona eona. Bo anu nipanggalivayakamiu ka roa riarantombi, rapatolele ka todea ri savalikuna!"

Agina kita matundu nte Alatala bo nee maeka ka
manusia

Matius 10:28-31

⁴ "Vega-vegaKu, pariaramo! Nee maeka ka tona madota mompatesi komiu, sabana maupu haitu domo ria nuapa-nuapa mamala rapoviara ka komiu. ⁵ Kuuli ka komiu isema masipato rapokaekamiu! Aginamo komiu maeka nte Alatala, sabana Ia nakuasa mompatesi karomiu bo mombanavusaka komiu riaranaraka! Pariaramo tesaKu hitu! Aga Alatala masipato rapokaekamiu! ⁶ Natantu nisanimiu tonji rone nipobalu lima-mbaa rompeka doi kodi. Nau ledo nadea alina ri panggita manusia, ledo ria sambaa ledo nitora nu Alatala. ⁷ Iyapa tonji rone nitornaNa, nemopa komiu. Nau bulua ri balenggamiu nirekeNa bo nisaniNa pura. Jadi nee maeka, apa nipotove nu Alatala kita pade tonji rone nadea."

Kita kana manguli ri ngayo ntodea kita topangoseaka i
Yesus

Matius 10:32-33; 12:32; 10:19-20

⁸ "Pariaramo! Isema-sema manguli ri ngayo ntodea, ia topangoseaka Yaku, Yaku muni manguli ri ngayo malaeka-malaeka nu Alatala, ia topangoseaka Yaku. ⁹ Tapi isema-sema nanguli ri ngayo manusia, ledo nisanina Yaku, Yaku muni manguli ri ngayo malaeka-malaeka nu Alatala, ledo nisaniKu ia.

¹⁰ Isema-sema nompakadaa Yaku, Ana nu Manusia, mamala raampung. Tapi isema-sema nombasalai Nosa Gasa nu Alatala, ledo raampung.

¹¹ Ane komiu rakeni ntona ri ngayo ntopotangara ri banua petupu, atau ri ngayo pomarenta sabana komiu nangoseaka Yaku, nee makini raramiu mompekirika nuapa raulimiu mombasaliku karomiu. ¹² Apa tempo haitu, Nosa Gasa nu Alatala mboto mompatuduki ka komiu nuapa masipato raulimiu."

Porapa tokalumana nadoyo

¹³ Saito lako ri todea nanguli ka i Yesus, "Guru, tudumo sampesuvuku mombabagi ka yaku bagiaku lako ri kaboli kakalumana ntuama kami."

¹⁴ Nesanamo i Yesus, "Sampesuvu, isema nangangataka Yaku majadi topobagi kakalumana ka komiu?"

¹⁵ Pade nanguli i Yesus ka todea, "Pakabelo-belo! Nee madamba gaga raramiu ante mbara-mbara, sabana naupa mbara-mbaramiu nadea ledo haitu mompakajadi katuvumiu mabelo."

¹⁶ I Yesus norapa mompakalanto tesaNa pangane ivei: "Naria saito tona nakalumana, tanana nabelo bo aselena nadea mpoo. ¹⁷ Tona haitu nompekiri, 'Nuapa kupovia? Domo ria pomboli asele poviaku.' ¹⁸ Naupu nipekirina, nitesanamo ka karona mboto, 'Ivei kupovia. Kugerosi gampiri kodi hitu bo kupoviaka gampiri mbarasona bo kuboli ri sia asele poviaku bo mbara-mbaraku. ¹⁹ Maupu haitu domo mokarajaa yaku, apa nadea mpoo mbara-mbara niboliku, madea mpae pade maupu. Jadi mamala yaku motondodo-ndodo, mangande, manginu bo matuvu masana.'

²⁰ Tapi Alatala nanguli ka ia, 'Heh, todayo! Bongi hitu iko mamate. Pura-pura anu nipakasadiamu, isema tupuna ngena? "

²¹ Kaupu tesa haitu i Yesus nanguli, "Ivesiamo majadi nte tona nompasimbuku nompasiromu kakalumana ka karona mboto, tapi katuvuna napakasi ri panggita nu Alatala."

Nee makini rara mompekirika katuvumiu ri dunia

Matius 6:19-21, 25-34

²² Pade nanguli i Yesus ka anaguruNa ivei: "Kuuli ka komiu, nee makini raramiu mompekirika katuvumiu bara nuapa rakandemiu, bara baju nuapa rapakemiu, ²³ apa katuvuta nopokopa pade kandeana bo karota nopokopa pade pakeata ²⁴ Peintamo tonji kalikoa. Ira ledo notuda pae, ledo nokato, bo ledo naria gampiri pomboli kandeana. Tapi naupa ivesia, Alatala nombadekei kandeana ka ira! Nemopa komiu anu nipotoveNapa pade tonji! ²⁵ Nuapa gunana makini raramiu? Nau damo makini njuu raramiu, ledo ria saitoa komiu mompakule mantambai umurumiu, nau aga sambonggi. ²⁶ Ane ledo rapakulemiu movia anu nakodi haitu, rapokuya makini raramiu, mompekirika anu ntanina? ²⁷ Peintamo sese nu bunga ranggarava. Bunga haitu natuvu nau ledo nokarajaa, ledo nantanu kae rapovia baju. Tapi naupa ivesia, Kuuli ka komiu, Magau Salomo anu nakalumana mpoo, ledo ria pakeana nagaya mpo sese nu bunga! ²⁸ Jadi ane Alatala nompakagaya bunga-bunga ranggavoko anu aga natuvu sampalai bo rapalabusimo, nemopa komiu! Natantu Ia mombadekei pakea niparaluumiu! Nakura mpoo pomparasayamiu!"

²⁹ Jadi nee maingu bo makini raramiu mompekirika nu-apa rakandemi baranuapa rainumi! ³⁰ Haitu pura anu nielo ntona ledonosisani nte Alatala. Tapi ledoparaluu makini raramiu, sabana Alatala Tuamamiu, nisaniNa purapura anu niparaluumiu. ³¹ Jadi pasimbukumo ala Alatala mompamenta riara katuvumiu, bo purapura anu ntanina haitu radekeiNa muni ka komiu."

³² I Yesus nompapola tesaNa ivei: "Nau ledonadea komiu anaguruKu, nee maeka, sabana komiu nipelisi nTuamamiu Alatala, lako ri kabelo raraNa ala komiu moparenta mosangani-nggani nte Ia riara poparentaNa. ³³ Jadi pobalumo mbara-mbaramiu bo dekeimo alina haitu ka tona napakasi. Poviamo batutu doi anu ledo mamala magero. Batuana, poviamo anu mompakadamba rara nu Alatala. Ivesiamo komiu momboli kakalumana ri suruga, anu ledo maupu-upu bo ledorapangangga ntona atau rakandesi nu saipa. ³⁴ Pasimbukumo mompakadea kakalumana ri suruga. Apa ri umba naria kakalumanamiu, ri sia muni pekirimiu."

Kita kana masadia tempo i Yesus makava

³⁵⁻³⁶ I Yesus notesa sangu porapa ivei: "Komiu kana masadia tempo Yaku makava. Komiu kana mainga nasimbayu mpo batua-batua nompopea kakava nu madikara lako ri posusa ponika. Batua haitu batebatena masadia bo poindora ledorapepayara. Ane makava madikara mombatanede vamba, masalisa vamba haitu raungge ka ia. ³⁷ Nabelo mpuu batua haitu ane manjili madikara bo rakavana ira da nemata! Pariaramo! Madika haitu mompasua baju pokarajaa bo ratuduna ira monturo, bo ia mboto mombasondu kanda ka ira! ³⁸ Nabelo mpuu batua-batua nikavana nasadia nompopea kakava nu madikara, naupa ia makava tanga bongi bara bobayana."

³⁹ Pade nanguli munimo i Yesus, "Pariaramo porapa hitu! Ane rasani ntupu banua tinti sakuya topangangga makava, natantumorajagaina banuana bo ledorapalambana topangangga mesuarabanua. ⁴⁰ Ivesia muni komiu. Komiu kana mainga nompopea kakavaKu, apa ledonisanimiu tempona Yaku, Ana nu Manusia makava."

Porapa batua tobelona anu nangoseaka dota nu madikana

Matius 24:45-51

⁴¹ I Petrus nekutana, "Pue, porapa haitu nirapaMiu ka kami atau ka todea ntanina muni?"

⁴² Nesanamo i Yesus, "Haitu niuliKu ka batua nanoto bo natutu neoseaka. Tona haitu raanggataka nu madikana majadi topompasiayu purapura batuanantanina riara banua. Iamo mompasiayu kanda ka

batua-batua ntanina eo-eo. ⁴³ Mabelo mpuu batua haitu ane tempo madikana manjili, nipovianamo bagoniparasaya ka ia. ⁴⁴ Pariaramo tesaKu hitu! Madika haitu manganggataka ia majadi topompasiayu purapura mbara-mbarana.

⁴⁵ Tapi mandasa mpuu batua haitu ane agamompekiriri riara ntaina ivei: 'Wee! Da masaepa pade manjili madikaku.' Bo ia aganombaboba batua-batua ntaninalanggai bo mombine, bo agamangande manginu bo malimpuno. ⁴⁶ Tempo batua haitu movia madaa ivesia, sampesanika madikana manjilimo ri eo bo jaa ledonisanina. Batua haitu rahuku bo ratedaka ri savalikuna nasimbayu mpo tona ledo natundu nte Alatala.

⁴⁷ Ane batua nisanina dota nu madikana, tapi ledonainga bo ledonipoviana dota nu madikana, ia kana rajeani pakandasa. ⁴⁸ Tapi ane ledonisani nu batuanu-apanipodota nu madikana bo nipoviana anu nasala sampe masipato rahuku, ia agaraboba sakide. NiuliKu ivesia sabana tona nidekeika nadea, nadea muni ratuntu lako nte ia. Tona niparasayaka nadea, nadea muni rasarumaka lako nte ia."

Tona mosieva, sanu nangoseaka i Yesus, sanu ledo

Matius 10:34-36

⁴⁹ I Yesus nanguli, "Kakanana Yaku nakava mompapusi manusia ri dunia ante pehuku nu Alatala. Naogempuu raraKu rapanakimo apu haitu! ⁵⁰ Tapi da nariapapeparajea kana Kurasai. Bo nasusa mpuu raraKu anedopa majadi. ⁵¹ Nisarumakamiu kakavaKu mompoppinggabelo tona ri dunia hitu, tapi ledonakana! KakavaKu agamompoposieva tona. ⁵² Nompamula siisii ane maria alima tona sambanua, ira matebagi-bagi bo mosieva. Ira tatalu mosieva ante ira randua. ⁵³ Totua langgai mosieva ante anana langgai. Totua mombine mosieva ante anana mombine. Bo mosieva muni ante maniana mombine."

Nombatasere tempo

Matius 16:2-3

⁵⁴ Nanguli munimo i Yesus ka todea, "Ane nikitamiu kulimu neumba ri mpanauna, nisanimiu domo masae maudamo. Bo mpuu-mpuu mauda. ⁵⁵ Ane nikitamiu poiri neburu lako ri puluna, nisanimiu kana mapane eo. Bo mpuu-mpuu mapane eo. ⁵⁶ Komiu aga tobelo ri sumba! Komiu natau nantasere ravana bo nompetandaina. Nakuya ledonisanimiu anu nipovia nu Alatala sii-sii?"

Dopame ratangara, kita kana mosieloka belo ante bali-ta

Matius 5:25-26

⁵⁷ "Nakuya ledonipekirimiu mbotomo pokainggu mbana nabelo? ⁵⁸ Rapana, ane komiu rapangadu

ntona bo hau ri ngayo ntopotangara, agina komiu mosieloka belo nte topangadu haitu tempo komiu da ri tatanga dala. Nee sampe komiu rakenina mpou ratangara ri ngayo ntopotangara bo topotangara haitu mombadekei komiu ka polisi ala rasuaraka riara ntarunggu. ⁵⁹ Pariaramo! Komiu ledo rasuvuraka lako ri tarunggu ane dopa nibayarimiu pakaupu vayamiu!”

Ane komiu ledo majea komiu rapakandasa

13 Tempona haitu naria tona notesa ka i Yesus, nombatesa bara sako-ndua toGalilea nipatesi Gubernur Pilatus tempo ira nombadekei binata pesomba ka Alatala. ² Nangepe kareba haitu nanguli i Yesus, “Nee rapekirimiu toGalilea namate haitu sabana dosara nadeapa pade dosa ntoGalilea ntanina. ³ Tantu ledo! Tapi Kuuli ka komiu, ane komiu ledo majea movia dosa, komiu rahuku pura. ⁴ Toramo tona sapulu uvalu anu namate napara Kola Siloam tempo ira nirumpi nu banua langa. Nee rapekirimiu ira namate sabana nadeapa dosara pade dosa ntoYerusalem ntanina! ⁵ Ledo ntoto nakana! Kuuli vai ka komiu sangganipa, ane komiu ledo majea movia dosamiu, natanu komiu pura-pura rahuku muni.”

Porapa kayu ara ledo novua

⁶ Naupu sia i Yesus notesa porapa hitu, ivei: “Naria sanggayu kayu ara nituda ntona ri taluana. Naria saeo, tupu ntalua hau nangelo vua kayu haitu, tapi ledo ria sangua vuana nikavana. ⁷ Jadi niulikana topokarajaa talua haitu, ‘Peintamo! Talu-mpaemo kasaena tumai njuu yaku mangelo vuana, tapi nau sangua vuana ledo ria nikavaku. Agina ratovosimo kayu hitu. Ledo ria gunana, aga nompakarugi boya ntana.’

⁸ Tapi nesana topokarajaa talua haitu, ‘Tua, palambakamo ruru kayu hitu matuvu sampaepa. Kutonggo tana ri punana bo kudika pupu. ⁹ Rakitata ruru. Bara movua mpae meonga. Tapi ane ledo movua ngena, ratovositamo.’”

Ri eo penonto i Yesus nompakabelo mombine nabunggu

¹⁰ Naria saeo ri eo penonto, i Yesus nompaguru ri banua petupu. ¹¹ Ri sia naria saito mombine nipakabunggu nu seta, sapulu valu-mpaemo kasaena. Ia nabunggu bo domo nanoro neangga. ¹² Tempo i Yesus nanggita mombine haitu, nipokioNa bo niulikaNa, “Ina, mabelomo komiu.” ¹³ Pade nidikaNa paleNa ri karo nu mombine, kaliu-liu nanoro karona, bo ni-toyanamo Alatala.

¹⁴ Tempo pakeni ri banua petupu haitu nanggita i Yesus nompakabelo tobunggu ri eo penonto, narau-mo rarana. Bo niulikana todea ri sia, “Riara saminggu naria ono-eo nipakatantu ka kita mokarajaa. Kakava-

mo komiu rapakabelo ri eo ntanina, aga nee ri eo penonto!”

¹⁵ Nangepe tesa haitu, nangulimo i Yesus, “Komiu aga tobelo ri sumba! Ri eo penonto pura-pura komiu nombakabasaka japimiu, bara jaramiu, bo nikenimiu rapopainu. ¹⁶ Tapi ri sii, naria saito mombine, muli i Abraham, nipou nu Magau Seta sapulu valu-mpaemo kasaena. Ledo masipato ia rakabasaka lako ri kuasa nu seta ri eo penonto?” ¹⁷ Tesa i Yesus, nompakaeya topangeva Ia. Tapi tona ntanina nadamba pura nang-gita kabaraka nipoviaNa.

Porapa batu mandoe

Matius 13:31-32; Markus 4:30-32

¹⁸ Naupu haitu i Yesus nanguli, “Berimba kajadina Poparenta nu Alatala? Nuapa Kupasimbayuka? ¹⁹ Kajadina nasimbayu ante porapa hitu: naria sangu batu mandoe † anu nituda ri talua. Batu mandoe haitu natuvu sampe najadi kayu mbaso. Nadea tonji nakava novia jumuna ri tinggu kayu haitu.”

Porapa ragi

Matius 13:33

²⁰ Nanguli vaimo i Yesus, “Nuapa Kupakasimbayuka kajadina Poparenta nu Alatala? ²¹ Kajadina nasimbayu ante ragi niala mombine bo nipasigalona ante talunjuka labu nu gando. Naupu nipasigalona, nenggam-ba puramo labu nu gando haitu.”

Majadi todea ri Poparenta nu Alatala

Matius 7:13-14, 21-23

²² Tempo i Yesus nompapola polipana hau ri ngata Yerusalem, Ia noliu ri ngata-ngata ntanina bo nompaguru. ²³ Naria tona nakava nekutana nte Ia, “Pue, ledo madea tona rapakasalama?”

Nesanamo i Yesus, ²⁴ “Tona rapakasalama namala nirapaka tona mesua ri vamba napii. Pasimbukumo mesua ri vamba napii haitu. Apa nadea tona mompasimbuku mesua tapi ledo rapakulera. ²⁵ Apa ane rapana, tupu nu banua membangu mombatutui vamba, bo komiu meangga ri savalikuna mombatanede vamba bo manguli, ‘Tua, ungge ka kami vamba!’ tupu nu banua haitu aga mesana ivei: ‘Ledo nisaniku komiu!’

²⁶ Bo komiu manguli, ‘Kami nangande, nangu nu nosanggani-nggani ante komiu, tua. Bo komiu muni nompaguru ri ngata kami bara ipia!’

²⁷ Tapi tupu nu banua haitu aga mesana ka komiu, ‘Ledo nisaniKu komiu, bo ledo nisaniKu lako ri umba komiu. Palaimo lako ri sii. Komiu pura-pura tona nadaa!’

²⁸ Tempo komiu manggita i Abraham, i Ishak, bo i Yakub mosanggani-nggani ante pura-pura nabi ng-

† Mandoe nitesara ri sii sangaya mandoe nambaso, sampe talu-metere kalangana.

gaulu mosusa madamba-damba ri Poparenta nu Alatala, motumangi komiu bo masusa mpuu raramiu sabana komiu rapopalai hau ri savalikuna! ²⁹ Madea tona ntanina anu ledo toYahudi majadi todea ri Poparenta nu Alatala. Ira makava lako ri mpandakena, mpanauna, tasina, bo lako ri puluna mosusa madamba-damba ri Poparenta nu Alatala. ³⁰ Pariaramo! Nadea tona naripuri sii-sii, majadi marikolu. Bo nadea tona narikolu sii-sii, majadi maripuri."

Nabuku rara i Yesus sabana toYerusalem ledo nadota nantarima Ia
Matius 23:37-39

³¹ Tempona haitu muni, naria bara sako-ndua toFarisi nakava nte i Yesus bo nanguli, "Komiu kana malai lako ri sii, sabana Magau Herodes madota mompatesi Komiu!"

³² Tapi nesana i Yesus, "Koi ulika topeakalani haitu ivei: 'Eo hitu bo maile Yaku da mompopalai seta-seta, bo mompakabelo tona nadua. Maipua pade Kupakaupu pokarajaaKu. ³³ Tapi eo hitu, maile bo maipua, kana Kupapola polipaKu hau ri ngata Yerusalem, apa ledo nabelo nabi rapatesi ri ngata ntanina.'

³⁴ He, komiu toYerusalem! Komiu nompatesi nabibi, bo tona nisuro nu Alatala nirempemiu vatu sampe namate! Nadea ngganimo Yaku madota mombasaliku komiu pura-pura, nasimbayu mpo manu tina nombarumutasi anana, tapi ledo nadota komiu. ³⁵ Sabana haitu, Banua nu Alatala rapalaikaNa. Kuuli ka komiu, domo rakitamiu Yaku sampe makava tempona komiu manguli, 'Maoge belo ka Ia anu nakava nipo-sumba nu Alatala!' †"

Ri eo penonto, i Yesus mompakabelo tona nadua

14 Naria saeo ri eo penonto, i Yesus hau nangande ri banua pakeni ntoFarisi. Tona ri sia mompariara nuapa rapovia i Yesus. ² Naria tona nadua neonga ri ngayo i Yesus. Kadana bo palena nebangga puramo. ³ Nanggita tona haitu, nekutanamo i Yesus nte guruguru agama bo toFarisi ri sia, "Nantuntuni atura agamata, mamala kita mompakabelo tona nadua ri eo penonto, atau ledo?"

⁴ Tapi ira ledo nadota nesana. Jadi i Yesus nombadika paleNa ri karo ntona nadua haitu bo nipakabeloNa bo nituduNa manjilimo. ⁵ Naupu haitu, niuliNa ka guruguru agama bo toFarisi, "Ane rapana anamiu bara japimiu manavu ralovu ri eo penonto, natantu rasoreakamiu masalisa ri eo haitu muni."

⁶ Nangepe tesa i Yesus haitu, ledo ria saitoa ira nabia nesana.

Alatala mompakakaoge tona naede rarana

⁷ Ri banua ntoFarisi pangane, i Yesus nanggita torata-torata nompelisi ponturo tobelona. Sabana haitu, nipatudukiNa ira ante porapa hitu: ⁸ "Ane komiu raga-ga hau ri posusa poboti, nee monturo ri ponturo tobelona. Apa ane makava torata naogepa pade komiu, ⁹ tupu nu banua anu nombagaga komiu kana manguli ka komiu, 'Merapi ampu, ponturo hitu nipakasadia ka torata hitu. Komiu kana molinja ri ponturo ntanina.' " I Yesus mompapola tesaNa ivei: "Natantu maeya matamiu molinja ri purina. ¹⁰ Jadi, ane komiu ragaga hau ri posusa, aginamo monturo ri purina ala tupu nu banua makava manguli ka komiu, 'Katumai, monturo ri sii.' Ane ivesia rapoviamiu, komiu rapakaoge ri ngayo ntorata ntanina pura-pura. ¹¹ Isema-sema mompakalanga rarana mboto, kana rapakaede nu Alatala. Bo isema-sema mompakaede rarana mboto, kana rapakaoge nu Alatala."

¹² Pade i Yesus notesa ka tupu nu banua ri sia, "Ane komiu nombagaga tona makava mangande ri posusa, bara eona bara bongina, nee ragagamiu roamiu, bara sampesuvumiu bara tona nakalumana nosadoyanta nte komiu, apa ragagara mpanjili komiu ngena. Jadi ivesiamo rapoviara mombabalasi pokainggumiu nabelo. ¹³ Ane komiu movia posusa, gagamo tona napakasi, tona nakeru, tona napunggu bo tona naburo. ¹⁴ Ane ivesia rapoviamiu, Alatala mombadekei belo ka komiu. Sabana ledo rapakule tona ivehaitu mombabalasi pokainggumiu nabelo. Pokainggumiu nabelo haitu rabalasi nu Alatala tempo tona nanoa rapakatuvu mpanjili lako ri kamatena."

Porapa posusa mbaso

Matius 22:1-10

¹⁵ Naria tona nangande nosinggani-nggani ri posusa haitu nangepe tesa i Yesus bo nanguli: "Mabelo mpuu tona mangande mosinggani-nggani ante Alatala ri posusa mbaso ri Poparenta nu Alatala bara maipia."

¹⁶ I Yesus nesana ante porapa ivei: "Naria sanggani tona novia posusa mbaso bo nadea tona nigagana. ¹⁷ Tempo nasadiamo posusa, nituduna batuana hau mangulika tona nigagana ivei: 'Kamaimo, nasadia puramo!' ¹⁸ Tapi tona nigaga, saito-saito aga notanje. Saito nanguli, 'Yaku dako nangali salimpu tana bo kana hau kupeinta ntani ruru. Merapi ampu yaku, ledo majadi tou!' ¹⁹ Tona ntanina nanguli, 'Yaku dako nangali japi lima-ndai bo da kupesoba mompakena. Merapi ampu yaku, ledo majadi tou!' ²⁰ Bo tona ntanina nanguli, 'Dako noberei yaku, jadi ledo makapo tou!'

²¹ Batua haitu nanjili manggeni tesara ka tupu nu posusa. Narau mpuu rara ntupu posusa, bo niulikana batuana pangane, 'Koimo masalisa hau ri ngata, ri

† Mazmur 118:26

dala mbaso bo dala kodi, bo keni tumai tona napakasi, tona nakeru, tona naburo bo tona napunggu!

²²Jadi naupu nipoviana pura-pura anu niparenta ka ia, niulinamo, 'Tua, nipoviakumo anu niulimiu. Nadea tona nakava tapi da nariapa ponturo naloga.'

²³Jadi nanguli tupu nu posusa ka batuana haitu, 'Ane ivesia, koi hau ri dala mbaso bo dala kodi ri savaliku ngata. Saravimo tona tumai, ala maponu pura ponturo ri banuaku! ²⁴Kuuli ka komiu, ledo ria saitoa tona niga-gaku kudekei mangande nuapa-nuapa ri posusaku hitu!' "

Nakaja majadi topangoseaka i Yesus

Matius 10:37-38

²⁵Nadea tona hau nantuntuni i Yesus ri polipana. Jadi neilimo Ia bo nanguli ka ira, ²⁶"Isema-sema madota mangoseaka Yaku, kana rapotovenapa Yaku pade tina tuamana, bereina, ana-anana, sampesuvu-sampesuvuna, bo karna mboto. Ane ledo rapotovenapa Yaku pade ira pura-pura, bo nelabipa pade karna mboto, ledo mamala ia majadi topangoseaka Yaku. ²⁷Isema-sema ledo madota manjimbuka kayu salibna bo mangoseaka Yaku, ledo mamala majadi topangoseaka Yaku. †

²⁸Rapana, ane maria saito komiu madota movia banua mbaso, natantu dopame mombabangu, kana rarekena ntani ruru doina bara magana bara ledo.

²⁹Apa ane maupumo doina, tano da pandasi najadi, natantu tona manggita poviana haitu aga mompongirika ia. ³⁰Raulira, 'Hee, naoge rarana nompovia banua mbaso tapi ledo nipakulena mompakaupuna.'

³¹Ivesia muni ane magau ante surudaduna sapulu njobu hau mosieva nte magau ntanina ante ropulu njobu surudaduna. Natantu dopame hau, kana rapekirina ntani ruru bara rapakule nu surudaduna mangeva surudadu dea nu magau ntanina. ³²Ane nisanina ledo rapakule nu surudaduna mangevana, natantu da makavao balina, rasuronamo tona hau merapi posing-gabelo.

³³Jadi, ivesia muni ante komiu. Dopame komiu majadi topangoseaka Yaku, kana rapekirimiu ntani ruru. Ane ledo masadia komiu mombakabasaka pura-pura anu naria nte komiu, ledo mamala komiu majadi topangoseaka Yaku."

Topangoseaka i Yesus nirapaka gara

Matius 5:13; Markus 9:50

³⁴"Gara noguna mami. Tapi ane gara mamolimo, berimba mompakapaga mpanjili? ³⁵Domo ria gunana. Ledo namala rapake mompakaboya tana, ledo muni

† ATAU: Isema-sema ledo masadia rapandasa atau rapatesi sabana ia nompasaya Yaku, ia ledo mamala majadi topangoseaka Yaku.

rapajadi pupu. Damo ratedaka nggoo. Isema-sema naria talingana, pariaramo tesaKu hitu!"

Bimba nalipo

Matius 18:12-14

15 Naria sanggani nadea topesingara balasitee ante tona ntanina, anu niuli nteada nadaa pokainggura, nakava nangepe tesa i Yesus. ²Nanggita haitu, toFarisi bo guru agama nongau. "Hm! Ledo nabelo tona hitu! Ia nosimporoa ante tona nadaa bo nangande singgani nte ira!" ††

³Nangepe tesara haitu, nesana vai i Yesus ante porapa hitu ka ira: ⁴"Rapana, ane roamiu mompatuvu bimba saatu anguna bo malipo sangu, nuapa rapoviana? Tantu rapalaisina bimbana siopulu bo sasio ranggarava bo hau raelona sangu bimbana nalipo haitu sampe rakavana. ⁵Ane rakavana bimbana haitu, rasimbuakana manjili ante damba rarana. ⁶Makava ri banua, rapasiromuna roana bo tona nosadoyata nte ia bo raulikana, 'Kamaimo kita madamba-damba, sabana nikavakumo bimbaku nalipo!' ⁷Ivesia muni ri suruga. Ane saito tona nadaa majea, kadamba nu isi suruga naogepa pade kadamba ka siopulu bo sasio tona nanao anu ledo paraluu majea."

Doi nalipo

⁸I Yesus nompapola tesaNa ante porapa ntanina ivei: "Rapana maria mombine ante doi salaka sapulu mpekana. Ane malipo sampeka, nuapa rapoviana? Natantu ratunjuna poindo bo rasaevena banuana mangelo pakabelo sampe rakavana doi nalipo haitu. ⁹Ane rakavana doina haitu, rapasiromuna roana bo tona nosadoyata nte ia ivei: 'Kamaimo kita madamba-damba, sabana doiku nalipo nikavaku mpanjili.' ¹⁰Ivesia muni malaeka-malaeka nu Alatala. Madamba mpuu rarara ane saito tona najea nokainggu nadaa."

Ngana nalipo

¹¹Notesa vaimo i Yesus ante porapa hitu, "Naria saito totua langgai, randua anana, langgai pura. ¹²Ana kaupuna nanguli ka tuamana, 'Tata, dekei ka yakumo bagiaku lako ri kakalumanamiu.' Jadi, nibagi ntua-manamo kakalumanana ka anana randua. ¹³Bara sako-eo kaliuna, ngana kaupu haitu nompobalu bagiana pura-pura, bo hau ri ngata nakavao. Hamai ia nompakaupu doina nggoo-nggoo, natuvu nompesana. ¹⁴Naupu purapa doina, najadimo kaara mpai ri ngata haitu sampe ia muni napepa. ¹⁵Pade hau ia nokarajaa ka tona ri ngata haitu. Tona haitu nombatudu ia hau mojjaga bavu ri talua. ¹⁶Naara mpuu taina

†† Nantuntuni ada ntoYahudi, ane ira mangande mosanggani nggani ante tona nadosa, ira muni majadi maruto bo ledo masipato metupu singgani-nggani nte toYahudi ntanina.

sampe nau tibo bavu mbeki rakandena. Tapi ledo ria saitoa tona nombadekei kandea ka ia. ¹⁷ Kaupuna, nanotomo rarana, bo nipekirina, 'Tona nokarajaa ka tuamaku nelabi-labi kandeara, tapi yaku ri sii mamate ara. ¹⁸ Yaku kana manjili hau nte tuamaku bo kuuli ka ia ivei: Tata, nadosamo yaku ri ngayo nu Alatala bo ri ngayomiu muni. ¹⁹ Tata, domo masipato yaku rareke anamiu, aginamo rarekemi batu.' ²⁰ Naupu nompekiri ivesia, nanjilimo ia hau nte tuamana.

Da nakavao ia, nikita ntuamanamo. Naasi mpuu mata ntuamana nanggita anana. Nangova ia nantomunaka anana. Nakava nte anana nikapuina anana bo niekina. ²¹ Pade nanguli ngana haitu ka tuamana, 'Tata, nadosamo yaku ri ngayo nu Alatala bo ri ngayomiu muni. Domo masipato yaku rareke anamiu.'

²² Tapi tuamana nombaronde batu-batuana bo nituduna, 'Koi ala masalisa baju nabelo bo popasuaka ia. Pasuaka muni sinji ri koya mpalena bo sapatu ri kadana. ²³ Maupu haitu, koi ala ana japi toboyana bo sambalemo. Kita mangande madamba-damba, ²⁴ sabana anaku hitu, mamala raulita namatemo, tapi siipa natuvu mpanjilimo. Ia nalipomo, tapi siipa nikava mpanjilimo.' Jadi nipoviara posusa, bo nadamba-damba.

²⁵ Tempo ira nadamba-damba ri banua, anana lumbua da ri talua. Nanjilipa ia, bo naparamo nte banuara, niepena musi bo suara ntopomore. ²⁶ Nirondena saito batu bo nipekutanana, 'Nokuya tona nadea ri banua?'

²⁷ Nesana batu haitu, 'Nanjilimo tueimiu. Jadi tuamamiu nombatudu kami mosambale japi toboyana sabana anana nalipo nakava ante nabelo.'

²⁸ Nangepe haitu, naraumo rara ana lumbua sampe ledo nadota ia mesua riaru banua. Jadi nesuvu tuamana mantingengesi ia mesua. ²⁹ Tapi nanguli ngana haitu ka tuamana, 'Nompae-mpaemo yaku nokarajaa mpo batuamiu. Ledo ria sanggani niliunakaku anu niparentamiu kaku. Tapi nau sangu ana ntovau ledo ria nidekeimiu kaku ala yaku madamba-damba ante roaku. ³⁰ Damo nakava anamiu nompakaupu kakalumanamiu nikenina hau nongei ka bajinga, bo nisambalekamiu japi ka ia.'

³¹ Nesana tuamana haitu, 'Anaku, iko batena naria ri sii nte yaku. Pura-pura anuku, iko mami tupuna. ³² Tapi kita masipato mosusa madamba sabana tueimu namate, natuvu mpanjili. Ia nalipomo tapi sii-sii nikavata mpanjili.' "

Porapa tona natenggo rarana

16 I Yesus notesa porapa hitu ka anaguruNa: "Naria saito tona nakalumana bo naria muni saito

† *Popasuaka sinji bo sapatu. Batuana, ana haitu nitarima ntuamana. Mompake sinji tandana nalanga panggana, bo mompake sapatu tandana ia ana bo ledo batu. Apa nabiasa batu ledo nosapatu.*

topompasiayu kakalumanana. Tokalumana nangepe perai ntona ka topompasiayu haitu, nompakarugi kakalumana nggoo. ² Jadi nipokiona topompasiayu haitu bo niulikana, 'Natantu mpuu pokainggumu niepeku! Dekei kakumo buku nu doi pokarajaamu nompasiayu kakalumanaku. Domo iko mompasiayu kakalumanaku!'

³ Nangepe haitu, nompekirimu topompasiayu kakalumana, 'Hee, berimbamo yaku hii? Tuaku madota mombakabasaka yaku. Nuapa kupovia ngena? Ane motonggo, domo kupakule. Ane merapi-rapi ri dala, maeya matak. ⁴ Ha, ivei kupovia! Kupakaluu rara ntona noinda nte tuaku, jadi ane rakabasaka i tua yaku ngena, ratarimara yaku ri banuara.' ⁵ Jadi naupusia, hau ia nompokio pura-pura tona noinda doi nte tuana. Nanguli ia ka tona paratama, 'Sakuya indamu nte tuaku?'

⁶ Nesana tona haitu, 'Saatu gumba nu lana.'

Nanguli topompasiayu haitu, 'Sii sura indamu. Ponturo ri sii, tulisimo limapulu gumba nu lana.' ⁷ Naupusia, niulikana tona karanduana, 'Sakuya indamu?'

Nesana tona haitu, 'Sanjobu karu pae.'

Pade nangulimo topompasiayu haitu, 'Siimo sura indamu. Tulisimo valu-atu karu.'

⁸ Tempo tona nakalumana haitu nangepe anu nipovia ntopompasiayu ledo nanao haitu, nitoianamo topompasiayu haitu sabana natau noakala mangelo katuvu mabelo. Apa tona ledo nosisani nte Alatala natau nompasiayu katuvura nte roara. Nataupa ira pade tona natuvu ri reme nTupu nompasiayu katuvura ka tempo makava. ⁹ Kuuli ka komiu, pakemo kakalumana ri dunia hitu mombatulungi tona ntanina, ala tempona kakalumana dunia domo maria gunana, komiu ratarima nu Alatala ri ponturo anu batena sampe ri kasae-saena ri suruga. ¹⁰ Tona namala niparasaya ante mbara-mbara sakide, namala muni niparasaya ante mbara-mbara nadea. Tapi ane ia ledo nokainggu nanao ante mbara-mbara sakide, ia ledo mokainggu manoa ante mbara-mbara nadea. ¹¹ Jadi ane komiu ledo namala niparasaya ante kakalumana ri dunia nadaa hitu, isema momparasaya komiu ante kakalumana nabelo ri suruga? ¹² Ane komiu ledo namala niparasaya ante mbara-mbara ntona ntanina ri dunia hitu, isema mombadekei ka komiu kakalumana majadi bagiamiu mboto ri suruga? ¹³ Ledo rapakule nu batu saito matundu nte madika randua. Sabana, saito raportovena bo saitopa ledo rapeilina. Saito raoseakana parentana bo saitopa rapoarana. Ivesia muni komiu. Ane komiu mompotove mbara-mbara ri dunia hitu, ledo rapakulemiu mpuu-mpuu mangosea-ka dota nu Alatala."

I Yesus notesa ka toFarisi

Matius 11:12-13; 5:31-32; Markus 10:11-12

¹⁴ ToFarisi nangepe pura-pura anu nitesa i Yesus pangane, aga nipongirikara i Yesus sabana ira topompo-tove doi. ¹⁵ Tapi i Yesus nanguli ka ira, "Ri ngayo ntona ntanina, komiu nikita nabelo, tapi nisani nu Alatalamo pura-pura isi rara ntaimiu. Anu nabelo ntoto ri panggita manusia, haitumo nipovuu mata nu Alatala.

¹⁶ Atura-atura agama nidekei Nabi Musa ka kita, bo pepatuduki nu nabi-nabi ntanina rapake sampe peonga i Yohanes Topediu. Nompamula lako ri tempo i Yohanes haitu, Kareba Belo anu notesa Poparenta nu Alatala, nipatolele njuu. Bo tona nompasimbuku mpuu majadi todea nu Alatala. ¹⁷ Atura-atura agama nidekei Nabi Musa ledo molese. Namurapa langi bo tana maopo, pade sanganu hurupu lako ri Atura-atura haitu molese. Haitu bate-batena maria."

¹⁸ Pade nanguli munimo i Yesus, "Isema-sema langgai nompogaaka bereina pade noberei nte mombine ntanina, ia nobualo. Bo tona nompoberei mombine nimpogaaka, ia muni nobualo."

Tona nakalumana ante i Lazarus

¹⁹ I Yesus nompapola tesaNa ante porapa hitu: "Naria saito tona nakalumana, pakeana mpo pakea nu magau nasuli mpuu alina. Katuvuna eo-eo mpo toposusa. ²⁰ Naria saito tona napakasi nidika ntona ri vamban tona nakalumana. Topakasi haitu nosanga i Lazarus. Ia nabaka njumanggaro. ²¹ Ia madota mangande rombo nggandea nanavu lako ri meja ntokalumana haitu. Napakasi ntoto ia sampe asu-asu muni nakava nombadila bakana.

²² Nakavamo tempona tona napakasi haitu namate bo ia niken nu malaeka hau ri ponturo nabelo ri sinjori Nabi Abraham. Tona nakalumana namate munimo bo nitana. Ia niken hau ri ponturo ntomate. ²³ Nandasa mpuu ia ri sia. Nitingoana ri kalangana, nikitana Nabi Abraham ri ponturona nakavao, bo i Lazarus nonturo ri sinjorina. ²⁴ Nongaremo tokalumana haitu, 'Tuamaku, Abraham, poasimo yaku! Tudumo i Lazarus mombalome koya mpalena ri uve pade tumai mombabanggasi dilaku, nandasa mpuu yaku ri mata nu apu hitu.'

²⁵ Tapi nesana i Abraham, 'Toramo anaku, tempo iko ri dunia, nikavamu puramo belona, tapi i Lazarus aga nanggava anu nadaa. Sii-sii ia nipakadamba, bo iko nimpandasa. ²⁶ Bo ri olota naria salu nandala ntoto. Tona ri sii ledo namala tou, bo tona ri situ ledo namala tumai.'

²⁷ Nangepe haitu, tona nasugi nanguli, 'Ane ivetutano, kuperapi mpuu-mpuu nte komiu, tudumo i Lazarus hau ri banua ntuamaku. ²⁸ Da nariapa alima

sampesuvuku hamai. Tudumo i Lazarus hau mompainga ira ala ira ledo mesua ri ponturo pepandasa hitu.'

²⁹ Nesana i Abraham, 'Nariam Buku Atura Agama nitulisi Nabi Musa bo Buku nu Nabi-nabi nte ira. Dekeikamo ira mangoseaka anu nitulisi riara buku-buku haitu!'

³⁰ Tapi nesana tokalumana, 'Ledopa magana. Tapi ane maria tona namate matuvu mpanjili hau nte ira, tantu ira majea movia dosa.'

³¹ Tapi nesana i Abraham, 'Ane ledo rapariarara parenta Nabi Musa bo nabi-nabi ntanina, tantu ledo muni raparasayara nau maria tomate matuvu mpanjili! "

Dosa bo poampungu

Matius 18:6-7, 21-22; Markus 9:42

17 I Yesus nanguli ka anaguruNa, "Natantu kana maria mpengaya-ngaya anu mompakanavu tona riara dosa. Tapi masilaka mpuu topepakanavu! ² Agina rapantoesi vatu mbaso ri tambolona bo ratedaka hau rantasi. Mabelopa haitu pade rapakanavuna roa ledo naroso pomparasayana sampe movia dosa. ³ Sabana haitu, pakabelo-belo! Ane maria sampesuvumiu movia dosa onteakamo! Bo ane manjoso raramo ia bo merapi ampu, ampungimo ia. ⁴ Ane pitu-nggani saeo rapoviana anu nadaa ka komiu bo nggani-nggani ia makava nte komiu merapi ampu, ampungimo ia."

Pomparasaya naroso

⁵ Pade nanguli anaguruNa, "Pue, pakaroso pomparasaya kami."

⁶ Nesana i Yesus, "Ane rapana pomparasayamiu masimbayu kambasona mpo batu nu mandoe, mamala raulimiu ka kayu mbaso hitu, 'Kaubimo! Koi polinja hau rantasi.' Natantu kayu haitu molinja mpuu."

Pokainggu ntopangoseaka i Yesus

⁷ "Rapana, saito lako nte komiu maria batuan nopa-jeko, bara nompoevu bimba ranggarava. Tempo batua haitu manjili lako ranggarava, natantu ledo raulimiu ka ia, 'Kamai masalisa mangande!' ⁸ Ledo ivesia. Natantu aga raulimiu ka ia, 'Koi pasadia kandeaku. Pasuamo baju nagasa bo sondumo kandeaku. Maupu yaku mangande bo manginu pade iko.' ⁹ Natantu batua haitu ledo masipato ratoiya sabana ia aga nangoseaka parenta nu tuana. ¹⁰ Ivesia muni komiu. Ane maupumo rapoviamiu pura-pura anu niparenta nu Alatala ka komiu, ulimo, 'Kami hii aga batua biasa. Ledo masipato ratoiya. Kami aga nangoseaka anu niparenta ka kami.' "

I Yesus nompakabelo sapulu tona nadua oge

¹¹ Ri polipana hau ri ngata Yerusalem, i Yesus noliu ri pobingga bagia Samaria bo Galilea. ¹² Tempo Ia nesua rangata, naria sapulu tona nadua oge nombatomunaka Ia. Ira neangga nggavao ¹³ bo nongare, "Yesus! Poasimo kami!"

¹⁴ Pade nikanotoNamo ira bo niulikaNa, "Koimo pekiparesa karomiu nte topanggeni pesomba, nangoseaka Atura-atura agama nipapola Nabi Musa." Nangepe haitu, hau mpuumo ira. Tempo ira da nolipa, nabelo puramo karora. †

¹⁵ Saito ira, nikitana karon nabelomo, nanjili vai ia hau nte i Yesus bo nombatoiya-toiya Alatala ante suara namangga. ¹⁶ Ia notungga sampe ri tana ri ngayo i Yesus bo nanguli tarima kasi. Ia mai toSamaria.

¹⁷ I Yesus nanguli ka ia, "Sapulu tona nipakabeloKu pangane. Ri umbamo sasiopa? ¹⁸ Nakuya aga saito hitu nanjili nanguli tarima kasi nte Alatala? Bo ia ledo toYahudi!" ¹⁹ Pade nanguli i Yesus ka tona haitu, "Peanggamo bo kapolamo. Nabelomo iko sabana iko nomparasaya Yaku!"

Tempo majadi Poparenta nu Alatala

Matius 24:23-28, 37-41

²⁰ Naria bara sako-ndua toFarisi nekutana nte i Yesus, maipia majadi Poparenta nu Alatala.

Nesana i Yesus, "Poparenta nu Alatala ledo nompamula ante tanda-tanda nikita. ²¹ Ledo maria tona manguli, 'Peintamo, siimo Poparenta nu Alatala,' atau 'Peintamo, hamaimo Poparenta nu Alatala!' Sabana Poparenta nu Alatala naria riarai nta ntona." ††

²² Naupu haitu i Yesus nanguli ka anaguruNa, "Makava tempona ngena, maoge mpuu raramiu manggita Yaku, Ana nu Manusia, nau aga saeo, tapi domo rakitamiu Yaku. ²³ Tempo haitu, tona manguli ka komiu, 'Peintamo, moitu Ia', bara manguli 'Siimo Ia'. Tapi nee raoseakamiu ira. ²⁴ Sabana tempo Yaku makava mpanjili ngena, kakavaKu malanto rakita ri umba-umba dunia, nasimbayu mpo kila novende ri laerava bo nombavanta njumangu langi. ²⁵ Tapi dopame makava tempona haitu, Yaku kana rapandasa bo rapoara ntona natuvu sii-sii.

²⁶ Tempo Yaku Ana nu Manusia makava bara maipia, pokainggu manusia masimbayu ante pokainggu manusia tempo Nabi Nuh nggaulu. ²⁷ Ira bate-batena nangande, nanginu bo nosipoberei njuu sampe tempo

† *I Yesus nonia nompakabelo ira, siamo sampe nitudukaNa ira hau raparesa ntopanggeni pesomba. Nangoseaka Atura-atura agama nipapola Nabi Musa, topanggeni pesomba kana momparesa karo ntona nabelo lako ri dua oge ala rasani katantuna bara nabelo mpuumo karora bara ledo. Peinta Imam pasal 13-14.*

†† *Poparenta nu Alatala naria riarai nta ntona. Poparenta nu Alatala naria ri tatangamiu.*

Nabi Nuh nesua riarai kapalana. Nakava uve oge nombongasi pura-pura ira. ²⁸ Ivesia muni inggu ntona ri ngata Sodom nggaulu tempo i Lot nonturo hamai. Ira nangande bo nanginu, nompobalu, neali, notuda-tuda bo nombangu banua. ²⁹ Tapi tempo i Lot nalai lako ri ngata Sodom, eo haitu muni nanaumo apu ante vatu colonggata navaya lako ri suruga nompakaropu ira sangata. ³⁰ Ivesia muni pokainggu ntona bara maipia tempo Yaku, Ana nu Manusia makava.

³¹ Tempo kakavaKu haitu, tona nangosanaka ri savaliku nu banuana, nee mesua rabanua mangala mbarambarana. Ivesia muni tona ri taluana. Nee manjili hau ri banua. ³² Toramo anu najadi nte berei i Lot tempo ia neili nompeinta ngata Sodom. Ia najadi tinja gara. ††† Isema-sema nompasimbuku nangoseaka dotana mboto, bo natuvu ka karon mboto, ledo manggava katuvu mabelo sampe ri kasae-saena. Tapi isema-sema nombakabasaka dotana mboto sabana nangoseaka Yaku, nau ia rapatesi, iamo matuvu mabelo sampe ri kasae-saena.

³⁴ Pariaramo! Tempo Yaku makava, ane randua tona maturu ri sangu paturu bongi haitu, saito raala bo saito maboli. ³⁵ Maria mombine randua mogili mosanggani-nggani, saito raala bo saito maboli. ³⁶ [Randua tona mokarajaa ri talua, saito raala bo saito maboli.]

³⁷ Naupu sia ana-anaguru i Yesus nekutana, "Pue, ri umba rakajadina haitu ngena?"

Nesana i Yesus, "Ane tonji kalikoa nasiromu, tantu naria matepudu ri sia." ††

Porapa timbala ante topotangara

18 Naupu haitu i Yesus nompatuduki anaguruNa ante notesa sangu porapa ala ira masaro mosambaya bo nee masau rara. ² NiuliNa ivei: "Ri sangu ngata naria topotangara anu ledo naeka nte Alatala bo ledo muni nipeilina singgamanusiana. ³ Ri ngata haitu mai naria muni saito mombine natimbala nasaro nakava nte topotangara bo nekisaliku ivei: 'Tulungimo yaku mantingayo baliku!' ⁴ Pamulana topotangara haitu ledo nadota mantulungi timbala pangane. Tapi kaupuna nipekirina, 'Nau yaku ledo naeka nte Alatala bo ledo muni nipeiliku singgamanusiaku, ⁵ aginamo kutulungi mombine hitu ala domo rabatona yaku. Ane ledo kutulungi ia, ledo maupu-upu ia tumai mombalengesi yaku.'" "

⁶ Nanguli i Yesus ka anaguruNa, "Pariaramo anu niuli ntopotangara anu ledo nanao haitu! ⁷ Iyapa tona ledo nanao, nadota nantulungi timbala nerapi nte ia, nemopa Alatala! Natantu ratulungiNa todea nipelisiNa anu nekakai nte Ia eo bongi. Nee rapekirimiu Ia aga

‡ *Berei i Lot najadi tinja gara sabana ia neili nompeintaka ngata Sodom napapu. Peinta Kajadia 19:26. †† Batuana, ivesia muni kakavaNa. Ia ledo makava nggalino-lino, natantu rasani ntona.*

nokalera-lera mantulungi ira. ⁸ Parasyamo: masalisa ratulungiNa ira. Tapi tempo Yaku, Ana nu Manusia makava mpanjili ri dunia hitu, da mariapa tona mpuu-mpuu momparasaya Yaku?"

Porapa toFarisi ante topesingara balasitee

⁹ I Yesus notesa porapa hitu ka tona nompekiri iramo tona nabelo bo nompandaente tona ntanina. ¹⁰ Nanguli i Yesus, "Naria randua tona hau nosambaya ri Banua nu Alatala. Saito toFarisi, bo saito topesingara balasitee.

¹¹ ToFarisi haitu neangga bo nosambaya riarantaina, 'Pue, yaku nosukuru nte Komiu sabana yaku hii ledon nasimbayu ante tona ntanina, haitumo topebagiu, tona natenggo rarana, bo tona nobualo. Yaku nosukuru apa yaku ledon nasimbayu ante topesingara balasitee moitu. ¹² Ronggani saminggu yaku nopuasa, bo nidekeiku ka Komiu sabagia lako ri sapulu bagia asele panggaviaku pura-pura.'

¹³ Tapi topesingara balasitee haitu neangga nakavaonosambaya. Ledo nabia ia nantingoa ri langi. Ia nansoso rara bo nosapa-sapa bambarana bo nanguli, 'Alatala, poasimo yaku, apa yaku tona nadosa.' "

¹⁴ Nanguli i Yesus, "Kuuli ka komiu, tempo ira randuananjili, topesingara balasitee nitarima nu Alatala, tapi toFarisi ledon. Apa, isema-sema nompakaoge karona mboto, kana rapakaede nu Alatala, tapi isema-sema nompakaede rarana, kana rapakaoge nu Alatala."

I Yesus nerapi belo ka ngana-ngana

Matius 19:13-15; Markus 10:13-16

¹⁵ Nadea tona nanggeni ngana kodi hau nte i Yesus ala radikaNa paleNa ri ngana haitu bo merapi Alatala mombadekei belo ka ira. Nanggita haitu, ana-anaguruNa nompokarau ira.

¹⁶ Tapi i Yesus nompokio ngana-ngana haitu bo niulikaNa anaguruNa, "Dekeikamo ngana-ngana gahitumakava nte Yaku. Nee ratagi ira, sabana aga tona nasimbayu ingguna mpo ngana-ngana gahitumasipato majadi todea ri Poparenta nu Alatala. ¹⁷ PariaramotesaKu hitu! Isema-sema ledon natundu nte Alatala nasimbayu mpo ngana kodi natundu nte totuana, ia ledon mamala majadi todea nu Alatala."

I Yesus ante pakeni ntoYahudi nakalumana

Matius 19:16-30; Markus 10:17-31

¹⁸ Naria saito pakeni ntoYahudi nekutana nte i Yesus, "Guru belo, nuapa kupovia ala kukava katuvua mabelo sampe ri kasae-saena?"

¹⁹ Nesana i Yesus, "Nakuya niulimuka Yaku nabelo? Ledon ria saitoa tona nabelo, aga Alatala. ²⁰ Natantunisanimu parenta-parenta nu Alatala anu nanguli, nee

mobualo, nee mepatesi, nee mangangga, nee mosabi dava, bo bilamo tina tuamamu." †

²¹ Nesana tona haitu, "Pura-pura parenta haitu nioseakakumo lako ri kakodiku."

²² Nangepe haitu, nangulimo i Yesus ka ia, "Da nariasangayapa kana mupovia. Pobalu pura-pura kakalumamubo dekei alina haitu ka tona napakasi ala mukava kakalumana ri suruga. Maupu sia, oseakamo Yaku!"

²³ Nangepe tesa i Yesus haitu, nasusamo rarana, sabana ia tona nakalumana mpuu. ²⁴ Nisani i Yesus nasusarara ntona haitu. Sia sampe niuliNa, "Nakajampuu tona nakalumana matundu nte Alatala bo majadi todeaNa. ²⁵ Namurapa sangu unta mesua ri puki nu jaru, pade tona nakalumana matundu nte Alatala bo majadi todeaNa."

²⁶ Tona nangepe tesa i Yesus nanguli, "Ane ivesia, isema tano mamala rapakasalama?"

²⁷ Nanguli i Yesus, "Anu ledon rapakule nu manusia nipakule nu Alatala."

²⁸ Jadi nanguli i Petrus ka i Yesus, "Peintamo, Pue! Kami nompalaisi pobanua kami bo nangoseaka Komiu."

²⁹ Nanguli i Yesus ka ira, "PariaramotesaKu. Isema-sema nompalaisi banuana, bara bereina, bara sampe-suvuna, bara tina tuamana, bara anana sabana ia nangoseaka Alatala, ³⁰ madea nggani kadeana rakavana ri dunia hitu. Bo ri tempo makava ratarimana katuvunabelo sampe ri kasae-saena."

Katalu-ngganina i Yesus notesa kamateNa

Matius 20:17-19; Markus 10:32-34

³¹ I Yesus nompasiromu sapulu randua anaguruNa pade niulikaNa, "Epemo! Sii-sii kita mantende hau ri ngata Yerusalem. Hamai kana madupa pura-pura anu nitulisi nabi-nabi nggaulu, haitumo anu majadi ante Yaku, Ana nu Manusia. ³² Yaku kana radekei ka tona ledon toYahudi. Yaku rabirisikara mata, rapongeingeikara, bo ratoveulusira. ³³ Yaku racambu pakan-dasa bo rapatesira. Tapi ri eo katalaluna Yaku matuvumpanjili."

³⁴ Pura-pura anu nitesa i Yesus haitu ledon nipaha nu anaguruNa. Batua ntesaNa haitu nitabuniaka ka ira. Jadi ledon nisanira nuapa nitesa i Yesus.

I Yesus nompakabelo saito tobuoro

Matius 20:29-34; Markus 10:46-52

³⁵ Tempo i Yesus napara ngata Yerikho, naria saito tobuoro nonturo nerapi-rapi ri bivi dala. ³⁶ Niepena tona nadea noliu, nipekutanana tona, "Nuapa najadi?"

³⁷ Nesana tona, "I Yesus, toNazaret moliu ri sii."

³⁸ Nangepe haitu, nongaremo tobuoro, "Yesus, Muli Magau Daud, poasimo yaku!"

† Pesuvu 20:12-16; Ulangan 5:16-29

³⁹ Tona ri kolu i Yesus narau ka toburo bo nom-basalaraka ia, "Nee makanano! Kalino iko!"

Tapi toburo haitu aga nantambai kamanggana nongare, "Yesus, Muli Magau Daud, poasimo yaku!"

⁴⁰ Nangepe toburo nongare, netaamo i Yesus, bo nituduNa tona manggeni toburo ka Ia. Nakavapa toburo, nipekutana i Yesusmo, ⁴¹ "Nuapa mupodota Kupovia ka iko?"

Nesanamo toburo, "Pue, yaku madota mekita!"

⁴² Nanguli i Yesus ka ia, "Ane ivesia, pekitamo! Mabelomo matamu, sabana iko nomparasaya Yaku!"

⁴³ Kaliu-liu namala mpuumo nekita toburo haitu, bo haumo ia nantuntuni i Yesus bo nombatoiya Alatala. Pura-pura todea ri sia anu nanggita kajadia haitu, nantoiya Alatala.

I Yesus ante i Zakheus

19 Nakava ri ngata Yerikho, nolipa njuu i Yesus noliu ri sia. ² Ri ngata haitu naria saito pakeni ntopesingara balasitee, nosanga i Zakheus. Nasugi mpuu ia. ³ Ia madota manggita i Yesus, tapi ledo nikitana sabana naede karona bo nadea mpuu tona nombatagui i Yesus. ⁴ Jadi i Zakheus nangova nokolu bo nompene kayu ri bivi nu dala ala mamala ia mompeinta i Yesus tempo moliiu ri sia.

⁵ Tempo i Yesus nakava ri puna kayu haitu, nitingoNamo i Zakheus, bo niulikaNa, "Zakheus, panaumo masalisa, apa eo hitu Yaku mesai ri banuamu."

⁶ Jadi, nompari-mparimo i Zakheus nanau bo nitari mana i Yesus ante damba rarana. ⁷ Tapi pura-pura tona nanggita i Yesus hau ri banua i Zakheus, nonguan-gua. "Hm, ledo nabelo i Yesus nesai ri banua ntodosa!"

⁸ Naupu haitu neanggamo i Zakheus ri ngayo ntodea bo nanguli ka i Yesus, "Pue, santanga mbara-mbaraku kudekei ka tona napakasi. Isema-sema nibagiuku, kupopan-jili ka ia pata-nggani kadeana."

⁹ Nangulimo i Yesus, "Eo hitu nipakasalamamo komiu sambanua, sabana komiu nomparasaya Alatala, nasimbayu mpo i Abraham totuamiu nggaulu nomparasaya Alatala. ¹⁰ Yaku, Ana nu Manusia, nakava ri dunia hitu ala mangelo bo mompakasalama tona nasalandala."

Porapa doi bulava

Matius 25:14-30

¹¹ Tempo tona da nangepe tesa i Yesus pangane, nitesaNa sangupa porapa ka ira. Apa tempo haitu nparamo Ia ri ngata Yerusalem, bo nisarumaka ntodea masalisa mompamula Poparenta nu Alatala ri dunia, tano dopa. ¹² Jadi i Yesus nompasimbayu karoNa mboto ka ana madika nte porapa hitu: "Naria saito ana madika, patujuna hau ri ngata nakavao ala ralanti

nu Magau Mbaso majadi madika. Maupu sia pade manjili tumai moparenta ri ngatana mboto. ¹³ Dopame ia hau, nipokiona ntani sapulu batuana bo nidekeikana simbo sampeka doi bulava † ka ira. Pade niulikana, 'Doi hitu rapagolimiu sampe manjili yaku.'

¹⁴ Naupu notesa ivehaitu nalaimo ia. Tapi tona ri ngatana mboto navuu matara nte ia. Jadi nitudura topanggeni tesa hau ri ngata nakavao haitu. Nakava sumai topanggeni tesa haitu nanguli ka Magau Mbaso, 'Kami ledo madota ana madika hitu majadi madika ri ngata kami.' ¹⁵ Tapi naupa topanggeni tesa nanguli ivesia, ana madika pangane kana ralanti majadi madika ri ngatara. Naupu haitu nanjilimo madika hau ri ngatana mboto.

Nakava ri banuana, nirondena sapulu batuana anu nidekeikana doi bulava ala rasanina sakuya ana nu doi nikavara.

¹⁶ Batua paratama nanguli, 'Pua, doi bulavamiu sampeka haitu nipagoliku najadi sapulu-mpekana.'

¹⁷ Pade nanguli madika ka batuana haitu, 'Nabelomo! Iko batua nabelo. Iko namala raparasaya ante mbarambara sakide. Sabana haitu, iko Kupajadi topomparenta sapulu ngata.'

¹⁸ Jadi batua karanduana nakava bo nanguli, 'Pua, doimu sampeka nipagoliku najadi lima-mpeka.'

¹⁹ Pade nanguli madika ka ia, 'Nabelo! Iko Kuang-gataka majadi topomparenta lima ngata.'

²⁰ Pade nakavamo batua ntanina nanguli, 'Pua, siimo doi bulava sampeka nidekeimiu ka yaku. Nibunguku ante kae bo nitabuniakaku. ²¹ Naeka yaku nte komiu, sabana nisaniku komiu nasoa. Komiu nangala anu ledo pombolimiu, bo nangala asele ri talua anu ledo potudamiu.'

²² Nesana madika ka batua haitu, 'Iko tu batua nadaa! Tesamu mboto kupake mombatangara iko. Nisanimu Yaku nasoa, bo Yaku nangala anu ledo pomboliku bo Yaku nangala asele ri talua anu ledo potudaku. ²³ Ane ivesia, nakuya ledo nidekeimuka doiku haitu ka tona mompopoana doi ala tempo yaku maka-va mamala kualu mpanjili doiku ante anana!' ²⁴ Pade nanguli madika ka tona ri sia, 'Alamo doi bulavana sampeka haitu bo dekei ka batua anu naria doi bulava sapulu-mpekana.'

²⁵ Tapi tona pangane nanguli ka madika, 'Pua, nariamo doina sapulu-mpekana!'

²⁶ Nesana madika haitu, 'Kuuli ka komiu, isema-sema namala raparasaya ante anu nidekei ka ia, kana ratambai ka ia. Tapi isema-sema ledo namala raparasaya, anu naria sakide nte ia ralelakasi lako nte ia. ²⁷ Hitupa, keni tumai ri ngayoku bali-baliku anu ledo nadota nantarima yaku majadi madikara. Patesimo ira pura-pura ri ngayoku hitu! "

† *sampeka doi bulava: basa Ibrani 'mina'. Doi haitu gaji ntopokarajaa labi talu-mbula, atau saatu eo.*

I Yesus nesua ri ngata Yerusalem bo nitoiya ntodea

Matius 21:1-11; Markus 11:1-11; Yohanes 12:12-19

²⁸ Naupu i Yesus notesa pura-pura haitu, nokolumo Ia hau nantende ri Yerusalem. ²⁹ Napara ngata Betfage bo Betania ri kente nu Bulu Zaitun, nituduNa randua anaguruNa hau mokolu. ³⁰ Dopame nalai ira, niu-likaNa, "Koi pokolu ri ngata moitu! Makava hamai, rakavamiu sangu ana keledai nitataka. Ana keledai haitu dopa sanggani nipesavi ntona. Volemo keledai haitu bo keni tumai. ³¹ Ane maria tona mompekutana, 'Nakuya nivolekamiu keledai tutu?' ulika ia, 'I Pue madota mompakena.'"

³² Jadi haumo randua anaguruNa haitu bo nikavara mpuu anu niuli i Yesus ka ira. ³³ Tempo nivolera ana keledai haitu, nekutanamo tupuna, "Nakuya nivolekamiu keledai tutu?"

³⁴ Nesanamo ira, "I Pue madota mompakena."

³⁵ Pade niumbura ana keledai haitu hau nte i Yesus. Nidikara baju ndoera ri bovate nu keledai bo nitulungira i Yesus mesavi. Naupu haitu nipapolaramo polipara.

³⁶ Tempo i Yesus noliu ri sia nesavi keledai, todea nombavoke baju ndoera rapolampi dala raoseNa, tandana pombabilara Ia.

³⁷ Tempo i Yesus napara ri ngata Yerusalem ri dala notua lako ri Bulu Zaitun, pura-pura todea nantuntuni Ia, nompamula nongare-ngare nantoiya Alatala ante damba rara sabana pura-pura kabaraka nikitara. ³⁸ Niulira,

"Maoge belo ka Magau anu nakava niposumba nu Alatala! Ratoiyamo Alatala ri suruga! Ri suruga naria katuvu nabelo!"

Mazmur 118:26

³⁹ Naria bara sako-ndua toFarisi ri tatanga ntodea haitu nompongare Ia, "Guru, salaraka anaguruMiu, nee mohanano!"

⁴⁰ Tapi nesana i Yesus, "Kuuli ka komiu, ane ledo mohanano ira, natantu vatu-vatu hitu kana mongare mombatoiya Yaku!"

I Yesus nantangisi tupu ngata Yerusalem

⁴¹ I Yesus naparamo nte ngata Yerusalem, sampe namala nikitaNa bo nitangisiNamo isi ngata haitu. ⁴² NiuliNa, "Pakasi ranga! Mabelo mpuu ane eo hitu rasanimiu, anu manggeni katuvu mabelo ka komiu. Tapi hitu nitabuniaka ka komiu, domo rasanimiu. ⁴³ Apa makava tempona ngena, ngatamiu ravala ntiku nu balimiu. Balimiu mompatiku komiu sampe ledo mamala komiu mesuvu. ⁴⁴ Ngatamiu ragerosira ngena, bo komiu pura-pura rapatesira. Ledo maria sangu vatu nipakemiu novia ngata hitu rapalambara mosisunju. Haitu pura majadi ngena sabana ledo nipeilimiu tempo hitu Alatala nakavamo mompakasalama komiu."

Naupu i Yesus notesa ivesia, nesuamo Ia riarangata Yerusalem.

I Yesus nesua ri Banua nu Alatala

Matius 21:12-17; Markus 11:15-19; Yohanes 2:13-22

⁴⁵ Naupu sia i Yesus hau nesua ri doyata Banua nu Alatala bo nipopalaiNa topobalu-baluru ri sia. ⁴⁶ Niu-likaNa ira, "Riara Buku Gasa nitulisi ivei: 'BanuaKu majadi banua posambaya.' † Ivesia niuli nu Alatala, tapi komiu ri sii nompajadi Banua nu Alatala hitu petabuni ntopeago!"

⁴⁷ Eo-eo i Yesus nesua nompaguru ri doyata Banua nu Alatala. Balengga ntopanggeni pesomba ante guru-guru agama bo totua-totua ntoYahudi madota mompatesi Ia. ⁴⁸ Tapi ledo nikavara dala mompatesi Ia, sabana pura-pura todea nadamba gagamo nangepe tesaNa.

Pakeni ntoYahudi nangelo saba, nekutana lako ri umbakuasa i Yesus

Matius 21:23-27; Markus 11:27-33

20 Naria saeo i Yesus nompaguru bo nompatolele Kareba Belo ka todea ri doyata Banua nu Alatala. Sampesanika nakavamo balengga-balengga ntopanggeni pesomba, guru-guru agama bo totua-totua ntoYahudi ² nanguli ka Ia, "Uli ka kami, ante kuasa isema nipoviaMiu pura-pura hitu ri Banua nu Alatala? Isema nombadekei kuasa haitu ka Komiu?"

³ Nanguli i Yesus, "Yaku muni mekutana nte komiu. Uli ka Yaku, ⁴ isema nombadekei kuasa ka i Yohanes nombadiu tona? Kuasana haitu lako nte Alatala atau lako nte manusia?"

⁵ Jadi pakeni ntoYahudi nosimpekutana, "Berimba kita mesana ka Ia? Ane raulita i Yohanes nombadiu ante kuasa lako nte Alatala, aga rauliNa ka kita, 'Jadi nakuya ledo niparasayamiu i Yohanes?' ⁶ Tapi ane raulita kuasana lako nte manusia, natantu todea mombarempempe kita ante vatu, sabana ira pura-pura nomparasaya i Yohanes mpuu-mpuu nabi." ⁷ Jadi nesana ira, "Ledo nisani kami lako nte isema kuasana."

⁸ Nanguli i Yesus ka ira, "Ane ivesia, ledo muni Kuuli ka komiu kuasa isema nipakeKu novia pura-pura hitu."

Pakeni-pakeni agama Yahudi nirapaka topokarajaa talua

Matius 21:33-46; Markus 12:1-12

⁹ Naupu haitu i Yesus notesa porapa ka todea ivei: "Naria saito langgai notuda salimpu talua anggur. Taluana haitu nidekeikana ka bara sako-ndua topokarajaa mojangpangina, damo mobagi aselena. Pade nalaimo ia hau ri ngata ntanina bo nasae non-turo hamai. ¹⁰ Nakava tempona mompupu vua, ni-

† Yesaya 56:7

tudunamo batuana hau nte topokarajaa talua ala radekeikara sabagia lako ri asele ntaluana. Tapi, topokarajaa talua aga nombaboba batua haitu bo nombatudu ia manjili ante pale nggoo. ¹¹ Jadi tupu ntalu haitu nantudu vai saito batua ntanina, tapi batua haitu muni niboba bo nipakaeya ntopokarajaa haitu, pade nitudu nanjili ante pale nggoo muni. ¹² Pade nitudu nu tupu ntalu vai batuana katataluna. Tapi batua haitu muni nibobara sampe nabaka bo nitedakara hau ri savaliku ntalu haitu. ¹³ Kaupuna tupu nu talua nanguli, 'Nuapa kupovia? Aginamo anaku mboto anu nipotoveku kutudu hau nte ira. Natantu rabilara ia.' ¹⁴ Tapi tempo topokarajaa talua nanggita ana ntupu talua nakava ri talua, nosiulikamo ira, 'Tumaimo ana ntupu ntalu. Ia ngena rakaboli mbara-mbara ntuamana. Rapatesitamo ia, ala talua hitu majadi bagiata.' ¹⁵ Jadi nikenira ana ntupu ntalu haitu hau ri savaliku ntalu bo nipatesiramo."

Nanguli i Yesus ka topangepe porapa haitu, "Jadi, nuapa rapovia ntupu ntalu ka topokarajaa haitu?"

¹⁶ Natantu rapatesina pura-pura ira, bo radekeina taluana ka tona ntanina mojangpangina."

Topangepe porapa haitu nanguli ka i Yesus, "Nee mpuu sampe majadi ivehaitu!"

¹⁷ I Yesus nompeintaka ira bo nanguli, "Nuapa batuana anu nitulisi riaru Buku Gasu iveri:

'Vatu nitedaka ntopovia banua, vatu haitumo nopokopa ka banua haitu.' "

Mazmur 118:22

¹⁸ I Yesus nombarapaka karoNa mboto ante vatu. NiliNa, "Isema-sema manavu ri vatu haitu marupusaka bo isema-sema rarumpi nu vatu haitu, maoya mpeje."

Tona nekutana pombayari balasitee

Matius 22:15-22; Markus 12:13-17

¹⁹ Nisani nu guru-guru agama bo balengga-balengga ntopanggeni pesomba, porapa haitu nipambela i Yesus ka ira. Sabana haitu, naoge rarara mombasaka i Yesus tempo haitu muni, tapi naeka ira ka todea. ²⁰ Jadi nielora loga mabelo mombasaka Ia. Nitudura bara sako-ndua tona hau mompomata i Yesus. Nitunggaira netingu nangelo tesaNa masala, ala i Yesus mamala rakeni rapangadu ri ngayo gubernur. ²¹ Tona nitudura pangane hau nte i Yesus bo nanguli, "Guru, nisani kami pura-pura tesaMiu bo anu nipepatudukikaMiu nakana. Nisani kami muni Komiu ledo nompelenje, Komiu nanoa nompatuduki pakalanto dota nu Alatala ka manusia. ²² Jadi, uli ka kami: nantuntuni atura-atura agamata, masipato kita mombabayari balasitee ka Magau Mbaso Kaisar atau ledo?"

²³ Tapi nisani i Yesus akalara mombaopa tesaNa. Jadi niulikaNa ira, ²⁴ "Popakita ka Yaku sampeka doi." Naupu sia nidekei ntona haitu sampeka doi. Neku-tanamo i Yesus, "Lenje bo sanga isema ri doi hitu?"

Nesana ira, "Magau Mbaso Kaisar."

²⁵ Nanguli i Yesus ka ira, "Ane ivesia, dekeimo ka Magau Kaisar anu masipato radekei ka Magau Kaisar, bo dekeimo ka Alatala anu masipato radekei ka Alatala."

²⁶ Kaupuna, ledo ria sambelaa tesaNa nasala nikavara ri ngayo ntodea. Nokumaa ira nangepe pesana i Yesus, bo domo nokanano ira.

ToSaduki nekutana tona matuvu mpanjili

Matius 22:23-33; Markus 12:18-27

²⁷ Naria bara sako-ndua toSaduki nakava nte i Yesus. (ToSaduki haitumo salunu toYahudi anu nanguli tona namate ledo matuvu mpanjili lako ri kamatena ri tempo makava.) Nanguli ira ka i Yesus, ²⁸ "Guru, Nabi Musa notulisi atura hitu ka kita: 'Ane maria saito langgai noberei bo namate dopame naria anana, sampesuvuna mboto kana mompoberei timbala haitu ala momuli majadi muli ka bereina namate haitu.' ²⁹ Naria papitu langgai nosampesuvu. Ana lumbua noberei tapi dopame noana, namatemo ia. ³⁰ Tueina karanduana nompoberei timbala haitu, tapi dopame noana, namate munimo ia. ³¹ Ivesia muni najadi nte tueina katataluna sampe tuei kaupuna. Pura-pura namate dopame noana. ³² Kaupuna namate munimo mombine. ³³ Jadi, tempo tomate rapakatuva mpanjili lako ri kamatena, isema kakanana berei nu mombine haitu? Apa ia nipobereira papitu."

³⁴ Nesana i Yesus, "Tona ri dunia hitu noberei. ³⁵ Tapi ane tona masipato rapakatuva nu Alatala mpanjili bo manggava bagia ri dunia nabaru, domo moberei. ³⁶ Ira masimbayu ante malaeka nu Alatala, domo mamate. Ira majadi ana-ana nu Alatala sabana ira nipakatuva nu Alatala mpanjilimo.

³⁷ Nabi Musa mboto nompakalanto ka kita tomate matuvu mpanjili. Ri tesa santungu gumbu navaya anu ledo nikande nu apu, i Musa nanguli, 'Alatala Tupu nisomba i Abraham, i Ishak bo i Yakub.' ³⁸ Jadi lako ri tesa Nabi Musa, nisanita ira da natuvu. Apa ledo tomate nombasomba Alatala, tapi tona natuvu nombasomba Ia. Apa ri panggita nu Alatala pura-pura tona da natuvu."

³⁹ Naupu i Yesus nanguli ivesia, bara sako-ndua guru agama ri sia nanguli ka Ia, "Guru, nabelo mpuu pesanaMiu." ⁴⁰ Jadi domo nabia ira nekutana hanupa nte i Yesus.

Magau Topepakasalama nitesa i Yesus ka guru agama

Matius 22:41-46; Markus 12:35-37

⁴¹ I Yesus nompekutana ira, "Berimba sampe niuli ntona Magau Topepakasalama iamomuli Magau Daud? ⁴² Tano i Daud mboto nanguli Ia Puena. Riaru Buku Mazmur, i Daud notulisi iveri:

† Ulangan 25:5 †† Pesuvu 3:6

'Tupu nanguli ka Pueku, "Ponturomo ri sabingga ng-ganaKu, ⁴³ sampe pura-pura baliMu Kupopekou nte Iko."'

Mazmur 110:1

⁴⁴ Jadi ane i Daud mboto nanguli Magau Topepakasalama haitu Puena, berimba sampe rauli Ia muli Magau Daud?"

I Yesus nompopatora nee moinggu mpo guru-guru agama

Matius 23:1-36; Markus 12:38-40

⁴⁵ Tempo todea da nangepe tesaNa, niulikaNamo ana-anaguruNa ivei: ⁴⁶ "Pakabelo-belo, nee rapasialamiu pokainggu nu guru-guru agama. Nipokonora nanjayo-njayo nobaju ndoe ala rabila ntona. Nipokonora rapakaoge ntona ri potomu. Ane nesua ri banua petupu, nipokonora nonturo ri ponturo nabelo. Ivesia muni ri posusa. Nipokonora nonturo ri ponturo tobelona. ⁴⁷ Nibagiura timbala-timbala ala raalasira banua ntimbala haitu. Bo nitabuniakara pokainggura nadaa ante nosambaya pakandoe. Natantu mantamo mpuu pehuku ka ira ngena!"

Pedekei timbala napakasi

Markus 12:41-44

21 Tempo i Yesus da ri Banua nu Alatala, nikitaNa tona nakalumana nombasuaraka doira ri peti pomboli doi pedekei. ² NipeintaNa muni saito timbala napakasi mpuu nombasuaraka rompeka doi kodi. ^{†3} Nanggita haitu, nanguli i Yesus, "Pariaramo! Nadeapa pedekei ntimbala napakasi haitu pade pedekei ntona ntanina. ⁴ Ira nombadekei lako ri labi nu kakalumanara, tapi nau timbala haitu napakasi mpuu, nidekeina pura-pura doi naria nte ia, anu niparaluuna mboto ka katuvuna."

I Yesus notesa kagero Banua nu Alatala

Matius 24:1-2; Markus 13:1-2

⁵ Naria bara sako-ndua notesa ka i Yesus. Nitesara Banua nu Alatala nipakaramba ante vatu-vatu nagaya mpuu bo mbara-mbara naramba nidekei ntona ka Alatala.

Tapi nanguli i Yesus, ⁶ "Makava tempona ngena pura-pura anu nikitamiu hitu magero. Domo maria sangua vatu potembona mosisunju ri bavo vatu ntanina, sabana pura-pura vatu haitu radurasi."

I Yesus notesa anu majadi ri tempo napara kaupu dunia

Matius 10:16-25; 24:3-14; Markus 13:3-13

⁷ Ana-anaguru i Yesus nekutana, "Guru, maipia majadi pura-pura anu nitesaMiu tutu? Nuapa tandana ane maparamo tempona?"

⁸ Nesana i Yesus, "Pakabelo-belo! Nee sampe komiu rabagiu. Madea ngena tona makava mompobalu sangaku. Raulira iramo 'Magau Topepakasalama.' Bo raulira muni, nakavamo kaupu nu dunia! Tapi nee raoseakamiu tesara. ⁹ Ane raepemiu kareba posieva bo kagado, nee maviora. Haitu pura-pura kana majadi ntani ruru. Tapi dopa haitu mpuu kaupu nu dunia."

¹⁰ NipapolaNa tesaNa, "Tona sangata mosieva nte tosangatana bo magau simbo magau mosieva muni. ¹¹ Ri umba-umba ri dunia maria lingu mbaso bo ara mpai bo dua naronja. Ri langi maria kajadia mepakae-ka bo tanda-tanda ledo nasaro nikita. ¹² Tapi dopame majadi pura-pura haitu, komiu rasaka ntona bo rapandasara. Komiu ratangara ri banua petupu bo rasuara-ka riararatarunggu. Komiu rakeni muni ri ngayo nu magau-magau bo gubernur-gubernur sabana komiu nangoseaka Yaku. ¹³ Haitumo loga nabelo ka komiu motesa pomparasayamiu Yaku ka ira. ¹⁴ Pakaliangu raramiu ala nee makini raramiu mompekirika nuapa raulimiu bara berimba komiu mesana ka ira mombasaliku karomiu. ¹⁵ Apa Yaku mboto mombadekei ka komiu tesa-tesa bo noto mpekiri sampe ledo maria saitoa balimiu mompakule mombadagi bara mombabali tesamiu. ¹⁶ Tempona haitu nau tina tuamamiu, sampesuvu sararamiu bo roamiu mompobalu komiu ka balimiu. Maria sanu komiu rapatesira. ¹⁷ Komiu rapovuu mata ntodea, sabana komiu nangoseaka Yaku. ¹⁸ Tapi naupa ivesia, ledo makuya-kuya komiu, nau sambesa buluamiu ledo ria malipo. ^{††19} Ane komiu bate-batena momparasaya bo ledo moura, komiu mpuu-mpuu manggava katuvu mabelo sampe ri kasae-saena."

I Yesus notesa kagero ngata Yerusalem

Matius 24:15-21; Markus 13:14-19

²⁰ "Ane rakitamiu ngata Yerusalem rapatiku nu tantara balira, rasanimumo domo masae ngata Yerusalem ragerosi. ²¹ Tempona haitu tona ri bagia Yudea kana masalisa malai hau ri buluna. Tona ri ngata Yerusalem kana mesuvu lako rangata haitu bo tona ri savaliku ngata nee mesua rangata. ²² Tempo haitu tempo pehuku nu Alatala ala madupa pura-pura anu nitulisi ri Buku Gasa. ²³ Napakasi mpuu mombine natiana bo mombine da nompatomi anana tempo haitu apa

† Basa Yunani: rompeka doi tambaga. Doi tambaga haitu ledo mpuu nadea alina.

†† Nau sambesa bulua ri balenggamiu ledo ria malipo. Bunga basa, batuana: komiu masalama, komiu ledo ntoto rapopogaa lako nte Alatala.

makaja malai. Ngata haitu mombarasai peparajea nta-mo bo Tupu mombahuku todeaNa. ²⁴ Sanu ira rapatesi ante guma. Sanu rasaka ratavani nu balira bo rakeni hau ri ngata-ngata ntanina. Bo ngata Yerusalem raparenta ntona ledo toYahudi sampe magana tempona nipakatantu nu Alatala ka ira.”

I Yesus notesa kakavaNa

Matius 24:29-31; Markus 13:24-27

²⁵ “Tempo haitu maria tanda-tanda nipokaeka rakitamiu ri mata nu eo, bula, bo ri betue-betue. Pura-pura manusia maeka rarara bo maingu mangepe pogu balumba mbaso ri tasi moruu mpo guru kede. ²⁶ Tempona haitu tona malipo rarara sabana ekara mompekirika nuapa majadi ri dunia, apa pura-pura anu nakuasa ri langi ragoya. ²⁷ Maupu haitu, rakitaramo Yaku, Ana nu Manusia, manau riaru kulimu. † Bo rakitaramo kuasaKu bo kaogeKu nipokumaaka. ²⁸ Tempo pura-pura kajadia haitu mompamula majadi, peangga pakaroso bo nee makini raramiu, apa domo masae komiu rapakasalama nu Alatalamo.”

Porapa sanggayu kayu ara

Matius 24:32-35; Markus 13:28-31

²⁹ Naupu haitu, i Yesus notesa porapa ka ana guruNa ivei: “Peintamo kayu ara, bo kayu ntanina. ³⁰ Ane rakitamiu kayu noroyamo, natantu nisanimiu naparamo tempo mapane. ³¹ Ivesia muni ane rakitamiu pura-pura kajadia niuliku pangane, rasanimiu domo masae Alatala mpuu-mpuu momparenta mpo Magau. ³² Pariaramo tesaKu hitu! Dopame mamate pura-pura tona natuvu tempo haitu, pura-pura kajadia nitesaKu pangane majadimo. ³³ Langi bo tana malipo tapi tesaKu bate-batena sampe ri kasae-saena.”

Kita kana masadia mompopea kakava i Yesus

³⁴⁻³⁵ “Pakabelo! Komiu kana mainga, apa Yaku, Ana nu Manusia, sampesanika makavamo. Nee sampe Kukava komiu aga mosusa bo manginu sampe malangu, atau masesa rara mompekirika katuvumiu eo-eo sampe komiu ledo masadia. Apa Yaku makava nte pura-pura manusia ri umba-umba ri dunia bo kakavaKu masimbayu mpo tolia. ³⁶ Komiu kana mainga-inga bo masaro mekakai nte Alatala ala rapakulemiu mombatidamaka pura-pura anu majadi haitu bo ledo maeya matamiu mantingayo Yaku, Ana nu Manusia.”

³⁷ Eona, i Yesus nompaguru ri Banua nu Alatala bo bongina hau naturu ri Bulu Zaitun. ³⁸ Mpadondo-mpadondo todea nakava ri Banua nu Alatala mangepe pepatuduki i Yesus.

I Yudas nonia mompombalu i Yesus

Matius 26:1-5, 14-16; Markus 14:1-2, 10-11; Yohanes 11:45-53

22 ¹⁻² Naparamo eo posusa ntoYahudi niuli Posusa Roti Ledo Noragi. Posusa haitu niuli muni Posusa Paskah. Balengga-balengga ntopanggeni pesomba bo guru-guru agama da nangelo dalapa mompatesi i Yesus nggalino-lino, apa naeka ira ka todea.

³ Tempo haitu Magau nu Seta nesua riaru ntai i Yudas anu niuli Iskariot, saito lako ri sapulu randua anaguru i Yesus. ⁴ Naupu nipesua nu Magau Seta, hau ia nosinggava nte balengga-balengga ntopanggeni pesomba bo pakeni ntopojaga Banua nu Alatala, motesaka berimba rapobaluna i Yesus ka ira. ⁵ Nadamba mpuu rarara nangepe anu niuli i Yudas bo ira nojanji mombadekei doi ka ia. ⁶ Nadotamo i Yudas. Jadi, hau ia mangelo loga mompobalu i Yesus ka ira tempo ledo ria todea.

Ana-anaguru i Yesus nompakadia Posusa Paskah

Matius 26:17-25; Markus 14:12-21; Yohanes 13:21-30

⁷ Nakavamo eo matana Posusa Roti Ledo Noragi, haitumo tempona mosambale ana bimba rakande ri Posusa Paskah haitu. ⁸ I Yesus nombatudu i Petrus bo i Yohanes ivei: “Koi pasadiamiu kande Paskah ka kita.”

⁹ Nekutanamo ira randua, “Pue, ri umba rapodotaMiu rapompakadia kande haitu?”

¹⁰ Nesana i Yesus, “Tempo komiu mesua rangata, raposinggavakamiu saito langgai manjimbuaka gumba nte uve. Tuntunimo ia hau ri banua rapesuana. ¹¹ Pade ulika tupu banua ivei: ‘I Guru nanguli ivei: ri umba tombi Kupangande kande Paskah mosangganing-gani ante ana-anaguruKu?’ ¹² Bo tupu banua haitu mombatuduaka ka komiu sangu tombi mbaso ri kalangana nagana ante parevana. Ri siamo rapompakadiamiu kande Paskah ka kita.”

¹³ Haumo i Petrus bo i Yohanes nesua rangata. Nikavara nasimbayu mpuu mpo anu niuli i Yesus ka ira. Jadi nipakadiaramo kande Paskah.

I Yesus nantudu anaguruNa mangande roti bo manginu uve anggur mombatora Ia

Matius 26:26-30; Markus 14:22-26; 1 Korintus 11:23-25

¹⁴ Nakavamo tempo mangande kande Posusa Paskah haitu, i Yesus nangande singgani-nggani ante anaguruNa ri banua haitu. ¹⁵ NiulikaNa ira, “Naoge mpuu raraKu mangande mosinggani-nggani ante komiu ri Posusa Paskah hitu dopame Yaku rapandasa. ¹⁶ Kuuli ka komiu, domo Kukande hanupa kande Paskah sampe Alatala momparenta pura-pura manusia bo anu nirapaka Posusa hitu rapakadupa.”

¹⁷ Naupu sia i Yesus nangala saboda uve anggur bo niuliNa tarima kasi nte Alatala. Pade niuliNa ka anagu-

† Daniel 7:13

ruNa, "Alamo uve anggur hitu bo inumo, saito-saito.
¹⁸ Kuuli ka komiu, nompamula hitu, domo Kuinu hanu-
 pa uve anggur sampe majadimo Poparenta nu Alata-
 la."

¹⁹ Naupu sia, niala i Yesus munimo roti. Naupu niuli-
 Na tarima kasi nte Alatala, nitubi-tubiNa roti haitu bo
 nibagiNa ka ira bo niuliNa, "Roti hitu karoKu Kudekei
 mombatolosi komiu. Kandemo roti hitu rapombatora
 Yaku." ²⁰ Ivesia muni naupu nangande, nialana saboda
 uve anggur bo niuliNa, "Panginu hitu tandana Pojanji
 nu Alatala nabaru anu rapakaasa nte raaKu matiti ka
 komiu. ²¹ Peintamo! Topompobalu Yaku naria nosing-
 gani-nggani ante Yaku ri sii. ²² Yaku, Ana nu Manusia
 kana mamate mami nangoseaka anu nipakatantu nu
 Alatala. Tapi mandasa mpuu tona mompobalu Yaku!"

²³ Nangepe haitu, nosimpekutanamo anaguru i
 Yesus, "Isema lako nte kita hitu mompobalu i Yesus?"

Anaguru nosinjanaika isema naoge panggana

²⁴ Pade anaguru i Yesus nosinjanaika isema ira nao-
 gepa.

²⁵ Nangepe haitu, i Yesus nanguli ka ira, "Ane todea-
 todea anu ledo nosisani nte Alatala, magaura nabiasa
 nompatundu todeana bo tomaoge-tomaoge nom-
 pokono rauli ntona topesaliku. ²⁶ Tapi ledo ivesia nte
 komiu. Kakanana isema naoge kana majadi masim-
 bayu mpo tona naede, bo pakenimiu kana majadi
 masimbayu mpo batua. ²⁷ Isema naogepa, tona non-
 turo nangande, atau tona nosondu ka ia? Natantu
 naogepa toponturo. Tapi Yaku Tupumiu, naria ri
 tatangamiu najadi toposondu ka komiu. *Jadi ledo
 masipato komiu masesa mompekirika isema naogepa!*

²⁸ Tempo Yaku nombarasai susa bo pari, ledo ni-
 palaisimiu Yaku. ²⁹ Jadi, Kudekei kuasa ka komiu mo-
 parenta, masimbayu mpo TuamaKu Alatala nom-
 badekei kuasa ka Yaku momparenta todeana. ³⁰ Jadi
 komiu muni madamba mangande bo manginu ante
 Yaku ri PoparentaKu tempo Yaku majadi Magau. Bo
 komiu monturo ri sapulu randua gadera magau bo
 momparenta tona lako ri sapulu randua valaa ntoIs-
 rael." †

I Yesus notesa pesapu i Petrus

Matius 26:31-35; Markus 14:27-31; Yohanes 13:36-38

³¹ Pade nanguli i Yesus ka i Simon Petrus, "Simon,
 epemo tesaKu! Magau nu Seta nipaloga nu Alatalamo
 mompesori komiu pura-pura nasimbayu mpo topo-
 varo pae. ³² Tapi niposambayaKukamo iko, Simon, ala
 pomparasayamu ledo moura. Jadi maupu iko rapesori
 bo muoseaka mpanjili Yaku, iko kana mompakaroso
 pomparasaya nu roamu."

† *Haitumo toYahudi.*

³³ Pade nesana i Petrus, "Pue, ledo kupalaisi Komiu!
 Yaku nasadia ratarunggu mosanggani-nggani nte
 Komiu!"

³⁴ Tapi nesana i Yesus, "Pariaramo, Petrus! Dopame
 mototoroko manu ngena bobaya, talu-ngganimo iko
 mombasapu Yaku!"

I Yesus nompopainga anaguruNa Ia raeva ntona nge- na

³⁵ Naupu haitu i Yesus nanguli ka anaguruNa pura-
 pura, "Bara ipia nituduKu komiu hau mompatolele
 Kareba Belo lako nte Alatala, bo ledo nidekeiKu komiu
 manggeni doi bara batutu bara sapatu. Berimba tem-
 po haitu, naria anu nakura nte komiu?"

Nesana ira, "Kami ledo nakura nuapa-nuapa."

³⁶ Pade nanguli i Yesus, "Nakana tesamiu. Tapi sii-sii
 isema naria doina bara batutuna kana rakenina. Isema
 ledo naria gumana kana rapobaluna bajuna raalikana
 guma. ³⁷ Sabana, naria anu nitulisi riaru Buku Gasa
 nanguli, 'Magau Topepakasalama rareke ntona todaa.'
 † Anu nitulisi haitu mpuu-mpuu majadi ri karoKu. Apa
 anu nitulisi ri Buku Gasa anu nombatesa Yaku, ni-
 pakadupa sii-sii."

³⁸ Pade nanguli anaguruNa, "Pue, siimo guma roma-
 ta."

Nesana i Yesus, "Naganamo."

I Yesus nosambaya ri Bulu Zaitun

Matius 26:36-46; Markus 14:32-42

³⁹ Naupu sia, i Yesus nesuvu lako rangata haitu bo
 hau nantende ri Bulu Zaitun nangoseaka kabiasaNa.
 Bo ana-anaguruNa muni hau nosinggani-nggani nte
 Ia. ⁴⁰ Nakava sumai, niulikaNamo ira, "Komiu kana
 mosambaya ala komiu ledo mambela pesori."

⁴¹ Pade haunapa Ia sakide lako nte ira. Kakavaona ni-
 tasere samporempetaka vatu. Ia nantaputu bo nosam-
 baya: ⁴² "Tata, ane rapodotaMiu, lelakasimo peparajea
 hitu ‡ anu rapambela ka Yaku. Tapi nee dotaKu majadi,
 tapi dotaMiu majadi." ⁴³ [Pade nakavamo saito malae-
 ka lako ri suruga mompakaroso raraNa. ⁴⁴ Nasusa
 mpuu raraNa, sampe Ia nosambaya mpuu-mpuu bo
 iniNa eva raa natiti ri tana.]

⁴⁵ Naupu nosambaya, neanggamo i Yesus bo nanjili
 hau nte anaguruNa. NikavaNa namonjo puramo ira,
 nikeni kabuku nu rarara. ⁴⁶ NiuliNa ka ira, "Pembangu-
 mo! Nakuya komiu aga namonjo? Pembangumo bo
 posambayamo ala komiu ledo mambela pesori."

†† Yesaya 53:12 ‡ *Ielakasimo peparajea hitu. Basa Yunani:
 'Ielakasimo boda hitu.'*

I Yesus nisaka

Matius 26:47-56; Markus 14:43-50; Yohanes 18:3-11

⁴⁷ Da notesa i Yesus ka ira, nakavamo bara sako-pulu tona niken i Yudas, anaguru i Yesus. I Yudas nangga-parai i Yesus bo nitabena ante peeki, nangoseaka ada ntoYahudi.

⁴⁸ Tapi nanguli i Yesus, "Yudas, ante petabemu tutumo tano iko mompobalu Yaku, Ana nu Manusia ka baliKu."

⁴⁹ Tempo nisani nu anaguruNapa i Yesus rasaka, nangulimo ira, "Pue, ratimbe kami ante guma ira?" ⁵⁰ Saito ira netimbe mpuumo bo nambela batua nu Pakeni nTopanggeni Pesomba bo napudu talinga ngganana.

⁵¹ Tapi i Yesus nombatagi ira, "Nee metimbe!" Bo nituiNa talinga ntona bo nipakabeloNa.

⁵² Pade niulikaNa balengga-balengga ntopanggeni pesomba, pakeni-pakeni topojava Banua nu Alatala, bo totua-totua ngata nakava ri sia mombasaka Ia, niuliNa: "Yaku hii ledo topeago sampe komiu kana makava ante guma bo pato mosaka Yaku! ⁵³ Eo-eo Yaku naria nosangani ante komiu ri Banua nu Alatala, tapi ledo nisakamiu Yaku. Damo bongina hitu pade nabia komiu nakava mombasaka Yaku. Hitumo logamiu, loga nu Magau Seta!"

I Petrus nombasapu i Yesus

Matius 26:57-58, 69-75; Markus 14:53-54, 66-72; Yohanes 18:12-18, 25-27

⁵⁴ Nisakara mpuumo i Yesus bo nikenira hau ri banua nu Pakeni nTopanggeni Pesomba. I Petrus netuntuni nggavao lako ri purina. ⁵⁵ Ri doyata naria apu nipadumpu ntona rapanderu. Jadi haumo i Petrus nonturo nte topanderu haitu. ⁵⁶ Naria batua mombine nompelepi ia nonturo napara apu haitu nanguli, "Tona haitu muni roa i Yesus!"

⁵⁷ Tapi i Petrus nesapu, "Ledo nakana! Ledo nisaniku Ia!"

⁵⁸ Dopa nasae naria vai tona ntanina ri sia nanggita i Petrus bo nanguli ka ia, "Iko muni saito roara!"

Tapi nanguli i Petrus, "Ledo! Ledo yaku, le!"

⁵⁹ Nitasere sajaa kaliuna, nanguli vai saito, "Ia haitu mpuu-mpuu roa i Yesus, sabana ia muni toGalilea!"

⁶⁰ Tapi nesana i Petrus, "Ledo nisaniku nuapa niulimu!"

Da notesa i Petrus, eva nisuka nototorokomo manu. ⁶¹ Pade neilimo i Yesus nangganoto i Petrus. Jadi nitora i Petrusmo anu niuli i Yesus ka ia pangane ivei: "Dopame motoroko manu ngena bobaya, talu-ngganimo iko mombasapu Yaku." ⁶² Pade nesuvumo i Petrus hau ri savalikuna bo notumangi natesumondemonde.

I Yesus nipongei-ngeika bo niboba nu tantara

Matius 26:67-68; Markus 14:65

⁶³ Tona nombajaga i Yesus nompongei-ngeika Ia bo nibobara. ⁶⁴ Nibonggora mataNa bo nipekutanara, "He, nabi! Boto vei isema nombaboba Iko!" ⁶⁵ Nadea muni tesa-tesara nadaa nompongeika Ia.

I Yesus nitangara ri ngayo Polibu Mbaso Agama Yahudi

Matius 26:57-66; Markus 14:55-64; Yohanes 18:19-24

⁶⁶ Naeo mpadondo nasiromumo tona ri Polibu Mbaso Agama Yahudi, haitumo totua-totua ntoYahudi, balengga-balengga ntopanggeni pesomba, bo guru-guru agama. Pade nikenira i Yesus hau ri ngayo ntoPolibu haitu. ⁶⁷ Niulikara i Yesus, "Ane iko mpuumpuu Magau Topepakasalama, ulimo ka kami!"

Nesana i Yesus, "Nau damo Kupesanaka, ledo raparasayamiu tesaKu, ⁶⁸ bo ane Kupekutana komiu, tantu ledo rapesanakamiu. ⁶⁹ Aga hitu Kuuli ka komiu: nompamula sii-sii Yaku, Ana nu Manusia monturo ri sablingga nggana nu Alatala anu Neliu KakuasaNa." †

⁷⁰ Pade nekutana vai ira pura-pura, "Jadi, Ikomo hii tano Ana nu Alatala?"

Nesana i Yesus, "Nakana niulimiu, Yakumo hii Ana nu Alatala."

⁷¹ Pade nosiulikamo ira, "Domo paraluu raelota sabi ntanina, apa niepeta salaNa lako ri tesaNa mboto!"

I Yesus niparesa ri ngayo i Pilatus bo Magau Herodes

Matius 27:1-2, 11-14; Markus 15:1-5; Yohanes 18:28-38

23 Jadi neangga puramo toPolibu Mbaso haitu hau manggeni i Yesus ri ngayo Gubernur Pilatus. ² Ri sia ira nombarai Ia. Niulikara i Pilatus, "Tona hitu nika-va kami nompatuduki tona mangeva pomarenta. NitagiNa tona mombayari balasitee ka Magau Mbaso Kaisar, bo niuliNa Iamo i Kristus, saito Magau."

³ Nekutanamo Gubernur Pilatus, "Nakana mpuu Iko Magau ntoYahudi?"

Nesana i Yesus, "Nakana niulimiu."

⁴ Gubernur Pilatus nangulika balengga-balengga ntopanggeni pesomba bo todea haitu, "Niparesakumo tona hitu, ledo ntoto naria salaNa nikavaku!"

⁵ Tapi aga nantambaipa pebarusura bo nanguli, "PepatudukiNa nompakapane rara ntodea ri njuman- gu ngata ri bagia Yudea hitu. Ia nompamula nompatuduki ri bagia Galilea, sampe nakava ri sii muni- mo."

⁶ Nangepe haitu, nekutanamo Gubernur Pilatus, "ToGalilea Ia hii?"

Nesana tona, "Iyo, toGalilea Ia."

† Mazmur 110:1

⁷ Nisaninapa i Yesus toGalilea, nitudunamo tona manggeni i Yesus hau ri ngayo Magau Herodes, apa Magau Herodes noparenta ri Galilea. Bo tempo haitu, Magau Herodes naria muni ri ngata Yerusalem.

I Yesus niparesa ri ngayo Magau Herodes

⁸ Nadamba mpuu rara Magau Herodes nanggita i Yesus, apa nasaemo pangepena kareba i Yesus bo naoge rarana manggitaNa. Nisarumakana muni bara mamala rakitana kabaraka rapovia i Yesus. ⁹ Haitumo sampe nadea pompekutanana nte i Yesus, tapi i Yesus ledo nesana. ¹⁰ Balengga-balengga ntopanggeni pesomba bo guru-guru agama neangga ri sia muni bo nanggarasese nombarai i Yesus. ¹¹ Jadi Magau Herodes ante tantarana nanjalai Ia bo nipongei-geikara. Nipopasuakara baju magau ka i Yesus, pade nikenira mpanjili ka Gubernur Pilatus. ¹² Magau Herodes ante Gubernur Pilatus bara ipia nosipobali. Tapi nompamula eo haitu, nosimpovegamo ira.

I Yesus nihuku mate

Matius 27:15-26; Markus 15:6-15; Yohanes 18:39-19:16

¹³ Gubernur Pilatus nompasirumu balengga-balengga ntopanggeni pesomba, totua ngata, bo todea ntanina, ¹⁴ pade niulikana ira pura-pura, "Tona hitu nikenimiu ka yaku bo niulimiu Ia nompakeni tona nangeva pomarenta. Niparesakumo Ia ri ngayomiu pura-pura, tapi ledo ntoto nikavaku anu niraimiu ka Ia. ¹⁵ Ivesia muni panggava Magau Herodes, apa nipopanjinlina tumai ka yaku. Tona hitu ledo novia nuapa-nuapa masipato rapohuku mateNa. ¹⁶ Sabana haitu, kutudu tantaraku mombaboba bo mombakabasaka Ia." ¹⁷ [I Pilatus nanguli ivesia apa nantuntuni kabiasara, tempo Posusa Paskah, ia kana mombakabasaka ka ira saito tona nitarunggu.]

¹⁸ Tapi pura-pura tona ri sia nongare-ngare, "Patesimo Ia! Kabasakamo i Barabas ka kami!" ¹⁹ (I Barabas haitu nitarunggu sabana ia nangeva pomarenta ri ngata Yerusalem, bo ia topepatesi.)

²⁰ I Pilatus madota mombakabasaka i Yesus, jadi niulina vai sangganipa ri ngayo ntodea. ²¹ Tapi nongare vaimo ira, "Pakumo Ia ri kayu salib! Pakumo Ia ri kayu salib!"

²² Katalu-ngganina i Pilatus notesa ri ngayora, "Tapi nuapa salaNa? Ledo ria sangua salaNa nikavaku sampe masipato Ia rapatesi."

²³ Tapi ira aga nantambaipa kamanggana pongarera, "I Yesus kana rapaku ri kayu salib!" Kaupuna, padagimo ira, apa ira ledo naupu-upu nongare. ²⁴ Jadi kaupuna i Pilatus nombabotusi bo nompoyo perapi ntodea, ²⁵ bo nikabasakana ka ira tona niperapira, haitumo i Barabas, anu nitarunggu sabana nangeva pomarenta bo nepatesi. Bo i Yesus nidekeina ka tantara

Roma mompatesina nangoseaka dota nu pakeni ntoYahudi.

I Yesus nipaku ri kayu salib

Matius 27:32-44; Markus 15:21-32; Yohanes 19:17-27

²⁶ Naupu haitu nikenira i Yesus hau rapatesira. Ri tatanga dala, nipotomuramo saito toKirene nosanga i Simon. Ia dako nakava ri kota Yerusalem. Nipopetaara ia bo nibarusura manjimbuka kayu salib i Yesus ri puriNa.

²⁷ Nadea ntoto tona nantuntuni i Yesus. Naria muni bara sako-ndua mombine netuntuni. Mombine gahaitu notumangi, nantangisi Ia. ²⁸ I Yesus neili nompeinta ira bo nanguli, "Mombine toYerusalem! Nee ratangisimiu Yaku. Aginamo tangisi karomiu mboto bo anamiu, ²⁹ apa makava tempona ngena rauli ntona, 'Nabelo mpuu mombine nagampa anu ledo sangganiana noana bo ledo sangganiana nompatomi ngana!' ³⁰ Tempo haitu rauli ntona ka bulu, 'Rumpimo kami!' bo raulira ka buntina, 'ivumo kami!' Mandasa mpuu komiu ngena! ³¹ Sabana, ane rapoviara ivesia sii-sii nte kayu mata evamo Yaku tonoa, berimba muni rapoviara ngena nte kayu ngau evamo komiu totenggo? Tantu mandasa ntotopa komiu ngena!"

³² Tempo haitu nikenira muni randua tona rapatesi sangganiana nte i Yesus. Tona randua haitu nadaa mami. ³³ Tempo nakava ri buntina nosanga Banga Balengga †, nipakuramo i Yesus ri kayu salib. Bo tona nadaa randua haitu nipakura munimo ri kayu salib ntanina, saito ri sabingga nggana i Yesus, bo saito ri sabingga njidina. ³⁴ Naupu haitu i Yesus nosambaya, "Tata, ampungimo ira. Ledo nisanira nuapa nipoviara."

Tantara anu nombapaku i Yesus, notende lamoro alarasanira isema rakamalakana pakea i Yesus. ³⁵ Nadea tona neangga ri sia nantarana. Naria muni pakenipakeni ntoYahudi nompongeika i Yesus. Niulira, "Hm! Tona ntanina nipakasalama. Ane mpuu-mpuu Ia Magau Topepakasalama nipelisi nu Alatala, dekeikamo Ia mompakasalama karoNa mboto!"

³⁶ Tantara muni nompongeika Ia. Ira nanggaparai i Yesus bo nombaduduaka uve anggur napoi ka Ia.

³⁷ Niulira, "Ane iko mpuu-mpuu Magau ntoYahudi, pakasalama mbotomo karoMu!"

³⁸ Ri kayu salib ri bavo balengga i Yesus nitulisi ivei:
HITUMO MAGAU NTOYAHUDI.

³⁹ Saito tona nadaa anu nipaku ri kayu salib ri sinjori i Yesus, nombadee Ia, "Heh, le! NiuliMu iko Magau Topepakasalama. Ane makana, le, pakasalamamo karoMu bo pakasalama muni kami!"

⁴⁰ Tapi tona nadaa ntanina haitu nombatagi roana. Niulina, "Nee ivesia! Ledo naeka iko nte Alatala? Kita pura-pura nosangganingganinuhuku mate. ⁴¹ Bo kita

† Hosea 10:8 † *Banga Balengga: riarabasa Ibrani "Golgota".*

randua hii masipato rahuku nasinjuru ante pokaingguta nadaa. Tapi tona hitu ledo ntoto nasala!"

⁴² Niulina ka i Yesus, "Yesus, tora muni yaku tempo Komiu makava majadi Magau."

⁴³ Nanguli i Yesus ka ia, "Pariaramo tesaKu hitu. Eo hitu muni iko mosanggani-nggani ante Yaku ri Firdaus."

Kamate i Yesus

Matius 27:45-56; Markus 15:33-41; Yohanes 19:28-30

⁴⁴ Nitasere tinti sapulu randua tanga eo, domo nevangga mata nu eo. Pura-pura ngata haitu najadi nalanda sampe tinti tatalu nggoviana. ⁴⁵ Pade kae povombo ri Banua nu Alatala nabite najadi rombite. ⁴⁶ Naupu haitu i Yesus nongare ante suara namangga, "Tata, siimo nyawaKu!" † Naupu nanguli ivesia, naponjimo nosaNa.

⁴⁷ Tempo balengga nu tantara nanggita anu najadi, nitoiyanamo Alatala. Niulina, "Nakana mpuu tona hitu ledo ria salaNa."

⁴⁸ Todea anu nakava nantara pura-pura kajadia haitu nikitara i Yesus namatemo. Jadi nanjilimo ira nosapasapa bambarara apa nanjoso rarara. ⁴⁹ Pura-pura roa i Yesus bo mombine anu nosanggani nte Ia lako ri bagia Galilea, neangga nggavao nompeintaka pura-pura anu najadi haitu.

I Yesus nitana

Matius 27:57-61; Markus 15:42-47; Yohanes 19:38-42

⁵⁰⁻⁵¹ Naria langgai nosanga i Yusuf, lako ri ngata Ari-matea ri bagia Yudea. Ia tona nabelo bo pokaingguna nanoa. Ia nantongoraka tempona Alatala moparenta mpo Magau. Ia saito lako ri Polibu Mbaso Agama Yahudi tapi ledo nasituju ia ante potangara bo poviara nompatesi i Yesus. ⁵² I Yusuf hau nte i Pilatus nerapi karobata i Yesus radekei ka ia ratanana. ⁵³ Nitaurakana karobata i Yesus lako ri kayu salib, pade nisompuna ante kae gandisi nabelo. Naupu haitu nibolina karobata i Yesus riarara dayo, ri vatu nipaa. Dayo haitu da nabaru dopa ria sanggani nipodayo. ⁵⁴ Haitu najadi nggoviana ri eo pompakasadia ka eo penonto. Nangoseaka kabiasa ntoYahudi, nompamula kasolo nu eo, ira nitagi nokarajaa sabana nompamulamo eo penonto.

⁵⁵ Mombine nomporea i Yesus lako ri bagia Galilea, hau nantuntuni i Yusuf manggita dayo. Nikitara muni berimba karobata i Yesus niboli riarara dayo. ⁵⁶ Naupu haitu nanjilimo ira hau rangata, pade nipakasadiara rampa-rampa bo lana dupa radika ri karobata i Yesus. Eo sunjuna haitu eo penontomo, jadi nenontomo ira nokarajaa, nantuntuni atura agama ntoYahudi.

† Mazmur 31:6

I Yesus natuvu mpanjili

Matius 28:1-10; Markus 16:1-8; Yohanes 20:1-9

24 Eo Aka sanggaeo mpisina, mombine gahaitu hau ri dayomo nanggeni rampa-rampa nipakasadiara ka karobata i Yesus. ² Nakava ri dayo, nikitara nateduliakamo vatu nipotutui dayo haitu. ³ Jadi nesuamo ira riarara dayo, tapi domo naria karobata i Yesus ri sia. ⁴ Tempo ira neangga ri sia bo da naingu rarara nompekirika kajadia haitu, sampesanika neongamo randua malaeka nu Alatala nopakea nenggila neangga ri sinjorira. ⁵ Naeka mpuu rara mombine gahaitu sampe ira notungga narapa ri tana. Nangulimo randua malaeka haitu ka ira, "Nakuya komiu nangelo tona natuvu ri ponturo ntona namate? ⁶ Domo naria Ia ri sii. Natuvu mpanjilimo Ia! Toramo anu nitesaNa ka komiu tempo Ia da naria ri bagia Galilea. ⁷ NiuliNa, 'Yaku, Ana nu Manusia, kana radekei ka tona nadosa, bo mamate rapaku ri kayu salib, tapi ri eo katataluna Yaku matuvu mpanjili.' "

⁸ Nangepe anu niuli nu malaeka haitu, nitoraramo tesa i Yesus bara ipia. ⁹ Jadi nanjilimo ira lako ri dayo haitu, bo nitesara pura-pura anu najadi pangane ka anaguruNa sapulu saito bo ka pura-pura topangosea-ka Ia ntanina. ¹⁰ Mombine pangane iamo: i Maria Magdalena, i Yohana, i Maria tina Yakobus, ante mombine-mombine ntanina. Nitesara pura-pura anu najadi pangane ka anaguruNa, ¹¹ tapi ana-anaguru gahaitu ledo niparasayara anu nitesa nu mombine gahaitu, apa nis-arumakara aga tesa nikarara mboto. ¹² Tapi i Petrus neangga bo nangova hau ri dayo haitu. Ia notungga, nompeinta riarana. Nikitana damo kae sompuna bayangi ri sia. Domo naria karobata i Yesus. Nanggita haitu nanjilimo i Petrus, nokumaa nompekirika anu najadi.

I Yesus neumba ri ngayo ntona randua ri dala hau ri ngata Emaus

Markus 16:12-13

¹³ Eona haitu muni, randua topangoseaka i Yesus nolipa hau ri ngata Emaus, nitasere sapulu sakilo kakavaona lako ri ngata Yerusalem. ¹⁴ Ira notesa nggalako dala, nombatesa anu najadi ante i Yesus. ¹⁵ Da notesa-tesa nosinjula pekiri ira, sampesanika neongamo i Yesus bo nolipa nosanggani-nggani nte ira. ¹⁶ Nikitara i Yesus, tapi ledo nisanira Ia apa naria anu nompakabali matara. ¹⁷ Nanguli i Yesus ka ira, "Nuapa nitesamiu pangane?"

Netaamo ira randua haitu ante buku rara. ¹⁸ Nesanamo saito anu nosanga i Kleopas, "Lako ri pura-pura tona ri ngata Yerusalem bara aga Komiu saitoMiu ledo nangisani anu najadi bara sako-mbongi naliu!"

¹⁹ Nekutana i Yesus, "Nuapa najadi?"

Nesana ira, "Anu najadi nte i Yesus, toNazaret! Ia nabi nu Alatala. TesaNa bo poviana nakuasa mpuu ri panggita nu Alatala, bo muni ri panggita ntodea.²⁰ Tapi balengga-balengga ntopanggeni pesomba bo totua-totua nu ngatata nombadekei Ia ka pomarenta ala rahuku mate, bo nipakura Ia ri kayu salib.²¹ Kami nanjarumaka Iamo mombakabasaka kita toIsrael lako ri balita. Bongi hitu katalu-mbonginamo Ia namate.²² Tapi bara sako-ndua mombine roa kami nom-pakatekaja kami, apa bobayana pangane ira hau ri dayo i Yesus,²³ tapi ledo nikavara karo batana ri sia. Ira nanjili nanguli ka kami nikitara malaeka lako nte Alatala bo malaeka haitu nanguli ka ira, i Yesus natuvu mpanjilimo.²⁴ Naupu haitu, bara sako-ndua roa kami hau ri dayo bo nikavara anu nitesa nu mombine pangane ivesia mpuu, tapi ledo nikitara i Yesus."

²⁵ Nangepe haitu, i Yesus nanguli ka ira, "Nadoyo mpuu komiu! Nakumba mpuu pekirimiu momparasaya anu nitesa nu nabi-nabi nggaulu!²⁶ Magau Topepakasalama mombarasai peparajea ntani ruru dopame rapakaoge."²⁷ I Yesus nombatesa ka ira pura-pura anu nitulisi ri Buku Gasa, anu nombaboto karoNa mboto, nompamula lako ri buku-buku nitulisi Nabi Musa sampe ri buku-buku nabi ntanina.

²⁸ Nakava ri ngata Emaus, i Yesus madota mompapola polipana.²⁹ Tapi ira nompopetaa Ia. "Mesai ri sii ante kamimo ruru, apa nanggoviamo, masolomo eo." Jadi i Yesus nesua nosanggeni ante ira hau rabanua.

³⁰ Tempo Ia nonturo nangande sanggeni ante ira, nialana roti pade niuliNa tarima kasi ka Alatala. Naupu haitu nitubiNa roti haitu bo nibagiNamo ka ira.

³¹ Damo rahaitu pade nanoto rarara bo nisanira, Iamo i Yesus. Naupu haitu, napaya ri belaNamo, domo ria nikitara i Yesus.³² Pade nosiulikamo ira, "Siamo sampe nasana rarata tempo Ia notesa ka kita ri dala pangane bo nombatentei isi Buku Gasa ka kita!"

³³ Jadi jaa haitu munimo ira nanjili hau ri ngata Yerusalem. Hamai nikavara anaguru i Yesus sapulu saitopa nasiromu ante tona ntanina.³⁴ Tona nasiromu haitu nanguli ka ira randua, "I Yesus mpuu-mpuu natuvu mpanjilimo! Ia neonga nte i Simon Petrus!"

³⁵ Nangepe haitu, randua topangoseaka i Yesus anu dako neonga haitu, nombajaritai anu najadi nte ira ri dala hau ri ngata Emaus, bo berimba nisanira i Yesus tempo Ia notubi roti.

I Yesus nompopakita karoNa ka anaguruNa

Matius 28:16-20; Markus 16:14-18; Yohanes 20:19-23; Suro-Suro 1:6-8a

³⁶ Da notesa-tesa ira haitu, sampesanika i Yesus neangga ri tatangara, bo nanguli, "Kuperapi Alatala mompakatinonto raramiu!"

³⁷ Tapi natekaja ira bo naeka mpuu rarara. Nisarumakara bara mboa.³⁸ Jadi i Yesus nanguli ka ira, "Nakuya komiu naeka bo nonggai raramiu?"³⁹ Peintamo paleku bo peinta muni kadaKu. Yaku mpuumo hii! Tuimo ala rasaniami Yaku ledo mboa. Apa mboa ledo ria isina bo bukuna. Tapi Yaku hii, naria isiKu bo bukuKu."

⁴⁰ Naupu sia, nipopakitana ka ira valea nu paku ri paleNa bo ri kadaNa.⁴¹ Nadamba mpuu rarara tapi nokumaa muni. Da nonggai rarara. Jadi i Yesus nanguli vai ka ira, "Naria anu rakande ri sii?"⁴² Jadi nidekeikaramo sanggato bau ntasi nitunu.⁴³ I Yesus nangala bau haitu bo nikandeNa ri ngayora ala rasani-ria Ia ledo mpuu mboa.

⁴⁴ Naupu haitu, niuliNamo ka ira, "Hitumo niuliKu ka komiu bara ipia tempo Yaku da naria nosanggeni ante komiu. Pura-pura anu niboto nu nabi-nabi nggaulu nantesaki Yaku, kana rapakadupa. Haitumo, anu nitulisi ri Buku Atura Agama nitulisi Nabi Musa, Buku Nabi-nabi ntanina, bo Buku Mazmur."⁴⁵ NipakanotoNa pekirira ala rapakulera mombapaha isi Buku Gasa.⁴⁶ NiuliNa ka ira, "Riara Buku Gasa nitulisi, Magau Topepakasalama kana rapandasa bo rapatesi bo eo katalaluna matuvu mpanjili lako ri kamateNa.⁴⁷ Kareba Belo kana rapatolele ka pura-pura manusia; ala ira majea lako ri dosara bo Alatala mombaampungira sabana anu nipovia nu Magau Topepakasalama. Kareba haitu kana rapatolele mompamula lako ri ngata Yerusalem hitu sampe ri njumangu dunia.⁴⁸ Komiumo sabina pura-pura anu najadi nte Yaku.⁴⁹ Pariaramo! Kupopanau ka komiu Nosa Gasa anu nijanji nTuaMaKu Alatala. Jadi popeamiu ri sii ri ngata Yerusalem sampe kuasa nu Alatala manau nte komiu."

I Yesus neore hau ri suruga

Markus 16:19-20; Suro-Suro 1:9-11

⁵⁰ Naupu haitu, i Yesus nanggeni ana-anaguruNa hau ri savaliku ngata Yerusalem napara ngata Betania. Ri sia nilaerakana paleNa bo nerapi Alatala mombadekei belo ka ira pura-pura.⁵¹ Da nosambaya, nolanggamo i Yesus lako ri ngayora, bo neore hau ri suruga.⁵² Nantaputumo anaguruNa mombasomba Ia. Naupu sia nanjilimo ira hau ri ngata Yerusalem ante rara nadamba ntoto.⁵³ Ira naria njuu ri Banua nu Alatala nombatoiya Alatala.

19-May-2009@12:42, Backup Description=19-May-2009@09:53, snave - 26-May-2009@11:04, Backup Description=26-May-2009@11:03, B Altork - ❖❖❖

Yohanes

Vamba nu Tesa

Buku hitu nitulisi i Yohanes, anaguru i Yesus anu nabiasa niuli riara buku hitu “anaguru nipotove i Yesus.” Ia mboto nanggita pura-pura kajadia nitesa riara Buku hitu.

Riara buku hitu i Yesus niuli “Tesa nu Alatala.” Iamo nisuro nu Alatala tumai ri dunia majadi manusia bo monturo ri tatanga manusia. Patuju nu buku hitu ala pura-pura topombaca tesa hitu mamala momparasaya i Yesus Ana nu Alatala, Magau Topepakasalama anu nijanji nu Alatala, bo ala rakavara katuvua nabelo sampe ri kasae-saena (20:31).

Pasal 2 sampe pasal 12 notesa pitu-ngaya tanda nabaraka nipovia i Yesus. Tanda-tanda haitu nompakalanto i Yesus mpuu-mpuu Magau Topepakasalama nakuasa. Nggani-nggani nitesa tanda nabaraka, nitesa muni pepatuduki i Pue Yesus ka todea. Patuju i Yesus novia tanda nabaraka haitu, nipakalanto riara pepatudukiNa. Nanggita tanda-tanda haitu, naria tona momparasaya i Yesus bo najadi topangoseaka Ia. Tapi naria muni sanu nesapuaka bo ledo momparasaya Ia. Nadea mpuu pakeni ntoYahudi nangeva Ia.

Ri pasal 13-17 naria tesa i Yesus ka anaguruNa bongi Ia nisaka. Ia nompatuduki ira bo nompakaroso rarara. Ri pasal 14-21 i Yesus nisaka, nitangara, nipatesi, bo natuvu mpanjili.

notesa katuvua nabelo sampe ri kasae-saena anu nompamula sii-sii ka tona momparasaya i Yesus. Nadea pora-pa nipake ri buku hitu mompakalanto katuvua nabelo haitu bo posisanita ante i Yesus. Evamo, i Yesus nirapaka uve anu nombadekei katuvua, roti, reme, dala, topoevu nabelo, valaa anggur.

Isi nu Buku

Pompamulana (1:1-18)

I Yohanes Topediu bo anaguru i Yesus pamulana (1:19-51)

Pokarajaa i Yesus ri mata ntodea (Pasal 2-12)

Pepatuduki i Yesus ka ana-anaguruNa (Pasal 13-17)

I Yesus namate nipaku ri kayu salib bo natuvu mpanjili ri eo katataluna (Pasal 18-21)

Yesus Kristus Iamo Tesa nu Alatala

1 Ri lamba pamulana naria mamimo Tesa nu Alatala. Tesa haitu nosingani-nggani ante Alatala, bo Ia nasimbayu nte Alatala. ² Lako ri lamba pamulana Tesa nu Alatala nosingani-nggani ante Alatala. ³ Iamo nipopale nu Alatala nompajadi pura-pura anu naria. Nau sangaya ledo ria rapajadi ane ledo lako nte Ia. ⁴ Iamo puna katuvua nabelo, bo katuvua nabelo nompakareme pekiri nu manusia. ⁵ Reme haitu nevanta ri kalandana ri dunia hitu. Bo kalandana haitu ledo ntoto nompakule mompepayana. †

⁶ Naria saito tona nosanga i Yohanes ††. Ia nakava nisuro nu Alatala. ⁷ I Yohanes nakava nosabi nompopaisani reme haitu, ala pura-pura manusia mamala momparasaya. ⁸ Ia mboto ledo reme haitu, ia aga notesa nompopaisani reme haitu. ⁹ Reme haitu reme nakana anu nakava ri dunia mompakareme pura-pura

† Kalandana haitu ledo ntoto nompakule mompepayana. kalandana haitu ledo ntoto nompakule nompahana. †† Yohanes. Haitumo, Yohanes Topediu.

manusia. ¹⁰ Tesa nu Alatala naria mamimo ri dunia, tapi nau Ia nipopale nu Alatala nompajadi dunia, manusia ri dunia ledo nadota nangisaniNa. ¹¹ Ia nakava ri ngataNa mboto ‡, tapi tona ri ngataNa haitu ledo nadota nantarima Ia. ¹² Tapi isema-sema nantarima Ia bo momparasaya Ia, nidekeikaNa kuasa majadi ana-ana nu Alatala. ¹³ Ira najadi ana-ana nu Alatala ledo sabana nipoanaka ntotuara, atau lako ri dota manusia bara dota ntuumara. Tapi sabana Alatala mboto nompajadi ira anaNa.

¹⁴ Ia anu niuli Tesa nu Alatala haitu najadi manusia bo nonturo ri tatanga kami ri dunia hitu. Bo nikita kami kuasaNa bo kaogeNa, haitumo kuasa bo kaoge nitarimaNa lako nte TuamaNa apa Ia AnaNa saito-itoNa. Iamo sampe nisanita mpuu Alatala bo toveNa ka kita.

¹⁵ I Yohanes nompopaisani ka todea isema niuli Tesa nu Alatala haitu. Nongaremo ia, “Hitumo Ia anu niuliku bara ipia. Niuliku kana maria tona makava ri puriku anu naogepa pade yaku. Ia naogepa pade yaku sabana lako ri lamba pamulana dopame yaku nipoanaka

‡ t ngataNa mboto, haitumo Ia nakava nte toYahudi.

naria mamimo Ia." ¹⁶ Naoge mpuu tove i Yesus Kristus ka kita sampe ledo ria kaupu-upuna belo nidekeiNa ka kita. ¹⁷ Lako nte Nabi Musa nitarimata Atura-atura agama. Tapi lako nte i Yesus Kristus sampe mpuu-mpuu nisanita Alatala bo toveNa ka kita. ¹⁸ Dopa naria saitoa tona nanggita Alatala. Tapi AnaNa saito-itona anu nasimbayu nte Alatala bo narapa nte Ia, Iamo nom-popaisani Alatala ka kita.

I Yohanes Topediu notesa karon mboto

Matius 3:1-12; Markus 1:1-8; Lukas 3:1-20

¹⁹ Pakeni-pakeni ntoYahudi ri ngata Yerusalem nantudu bara sako-ndua topanggeni pesomba bo toLewi hau nte i Yohanes Topediu mompekutana ia ivei: "Isema kakanana komiu tutu?"

²⁰ Nangepe haitu, ledo nitabuniaka i Yohanes nuapa-nuapa tapi nitovontoona, "Yaku hii ledo Magau Topepakasalama anu nijanji nu Alatala."

²¹ Bo nipekutanara vai ia, "Ane ivesia, isema tano komiu? Bara komiumo tu Nabi Elia?"

Nesana i Yohanes, "Ledo."

Bo nekutana vaimo ira, "Bara komiumo tu nabi anu nijanji nu Alatala makava bara maipia?" †

Nesana i Yohanes, "Ledo muni."

²² Bo nanguli vaimo ira, "Ane ivesia, uli ka kami isema kakanana komiu ala mamala ratesa kami ka tona nantudu kami tumai. Kakanana isema komiu?"

²³ Nesana i Yohanes, "Yakumo hii tona nitesa Nabi Yesaya nggaulu ivei:

'Naria saito tona nongare-ngare ri karava bai: pakasadia dala ka Tupu!'"

Yesaya 40:3

²⁴ Ira bara sako-ndua haitu anu nitudu ntoFarisi.

²⁵ Ira muni nompekutana ia, "Ane komiu ledo Magau Topepakasalama, ledo Nabi Elia, bo ledo muni nabi nijanji nu Alatala makava, nakuya tano komiu nombadiu tona? Ante kuasa isema?"

²⁶ Nesana i Yohanes, "Yaku nombadiu tona ante uve tandana ira najea lako ri dosara. Tapi ri tatangamiu naria saito tona dopa nisanimiu. ²⁷ Ia haitu makava maliu yaku. Tapi Ia naogepa pade yaku sampe nau mombavole lui sapatuNa, ledo masipato yaku."

²⁸ Pura-pura haitu najadi ri ngata Betania †† ri sambote Binangga Yordan ri ponturo i Yohanes nombadiu tona.

I Yohanes nanguli i Yesus Ana Bimba nu Alatala

²⁹ Eo kamailena i Yohanes nanggita i Yesus nakava tumai nanggaparai ia, bo niulina ka tona hamai, "Pein-

† nabi anu nijanji nu Alatala makava bara maipia: niparasaya ntoYahudi kana makava saito nabi mompopaisani kakava nu Magau Topepakasalama. Peinta Ulangan 18:15, 18. †† ngata Betania: naria ngata Betania ntanina napara ngata Yerusalem. Peinta Yohanes 11:1; 12:1.

tamo! Tumaimo Ana Bimba nipakasadia nu Alatala anu mompakalali dosa manusia! ³⁰ Iamo nitesaku bara ipia tempo niuliku ka komiu kana makava saito tona ri puriku anu naogepa pade yaku, sabana dopame yaku nipoanaka, naria mamimo Ia lako ri lamba pamulana. ³¹ Yaku mboto bara ipia dopa nisaniku Ia haitu Magau Topepakasalama. Tapi patuju kakavaku mombadiu tona ante uve, ala Ia rapopaisani ka toIsrael."

³² Bo naria muni tesa i Yohanes ntanina ivei: "Nikitaku Nosa Gasa nu Alatala nanau lako ri langi nolenje mpo tonji banggebodo netuu ri karoNa. ³³ Tempo haitu, dopa nisaniku Ia Magau Topepakasalama. Tapi Alatala anu nantudu Yaku mombadiu tona ante uve, Iamo nanguli ka yaku bara ipia ivei: 'Ane nukita Nosa GasaKu manau metuu ri tona saito, Ia haitumo mombadiu tona ante Nosa GasaKu.'" ³⁴ Bo i Yohanes nom-papola tesana, "Yaku mboto nanggita kajadia haitu bo nombasabiki: Iamo mai Ana nu Alatala!"

Anaguru i Yesus pamulana

³⁵ Eo kamailena naria vaimo i Yohanes nosanggani-nggani ante randua topangoseaka ia. ³⁶ Tempo nikitara i Yesus noliu ri sia, nangulimo i Yohanes, "Peintamo! Haitumo Ana Bimba nu Alatala!"

³⁷ Tempo randua topangoseaka i Yohanes haitu nangepe tesana, haumo ira nangoseaka i Yesus. ³⁸ I Yesus neili ntaliku nanggita ira nangoseaka Ia. Bo nipekutanaNa, "Nuapa nielomiu?"

Nesanamo ira randua, "Rabi, ri umba ponturoMiu?" (Batuana Rabi, Guru.)

³⁹ Nesana i Yesus, "Kaimo ala rasanimiu." Tempo haitu nitasere tinti ampa nggoviana. Jadi hau mpuumo ira randua nanggita ponturo i Yesus. Bo ira nosanggani ante Ia eo haitu.

⁴⁰ I Andreas saito lako ri ira randua anu nangepe tesa i Yohanes pangane, hau nioseakanamo i Yesus. I Andreas nosampesuvu nte i Simon Petrus. ⁴¹ Naliu i Andreas nosinggava nte i Yesus, haumo ia nasalisa nanggelo sampesuvuna i Simon bo nanguli, "Kami nosinggava nte Mesias!" (Batuana "Magau Topepakasalama anu nijanji nu Alatala". Riaru basa Yunani "Kristus".)

⁴² Bo nikeninamo i Simon hau nte i Yesus.

Tempo ira nakava hamai, nikita i Yesusmo i Simon bo niuliNa, "Iko Simon ana i Yohanes ‡. Tapi nompamula sii-sii sangamu i Kefas." (Kefas nasimbayu batuana ante Petrus, batuana, "vatu".)

I Yesus nompokio i Filipus bo i Natanael mangoseaka Ia

⁴³ Eo kamailena i Yesus nonia hau ri bagia Galilea. Ia nompotomu i Filipus, bo niulikaNa, "Kaimo, oseakamo

Yaku.”⁴⁴ I Filipus haitu tona lako ri ngata Betsaida, haitumo ngata ponturo i Andreas bo i Petrus.

⁴⁵ Bo hau i Filipus nosinggava nte i Natanael bo niulikana, “Kami nosinggava nte tona nitesa Nabi Musa ri ara Buku Atura Agama bo nitesa ri Buku Nabi-nabi ntanina, haitumo i Yesus lako ri ngata Nazaret, ana i Yusuf.”

⁴⁶ Tapi nesanamo i Natanael, “Ah! Ledo nisarumakaku anu nabelo meumba lako ri ngata Nazaret!” Nanguli Filipus ka ia, “Kaimo. Peinta mbotomo!” Bo hau mpuumo i Natanael.

⁴⁷ Tempo i Yesus nanggita i Natanael nakava nte Ia, niulikaNa, “Peintamo! Hitumo saito toIsrael mpuu! Ledo ntoto naria katenggona.”

⁴⁸ Nangepe tesa haitu nanguli i Natanael ka i Yesus, “Berimba sampe nisaniMiu yaku?”

Nesanamo i Yesus, “Dopame i Filipus hau nompokio iko, nikitaKumo iko hamai ri puna kayu ara.”

⁴⁹ Nangepe tesa haitu nangulimo i Natanael, “Guru, Komiumo Ana nu Alatala! Komiu mpuu-mpuu magau ntoIsrael!”

⁵⁰ Nanguli i Yesus ka ia, “Iko nompasaya sabana niuliku nikitaKu iko hamai ri puna kayu ara. Tapi kana mukita kajadia nabarakapa pade kajadia haitu.”⁵¹ Bo niuli i Yesus ka pura-pura ira, “Pariaramo tesaKu hitu, rakitamiu langi matebuka bo malaeka-malaeka nu Alatala manau bo mompene ri ngayoKu, Ana nu Manusia.”[†]

Posusa ponika ri ngata Kana

2 Rombongi kaliuna kajadia haitu, naria posusa ponika ri ngata Kana ri bagia Galilea. Tina Yesus naria hamai.² I Yesus bo anaguruNa muni nigaga hau ri posusa haitu.³ Da ranja mposusa, naotimo uve anggur. Jadi nanguli tina Yesus ka Ia, “Domo ria uve anggurra. Naoti puramo.”

⁴ Nanguli i Yesus ka tinaNa, “Ina, nakuya niulimiu ka Yaku? Dopa nakava tempona Yaku mompopakita kuasaKu.”

⁵ Bo nangulimo tinaNa ka topokarajaa ri posusa haitu, “Poviamo nuapa-nuapa ratuduNa ka komiu ngena.”

⁶ Ri sia naria aono gumba mbaso nipovia lako ri vatu nipasadia rapomboli uve rapotoposi kada bo pale nanggoseaka ada-ada ntoYahudi. Sangu gumba haitu, isina saatu lite uve.⁷ Nanguli i Yesus ka topokarajaa ri posusa haitu, “Isimo gumba-gumba haitu ante uve.” Jadi niisira mpuumo sampe naponu.⁸ Naupu haitu nanguli i Yesus, “Sibumo sakide uve haitu, bo kenimo ka tupu mposusa.”

[†] Peinta Kajadia 28:12. I Yakub nggaulu nanggita malaeka nanau mompene ri tangga. Patuju i Yesus, haitu majadi tandana Ia nipelisi nu Alatala movia pokarajaaNa haitu.

Jadi nikeniramo uve haitu ka tupu mposusa.⁹ Tupu mposusa haitu nompetami sakide uve nikenira. Domo aga uve nggoo, najadi uve anggurmo. Ledo nisanina lako ri umba uve anggur haitu. Aga tona nombasibu uve pangane nangisani. Naupu tupu mposusa nompetami uve anggur haitu, nipokiona boti langgai¹⁰ bo niulikana, “Biasana tona nompatala uve anggur tobelona ntani ruru, bo ane torata nabasamo nanginu pade nipatala ka ira uve anggur biasa. Tapi komiu, ni bolimiu uve anggur tobelona sampe sii-siii!”

¹¹ Haitumo kabaraka pamulana nipovia i Yesus tempo Ia ri ngata Kana ri bagia Galilea. Ia nompopakita kuasaNa ante kabaraka haitu bo ana-anaguruNa nompasaya Ia.

¹² Naupu posusa haitu i Yesus hau ri ngata Kapernaum nosinggani-nggani ante tinaNa bo sampesuvu sampesuvuNa bo ana-anaguruNa. Bo ira nonturo hamai bara sako-mbongi kasaena.

I Yesus nompopalai topobalu-balulako ri Banua nu Alatala

Matius 21:12-17; Markus 11:15-19; Lukas 19:45-48

¹³ Naparapa Eo Mbaso Paskah ntoYahudi, haumo i Yesus ri ngata Yerusalem.¹⁴ Ri doyata nu Banua nu Alatala nipeintaNa tona nobalu-balulaji, bimba bo tonji banggebodo. Bo naria muni toposula doi^{††} nonturo hamai.¹⁵ Nanggita haitu, i Yesus novia cambu lako ri kaloro bo nipopalaiNa pura-pura ira lako ri Banua nu Alatala nosinggani-nggani ante bimba bo japi haitu. Doi ntoposula doi nikamburakaNa. Bo meja-mejara nisumbolinakaNa.¹⁶ Bo niulikaNa topobalu tonji banggebodo haitu, “Keni haumo pura-pura anu tutu lako ri sii! Banua nTuamaKu nee rapajadi banua pogade!”

¹⁷ Nanggita pokainggu i Yesus haitu, nitora nu ana-anaguruNamo anu nitulisi riaru Buku Gasa ivei: “Pepotoveku ka banuaMiu, Pue, mompakamate yaku.”

Mazmur 69:9.

¹⁸ Naupu haitu pakeni-pakeni ntoYahudi nangeva i Yesus bo nanguli, “Kabaraka nuapa rapoviaMu tandana Iko nakuasa nompopalai tona ivesia?”

¹⁹ Nesana i Yesus, “Geromo banua nu Alatala hitu bo Kubangu mpanjili riaru talu-eo.”

²⁰ Nanguli vai toYahudi, “Ba! Tona nokarajaa patapulu bo ono-mpae kasaena novia Banua nu Alatala hitu. Berimba Iko mamala mombabanguna mpanjili riaru talu-eo?”²¹ Tapi banua nu Alatala nipatuju i Yesus haitumo karoNa mboto.²² Naliu i Yesus natuvu mpanjili lako ri kamateNa, nitora nu anaguruNamo tesaNa hi-

^{††} toposula doi: naria sangaya doi nipakatantu rapake riaru Banua nu Alatala. Ledo nidekei doi Roma rapake, jadi tona kana nosula doira.

tu. Bo niparasayaramo anu nitulisi riaru Buku Gasa bo anu nitesa i Yesus mboto.

I Yesus nangisani pura-pura isi rara ntai ntona

²³ Tempo i Yesus da naria ri ngata Yerusalem tempo Posusa Paskah, nadeamo tona nomparasaya Ia sabana nikitara kabaraka-kabaraka nipoviaNa. ²⁴ Tapi i Yesus mboto ledo nomparasaya ira sabana nisaniNa isi rara ntaira pura-pura. ²⁵ Ledo paraluu tona mompakalanto inggu manusia ka Ia sabana nisaniNa puramo isi rara ntai manusia.

I Yesus ante i Nikodemus

3 Naria saito toFarisi nosanga i Nikodemus. Ia pak-
eni agama ntoYahudi. ² Ia nakava nte i Yesus tempo nabongi bo nanguli, "Guru, nisani kami Komiu tu nisuro nu Alatala mompatuduki kami. Sabana, ledo ria saitoa tona mompakule movia kabaraka mpo anu nipoviaMiu tutu ane Alatala ledo nosanggani nte ia."

³ Nesana i Yesus, "Pariaramo tesaKu hitu, ledo ria saitoa tona mamala majadi todea riaru Poparenta nu Alatala ane ia ledo rapoanaka mpanjili." †

⁴ Nekutana i Nikodemus nte Ia, "Mamala tona natu-amo rapoanaka mpanjili? Mamala ia mesua vai riaru ntai ntinana bo rapoanaka mpanjili?"

⁵ Nesana i Yesus, "Pariaramo tesaKu hitu; ane tona ledo rapoanaka ante uve †† bo ante kuasa Nosa Gasa nu Alatala, tona haitu ledo mamala majadi todea riaru Poparenta nu Alatala. ⁶ Karota najadi lako ri manusia, tapi katuvu nabaru najadi lako ri kuasa Nosa Gasa nu Alatala. ⁷ Jadi nee mahera ane Kuuli ka komiu, komiu kana rapoanaka mpanjili. ⁸ Poiri neburu hau ri umba nipodotana. Kita nangepe vuuna tapi ledo nisanita lako ri umba kakavana bo hau ri umba rakalauna. Ivesia muni kuasa Nosa Gasa nu Alatala nompoanaka tona mpanjili."

⁹ Bo nekutana vaimo i Nikodemus, "Berimba sampe haitu mamala majadi?"

¹⁰ Nesana i Yesus, "Iko tu guru ntoYahudi anu nibila. Berimba bo ledo nisanimu? ¹¹ Pariaramo tesaKu hitu. Kami hii notesa anu nisani kami, bo kami nanguli anu nikita kami mboto, tapi komiu pura-pura ledo nadota momparasaya tesa kami. ¹² NitesaKu anu najadi ri dunia hitu, ledo niparasayamiu. Berimbamo raparasayamiu ane Kutesa ka komiu anu najadi ri suruga? ¹³ Dopa ria saitoa tona neore hau ri suruga nang-gita anu najadi hamai. Aga Yaku, Ana nu Manusia anu nanau lako ri suruga tumai ri dunia nanggitana.

† rapoanaka mpanjili. Basa Yunani: rapoanaka lako ri bavona. Batuana, nanggava katuvu nabaru lako nte Alatala ri suruga. Peinta muni ayat 7. †† rapoanaka ante uve: nadea tafsiran. Sanu nanguli batuana porapa haitu pombadiu i Yohanes atau pombadiu ntoKristen. Sanu nanguli batuana pompoanaka biasa, haitumo uve nesuvu tempo noana. Sanu nanguli batuana uve haitu, Nosa Gasa.

¹⁴ Nabi Musa nggaulu novia sanggayu ule tambaga ri karava bai bo nianggatakana pakalanga ri tinja sambesa ala isema-sema mantingoa ule haitu ledo mamate. Yaku, Ana nu Manusia kana raanggataka pakalanga, ‡ nasimbayu mpo ule haitu, ¹⁵ ala isema-sema momparasaya Yaku, manggava katuvua mabelo sampe ri kasae-saena. ¹⁶ Apa Alatala mpuu-mpuu nompotove manusia sampe nidekeiNa AnaNa saito-itoNa, ala isema-sema momparasaya AnaNa ledo rapopogaa lako nte Alatala tapi manggava katuvua mabelo sampe ri kasae-saena. ¹⁷ Apa patuju nu Alatala nombatudu AnaNa makava ri dunia hitu, ledo ala mombahuku manusia tapi ala ira rapakasalamaNa.

¹⁸ Isema-sema momparasaya Ana nu Alatala haitu le-
do rahuku. Tapi isema-sema ledo nomparasaya, ni-
huku nu Alatalamo sabana ledo niparasayara Ana nu Alatala saito-itoNa haitu. ¹⁹ Ana nu Alatala nakava ri dunia eva reme nombavanta kalandana, tapi ira ni-
huku sabana nipokonorapa kalandana pade karemena apa pokainggura nadaa. ²⁰ Isema-sema novia nadaa ledo ntoto nipokonora reme. Ira ledo ntoto madota manggaparai reme haitu ala pokainggura nadaa haitu ledo rakita. ²¹ Tapi isema-sema nangoseaka Alatala anu nakana, ia manggaparai reme haitu ala pokaing-guna malanto rakita nangoseaka dota nu Alatala."

I Yesus ante i Yohanes Topediu

²² Naupu haitu nalaimo i Yesus ante anaguruNa hau ri bagia Yudea. Hamai Ia nonturo bara sakuya kasaena ante ira bo nombadiu tona, tandana ira najadi topan-goseaka Ia.

²³⁻²⁴ Tempo haitu i Yohanes Topediu dopa nisuaraka riaru ntarunggu. Ia nombadiu tona ri ngata Ainon na-para ngata Salim, sabana ri sia nadea uve. Bo ledo naupu-upu tona nakava nekidiu nte ia.

²⁵ Ri sia ana-anaguru i Yohanes nosinjanai nte saito toYahudi. Ira nosinjanaika ada-ada pompakagasa karo anu nituntuni ntoYahudi. ²⁶ Pade ana-anaguruna haitu hau nte i Yohanes bo nanguli, "Guru, da nitoramiu tona nosanggani ante komiu ri sambote Binangga Yordan, anu nituduakamiu ka kami bara ipia? Hitupa Ia muni nombadiu tona, bo nadea mpuu tona hau nte Ia."

²⁷ Nesana i Yohanes, "Ledo makuya. Ledo ria saitoa manggava nuapa-nuapa ane ledo radekei nu Alatala ka ia. ²⁸ Niepemi mbotomo tesaku bara ipia. Niuliku yaku ledo Magau Topepakasalama anu nijanji nu Alatala. Yaku aga tona nisuro mokolu ka Magau haitu. ²⁹⁻³⁰ Ia kana mantambai rabila tapi yaku domo. Rapana ri posusa ponika, boti langgai nibila apa iamo mom-poberei boti mombine. Tapi ane vega nu boti langgai

‡ raanggataka pakalanga: Patuju tesa hitu, i Yesus kana raang-gataka ri kayu salib bo raore hau ri suruga naliu natuvu mpanjili lako ri kamateNa. Peinta Yohanes 12:32-33.

anu nombaurusi poboti, ia aga neangga ri sinjori boti langgai, bo nadamba mpuumo rarana nangepe suara nu boti langgai nadamba haitu. Yaku nasimbayu ante topourusi poboti haitu. Nadamba mpuumo raraku *apa nadea tona nangoseaka i Yesus.*

³¹ I Yesus anu nanau lako ri suruga naogepa pade pura-pura manusia. Manusia biasa lako ri dunia hitu, aga nombatesa anu najadi ri dunia hitu. Tapi Ia anu nanau lako ri suruga naogepa pade pura-pura manusia. ³² Ia notesaki anu nikitaNa bo niepeNa, tapi ledo nadea tona nomparasaya tesaNa haitu. ³³ Tapi isema-sema nomparasaya tesaNa haitu, raulina Alatala mpuu-mpuu nakana. ³⁴ Tona nisuro nu Alatala, Iamo nompapola tesa nu Alatala, sabana Alatala nombadekei Nosa Gasana ka Ia, ledo ria pantaaNa. ³⁵ Tuamata Alatala nompotove AnaNa, bo nidekeiNa Ia mombakuasai pura-pura. ³⁶ Isema-sema momparasaya AnaNa, manggava katuvua mabelo sampe ri kasae-saena. Tapi isema-sema ledo nekou nte AnaNa ledo manggava katuvua mabelo haitu. Ia aga rapambela rau rara nu Alatala sampe ri kasae-saena."

I Yesus ante saito mombine toSamaria

4 ToFarisi nangepe lelana nadeamo tona hau nekidiu nte i Yesus ala majadi topangoseaka Ia sampe nadeapa topangoseaka i Yesus pade i Yohanes Topediu. ² (Kakanana aga ana-anaguru i Yesus nombadiu tona, ledo i Yesus mboto.) ³ Jadi nisanipa i Yesus niepe ntoFarisimo lelana haitu, nalaimo Ia lako ri bagia Yudea bo nanjili hau ri bagia Galilea. ⁴ Riara poli-paNa haitu, naria paraluuNa noliu ri bagia Samaria.

⁵ Jadi nakavamo i Yesus ri ngata Sikhar ri bagia Samaria. Ngata haitu napara tana nidekei i Yakub ka anana i Yusuf nggaulu. ⁶ Hamai naria buvu niuli Buvu i Yakub. Jadi nenontomo i Yesus bo nonturo ri sinjori buvu haitu, sabana nalenge Ia nolipa. Tempo haitu nantongomo eo. ⁷⁻⁸ Ana-anaguru i Yesus napola hau riara ngata haitu mangali kande.

Tempo i Yesus nonturo ri buvu haitu, nakavamo saito mombine toSamaria manambu uve. Nanguli i Yesus ka ia, "Ina, dekei ka Yaku hanu uve Kuinu."

⁹ Nanguli mombine toSamaria haitu ka Ia, "Ha! Komiu tu toYahudi, yaku hii toSamaria. Berimba sampe Komiu merapi uve inu lako nte yaku?" Niulina ivesia sabana nabiasa toYahudi ledo nosimpokono ada ante toSamaria. †

¹⁰ Nesanamo i Yesus, "Ane musani anu nidekei nu Alatala bo ane musani isema Yaku anu nerapi uve inu lako nte iko, natantu muperapi muni lako nte Yaku bo Kudekei ka iko uve anu nombadekei katuvua mabelo."

† ToYahudi ledo nompokono ada ntoSamaria. Ane toSamaria mompake panginu bara suraya, panginu atau suraya haitu nireke ntoYahudi narutomo.

¹¹⁻¹² Naupu haitu nanguli vaimo mombine haitu, "Berimbamo? I Yakub totua kami nggaulu, nokae buvu hitu. Bo kami nikabolina. Ia mboto nanginu uve lako ri buvu hitu bo ivesia muni ana-anana bo binata-binata nipiariana. Naogepa Komiu pade i Yakub? Ledo ria posibuMiu raposibu uve, bo buvu nandala mpuu. Lako ri umba rapangalaMiu uve anu mombadekei katuvua mabelo nitesaMiu tutu?"

¹³ Nesana i Yesus, "Isema-sema manginu uve lako ri buvu hitu da mabaipa tambolona. ¹⁴ Tapi isema-sema manginu uve Kudekei ka ia, domo mabai tambolona sampe ri kasae-saena. Sabana uve Kudekei ka ia haitu majadi uve mpemata moili lako riara ntaina bo nombadekei katuvua mabelo ka ia sampe ri kasae-saena."

¹⁵ Nangepe haitu nanguli mombine, "Ane ivesia, Guru, dekei ka yakumo uve haitu ala domo mabai tamboloku bo domo malenge yaku tumai manambu uve ri sii."

¹⁶ Nanguli i Yesus ka ia, "Koi ala ntani bereimu tumai."

¹⁷ Nesana mombine haitu, "Yaku ledo noberei."

Nanguli i Yesus ka ia, "Nakana mpuu niulimu tutu iko ledo noberei. ¹⁸ Apa alimamo langgai nompoberei iko bo langgai anu naria nte iko sii-sii ledo bereimu. Jadi nakana tesamu."

¹⁹ Bo nesana mombine haitu, "Guru, natantumo Komiu nabi. ²⁰ Totua kami nggaulu nombasomba Alatala ri bavo nu bulu hitu. Tapi Komiu toYahudi nanguli aga ri ngata Yerusalem masipato tona mombasomba Alatala."

²¹ Nesana i Yesus ka ia, "Ina, pariarano tesaKu hitu. Kana makava tempona tona domo mombasomba Tuamata Alatala ri bulu hitu bo domo muni ri ngata Yerusalem. ²² Komiu toSamaria ledo nisanimiu mpuu Alatala. Tapi kami toYahudi nisani kami isema nisomba kami, apa Magau Topompakasalama manusia meumba lako nte kami toYahudi. ²³ Tapi makava tempona bara maipia, bo kakanana tempo haitu nariamo, tona anu mpuu-mpuu mombasomba Tuamata Alatala kana mombasomba Ia ante petulungi nu Nosa Gasana nangoseaka pepatuduki nakana. †† Pesomba ivehaitu nipokono nu Alatala. ²⁴ Alatala nosa. ‡ Jadi isema-sema madota mombasomba Ia kana mombasomba Ia ante petulungi nu Nosa Gasana nangoseaka pepatuduki nakana."

²⁵ Nesana vai mombine haitu, "Nisaniku kana makava Magau Topepakasalama anu niuli i Kristus. Ane Ia haitu makava, Ia kana motentei pakalanto mpengayangnya ka kita."

†† kana mombasomba Ia ante petulungi nu Nosa Gasana nangoseaka pepatuduki nakana. Basa Yunani: 'riara nosa bo kakanana'. kana mombasomba Ia riara ntaira ante mpuu-mpuu rarara.

‡ Alatala nosa. Batuana, ledo ria karoNa, ledo nonturo ri banua bara ri bavo nu bulu. Ane kita metupu nte Ia, ledo rapenara riumba petuputa.

²⁶ Nanguli i Yesus ka mombine haitu, "Yaku anu notesa ka iko hitu-hitu, Yakumo tona niulimu tutu."

²⁷ Da ranja mpotesa ira, nakavamo ana-anaguru i Yesus lako riara ngata. Natekaja ira nanggita i Yesus notesa nte mombine haitu. Tapi ledo ria saitoa nabia nompekutana mombine haitu, "Nuapa paraluumu?" Ledo muni nabia ira nompekutana i Yesus, "Nuapa sabana Komiu notesa nte mombine haitu?"

²⁸ Naupu sia, mombine haitu nomboli posibuna ri sia bo nanjili hau ri ngata. Nakava hamai niulina ka tona ri ngata haitu, ²⁹ "Kamaimo! Kita hau mompeinta langgai ria anu nombatesa ka yaku pura-pura anu nipoviaku. Bara suga Iamo Magau Topepakasalama anu nijanji nu Alatala." ³⁰ Nangepe tesa mombine haitu, nesuvumo ira lako ri ngata haitu hau mompeinta i Yesus.

³¹ Puri mombine rou rangata, nanguli ana-anaguru i Yesus ka Ia, "Kaimo Guru, mangandemo kita."

³² Tapi nesana i Yesus, "Nariamo kandeaku anu ledo nisanimiu."

³³ Nangepe haitu, nosipekutanamo anaguruNa, "Naria tona nanggeni kandeaku ka Ia?"

³⁴ Jadi nanguli i Yesus ka ira, "Mangoseaka dota nu Alatala anu nantudu Yaku, bo mompakaupu pokarajaa niparasayaNa ka Yaku, haitumo kandeaku. ³⁵ Biasa niuli ntona ivei: 'Da pata-mbulapa pade mokato.' Tapi Kuuli ka komiu, peintamo pae ri talua nakunimo, nasadiamo rakato. ³⁶ Topokato nompamulamo nantarima tambora apa nipasiromura asele anu manggeni katuvua nabelo sampe ri kasae-saena. Jadi topotuda bo topokato madamba-damba mpasanggani. *Asele nipasiromura, batuana manusia anu manggava katuvua mabelo sampe ri kasae-saena.*³⁷ Nakana mpuu tesa anu nanguli, 'Tosaitona notuda, tona ntanina nokato.' ³⁸ Komiu Kutudu hau mokato anu ledo nitudamiu. Tona ntanina notuda bo komiumo mangala asele mpanggaviara."

³⁹ Nadea toSamaria lako ri ngata haitu nomparasaya i Yesus sabana nieperamo tesa nu mombine pangane nanguli, "Ia notesa ka yaku pura-pura anu nipoviaku."

⁴⁰ Jadi hau ira mosinggava nte i Yesus bo niunakara Ia mesai ri ngatara bara sakuya kasaena. Jadi nesai mpuumo i Yesus hamai rombongi kasaena. ⁴¹ Bo nantambaimo kadea ntona nomparasaya i Yesus sabana niepera mbotomo tesaNa.

⁴² Naupu sia, niulikara mombine haitu, "Sii-sii niparasaya kami mpuumo, ledo aga lako ri tesamu tapi niepe kami mbotomo tesaNa. Bo nisani kamimo Ia mpuu-mpuu Magau Topompakasalama manusia."

I Yesus nompakabelo ana ntomaoge nadua

⁴³ Naliu karombongina, haumo i Yesus ri bagia Galilea. ⁴⁴ Evamo niuliNa mboto, "Saito nabi ledo nibila ntona ri ngatana mboto." ⁴⁵ Jadi tempo Ia nakava ri

bagia Galilea, Ia nitarima ntoGalilea ante damba rara. Apa ira muni nangoseaka Eo Mbaso Posusa Paskah ri ngata Yerusalem bara ipia bo nikitara mbotomo purapura anu nipovia i Yesus hamai.

⁴⁶ Bo hau vaimo Ia ri ngata Kana ri bagia Galilea, ngata nipompajadiNa uve najadi uve anggur bara ipia. Ri ngata Kapernaum naria saito tomaoge anu nokarajaa ri banua magau, anana langgai nadua ntamo.

⁴⁷ Sampangepe i Yesus nakavamo ri bagia Galilea lako ri bagia Yudea, hau ia mosinggava nte i Yesus bo nerapi tulungi mpuu-mpuu ala i Yesus hau ri ngata Kapernaum mompakabelo anana damo kamatena.

⁴⁸ Nangepe haitu, nanguli i Yesus ka ia, "Komiu todea, ane ledo rakitamiu tanda-tanda nipokumaaka bo kabaraka-kabaraka, ledo ntoto raparasayamiu."

⁴⁹ Nanguli tomaoge haitu ka i Yesus, "Pue, masalisa kita hau kamba da naria nosana."

⁵⁰ Nanguli Yesus ka ia, "Panjilimo! Nabelomo anamu!" Nangepe haitu, niparasaya ntomaogemo tesa i Yesus ka ia. Jadi nanjilimo ia. ⁵¹ Da ri dala ia, netomunakamo bara sako-ndua batuana nanguli, "Nabelomo anamiu!"

⁵² Jadi nekutanamo ia, "Ipia pamulana anaku nabelo?"

Nesana ira, "Riavi tanga eo nitasere tinti sangu nanaumo panena." ⁵³ Bo nitora ntomaogemo tinti sangu riavi i Yesus nanguli ka ia, "Nabelomo anamu!" Naliu haitu, ira sambanua nomparasaya i Yesus puramo.

⁵⁴ Haitumo tanda karanduana nipokumaaka nipovia i Yesus tempo Ia nakava ri bagia Galilea lako ri bagia Yudea.

I Yesus nompakabelo tona nadua ri Kola Betesda

5 Bara sakuya kasaena naliu haitu, nanjilimo i Yesus hau ri ngata Yerusalem mantuntuni eo mbaso ntoYahudi hamai. ² Ri ngata Yerusalem naria bobaa ngata nosanga "Bobaa Bimba". Napara bobaa haitu naria sangu kola niuli riara basa ntoYahudi Kola Betesda. Nantalili kola haitu naria lima-angu tambale nagaya anu nisouni. ³ Ri tambale-tambale haitu nadea mpuu tona nadua naturu. Naria tona naburo, naria tona nakejo, naria tona napunggu bo dua ntanina. Ira pura-pura nompopea uve mojompe. ⁴ Apa sangganinggan malaeka nu Alatala nanau ri uve kola haitu nompopojompe uvena. Bo isema-sema mokolu mesua riara uve tempo uve haitu nojompe, kaliu-liu nabelo lako ri duana. ⁵ Ri sia naria saito langgai nadua talupulu bo valu-mpaemo kasaena. ⁶ I Yesus nanggita todua haitu naturu ri sia. NisaniNapa sakuyamo kasaena duana haitu, nipekutanaNamo, "Madota iko mabelo?"

⁷ Nesana tona nadua haitu, "Guru, ledo naria tona manggeni yaku hau riara kola tempo uve kola haitu nojompe. Da nompasimbuku yaku hau mesua, nariamo tona ntanina nokolu nesua riara uve."

⁸ Bo nanguli i Yesus ka ia, "Peanggamo! Anggatakamo ompamu bo polipamo!" ⁹ Kaliu-liu nabelomo tona haitu. Nianggatakanamo ompana bo noli-pamo ia.

Tempo haitu nambela eo penonto. ¹⁰ Sabana haitu, nangulimo pakeni-pakeni ntoYahudi ka tona nipakabelo haitu, "Eo hitu eo penonto. Nantuntuni Atura agama, ledo mamala iko mosimbuaka ompamu!"

¹¹ Tapi nanguli tona haitu, "Tona nompakabelo yaku pangane nanguli ka yaku, 'Anggatakamo ompamu bo polipamo!'"

¹² Nekutanamo toYahudi haitu, "Isema nantudu iko manganggataka ompamu bo molipa?"

¹³ Tapi tona dako nipakabelo haitu, ledo nisanina isema nompakabelo ia, sabana i Yesus netinggalipomo ri tatanga ntodea haitu.

¹⁴ Naupu haitu i Yesus nosinggava nte tona haitu rirara Banua nu Alatala, bo niulikaNa ka ia, "Peinta vei! Nabelomo iko. Jadi tumo mupovia dosa ala iko ledo mambela anu nadaapa vai pade duamu tutu."

¹⁵ Naupu sia, haumo tona haitu nte pakeni ntoYahudi bo nanguli, i Yesusmo nompakabelo ia. ¹⁶ Jadi nompamula lako ri kabelo ntona haitu, nieloramoda dala mompandasa i Yesus, sabana nipakabeloNa tona nadua ri eo penonto.

¹⁷ Tapi nanguli i Yesus ka ira, "TuamaKu bate-batena nokarajaa sampe ri eo hitu, bo Yaku muni kana mokarajaa."

¹⁸ Nangepe tesa i Yesus haitu, pakeni ntoYahudi nompasimbuku mpuu mangelo dala mompatesi Ia. Apa Ia ledo aga nombaliunaka atura-atura eo penonto tapi niuliNa muni Alatala TuamaNa mboto. Ivesiamo Ia nompakasimbayu karoNa ante Alatala.

I Yesus notesa kuasaNa

¹⁹ Jadi nanguli i Yesus ka pakeni ntoYahudi haitu, "Pariaramo tesaKu hitu. Yaku ledo mamala movia nuapa-nuapa nangoseaka dotaKu mboto, tapi anu niki-taKu lako nte TuamaKu, haitumo nipoviaKu. Nuapanuapa nipovia nTuamaKu, haitu muni Kupovia. ²⁰ Sabana, TuamaKu nompotove Yaku, AnaNa, bo nipopakitaNa ka Yaku pura-pura anu nipoviaNa. Bo rapopakitaNa tanda-tanda nelabipa kabarakana pade anu nipoviaKu pangane ala rapokumaakamiau. ²¹ TuamaKu nompakatuvu mpanjili tona namate bo nombadekei katuvua nabaru ka ira. Ivesia muni Yaku, AnaNa, mombadekei katuvua nabaru ka isema-sema nipodotaKu. ²² TuamaKu mboto ledo mombatangara tona, sabana kuasa mombatangara manusia nidekeiNamo ka Yaku, AnaNa, ²³ ala pura-pura tona mombabila Yaku, AnaNa, nasimbayu mpo pebilara Ia. Isema-sema ledo nombabila Yaku, batuana ia ledo muni nombabila TuamaKu anu nantudu Yaku.

²⁴ Pariaramo tesaKu, isema-sema nangepe tesaKu bo nomparasaya Alatala anu nantudu Yaku, ia manggava katuvua nabelo sampe ri kasae-saena. Ia ledo mambela pehuku bo ledo rapopogaa lako nte Alatala tapi nariamo katuvua nabaru nte ia. ²⁵ Pariaramo tesaKu hitu. Kana makava tempona bara maipia, bo sii-sii nakavamo tempona haitu, tona namatemo mangepe suaraKu, Ana nu Alatala, bo ira anu mangepena bo mangoseakana, manggava katuvua mabaruu. ²⁶ Apa TuamaKu Alatala nakuasa nombadekei katuvua nabaru, bo ivesia muni Yaku, AnaNa nidekeiNa kuasa ka Yaku mombadekei katuvu nabaru. ²⁷ Bo nidekeiNa muni kuasa ka Yaku mombatangara manusia sabana Yakumo tona niuli Ana nu Manusia.

²⁸ Nee mokumaa mangepe tesaKu hitu, sabana kana makava tempona pura-pura tomate mangepe suaraKu ²⁹ bo mesuvu lako ponturora. Tona nabelo pokainggura matuvu mpanjili bo manggava katuvua mabelo sampe ri kasae-saena. Bo tona nadaa pokainggura matuvu mpanjili ala rahuku."

Pata-ngaya anu nompakalanto isema i Yesus

³⁰ Bo nanguli munimo i Yesus ka pakeni-pakeni ntoYahudi, "Yaku ledo namala novia nuapa-nuapa nangoseaka dotaKu mboto. Yaku mombatangara nangoseaka anu niepeKu lako nte TuamaKu. PotangaraKu nanao apa Yaku ledo nangoseaka dotaKu mboto tapi aga dota nTuamaKu anu nombatudu Yaku.

³¹ Ane aga Yaku saitoKu motesaki karoKu mboto *bo ledo ria sabi ntanina*, dopa rasanimiu ane tesaKu namala raparasayamiau atau ledo. ³² Tapi naria saito tona ntanina anu nompakalanto isema Yaku. *TuamaKu sabiKu* bo nisaniKu tesaNa haitu nakana. ³³ Komiu nombasuro tona hau nte i Yohanes Topediu bo anu niulina nakana mami. ³⁴ Kakanana ledo paraluu manusia nompakalanto isema Yaku. Tapi Kupopatora ka komiu tesa i Yohanes ala komiu mamala rapakasalama. ³⁵ I Yohanes Topediu haitu nasimbayu mpo poindo nevangga bo nanggeni reme ka komiu. Bo komiu nadamba mpuu nangepe tesana. Tapi kadamba nu raramiu haitu aga sampalai.

³⁶ Tapi naria sangayapa anu nompakalanto isema Yaku, bo anu haitu nopokopa pade sabi i Yohanes Topediu, haitumo pokarajaaKu. PokarajaaKu niparasaya nTuamaKu ka Yaku ala Kupakaupu. Pokarajaa haitumo nompakalanto Yaku hii nitudu nTuamaKu. ³⁷ Bo TuamaKu anu nantudu Yaku, Ia muni nompakalanto isema Yaku. Dopa sangganu niepemiu suaraNa bo dopa muni sangganu nikitamiau lenjeNa. ³⁸ Tesa-tesaNa ledo nipariaramiau, apa ledo niparasayamiau Yaku nituduNa. ³⁹ Komiu natutu neguru isi Buku Gasa sabana niulimiu rira buku haitu rakavamiau katuvua mabelo sampe ri kasae-saena.

Tano isi Buku Gasa haitumo anu nompakalanto isema Yaku. ⁴⁰ Tapi naupa komiu natutu neguru Buku Gasa, komiu bate-batena ledo nadota momparasaya Yaku ala rakavamiu katuvua mabelo haitu.

⁴¹ Yaku ledo mbeki ratoiya nu manusia. ⁴² Tapi nisaniku komiu ledo ntoto nompotove Alatala. ⁴³ Yaku nakava nte komiu ante kuasa nTuamaKu tapi komiu ledo nadota nantarima Yaku. Ane tona ntanina nakava nte komiu ante kuasana mboto, tona haitumo nitari-mamiu. ⁴⁴ Berimbamo komiu mamala momparasaya Yaku? Apa komiu aga madota rabila nu roa. Ledo nipasimbukumi manggava pebila nu Alatala Saito-itoNa! ⁴⁵ Tapi naupa ivesia, nee rasarumakamiu Yaku mompakasala komiu ri ngayo nTuamaKu bara maipia. Naria tona mompakasala komiu, haitumo Nabi Musa anu nisarumakamiu. ⁴⁶ Apa ane komiu mpuu-mpuu nompapasaya tesa Nabi Musa, natantumo raparasayamiu muni Yaku, sabana karoKu hitumo anu nitesa Nabi Musa riaru buku-bukuna. ⁴⁷ Tapi ane ledo niparasayamiu anu nitulisi Nabi Musa, berimbamo komiu mamala momparasaya tesaKu?"

I Yesus nombadekei kandeana ka lima-njobu tona

Matius 14:13-21; Markus 6:30-44; Lukas 9:10-17

6 Naliu haitu, i Yesus hau nevote Rano Galilea, anu niuli muni Rano Tiberias. ² Nadea mpuu tona nantuntuni Ia sabana nikitaramo tanda-tanda nipokumaa-ka nipoviaNa nompakabelo tona nadua. ³ Nakava ri sambote rano, i Yesus ante ana-anaguruNa nantende ri buntina bo nonturomo. ⁴ Tempo haitu naparamo Eo Mbaso Paskah ntoYahudi.

⁵ Tempo i Yesus nompeili ntiku, nikitaNa tona dea nakava nte Ia. Bo niulikaNa i Filipus, "Ri umba rakalauta mangali kandeana radekei ka tona dea hitu?" ⁶ Nisani i Yesus mamimo anu rapoviaNa ngena tapi niuliNa ivesia ala mombauji i Filipus.

⁷ Nesanamo i Filipus, "Nau roatu kadeana doi salaka† raalika roti, ledo magana rapakande ka tona dea hitu. Nau aga mbo sakide rabagi ka ira, ledo magana."

⁸ Pade saito anaguruNa ntanina anu nosanga i Andreas, sampesuvu i Simon Petrus, nanguli ⁹ "Siimo ngana langgai anu nobaku lima-angu roti jelai †† bo rombaa bau. Tapi nuapa batuana haitu ka tona ivehitu kadeana?"

¹⁰ Nanguli i Yesus, "Tudumo todea monturo." Ri ponturo haitu nakavoko. Jadi tona dea gahaitu nonturo puramo ri bavo nggavoko. Kadea nu langgai hamai nitasere lima-njobu. ¹¹ Naupu haitu, i Yesus nangala roti bo nanguli tarima kasi ka Alatala. Bo nitubi-tubiNa roti

† doi salaka: sampeka doi salaka nasimbayu ante gaji ntona saeo. †† roti jelai: Roti nipovia lako ri jelai. Jelai iamo sangaya tudatuda eva pae, nolenje eva dale tie sakide. Tempo nggaulu ri bagia Palestina bo Mesir, jelai namurapa pade gando sampe nipakande ka binata, bo nipovia roti nikande ntona napepa.

haitu ka todea anu nonturo ri sia. Ivesia muni nipoviaNa ante bau. Bo tona dea haitu nangande sampe nabosu. ¹² Nabosupa ira, nangulimo i Yesus ka ana-anaguruNa, "Pasiromu puramo labi-labi nu roti bo bau haitu. Nee sampe maria anu ratedaka." ¹³ Jadi lako ri lima-angu roti jelai nikande ntodea haitu, nipasiromura labina, da naganapa sapulu rotonda.

¹⁴ Nipeinta ntodeapa anu nipovia i Yesus, notesamo ira, "Mpuu-mpuu Ia mai nabi nisarumakata makava ri dunia!" ¹⁵ Nisani i Yesus ira nopatuju makava mompasuu Ia majadi magaura. Jadi nalaimo Ia saitoNa hau ri bulu.

I Yesus nolipa ri bavo nu uve

Matius 14:22-33; Markus 6:45-52

¹⁶ Nggoviana haitu, notuamo ana-anaguru i Yesus hau ri rano. ¹⁷ Bo nesavi sakayamo ira hau mevote ri ngata Kapernaum. Nabongimo tapi i Yesus dopa nakava nte ira. ¹⁸ Tempo haitu nakavamo poiri narimboso sampe nambasomo balumba rano. ¹⁹ Ira novose sakaya nitasere bara alima atau aono kilo lako ri talinti, pade nikitara i Yesus nolipa ri bavo nu uve rano tumai nantotoaka sakayara. Nanggita haitu, navioramo rarara. ²⁰ Tapi nanguli i Yesus ka ira, "Nee maeka! Yaku hii!" ²¹ Nangepe haitu, nadambamo rarara nompopompene i Yesus riaru sakayara. Bo sampesanika nakavamo sakayara ri talinti anu nikalaura.

Todea nangelo i Yesus

²² Naeo mpadondo, todea anu naboli ri sambote rano haitu nangelo i Yesus. Nitorara aga sangu sakaya hamai riavi. Bo nitorara i Yesus ledo nesavi sakaya nosanggani-nggani ante ana-anaguruNa, aga ira bayangi nesavi sakaya hau ri sambotena. ²³ Naupu sia, nakavamo bara sakuya sakaya ntanina lako ri ngata Tiberias nesampo napara ponturo ntodea nangande roti naupu i Yesus nanguli tarima kasi nte Alatala.

²⁴ Nisani ntodeapa i Yesus domo naria hamai bo domo muni naria ana-anaguruNa, nesavi sakaya munimo ira hau mangelo i Yesus ri ngata Kapernaum.

I Yesus nirapaka roti anu nombadekei katuvua mabelo

²⁵ Tempo tona dea nosintomu nte i Yesus ri sambote rano, nipekutanaramo, "Guru, ipia komiu nakava ri sii?"

²⁶ Nesanamo i Yesus, "Pariaramo tesaKu! Komiu nangelo Yaku sabana komiu nangande roti sampe nabosu. Ledo nisanimiu patuju ntanda nabaraka nipoviaKu haitu. ²⁷ Nee aga mokarajaa ala manggava kandeana anu masalisa maupu atau mavai. Agina komiu mokarajaa ala manggava kandeana anu ledo mavai bo anu mombadekei katuvua mabelo sampe ri kasae-saena. Yaku, Ana nu Manusia mombadekei kandeana haitu ka komiu,

sabana Yakumo nianggataka nTuamaKu Alatala mantui pokarajaa haitu."

²⁸ Pade nekutanamo ira, "Nuapa masipato rapovia kami ala pokainggu kami rapokonoa nu Alatala?"

²⁹ Nesana i Yesus, "Iveimo anu nipokonoa nu Alatala: Parasayamo Yaku anu nituduNa."

³⁰ Bo nanguli vaimo ira, "Ane ivesia, tanda nuapa rapoviaMiu ala rakita kami bo raparasaya kami Komiu? Povia nuapa rapoviaMiu? ³¹ Apa totua kami nggaulu nangande roti anu niuli 'manna' ri karava bai. Haitu nitulisi riaru Buku Gasa ivei: 'NidekeiNa ka ira kandeana lako ri suruga rakandera.' [†]"

³² Nanguli i Yesus ka ira, "Pariaramo tesaKu, ledo i Musa bara ipia anu nombadekei kandeana lako ri suruga ka komiu. Tapi TuamaKu anu nombadekei kandeana mpuu lako ri suruga ka komiu. ³³ Apa kandeana nopuna lako ri Alatala, haitumo Ia anu nanau lako ri suruga bo nombadekei katuvua ka manusia."

³⁴ Nanguli vaimo todea haitu, "Ane ivesia, Guru, dekei ka kamimo kandeana haitu eo-eo."

³⁵ Nanguli i Yesus ka ira, "Yakumo hii kandeana anu nombadekei katuvua haitu. Isema-sema makava nte Yaku, domo maara, bo isema-sema momparasaya Yaku, domo mabai tambolona sampe ri kasae-saena. ³⁶ Tapi evamo niuliku ka komiu pangane, naupa nikitamiumo Yaku, ledo niparasayamiu. ³⁷ Pura-pura tona nidekei nTuamaKu ka Yaku kana momparasaya Yaku, bo isema-sema momparasaya Yaku ledo ntoto Kupoara. ³⁸ Apa Yaku nanau lako ri suruga, ledo movia dotaKu mboto, tapi movia anu nipodota nu Alatala anu nantudu Yaku. ³⁹ Bo iveimo dota nu Alatala anu nantudu Yaku, ala ledo malipo nau saitoa lako ri pura-pura tona nidekeiNa ka Yaku. Ira pura-pura kana Kupakatuvu mpanjili ri kaupun nu dunia. ⁴⁰ Iveimo dota nTuamaKu, ala pura-pura tona anu mombasani bo momparasaya Yaku, AnaNa, manggava katuvua mabelo sampe ri kasae-saena. Bo Kupakatuvu mpanjili ira ri kaupun nu dunia."

⁴¹ Nangepe tesa haitu nongutu-ngutumun toYahudi ri sia, sabana i Yesus nanguli, "Yakumo hii kandeana anu nanau lako ri suruga." ⁴² Nosimpotesamo ira, "Bai! Ledo Ia hitu i Yesus ana i Yusuf? Nisanita pura tona tuaNa. Berimba sampe niuliNa Ia nanau lako ri suruga?"

⁴³ Nangepe haitu, nangulimo i Yesus ka ira, "Nee mongutu. ⁴⁴ Ledo ria saitoa mamala momparasaya Yaku ane ledo rakeniaka nTuamaKu anu nantudu Yaku. Bo isema-sema momparasaya Yaku, kana Kupakatuvu mpanjili ri kaupun nu dunia. ⁴⁵ Riaru buku nabi-nabi nitulisi ivei:

'Pura-pura tona rapatuduki nu Alatala.'

Yesaya 54:13

Jadi isema-sema mompariara pepatuduki nTuamaKu bo meguru lako nte Ia, tantu raparasayana Yaku.

⁴⁶ Nee rasarumakamiu nariamo tona anu nanggita TuamaKu. Yaku anu nakava lako nte Alatala, aga Yaku saitoKu nanggita Ia. ⁴⁷ Pariaramo tesaKu hitu, isema-sema momparasaya Yaku, matuvu mabelo sampe ri kasae-saena. ⁴⁸ Yakumo hii kandeana anu nombadekei katuvua nabelo.

⁴⁹ Totuamiu nggaulu nangande kandeana anu niuli 'manna' ri karava bai, bo ira pura-pura namate. ⁵⁰ Tapi ledo ivesia ante kandeana anu nanau lako ri suruga. Isema-sema mangande kandeana haitu ledo mamate.

⁵¹ Yakumo hii kandeana anu nanau lako ri suruga, anu nombadekei katuvua nabelo haitu. Isema-sema mangande kandeana hitu, matuvu mabelo sampe ri kasae-saena. Kandeana anu nombadekei katuvua nabelo, batuanan isi karoKu anu Kudekei ala manusia mamala matuvu mabelo *sampe ri kasae-saena.*"

⁵² Nangepe tesa i Yesus haitu, nosinjanai mbotomun toYahudi. Nosipekutanamo ira, "Berimba tona haitu mamala nombadekei isi karoNa rakandeta?"

⁵³ Bo nanguli i Yesus ka ira, "Pariaramo tesaKu hitu, ane komiu ledo mangande isi karoKu, Ana nu Manusia, bo ledo manginu raaKu, komiu ledo ntoto matuvu mabelo. ⁵⁴ Tapi isema-sema mangande isi karoKu bo manginu raaKu, iamo matuvu mabelo sampe ri kasae-saena, bo Kupakatuvu mpanjili ia ri kaupun nu dunia. ⁵⁵ Apa, isi karoKu haitumo kandeana mpuu bo raaKu haitumo panginun mpuu. ⁵⁶ Isema-sema mangande isi karoKu bo manginu raaKu, iamo maroo mosangun rara ante Yaku bo Yaku maroo mosangun rara ante ia.

⁵⁷ TuamaKu anu nantudu Yaku, Iamo puna katuvua nabelo, bo katuvuKu nopuna lako nte Ia. Ivesia muni tona anu mangande isi karoKu, katuvuna mopuna lako nte Yaku. ⁵⁸ Yakumo hii kandeana anu nanau lako ri suruga. Kandeana hitu ledo eva 'manna' nikande ntotumamiu nggaulu. Naupa ira nangande 'manna' haitu, namatemo ira. Tapi isema-sema mangande kandeana hitu matuvu mabelo sampe ri kasae-saena."

⁵⁹ Pura-pura tesa haitu nitesa i Yesus tempo nipatudukiNa tona riaru banua petupu ri ngata Kaper-naum.

Nadea topangoseaka i Yesus noura rarara

⁶⁰ Naupu nangepe tesa i Yesus haitu, nadeamo topangoseaka Ia nanguli, "Hu! Nakaja gaga pepatuduki hitu! Isema mompakule mangoseaka tesa eva haitu?"

⁶¹ Nisani i Yesusmo topangoseaka Ia nongutu-ngutu ivesia, jadi niulikaNa ira, "Noura raramiu mangepe pepatudukiKu pangane? ⁶² Natantu nau rakitamiu Yaku, Ana nu Manusia meore mpanjili hau ri pontur-oKu pamulana, dopa muni raparasayamiu. ⁶³ Kuasa nu

† Mazmur 78:24

manusia ledo mompakule nombadekei katuvua nabelo, aga Nosa Gasa nu Alatala. Tesa-tesa niuliKu ka komiu, nakava lako ri Nosa Gasa bo tesa-tesa haitumo nombadekei katuvua nabelo. ⁶⁴ Tapi da naria sanu komiu ledo nomparasaya." I Yesus nanguli ivesia sabana nisaniNa mamimo lako ri pamulana isema ledo momparasaya bo isema mompobalu Ia bara maipia. ⁶⁵ Pade niuliNa muni, "Haitu sampe niuliKu ka komiu pangane, ledo ria saitoa mamala momparasaya Yaku ane ledo rapaloga nTuamaKu."

⁶⁶ Nompamula lako ri eo haitu, nadea topangoseaka i Yesus nompalaisi Ia bo domo nadota nangoseaka Ia. ⁶⁷ Jadi i Yesus nompekutana anaguruNa sapulu randua haitu, "Berimbamo? Rapalaisimiu muni Yaku?"

⁶⁸ Nesana i Simon Petrus, "Pue, nte isema rakalau kami? Aga komiu nombatesa tesa anu nombadekei katuvua mabelo sampe ri kasae-saena. ⁶⁹ Kami nomparasayamo bo nisani kami, Komiumo ToGasa anu nakava lako nte Alatala."

⁷⁰ Nesana i Yesus, "Yaku mbotomo nompelisi komiu sapulu randua tutu. Tapi naupa ivesia, naria saito komiu nipopale nu Magau Seta!" ⁷¹ Tona nipatuju i Yesus iamo i Yudas ana i Simon Iskariot. Apa naupa i Yudas haitu saito lako nte ira sapulu randua, ia haitumo anu mompobalu i Yesus ngena.

Sampesuvu-sampesuvu i Yesus ledo nomparasaya Ia

7 Naupu haitu, i Yesus hau nompesayo ngata-ngata ri bagia Galilea. Domo nadota Ia hau ri bagia Yudea sabana pakeni-pakeni ntoYahudi hamai da nangelo dala mompatesi Ia. ² Tempo haitu naparamo eo mbaso ntoYahudi anu niuli Posusa Sou Tava. ³ Tuei-tuei † i Yesus nanguli ka Ia, "Aginamo Iko hau ri bagia Yudea ala pura-pura topangoseaka Iko hamai rakitara muni kabaraka-kabaraka Mupovia. ⁴ Apa isema-sema madota rasani ntodea, ledo ratabuniakana poviana. Jadi popakitamo tanda nipokumaaka nipoviaMu ka todea." ⁵ Niulira ivesia sabana nau i Yesus sampesuvura mboto, ledo muni niparasayara Ia.

⁶ Nesanamo i Yesus, "Dopa tempona Kupopakita karoKu. Ane komiu, ledo nometempo ane maria loga hau, ⁷ apa ledo ria tona navuu matana nte komiu. Tapi Yaku nipovuu mata ntona nadaa ri dunia hitu sabana Yaku nantuenaka pokainggura nadaa. ⁸ Koimo komiu ri posusa haitu. Yaku dopa hau, sabana dopa nakava tempoku." ⁹ Ivesiamo i Yesus notesa ka sampesuvu-sampesuvuNa. Bo naupu haitu, Ia da naboli ri bagia Galilea.

† Tuei-tuei Batuana ri sii, sampesuvu koyopuse. I Yesus tuaka ntoto.

I Yesus hau ri Posusa Sou Tava

¹⁰ Nalaipa sampesuvu i Yesus hau ri Yerusalem, hau munimo Ia saitoNa. Ia hau ri posusa haitu nggalinolino ala ledo rasani ntodea. ¹¹ Ri posusa haitu, pakeni-pakeni ntoYahudi nangelo Ia. Ira nekutana-tana, "Ri umba tano Ia?"

¹² Ri tatanga ntodea nadeamo tona nosikalivaya nanguli i Yesus. Naria sanu nanguli, "Ia tona nabelo." Tapi naria muni sanu nanguli, "Ledo! Ia nombabagi todea!" ¹³ Tapi ledo ria saitoa tona nabia nanguli ri ngayo ntodea, sabana naeka ira ka pakeni-pakeni ntoYahudi.

¹⁴ Nagantanga posusa haitu pade nesua i Yesus hau ri doyata Banua nu Alatala bo nompamulamo nompatuduki tona. ¹⁵ Pakeni ntoYahudi nokumaa mpuu nangepe pepatuduki i Yesus, bo nanguli, "Hee! Nakuya sampe nadea mpuu nisaniNa, tano mai Ia ledo nosikola?"

¹⁶ Nesana i Yesus ka ira, "PepatudukiKu ledo lako ri pangisaniKu mboto, tapi lako nte Alatala anu nantudu Yaku. ¹⁷ Isema-sema madota mangoseaka dota nu Alatala, natantumo rasanina pepatudukiKu hitu lako nte Alatala, bo ledo lako nte Yaku mboto. ¹⁸ Isema-sema nompatuduki lako ri pangisanina mboto, ia mbeki ratoiya ntona. Tapi isema-sema *ledo nompekirika karon mboto tapi* nompasimbuku ala topantudu ia haitu ratoiya, iamo nanao, ledo ria tenggona. ¹⁹ Nabi Musa nombadekei ka komiu Atura-atura agama nggaulu, tapi ledo ria saitoa komiu natutu nangoseaka Atura-atura haitu. Ane ledo nakana tesaKu hitu, nakuya komiu nompasimbuku mompatesi Yaku?"

²⁰ Nesanamo tona dea haitu, "Iko nipesua nu seta! Isema nompasimbuku mompatesi Iko?"

²¹ Nesana i Yesus, "Aga sangaya kabaraka nipoviaKu bara ipia †† bo komiu nahera sabana nipoviaKu ri eo penonto. ²² Komiu biasa nombasuna ana langgaimiu ri eo penonto nangoseaka atura nidekei Nabi Musa, ‡ nau kakanana ada haitu ledo nopuna lako nte i Musa tapi lako nte totuamiu nggaulu. ²³ Komiu novia ada posuna ri eo penonto ala ledo raliunakamiu Atura-atura anu nidekei i Musa. Jadi nakuya komiu narau ka Yaku nompakabelo saito tona nadua njumanggaro ri eo penonto? ²⁴ Nee mompakasala tona nangoseaka anu nikitamatamiu, tapi nangoseaka kanoana!"

†† Kabaraka haitumo nompakabelo tona napunggu ri Kola Betesda. Peinta Yohanes 5:1-18. Nantuntuni atura-atura agama Yahudi, nitagi nokarajaa ri eo-eo penonto. Panguli pakeni ntoYahudi, kabaraka muni ledo mamala rapovia ri eo penonto. ‡ atura nidekei Nabi Musa: Atura-atura agama Yahudi nanguli ngana langgai kana rasuna ane umuruna nagana valu-eo. Naupa eo haitu nambela eo penonto kana nipoviara ala nee mombaliunaka ada posuna haitu.

Nakana i Yesus Magau Topepakasalama anu nijanji nu Alatala?

²⁵ Naupu haitu naria bara sako-ndua toYerusalem nanguli, "Ledo Ia hitumo tona nielo nu pakeni-pakeni ala rapatesira? ²⁶ Tapi peintamo! Ia notesa ri ngayo ntodea bo ledo ria saitoa tona nombabali tesaNa. Nee-nee bara nisani nu pakenita Iamo Magau Topepakasalama anu nijanji nu Alatala! ²⁷ Tapi ledo bara. Apa ane Magau Topepakasalama makava, ledo rasanita lako ri umba kakavana. Tapi tona hitu, nisani-ta lako ri umba kakavaNa."

²⁸ Jadi tempo i Yesus da nompatuduki ri doyata Banua nu Alatala, nitesaNa ante suaraNa namangga, "Nisanimiu tano isema Yaku bo lako ri umba kakavaKu? Yaku ledo nakava nangoseaka dotaKu mboto, tapi Yaku nakava nangoseaka dota nu Alatala anu nombatudu Yaku. Iamo masipato raparasaya. Ledo ntoto nisanimiu Ia, ²⁹ tapi Yaku nosisani ante Ia, sabana Yaku nakava lako nte Ia bo Iamo nantudu Yaku tumai."

³⁰ Nangepe haitu, nipasimbukura mombasaka Ia. Tapi ledo ria saitoa nompakule mombasakaNa sabana dopa nakava tempona nipakatantu nu Alatala. ³¹ Tapi nadea lako ri todea haitu nomparasaya Ia. Niulira, "Magau Topepakasalama mpuumo Ia, apa nadea mpuu kabaraka nipoviaNa!"

Topojaga Banua nu Alatala nompasimbuku mombasaka i Yesus

³² ToFarisi nangepe todea nanggalivaya notesa i Yesus. Haitumo sabana ira bo balengga-balengga ntopanggeni pesomba ntoYahudi nantudu bara sako-ndua topojaga Banua nu Alatala hau mombasaka i Yesus.

³³ Tempo haitu, i Yesus nanguli ka todea, "Sam-palaipa Yaku mosanggani-nggani ante komiu pade hau manjili nte Ia anu nantudu Yaku. ³⁴ Komiu mangelo Yaku, tapi ledo rakavamiu Yaku. Bo ledo mamala komiu hau ri ponturo Kukalau."

³⁵ Nangepe tesa i Yesus haitu, naingumo pakeni ntoYahudi. Nosimpekutanamo ira, "Hau ri umba tano Ia sampe ledo rakavata Ia? Bara hau nte toYahudi anu nonturo ri ngata-ngata ntona ledo toYahudi bo mompatuduki tona ledo toYahudi? ³⁶ Nuapa muni batuana tesaNa nanguli kita mangelo Ia tapi ledo rakavata Ia, bo ledo mamala kita hau ri ponturo rakalauNa?"

Uve anu nombadekei katuvua nabelo

³⁷ Ri eo kaupuna, eo matana posusa haitu, i Yesus neangga ri doyata Banua nu Alatala bo notesa ante suara namangga, "Isema-sema nabai tambolona, kaimaimo nte Yaku bo manginu. ³⁸ Isema-sema nompara-

saya Yaku kana maria uve moili lako riarantaina anu nombadekei katuvua nabelo, nangoseaka anu nitulisi riarabuku Gasa." ³⁹ Uve nipatuju i Yesus, haitumo Nosa Gasa nu Alatala anu radekei ka tona nomparasaya Ia. Tempo haitu, Nosa Gasa dopa nidekei ka topomparasaya sabana i Yesus dopa neore hau ri suruga bo nipakaoge nu Alatala.

⁴⁰ Nadea tona nangepe tesa i Yesus haitu bo naria sanu ira nanguli, "Natantumo Ia nabi anu nijanji nu Alatala nggaulu!" †

⁴¹ Bo naria muni sanu ira nanguli, "Ia hitumo Magau Topepakasalama anu nijanji nu Alatala!"

Tapi naria muni sanu tona nanguli, "Ledo! Magau Topepakasalama ledo makava lako ri bagia Galilea!

⁴² Apa riarabuku Gasa nitulisi Magau Topepakasalama meumba lako ri muli Magau Daud, bo makava lako ri ngata Betlehem ngata nipompoanaka Magau Daud."

†⁴³ Jadipa todea haitu nosinjanai, sanu nomparasaya i Yesus, sanu ledo. ⁴⁴ Naria bara sako-ndua ira madota mombasaka Ia, tapi ledo ria saitoa nabia nanggangisiNa.

Pakeni-pakeni ntoYahudi ledo nadota momparasaya

⁴⁵ Naupu sia, topojaga Banua nu Alatala anu nitudu mombasaka i Yesus pangane, nanjili hau nte toFarisi bo balengga-balengga ntopanggeni pesomba. Nakava hamai, toFarisi bo balengga-balengga haitu nanguli ka ira, "Nakuya ledo nikenimiu tona haitu tumai?"

⁴⁶ Nesanamo topojaga Banua nu Alatala haitu, "Dopa naria niepe kami tona notesa mpo Ia."

⁴⁷ Nesanamo toFarisi, "Nibagiuna munimo komiu?"

⁴⁸ Peintamo! Ledo ntoto ria pakeni agama atau toFarisi nomparasaya Ia! ⁴⁹ Aga todea biasa gahaitu nomparasaya, apa ledo nisanira Atura-atura agama. Nasurukavumo ira!"

⁵⁰ Saito toFarisi hamai nosanga i Nikodemus. Sangganimo ia hau nte i Yesus. Nanguli ia ka roa-roana, ⁵¹ "Nangoseaka Atura-atura agamata, ledo mamala rapakasalata tona ane dopa niepeta parakarana bo dopa niparesata pokaingguna."

⁵² Nesana roa-roana toFarisi, "Nakuya nisalikulamiu Ia? Komiu muni toGalilea? Paresamo Buku Gasa pakabelo-belo! Rakitamiu ledo ria saitoa nabi meumba lako ri bagia Galilea!"

⁵³ Naupu haitu, nanjilimo ira pura-pura hau ri banuara mboto.

Mombine nikava nobualo

8 Tapi i Yesus hau ri Bulu Zaitun. ² Kamaile bobayana, hau vaimo Ia nesua ri doyata Banua nu

† nabi anu nijanji nu Alatala nggaulu: Peinta Ulangan 18:15. †† I Yesus nipakambaso ri ngata Nazaret ri bagia Galilea, tapi bara ledo nisanira Ia mpuu-mpuu nipoanaka ri ngata Betlehem ri bagia Yudea.

Alatala, bo nakavamo todea nasiromu nte Ia. Nonturo-mo Ia bo nompatuduki ira.

³ Tempo haitu, nakavamo guru-guru agama bo to-Farisi nanggeni saito mombine nikavara nobualo. Mombine haitu nipopeanggara ri ngayo ntodea. ⁴ Bo niulikara i Yesus, "Guru, mombine hitu nikava kami nobualo. ⁵ Riaru Atura-atura agama, naria parenta i Musa nanguli, ane mombine nokainggu ivesia kana rarempe ante vatu sampe mamate. Jadi berimba panggavaMiu pokainggu nu mombine hitu?" ⁶ Patuju nu pompekutanara haitu mombatoliani tesa i Yesus ala mamala rapakasalara Ia.

Tapi i Yesus ledo notingo. Ia aga notungga notulisi tana ante koya-mpaleNa. ⁷ Tapi ledo nenonto ira nompekutana-tana. Jadi kaupuna niumberaka i Yesusmo balenggaNa bo nanguli, "Isema-sema komiu ledo nadosa, iamo mokolu mombarempempe mombine hitu ante vatu." ⁸ Naupu i Yesus notesa ivesia, notungga vaimo Ia notulisi tana ante koya-mpaleNa.

⁹ Nangepe tesa i Yesus haitu, nalai saito-saitomo ira lako ri sia, nompamula lako ri totua sampe tona namuda. Kaupuna nalai puramo, naboli damo i Yesus ante mombine pangane batena neangga ri belana. ¹⁰ Niumberaka i Yesus balenggaNa bo niulikana mombine haitu, "Ri umba puramo tona pangane? Domo ria topombahuku iko?"

¹¹ Nesana mombine haitu, "Domo ria, Pue."

Nanguli i Yesus, "Yaku muni ledo mombahuku iko. Panjilimo bo tumo rapovia dosa."

I Yesus reme nu dunia

¹² Naupu haitu nanguli vaimo i Yesus ka todea, "Yakumo hii reme dunia. Isema-sema mangoseaka Yaku ledo matuvu ri kalandana, tapi manggava reme anu mombadekei katuvua mabelo."

¹³ Nesana toFarisi, "Aga tesaMu mboto tu! Jadi ledo nakana."

¹⁴ Nesana i Yesus, "Nau karoKu mboto nitesaKu, nakana tesaKu sabana nisaniKu lako ri umba kakavaKu bo hau ri umba Kukalau. Tapi ledo nisanimiu lako ri umba kakavaKu bo hau ri umba Kukalau.

¹⁵ Komiu nompakasala tona nangoseaka pompekirimiu mboto. Yaku ledo nompakasala tona. ¹⁶ Tapi ane rapana Kupakasala tona, natantumopo botusiKu manoa, sabana ledo aga pobotusiKu saitoKu tapi pobotusi nTuamaKu anu nantudu Yaku.

¹⁷ Riaru Atura-atura agama naria nitulisi ivei: 'Ane maria randua sabi masimbay tesara riaru potangara, tesara namala raparasaya.' ¹⁸ Naria randua anu nombasabiki Yaku. Yaku mboto saito, bo karanduana TuamaKu anu nantudu Yaku."

¹⁹ Bo nekutana vaimo ira, "Ri umba TuamaMu?"

† Ulangan 17:6; 19:15

Nesana i Yesus, "Ledo nisanimiu mpuu Yaku. Bo ledo muni nisanimiu mpuu TuamaKu. Ane rapana nisanimiu mpuu Yaku, natantu rasanimiu mpuu TuamaKu."

²⁰ Tesa i Yesus haitu nitesaNa ri doyata Banua nu Alatala tempo Ia nompatuduki tona napara peti pomboli doi pesomba. Ledo ria saitoa tona namala mombasaka Ia sabana dopa nakava tempoNa.

ToYahudi nainggu sabana i Yesus nanguli, "Komiu ledo mamala hau ri ponturo Kukalau."

²¹ Bo nanguli vaimo i Yesus ka todea, "Yaku malai lako ri sii bo raelomiu Yaku, tapi komiu aga rapopogaa lako nte Alatala sabana dosamiu. Komiu ledo mamala hau ri ponturo Kukalau."

²² Nangepe haitu, nosiulikamo pakeni ntoYahudi, "Bara Ia mopatuju mompatesi karoNa mboto, sabana niuliNa kita ledo mamala hau ri ponturo rakalauNa." ††

²³ Tapi nanguli i Yesus ka ira, "Komiu nopuna lako ri dunia hitu, tapi Yaku nopuna lako ri suruga. Komiu todea ri dunia hitu, tapi Yaku ledo. ²⁴ Haitu sampe niulikaku ka komiu, komiu mamate bo rapopogaa lako nte Alatala sabana dosamiu. Niulikaku isema Yaku. ‡ Ane ledo raparasayamiu tesaKu haitu, komiu mpuu-mpuu mamate bo rapopogaa lako nte Alatala sabana dosamiu."

²⁵ Bo nekutana vaimo toYahudi, "Kakanana, isema tano Iko?"

Nesana i Yesus, "Domo ria gunana Kutesa ka komiu! ††²⁶ Da nadeapa mamala Kuuli mompakasala komiu, tapi ledo Kuuli. Aga anu niepeKu lako nte Ia anu nantudu Yaku, haitumo Kutesa ka manusia ri dunia. Bo Ia namala raparasaya."

²⁷ Ledo nisanira i Yesus notesaki TuamaNa ri suruga. ²⁸ Haitu sampe niuliNa vai ka ira, "Niulikaku ka komiu isema Yaku. Bo maupu komiu manganggataka Yaku, Ana nu Manusia, ††ri kayu salib, tempo haitu pade rasanimiu tesaKu hitu nakana bo rasanimiu muni ledo ria sangayaa nipoviaKu nangoseaka dotaKu mboto. Tapi Yaku bate-batena notesa nangoseaka anu nipatuduki nTuamaKu ka Yaku. ²⁹ Ia anu nantudu Yaku, Ia muni nomporea Yaku. Ledo rapalambaNa Yaku saitoKu, sabana Yaku bate-batena novia anu nompakadamba raraNa."

³⁰ Naliu i Yesus notesa ivesia, nadeamo tona nompapasaya Ia.

†† Nangoseaka pomparasaya ntoYahudi, ane tona mompatesi karona mboto, nyawana kana ranavusaka riaru narakaa. ‡ isema Yaku ATAU: "YAKU NARIA". Riaru agama Yahudi, sanga nu Alatala naganasapa iamo "Yahweh" atau "Yehovah". Batuana "Yaku Naria". Peinta Pesuvu 3:14. Ri buku hitu anu nitulisi i Yohanes, i Yesus nasaro nanguli "Yaku naria" rapopakita Iamo nasimbay nte Alatala. †† Domo ria gunana Kutesa ka komiu: Anu nitesaKu ka komiu lako ri pamulana! †† manganggataka Yaku, Anu nu Manusia: Patuju ntesa hitu, i Yesus kana raanggataka pakalanga ri kayu salib bo meore hau ri suruga. Peinta muni Yohanes 12:32-33.

Ane rasanita pepatuduki nakana, kita domo rapobatua nuapa-nuapa

³¹ Naupu haitu, i Yesus nanguli ka toYahudi anu nom-parasaya Ia, "Ane komiu maroo mangoseaka tesaKu, komiu mpuu-mpuu topangoseaka Yaku. ³² Bo ane ivesia, rasanimumo pepatuduki nakana sampe komiu rakabasaka lako ri pobatuamiu."

³³ Nesana pakeni ntoYahudi, "Kami hii muli i Abraham. Dopa sanggania kami nipobatua ntona. Berimba bo niuliMiu kami domo rapobatua?"

³⁴ Nesana i Yesus ka ira, "Pariaramo tesaKu hitu. Isema-sema novia dosa, iamo nipobatua nu dosa. ³⁵ Ane batua, ledo natantu makuasa riaru banua nu madika. Tapi ane ana nu madika, natantumoa ia makuasa riaru banua ntuamana. ³⁶ Jadi, ane Ana nu Alatala mbotomo mombakabasaka komiu *lako ri dosa*, makabasaka mpuumoa komiu! ³⁷ NisaniKu komiu pura-pura muli i Abraham. Tapi nau damo ivesia, komiu madota mompatesi Yaku, sabana ledo nipokonomiu mantarima pepatudukiKu. ³⁸ Anu nikitaKu nte TuamaKu, haitumo nitesaKu ka komiu. Tapi komiu aga novia anu nipatuduki ntuamamiu ka komiu."

³⁹ Nesana ira ka i Yesus, "Tuama kami i Abraham."

Nanguli i Yesus, "Ane komiu mpuu-mpuu muli i Abraham, natantumoa pokainggumiu mabelo, nasimbayu mpo pokainggu i Abraham. ⁴⁰ Yaku nompasimbayu ka komiu pepatuduki nakana anu niepeKu lako nte Alatala, tapi komiu aga nompasimbuku mompatesi Yaku. Ledo ivesia pokainggu i Abraham! ⁴¹ Pokainggumiu tu nanjava pokainggu ntuamamiu mboto!"

Nesana vaimo ira, "Kami ledo ana vone! Tuama kami aga saito, haitumo Alatala."

⁴² Nanguli i Yesus ka ira, "Ane Alatala tuamamiu, tantu rapotovemiu Yaku, sabana Yaku nopuna lako nte Ia. Yaku nakava ledo nangoseaka dotaKu mboto, tapi nangoseaka dota nu Alatala anu nantudu Yaku.

⁴³ Natantumoa ledo nipahamiu tesaKu sabana ledo nipokonomiu mantarima pepatudukiKu. ⁴⁴ Komiu nasimbayu ante tuamamiu, Magau nu Seta! Komiu batena madota mangoseaka dotana. Lako ri pamulaname ia bate-batena topepatesi. Ia ledo nosabingga ka anu nakana, sabana ledo ria nuapa-nuapa nakana riaru ntaina. Masipato ia modava, apa ia topodava mami bo puna nu dava. ⁴⁵ Yaku notesa anu nakana ka komiu, bo ledo niparasayamiu *sabana komiu muni topodava*. ⁴⁶ Coba popakita ka Yaku dosaKu! Nakana anu nitesaKu, jadi nakuya ledo niparasayamiu? ⁴⁷ Tona nopuna lako nte Alatala mompariara tesa nu Alatala. Tapi komiu ledo mompariara tesaNa sabana komiu ledo nopuna lako nte Alatala."

I Yesus naogepa pade i Abraham

⁴⁸ Nangepe tesa haitu, nangulimo toYahudi ka i Yesus, "Hm! Nakana mpuu niuli kami! Iko nipesua nu seta! Iko nasimbayu mpo toSamaria naruto!"

⁴⁹ Nesana i Yesus, "Yaku ledo nipesua nu seta. Yaku nombabila TuamaKu, tapi aga nisalaimiu Yaku. ⁵⁰ Yaku ledo mbeki rabila ntona. Tapi TuamaKu madota Yaku rabila ntona bo Iamo topotangara nanao. ⁵¹ Pariaramo tesaKu hitu. Isema-sema mangoseaka tesaKu ledo mamate sampe ri kasae-saena."

⁵² Nangepe haitu nanguli toYahudi ka i Yesus, "Hitu-pa nisani kamimo nipesua nu seta mpuumoa Iko! I Abraham bo nabi-nabi nggaulu namate puramo. Tapi panguliMu, isema-sema nangoseaka tesaMu ledo mamate sampe ri kasae-saena! ⁵³ Berimbamo? Naogepa Iko pade tuputa i Abraham? Ia bo nabi-nabi nggaulu namate puramo! Isema ntoto Iko sampe Iko nabia notesa ivesia?"

⁵⁴ Nesana i Yesus, "Ane Yaku mombabila karoKu mboto, ledo ntoto maria batuana. Tapi TuamaKu nombabila Yaku bo Iamo anu nipangakumiu Alatala nisombamiu, ⁵⁵ nau komiu ledo nosisani ante Ia. Tapi Yaku nosisani belo ante Ia. Ane rapana Kuuli Yaku ledo nosisani ante Ia, tantu Yaku majadi topodava nasimbayu mpo komiu. Tapi Yaku mpuu-mpuu nosisani ante Ia bo Yaku natutu nangoseaka tesaNa. ⁵⁶ Totuamiu nggaulu i Abraham, nadamba mpuu rarana sabana nisanina rakitana Yaku makava. Nikitanamo bo nadamba mpuumoa rarana."

⁵⁷ Nanguli vaimo toYahudi, "Ba! Iko tu dopa rakavana lima-pulu mpae umuruMu! Berimba sampe Iko nanguli nikitaMumo i Abraham, totua kami nggaulu?"

⁵⁸ Nesanamoa i Yesus, "Pariaramo tesaKu. Dopame i Abraham nipoanaka, naria mamimo Yaku!" †

⁵⁹ Nangepe tesa i Yesus haitu, nangala vatumo toYahudi mombarempe Ia. Tapi Ia netinggalipo lako ri tatangara bo nalai lako ri Banua nu Alatala haitu.

I Yesus nompakabelo mata ntoburo ri eo penonto

9 Tempo i Yesus noliu, nikitaNa saito tona naburo mami lako ri pompoanaka. ² Nekutanamo ana-anaguru i Yesus, "Guru, isema nadosa sampe tona hitu naburo mami lako ri pompoanaka? Totuana atau ia mboto?"

³ Nesana i Yesus, "Ledo ia nadosa, ledo muni totuana. Tapi haitu najadi ala kuasa nu Alatala mamala rakitana riaru nggatuvuna. ⁴ Ane da maeo, kita kana movia pokarajaa nu Alatala anu nantudu Yaku. Apa ane

† *Naria mamimo Yaku ATAU: "Yaku Naria": Riaru basa Ibrani "YAKU NARIA" sanga nu Alatala. Peinta Pesuvu 3:14. Ane nanguli ivesia, i Yesus nompakalanto Ia nasimbayu nte Alatala. Jadi toYahudi madota mombarempe Ia ante vatu sabana nipakasimbayuna karoNa ante Alatala.*

mabongimo domo mamala mokarajaa. ⁵ Sanggariana Yaku riara dunia hitu, Yakumo reme anu nompakareme pekiri nu manusia."

⁶ Naupu nitesaNa ivesia, niteveulusiNamo tana bo nipinjukiNa pade nigeseNa ri mata ntoburo. ⁷ Pade nituduNa, "Koi doupimo matamu ri uve Kola Siloam." Siloam batuana "Nitudu." Jadi hau mpuumo toburo haitu. Nakava ri Kola Siloam, nidoupinamo matana. Nanjilipa ia, nekitamo matana.

⁸ Tona nosadoyata ante ia bo tona nanggita ia nerapi-rapi ri bivi dala bara ipia, nosipekutana, "Ledo ia haitu tona nonturo ri bivi dala nerapi-rapi bara ipia?"

⁹ Naria sanu nanguli, "Nakana! Iamo!"

Tapi naria muni sanu tona nanguli, "Ledo ia, aga lenjena nasimbayu."

Tapi ia mboto nanguli, "Yakumo!"

¹⁰ Jadi nipekutanaramo, "Berimba sampe matamu nekita?"

¹¹ Nesana ia, "Tona nosanga i Yesus notoveulusi tana, bo nipinjukiNa sakide tampo haitu, bo nigeseNa ri mataku. Pade nituduNa yaku hau mombadousi mataku ri Kola Siloam. Jadi hau mpuumo yaku bo naupu nendou namalamo mataku nekita."

¹² Nekutana vaimo ira, "Ri umbamo tona haitu?"

Nesana toburo, "Ledo nisaniku."

ToFarisi nomparesa toburo nipopekita matana

¹³⁻¹⁴ Tempo i Yesus nombagalo tana ante veuluNa bo nompopekita mata ntoburo haitu nambela eo penonto. Jadi haitumo sampe toburo anu nabelomo matana niken ntona hau ri ngayo ntoFarisi. ¹⁵ Bo toFarisi muni nompekutana toburo, "Berimba sampe matamu nipopekita?"

Nesana ia, "NigeseNa tampo mataku pade nidousiku bo namalamo mataku nekita."

¹⁶ Bara sako-ndua toFarisi haitu nanguli, "Natantum i Yesus haitu ledo lako nte Alatala, sabana Ia ledo nangoseaka atura-atura eo penonto."

Tapi naria muni sanu nanguli, "Umbamo tona nadosa mamala movia kabaraka ivehaitu?" Jadi nosisala panggava ira.

¹⁷ Jadi nipekutana ntoFarisi vaimo toburo, "Berimba panggavamu, apa matamu nipakabeloNa."

Nesana toburo, "Ia nabi."

¹⁸ Tapi ledo niparasaya ntoFarisi † tona haitu mpuu-mpuu naburo bo dako nipopekita matana. Jadi nipokiora tina tuama ntoburo nipakabelo matana haitu ¹⁹ bo nipekutanara, "Nakana mpuu hitumo anamiu anu niulimiu naburo mami lako ri pompoanaka? Berimba sampe sii-sii nabelomo matana?"

²⁰ Nesana tina tuama ntoburo haitu, "Nisani kami, ia mpuu-mpuu ana kami, bo ia mpuu-mpuu naburo ma-

mi lako ri pompoanaka. ²¹ Tapi bara berimba sampe ia namala nekita sii-sii, ledo nisani kami. Bo ledo muni nisani kami bara isema nompakabelo matana. Aginamo ia mboto rapekutanamiu. Ia nambasomo. Ia mbotomo mamala mesanaka pompekutanamiu."

²² Tina tuamana nanguli ivesia sabana naekamo ira ka toFarisi †. Apa toFarisi haitu nasintuvumo isema-sema mompangaku i Yesus Magau Topepakasalama anu nianjanji nu Alatala, domo radekei metupu ri banua petupu. ²³ Haitumo sampe tina tuamana nanguli, "Ia nambasomo. Aginapa ia mboto rapekutanamiu."

²⁴ Naupu haitu, nipokiora vai sangganipa toburo haitu bo nipekutanara, "Ulimo anu nakana ri ngayo nu Alatala! Nisani kamimo tona nompakabelo matamu haitu tona nadosa!"

²⁵ Bo nesana toburo haitu, "Ledo nisaniku bara nadosa Ia bara ledo. Tapi anu nisaniku, pangane yaku naburo, tapi hitupa nekitamo mataku."

²⁶ Bo nanguli vaimo toFarisi ka ia, "Nuapa nipoviaNa ka iko? Berimba pompakabeloNa matamu?"

²⁷ Nesana toburo haitu, "Nitesakumo ka komiu pangane tapi ledo niparasayamiu. Nakuya rapekutanamiu vai? Madota muni komiu mangoseaka Ia?"

²⁸ Naraumo ira bo niraira ivei: "Ikomo tu topangoseaka Ia, kami ledo! Kami topangoseaka i Musa! ²⁹ Nisani kami Alatala notesa nte i Musa nggaulu. Tapi tona haitu, ledo nisani kami unu nu apuNa."

³⁰ Bo nesana vaimo toburo haitu, "Hee! Nahera mpuu yaku! Ledo nisanimiu lako ri umba kakavaNa, tapi Ia nompakabelo mataku naburo! ³¹ Nisanita Alatala ledo nangepe posambaya ntona nadosa, tapi Ia nompetingai posambaya ntona netupu nte Ia bo nangoseaka dotaNa. *Ane tona haitu ledo lako nte Alatala, berimbamo Ia mompakabelo mataku?*³² Lako ri lamba pamulana dopa sanggan n iepeta naria tona namala nompakabelo mata ntona naburo mami lako ri pompoanaka. ³³ Ane tona haitu ledo lako nte Alatala, natantum i ledo mamala movia nuapa-nuapa."

³⁴ Nesana ira, "Hih! Iko tu todosa mami lako ri pompoanaka! Ledo ntoto masipato iko mompatuduki kami!" Jadi nompamula lako ri eo haitu, domo nidekeira tona haitu metupu ri banua petupu.

Tona ledo nomparasaya i Yesus Magau Topepakasalama nirapaka tona naburo matana

³⁵ Niepe i Yesusmo tona haitu domo radekei metupu ri banua petupu ntoYahudi, hau Ia mosinggavaka bo nipekutanaNa, "Berimbamo? Niparasayamu Ana nu Manusia?"

³⁶ Nesana tona haitu, "Isema tona niuliMiu, Guru? Uli ka yaku ala kuparasaya Ia."

† toFarisi. Ri naskah basa Yunani nitulisi: "toYahudi".

†† toFarisi. Ri naskah basa Yunani nitulisi: "toYahudi".

³⁷ Nanguli i Yesus ka ia, "Nikitamumo Ia. Iamo notesa ante iko."

³⁸ Bo nanguli tona haitu, "Ane ivesia, Pue! Ni-parasayakumo!" Bo nantaputumo ia mombasomba i Yesus.

³⁹ Nanguli i Yesus ka ia, "Patuju kakavaKu ri dunia hitu ala mompakalanto sala ntona ala tona naburo mamala mekita, bo tona nisarumakana nekita, majadi maburo."

⁴⁰ Naria bara sako-ndua toFarisi neangga ri sia bo niepera i Yesus nanguli ivesia, nekutanamo ira, "NisarumakaMu kami hii naburo muni?"

⁴¹ Nesana i Yesus, "Ane rapana komiu naburo mami, natantumo ledo nadosa komiu. Tapi komiu nanguli namala nekita. Haitu sampe komiu bate-batena nadosa."

Porapa topoevu bimba

10 "Pariaramo tesaKu hitu. Ane tona aga nompene vala nesua riaru gimpu bo ledo nesua ri bobaa, tona haitu topangangga bo topeago. ² Tapi topoevu bimba-bimba haitu, nesua ri bobaa nu gimpu. ³ Topojaga gimpu mombabuka bobaa ka ia, bo bimba-bimba haitu mombatalingai suaranya ane rapokiona sangara sangu-sangu. Bo rakenina ira hau ri savalikuna. ⁴ Ane nesuvu ri savalikuna puramo bimba, topoevu molipa mokolu ka bimbana haitu. Bo bimba-bimba haitu mangoseaka purina, sabana nisanira suara ntopoevu. ⁵ Bimba-bimba haitu ledo mangoseaka tona ntanina, tapi aga rapalaikara tona haitu, sabana ledo nisanira suaranya."

⁶ I Yesus notesa porapa haitu ka toFarisi, tapi ledo nisanira batuana. ⁷ Sabana haitu, nanguli vaimo i Yesus ka ira, "Pariaramo tesaKu hitu! Yakumo hii bobaa rapesua nu bimba hau riaru gimpu. ⁸ Pura-pura tona nakava nokolu ka Yaku, aga topangangga bo topeago. Tapi bimba-bimba ledo nombatalingai suaranya. ⁹ Yakumo hii bobaa. Isema-sema mesua modala nte Yaku rapakasalama. Ia mamala mesua bo mesuvu manggava kanda. ¹⁰ Ane topangangga, ia aga tumai mangangga, mepatesi, bo mompakagero. Tapi Yaku hii nakava ala manusia manggava katuvua mabelo bo katuvua haitu ledo ria kakurana." †

I Yesus Topoevu nabelo

¹¹ "Yakumo hii topoevu nabelo. Yaku nasadia mamate ala bimbaKu matuvu. ¹² Tona nigaji anu ledo topoevu bimba bo ledo muni tupu nu bimba, ane rakitana asulaku makava mombaraga bimba-bimba, aga rapalaikana bimba-bimba haitu apa ledo bimbana mboto. Jadi bimba haitu raraga bo rasaka nu asulaku sampe masimpotare. ¹³ Tona nigaji haitu mangova

† *Bimba nirapaka topomparasaya, bo topeago bo topangangga nirapaka guru mpodava.*

malai sabana ia aga nigaji. Ledo rapotovena bimba-bimba haitu.

¹⁴⁻¹⁵ Yakumo hii topoevu nabelo. TuamaKu nisaniNa Yaku bo Yaku nisaniKu muni Ia. Ivesia muni nisaniKu pura-pura bimbaKu bo bimba-bimbaKu nisanira Yaku. Bo Yaku mamate ala bimba-bimbaKu mamala matuvu.

¹⁶ Da nariapa bimba-bimbaKu ntanina anu dopa nesua riaru gimpu hitu. Ira muni kana Kukeni tumai. Ira mombatalingai suaraKu bo pura-pura bimbaKu majadi salunu rapoevu ntona saito.

¹⁷ TuamaKu nompotove Yaku sabana Yaku nasadia nombadekei karoKu rapatesi ala Yaku matuvu mpanjili. ¹⁸ Ledo ria saitoa tona mamala mompatesi Yaku ane ledo Kudekei. Tapi Yakumo anu nombadekei karoKu rapatesi nangoseaka dotaKu mboto. Yaku nakuasa mombadekei karoKu rapatesi bo Yaku nakuasa muni matuvu mpanjili, sabana haitumo niparenta nTuamaKu ka Yaku."

¹⁹ Nangepe tesa i Yesus haitu, nosinjanai vai toYahudi. ²⁰ Nadea ira nanguli, "Ia haitu nipesua nu seta! Nagila ntotomo Ia! Rapokuya raepeta tesaNa?"

²¹ Tapi naria muni sanu tona nanguli, "Ledo! Ane tona nipesua nu seta, ledo ivesia tesana! Natantumo seta ledo mamala mompakabelo tona naburo!"

ToYahudi ledo nadota nompapasaya i Yesus Ana nu Alatala

²² Naliu haitu, nakavamo gantana Posusa Mombatora Pobaruki Banua nu Alatala ri ngata Yerusalem. Posusa haitu nambela tempo naranindi. ²³ I Yesus nolipa ri tambale ri doyata Banua nu Alatala anu nosanga Tambale Magau Salomo. ²⁴ Bo nakavamo pakeni ntoYahudi nantagui Ia hamai. Nekutanamo ira, "Sampe maipia Iko mompakaingu kami? Ane Iko mpuu-mpuu Magau Topepakasalama anu nijanji nu Alatala, uli pakalanto ka kami!"

²⁵ Nesana i Yesus, "NiuliKumo ka komiu, tapi ledo niparasayamiu. Kabaraka-kabaraka nipoviaKu ante kuasa lako nte TuamaKu nompopaisani ka komiu isema Yaku hii. ²⁶ Tapi ledo ntoto niparasayamiu sabana komiu ledo bimba-bimbaKu. ²⁷ Bimba-bimbaKu nantalingai tesaKu bo nisaniKu ira bo nioseakara Yaku. ²⁸ Yaku nombadekei ka ira katuvu mabelo sampe ri kasae-saena bo ira ledo ntoto rapopogaa lako nte Alatala. Ledo ntoto maria saitoa tona mamala mangago bimbaKu lako nte Yaku. ^{††29} TuamaKu niparasayakaNa ka Yaku bimba-bimba haitu bo Iamo naogepa pade pura-pura anu naria. Ledo ntoto ria saitoa tona mamala mangago ira lako nte Ia. ³⁰ Yaku bo TuamaKu ledo ria posisalana, aga saito."

†† *mangago bimbaKu lako nte Yaku: batuana, manggeni tona moura pomparasayara.*

³¹ Nangepe tesaNa haitu, niala ntoYahudimo vatu raporempera i Yesus. ³² Tapi nanguli i Yesus ka ira, "Nadeamo povia nabelo lako nte TuamaKu nipopakitaKu ka komiu. Povia umbana sampe rarempemiu vatu Yaku?"

³³ Nesana toYahudi, "Ledo poviaMu nabelo sampe Iko rarempe kami vatu. Tapi sabana Iko nompan-daente Alatala. Iko aga manusia biasa, tapi Iko nom-pakasimbayu karoMu ante Alatala!"

³⁴ Nesana i Yesus, "Riara Atura-atura agamamiu, naria tesa nu Alatala *ka pakeni ntoYahudi nggaulu* nitulisi ivei: 'Komiu pura-pura ana-ana nu Alatala.' ³⁵ Anu nitulisi riara Buku Gasahaitu ledo nabali-bali tapi batebatena nakana sampe ri kasae-saena. Ira anu nantari-ma tesa nu Alatala nggaulu haitu niuliNa 'ana-ana nu Alatala', ³⁶ nemopa Yaku! Apa Yakumo hii nipelisi nu Alatala bo nituduNa tumai ri dunia! Jadi nakuya niulikamiu Yaku nompandaente Alatala sabana niuliKu Yakumo hii Ana nu Alatala? ³⁷ Ane rapana ledo Kupovia pokarajaa niparasaya nTuamaKu ka Yaku, nee raparasayamiu Yaku. ³⁸ Tapi nipoviaKu pokarajaa haitu jadi kana raparasayamiu Yaku. Nau ledo madota komiu momparasaya tesaKu, kana raparasayamiu sabana anu nipoviaKu. Ivesiamo rasanimiu mpuu-mpuu Yaku nosangu rara nte TuamaKu bo TuamaKu muni nosangu rara nte Yaku."

³⁹ Nangepe haitu, pakeni ntoYahudi nompasimbuku vaimo mombasaka i Yesus, tapi nalaimo Ia.

⁴⁰ Naupu haitu, haumo i Yesus nanjili ri sambote Binangga Yordan. Bo Ia naroo hamai ri ponturo i Yohanes Topedi nombadiu tona bara ipia. ⁴¹ Nadea tona hau nosinggava nte Ia. Bo simbo notesamo ira, "I Yohanes ledo ntoto novia kabaraka. Tapi ia nantesa i Yesus bo tesana haitu nakana mpuu!" ⁴² Bo nadea tona hamai nomparasaya i Yesus.

I Lazarus namate

11 ¹⁻² Naria saito langgai nosanga i Lazarus anu nonturo ri ngata Betania nosanggani-nggani ante sampesuvuna mombine anu nosanga i Maria bo i Marta. I Maria mombine nombatoli lana dupa ri kada i Yesus bo nipakabaina ante buluana. Naria sanggani i Lazarus nadua ntamo. ³ Jadi sampesuvuna randua nombatudu tona hau mangulika i Yesus ivei: "Pue, vega nipotoveMiu nadua."

⁴ Nangepe kareba haitu, nangulimo i Yesus, "Duana haitu dopa rapomatena. Haitu najadi ala Alatala mompopakita kuasaNa. Bo lako ri duana haitu, rasani ntona Yaku, Ana nu Alatala, nakuasa muni."

⁵ I Yesus nompotove i Marta, i Maria bo i Lazarus.

⁶ Tapi tempo niepeNa karebana i Lazarus nadua, nitunggaila rombongipa kasaena pade hau Ia. ⁷ Naliu

rombongi haitu, niuliNa ka ana-anaguruNa, "Anumo, kita manjili hau ri bagia Yudea." ^{††}

⁸ Nesana anaguruNa, "Guru, dopa nasae toYahudi hamai madota mombarempemiu Komiu ante vatu sampe mamate. Nuapa sabana sii-sii Komiu madota hau vai?"

⁹ Nanguli i Yesus ka ira, "Saeo sapulu rojaa kasaena. Tona nolipa ri eona, ledo matepasunu vatu kadana, apa nikitana reme anu nombavanta dunia. ¹⁰ Tapi tona nolipa tempo nabongi, matepasunu vatu kadana sabana ledo ria nuapa-nuapa nompakareme dalana." [‡]

¹¹ Ivesiamo tesa i Yesus ka anaguruNa. Naupu haitu, nipapolaNa tesaNa ka ira. NiuliNa, "Vegata i Lazarus namonjomo. Tapi hau Kulike ia."

¹² Bo nesana ana-anaguru i Yesus, "Ane namonjo mpuumo i Lazarus, tantu ia kana mabelo mpanjili lako ri duana haitu." ¹³ Nisarumaka nu anaguruNa namonjo biasa i Lazarus. Tano mai patuju tesa i Yesus nanguli i Lazarus namatemo. ¹⁴ Haitumo sabana i Yesus no-tovontoo ka ana-anaguruNa, "I Lazarus namatemo. ¹⁵ Nadamba raraKu Yaku ledo naria hamai tempo ia namate, sabana kamatena haitu manggeni belo ka komiu ala raparasayamiu Yaku. Anumo, haumo kita mompeinta i Lazarus."

¹⁶ Bo i Tomas anu nidae "Ngana Rapi" nanguli ka roaroana anaguru i Yesus, "Anumo, kita mangoseaka Ia ala kita muni mamate mosanggani-nggani ante Ia."

I Yesus nompakavoe rara i Marta bo i Maria

¹⁷ Tempo i Yesus nakava ri ngata Betania, pata-eomo kasaena i Lazarus ri dayo. ¹⁸ Ngata Betania haitu napa ngata Yerusalem, nitasere talu-kilo kakavaona. ¹⁹ Jadi nadeamo toYahudi nakava nte i Marta bo i Maria mompakavoe rarara sabana sampesuvura i Lazarus namatemo.

²⁰ Niepe i Martapa naparamo i Yesus, hau ia mantomunaka Ia. I Maria nepopea ri banuana. ²¹ Nosinggavapa nte i Yesus, nangulimo i Marta ka Ia, "Pue, ane naria Komiu ri sii tempo haitu, ledo mamate sampesuvuku i Lazarus. ²² Tapi naupa ivesia, nisaniku nuapauapa raperapiMiu sii-sii, radekei nu Alatala ka Komiu."

²³ Nanguli i Yesus ka i Marta, "Sampesuvumu haitu da matuvu mpanjili."

²⁴ Nanguli i Marta, "Iyo. Nisaniku ia matuvu mpanjili ri kaupnu dunia tempo pura-pura tona namate matuvu mpanjili."

²⁵ Nanguli i Yesus ka i Marta, "Yakumo anu nompakatuvu mpanjili tona namate bo Yakumo nombadekei katuvua nabelo. Isema-sema nomparasaya Yaku, nau ia mamatemo, ia batena matuvu mabelo.

²⁶ Bo isema-sema natuvu nabelo bo nomparasaya

^{††} Ngata Betania ponturo gi Lazarus, ri bagia Yudea napara ngata Yerusalem. [‡] Batuana, ane dopa makava tempona nipakatantu nu Alatala, dopa makuya-kuya i Yesus, nirapaka Ia da nolipa ri eona.

Yaku, ledo mamate bo rapopogaa lako nte Alatala sampe ri kasae-saena. Niparasayamu anu niuliKu hitu?"

²⁷ Nanguli i Marta, "Iyo, Pue. Niparasayakumo Komitu Ana nu Alatala, Magau Topepakasalama anu nijanji nu Alatala makava ri dunia."

²⁸ Naupu i Marta notesa ka i Yesus ivesia, hau ia nompokio i Maria bo nanggalivaya ka ia, "Nakavamo i Guru. Ia madota mosinggava nte iko." ²⁹ Nangepe tesa i Marta haitu, neanggamo i Maria hau nasalisa mosinggava nte i Yesus. ³⁰ Tempo haitu, i Yesus dopa nesua rangata Betania. Ia da ri savalikuna, ri ponturo niposinggavaNa ante i Marta. ³¹ ToYahudi anu nompakavoe rara i Maria ri banuana nanggita ia nompari-mpari hau. Jadi hau muni ira netuntuni ri puri. Nisarumakara ia hau ri dayo mantangisi sampesuvuna.

³² Nakavapa i Maria nte i Yesus, nantaputumo ia ri ngayoNa bo nanguli, "Pue, ane naria Komiu ri sii bara ipia, natantumo ledo mamate sampesuvuku."

³³ Tempo i Yesus nanggita i Maria nte toYahudi anu nomporea ia notumangi-mangi, nasusa mpuumo raraNa. ³⁴ Bo nekutanamo Ia, "Ri umba dayona?"

Nesanamo ira, "Pue, kaimo, hau rapeintata."

³⁵ Notumangimo i Yesus. ³⁶ Nanggita haitu, nanguli toYahudi anu nantuntuni i Maria pangane, "Peintamo. Nipotove i Yesus mpuumo i Lazarus."

³⁷ Tapi naria muni sanu ira nanguli ka roa, "Tona naburo namala nipakabeloNa. Nakuya bo ledo namala nipakabeloNa i Lazarus nadua ala ia ledo mamate?"

I Yesus nompakatuvu mpanjili i Lazarus

³⁸ I Yesus nanggaparai dayo i Lazarus ante susa raraNa. Dayo haitu bolo vatu ri kente nu bulu, vambana niupi ante vatu mbaso. ³⁹ Nanguli i Yesus, "Lelakamo vatu haitu!"

Tapi nanguli i Marta, sampesuvu ntomate haitu, "Pue, natantu navaumo ia, apa pata-eomo ia riaradayaona."

⁴⁰ Nanguli i Yesus ka i Marta, "Nuapa niuliKu ka iko pangane? Ane muparasaya, mukita kaoge kuasa nu Alatala!" ⁴¹ Naupu sia, nilelakaramo vatu mbaso nipombatutui dayo haitu. Pade nitingoa i Yesusmo langi bo nosambaya, "Tata, Yaku nosukuru sabana posambayaKu hitu niepeMiumo. ⁴² NisaniKu Komiu bate-batena nangepe posambayaKu, tapi niuliKu ivesia ala raepe ntona ri sii ala raparasayara Komiumo nombatudu Yaku tumai ri dunia."

⁴³ Naupu notesa ivesia, nongaremo i Yesus ante suara namangga, "Lazarus! Pesuvumo!" ⁴⁴ Bo nesuvu mpuumo i Lazarus lako riaradayaona nu dayo. Kadana bo palena da nibeve sompu bo balenggana da nipou kae. Bo nanguli i Yesus ka ira, "Volemo pompouna ala mabelo ia molipa."

Pakeni-pakeni ntoYahudi nasintuvu mompatesi i Yesus

Matius 26:1-5; Markus 14:1-2; Lukas 22:1-2

⁴⁵ Nadea toYahudi nakava mompakavoe rara i Maria bo nikitara anu nipovia i Yesus. Bo nadeamo ira nompapasaya Ia. ⁴⁶ Tapi naria muni sanu hau nte toFarisi nombatesa ka ira anu nipovia i Yesus. ⁴⁷ Jadi balengga-balengga ntopanggeni pesomba bo toFarisi nompasiromu toPolibu Mbaso Agama Yahudi. Niulira ka topolibu anu nasiromu haitu, "Nuapa masipato rapoviata? Nadea mpuu kabaraka nipovia ntona haitu. ⁴⁸ Ane kita batena mompalamba Ia ivesia, natantumo purapura tona momparasaya Ia ngena! Bo kaupuna tantara nu Magau Mbaso ri ngata Roma makava mombagero Banua nu Alatala bo pura-pura ngatata!"

⁴⁹ Naria saito ira nosanga i Kayafas, anu najadi Pakeni nTopanggeni Pesomba mpae haitu. NiulikaNa ira, "Ledo nisanimiu nuapa-nuapa! ⁵⁰ Ledo ntoto nipekirimiu kabelo ka todea! Aginapa saito tona mamate pade todea rapakaropu! Agina saito mamate manjambei todea!"

⁵¹ Kakanana tesa i Kayafas haitu ledo nitesana lako ri pekirina mboto, tapi ia niposumba nu Alatala sabana ia Pakeni nTopanggeni Pesomba mpae haitu. Ia nombaboto kamate i Yesus manjambei todea toYahudi.

⁵² Bo ledo aga toYahudi, tapi nibotusina muni i Yesus mamate ka pura-pura ana-ana nu Alatala ntanina ri umba-umba ri dunia, ala ira rapasiromu majadi sanganu. ⁵³ Jadi nompamula lako ri eo haitu, pakeni ntoYahudi nasintuvumo mompatesi i Yesus.

⁵⁴ Sabana haitu, i Yesus domo noliu ri ngata-ngata ntoYahudi, ala domo rakita ntona. Tapi nalai Ia lako ri bagia Yudea hau ri ngata Efraim napara karava bai. Bo naroo hamai nosangani-nggani ante anaguruNa.

⁵⁵ Tempo haitu naparamo eo mbaso agama Yahudi anu niuli Eo Mbaso Paskah. Jadi nadeamo tona lako ri ngata-ngata ntoYahudi nantende hau ri ngata Yerusalem ala mantuntuni ada pompakagasa karora dopame rapamula Eo Mbaso Paskah. ⁵⁶ Nakava hamai, nielo-elora i Yesus. Bo ane ira nasiromu ri Banua nu Alatala, nosimpekutana ira, "Berimba panggavamiau? Makava Ia ri posusa ngena, atau ledo?"

⁵⁷ Tapi balengga-balengga ntopanggeni agama bo toFarisi lave niulira mami, "Isema-sema nangisani ponturo i Yesus, kana raulina ka kami ala Ia mamala rasa-ka!"

I Yesus nitoli lana dupa ri ngata Betania

Matius 26:6-13; Markus 14:3-9

12 Ono-eopa pade Eo Mbaso Paskah, i Yesus hau ri ngata Betania, ngata niponturo i Lazarus nipakatuvuNa mpanjili lako ri kamatena bara ipia.

² Hamai nipovia posusa mombabila i Yesus. I Marta

nantulungi nanggeni kandea ka toposusa bo i Lazarus nonturo ri tatangara nangande nosangani-nggani ante i Yesus.

³ Tempo ira nonturo hamai, i Maria nangala sabotolo lana vangi narwastu anu nasuli mpuu alina, nitasere santanga lite isina. Bo nakavamo ia mombatoli lana haitu ri kada i Yesus tanda pebilana, bo nipakabaina ante buluana. Bo riaru banua haitu navangi mpuu soana lako ri lana vangi haitu.

⁴ Nanggita haitu, notesamo saito anaguru i Yesus anu nosanga i Yudas Iskariot anu mompobalu Ia bara maipia. Niulina, ⁵ "Nakuya ledo nipobaluka lana nasuli alina haitu nte alina taluatu doi salaka † bo alina haitu radekei ka tona napakasi?" ⁶ Kakanana ledo tona napakasi nitora i Yudas, tapi aga karonu mboto apa ia topelea. Iamo anaguru anu niparasaya nombaboli doira, bo sanggani-sanggani nipeleana doi haitu. Haitu sampe niulina ivesia.

⁷ Tapi nangulimo i Yesus ka i Yudas, "Dekeikamo ia movia haitu, sabana anu nipoviana haitu mantora eo pombatana Yaku ngena. ††⁸ Tona napakasi bate-batena maria ri tatangamiu, tapi Yaku ledo."

Sintuvu balengga-balengga ntopanggeni pesomba mompatesi i Lazarus

⁹ Nadea mpuu toYahudi nangepe lenea i Yesus naria ri ngata Betania. Jadi haumo ira manggita i Yesus bo muni manggita i Lazarus anu nipakatuvuNa mpanjili lako ri kamatena. ¹⁰ Balengga-balengga ntopanggeni agama nasintuvu mompatesi i Lazarus muni. ¹¹ Sabana, naupu i Lazarus nipakatuvu mpanjili, nadeamo toYahudi domo nadota nangoseaka balengga-balengga ntopanggeni agama. Ira aga nangoseaka i Yesus bo nanjarumaka Ia.

I Yesus nikadambanaka mpo Magau ri ngata Yerusalem

Matius 21:1-11; Markus 11:1-11; Lukas 19:28-40

¹² Naeo mpadondo, todea anu nakava ri ngata Yerusalem mantuntuni posusa Paskah, niepera i Yesus makava ri ngata Yerusalem muni. ¹³ Jadi nialara tava ndate ‡ bo hau ira nombatomunaka i Yesus bo non-gare-ngaremo ira,

"Hosana! Ratoiyamo Alatala!

Maoge belo ka Ia anu nakava niposumba nu Alatala! Iamo Magau ntoIsrael!"

Mazmur 118:26

† doi salaka: Sampeka doi salaka nasimbayu ante gaji ntona saeo. †† Nantuntuni kabiasa ntoYahudi, tomate nisompu ante lana vangi bo rampa-rampa. ‡ tava ndate: Tava-tava haitu nitalera ri dala rapoliu i Yesus ala mombabila Ia nangoseaka ada ntoYahudi ane maria tomaoge makava riaru ngatara. Peinta Matius 21:8; Markus 11:8.

¹⁴ I Yesus nanggava sangu ana keledai bo nipesavina. Pesavina haitu nompakadupa tesa nitulisi riaru Buku Gasu ivei:

¹⁵ "Kadambamo komiu tupu ngata Yerusalem! Peintamo! Magaumiu makava nesavi ana nu keledai! ‡†"

Zakharia 9:9

¹⁶ Jadi nibila ntodea mpuu i Yesus tempo Ia nesua riaru ngata Yerusalem. Tapi dopa nisani nu ana-anaguruNa batuana. Naliu Ia natuvu mpanjili lako ri kamateNa bo neore hau ri suruga, pade nisanira pebila ntodea ka i Yesus nompakadupa anu nitulisi riaru Buku Gasu pangane.

¹⁷ Todea anu nosangani-nggani ante i Yesus tempo Ia nompokio i Lazarus lako riaru dayo bo nompakatu- vu mpanjili ia, todea gahaitumo notesa kajadia haitu ka tona ntanina. ¹⁸ Jadi nadea tona hau nombatomunaka i Yesus, sabana niepera i Yesus novia kabaraka haitu. ¹⁹ Nanggita haitu, nosimpotesamo toFarisi, "Nidagimo kita! Peinta vei! Pura-pura tona ri dunia hau nangoseaka Ia!"

I Yesus notesa kamateNa

²⁰ Ri tatanga ntodea hau metupu nte Alatala ri ngata Yerusalem tempo posusa Paskah haitu, naria muni bara sako-ndua toYunani. ²¹ Ira nakava nangulika i Filipus, "Ane mamala, kami madota mosinggava nte i Yesus." (I Filipus haitu tona lako ri ngata Betsaida ri bagia Galilea.) ²² Nangepe perapira haitu, hau i Filipus notesa ka i Andreas bo ira randua hau nanguli perapi haitu ka i Yesus.

²³ I Yesus notesa kamateNa ka ira. NiuliNa, "Nakavamo tempona Alatala mompopakita kaoge Ana nu Manusia, haitumo kaogeKu. ²⁴ Pariaramo tesaKu hitu: ane angu mpae ledo ratuda ri tana, pae haitu bate-batena aga sangu, ledo movua. Tapi ane angu mpae haitu ratuda ri tana, kaupuna pae haitu movua madea. ²⁵ Isema-sema aga nompotove katuvuna ri dunia hitu kana malipo katuvuna bara maipia. Tapi isema-sema ledo nompotove katuvuna riaru dunia hitu, manggava katuvua mabelo sampe ri kasae-saena. ²⁶ Isema-sema mokarajaa ka Yaku kana mangoseaka Yaku ala ri umbau-umba Kukalau, ia mosangani-nggani nte Yaku. Bo isema-sema mokarajaa ka Yaku natantu rabila nTua- maKu.

²⁷ Hitupa nasusa mpuumo raraKu. Nuapa Kuuli? Madota Kuperapi TuamaKu mombakabasaka peparajea anu majadi ri karoKu ngena. Tapi ledo Kuperapi ivesia, sabana patuju kakavaKu ri dunia hitu ala mombarasai peparajea haitu." ²⁸ Jadi nanguli i Yesus ka TuamaNa, "Tata, popakita kaogeMiu ka manusia!"

‡† keledai: Ane Magau makava mesavi jara, batuana ia nakava mosieva. Tapi ane ia makava mesavi keledai, batuana ia nakava mosinggabelo ante tupu ngata haitu.

Naupu niuliNa ivesia, nariamo suara lako ri langi nanguli, "NipopakitaKumo kaogeKu bo Kupopakita vai."

²⁹ Nangepe suara haitu, sanu tona nanguli naria guru kede. Tapi naria muni sanu ira nanguli malaeka notesa ka i Yesus.

³⁰ Jadi nanguli i Yesus ka ira, "Tesa niepemi pangane ledo aga mompakaroso raraKu, tapi mompakaroso raramiu. ³¹ Sii-sii nakavamo tempona dosa nu manusia ri dunia ratangara. Sii-sii temponamo Magau nu Seta anu nakuasa ri dunia, radagi. ³² Bo tempo Yaku raanggataka pakalanga ri tinja, † Kupakeni pura-pura manusia mangoseaka Yaku." ³³ I Yesus notesa ivesia ala mompopaisani ka ira dala kamateNa ri kayu salib ngena.

³⁴ Bo nanguli todea ka Ia, "Lako ri Buku Atura Agama, nisanita Magau Topepakasalama anu nijanji nu Alatala kana matuvu sampe ri kasae-saena. Jadi berimba sampe niuliMiu Ana nu Manusia kana mamate raanggataka pakalanga ri tinja? Isema Ana nu Manusia haitu?" ††

³⁵ Nesana i Yesus, "Damo sampalai reme maroo nte komiu. Jadi agina komiu molipa tempo da nareme ala komiu ledo rakava nu landa. Tona nolipa riaru kalandana ledo nisanina hau ri umba rakasondana.

³⁶ Parasayamo Yaku kamba da naria nosangani-ngani ante komiu nompakareme dunia ala komiu bate-na matuvu riaru reme."

Nadea toYahudi ledo nomparasaya i Yesus

Naupu i Yesus notesa ivesia, nalaimo Ia lako nte todea bo domo nadota Ia rakitara. ³⁷ Naupa nadeamo kabaraka nipoviaNa ri ngayora, ledo niparasayara Ia. ³⁸ Haitu najadi ala madupamo tesa nitulisi Nabi Yesaya nggaulu ivei:

"Pue, ledo ria tona nomparasaya kareba niken kami ka ira!

Nau kuasaMiu nipopakita ka ira, ledo muni niparirara."

Yesaya 53:1

³⁹ Jadi ira ledo nompakule nomparasaya, sabana Tupu nompakakaa bagara. Evamo tesa nipasimbayu Nabi Yesaya ivei:

⁴⁰ "Tupu nompakaburo matara bo nompakakaa bagara, ala matara ledo mekita bo rarara ledo mesani, ala ira ledo manjili nte Ia bo rapakabeloNa."

† raanggataka pakalanga lako ri tana. Batuana, raanggataka ri kayu salib pade meore hau ri suruga. Peinta Yohanes 3:14. †† Nangoseaka todea, Ana nu Manusia nasimbayu ante Magau Topepakasalama anu nijanji nu Alatala bo Magau Topepakasalama haitu matuvu sampe ri kasae-saena. Tapi i Yesus nanguli Ana nu Manusia kana mamate raanggataka ri kayu salib. Jadi ira naingu nu apa sabana Ia kana mamate. Jadi niulira bara Ana nu Manusia ledo nasimbayu ante Magau Topepakasalama haitu.

Yesaya 6:10

⁴¹ Nabi Yesaya nanguli ivesia sabana nisaninamo kaoge anu maria nte i Yesus bo nibotona.

⁴² Naupa ivesia, nadea muni pakeni ntoYahudi nomparasaya i Yesus. Tapi ira aga nomparasaya nggalino sabana naeka ira nte toFarisi, nee-nee ira domo radekei metupu ri banua petupu. ⁴³ Ira nomparasaya nggalino sabana nipokonorapa ratoiya nu manusia pade ratoiya nu Alatala.

Tesa-tesa i Yesus rapake mombatangara manusia

⁴⁴ Bo i Yesus nanguli nte suara namangga ri tatanga ntodea, "Isema-sema nomparasaya Yaku, ledo aga nomparasaya Yaku tapi niparasayana muni Alatala anu nantudu Yaku. ⁴⁵ Bo isema-sema nanggita Yaku, nikitana muni Alatala anu nantudu Yaku. ⁴⁶ Yaku tumai ri dunia mompakareme manusia, ala isema-sema momparasaya Yaku domo monturo ri kalandana.

⁴⁷ Ane maria tona mangepe tesaKu tapi ledo raoseakana tesa haitu, ledo Yaku mombahuku ia. Apa Yaku nakava ri dunia hitu, ledo mombahuku manusia, tapi mompakasalama manusia. ⁴⁸ Tona nompoara Yaku bo ledo nompariara tesaKu, naria anu mombahuku ira. TesaKu haitu mombahuku ira ri kaupu nu dunia, ⁴⁹ apa Yaku ledo notesa nangoseaka dotaKu mboto. Yaku aga nanguli anu niparenta nTuamaku ka Yaku, sabana Iamo nantudu Yaku makava ri dunia. ⁵⁰ Bo nisaniKu muni parentaNa haitu mombadekei katuvua mabelo sampe ri kasae-saena. Jadi tesa nitesaKu ka komiu aga nangoseaka anu niparenta nTuamaKu ka Yaku."

I Yesus notoposi kada nu ana-anaguruNa

13 Tempo haitu naparamo Eo Mbaso Paskah. Bo nisani i Yesus naparamo gantana rapalaisiNa dunia hitu bo manjili hau nte TuamaNa. Ia mpuumpuu nompotove ira anu najadi todeana ri dunia bo nipotoveNa sampe ri kaupuna. ‡

² I Yesus bo ana-anaguruNa nonturo nangande nosangani-ngani bo bongina haitu Magau nu Seta nesua ri pekiri i Yudas ana i Simon Iskariot ala mompobalu i Yesus ka baliNa. ³ Nisani i Yesus TuamaNa Alatala nombadekei pura-pura kuasa ka Ia. Bo nisaniNa muni Ia nakava lako nte Alatala bo Ia manjili hau nte Alatala. ⁴ Jadi neangamo Ia nombavonju baju ndoeNa, bo nialaNa handu nipoukaNa kopeNa. ⁵ Naupu haitu nitoliNa uve riaru loya. Bo nitoposiNa kada †† nu anaguruNa saito-saito pade nipakabaiNa ante handu nipompouNa kopeNa.

‡ nipotoveNa sampe ri kaupuna: Bo nipopakitaNa toveNa ledo ria kaupupuna. †† notoposi kada: bago notoposi kada ntona nireke bago nu batua, ledo bago masipato rapovia nu guru ka anaguruNa.

⁶ Tempo i Yesus nakava nte i Simon Petrus, nanguli i Petrus ka Ia, "Pue, Komiu tano mombatoposi kadaku?"

⁷ Nanguli i Yesus ka ia, "Sii-sii dopa nisanimu batuana anu nipoviaKu hitu. Nggapurina pade musani."

⁸ Tapi nanguli vaimo i Petrus ka i Yesus, "Nee, Pue! Nee mpuu ratoposiMiu kadaku!"

Nesanamo i Yesus, "Ane ledo Kutoposi kadamu, iko ledo mpuu anaguruKu."

⁹ Nangepe haitu, nanguli i Simon Petrus, "Ane ivesia, Pue, nee aga kadaku ratoposiMiu tapi paleku bo balenggaku muni."

¹⁰ Tapi nanguli i Yesus ka ia, "Tona naupu nandiu nagasa njumanggaromo, domo paraluu radiu. Aga kadana kana ratoposi pakagasa. Komiu nagasamo, aga saito ledo nagasa." ¹¹ Niuli i Yesus ivesia sabana nisaniNa isema mompobalu Ia ka baliNa. Haitu sampe niuliNa, "Aga saito ledo nagasa."

¹² Naupu i Yesus notoposi kadara, nipasuaNa mpanjili baju ndoeNa, bo nonturo mpanjili Ia pade nipekutanamo ana-anaguruNa, "Nisanimiu batuana anu dako nipoviaKu ka komiu pangane?" ¹³ Niulimiu Yaku Gurumiu bo Tupumiu, bo tesamiu haitu nakana, sabana Yaku mpuu-mpuu Gurumiu bo Tupumiu. ¹⁴ Jadi ane Yaku, Gurumiu bo Tupumiu, nompakaede raraKu notoposi kadamiu, komiu muni masipato mompakaede raramiu motoposi kada roa. ¹⁵ Yaku najadi jonjo ka komiu ala komiu mositulungi, nasimbayu mpo Yaku nantulungi komiu notoposi kadamiu. ¹⁶ Pariaramo tesaKu hitu, batua ledo naogepa pade madikana. Ivesia muni tona nitudu ledo naogepa pade topetudu. ¹⁷ Hitupa nisanimumo pepatuduki hitu. Jadi mabelo mpuu komiu ane raseakamiu pepatuduki hitu.

¹⁸ Anu niuliKu pangane ledo nambela komiu pura-pura. NisaniKu mamimo tona nipelisiKu, bo kana rapakadupa anu nitulisi riera Buku Gasa ivei: 'Tona nangande nosanggani-nggani ante Yaku, iamo najadi baliKu.' ¹⁹ Dopame majadi anu haitu, Kuuli mami ka komiu ala tempo anu haitu majadi ngena, rasanimiu mpuu isema Yaku. ²⁰ Pariaramo tesaKu hitu, isema-semba nantarima tona nituduKu, nitarimana muni Yaku. Bo isema-semba nantarima Yaku, nitarimana muni TuamaKu anu nantudu Yaku."

I Yudas nompalaisi ira

Matius 26:20-25, Markus 14:17-21, Lukas 22:21-23

²¹ Naupu i Yesus notesa pura-pura haitu, nasusa mpuumo raraNa. Bo niuliNa, "Pariaramo tesaKu hitu, naria saito komiu mompobalu Yaku ka baliKu."

²² Naingu mpuumo rara nu ana-anaguruNa nangepe tesaNa haitu sampe ira aga nosikanoto sabana ledo nisanira isema niuliNa. ²³ Saito anaguruNa anu nipo-

† †† rasanimiu mpuu isema Yaku ATAU: raparasayamiu Yaku-mo anu niuli YAKU NARIA. Peinta Pesuvu 3:14.

toveNa † nonturo ri sinjoriNa. ²⁴ Jadi i Simon Petrus nanggaundu roana haitu bo nanguli, "Pekutana nte i Guru bara isema niuliNa haitu."

²⁵ Jadi anaguruNa anu nonturo ri sinjori i Yesus nekutana, "Pue, isema niuliMiu pangane?"

²⁶ Nesana i Yesus, "Tona Kudekeika roti Kutula ri uta, iamo nipatujuKu." †† Naupu haitu nialaName santubi roti bo nitulaNa ri uta pade nidekeiNa ka i Yudas, ana i Simon Iskariot. ²⁷ Niala i Yudaspa roti haitu, kaliu-liu nesuamo Magau nu Seta riera ntaina. Bo nanguli i Yesus ka i Yudas, "Anu mupovia, poviamo masalisa!"

²⁸ Ledo ria saitoa ira sampangande haitu nangisani patuju i Yesus notesa ivehaitu ka i Yudas. ²⁹ Naria sanu nompekiri i Yesus nombatudu i Yudas hau mangali bara nuapa-nuapa rapakera riera posusa haitu, bara mombadekei doi ka tona napakasi, apa i Yudas topomboliaka doira. ³⁰ Jadi naupu i Yudas nangala roti lako nte i Yesus, nalaimo ia. Tempo haitu nabongimo.

Parenta nabaru

³¹ Nalaipa i Yudas, nangulimo i Yesus ka anaguruNa, "Sii-sii rakita ntonamo kaogeKu, Ana nu Manusia. Bo lako ri anu majadi ri karoKu ngena, rakita ntonamo kaoge nu Alatala. ³² Ane rakita ntona kaoge nu Alatala lako ri anu majadi ri karoKu ngena, Alatala mboto mompopakita kaogeKu ka ira, bo domo masae rapopakitaNa mpuu. ³³ Ana-anaKu, domo masae Yaku mosanggani-nggani ante komiu. Raelomiu Yaku ngena, tapi ledo rakavamiu. Haitu niuliKu ka pakeni-pakeni ntoYahudi bara ipia, ivesia muni Kuuli ka komiu: ri umba Kukalau komiu ledo mamala metuntuni.

³⁴ Naria parenta nabaru Kudekei ka komiu ivei: Komiu kana mosimpotove. Yaku nompotove komiu, ivesia muni komiu kana mosimpotove. ³⁵ Ane mosimpotove komiu, rasani ntodeamo komiu mpuu-mpuu ana-anaguruKu."

I Yesus nanguli i Petrus mombasapu Ia ngena

Matius 26:31-35; Markus 14:27-31; Lukas 22:31-34

³⁶ Bo nekutanamo i Petrus, "Pue, hau ri umba Komiu?"

Nesana i Yesus, "Ri umba Kukalau, iko dopa mamala metuntuni. Bara maipiapa pade mutuntuni Yaku."

³⁷ Nesana i Petrus, "Pue, nakuya sampe ledo mamala yaku mantuntuni Komiu sii-sii? Nasadiamo yaku mamate manjaliku Komiu!"

³⁸ Nesana i Yesus, "Mpuu-mpuu iko madota mamate manjaliku Yaku? Pariaramo tesaKu hitu, dopame mototoroko manu ngena, talu-ngganimo iko mombasapu Yaku."

‡ anaguru nipotoveNa, haitumo i Yohanes. †† ala madupa tesa ri Buku Gasa nitulisi ri 13:18 pangane.

I Yesusmo dala hau nte Alatala

14 Nanguli i Yesus ka ana-anaguruNa, "Nee masusa raramiu. Parasayamo Alatala, bo parasaya munimo Yaku. ² Ri banua nTuamaKu naloga ponturo. Yaku hau mompakasadia ponturo ka komiu. Ane ledo ivesia, natantum Kuuli ka komiu. ³ Bo maupu Yaku hau mompakasadia ponturo ka komiu, Yaku kana manjili tumai mombatomunaka komiu ala ri umba Kuponturo, ri sia muni raponturomiu. ⁴ Ponturo Kukalau haitu, nisanimumo dalana."

⁵ Nangulimo i Tomas ka Ia, "Pue, ledo nisani kami hau ri umba rakalauMiu. Jadi berimbamo rasani kami dala hau?"

⁶ Nesana i Yesus, "Yakumo hii dala, Yakumo nompopaisani anu nakana bo Yakumo nombadekei katuva nabelo. Ledo ria saitoa mamala makava ri ngayo nTuamaKu ane ledo ante Yaku. ⁷ Ane nisanimumo mpuu Yaku, rasanimumo muni TuamaKu. Nompamula sii-sii nisanimumo Ia bo nikitamiumo Ia."

⁸ Nanguli i Filipus ka i Yesus, "Pue, popakita ka kami TuamaMiu ala maosa rara kami."

⁹ Nesanamo i Yesus, "Ai, Filipus! Nasaemo Yaku nosanggani-nggani ante komiu. Dopa nisanimu isema Yaku? Isema-sema nanggita Yaku, nikitana munimo TuamaKu. Jadi berimba sampe niulimu ivesia, 'Popakita ka kami TuamaMiu?' ¹⁰ Dopa niparasayamu Yaku nasimbayu nte TuamaKu bo TuamaKu nasimbayu nte Yaku?"

Anu niuliku ka komiu pura-pura, ledo tesaKu mboto tapi tesa lako nte TuamaKu anu nosangu rara nte Yaku. Iamo anu novia pura-pura pokarajaa haitu.

¹¹ Parasayamo tesaKu hitu, Yaku mpuu-mpuu nosangu ante TuamaKu bo TuamaKu muni nosangu ante Yaku. Nau ledo niparasayamiu tesaKu, parasayamo sabana nikitamiumo kabaraka-kabaraka nipoviaKu.

¹² Pariaramo tesaKu hitu, isema-sema nomparasaya Yaku, mamala movia anu nipoviaKu. Bo ledo aga haitu, madeapa vai rapoviana pade anu nipoviaKu, sabana Yaku hau manjili nte TuamaKu. ¹³ Bo nuapa-nuapa raperapimiu sabana komiu topangoseaka Yaku, kana Kupovia ka komiu, ala rakita ntona kaoge nTuamaKu.

¹⁴ Nuapa-nuapa raperapimiu sabana komiu topan-goseaka Yaku, kana Kupovia ka komiu."

I Yesus nojanji mompopanau Nosa Gasa nu Alatala ka topomparasaya

¹⁵ "Ane komiu nompotove Yaku, raoseakamiu parenta-parentaKu. ¹⁶ Bo Kuperapi nte TuamaKu ala radekeiNa ka komiu Topetulungi ntanina, anu maroo nte komiu sampe ri kasae-saena. ¹⁷ Topetulungi haitumo Nosa Gasa nu Alatala anu mompopaisani anu nakana ka komiu. Tona ri dunia hitu anu ledo nom-

parasaya, ledo mamala mantarima Ia sabana ledo nikitara Ia bo ledo nosisani ante Ia. Tapi komiu nosisani ante Ia sabana Ia nosanggani-nggani ante komiu sii-sii, bo domo masae Ia monturo riaro ntaimiu. ¹⁸ Ledo Kupalaisi mpo ngana pailu komiu, apa Yaku manjili vai tumai nte komiu. ¹⁹ Damo sampalai rakita ntona Yaku ri dunia hitu. Tapi komiu da rakitamiu Yaku. Bo komiu matuvu mabelo sabana Yaku matuvu mpanjili. ²⁰ Ane makavamo tempo haitu, rasanimumo Yaku nosangu ante TuamaKu bo komiu muni nosangu ante Yaku, bo Yaku nosangu ante komiu.

²¹ Isema-sema mompariara bo mangoseaka parenta-parentaKu, iamo nompotove Yaku. Bo isema-sema nompotove Yaku, ia muni rapotove nTuamaKu, bo Yaku mboto nompotove ia bo mompopaisani karoKu ka ia."

²² Bo nekutana i Yudas (ledo i Yudas Iskariot), "Pue, nuapa sabana Komiu aga mompopaisani karoMiu ka kami, ledo ka pura-pura manusia ri dunia?"

²³ Nesana i Yesus, "Isema-sema nompotove Yaku raoseakana tesaKu. Bo TuamaKu nompotove ia bo Yaku ante TuamaKu makava monturo mosanggani-nggani ante ia. ²⁴ Tapi tona ledo nompotove Yaku, ledo nioseakana tesaKu. Tesa niepemi hitu ledo lako nte Yaku mboto, tapi lako nte TuamaKu anu nantudu Yaku.

²⁵ Pura-pura haitu nitesaKu kamba da nosanggani-nggani kita. ²⁶ Tapi ane Nosa Gasa nu Alatala makava, rapatudukiNa ka komiu mpengaya-ngaya bo rapopatorana ka komiu pura-pura anu nitesaKu ka komiu. Apa Iamo Topetulungi anu ratudu nTuamaKu manjambei Yaku.

²⁷ Katinonto rara Kudekei ka komiu, haitumo katinonto nu raraKu mboto. Bo anu Kudekei ka komiu haitu ledo nasimbayu nte anu nidekei nu dunia nadaa ka komiu. Jadi nee masusa raramiu, nee maeka.

²⁸ Toramo anu niuliku pangane, Yaku malai, tapi manjili vai tumai nte komiu. Ane mpuu-mpuu komiu nompotove Yaku, madamba mpuu raramiu sabana Yaku hau manjili nte TuamaKu, anu naogepa pade Yaku.

²⁹ Sii-sii niuliku mamimo ka komiu dopame majadi anu nitesaKu pangane, ala tempo madupa ngena, rarasayamiumo Yaku.

³⁰ Domo madea tesa Kuuli ka komiu, sabana gan-tanamo Magau nu Seta makava. Ia nombakuasai tona nadaa ri dunia hitu tapi ia ledo nakuasa momparenta Yaku. ³¹ Naupa ivesia, pepandasa anu majadi ri karoKu ngena, kana majadi ala rasani nu manusia ri dunia Yaku nompotove TuamaKu bo novia pura-pura anu niparentaNa ka Yaku.

Kaimo, malai kita."

I Yesus valaa anggur nakana

15 I Yesus nompapola tesaNa, “Yakumo hii valaa anggur nakana, bo TuamaKu tupu ntalua anggur haitu. ² Tinggu-tingguKu anu ledo novua niko-to bo nitedakana. Tapi tinggu-tinggu novua nipegasana pakabelo-belo ala mantambai kadea vuanana. ³ Komiumu tu nagasamo sabana nipariaramiumo pepatuduki nitesaku ka komiumu.

⁴ Komiumu kana maroo mosangu rara nte Yaku bo Yaku muni maroo mosangu rara nte komiumu. Tinggu-tinggu nogaa lako ri batana ledo movua. Aga tinggu-tinggu anu nosintaka nte batana haitu movua. Ivesia muni komiumu ledo movua ane komiumu ledo maroo mosangu rara nte Yaku.

⁵ Yakumo hii valaa anggur bo komiumu tu tinggu-tingguna. Ane komiumu maroo mosangu rara nte Yaku bo Yaku maroo mosangu rara ante komiumu, komiumu movua madea. Tapi ane komiumu mogaa lako nte Yaku, ledo rapakulemiu movia nuapa-nuapa. ⁶ Tona ledo naroo nosangu rara nte Yaku kana ratedeaka nasimbayumu mpo tinggu nu valaa ratedeaka sampe mangau. Tinggu-tinggu nangau haitu aga rapasiromu ratedeaka ri mata nu apu bo rapalabu. ⁷ Ane komiumu maroo mosangu rara nte Yaku bo tesaKu maroo riarantaimiumu, perapimomu nuapa-nuapa nipokonomiumu bo radekei ka komiumu. ⁸ Ane komiumu movua madea, natantu komiumu mpuu-mpuu anaguruKu. Bo poviamiumu haitu mompopakita kaoge nTuamaKu ka tona.

⁹ Yaku nompotove komiumu nasimbayumu mpo TuamaKu nompotove Yaku. Komiumu kana maroo mosangu rara nte Yaku ala rarasaimiumu pepotoveKu. ¹⁰ Ane raoseakamiumu parenta-parentaku, komiumu bate-batena mombarasai pepotoveKu, nasimbayumu mpo Yaku muni nangoseaka parenta nTuamaKu bo bate-batena mombarasai pepotoveNa.

¹¹ Pura-pura hitu niuliku ka komiumu ala kadamba nu raraku mamala muni rarasaimiumu bo kadamba nu raramiumu haitu ledo ria makura.

¹² Ivei parentaku: posimpotovemo, masimbayumu mpo Yaku nompotove komiumu. ¹³ Ane saito tona mamate manjambei vega-vegana, ia mpuu-mpuu nompotove vegana haitu. Ledo ria pepotove naogepa pade haitu.

¹⁴ Bo komiumu mpuu-mpuu vegaKu ane komiumu mangoseaka parenta-parenta nidekeiku ka komiumu.

¹⁵ Komiumu domo Kuuli batua, sabana batua ledo nisani-na nia nu madikana. Tapi hitupa komiumu Kuuli vegaKu sabana pura-pura anu niepeku lako nte TuamaKu, nitesaku muni ka komiumu. ¹⁶ Ledo komiumu nompelisi Yaku, tapi Yaku nompelisi komiumu bo nombatudu komiumu hau movua madea, haitumu vua anu ledo maupu-upu.

† vuana: batua, pokainggu ntona nikenika nu Nosa Gasa nirapaka vua (peinta Galatia 5:22-23), atau manusia nikeninompasaya i Yesus namala muni nirapaka vua.

Ane komiumu movua ivesia, nuapa-nuapa raperapimiumu lako nte TuamaKu sabana komiumu topangoseaka Yaku, kana radekeiNa ka komiumu. ¹⁷ Jadi siimo parentaku ka komiumu: posimpotovemo.”

Topomparasaya i Yesus rapovuu mata ntona ledo nompasaya

¹⁸ I Yesus nompapola tesaNa ka ana-anaguruNa ivei: “Tona nadaa ri dunia, nompovuu mata komiumu, tapi toramo, Yaku nokolupa nipovuu matara. ¹⁹ Ane rapana komiumu nosangu pekiri ante tona ledo nompasaya Yaku, natantumomu rapotovera komiumu sabana komiumu roara mboto. Tapi komiumu ledo nosangu pekiri ante ira, sabana Yaku nompelisi komiumu bo nopatani komiumu ka Yaku. Jadi haitu sampe komiumu nipovuu matara.

²⁰ Toramo tesa niulikumu ka komiumu: batua ledo naogepa pade madikana. Ane Yaku nipandasara, natantumomu komiumu muni rapandasara. Ane nioseakara pepatudukiKu, natantumomu raoseakara muni pepatudukimiumu. ²¹ Pura-pura haitu rapoviara ka komiumu sabana komiumu najadi topangoseaka Yaku, apa ledo nisanira mpuu Alatala anu nantudu Yaku. ²² Ane rapana Yaku ledo nakava bo ledo nompatuduki ka ira, tantu ira ledo rapakasala sabana dosara. Tapi nakavamo Yaku bo nipatudukimomu ira. Jadi domo mamala raulira ledo nisanira pokainggura nadosa. ²³ Isema-sema navuu matana nanggita Yaku, navuu muni matana nanggita TuamaKu. ²⁴ Ane rapana ledo nipoviaKu kabaraka-kabaraka ri ngayora anu ledo sanggani nipovia ntona ntanina, tantu ira ledo rapakasala sabana dosara. Tapi nikitaramo kabaraka-kabaraka haitu bo ira batena navuu matara nanggita Yaku bo TuamaKu muni. *Jadi ira kana rapakasala sabana dosara haitu.* ²⁵ Haitu najadi ala madupa tesa nitulisi riarabuku Gasa ivei: ‘Ira navuu matara nanggita Yaku nau ledo naria sabana.’ ††

²⁶ Kutudu Topetulungi lako nte TuamaKu tumai nte komiumu, haitumu Nosa Gasa nu Alatala anu mompopaisani anu nakana. Tempo makava Ia, Iamo mompopaisani Yaku ka komiumu. ²⁷ Bo komiumu muni mompopaisani Yaku ka todea sabana komiumu nosangganingganimu ante Yaku lako ri pamula panggaviaKu ri dunia hitu.”

16 I Yesus nompapola tesaNa ka ana-anaguruNa ivei: “Pura-pura haitu niuliku ka komiumu ala komiumu ledo moura momparasaya. ² Komiumu domo radekei metupu ri banua petupu ntoYahudi. Bo makava tempona topompatesi komiumu rasarumakara poviara haitu mompakadamba rara nu Alatala. ³ Rapoviara ivesia ka komiumu sabana ira ledo nosisani ante TuamaKu bo ledo muni nosisani nte Yaku. ⁴ Nitesaku mami ka komiumu ka-

mateKu, ala tempo haitu majadi ngena, ratoramiu nar-iamo nitesaKu ka komiu.”

Pokarajaa Nosa Gasa nu Alatala

“Tesa hitu ledo niuliKu ka komiu lako ri pamulana sabana Yaku da nosanggani-nggani ante komiu. ⁵ Tapi sii-sii Yaku hau nte TuamaKu anu nantudu Yaku, bo ledoria saitoa komiu nompekutana hau ri umba Kukalau. ⁶ Nasusa mpuu raramiu sabana niuliKu pangane Yaku malai. ⁷ Tapi tesaKu hitu nakana: nabelopa ka komiu ane malai Yaku. Apa ane ledo hau Yaku, Topetulungi ledo makava tumai nte komiu. Tapi ane hau Yaku, Kutudu Ia tumai nte komiu.

⁸ Ane makava Topetulungi, Ia mompakalanto batua-na dosa ka manusia ri dunia. Bo rapakalantoNa muni batua-na anu nanao, bo batua-na pehuku nu Alatala. ⁹ RapakalantoNa manusia nadosa sabana ledo ni-parasayara Yaku. ¹⁰ RapakalantoNa muni Yaku nanao, sabana sii-sii Yaku hau nte TuamaKu bo domo rapein-tamiau. ¹¹ Bo rapakalantoNa muni Alatala mpuu-mpuu mombahuku manusia, apa nihukuNamo Magau nu Seta anu nombakuasai manusia nadaa ri dunia hitu.

¹² Da nadeapa Kutesa ka komiu tapi dopa rapakulemiu mantarimana sii-sii. ¹³ Tapi ane makavamo Nosa Gasa haitu, Iamo mompopaisani ka komiu purapura anu nakana. Ia ledo motesa nangoseaka dotaNa mboto. Tapi anu niepeNa lako nte TuamaKu, haitumo ratesaNa. Bo ratesaNa ka komiu muni anu majadi ri tempo makava. ¹⁴ RapopaisaniNa kaogeKu ka komiu, sabana anu nitarimaNa lako nte Yaku, haitumo rapopaisaniNa ka komiu. ¹⁵ Pura-pura anu naria nte TuamaKu, anuKu pura. Haitumo sampe niuliKu ka komiu, anu nitarima nu Nosa Gasa lako nte Yaku, haitumo rapopaisaniNa ka komiu.”

Anaguru i Yesus masusa rarara sampalai, tapi maliu haitu madamba mpanjili

¹⁶ I Yesus nompapola tesaNa ka anaguruNa ivei: “Sampalaipa domo rapeintamiau Yaku. Ledo masae kaliuna haitu, rapeintamiau vaimo Yaku.”

¹⁷ Nangepe tesaNa haitu, nosipekutana anaguruNa, “Nuapa ntoto patujuNa nanguli ka kita sampalaipa domo rapeintata Ia, bo ledo masae kaliuna haitu, rapeintata vaimo Ia? Bo nuapa muni patuju ntesaNa nanguli Ia hau nte TuamaNa?” ¹⁸ Nosipekutana njuumo ira, “Nuapa patuju ntesaNa ‘Sampalaipa’? Ledo ntoto nisanita patuju ntesaNa haitu.”

¹⁹ Nisani i Yesus ira madota mompekutana Ia. Jadi niulikaNa ira ivei: “NikitaKu komiu nosipekutana nuapa patuju ntesaKu pangane tempo niuliKu ‘Sampalaipa domo rapeintamiau Yaku bo ledo masae kaliuna haitu, rapeintamiau vaimo Yaku’.” ²⁰ Pariaramo tesaKu hitu, komiu motumangi-mangi mpojea manggita anu maja-

di nte Yaku, tapi baliKu ri dunia hitu madamba-damba. Raramiu masusa tapi kasusa raramiu mabali majadi madamba. ²¹ Ane mombine damo kapoanana, natan-tumo nasusa mpuu rarana sabana nakavamo tempona moana. Tapi ane nesuvumo anana haitu, domo nitorana susa rarana. Nadamba mpuu rarana sabana ngana nesuvu ri dunia. ²² Ivesia muni ante komiu. Sii-sii nasusamo raramiu. Tapi Yaku mosinggava vai nte komiu bo tempo haitu komiu madamba mpanjili. Bo ledo maria saitoa tona mamala mompakalipo kadamba nu raramiu haitu. ²³ Tempo haitu, komiu domo mekutana nuapa-nuapa nte Yaku.

Pariaramo tesaKu. Nuapa-nuapa raperapimiu lako nte TuamaKu sabana komiu nangoseaka Yaku, kana radekeiNa ka komiu. ²⁴ Nau komiu topangoseaka Yaku, sampe sii-sii komiu dopa nomperapi nuapa-nuapa. Jadi perapimo bo radekei ka komiu ala raramiu mpuu-mpuu madamba!”

I Yesus nombadagi kuasa nadaa ri dunia

²⁵ “Tesa niuliKu ka komiu hitu aga nijalili. Tapi makava tempona domo Kujalili ka komiu, tapi Kutovontoomo motesaki TuamaKu ka komiu. ²⁶ Tempo haitu komiu mbotomo merapi nte TuamaKu sabana komiu nangoseaka Yaku. Ledo paraluu Kuperapi nuapa-nuapa lako nte TuamaKu ka komiu. ²⁷ Sabana, TuamaKu mboto nompotove komiu. Ia nompotove komiu sabana komiu nompotove Yaku bo niparasayamiumo Yaku hii nakava lako nte Ia. ²⁸ Yaku nakava lako nte TuamaKu tumai ri dunia hitu. Hitupa Kupalaisi dunia hitu bo manjili hau nte TuamaKu.”

²⁹ Bo nangulimo anaguruNa ka Ia, “Hitupa nitovontooMiumo notesa ka kami, domo aga nijaliliMiu.

³⁰ Nisani kamimo Komiu nangisani mpengaya-ngaya. Ledo paraluu tona nompekutana Komiu sabana nisan-iMiu mamimo pompekutanara. Haitumo sampe ni-parasaya kamimo Komiu mpuu-mpuu nakava lako nte Alatala.”

³¹ Nesanamo i Yesus, “Niparasayamiu mpuumo?”

³² Pariaramo! Kana makava tempona, bo nakavamo tempo haitu, komiu mosimpogaa. Komiu simbo manjili hau ri banuamiau mboto mompalaisi Yaku saitoKu. Tapi Yaku ledo aga saitoKu sabana TuamaKu naria nosanggani-nggani ante Yaku. ³³ Pura-pura tesaKu pangane nitesaKu ka komiu ala matinonto raramiu sabana komiu mosangu rara nte Yaku. Ri dunia hitu komiu rapandasa. Tapi pakaroso raramiu! Apa kuasa nadaa ri dunia hitu nidagiKumo!”

I Yesus nosambayani karoNa mboto

17 Naupu i Yesus notesa ivesia, nitingoanamo langi bo niuliNa ivei:

“Tata, nakavamo tempona! Popaisanimo kuasa bo kaogeKu ka tona ala Yaku, AnaMiu, mamala mompopaisani kuasa bo kaogeMiu. ² NidekeiMiumo kuasa ka Yaku, kuasa moparenta pura-pura manusia ala mamala Kudekei katuvua mabelo sampe ri kasae-saena ka tona nidekeiMiu ka Yaku. ³ Iveimo sampe manusia matuvu mabelo sampe ri kasae-saena: ira mosisani nte Komiu, Alatala aga saito-itoMiu nakana, bo ira mosisani muni ante Yaku, i Yesus Kristus, anu nituduMiu. ⁴ NipopaisaniKu kuasa bo kaogeMiu ri dunia hitu ante nompakaupu pokarajaa niparasayaMiu ka Yaku. ⁵ Tata, hitupa dekeimo kuasa bo kaoge ka Yaku ri situ nte Komiu, haitumo kuasa bo kaoge anu naria nte Yaku tempo Yaku nosanggani-nggani nte Komiu dopame dunia nipajadi.”

I Yesus nosambaya ka anaguruNa

⁶“Tata, nipopaisaniKumo Komiu ka tona nidekeiMiu ka Yaku lako ri dunia hitu. Ira todeaMiu mami, bo ira nidekeiMiu muni ka Yaku. Nioseakaramo tesaMiu ⁷ bo hitupa nisaniramo pura-pura anu naria nte Yaku, nopuna lako nte Komiu. ⁸ Apa nitesaKu ka ira puramo tesa niuliMiu ka Yaku, bo tesa-tesa haitu nitarimara puramo. Tata, nisanira Yaku mpuu-mpuu nakava lako nte Komiu, bo niparasayara Komiu nantudu Yaku.

⁹Yaku mosambaya ka ira. Ledo pura-pura manusia Kuposambayaka tapi aga ira anu nidekeiMiu ka Yaku, sabana ira haitu mpuu-mpuu todeaMiu. ¹⁰ Pura-pura tona anu najadi todeaKu, najadi todeaMiu muni. Bo pura-pura tona anu najadi todeaMiu najadi todeaKu muni. KuasaKu bo kaogeKu nalanto nikita riar ngatuvura.

¹¹ Domo masae Yaku monturo ri dunia hitu. Yaku tou nte Komiu, tapi anaguruKu da monturo ri dunia hitu. O, Tata! Komiu nagasa! Jagaimo ira ante kuasaMiu, haitumo kuasa nidekeiMiu ka Yaku. Jagaimo ira ala ira mosangu rara nasimbayu mpo Yaku nosangu rara nte Komiu. ¹² Tempo Yaku da nosanggani-nggani ante ira, Yakumo nombajagai ira ante kuasaMiu, haitumo kuasa nidekeiMiu ka Yaku. NijagaiKu anaguruKu sampe ledo ria saitoa ira nalipo, aga ia anu masipato rapopogaa lako nte Komiu sampe ri kasae-saena ala madupa anu nitulisi riar Buku Gasa. †

¹³ Sii-sii Yaku tou nte Komiu, Tata. Pura-pura anu niuliKu hitu nitesaKu ka anaguruKu tempo Yaku da naria ri sii ri dunia, ala ira mpuu-mpuu madamba nasimbayu mpo Yaku mpuu-mpuu nadamba. ¹⁴ NipasimbayuKu ka iramo tesaMiu sampe tona riar dunia hitu navuu matara nanggita anaguruKu. Sabana, anaguruKu haitu ledo nosangu pekiri ante ira, nasimbayu mpo Yaku muni ledo nosangu pekiri ante tona haitu. ¹⁵ Ledo Kuperapi Komiu mangala ira lako ri dunia hitu.

† Peinta Yohanes 6:39-40; 18:9; Mazmur 41:10.

Tapi Kuperapi ala Komiu mojagai ira lako ri Magau nu Seta. ††¹⁶ Ira ledo nosangu pekiri ante tona ledo nomparasaya, nasimbayu mpo Yaku muni ledo nosangu pekiri ante tona haitu. ¹⁷ Patudukimo ira ante TesaMiu nakana sampe ira majadi todeaMiu nagasa. TesaMiu haitumo pepatuduki nakana. ¹⁸ NituduKu ira hau nte tona ntanina riar dunia hitu, nasimbayu mpo Yaku nituduMiu tumai ri dunia. ¹⁹ Tata, Kudekei katuvuKu ka Komiu bo novia dotaMiu, ala manggeni belo ka anaguruKu, haitumo ala ira mpuu-mpuu mangoseaka pepatuduki nakana bo majadi todeaMiu nagasa.”

I Yesus nosambayaka pura-pura topomparasaya Ia

²⁰“Ledo aga anaguruKu hitu Kuposambayaka, tapi Kuposambayaka muni pura-pura tona anu majadi topomparasaya Yaku bara maipia sabana raepera tesa-tesa rapatolele nu anaguruKu hitu. ²¹ Tata, Kuperapi ala ira pura-pura mosangu rara nasimbayu mpo Yaku nosangu rara nte Komiu bo Komiu nosangu rara nte Yaku. Kuperapi ala ira muni mosangu rara nte Kita ala pura-pura manusia momparasaya Komiumo anu nantudu Yaku hitu.

²² NidekeiKu ka iramo kaoge nidekeiMiu ka Yaku ala ira mosangu rara nasimbayu mpo Kita muni nosangu rara. ²³ Yaku nosangu rara nte ira bo Komiu nosangu rara nte Yaku ala ira mpuu-mpuu mosangu rara. Ane ira mpuu-mpuu mosangu rara, kana rasani nu manusia Komiu nantudu Yaku bo Komiu nompotove ira, nasimbayu mpo pompotoveMiu Yaku.

²⁴ Tata, anu nipodotaKu ala tona nidekeiMiu ka Yaku haitu mamala mosanggani-nggani nte Yaku ri ponturoKu ala rakitara kuasaKu bo kaogeKu. Kuasa bo kaoge haitu nidekeiMiu ka Yaku, sabana nipotoveMiu Yaku lako ri lamba pamulana dopame dunia nipajadi.

²⁵ O, Tata, Komiu nanoa! Manusia ri dunia hitu ledo nosisani nte Komiu, tapi Yaku nosisani nte Komiu. Bo anaguruKu hitu nisanira Komiu nantudu Yaku.

²⁶ NipopaisaniKumo Komiu ka ira. Bo da Kupopaisani hanupa Komiu ka ira ala Ira mompotove tona ntanina nasimbayu mpo Komiu nompotove Yaku, bo ala Yaku mboto monturo riar ntaira.”

I Yesus nisaka

Matius 26:47-56; Markus 14:43-50; Lukas 22:47-53

18 Naupu i Yesus nosambaya, haumo Ia nosanggani-nggani ante ana-anaguruNa hau ri sambote salu Kidron. Hamai naria sangu pampa. I Yesus ante anaguruNa hau nesua riar pampa haitu. ² I Yudas, topompobalu i Yesus, nisanina muni pampa haitu apa i Yesus nasaro nasiromu nte anaguruNa hamai. ³ Jadi i Yudas nanggeni salunu tantara nu Magau Mbaso Roma bo topojava Banua nu Alatala hau ri pampa

†† Magau nu Seta: basa Yunani, ‘Anu Daa’.

haitu. Ira nitudu nu balengga-balengga ntopanggeni pesomba bo toFarisi. Nikenira poindo, sulo bo pareva posieva.

⁴ Nisani i Yesus puramo anu majadi ri karoNa. Haitu sampe Ia hau nanggaparai tona dea haitu bo nekutana, "Isema nielomiu?"

⁵ Nesanamo ira, "I Yesus toNazaret."

Nesanamo i Yesus, "Yakumo hii i Yesus." I Yudas topompobalu i Yesus neangga ri sia nosanggani-nggani nte tona dea haitu. ⁶ Tempo i Yesus nanguli ka ira, "Yakumo hii i Yesus," noura ntalikumo tona dea haitu bo nadungga singganimo. ⁷ Pade nekutana vaimo i Yesus, "Isema nielomiu?"

Nesanamo ira, "I Yesus toNazaret."

⁸ Bo nangulimo i Yesus, "NiuliKumo ka komiu pangane, Yakumo hii i Yesus. Ane Yaku mpuu nielomiu, palogamo roaKu hitu malai." ⁹ I Yesus notesa ivesia ala mompakadupa tesa niuliNa pangane ivei: "Tata, lako ri pura-pura topeoseaka nidekeiMiu ka Yaku ledo ria saitoa nalipo." †

¹⁰ Nangepe haitu, i Simon Petrus nombabitu gumana bo nisoena batua nu Pakeni nTopanggeni Pesomba anu nosanga i Malkus, napudu talinga ngganana.

¹¹ Tapi nangulimo i Yesus ka i Simon Petrus, "Pasua gumamu! Nisarumakamu Kupoara peparajea nidekei nTuamaku ka Yaku tano?" ††

I Yesus nikenri ri ngayo i Hanas

¹² Naupu haitu tantara-tantara nu Magau Mbaso Roma ante balenggara bo topojava Banua nu Alatala nombasaka i Yesus bo nitipunggura paleNa. ¹³ Nikenira ntani ruru i Yesus hau nte i Hanas ‡, matua langgai i Kayafas. I Kayafas haitu tona najadi Pakeni nTopanggeni Pesomba mpae haitu. ¹⁴ Iamo nanguli ka pakeni-pakeni ntoYahudi bara ipia, "Aginapa saito tona mamate manjambei todea."

I Petrus nombasapu i Yesus

Matius 26:69-70; Markus 14:66-68; Lukas 22:55-57

¹⁵ I Simon Petrus bo saito anaguru ntanina †† nantun-tuni i Yesus. Anaguru saito haitu nosisani ante Pakeni nTopanggeni Pesomba. Jadi ia namala nesua nosanggani-nggani ante i Yesus ri doyata banua nu Pakeni haitu. ¹⁶ Tapi i Petrus nepopea ri savaliku bobaa. Jadi anaguru ntanina anu niposisani nu Pakeni haitu, nanjili hau ri savalikuna. Bo nitesana ka mombine nojaga bobaa ala i Petrus radekei mesua riara doyata haitu. Bo nikenina i Petrus nesua riarana.

† Peinta Yohanes 6:39; 17:12. †† Kupoara peparajea nidekei nTuamaKu? Ri naskah basa Yunani: 'ledo Kuinu panginu nidekei nTuamaKu.' ‡ I Hanas bara ipia najadi Pakeni nTopanggeni Pesomba. Naupa naliumo tempona, ia da nireke tomaoge. Jadi haitumo sampe i Yesus nikenri mantingayo ia ntani ruru dopame rakeni hau mantingayo i Kayafas, Pakeni nTopanggeni Pesomba mpae haitu. †† saito anaguru ntanina: haitumo i Yohanes, topotulisi buku hitu.

¹⁷ Nesuapa i Petrus, nangulimo mombine nojaga bobaa haitu, "Apa ledo iko muni saito anaguruNa tano?"

Nesana i Petrus, "Ledo!"

¹⁸ Bongina haitu naranindi. Jadi bara sako-ndua batua bo topojava Banua nu Alatala nompanaki apu ni-panderura ri doyata haitu. Bo i Petrus muni neangga nosanggani-nggani nanderu ante ira.

Pakeni nTopanggeni Pesomba nomparesa i Yesus

Matius 26:59-66; Markus 14:55-64; Lukas 22:66-71

¹⁹ Tempo haitu nompamulamo i Hanas, Pakeni nTopanggeni Pesomba bara ipia nompekutana i Yesus, "Isema pura anaguruMiu, bo nuapa pura nipatudukiMiu ka ira?"

²⁰ Nesanamo i Yesus, "Yaku nasaro notovontoo notesa ri ngayo ntodea. Yaku nasaro notesa ri banua petupu bo ri Banua nu Alatala, ponturo nikasiromu ntoYahudi. Ledo ria sangganianitabuniakaKu tesaKu.

²¹ Jadi nuapa sabana nipekutanamiu Yaku? Agina todea anu nangepe tesaKu rapekutanamiu. Ira nangisani anu nitesaKu haitu."

²² Tempo i Yesus notesa ivesia, naria saito topojava Banua nu Alatala neangga napara i Yesus. Nisapana lenje i Yesus, bo niulina, "Ledo nabelo Iko nesana ivesia ka Pakeni nTopanggeni Pesomba!"

²³ Nesanamo i Yesus, "Ane nasala tesaKu, uli pakalanto anu nasala. Tapi ane nakana tesaKu hitu, nuapa sabana nisapakamu Yaku?"

²⁴ Naupu haitu, i Hanas nantudu tona manggeni i Yesus nitipunggura haitu hau nte i Kayafas anu najadi Pakeni nTopanggeni Pesomba mpae haitu.

I Petrus nombasapu i Yesus vaimo

Matius 26:71-75; Markus 14:69-72; Lukas 22:58-62

²⁵ Tempo i Simon Petrus da nanderu mpeangga ri sia, naria vaimo tona nekutana nte ia, "Apa ledo iko muni saito anaguru ntona haitu?"

Tapi nesapu vaimo i Petrus, "Ledo!"

²⁶ Naria munimo saito batua nu Pakeni nTopanggeni Pesomba ri sia. Ia nambela raposampesuvu ntona napudu talingana nisoesi i Petrus. Ia muni nekutana, "Ledo iko nikitaku ri pampa nosanggani-nggani ante i Yesus pangane?"

²⁷ Tapi nesapu vaimo i Petrus, "Ledo!" Nesanapa i Petrus, kaliu-liu nototorokomo manu.

I Yesus ri ngayo Gubernur Pilatus

Matius 27:1-2, 11-14; Markus 15:1-5; Lukas 23:1-5

²⁸ Da bobayana ntoto, nikeniramo i Yesus lako ri banua i Kayafas hau ri banua nu Gubernur. Pakeni-pakeni ntoYahudi mboto ledo nesua riara banua Gubernur Pilatus haitu, sabana ira majadi maruto nangoseaka

Atura-atura agamara, bo ledo mamala mangande kande posusa Paskah ngena. †²⁹ Sabana haitu, i Pilatus nesuvu hau ri savalikuna mosinggavaka ira bo nipekutanana, "Nuapa sala ntona hitu sampe nipangadumu?"

³⁰ Nesanamo ira, "Tua, ane ia ledo tona nadaa, nantanu ledo rakeni kami tumai ka komiu."

³¹ Nanguli i Pilatus ka ira, "Alamiumo Ia, bo ratangamiu mbotomo salaNa nangoseaka atura-atura agamamiu!"

Tapi nesana pakeni ntoYahudi haitu, "Ledo ria kuasa kami mombahuku mate tona." ††³² Haitu najadi mompakadupa tesa i Yesus tempo Ia notesa dala kamateNa. ‡

³³ Nangepe haitu, nesua vaimo i Pilatus hau riaru banuana bo nituduna tona manggeni i Yesus ka ia. Bo nipekutanana i Yesus, "Nakana mpuu Iko Magau ntoYahudi?"

³⁴ Nesana i Yesus, "Nisanimiu mboto atau tona nanguli ka komiu?"

³⁵ Nanguli i Pilatus, "Nisaniku tano? Yaku ledo toYahudi! TodeaMu mboto bo balengga-balengga ntopanggeni agama nanggeni Iko tumai nte yaku. Sala nuapa ntoto nipoviaMu?"

³⁶ Nesana i Yesus, "Poparentaku ledo nopuna lako ri dunia hitu. Ane rapana Yaku masimbayu nte magau lako ri dunia hitu, natantumo topangoseaka Yaku kana meeve ala Yaku ledo rasaka bo rakeni ka pakeni-pakeni ntoYahudi. Tapi poparentaku ledo nopuna lako ri dunia hitu."

³⁷ Bo nekutana vaimo i Pilatus, "Ane ivesia tano, magau mpuu Iko?"

Nesanamo i Yesus, "Nakana niulimiu tutu tu, Yaku hii magau. Yaku tumai nipoanaka ri dunia ante patuju mompopaisani anu nakana. Isema-sema nompotove anu nakana, rapariarana tesaKu."

³⁸ Nekutana i Pilatus, "Nuapa anu nakana?"

I Yesus nitangara kana mamate

Matius 27:15-31; Markus 15:6-20; 23:13-25

Naupu haitu nesuvu vaimo i Pilatus lako riaru banuana hau mangulika toYahudi, "Ledo ntoto naria nikavaku sala ntona hitu. ³⁹ Tapi nangoseaka kabi-

† *Gubernur haitu ledo toYahudi. Nangoseaka Atura-atura agama Yahudi, ane toYahudi mesua ri banua ntona ledo toYahudi, ia majadi maruto. Ane maruto ia tempo posusa Paskah, ia ledo mamala mangande kande posusa Paskah. Ia kana mompopea sambulapa pade mamala mangande kande posusa haitu. Peinta Bilangan 9:9-11.*

†† *Ledo ria kuasa kami mombahuku mate tona. Pomarenta Roma ledo nodekei tona nijajara mombahuku mate tona. Aga pomarenta Magau Mbaso Roma naria kuasa mombahuku mate tona. ‡ Ri Yohanes 12:32 I Yesus nanguli Ia raanggataka pakalanga, haitumo, Ia mamate ri kalangana ri kayu salib. I Yesus namate nipaku ri kayu salib nangoseaka atura pomarenta Magau Mbaso Roma. Ia ledo nirempu vatu sampe namate nangoseaka ada ntoYahudi. Peinta Yohanes 12:32-33 bo Matius 20:18-19.*

asamiu, ane Eo Mbaso Paskah kana kukabasaka ka komiu saito tona nitarunggu. Madota komiu kukabasaka ka komiu Magau ntoYahudi hitu?"

⁴⁰ Tapi nongaremo ira ante suara namangga, "Nee! Nemo Ia rakabasaka! Agina i Barabas rakabasaka ka kami!" I Barabas mai topeago.

19 Naupu haitu i Pilatus nantudu tantara-tantara mombacambu i Yesus. ² Naupu nicambura, nipongeikara i Yesus. Nipoviara songgo magau lako ri karui bo nipoposonggora ka i Yesus. Naupu haitu, nipasuakara santonga baju nakamao mpo baju magau. ³ Nikaparaira i Yesus bo nipongei-ngeikara bo niulira, "Tabe, Magau ntoYahudi!" Bo nisaparamo lenje i Yesus.

⁴ Naupu haitu, nesuvu vaimo i Pilatus hau ri savalikuna nanguli ka toYahudi, "Peintamo! Ia kukeni mesuvu tumai nte komiu ala rasanimiu ledo ntoto naria salaNa nikavaku." ⁵ I Yesus nikenira nesuvu hau ri savalikuna nosonggo karui bo nobaju magau nakamao. Nangulimo i Pilatus ka todea haitu, "Peintamo! Hitumo Ia!"

⁶ Nanggita i Yesus, nongare-ngaremo balengga-balengga ntopanggeni agama bo topojava-topojava Banua nu Alatala nanguli, "Pakumo Ia ri kayu salib! Pakumo Ia ri kayu salib!"

Nesana i Pilatus ka ira, "Alamiumo mbotomo Ia, bo pakumi mbotomo Ia ri kayu salib, sabana tona hitu ledo ntoto naria salaNa nikavaku."

⁷ Nesana toYahudi ka ia, "Nangoseaka atura-atura kami, tona hitu masipato rapatesi sabana Ia nompangaku karoNa Ana nu Alatala!"

⁸ Nangepe tesa ntoYahudi haitu, nantambaimo kae-ka rara i Pilatus. ⁹ Jadi nesua mpanjilimo ia riaru banuana bo i Yesus muni nikeni nesua. Nekutanamo i Pilatus, "Tona lako ri umba Iko?" Tapi ledo nesana i Yesus. ¹⁰ Jadi nanguli vaimo i Pilatus ka Ia, "Nakuya ledo nipesanakuMu tesaku? Yaku nakuasa mombakabasa-ka Iko, bo nakuasa muni mombapaku Iko ri kayu salib!"

¹¹ Nesana i Yesus, "Ane Alatala ledo mombadekei kuasa ka komiu, komiu ledo mamala mombakuasai karoKu. Jadi dosa ntona anu nanggeni Yaku tumai nte komiu nambasopa pade dosamiu."

¹² Nangepe tesa i Yesus, nipasimbuku i Pilatusmo mombakabasaka i Yesus. Tapi nongare vaimo toYahudi, "Isema-sema nompangaku karonu magau, iamo bali nu Magau Mbaso Kaisar! Jadi ane komiu mombakabasaka tona tutu, komiu muni bali nu Magau Mbaso Kaisar!"

¹³ Nangepe peparangga ntoYahudi haitu, niken i Pilatusmo i Yesus hau ri savalikuna bo nonturomo ia ri gadera potangara ri ponturo niuli "Jaula Vatu." Ane riaru basa Ibrani, sangana "Gabata." ¹⁴ Tempo haitu nambela eo pompakasadia ka eo penonto, nitasere tongo eo. †† Nangulimo i Pilatus ka toYahudi, "Siimo magaumiu!"

¹⁵ Jadi nongare-ngaremo ira, “Patesimo Ia! Patesimo Ia! Pakumo Ia ri kayu salib!”

Nanguli i Pilatus ka ira, “Hm! Pangulimiu masipato kupaku magaumiu ri kayu salib?”

Nesanamo balengga-balengga ntopanggeni agama, “Aga Magau Mbaso Kaisar magau kami!” ¹⁶ Kaupuna nidagi i Pilatus, bo nidekeina i Yesus ka ira ala Ia rapatesi ri kayu salib.

I Yesus nipaku ri kayu salib

Matius 27:32-44; Markus 15:21-32; Lukas 23:26-43

Nialaramo i Yesus bo niken ntantara-tantara hau ri savalikuna. ¹⁷ Nesuvumo Ia lako ri ngata haitu bo nisimbuakana mboto kayu salibNa hau ri ponturo niuli “Bulu Banga Balengga.” Riara basa Ibrani sangana “Golgota.” ¹⁸ Ri siamo i Yesus nipakura ri kayu salib. Ri tempo haitu naria muni randua tona ntanina nipaku ri kayu salibra, saito ri sablingga ngganaNa, saito ri sablingga njidiNa bo i Yesus ri tatangara.

¹⁹ I Pilatus nantudu tantarana mompataka dopi ri kayu salib i Yesus. Nitulisi ri dopi haitu ivei:

I YESUS TONAZARET, MAGAU NTOYAHUDI.

²⁰ Nadea toYahudi nombaca anu nitulisi ri dopi haitu sabana pompaku i Yesus napara ngata Yerusalem, bo tesa haitu nitulisi riara talu-ngaya basa, haitumo basa Ibrani, basa Latin, bo basa Yunani. ²¹ Nanggita haitu, nangulimo balengga-balengga ntopanggeni agama ka i Pilatus, “Nee ratulisimiu Magau ntoYahudi. Agina ratulisimiu ‘Panguli ntona hitu, iamo Magau ntoYahudi.’”

²² Tapi nesana i Pilatus, “Anu nitulisiku haitu, batena haitumo! Domo rabaliki.”

²³ Naupu tantara-tantara nombapaku i Yesus ri kayu salib, nialara pakeaNa bo nibagi-bagira pata-bagia, simbo sabagia. Baju ndoeNa nialara muni. Baju haitu ledo naria podauna, aga nitanu ivesiamo santonga.

²⁴ Haitu sampe tantara-tantara nanguli, “Nee rabitesita baju ndoe hitu. Agina kita mompenoa lamoro. Isema mambela lamoro, iamo manggava baju hitu.” Haitu najadi ala madupa tesa nitulisi riara Buku Gasa ivei:

“Ira momposibagi pakeaKu, bo baju ndoeKu raposipenoara.”

Mazmur 22:18

Jadi anu nipovia ntantara-tantara nompakadupa anu nitulisi haitu.

²⁵ Tina i Yesus nosanggeni-nggeni ante sampesuvuna mombine neangga napara kayu salib. Naria muni i Maria berei i Klopas bo i Maria Magdalena. ²⁶ I Yesus nanggita tinaNa neangga hamai ri sinjori anaguru nipotoveNa, † niuliNamo ka tinaNa, “Ina, reke anamumo ia.” ²⁷ Bo niuliNa munimo ka anaguruNa haitu,

†† tongo eo: tinti aono mpadondo. Basa Yunani “tinti aono.” Nantuntuni jaa ntoYahudi, “tinti aono” batuana tinti sapulu randua tongo eo. Tapi nangoseaka jaa ntoRoma, “tinti aono” batuana tinti aono mpadondo. † anaguru nipotoveNa, haitumo i Yohanes.

“Reke tinamumo ia.” Jadi nompamula lako ri eo haitu, anaguru pangane nantarima tina i Yesus monturo ri banuana.

I Yesus namate

Matius 27:45-56; Markus 15:33-41; Lukas 23:44-49

²⁸ Nisani i Yesus naupu puramo bagoNa. Jadi notesamo Ia ala madupa tesa nitulisi riara Buku Gasa. NiuliNa, “Nabai tamboloKu.” ††²⁹ Hamai naria sangu tubu niisi uve anggur napoi. Jadi tona nangala sangaya eva lomo bo nitomera riara uve anggur haitu. Naupu sia, nitosura ri vuntu kayu hisop sanggato bo nipopainukara i Yesus. ³⁰ Naupu i Yesus nompetai uve anggur napoi haitu niuliNamo, “Naupu puramo.” Naupu haitu notunggammo Ia bo naponjimo.

Tantara nombatosu usu i Yesus ante tavalala

³¹ Eo haitu eo pompakasadia ka eo penonto, bo eo penonto haitu nambela eo pamulana posusa Paskah ntoYahudi. Nantuntuni ada ntoYahudi ledo mamala karobata ntona nipaku ri kayu salib rapalamba moloe hamai sampe eo penonto, nemopa eo penonto haitu Eo Mbaso. Jadi haitu sampe pakeni-pakeni ntoYahudi nerapi nte i Pilatus ala kada ntona nipaku ri kayu salib haitu raboba pakakoto ala *tona haitu masalisa mamate bo* karobatarata masalisa ratauraka lako ri kayu salib. ³² Jadi haumo tantara-tantara mombaboba pakakoto kada-kada ntona randua anu nipaku ri kayu salib ri sinjori i Yesus. ³³ Tapi tempo ira nakava nte i Yesus, nikitara namatemo. Jadi ledo najadi nibobara pakakoto kada i Yesus. ³⁴ Tapi naria saito tantara nombatosu usu i Yesus ante tavalana. Niosunapa tavalala haitu, kaliu-liu nesuvumo raa ante uve lako ri usu i Yesus.

³⁵ Tona nanggita kajadia haitu, iamo nompopaisani kajadia haitu ka komiu ala komiu muni momparasaya. Nakana tesana haitu bo nisanina mbotomo tesana haitu nakana. ³⁶ Pura-pura haitu najadi ala madupa anu nitulisi riara Buku Gasa ivei: “Ledo ria sangua bukuna rapakakoto.” ††³⁷ Bo naria muni tesa ntanina riara Buku Gasa nanguli, “Ira mantingoa tona nitosura tavalala.” ††

I Yesus nitana

Matius 27:57-61; Markus 15:42-47; Lukas 23:50-56

³⁸ Naupu haitu, i Yusuf toArimatea hau nomperapi karobata i Yesus lako nte i Pilatus. I Yusuf haitu topan-goseaka i Yesus, aga ledo nisani ntona sabana ia naeka ka pakeni ntoYahudi. Perapi i Yusuf haitu nipoioyo i Pilatus. Jadi haumo i Yusuf nantauraka karobata i Yesus lako ri kayu salib. ³⁹ I Yusuf niporoa i Nikode-

†† Mazmur 69:22 † Pesuvu 12:46; Bilangan 9:12 †† Zakharia 12:10

mus, anu nakava nanggita i Yesus tempo bara ipia bongi. I Nikodemus nanggani galo rampa-rampa navangi nosanga mur bo gaharu, nitasere talu-pulu kilo kantamona. ⁴⁰ Bo ira randua nangala karobata i Yesus bo nisompura ante kae gandisi tobelona bo nidikara rampa-rampa navangi pangane, nangoseaka ada ntoYahudi mombasompu tomate.

⁴¹ Napara ri savaliku ngata pompaku i Yesus ri kayu salib, naria salibo pampa. Ri pampa haitu naria sangu dayo nabaru, haitumo vatu nipaa bo dopa sanggani nipake. ⁴² Jadi karobata i Yesus nibolira riara dayo haitu, sabana dayo haitu napara bo domo masae pamulana eo penonto.

I Yesus natuvu mpanjili

Matius 28:1-10; Markus 16:1-8; Lukas 24:1-12

20 Ri eo Aka mpadondo mpisina da naruyo, i Maria Magdalena hau ri dayo i Yesusmo. Nakava ri dayo, nikitana vatu nipotutui dayo haitu nateduliakamo lako ri vamba nu dayo. ² Jadi nangovamo ia hau nte i Simon Petrus bo anaguru nipotove i Yesus †, bo niulina, "Niala ntonamo karobata i Yesus lako riara nu dayo, bo ledonisani kami bara ri umba nipombolira!"

³ Nangepe haitu, nalaimo i Petrus bo anaguru ntanina haitu hau ri dayo. ⁴ Nangovamo ira randua, tapi anaguru ntanina haitu nagasipa pade i Petrus. Jadi ia nokolu nakava ri dayo. ⁵ Nakava ri dayo, notunggamo ia nompeinta riara dayo. Nikitana kae gandisi niposompu i Yesus hamai. Tapi ia ledonesua riara dayo haitu. ⁶ Pade nakavamo i Simon Petrus ri purina. Ia kaliu-liu nesua riara dayo haitu. Nikitana kae gandisi niposompu i Yesus hamai. ⁷ Bo nikitana muni kae nipompou balengga i Yesus. Tapi kae haitu ledonipasanggani ante kae gandisi, aga nitika pakabelo niboli santanina. ⁸ Pade nesua munimo anaguru ntanina anu nokolu nakava ri dayo pangane. Nikitanapa kae haitu, niparasayana munimo i Yesus natuvu mpanjili. ⁹ Sampe eo haitu dopa muni nisanira patuju ntesa nitulisi riara Buku Gasa nggaulu anu nanguli i Yesus kana matuvu mpanjili lako ri kamateNa.

I Yesus nompopakita karoNa ka i Maria Magdalena

Matius 28:9-10; Markus 16:9-11

¹⁰ Naupu haitu nanjilimo ira randua hau ri banuara. ¹¹ Tapi i Maria Magdalena da neangga notumangimangi ri savaliku nu dayo haitu. Ia notumangi bo notunggamo nompeintaka riara dayo. ¹² Ri sia nikitana randua malaeka nobaju nabula mpuu nonturo ri bela pomboli karobata i Yesus. Saito nonturo ri bela nu balenggaNa bo saito ri bela nu kadaNa. ¹³ Nektanamomalaekamalaekahaitu, "Ina, nakuya komiunotumangimangi?"

† anaguru nipotove i Yesus, haitumo i Yohanes.

Nesana i Maria, "Tupuku niala ntonamo lako ri sii bo ledonisaniku ri umba nipombolira."

¹⁴ Naupu haitu, neili ia bo nikitana i Yesus neangga ri sia, tapi ledonisanina Iamo mai i Yesus. ¹⁵ Nektanamomalaekamalaekahaitu, "Ina, nakuya iko notumangi? Isema nielomu?"

Nisarumaka i Maria bara topokarajaa ri pampa haitu. Jadi nesanamo ia, "Ane komiunangalakarobataNa lako ri sii, ulimo ka yaku bara ri umba nipombolimiuala kusani bo hau kuala Ia."

¹⁶ Nanguli i Yesus ka ia, "He, Maria."

Nangepe haitu, neili i Maria bo nanguli riara basai Ibrani, "Rabuni!" (Batuana, "Guru.")

¹⁷ Nanguli i Yesus ka ia, "Nee rakabe Yaku, apa Yaku dopa neore hau nte TuamaKu. Tapi koimo hau nte sampesuvu-sampesuvuku bo uli ka ira ivei: 'Yaku hau nte TuamaKu bo Tuamamiu, haitumo Alatala nisombaku bo nisombamiu.'"

¹⁸ Jadi hau mpuumo i Maria Magdalena nte ana-anaguru i Yesus bo niulina, "Nikitakumo i Pue!" Bo nitesana muni ka ira pura-pura anu nitesa i Yesus ka ia.

I Yesus nompopakita karoNa ka ana-anaguruNa

Matius 28:16-20; Markus 16:14-18; Lukas 24:36-49

¹⁹ Ri eo Aka bongina, ana-anaguru i Yesus nasiromu ri sangu banua. Vamba nu banua haitu nigunji sabana ira naeka ka pakeni ntoYahudi. Sampesanika, neongamo i Yesus neangga ri tatangara, bo nanguli, "Kuperapi Alatala mompakatinonto raramiu!" ²⁰ Naupu i Yesus nombatabe ira ivesia, nipopakitaNamo paleNa bo usuNa ka ira. Nadamba mpuumo rarara nanggita i Yesus. ²¹ Nanguli vaimo i Yesus, "Kuperapi Alatala mompakatinonto raramiu! Yaku mombasuro komiu, nasimbayu mpo TuamaKu nombasuro Yaku." ²² Naupu haitu nitavusiNamo ira ante nosaNa bo nanguli, "Tari-mamo Nosa Gasa nu Alatala. ²³ Ane raampungimiu dosa ntona, dosara raampungini nu Alatala muni, bo ane ledonirampungimiu dosa ntona, dosara ledonirampungini nu Alatala."

I Yesus nompopakita karoNa ka i Tomas

²⁴ I Tomas, saito lako ri sapulu randua anaguru i Yesus, niuli muni "Ngana Rapi". Ia ledonaria nosanggani-nggani ante roa-roana tempo i Yesus nakava nompopakita karoNa ka ira. ²⁵ Jadi nanguli ana-anaguruNa ntanina ka i Tomas, "Nikita kamimo i Pue!"

Tapi nanguli i Tomas, "Ane dopa kukita valea nu paku ri paleNa bo kudika koya-mpaleku ri bela nu paku, bo ane dopa muni kudika paleku ri valea ntavala ri usuNa, dopa kuparasaya."

²⁶ Naliu valu-mbongi, nasiromu vaimo ana-anaguru i Yesus riara nu banua haitu, bo i Tomas naria muni

nosanggani-nggani ante roana ri sia. Vamba nigungji puramo tapi sampesanika, neongamo i Yesus neangga ri tatangara, bo nanguli, “Kuperapi Alatala mompakatinonto raramiu!”²⁷ Naupu haitu, niuliNa ka i Tomas, “Peintamo paleKu hitu. Dikamo koya-mpalemu ri sii. Bo dikamo palemu ri valea ntavala ri usuKu hitu. Tumo mabata-bata raramu, tapi parasayamo!”

²⁸ Nanguli i Tomas ka i Yesus, “Tupuku! Alatala nisombaku!”

²⁹ Nanguli i Yesus ka i Tomas, “Iko nomparasaya sabana nikitamu Yaku. Tapi nabelopa tona nomparasaya nau ledo nikitana Yaku.”

Patuju nu buku hitu

³⁰ Da nadeapa tanda-tanda nipokumaaka ntanina nipovia i Yesus tempo Ia da naria nosanggani-nggani ante ana-anaguruNa anu ledo nitulisi riaru buku hitu.

³¹ Tapi anu nitulisi riaru buku hitu, patujuna ala manggeni komiu momparasaya i Yesus mpuu-mpuu Magau Topepakasalama, Ana nu Alatala. Bo patujuna muni ala komiu mamala manggava katuvua mabelo sampe ri kasae-saena sabana niparasayamiu Ia.

I Yesus nompopakita karoNa ka anaguruNa papitu

21 Naupu haitu, i Yesus nompopakita karoNa sangganipa ka anaguruNa ri bivi Rano Galilea. † Iweimo tesana. ² Bara sako-ndua anaguru i Yesus nasiromu ri sia, haitumo i Simon Petrus, i Tomas anu nidaa “Ngana Rapi”, i Natanael lako ri ngata Kana ri bagia Galilea, bo randua ana i Zebedeus, bo randua anaguruNa ntanina. ³ Nanguli i Simon Petrus ka roaroana, “Hau mompemala bau ri rano yaku.”

Nesana roana, “Hau muni kami.” Jadi hau ira nosanggani-nggani nesavi sakaya. Nojala baumo ira njambongi ntua tapi ledo ntoto ria bau namala nialara.

⁴ Nebonda eo, neangamo i Yesus ri bivi rano, tapi ledo nisani nu anaguruNa Ia haitu i Yesus. ⁵ I Yesus nompongare anaguruNa riaru sakaya, “Berimbamo, le? Naria bau nikavamiu?”

Nesana ira, “Ledo ntoto naria.”

⁶ Nanguli i Yesus ka ira, “Tendeakamo jalamiu ri sabingga nggana nu sakayamiu. Rakavamiu ngena bau.” Jadi nitendeakara mpuumo jala ri sabingga nggana sakayara. Ledo nipakulera nombasoreaka jala haitu apa nadea mpuu bau nesua rajalara.

⁷ Anaguru anu nipotove i Yesus †† nanguli ka i Petrus, “I Pue, tano!” Niepe i Petrus tesa haitu, nipasuana mpanjili bajuna, sabana ia ledo nobaju pangane. Bo nekavantumo ia hau riaru rano norabu hau ri kabatana. ⁸ Ana-anaguru i Yesus ntanina haitu netuntuni nte sakaya hau ri kabatana bo nombataja jala naponu

ante bau, sabana domo nakavao lako ri kabatana, nitasere saatu metere kakavaona. ⁹ Tempo ira nanau lako ri sakaya, nikitara naria ruti nu apu da narega ri sia, bo ri bavo nu ruti haitu naria bau bo naria muni roti.

¹⁰ Nanguli i Yesus ka ira, “Keni tumai bara sako-mbaa bau nipemalamiu tutu.” ¹¹ Jadi i Simon Petrus nesavi riaru sakaya bo nitajana jala haitu sampe ri kabatana. Jala haitu naponu ante bau mbaso, kadeana pura-pura saatu limapulu bo talu-mbaa. Tapi naupa ivesia kadeana, ledo nabite jala haitu.

¹² Bo niuli i Yesus vaimo ka anaguruNa, “Kamaimo kita mangande.” Ledo ntoto naria tona nabia nekutana nte i Yesus, “Isema Komiu?” Sabana nisanira puramo Ia haitu i Pue. ¹³ Hau i Yesus nangala roti bo nibagiNa ka ira. Bo ivesia muni nipoviaNa ante bau. ¹⁴ Haitu katalu-ngganina i Yesus nompopakita karoNa ka ana-anaguruNa naliu Ia natuvu mpanjili lako ri kamateNa.

I Yesus notesa ka i Petrus

¹⁵ Naupu ira nangande, i Yesus nompekutana i Simon Petrus, “Simon, ana i Yohanes, nambasopa tove mu ka Yaku pade tove nu roa-roamu haitu?”

Nesana i Petrus, “Iyo, nisaniMiu mboto, Pue, nipotoveku Komiu.”

Nanguli Yesus ka ia, “Ane ivesia, piaramo ana-ana bimbaKu.” ‡

¹⁶ Bo nekutana i Yesus karongganina, “Simon, ana i Yohanes, nipotovemu mpuu Yaku?”

Nesana i Petrus, “Iyo, nisaniMiu mboto, Pue, nipotoveku Komiu.”

Nanguli i Yesus, “Ane ivesia, poevumo bimba-bimbaKu.”

¹⁷ Bo i Yesus nekutana vai katalu-ngganina, “Simon, ana i Yohanes, nipotovemu mpuumo Yaku?”

Nangepe haitu, nasusa mpuumo rara i Petrus, sabana talu-ngganimo i Yesus nompekutana ia. Jadi nesana i Petrus, “Pue, nisaniMiu mpengaya-ngaya. Nisanimiu nipotoveku Komiu.”

Nanguli i Yesus, “Ane ivesia, piaramo bimba-bimbaKu. ¹⁸ Pariaramo tesaKu hitu, tempo iko da namuda iko mboto nompou kopemu bo hau ri umba-umba nipodotamu. Tapi ane matuamo iko, iko kana mombadekei palemu ratipunggu ntona ntanina, bo iko rakeni ntona hau ri ponturo anu ledo nipokonomu.”

††¹⁹ Ante jalili haitu i Yesus nompopaisani dala nggamate i Petrus bara maipiapa, anu mompopakita kaoge nu Alatala. Naupu haitu nangulimo i Yesus ka i Petrus, “Nee menonto mangoseaka Yaku!”

† Naskah basa Yunani: ‘Rano Tiberias’, nasimbayu ante Rano Galilea. †† anaguru nipotove i Yesus, haitumo i Yohanes.

‡ bimbaKu: haitumo topomparasaya i Yesus. †† Nantuntuni sajarana, i Petrus namate mpasuli nipaku ri kayu salib.

I Yesus ante i Yohanes, anaguru nipotoveNa

²⁰ Naupu haitu neilimo i Petrus bo nikanotona anaguru anu nipotove i Yesus. † Anaguru haitumo anu nonturo ri sinjori i Yesus tempo ira nangande bongina, anu nekutana, "Isema mompobalu Komiu, Pue?" ²¹ Jadi nekutnamo i Petrus, "Pue, nuapa majadi ante roaku moitu?"

²² Nesana i Yesus, "Ane rapana Yaku madota ia matuvu sampe Yaku makava mpanjili ri dunia hitu, haitu ledodo paraluu musani. Tapi iko, nee menonto mangosea-ka Yaku!"

²³ Lako rahaitu natolelemo kareba ka topomparasaya i Yesus nanguli anaguru nipotoveNa haitu ledodamate. Tapi ledodo ivesia tesa i Yesus. Ivei niuliNa: "Ane ra-

† *anaguru nipotove i Yesus, haitumo i Yohanes.*

pana Yaku madota ia matuvu sampe Yaku makava mpanjili ri dunia hitu, haitu ledodo paraluu musani."

²⁴ I Yohanes hii anaguru nitesa ri bavona, iamo nanggita bo notesaki kajadia haitu. Bo ia muni notulisi kajadia haitu riara buku hitu. Bo nisanita anu nitesana haitu mpuu-mpuu nakana.

Tesa kaupuna

²⁵ Da nadeapa anu ntanina nipovia i Yesus. Ane rapana ratulisi pura kajadia haitu, nipekiriku dunia hitu ledodo masuka rapomboli pura-pura buku ratulisi.

19-May-2009@12:42, Backup Descrip-

tion=19-May-2009@09:53, snave -

26-May-2009@11:04, Backup Descrip-

tion=26-May-2009@11:03, B Altork - ❖❖❖

Suro-Suro

Vamba nu Tesa

Tesa hitu sunju nu buku . Patuju i Lukas notulisi buku hitu ala mombatentei berimba topangoseaka i Yesus nompatolele Kareba Belo ante kuasa Nosa Gasa. Nipatolelera Kareba Belo ri ngata Yerusalem, ri njumangu bagia Yudea bo Samaria, sampe ri umba-umba ri dunia (Suro-suro 1:8).

I Lukas tona lako ri ngata Antiokhia ri bagia Samaria. Ia mboto nantuntuni i Paulus bara sakuya ngganina riaru polipana. Sia sampe naria bara sako-nggani nitulisi tesa "kami". Ia mboto naria nosanggani nte i Paulus ri kajadia-kajadia nitulisina ri ayat-ayat haitu: 16:10-17; 20:5-21:18; 27:1-28:16.

Riara buku hitu pokarajaa Nosa Gasa nu Alatala nitentei nompamula tempo Ia nakava nombakuasai topom-parasaya i Yesus ri ngata Yerusalem ri Eo Pentakosta. Pura-pura kajadia nitulisi riaru buku hitu nompopaisani ka kita Nosa Gasa nu Alatala bate-batena nanggeniaka topangoseaka i Yesus bo nompakaroso pomparasayara. Tesa SURO-SURO hitu nibagi tatalu bagia: 1) Pompamulana Kareba Belo nipatolele ri ngata Yerusalem naliu i Yesus neore hau ri suruga. 2) Kareba Belo nipatolele ri ngata-ngata ntanina ri bagia Yudea bo Samaria. 3) Kareba Belo nipatolele ri ngata-ngata mbaso ri sinjori Tasi Tatanga sampe ri ngata Roma anu niponturo Magau Mbaso.

Isi nu Buku

Pompamulana agama Kristen (1:1-26)

Parenta kaupuna bo janji i Pue Yesus (1:1-11)

Sambei i Yudas (1:12-26)

Anu nipovia nu suro-suro ri ngata Yerusalem (2:1-8:3)

Anu nipovia nu suro-suro ri bagia Yudea bo Samaria (8:4-12:25)

Anu nipovia i Paulus (13:1-28:31)

Polipa paratama nompatolele Kareba Belo (13:1-14:28)

Polibu ri ngata Yerusalem (15:1-35)

Polipa karongganina nompatolele Kareba Belo (15:36-18:23)

Polipa katalu-ngganina nompatolele Kareba Belo (18:24-21:16)

Povia i Paulus ri ngata Yerusalem bo Kaisarea sampe nakava ri ngata Roma (21:17-28:31)

1 Teopilus nibilaku:

Riara bukuku paratama, nitulisiku pura-pura pepatuduki i Pue Yesus bo pura-pura anu nipoviaNa lako ri pantepuuna ²³ sampe Ia neore hau ri suruga. Naliu Ia namate bo natuvu mpanjili, Ia nasaro nompopakita karoNa ka suro-suroNa nipelisiNa bara ipia, ala rasanira Ia mpuu-mpuu natuvu mpanjili. Riara tempo patapulu bongina nikitara mpuumo Ia, bo Ia nombatesa Poparenta nu Alatala ka ira. Dopame Ia hau ri suruga, nidekeiNa parenta-parenta ka suro-suroNa ante kuasa Nosa Gasa. ⁴ Naria saeo i Yesus nasiromu nte ira, niulikaNa ira, "Neepa ruru malai lako ri ngata Yerusalem. Popeamo sampe TuamaKu Alatala mompopanau Nosa Gasa nipejanjikaNa, evamo niu-liKu muni ka komiu bara ipia. ⁵ Toramo! I Yohanes nombadiu tona ante uve, tandana ira najea lako ri dosara. Tapi bara sako-eopa komiu radiu ante Nosa Gasamo. [†]"

I Yesus neore hau ri suruga

⁶ Tempo suro-suro i Yesus nasiromu nosanggani nte Ia, nipekutanara, "Pue, nakavamo tempona rak-abasakaMiu kita toYahudi lako ri balita ala kita mamala momparenta ngatata mboto?"

⁷ Nesana i Yesus, "Aga TuamaKu nakuasa mom-pakatantu eona bo jaana. Ledo paraluu rasanimiu. ⁸ Tapi komiu manggava kuasa ane Nosa Gasa nu Alatala manau nte komiu. Bo komiu mompatolele karebaKu ka tona ri ngata Yerusalem, ri bagia Yudea bo Samaria, sampe ri njumangu dunia." ⁹ Naupu i Yesus nanguli ivehaitu, neoremo Ia lako ri ngayora hau ri suruga. Ira nantingoa nangganoto Ia sampe nalipo lako ri panggitaru, sabana kulimu nombabungu Ia.

[†] radiu ante Nosa Gasamo komiu: batuana, Nosa Gasa mom-bakuasai komiu, bo monturo riaru ntaimiu.

¹⁰ Tempo ira da nantingoa langi nangganoto peore i Yesus, sampesanika neongamo randua malaeka nopakea mputi neangga ri sinjorira. ¹¹ Nanguli malae-ka haitu, "Heh, toGalilea! Nakuya komiu aga neangga ri sii, nantingoa langi? I Yesus anu nikitamiu pangane neore rou ri surugamo. Ivesia muni Ia manjili lako ri suruga tumai ri dunia, nasimbayu mpo nikitamiu pangane."

I Matias nipelisi manjambei i Yudas

¹² Naupu haitu, suro-suro i Yesus notinggulimo lako ri Bulu Zaitun bo hau ri ngata Yerusalem. Bulu haitu nitasere sangu kilo kakavaona lako ri Yerusalem.

¹³ Nakava ri Yerusalem, hau ira ri banua ponturora bo nompene ri tombi kalangana. Sanga nu suro-suro haitu iamo: i Petrus, i Yohanes, i Yakobus, i Andreas, i Filipus, i Tomas, i Bartolomeus, i Matius, i Yakobus ana Alfeus, i Simon Zelot topangeva pomarenta, bo i Yudas ana Yakobus. ¹⁴ Ira nasaro nasiromu nosangu rara nosambaya. I Maria tina Yesus, ante bara sako-ndua mombine ntanina, bo sampesuvu-sampesuvu i Yesus nasiromu muni nosambaya nosanggani-nggani ante ira.

¹⁵ Naria saeo, nitasere saatu ropulu kadeara nasiromu. Neanggamo i Petrus ri tatanga nu sampesuvu sampomparasaya bo nanguli, ¹⁶ "Sampesuvu pura-pura. Anu nitulisi riaru Buku Gasa nombatesa i Yudas kana madupa. Tempo nggaulu Magau Daud nom-pasimbayu tesa nu Nosa Gasa nanguli i Yudas manggeni tona mosaka i Yesus. ¹⁷ I Yudas haitu roata, sabana i Yesus mboto nompelisi ia majadi suroNa nasimbayu mpo kita." ¹⁸ (I Yudas haitu nangali salimpu tana ante doi nikavana tempo ia nompobalu i Yesus. Ri tana haitu ia nanavu bo namate. Taina nasemparaka sampe isi rarana nesuvu ri savalikuna. ¹⁹ Pura-pura tona nonturo ri ngata Yerusalem nangepe kajadia haitu. Sia sampe tana haitu nipoposangara "Akel-dama." Batuana riaru basara mboto "Tana Nikabubu nu Raa".)

²⁰ Nanguli vaimo i Petrus, "Riaru Buku Mazmur naria tesa nombaboto i Yudas ivei:

'Banua ponturora majadi sou boa. Domo maria tona monturo riarana.'

Mazmur 69:26

Bo naria muni anu nitulisi ivei:

'Aginamo pokarajaana raala ntona ntanina.' "

Mazmur 109:8

²¹⁻²² Bo i Petrus nompapola tesana ivei: "Sampesuvu-sampesuvu, haitumo sampe kita kana mompelisi saito tona lako nte kita mboto, ala ia mosanggani-nggani nte kita mompatolele kareba i Pue Yesus natuvu mpanjili lako ri kamateNa. Tona rapelisisita haitu kana lako ri kita samporoa anu nangoseaka i Pue Yesus ri

umba-umba nikalauNa bara ipia, lako ri tempo i Yohanes nompamula nombadiu tona, sampe i Yesus neore hau ri suruga."

²³ Jadi tona nasiromu ri sia nompelisi randua roara manjambei i Yudas, haitumo i Yusuf Barsabas (anu nidae i Yustus) bo i Matias. ²⁴⁻²⁵ Naupu haitu nosambayamo ira ivei: "Pue, nisaniMiu isi rara ntai manusia pura-pura. Jadi popaisani ka kamimo isema nipelisiMiu lako ri randua tona hitu majadi suro manjambei i Yudas. Apa i Yudas nombakabasaka bagona bo nihuku nangoseaka pokaingguna." ²⁶ Naupu ira nosambaya, nitenderamo lamoro, bo nambela sanga i Matias. Jadi nompamula lako ri eo haitu, i Matias nireke saito lako ri sapulu randua suro i Pue Yesus.

Panau Nosa Gasa nu Alatala

2 Nanggava eo mbaso ntoYahudi anu niuli Eo Pentakosta, pura-pura topangoseaka i Yesus ri sia nasiromu ri sangu banua. ² Sampesanika niepera moni lako ri langi eva vuu mpouri narimboso. Moni haitu niepe ri umba-umba riaru banua nikasiromura haitu. ³ Bo nikitara eva vaya nu apu nolenje mpo dila nakamburaka nasindele ri umba-umba bo netuu nte ira saito-saito. ⁴ Ira pura-pura nikuasai Nosa Gasa nu Alatala bo nompamulamo notesa ante mpengaya basa ntanina nisovadakara nangoseaka anu nidekei nu Nosa Gasa ka ira.

⁵ Tempo haitu nadea toYahudi ntanina lako ri ngatanga ri njumangu dunia nonturo ri ngata Yerusalem. Ira haitu tona natundu nte Alatala. ⁶ Tempo niepe ntona moni mpo vuu mpouri haitu, nadea mpuu tona nakava nasiromu. Natekaja ira sabana niepera basara mboto namala nipotesa ntopangoseaka i Yesus. ⁷ Nahera bo nokumaa mpuu ira nosimpotesa, "Berimbamo hii? Tona notesa-tesa haitu toGalilea pura! ⁸ Berimba sampe niepeta ira notesa ante basa-basata lako ri ngata-ngatata mboto? ⁹ Kita hii tona lako ri umba-umba, lako ri tana Partia, Media, Elam, lako ri tana Mesopotamia, Yudea bo Kapadokia. Naria muni lako ri tana Pontus bo Asia, ¹⁰ lako ri tana Frigia bo Pamfilia, lako ri tana Mesir bo lako ri tana Libia napara ngata Kirene. Naria muni lako ri ngata mbaso Roma. ¹¹ Sanu kita toYahudi bo sanu nesua agama Yahudi. Naria tona nakava lako ri levuto Kreta bo lako ri tana Arab. Kita hitu tona lako ri mpengaya basa, tapi niepeta ira nombatesa kabaraka-kabaraka nipovia nu Alatala ante basa mpengaya-ngaya!" ¹² Nokumaa puramo ira bo naingu mpuu rarara sampe nosipekutana-tana, "Nua-pa batuana kajadia hitu?"

¹³ Tapi naria muni tona ntanina hamai aga nepongei-ngeika. Ira nanguli, "Ah, tona haitu, bara nalangu!"

Tesa i Petrus ka todea

¹⁴ Nangepe tesa ntona haitu, neanggamu i Petrus nosanggani-nggani ante sapulu saito suro ntona, bo notesamo ia ka todea ante suara namangga. Niulina, "Sampesuvu-sampesuvuku toYahudi, bo pura-pura to-ponturo ri ngata Yerusalem! Epemo pakabelo-belo, ku-pakalanto ka komiu batuana anu najadi ri sii pangane. ¹⁵ Kami hii ledo nalangu mpo nibatamiu. Dopa tempo panginu, da tinti sasio mpadondona. ¹⁶ Tapi kajadia pangane, haitumo peonga nu Nosa Gasa nijanji nu Alatala nangoseaka tesaNa nipapola Nabi Yoel ng-gaulu, ivei:

¹⁷ 'Alatala notesa: Ri tempo napara kaupu nu dunia bara maipia, Kupopanau NosaKu ka pura-pura manusia.

Ana-anamiu, langgai bo mombine, mompasimbayu tesaKu ka komiu.

Kabilasa-kabilasamiu manggita anu Kupopakita ka ira.

Bo totua-totuamiu mangipika anu Kupopangipika ira.

¹⁸ Sampe batua-batuaKu muni, langgai bo mombine, Kudekeika Nosa Gasa ri tempo nijanjiKu haitu. Bo ira mompasimbayu pura-pura anu Kuuli ka ira.

¹⁹ Kupopakita ka komiu kabaraka-kabaraka ri langi bo tanda-tanda nipokumaaka ri dunia. Maria raa bo apu bo unu nu apu.

²⁰ Mata nu eo mabali majadi malanda, bula majadi mpo raa, dopame makava eo mbaso anu ledo ria kasimbayuna, haitumo Eo Tupu mombatangara manusia.

²¹ Bo isema-sema mekakai nte Tupu, ia kana rapakasalama.' "

Yoel 2:28-32

²² I Petrus nompakapola tesana ivei: "Sampesuvu-sampesuvuku toIsrael! Pariaramo tesaku hitu! Alatala nompopakita ka komiu pura-pura, Ia mpuu-mpuu nompelisi bo nantudu i Yesus toNazaret, sabana nidekeikaNa kuasa movia kabaraka bo tanda-tanda nipokumaaka. Nisanimiu mboto tesaku hitu nakana, sabana kajadia haitu pura-pura najadi ri tatangata. ²³ I Yesus haitu nidekei nu Alatala ka komiu bo nipatesimiu. Ia nidekeimiu ka tona nadaa nombapaku ri kayu salib. Tano mai, anu najadi haitu nangoseaka nia nipakatantu nu Alatala lako ri pamulana, apa nisaniNa mami lako ri pamulana anu majadi ante i Yesus.

²⁴ Komiu nompatesi i Yesus, tapi Alatala nompakatuvu mpanjili Ia lako ri kamateNa. NikabasakaNa Ia lako ri kuasa kamatea, sabana Ia ledo ntoto namala rataamaka ri ponturo ntona namate. ²⁵ Magau Daud nggaulu nombaboto i Yesus matuvu mpanjili ivei:

'Nikitaku Tupu nasaro nombajagai yaku. Ia ri sabingga ngganaku mombatulungi yaku ala yaku ledo molengga ragoya nuapa-nuapa.

²⁶ Haitumo sampe nadamba raraku, bo sumbaku nombasovadaka tesa-tesa petoiya. Bo karoku muni manjarumaka kuasaMiu,

²⁷ Sabana, ledo rapalambaMiu yaku maboli ri ponturo ntomate. Ledo rapalambaMiu karobataku maboli riara dayo sampe mapopo majadi avu, sabana Yaku batuanaMiu nipelisiMiu.

²⁸ NituduakaMiu ka yaku dala matuvu mabelo sampe ri kasae-saena. Melabipa kadamba raraku apa Komiu nosanggani-nggani ante yaku.' "

Mazmur 16:8-11

²⁹ I Petrus nompapola tesana ivei; "Sampesuvu-sampesuvuku, kuuli pakalanto ka komiu, i Daud, magau ntutuata namate bo nitana. Dayona da namala nikita sampe eo hitu. *Jadi natantu ledo karobatana mboto anu nipatujuna.*³⁰⁻³¹ Alatala nojanji bo nipakarosoNa ante sumpa, kana maria saito lako ri muli i Daud mboto raanggataka majadi magau bara maipia. † Nisani i Daud pojanji haitu bo ia muni nabi, jadi nisani-na anu rapovia nu Alatala. Nibotona Magau Topepakasalama anu nijanji nu Alatala matuvu mpanjili lako ri kamateNa. I Daud nanguli:

'Ia ledo rapalamba maboli ri ponturo ntomate, karobataNa ledo maboli riara dayo sampe mapopo majadi avu.'

Mazmur 16:10

³² I Yesusmo hii niuli i Daud pangane, sabana Iamo tona nipakatuvu nu Alatala mpanjili. Kami pura-pura hii najadi sabiNa, sabana kami mboto nanggita i Yesus natuvu mpanjili. ³³ Ia nianggataka nu Alatala bo nipo-ponturo ri ponturo nibila ri sabingga nggana nu Alatala ri suruga. Bo nitarimaNa Nosa Gasa nijanji nTua-maNa, Alatala. Jadi sampesuvu-sampesuvu, pangane nikitamiu bo niepemi kami notesa nte mpengaya basa. Haitu najadi sabana kuasa Nosa Gasa anu nipopanau i Yesus ka kami.

³⁴ Jadi patuju nu tesa Magau Daud pangane, ledo nanguli karon mboto, sabana natantu ledo i Daud natuvu mpanjili bo neore hau ri suruga. Tapi i Daud nanguli ivei:

'Tupu nanguli ka Pueku: Ponturomo ri sabingga ngganaKu

³⁵ sampe Kupopekou pura-pura baliMu nte Iko! "

Mazmur 110:1

³⁶ Bo i Petrus nompakaupu tesana, bo nanguli, "Jadi sampesuvu-sampesuvu, haitumo sampe kita toIsrael pura-pura, kana rasanita mpuu-mpuu, i Yesus hitumo anu nipakumiu ri kayu salib, Iamo nipelisi nu Alatala majadi Tupu bo Magau Topepakasalama!"

† *Mazmur 132:11*

³⁷ Tempo todea nangepe tesa i Petrus haitu, nasilon-
to ntoto riarara. Bo nipekutanara nte i Petrus bo suro-
suro ntanina, "Sampesuvu-sampesuvu, ane ivesia, nu
apa masipato rapovia kami?"

³⁸ Nesanamo i Petrus, "Kajeamo lako ri dosa-
dosamiu, bo komiu kana radiu saito-saito, tandana
komiu nomparasaya i Yesus Kristus, bo Alatala mom-
baampungki komiu bo mombadekei Nosa Gasana ka
komiu. ³⁹ Apa Alatala nojanji mombadekei Nosa Gasana
ka komiu pura-pura, bo ka muli nu mulimiu, bo ka
tona ri ngata nakavao. PojanjiNa haitu ka pura-pura
tona nipokio nTuputa Alatala majadi todeaNa."

⁴⁰ Ledo aga ivesia tesa i Petrus, tapi ante nadea tesa-
tesa ntanina nipatudukina bo nipaingana todea. Niulika-
na ira, "Kajeamo bo rapakasalama, ala komiu ledo
rapambela pehuku nu Alatala anu rapambela ka tona
nadaa ri ngata hitu *anu nompatesi i Yesus!*" ⁴¹ Naupu
nangepe tesa i Petrus, nantambaimo kadea ntona
nomparasaya i Yesus, bo ira nidiu, tandana ira topan-
goseaka Ia. Bo ri eo haitu tona nomparasaya i Yesus
natetambai talu-njobu kadeana. ⁴² Topangoseaka i
Yesus nabaru haitu natutu mpuu nangepe pepaduduki
nu suro-suro, bo ira nasaro nasiromu nosanggani-
nggani. Ira nasaro nangande nosanggani-
nggani nombatubi roti mantora kamate i Yesus, bo nosambaya
nosanggani-
nggani.

Katuvu ntopomparasaya

⁴³ Nadea mpuu kabaraka bo tanda-tanda nipoku-
maaka nipovia nu suro-suro sampe nokumaa bo nae-
ka todea. ⁴⁴ Pura-pura topomparasaya nosangu rara,
bo nuapa-nuapa naria ante ira nipakera mpasanggani-
nggani. ⁴⁵ Nasaro naria ira nompobalu kakalumanara
bo mbara-mbarara, bo doina haitu nibagi-bagi ka ira
pura nangoseaka anu niparaluura. ⁴⁶ Eo-eo ira nasiro-
mu ri doyata Banua nu Alatala. Ira notava-tava nasiro-
mu ri banuara notubi-tubi roti nantora i Yesus, bo nan-
gande nosanggani-
nggani ante damba rarara bo ante
liangu rara. ⁴⁷ Ira nasaro nombatoiya Alatala bo pura-
pura todea ntanina nompodamba ira. Bo eo-eo nan-
tambai kadea ntona nipakasalama nu Alatala.

Topunggu nipakabelo i Petrus bo i Yohanes

3 Naria saeo i Petrus bo Yohanes hau ri Banua nu
Alatala tinti tatalu ede eo, haitumo tempo posam-
baya ntoYahudi. ² Ri bobaa mbaso anu niuli Bobaa Na-
gaya, naria saito langgai napunggu mami lako ri pom-
poanaka. Eo-eo ia nikeni hau ri bobaa haitu ala ma-
mala mantande palena merapi-rapi nte topoliu nesua
hau mosambaya ri Banua nu Alatala. ³ Tempo nikitana
i Petrus bo i Yohanes noliu mesua hau ri Banua nu
Alatala, niulurkanamo palena merapi doi nte ira rand-
ua. ⁴ Jadi nikanotoramo topunggu haitu bo nanguli i

Petrus ka ia, "Peintamo kami!" ⁵ Topunggu haitu nom-
peintaka ira bo nisarumakana bara maria anu
radekeira ka ia. ⁶ Tapi nanguli i Petrus ka ia, "Yaku ledo
naria doiku, tapi anu naria nte yaku, haitumo kudekei
ka iko. Ante kuasa i Yesus Kristus toNazaret, poli-
pamo!"

⁷ Pade nikangisi i Petrusmo pale nggana ntopunggu,
bo nitulungina ia meangga. Kaliu-liu narosomo
kadana ante buku dalina. ⁸ Ia kaliu-liu nekavantu bo
neangga bo nompamula nolipa hau tumai. Naupu sia,
nesuamo ia riarara doyata Banua nu Alatala nosang-
gani-
nggani nte i Petrus bo i Yohanes. Ia nolipa bo
nekavantu-vantu nantoiya Alatala. ⁹ Pura-pura tona ri-
ara Banua nu Alatala nanggita ia nolipa bo nantoiya-
toiya Alatala. ¹⁰ Pade nanotomo rarara, iamo toperapi
nabiasa nonturo ri Bobaa Nagaya nerapi-rapi nte tona.
Nokumaa bo natekaja ira nanggita anu najadi nte top-
unggu haitu.

I Petrus notesa ri doyata Banua nu Alatala

¹¹ Topunggu pangane nantuntuni i Petrus bo i
Yohanes njuu. Tempo ira tatalu nakava ri tambale ri
Banua nu Alatala niuli Tambale Magau Salomo, pura-
pura tona nangova hau nasiromu ri ngayora, apa
natekaja ira nanggita topunggu haitu nolipamo.
¹² Tempo i Petrus nanggita todea gahaitu, niulikana
ira, "Sampesuvu-sampesuvuku toIsrael! Nakuya komiu
nokumaa nanggita anu najadi pangane? Nakuya
nikanotosikamiu kami? Natantu nisarumakamiu tona
hitu nolipa sabana kabaraka kami mboto, atau sabana
poagama kami naroso. Tapi ledo ntoto nakana!
¹³ Alatala anu nisomba ntotuata bo Nabi Abraham, i
Ishak, bo i Yakub, Iamo nombabila bo nompakaoge
BatuaNa i Yesus. I Yesus haitumo nidekeimiu ka po-
marenta, bo Iamo nipoaramiu ri ngayo i Pilatus tempo
i Pilatus madota mombakabasaka Ia. ¹⁴ Ia nanao bo
nabelo, tapi nipoaramiu Ia bo nisaravimiu i Pilatus
mombakabasaka topepatesi ka komiu. ¹⁵ Komiumo
nombatudu tona nompatesi Ia, tano Iamo topom-
badekei katuvu nabelo sampe ri kasae-saena ka
manusia. Bo Alatala nompakatuvu mpanjili Ia lako ri
kamateNa. Kami najadi sabiNa, sabana kami mboto
nanggita i Yesus natuvu mpanjili. ¹⁶ Jadi sampesuvu-
sampesuvu, nikitamiu topunggu hitu bo nisanimumo
ia. Ia nomparasaya i Yesus, jadi i Yesus nompakaro
kadana. Nikitamiu mboto, ia nabelo mpuumo sabana
pomparasayana i Yesus.

¹⁷ Sampesuvu-sampesuvu, nau komiu bo totua-totua
ngatata nompatesi i Yesus, nisaniku komiu novia anu
haitu sabana ledo nisanimiu Iamo Magau
Topepakasalama. ¹⁸ Nabi-nabi nggaulu anu niposum-
ba nu Alatala nanguli Magau Topepakasalama kana
mombarasai susa bo pari. Anu nipoviamiu hitu nom-

pakadupa anu niuli nu Alatala ka nabi-nabiNa. ¹⁹Jadi sampesuvu-sampesuvu, komiu kana majea lako ri dosa-dosamiau bo matundu nte Alatala ala dosa-dosamiau ralelakaNa. ²⁰Bo Alatala mompakaroso bo mompakasana raramiu. Bo Ia muni mombatudu i Yesus makava nte komiu, sabana i Yesus hitumo nipelisi nu Alatala majadi Magau anu mompakasalama komiu. ²¹I Yesus kana monturo ri suruga sampe makava tempona Alatala mompakabarua pura-pura, evamo nitesaNa ka nabi-nabi nipelisiNa nggaulu.

²²Sampesuvu-sampesuvu, naria tesa Nabi Musa nggaulu nombatesa i Yesus ivei:

'Tupumiu Alatala manganggataka saito lako ri sampesuvumiu mboto majadi nabi nasimbayu mpo yaku. Komiu kana mangoseaka nuapa pura raulina ka komiu.

²³Isema-sema ledo mangoseaka anu rauli nu nabi haitu, ia kana rataniaka lako nte todea nu Alatala bo rapatesi.'

Ulangan 18:15,18,19; Imamat 23:29

²⁴Nabi-nabi ntanina anu nompasimbayu tesa lako nte Alatala nggaulu, nompamula lako ri Nabi Samuel sampe nabi-nabi natuvu purina, ira pura nombatesa anu najadi ri tempo sii-sii. ²⁵Janji-janji nu Alatala anu nipasimbayu nu nabi-nabi, nambela komiu sii-sii. Pojanji nipovia nu Alatala nte totuamiau nggaulu nambela muni nte komiu. Alatala nojanji ka Nabi Abraham, totuata nggaulu ivei:

'Lako ri mulimu ngena, Kudekei belo ka pura-pura manusia ri dunia.'

Kajadia 22:18; 26:4

Jadi sampesuvu-sampesuvu, komiumo nantarima belo nijanji nu Alatala haitu!

²⁶Haitumo sabana Alatala nanganggataka BatuaNa i Yesus, bo nantudu Ia tumai nte kita toYahudi ntani ruru, ala radekeiNa belo ka kita, haitumo, Ia manggeni kita majea lako ri pokaingguta nadaa."

I Petrus bo i Yohanes niparangga ri ngayo Polibu Mbaso Agama Yahudi

4 Tempo i Petrus bo i Yohanes da notesa ka todea riaru Banua nu Alatala, nakava bara sako-ndua topanggeni pesomba, pakeni ntopojaga Banua nu Alatala, bo toSaduki. ²ToSaduki ledo nomparasaya to-mate matuvu mpanjili. Jadi narau mpuu ira nangepe i Petrus bo Yohanes nempatuduki ka todea i Yesus natuvu mpanjili lako ri kamateNa. Sabana, pepatudukira haitu nompakalanto tomate matuvu mpanjili. ³Jadi nisakara randua suro haitu bo nisuarakara riaru ntarunggu. Tempo haitu nabongimo, dopa namala ira ratangara. Jadi i Petrus bo i Yohanes nitaha ri sia sampe maile mpadondo. ⁴Tapi topangepe pepatuduki nu suro-suro pangane, nadeamo nom-

parasaya i Yesus. Jadi kadea ntopomparasaya i Yesus nantambai sampe nitasere lima-njobu tonana.

⁵Naeo mpadondo, pakeni-pakeni agama Yahudi, to-tua-totua ntoYahudi bo guru-guru agama nolibu ri Yerusalem. ⁶Ira nolibu ante Pakeni nTopanggeni Pesomba, iamo i Hanas, bo muni ante sampesuvuna i Kayafas, i Yohanes, i Aleksander, bo sampesuvu-sampesuvuna ntanina. ⁷Nasiromu purapa ira, nipekikeni-ramo i Petrus bo i Yohanes mantingayo ira pura-pura. Jadi nompamulamo ira nomparesa i Petrus bo i Yohanes ante nekutana, "Berimba komiu nompakabelo topunggu hitu? Ante kuasa nuapa, ante kuasa isema nipakemiu nompakabelo ia?"

⁸Jadi i Petrus nikuasai nu Nosa Gasa nu Alatala, bo nesanamo ia, "Totua-totua, pakeni ntodea bo pakeni agama. ⁹Kami nitangara sii-sii, sabana kami nantulungi saito topunggu, bo komiu madota mangisani berimba sampe tona hitu nipakabelo. ¹⁰Jadi ala rasanimiu bo ala rasani nu sampesuvuta toIsrael pura muni, kami manguli ka komiu, tona hitu nipakabelomo bo ia neangga ri ngayomiu pura-pura sabana kuasa lako nte i Yesus Kristus toNazaret. Komiu nombapaku i Yesus ri kayu salib sampe namate, tapi Alatala nompakatuvu Ia mpanjili. ¹¹I Yesusmo niuli vatu ri Buku Gasa ivei:

'Vatu nitedaka ntopovia banua, vatu haitumo nopokopa ka banua haitu.'

Mazmur 118:22

¹²I Petrus nompapola tesana, "Aga i Yesus namala mompakasalama manusia, sabana ri njumangu dunia ledo ria saitoa tona ntanina nipakakuasa nu Alatala mompakasalama manusia, aga i Yesus saitoNa."

¹³Topolibu haitu nokumaa pura-pura nanggita kabia i Petrus bo i Yohanes notesa, nemopa nisanira randua suro haitu aga tona biasa anu ledo nosikola nalanga. Lako rahaitu nisanira mpuumo randua suro haitu nosamporoa nte i Yesus bara ipia. ¹⁴Topolibu ledo namala nompoara tesa i Petrus bo i Yohanes, sabana topunggu nipakabelo haitu neangga ri ngayora nosanggani-nggani ante i Petrus bo i Yohanes. ¹⁵Jadi nitadura suro haitu rakeni hau ri savalikuna sampalai, bo topolibu pangane nosimpekutana, ¹⁶"Nuapa rapoviata ka tona randua haitu? Nisani ntoponturo ri ngata Yerusalem pura kabaraka nipokumaaka nipoviara. Ledo mamala rapoarata kajadia haitu. ¹⁷Tapi ala kareba hitu domo matolele hanupa, aginamo raparanggata ira randua bo raulita ka ira nee mpuu ratesamiau i Yesus ka tona ntanina."

¹⁸Naupu haitu nirondera mpanjili randua suro pangane bo niulikara, "Tumo motesa atau mompatuduki i Yesus ka tona!"

¹⁹Tapi nesana i Petrus bo i Yohanes, "Pekirimiu mbotomo mbana masipato rapovia kami ri panggita nu Alatala, mangoseaka parentamiau atau mangoseaka

parenta nu Alatala. ²⁰ Kami hii ledo mamala menonto motesa anu nikita kami bo anu niepe kami mboto.”

²¹ Ledo nikava ntopolibu anu masipato rahuku ka i Petrus bo Yohanes. Jadi niparanggara vaimo randua suro haitu pade nikabasakaramo, sabana naeka ira ka todea. Apa pura-pura todea nantoiya Alatala sabana kabaraka haitu. ²² Nokumaa mpuu todea sabana topunggu nipakabelo haitu, nelabimo patapulu-mpae umuruna.

Topomparasaya nerapi karoso rara lako nte Alatala

²³ Naupu i Petrus bo Yohanes nikabasaka, nanjilimo ira hau ri ponturo nu roara. Nakava ri sia, nitesara ka roara pura-pura anu niuli ntopolibu ka ira, haitumo balengga-balengga ntopanggeni pesomba bo pakenipakeni ntoYahudi ntanina. ²⁴ Naupu roara nangepe tesara haitu, pura-pura ira nosangu rara nekakai nte Alatala ivei: “Pue, Komiumo Topompajadi langi, tana, tasi, bo pura-pura isina. ²⁵ Komiu nombadekei tesa ka totua kami nggaulu Magau Daud. I Daud batuaMiu bo ante kuasa Nosa GasaMiu nitesana mami manusia mangeva i Yesus, ivei:

‘Narau todea anu ledo nosisani nte Alatala. Bo todea-todea novia nia anu ledo ria gunana.

²⁶ Magau-magau ri dunia nasiromu nasadia meeava, bo totua-totua ngata nasintuvu mangeva Alatala bo Magau Topepakasalama nipelisiNa.’

Mazmur 2:1-2

²⁷ O Pue, dopa nasae ri ngata hitu, Magau Herodes bo i Pontius Pilatus nasiromu ante toIsrael bo tona ledo nosisani nte Komiu. Patujura mangeva i Yesus, BatuaMiu nagasa, anu nipelisiMiu majadi Magau Topepakasalama. ²⁸ Ira nasintuvu nompatesi i Yesus. Tapi kakanana anu nipoviara aga nompakadupa anu nipakatantuMiu mami lako ri pamulana nangoseaka kuasaMiu bo dotaMiu. ²⁹ Pue, epemo tesara nompangga kami. Kami batuaMiu, bo kami merapi tulungi nte Komiu ala kami ledo maeka mompatolele tesaMiu. ³⁰ Pue, tulungi ala tona nadua mamala rapakabelo bo kabaraka bo tanda nipokumaaka majadi ante kuasa i Yesus, BatuaMiu nagasa.”

³¹ Naupu ira nosambaya, banua nikasiromura haitu nogoya. Ira pura-pura nikuasai nu Nosa Gasa nu Alatala, bo nipatolelera tesa nu Alatala bo domo ntoto naeka rarara.

Pura-pura topangoseaka i Yesus nosangu rara

³² Pura-pura topangoseaka i Yesus natuvu nosangu rara bo nosangu pekiri. Ledo ria saitoa nanguli mbarabarana anuna mboto. Anu naria ante ira, anura mpasanggani-nggani. ³³ Suro-suro ledo naupu-upu nompatolele kareba i Pue Yesus natuvu mpanjili, bo naroso mpuu tesara. Bo Alatala nabelo mpuu nte ira

pura-pura. ³⁴⁻³⁵ Ledo ria saitoa ira nakura nuapa-nuapa, sabana isema naria tanana bara banuana nipobaluna, nikenina ali nu tana bara banua haitu ka suro-suro rapake ka todea. Doi haitu nibagi-bagi nu suro-suro ka isema-sema naria paraluu.

³⁶⁻³⁷ Ivesia muni nipovia i Yusuf. Nipobaluna tanana bo doi haitu nikenina bo nidekeina ka suro-suro i Yesus. I Yusuf haitu toLewi lako ri levuto Siprus. Suro-suro nombadae ia i Barnabas, batuana, “topompakavoe rara ntona.”

I Ananias bo i Safira

5 Tapi naria muni saito langgai ntanina nosanga i Ananias, bereina nosanga i Safira. Ira njamboko nompobalu salimpu tanara. ² Bo doi ali ntana nipobalura haitu, sagaa nibolira ka ira mboto, bo sagaa nikenin i Ananias ka suro-suro. Nangulimo i Ananias, “Hitu puramo doi ali ntana nipobalu kami.” Poviana haitu nisani nu bereina muni.

³ Nanguli i Petrus ka ia, “Ananias, nakuya iko nompalamba Magau nu Seta nombakuasai raramu sampe nidavaimu Nosa Gasa nu Alatala? Iko nombaboliaka doimu sagaa ka iko mboto. ⁴ Dopame nipobalumu tana haitu, iko mami tupuna. Bo naupu tana haitu nipobalumu, doi ali ntana haitu iko muni tupuna. Nakuya sampe naria patuju riarantaimu nompovia anu nadaa? Iko ledo aga nodava ka manusia, tapi iko nodava ka Alatala!” ⁵⁻⁶ Naupu i Ananias nangepe tesa i Petrus, kaliu-liu nadunggamo ia bo namate. Bo nakava bara sako-ndua kabilasa mombasompu karobatana, bo nikenira hau ratana ri savalikuna. Pura-pura tona naeka mpuu nangepe anu najadi haitu.

⁷ Bara talu-jaa kaliuna i Ananias namate, nesua munimo bereina i Safira. Dopa nisanina anu dako najadi. ⁸ I Petrus nanguli ka ia, “Uli ka yaku, tana nipobalumi njamboko haitu, aga hitu puramo alina?”

Nesana i Safira, “Nakana. Tutu puramo alina.”

⁹ Nanguli i Petrus ka ia, “Nakuya iko bo bereimu i Ananias nasintuvu nombabagi Nosa Gasa nu Alatala? Epemo! Tona nombatana bereimu, dako nanjili lako ri dayo. Iko muni rakenira hau ratana ri savalikuna!”

¹⁰ Nangepe tesa haitu, nadunggamo i Safira bo kaliu-liu namate ri ngayo i Petrus. Tempo kabilasa-kabilasa pangane nesua, nikavara i Safira namate munimo. Bo nikenira karobatana hau ri savalikuna bo nitanara ri sinjori dayo bereina i Ananias. ¹¹ Nangepe kajadia haitu, naeka puramo topomparasaya i Yesus bo tona ntanina muni.

Kabaraka bo tanda-tanda nipokumaaka nipovia nu suro-suro i Yesus

¹² Nadea mpuu kabaraka bo tanda-tanda nipokumaaka nipovia nu suro-suro ri mata ntodea. Bo topan-

goseaka i Yesus nosangu rara nasiromu ri Banua nu Alatala ri Tambale Magau Salomo. ¹³ Tona ntanina anu ledo nomparasaya i Yesus ledo nabia nakava masiromu ante ira, tapi naupa ivesia, topomparasaya gahaitu mpuu-mpuu nipakaoge ntodea. ¹⁴ Kasae-sae katambai-mbai kadea ntopangoseaka i Yesus, langgai bo mombine. ¹⁵ Nanggita kabaraka-kabaraka nipovia nu suro-suro, nadea tona nadua nikenanti ante paturu bara ante ompa bo nituu ri dala. Apa nisarumakara ane molii i Petrus ngena, nau aga vayona mambela sakide, mabelomo ira. ¹⁶ Noumbe-umbe tona nakava lako ri ngata-ngata napara Yerusalem nanggeni tona nadua bo tona nipesua seta. Bo pura-pura tona haitu nipakabeloramo.

Suro-suro i Yesus nipandasa

¹⁷ Kaupuna Pakeni nTopanggeni Pesomba ante roaroana anu nangoseaka pepatuduki ntoSaduki, nasiritimo nanggita kadea ntona nomparasaya i Yesus. Jadi ira nompamula nompandasa suro-suro i Yesus.

¹⁸ Nisakara suro-suro, bo nisuarakara riaran tarunggu ngata. ¹⁹ Tapi bongina haitu saito malaeka nu Alatala nombangge vamba-vamba ntarunggu bo nanggeni suro-suro hau ri savalikuna. Nanguli ia, ²⁰ "Koimo, peangga ri doyata Banua nu Alatala bo patolelemo ka todea kareba katuvu nabaru." ²¹ Naupu nangepe tesa haitu, hau mpuumo suro-suro nanturusi anu niuli nu malaeka ka ira. Nasadondo mpuu ira hau ri doyata Banua nu Alatala bo nompamulamo nompatuduki tona ri sia.

Tempo haitu Pakeni nTopanggeni Pesomba ante roaroana nompokio pura-pura pakeni-pakeni ntoYahudi masiromu ri Polibu Mbaso Agama. Nitudura tona hau mangala suro-suro lako ri tarunggu, rakeni ratangara ri ngayora. ²² Tempo tona nitudu haitu nakava ri tarunggu, ledo nikavara suro-suro ri sia. Jadi nanjilimo ira hau manguli ka toPolibu Mbaso Agama. ²³ Niulira, "Nakavapa kami ri tarunggu, nikita kami vamba ntarunggu niupi bo nigunji pakabelo-belo bo topojava-topojaga naria pura ri vamba. Tapi tempo kami nombangge vamba haitu, ledo ria saitoa tona nikava kami riarana."

²⁴ Nangepe tesa haitu, pakeni ntopojaga Banua nu Alatala bo balengga-balengga ntopanggeni pesomba, naingu mpuu rarara nompekirika anu najadi ante suro-suro, bo naeka nompekirika anu majadi ngena. ²⁵ Dopa nasae, nakavamo saito langgai nanguli ka ira, "Epe vei! Tona nisuarakamiu riaran tarunggu, hitupa nompatuduki todea ri Banua nu Alatalamo!"

²⁶ Nangepe tesa haitu, pakeni ntopojaga Banua nu Alatala ante pura-pura roana hau nialara mpanjili suro-suro. Tapi ledo niduasira, apa naeka ira ka todea.

Niulira bara rarempe ntodea ante vatu ira ane raduasira suro-suro.

²⁷ Suro-suro nikenira nesua nantingayo Polibu Mbaso. Pade Pakeni nTopanggeni Pesomba nomparesa ira, ivei: ²⁸ "Komiu nitagi kami bara ipia, nee mpuu mompatolele pepatuduki i Yesus. Tapi ledo nepangala komiu, aga nggosena nipatolelemiu pepatuduki haitu ri njumangu ngata Yerusalem, bo niulimiu muni, i Yesus haitu namate nipatesi kami!"

²⁹ Nesana i Petrus bo suro-suro ntanina, "Kami kana mangoseaka parenta nu Alatala, bo ledo parenta nu manusia. ³⁰ Komiu nantudu tona mompatesi i Yesus bo mombapaku Ia ri kayu salib. Tapi Alatala anu nisomba ntotuata nggaulu, Iamo nompakatuvu i Yesus mpanjili lako ri kamateNa. ³¹ Bo Alatala nompakaoge i Yesus bo nipoponturoNa Ia ri sabingga ngganaNa, bo nidekeiNa ka Ia kuasa momparenta bo mompakasalama kita, ala kita toIsrael radekei loga majea lako ri dosa-dosata bo raampung. ³² Kamimo hii sabina pura-pura kajadia haitu, kami bo Nosa Gasa anu nidekei nu Alatala ka pura-pura topangoseaka parentaNa."

Tesa i Gamaliel

³³ Nangepe tesa-tesa nu suro-suro, nadua mpuu rara ntoPolibu Mbaso, sampe ira nasintuvu mompatesi suro-suro haitu. ³⁴ Tapi riaran Polibu Mbaso naria saito toFarisi nosanga i Gamaliel. Ia guru agama mpuu-mpuu nipakaoge ntodea. Ia neangga bo nantudu tona manggeni suro-suro mesuvu ri savalikuna sampalai ala ledo raepera tesana. ³⁵ Naupu haitu niulikana ka toPolibu Mbaso haitu, ivei: "Sampesuvu-sampesuvuku toIsrael! Kita kana mompekiri pakabelo-belo anu rapoviata ka tona hitu, ³⁶ apa bara sako-mpae naliu neumba i Teudas. Pangulina ia tona nabaraka sampe nitasere pataatu tona nangoseaka ia. Tapi ia muni nipatesi bo pura-pura topangoseaka ia nasimptare. ³⁷ Naupu haitu, tempo nitulisi pura-pura sanga ntona riaran buku sensus, neumba munimo i Yudas, tona lako ri bagia Galilea. Ia muni nompadidi todea nangoseaka ia. Tapi ia muni nipatesi bo pura-pura topangoseaka ia muni nagaro. ³⁸ Sabana haitu, kuuli ka komiu, nee rakuya-kuyamiu topangoseaka i Yesus hitu. Palambamo ira, sabana ane pepatudukira bo anu nipoviara aga nopuna lako ri manusia, tantu maopo ngena. ³⁹ Tapi ane pepatudukira bo anu nipoviara nopuna lako nte Alatala, ledo rapakuleta mombadagi ira. Ledo aga haitu! Nee sampe kita mangeva Alatala!"

Naupu toPolibu Mbaso nangepe tesa i Gamaliel, nitarimaramo tesana. ⁴⁰ Bo nipokiora suro-suro mesua mpanjili. Nakava ri sia, suro-suro haitu niporo pade nitagi vai: "Tumo mompatuduki kareba i Yesus ka tona!" Naupu sia pade nikabasakamo. ⁴¹ Suro-suro nompalasi Polibu haitu bo nadamba mpuu rarara sa-

bana ira nireke nu Alatala masipato mombarasai kausa bo kapari sabana pangoseakara i Yesus.

⁴² Bo eo-eo ri Banua nu Alatala bo muni ri banua-banua ntona, ira nompatolele Kareba Belo bo nompatuduki ka tona i Yesusmo Magau Topepakasalama anu nijanji nu Alatala.

Papitu tona nipelisi mantulungi suro-suro i Yesus

6 Kasae-sae kadea-dea topangoseaka i Yesus. Tempo haitu topangoseaka i Yesus deanapa toYahudi. Sanu ira nobasa Yunani, bo sanu nobasa basara mboto. † Tempo haitu topobasa Yunani ledo nadamba nte topobasa Yahudi. Topobasa Yunani nanguli, “Timbala-timbala kami ledo nanggava doi balanja eo-eo mpo anu nipalele ka timbala-timbala ntanina.”

² Sabana haitu, suro-suro sapulu randua haitu nompasiromu pura-pura topangoseaka i Yesus bo nanguli ka ira, “Ledo nabelo ane menonto kami nompatolele tesa nu Alatala aga mompakasiayu kandeamiu. ³ Jadi aginapa rapelisi miu papitu tona lako nte komiu mboto radekeika bago haitu. Pelisimo tona nabelo sangana, nanoto, bo nikuasai Nosa Gasa nu Alatala, bo pura-pura bago haitu radekei kami ka ira. ⁴ Bo ivesiamo kami suro-suro mamala mombatui bago kami mboto, haitumo mosambaya ka Alatala bo nompatolele tesaNa.”

⁵ Naupu nangepe tesa nu suro-suro pangane, nasituju puramo topangoseaka i Yesus ante tesa haitu. Jadi nipelisi rami i Stefanus, saito tona naroso pomparasayana i Yesus bo muni ia nikuasai nu Nosa Gasa nu Alatala. Nipelisira muni i Filipus, bo i Prokhorus, i Nikanor, i Timon, i Parmenas, bo i Nikolaus lako ri ngata Antiokhia. Ia ledo toYahudi, tapi ia nesua agama Yahudi. ⁶ Tona papitu haitu nikenikara ka suro-suro bo naupu nosambaya, suro-suro nombadika palera ri balengga ntona haitu mombalanti ira majadi topotulungi suro-suro. ⁷ Ivesiamo kareba nu Alatala napatolele njuu bo kadea ntopomparasaya i Yesus ri ngata Yerusalem nantambai mpuumo. Bo nadea muni topanggeni pesomba nangoseaka i Yesus.

I Stefanus nisaka

⁸ I Stefanus mpuu-mpuu nipobelo nu Alatala. Bo naria kuasa nu Alatala nte ia sampe nadea kabaraka bo tanda nipokumaaka nipoviana ri ngayo ntodea. ⁹ Tapi naria muni tona nangeva ia. Ira haitu toYahudi anu nosambaya ri banua petupu niuli Banua Petupu nu Batua-Batua Nikabasaka. Ira toYahudi ntanina lako ri ngata Kirene bo ngata Aleksandria. Ira bo toYahudi lako ri propinsi Kilikia bo lako ri propinsi Asia nangeva bo nosisanai nte i Stefanus. ¹⁰ Tapi ledo nipakulera

† Basa ntoYahudi tempo haitu basa Ibrani. ToYahudi nobasa Yunani biasa tosanatana anu nipoanaka ri ngata ntona ledo toYahudi. Topobasa Ibrani biasa tona lako ri ngata ntoYahudi mami.

nombasapu anu niuli i Stefanus, sabana Nosa Gasa nu Alatala nombadekei kapande ka ia notesa.

¹¹ Jadi nidekeira doi mate ka bara sako-ndua tona ala raulira, “Niepe kami tona haitu nanjalai Nabi Musa bo Alatala.” ¹² Ivesiamo ira nompakapane rara ntodea bo totua-totua ntoYahudi bo guru-guru agama sampe narau rarara nte i Stefanus. Jadi hau ira nombasaka i Stefanus, pade nikenira ratangara ri ngayo Polibu Mbaso Agama Yahudi. ¹³ Nikenira muni sabi-sabi mpodava ri ngayo ntoPolibu haitu mombatesa i Stefanus anu ledo nakana-kanaka. Sabi-sabi haitu nanguli, “I Stefanus nasaro nanjalai Banua nu Alatala anu nagasa, bo nasaro muni nisalaina Atura-atura nu Alatala anu nipa-pola Nabi Musa ka kita. ¹⁴ Niepe kami ia nanguli i Yesus toNazaret mombagerosi Banua nu Alatala bo mombabaliki pura-pura ada anu nidekei i Musa ka kita.” ¹⁵ Pura-pura tona ri Polibu Mbaso haitu nangganotosi i Stefanus. Bo nikitara lenje i Stefanus nasimbayumu lenje nu malaeka.

Tesa i Stefanus notesa ri ngayo Polibu Mbaso Agama

7 Pakeni nTopanggeni Pesomba nompekutana i Stefanus, “Berimba? Nakana anu niulira?”

² Nesana i Stefanus, “Totua-totua bo sampesuvu-sampesuvu. Epemo tesaku hitu. Dopame i Abraham totuata nggaulu nolinja hau ri ngata Haran, tempo ia da nonturo ri tana Mesopotamia, Alatala toNeliu Kao-gena nakava nte ia. ³ Alatala nanguli ka i Abraham, ‘Palaisimo ngatamu bo sampesuvumu hitu. Koimo hau ri ngata Kupopakita ka iko.’ ⁴ Jadi nalai mpuumo i Abraham nompalaisi ngata ntoKasdim, bo nolinja hau ri ngata Haran. Naliu kamate ntuamana, Alatala nantudu ia molinja lako ri ngata Haran tumai ri tana Israel, tana niponturota sii-sii. ⁵ Tempo haitu, ledo naria tana nipopobagiaka nu Alatala ka i Abraham. Nau aga sandanga ledo ria nidekeiNa ka ia. Tapi Alatala nojanji mombadekei tana hitu ka i Abraham sampe ri muli nu mulina. Tempo Alatala nojanji haitu, i Abraham dopa noana. ‡

⁶ Tapi iveimo tesa niuli nu Alatala ka i Abraham, ‘Mulimu monturo mpo topesovo ri ngata ntona. Tupu ngata haitu mompobatua ira, bo mompandasa ira pataatu mpae kasaena. ⁷ Tapi maupu haitu, Kuhuku tona nompobatua ira. Bo mulimu mesuvu lako ri ngata haitu, bo manjili metupu nte Yaku ri sii ri ngata hitu.’ ††

⁸ Naupu notesa ivesia, nitudu nu Alatalamo i Abraham bo muli-mulina rasuna, tandana pojanjiNa nte i Abraham. Jadi tempo i Ishak ana i Abraham nipoanaka, ia nisuna i Abraham tempo umuruna da valu-eo. Ivesia muni i Ishak nombasuna anana i Yakub, bo i

†† Kajadia 12:1 ‡ Kajadia 17:8; 48:4 †† Kajadia 15:13-14; Pesuvu 3:12

Yakub muni nombasuna anana sapulu randua anu najadi totua-totuata toYahudi.

⁹ Totua-totuata, nasiriati nanggita tueira i Yusuf, sampe ia nipobalura ka toMesir. Ia nipajadi batua, tapi Alatala nombatulungi ia, ¹⁰ bo nombakabasaka ia lako ri pura-pura kasusana. Alatala nombadekei ka ia kande anu nompakadamba rara i Firaun, magau ntoMesir, sampe Firaun nombalanti ia majadi gubernur ri tana Mesir, bo topourusi pura-pura isi banuana.

¹¹ Naliu haitu, nakavamo tempo ara mpai ri tana Mesir bo ri tana Kanaan, sampe pura-pura manusia hamai nasusa mpuu. Ivesia muni totua-totuata, domo mpuu naria kandeara. ¹² Tapi tempo i Yakub nangepe naria kanda ri tana Mesir, nituduna anana, totua-totuata haitu, hau ri tana Mesir mangali kanda. Haitu-mo polipara paratama hau ri tana Mesir. ¹³ Karonggan-ina ira hau, i Yusuf nompopaisani ka sampesuvu-sampesuvuna haitu, 'Yakumo hii i Yusuf.' Lako ri sia pade nisani nu Magau Mesir sampesuvu-sampesuvu i Yusuf. ¹⁴⁻¹⁵ Naupu haitu i Yusuf nompakatu kareba ka tuamana i Yakub nerapi ala tuamana ante pura-pura ira sangata molinja hau ri tana Mesir. Jadi i Yakub sangata nolinja hau ri tana Mesir. Kadeana ira pura-pura pitupulu bo alima. Bara sako-mpae kasaena ira nonturo ri sia, namatemo i Yakub. Ivesia muni anana, totua-totuata nggaulu. ¹⁶ Buku mboara nikeni hau ri ngata Sikhem, bo nitana ri dayo niali Nabi Abraham bara ipia lako ri muli i Hemor ri Sikhem ante doi sala-ka.

¹⁷ Nasaemo kaliuna haitu, naparamo tempo Alatala mompakadupa pojanjiNa ka i Abraham. Totuata ri tana Mesir nantambai njuumo kadeara. ¹⁸ Nasae-sae naria saito magau ntanina nomparenta ri tana Mesir, ledo nisanina i Yusuf. ¹⁹ Magau haitu nadaa mpuu nompandasa totua-totuata bo nombabagiu ira. Niparentana ala ngana-ngana dako nesuvu kana ratedakara ala mamate pura.

²⁰ Tempo haitumo i Musa nipoanaka. I Musa ngana nagaya mpuu. Talu-mbulamo kasaena ia nipatuvusi ntina tuamana, *sampe domo namala ia nitabuniaka ntotuana*. ²¹ Bo tempo ia nikeni niboli ri savaliku ngata, saito ana mombine Magau Firaun nanggava ngana haitu. Jadi nialana bo nipatuvusina mpo anana mboto. ²² Pura-pura pangisani bo ada-ada ntoMesir nipatuduki ka i Musa, sampe ia najadi tona naroso mpuu tesana bo poviana.

²³ Nagana patapulu mpae umuruna, neumbamo dota rarana hau manggita sampesuvu-sampesuvuna toIsrael. ²⁴ Nakava ri sia, nikitana saito toIsrael niboba ntoMesir. Jadi hau ia mombasaliku sampesuvuna niboba haitu bo nipatesinamo toMesir. ²⁵ Nisarumaka i Musa rasani nu sampesuvu-sampesuvuna toIsrael

iamo nipelisi nu Alatala mombakabasaka ira lako ri pobatua ntoMesir. Tano ledo mpuu nisanira. ²⁶ Kamailekana, hau vai ia bo nikitana randua toIsrael nosibaga. Ia nompasimbuku mompoposinggabelo ira randua. Nanguli ia, 'Komiu tu nosampesuvu! Nakuya komiu nosibaga, le?'

²⁷ Tapi tona nombaboba roana haitu nombajunaka i Musa, bo nanguli, 'Isema nangangataka iko majadi totua ngata atau topotangara kami?' ²⁸ Iko bara mado-ta mompatesi yaku nasimbayu mpo toMesir nipatesimu riavi! ††

²⁹ Nangepe haitu, nalaimo i Musa lako ri tana Mesir, sabana poviana nompatesi toMesir nisani ntonamo. Hau ia nonturo ri tana Midian. Bo hamai ia noberei bo noana randua ngana langgai.

³⁰ Patapulu mpae kaliuna, nakavamo saito malaekante i Musa ri karava bai napara Bulu Sinai. Malaeka haitu neonga riara apu ri santungu gumbu navaya. ³¹ Nokumaa i Musa nanggita gumbu navaya bo hau ia manggaparai bo niparesana gumbu haitu. Pade niepena suara nTupu nanguli, ³² 'Yakumo hii Alatala anu nisomba ntotuamu nggaulu, Tupu i Abraham, i Ishak bo i Yakub.' †† Nangepe haitu, naekamo rara i Musa sampe nolete bo domo nabia ia mompeinta gumbu navaya haitu.

³³ Nanguli vaimo Alatala ka ia, 'Vonju sapatumu, apa tana nipeanggamu tutu tana nagasa. ††³⁴ NikitaKu bo nipariaraKu kandasa ntodeaKu ri tana Mesir. Bo niepeKumo pekakaira nerapi tulungi. Haitu sampe Yaku nanau mombakabasaka ira. Jadi panggalivomo, iko Kutudu manjili hau ri tana Mesir mombakabasaka ira! ††† Ivesiamo tesa nu Alatala ka i Musa.

³⁵ I Musa hitumo anu ledo nipokono ntoIsrael bo nipoarara ante tesa ivei: 'Isema nangangataka iko majadi totua ngata atau topotangara kami?' ††† Tapi ia mpuu-mpuu nipelisi nu Alatala manggeniaka ira bo mombakabasaka ira lako ri pobatua ntoMesir. Haitu nipoviana ante petulungi nu malaeka anu nakava nte ia ri gumbu navaya. ³⁶ I Musamo mai tona nanggeni todea toIsrael nesuvu lako ri tana Mesir, bo nipoviana kabaraka-kabaraka bo tanda-tanda nipokumaaka ri tana Mesir, ri Tasi Nalei bo ri karava-karava bai patapulu mpae kasaena. ³⁷ I Musa muni nanguli ka todea toIsrael, 'Alatala nombadekei ka komiu saito Nabi nasimbayu mpo yaku [§], rapelisiNa lako nte komiu mboto.' ³⁸ I Musa muni naria nosangani-nggani nte todea toIsrael ri karava bai, bo i Musamo mai najadi topetariolo ntotuata ante malaeka anu notesa ka ia ri Bulu Sinai. I Musamo mai nantarima tesa natuvu lako nte Alatala bo nipapolana ka kita.

†† Pesuvu 2:14 † Pesuvu 3:2 †† Pesuvu 3:6 †† Tana haitu nireke nagasa sabana ri sia peonga nTupu. ††† Pesuvu 3:5,7-8,10 ††† Pesuvu 2:14 § nasimbayu mpo yaku ATAU: nasimbayu mpo pompelisiNa yaku. Peinta Ulangan 18:15.

³⁹ Naupa ivesia, totua-totuata ledo ntoto nioseakara tesa i Musa. Nisapuakara tesana bo ira madota manjili hau ri tana Mesir. ⁴⁰ Niulira ka i Harun, tuaka i Musa, 'Povia ka kami sangu pinoito anu mamala manggeniaka kami. Apa domo nisani kami bara nuapamo najadi nte i Musa anu nanggeni kami nesuvu lako ri tana Mesir!' ⁴¹ Jadipa, nipoviaramo sangu pinoito nolenje mpo ana japi. Naupu haitu nikenira pesomba bo nisambaleka binata ka pinoito haitu, bo nipoviara posusa mombatoiya anu nipovia mpalera mboto. ⁴² Jadi Alatala nompalaisi ira bo nompalamba ira nombasomba betue-betue ri langi. Haitu nitulisi riaru buku nu nabi-nabi ivei:

'O, toIsrael! Nisambalemiu binata rapesombamiu ri karava bai patapulu mpae kasaena, tapi ledo nipesombamiu ka Yaku.

⁴³ Ledo aga haitu, tapi tenda pesomba ka viata Molokh †† nikenikenimiu nosanggeni-nggani ante pinoito nolenje mpo betue viata Refan! Pinoito-pinoito haitumo nipoviamiu rasombamiu. Haitu sabana komiukana Kutedaka makavao, haunapa lako ri tana Babel!

Amos 5:25-27

⁴⁴ Sampesuvu-sampesuvu. Tempo totua-totuata naria ri karava bai, naria nte ira tenda petupu, tandana Alatala nonturo nosanggeni-nggani ante ira. Tenda haitu nipoviara nantuntuni parenta nu Alatala ka i Musa bo nantuntuni gambara nipopakita nu Alatala ka ia. ⁴⁵ Tenda haitu nidekei ka mulira bo ira nanggeni tenda haitu tumai ri tana Kanaan hitu. Tempo haitu Alatala nompopalai tupu ngata Kanaan bo i Yosua nanggeniaka toIsrael nompemala ngata anu niponturota sii-sii. Bo tenda haitu da nipakera metupu nte Alatala sampe ri tempo Magau Daud. ⁴⁶ Magau Daud nompakadamba rara nu Alatala bo niperapina nte Alatala ala ia rapaloga movia banua raponturo nu Alatala, haitumo Alatala nisomba i Yakub. ⁴⁷ Tapi damo anana, Magau Salomo nombabangu Banua nu Alatala. ⁴⁸ Naupa ivesia, Alatala anu Neliu KaogeNa, ledo nonturo ri banua nipovia nu manusia. Apa riaru buku nu nabi nitulisi ivei:

⁴⁹ 'Langi gaderaKu bo tana potande kadaKu.

Banua nuapa rapoviamiu Kuponturo? Ri umba ponturo Kupangosanaka?

⁵⁰ Sabana, dunia ante pura-pura isina, Yaku mboto nompajadina!

Ivesiamo tesa nu Alatala.

Yesaya 66:1-2

⁵¹ Sampesuvu-sampesuvu, nakaa mpuu bagamiu! Bo komiu mpuu-mpuu netibongo! Ledo nadota komiu mangepe bo mangoseaka Tesa nu Alatala! Komiu batena nasimbay mpo totuamiu nggaulu nangeva

† Pesuvu 32:1,23 †† Viata Molokh tupu nu langi bo mata nu eo nisomba ntoKanaan. I Refan viata nu planeta Saturn nisomba ntoMesir nggaulu.

Nosa Gasa nu Alatala! ⁵² Ledo ria saitoa nabi ledo nipandasa ntotuamiu nggaulu. Nipatesira muni nabi-nabi anu nompatolele kareba kakava i Yesus, Batua nu Alatala nanao. Bo sii-sii nipobalumi bo nipatesimiu Batua nu Alatala haitu! ⁵³ Komiumo nantarima Atura-atura nu Alatala anu nidekei nu malaeka-malaeka ka totuata nggaulu, tapi ledo nipokonomiu nangoseakana!"

I Stefanus nipatesi

⁵⁴ Nangepe tesa i Stefanus pangane, nadua mpuumo rara ntoPolibu Mbaso Agama sampe nanggiki baga pura ira. ⁵⁵ Tapi i Stefanus nikuasai nu Nosa Gasa nu Alatala, bo nangingoa langi. Nikitana reme nu Alatala. Bo nikitana muni i Yesus neangga ri sablingga nggana nu Alatala. ⁵⁶ Nanguli i Stefanus, "Peintamo! Nikitaku langi natebuka bo i Yesus, Ana nu Manusia neangga ri sablingga nggana nu Alatala ri suruga!"

⁵⁷ Nangepe haitu, toPolibu Mbaso nongare-ngare bo nombaramu talingara ala domo raepera hanupa tesa i Stefanus. Nangova puramo ira hau mombasaka i Stefanus. ⁵⁸ Nidiisakara hau ri savaliku ngata, bo nirempera vatu. Sabi-sabi mpodava ri Polibu Mbaso pangane, nombavonju bajura bo nibolira nte tona nosanga i Saulus, ala mabelo ira mombarempe i Stefanus. ⁵⁹ Tempo i Stefanus da nirempera, nekakaimo ia, "Pue Yesus, siimo nyawaku!" ⁶⁰ Bo nantaputu ia bo nongare ante suara namangga, "Pue, ampungimo dosara hitu!" Naupu haitu, namatemo ia.

8 I Saulus nadamba apa i Stefanus nipatesira.

I Saulus nompandasa topangoseaka i Yesus

Nompamula eo haitu todea topangoseaka i Yesus ri ngata Yerusalem mpuu-mpuu nipandasa ntoYahudi sampe ira nasimpotare hau ri njumangu ngata ri bagia Yudea bo Samaria. Aga suro-suro i Yesus ledo nalai. ² Tona natundu nte Alatala nombatana i Stefanus ri dayo, bo nombatangisi ia ante nasusa mpuararara.

³ I Saulus nompasimbuku njuu mompandasa topangoseaka i Yesus ala domo raparasayara i Yesus. Nipebutuna banuara nipesuana bo isema-sema nomparasaya i Yesus, langgai bo mombine, niumbunjaina ri savalikuna bo nisuarakana riaru ntarunggu.

Kareba Belo lako nte Alatala nipatolele ri bagia Samaria

⁴ Topomparasaya nasimpotare haitu, nompatolele kareba lako nte Alatala ri umba-umba. ⁵ Saito ira nosanga i Filipus. Ia hau ri ngata Samaria bo nipatolelena ka tona hamai i Yesusmo Magau Topepakasalama anu nijanji nu Alatala. ⁶ Tempo todea nangepe i Filipus notesa bo nikitara kabaraka-kabaraka nipoviana, ni-

pariarara mpuumo anu nitesana haitu. ⁷ Apa nadea seta nipopalaina lako nte tona. Seta-seta haitu nesuvu bo nongare-ngare. Nadea muni tona nakoyo, tona nakejo, bo tona napunggu nipakabelona. ⁸ Jadi nadamba mpuumo rara ntona ri ngata Samaria.

⁹ Ri ngata haitu naria saito toposibalimata nosanga i Simon. Bara sakuya kasaena ia nompopokumaa todea ri ngata Samaria sabana poviana. Bo niulina iamo tona nabaraka. ¹⁰ Pura-pura tona ri ngata haitu, tomaoge bo tona biasa, nompariara tesana. Niulira, "I Simon mai naria baraka ntupu anu niuli 'Baraka Oge!'"

¹¹ Nasae mpuumo ia nompopokumaa ira ante posibali-matana sampe ira pura-pura nompariara ia. ¹² Tapi i Filipus nompatolele Kareba Belo ka ira. Kareba Belo haitu nanguli Poparenta nu Alatala bo i Yesus Kristus, Magau Topepakasalama. Niparasayaramo kareba haitu bo ira nidiumo, langgai bo mombine, tandana ira nomparasaya i Yesus. ¹³ I Simon mboto nomparasaya, bo naupu ia nidiu, nituntunina njuumo i Filipus. Nokumaa mpuu ia nanggita kabaraka-kabaraka bo tanda-tanda nipokumaaka nipovia i Filipus.

¹⁴ Suro-suro ri ngata Yerusalem nangepe kareba tona ri ngata Samaria nantarima tesa nu Alatalamo. Jadi nitudura i Petrus bo i Yohanes hau ri Samaria.

¹⁵ Tempo i Petrus bo Yohanes nakava hamai, niposambayakara toSamaria anu nomparasaya i Yesus ala Nosa Gasa nu Alatala manau nte ira. ¹⁶ Apa Nosa Gasa nu Alatala dopa nanau mombakuasai ira. Ira aga nidiu, tandana ira nomparasaya i Pue Yesus. ¹⁷ Jadi, i Petrus bo i Yohanes nombadika palera ri balengga ntoSamaria haitu bo Nosa Gasa nanau nte ira mpuu.

¹⁸ Nikita i Simon suro-suro nombadika palera ri balengga ntona haitu bo Nosa Gasa mombakuasai ira. Jadi nikeninamo doi ka i Petrus bo Yohanes apa ia madota mangali kabaraka haitu. ¹⁹ Niulina, "Dekei ka yaku muni kuasa tutu ala yaku muni mamala mombadika paleku ri balengga ntona sampe ira rakuasai Nosa Gasa nu Alatala."

²⁰ Tapi nesana i Petrus, "Masurukavu mpuu iko bo doimu! Nisarumakamu kabaraka nidekei nu Alatala mamala raali ante doi? ²¹ Iko ledo ntoto masipato metuntuni riaru pokarajaa kami hitu, sabana raramu ledo nanao ri panggita nu Alatala. ²²⁻²³ Nisaniku iko tu nasiriati bo iko nipobatua dosa! Jadi, kajeamo lako ri patujumu nadaa, bo perapimo nte i Pue ala raampungina pekirimu nadaa tutu!"

²⁴ Nanguli i Simon, "Ai! Tulungi posambayakamii yaku, perapi nte i Pue ala anu niulimii tutu ledo mam-bela yaku."

²⁵ Naupu i Petrus bo Yohanes nosabi bo nompatolele tesa i Pue ka todea, nanjilimo ira hau ri ngata Yerusalem. Bo riaru polipara haitu nipatolelera Kareba Belo ri ngata dea ri bagia Samaria.

I Filipus ante toEtiopia

²⁶ Naria malaeka nu Alatala nakava nangulika i Filipus, "Koimo hau ri puluna sampe mukava dala motua lako ri ngata Yerusalem hau ri ngata Gaza." (Dala haitu domo nasaro niose.) ²⁷⁻²⁸ Jadi haumo i Filipus.

Tempo haitu naria saito toEtiopia ri dala haitu notua lako ri ngata Yerusalem hau manjili ri ngatana mboto. Ia tona nalanga panggana bo ia nipakakuasa nombaurusi kakalumana i Kandake, Magau Mombine ri tana Etiopia. Tona haitu dako nombasomba Alatala ri ngata Yerusalem bo ia nodoka nanjili hau ri ngatana mboto. Tempo ia nonturo riaru dokana, ia nombabaca buku nitulisi Nabi Yesaya nggaulu. ²⁹ Jadi Nosa Gasa nanguli ka i Filipus, "Koi ragamo doka ntona hau tu."

³⁰ Jadi nangovamo i Filipus hau mantotoaka doka haitu. Niepena tona riaru nu doka nombaca buku nitulisi Nabi Yesaya. Jadi nekutanamo i Filipus, "Nisanimiiu batuana anu nibacamii tutu, tua?"

³¹ Nesana toEtiopia, "Berimba kusani ane ledo ria tona mombabatuasina ka yaku?" Pade niunakana i Filipus mesavi ri doka, bo monturo ri sinjorina. ³² Hitumo tesa-tesa lako ri buku Nabi Yesaya nibacana haitu:

Ia mpo bimba niumbu rakeni rasambale, mpo ana bimba ledo nombee nigau buluna. Ivesia muni ia ledo ntoto ria sambelaa notesa.

³³ Ia nisalai bo ledo nitangara nanao.

Ia nasalisa nipatesi sampe ledo ria mulina mamala ratutura ntona.

Yesaya 53:7-8

³⁴ Nanguli toEtiopia haitu ka i Filipus, "Uli kaku isema kakanana niuli Nabi Yesaya tempo nitesana tona nira-paka bimba, karonu mboto atau tona ntanina?" ³⁵ Jadi, i Filipus nompasimbayu Kareba Belo i Yesus ka tona haitu nompamula lako ri tesa-tesa nibacana pangane.

³⁶ Riaru polipara haitu, nikitara uve napara dala. Nanguli toEtiopia, "Peintamo! Moitu uve. Mamala yaku raudiu sii-sii?"

³⁷ [Nesanamo i Filipus, "Ane niparasayamii mpuu, mamala komiiu radiu."]

Nanguli toEtiopia haitu, "Niparasayaku i Yesus Kristus Iamo Ana nu Alatala!"

³⁸ Naliu sia, nipopetaanamo dokana, bo nanaumo ira randua lako ri doka bo hau riaru nu uve. ToEtiopia haitu nidiu i Filipusmo, tandana niparasayana i Yesus.

³⁹ Nesore ira lako riaru nu uve, Nosa Gasa nu Alatala nangala i Filipus lako ri sia bo domo nikita ntoEtiopia. ToEtiopia haitu nompapola polipana bo nadamba mpuu rarana. ⁴⁰ Ledo nisani-sani, nariamo i Filipus ri ngata Asdod. Nipapolana polipana bo nipatolelena Kareba Belo i Yesus ka todea ri pura-pura ngata sampe nakava ri ngata Kaisarea.

I Saulus najea bo nomparasaya i Yesus

Suro-suro 22:6-16; 26:12-18

9 Ri tempo haitu, i Saulus da nompararai njuu mompatesi topangoseaka i Pue Yesus. Ia hau ri ngayo nu Pakeni nTopanggeni Pesomba, ² bo nerapi sura kuasa rakenikana ka pakeni agama ri banua petupu ntoYahudi ri ngata Damsyik. Patujuna, ane rakavana topangoseaka Papatuduki i Yesus, bara lang-gai bara mombine, rasakana bo rakenina hau ratan-gara ri ngata Yerusalem.

³ Riara polipana hau ri ngata Damsyik, tempo napara ngata haitu, sampesanika naria reme nevanta lako ri langi nantiku ia. ⁴ Nadunggamo ia bo niepena suara nanguli ka ia, "Saulus, Saulus! Nakuya iko nompan-dasa Yaku?"

⁵ Nekutana i Saulus, "Isema komiu, tua?"

Nesana topotesa haitu, "Yakumo i Yesus, tona nipan-dasamu. ⁶ Jadi peanggamo! Koimo pesua riara ngata moitu. Hamai pade rauli ka iko anu masipato mupovia."

⁷ Tona nompokoroa i Saulus haitu natekaja mpuu sampe ledo nipakulera notesa, sabana ira muni nangepe suara haitu, tapi ledo nikitara topotesa. ⁸ Jadi neanggamo i Saulus, bo nibulana matana, tapi domo nekita, jadi damo ninini roana nesua ri ngata Damsyik. ⁹ Talu-mbongi kasaena ia ledo nekita bo ledo muni nangande ledo nanginu nuapa-nuapa.

¹⁰ Ri ngata Damsyik naria saito topangoseaka i Yesus nosanga i Ananias. Naria anu nipopakitana ka ia bo i Pue Yesus nanguli ka ia, "Ananias!"

Nesana i Ananias, "Iyo, sii yaku, Pue!"

¹¹ I Pue nanguli, "Koimo hau ri dala nosanga Dala Noa. Elomo ri sia saito tona lako ri ngata Tarsus nosanga i Saulus. Hitu-hitu ia nosambaya. ¹² Riara panggitana nikitana iko nakava nombadika palemu ri balenggana ala matana mekita mpanjili."

¹³ Nesanamo i Ananias, "Pue, niepeku nadea tona notesa i Saulus haitu. Niulira nadea mpuu todeaMiu nipandasana ri ngata Yerusalem ¹⁴ Sii-sii ia nakava mu-ni ri sii, nidekei kuasa lako ri balengga-balengga ntopanggeni pesomba mombasaka pura-pura kami topomparasaya Komiu."

¹⁵ Tapi nanguli i Pue, "Koimo! Apa nipelisiKumo ia mokarajaa ka Yaku mompatolele karebaKu ka tona le-do noagama Yahudi, ka magau-magau bo ka todea toIsrael muni. ¹⁶ Damo Yaku mboto manguli ka ia ka-susa rakavana sabana nioseakana Yaku bo nipatolele-na karebaKu."

¹⁷ Jadi haumo i Ananias ri banua i Yudas ri Dala Noa. Bo nesuamo ia riara banua bo nidikana palena ri balengga i Saulus, bo nanguli, "Sampesuvuku Saulus. I Pue Yesus nikitamu ri tatanga nu dala tempo komiu nolipa tumai, Iamo nombatudu yaku tumai, ala komiu

mekita mpanjili bo rakuasai nu Nosa Gasa nu Alatala." ¹⁸ Naupu i Ananias notesa haitu, kaliu-liu nanavu anu eva ruke bau lako ri mata i Saulus sampe nekita mpan-jilimo ia. Naupu haitu, nembangumo i Saulus bo nidiu, tandana niparasayanamo i Yesus. ¹⁹ Naupu nidiu, nangandemo ia bo naroso mpanjili bukuna.

I Saulus nompatolele kareba i Yesus ri ngata Damsyik

Naupu haitu, i Saulus nonturo nte topangoseaka i Yesus ri ngata Damsyik bara sako-mbongi kasaena. ²⁰ Tempo haitu muni, ia kaliu-liu hau ri banua-banua petupu ntoYahudi ri Damsyik nompatolele kareba i Yesus ka toYahudi. Ia nanguli, "Yesusmo Ana nu Alata-la!"

²¹ Nokumaa pura tona nangepe i Saulus. Niulira, "Berimba tano tona hitu? Ledo ia hitu mompatesi topangoseaka i Yesus ri ngata Yerusalem? Bo tumai munimo ia ante patujuna mombasaka topangoseaka i Yesus ri sii bo manggeni ira ratangara ri ngayo baleng-ga-balengga ntopanggeni pesomba!"

²² Tapi nasae-sae nantambai-mbai karoso i Saulus nompatuduki tona. Ia mpuu-mpuu natau nom-pakalanto ka ira, i Yesusmo Magau Topepakasalama anu nijanji nu Alatala, sampe toYahudi nonturo ri nga-ta Damsyik domo nipakulera nombabali tesana.

²³ Bara sakuya kasaena kaliuna haitu, toYahudi nas-intuvu mompatesi i Saulus. ²⁴ Eo bongi ira nompopea nojaga ri bobaa-bobaa ri tembo nu ngata haitu. Ane mesuvu ia, rapatesira. Tapi niara haitu nisani i Saulus. ²⁵ Jadi naria sambongi topangoseaka i Saulus nom-badika i Saulus riara karanji mbaso, bo niulura ia lako ri bavo nu tembo ngata haitu hau ri savaliku nu ngata, *ala mamala malai lako ri tona madota mompatesi ia.*

I Saulus ri ngata Yerusalem

²⁶ I Saulus nalai lako ri ngata Damsyik hau ri ngata Yerusalem. Ri sia ia nompasimbuku mosanggan nte topangoseaka i Yesus. Tapi ira da naeka nte ia. Dopa niparasayara ia mpuu-mpuu topangoseaka i Yesus.

²⁷ Jadi i Barnabas hau nombatulungi i Saulus. Nikenina ia hau motesa nte suro-suro. I Barnabas notesa ka ira berimba i Saulus nanggita i Pue Yesus ri tatanga nu dala, bo i Pue notesa ka ia. Nitesana muni kabia i Saulus nompatolele kareba i Yesus ka tona ri ngata Damsyik. ²⁸ Nangepe tesa i Barnabas, nitarima nu suro-suromo i Saulus monturo singgani nte ira. Naupu sia, i Saulus nompatolele kareba i Pue Yesus ri nju-mangu ngata Yerusalem bo ledo ria eka nu rarana.

²⁹ Bo nitesana muni ka toYahudi anu nobasa Yunani bo nosinjanai nte ira. Tapi ira aga nompasimbuku mom-patesi ia. ³⁰ Topomparasaya ntanina niepera i Saulus rapatesi, jadi nikeniramo ia notua hau ri ngata

Kaisarea bo nitudura hau manjili ri ngata Tarsus, ngatana mboto.

³¹ Jadi todea topangoseaka i Yesus ri njumangu bagia Yudea, Galilea bo Samaria domo nipandasa. Kasae-sae kadea-dea tona nomparasaya i Yesus, bo todea topomparasaya nantambai karoso pomparasayara sabana ira natundu nte Alatala, bo sabana Nosa Gasa nantulungi ira.

I Petrus ri ngata Lida bo ri ngata Yope

³² I Petrus hau ri umba-umba nompelioda todea nu Alatala. Naria sanggani ia nesai ri ngata Lida. ³³ Ri sia, niposinggavakana saito langgai nosanga i Eneas. I Eneas mai napunggu, bo valu-mpaemo kasaena domo ntoto namala nembangu. ³⁴ Nanguli i Petrus ka ia, "Eneas, i Yesus Kristus mompakabelo iko. Pembangu-mo, pasiayumo paturumu." Naupu haitu kaliu-liu nabelomo i Eneas bo nembangu mpuumo ia. ³⁵ Pura-pura tona nonturo ri ngata Lida bo ri ngata Saron nanggita i Eneas nabelomo. Jadi niparasayara munimo i Pue Yesus.

³⁶ Napara ngata Lida naria ngata ntanina nosanga Yope. Ri ngata Yope naria saito mombine topangoseaka i Yesus, sangana i Tabita. (Riara basa Yunani sangana i Dorkas, batuana "rusa".) Pokaingguna nabelo, bo ia nasaro nantulungi tona napakasi. ³⁷ Tempo haitu nadua i Tabita bo namatemo. Naupu mboana nidu, niken i niboli riara ntombi ri kalangana. ³⁸ Topangoseaka i Yesus ri ngata Yope nangepe i Petrus naria ri ngata Lida. Bo ngata Yope ledi nakavao lako ri ngata Lida pangane. Sia sampe nitudura randua tona hau manguli petevai ka i Petrus ivei: "Kamai masalisa tumai ri ngata Yope." ³⁹ Nangepe tesa ntona randua haitu, haimo i Petrus nantuntuni ira hau ri ngata Yope. Nakava ri sia, ia niken i hau ri tombi ri kalangana haitu. Pura-pura timbala notumangi nantagui i Petrus bo nipopakitaraka ka ia baju-baju bo pakea nidau i Tabita ka ira tempo ia da natuvu.

⁴⁰ I Petrus nantudu ira mesuvu pura, pade nantaputu ia nosambaya. Naupu haitu, nitingayona mboa i Tabita bo nanguli, "Tabita, pembangu-mo!" Naupu i Petrus nanguli ivesia, nibula i Tabitamo matana. Nikitanapa i Petrus, nembangumo ia bo nonturo. ⁴¹ Bo i Petrus nanggangisi palena nantulungi ia meangga. Naupu sia i Petrus nompokio timbala-timbala pangane bo topomparasaya ri sia bo niulikana ira, "Siimo roamiu, natuvu mpanjilimo ia."

⁴² Kareba kajadia haitu natolele ri njumangu ngata Yope, sampe nadeamo tona nomparasaya i Pue Yesus. ⁴³ Naliu haitu, bara sako-mbongipa i Petrus nonturo ri ngata Yope haitu ri banua ntopokarajaa kulimba nosanga i Simon.

I Petrus nompatolele Kareba Belo ka i Kornelius

¹⁰ Ri ngata Kaisarea naria saito langgai nosanga i Kornelius. Ia tantara nu Magau Mbaso Kaisar bo ia balengga ntantara anu nombabalenggai saatu tantara ntanina anu niuli Lunu ntoItalia. ² I Kornelius natundu nte Alatala. Naupa ira ledi toYahudi tapi ira sambanua netupu nte Alatala. Ia nasaro nantulungi toYahudi anu napakasi, bo ia nasaro nosambaya ka Alatala. ³ Naria saeo nitasere tinti tatalu ede eo, naria anu nipopakita ka ia, haitumo saito malaeka nu Alatala nakava nombaronde ia, "Kornelius!"

⁴ Naeka mpuu i Kornelius nanggita malaeka haitu. Nesana i Kornelius, "Nuapa, tua?"

Nanguli malaeka, "Posambayamu nitarima nu Alatalamo, bo nitorana kabelo raramu nantulungi tona napakasi. ⁵ Jadi tudumo tona hau ri ngata Yope mangulika tona nosanga i Simon Petrus tumai. ⁶ Ia nesai ri banua ntopokarajaa kulimba anu nosanga i Simon, anu nonturo ri talinti."

⁷ Naupu haitu, nalaimo malaeka. I Kornelius nompokio randua topokarajaa lako riara nu banuana. Nipokiona muni saito tantara niparasayana, anu netupu nte i Alatala muni. ⁸ I Kornelius notesa ka ira tatalu anu dako najadi riara mpanggitana, pade nituduna ira hau ri ngata Yope nompokio i Simon Petrus.

⁹ Ri eo kamailena, tempo natanga eo, ira tatalu da ri polipara maparamo ngata Yope, i Petrus nompene mosambaya ri ata nu banua anu nantalumbu. ¹⁰ Da nosambaya, naara mpuumo taina, madota mangande. Da nompopea kande rapakasadia, naria anu nipopakita ka ia. ¹¹ Nikitana langi natebuka bo naria eva sabala kae nabini niloe ri sokina pata-njoki nateuluraka lako ri langi sampe ri tana. ¹² Riara nu kae haitu naria mpengaya-ngaya binata: naria nokada pata-nggada, naria nenjoyo, bo naria muni tonji-tonji navura *binata anu nitagi rakande ntoYahudi*. ¹³ Pade naria suara nanguli ka ia, "Petrus, peanggammo! Sambalemo binata-binata hitu bo kandemo!"

¹⁴ Tapi nesana i Petrus, "Ledaku, Pue! Dopa sanggani nikandeku anu nipopali bara anu naruto nantuntuni Atura agama!"

¹⁵ Tapi suara haitu nanguli vai ka ia, "Anu niuli nu Alatala nabelo, nee muuli nipopali!" ¹⁶ Anu nipopakita ka ia, nisili sampe talu-nggani. Naupu haitu kae ante binata pangane nateoretaka mpanjili hau ri langimo.

¹⁷ Naingu mpuu rara i Petrus nompekirika batuana anu nikitana pangane. Da nompekiri-pekiri i Petrus, nakavamo tona tatalu anu nitudu i Kornelius mangelo banua i Simon. Ira neangga ri vambana ¹⁸ bo nekutana, "Naria torata nesai nte komiu ri sii nosanga i Simon Petrus?"

¹⁹ I Petrus da nompekirika batuanu anu nipopakita ka ia pangane, Nosa Gasa nu Alatala nanguli ka ia, "Petrus, naria tatalu tona nakava nompaelo iko.

²⁰ Panau masalisa hau ri tambena. Nau ira ledo toYahudi, nee makaja raramu mantuntuni ira, sabana Yaku mboto nantudu ira tumai."

²¹ Jadi nanaumo i Petrus hau ri tambena bo nangulika tona tatalu haitu, "Yakumo hii tona nielomiu. Nuapa paraluumiu nte yaku?"

²² Niulira, "Kami hii nitudu Kapten Kornelius tumai. Nau ia ledo toYahudi, ia tona nanao bo ia natundu nte Alatala bo pura-pura toYahudi nombabila ia. Naria malaeka nu Alatala nantudu ia mompokio komiu hau ri banuana ala raepena anu raulimiu ka ia."

²³ Naupu haitu i Petrus nombaunaka ira maturu ri banua niponturona sambongi. Jadipa naturumo ira.

Naeo mpadondo, haumo i Petrus nosanggani-nggani ante ira, bo bara sako-ndua topomparasaya lako ri ngata Yope nantuntuni ira. ²⁴ Sambongi ira naturu ri dala pade nakava ri ngata Kaisarea. Ri sia ira nipopeapea i Kornelius sambanua. Naria muni sampesuvu-sampesuvuna bo vega-vega rapana nipasiromuna ri banuana. ²⁵ Tempo i Petrus nakava, haumo i Kornelius nantomunaka ia, bo nantaputu ri ngayo i Petrus mombasomba ia. ²⁶ Tapi i Petrus nanggngisi palena mompopeangga ia bo niulikana, "Peanggamo. Yaku hii aga manusia biasa muni, nasimbayu mpo komiu!" ²⁷ Da ranja mpotesa nte i Kornelius, nesuamo i Petrus hau rabanua. Nikitana nadeamo tona nasiromu, ²⁸ bo niulikana ira, "Sampesuvu-sampesuvu, nisanimiu mboto, nantuntuni Atura agama Yahudi, kami toYahudi nitagi mosimporoa atau mompanjayo tona ledo toYahudi. Tapi Alatala nompakalanto ka yaku riaru anu nipopakitaNa ka yaku, ledo mamala kuuli sanu manusia naruto atau ledo mamala kuporoo, *sabana Alatala nantarima pura-pura manusia.*" ²⁹ Haitumo sabana ledo nakaja raraku nakava tumai tempo yaku niulikamiu tumai. Jadi, uli kaku, nuapa patujumiu nompokio yaku tumai?"

³⁰ Nesanamo i Kornelius, "Talu-mbongi naliu, nitasere jaa ivehitu muni, tinti tatalu ede eo, yaku nosambaya ri banuaku. Sampesanika naria saito malaeka nikitaku neangga ri ngayoku. Pakeana nenggila-nggila. ³¹ Ia nanguli ka yaku ivei: 'Kornelius! Posambayamu nitarima nu Alatalamo, bo nitorana kabelo raramu nantulungi tona napakasi. ³² Jadi tudumo tona hau ri ngata Yope mangulika tona nosanga i Simon Petrus tumai. Ia nesai ri banua ntopokarajaa kulimba anu nosanga i Simon, anu nonturo ri talinti.'

³³ Haitumo sampe nitudukumo nasalisa tona hau mangulika komiu tumai. Nabelo mpuu raramiu nakava tumai. Hitupa kami nasiromu puramo ri panggita nu Alatala, ala raepe kami pura-pura anu niuliNa ratesamiu ka kami."

I Petrus nompasimbayu Kareba Belo ka i Kornelius sambanua

³⁴ Naupu haitu i Petrus nanguli ka ira, "Sampesuvu-sampesuvu, hitupa nisanikumo Alatala ledo nompeleje nanggita manusia. ³⁵ Isema-sema natundu nte Alatala bo novia anu nanao, tona haitumo nitarima nu Alatala. Alatala ledo nompelisi tona lako ri umba.

³⁶ Sampesuvu-sampesuvu, nisanimiu mbotomo isi kareba nipasimbayu nu Alatala ka kami toIsrael. Kareba haitu nanguli i Yesus Kristus anu nompoposinggabelo manusia ante Alatala. I Yesusmo Tuputa pura-pura, ledo aga Tupu ntoYahudi. ³⁷ Nisanimiu anu najadi ri njumangu tana ntoYahudi. Nompamula ri bagia Galilea, tempo i Yohanes nombadiu tona anu najea lako ri dosa-dosara. ³⁸ Nisanimiu muni Alatala nompelisi i Yesus toNazaret bo nidekeiNa Nosa Gasa bo kuasa. Nisanimiu muni i Yesus hau ri umba-umba novia anu nabelo, bo nipakabeloNa pura-pura tona nipandasa Magau nu Seta sabana Alatala naria nte Ia.

³⁹ Kamimo hii sabi pura-pura anu nipoviaNa ri tana ntoYahudi sampe ri ngata Yerusalem. Kaupuna i Yesus haitu nipatesi ntoYahudi, nipaku ri kayu salib. ⁴⁰ Tapi ri eo katataluna, Alatala nompakatuvu Ia mpanjili, pade nipopakitaNa ka manusia. ⁴¹ Tapi ledo pura-pura tona nanggita Ia, aga kami nipelisi nu Alatala nokolu majadi sabi-sabiNa. Naliu i Yesus natuvu mpanjili, kami nanggande bo nanginu nosanggani-nggani nte Ia. ⁴² Bo nituduNa kami mompatolele Kareba Belo haitu ka pura-pura tona, bo manguli ka tona Iamo nianggataka nu Alatala majadi Topotangara pura-pura manusia da natuvu bo anu namatemo. ⁴³ Pura-pura nabi nggaulu notesa i Yesus. Niulira isema-sema momparasaya i Yesus, dosana raampungu ante kuasa i Yesus."

Tona ledo toYahudi nikuasai Nosa Gasa nu Alatala muni

⁴⁴ Da notesa i Petrus, nanaumo Nosa Gasa nu Alatala bo nombakuasai pura-pura topangepe tesa haitu.

⁴⁵ ToYahudi anu nompapasaya i Yesus, anu nantuntuni i Petrus lako ri Yope, ira pura-pura nokumaa sabana Nosa Gasa nipopanau muni ka tona ledo toYahudi.

⁴⁶ Nisanira tona haitu nikuasai Nosa Gasa sabana niepera ira notesa ante basa-basa nidekei nu Nosa Gasa ka ira bo nantoiya kaoge nu Alatala. Jadi i Petrus nanguli ka roana, ⁴⁷ "Peintamo! Tona hitu nantarima Nosa Gasa nu Alatala munimo nasimbayu mpo kita toYahudi. Jadi isema mombatagi ira? Ira muni kana radiu nte uve, tandana ira nangoseaka i Yesus!" ⁴⁸ Jadi i Petrus nantudu gi Kornelius sambanua radiu nte uve, tandana ira nompapasaya i Yesus Kristus. Naupu nidu, niperapira i Petrus monturo ante ira bara sako-mbongi.

I Petrus notesa anu najadi ri Kaisarea nte topangoseaka i Yesus ri Yerusalem

11 Suro-suro i Pue Yesus bo topomparasaya ri nju-mangu bagia Yudea, nangepe tona ledo noagama Yahudi nomparasaya tesa nu Alatala munimo.

²Tempo i Petrus hau ri ngata Yerusalem, toYahudi anu nomparasaya i Yesus nompakasala ia. ³Niulira, "Nakuya komiu hau ri banua ntona ledo toYahudi? Bo nakuya komiu nangande mpasangani-nggani nte ira?"[†]

⁴Nangepe tesa haitu, i Petrus notesa ka ira pura-pura anu najadi lako ri pantepuuna. Niulina, ⁵"Tempo yaku nosambaya ri ngata Yope, naria anu nipopakita ka yaku. Nikitaku eva sabala kae nabini niuluraka lako ri langi niloe ri sokina pata-njoki bo nituu ri ngayoku. ⁶Riara nu kae haitu nikitaku mpengaya-ngaya binata nokada pata-nggada, bo binata-binata navura, binata-binata nenjoyo, bo tonji-tonji navura. ⁷Niepeku suara nanguli ka yaku, 'Anumo, peanggamu, Petrus! Sambalemo binata tutu bo kandemo!' ⁸Tapi nesana yaku, 'Ledaku, Pue. Dopa sanggani nikandeku anu nipopali bo naruto mpo binata moitu!' ⁹Tapi naria vaimo suara haitu lako ri langi, 'Anu niuliku nabelo rakande, nee muuli nipopali!' ¹⁰Talu-nggani nikitaku anu haitu, pade nioretaka mpanjili kae haitu hau ri langi.

¹¹Eva nisuka tempo haitu muni, tatalu tona lako ri ngata Kaisarea nakava ri banua ponturoku. Ira nitudu i Kornelius hau mangala yaku. ¹²Bo Nosa Gasa nu Alatala nantudu yaku hau nosangani-nggani ante ira bo nee makaja raraku. Jadi haumo yaku. Aono sampesuvu sampomparasaya lako ri ngata Yope nantuntuni yaku hau ri ngata Kaisarea, bo kami pura-pura nesua rabanua i Kornelius. ¹³Naupu haitu i Kornelius notesa ka kami nikitana malaeka neangga riara banuana bo nanguli, 'Tudumo tona hau ri ngata Yope mangala langgai nosanga i Simon Petrus. ¹⁴Raulina ka iko berimba komiu sambanua mamala rapakasalama.' "

¹⁵I Petrus nompapola tesana, "Tempo yaku da notesa ka ira, nanaumo Nosa Gasa nte ira nasimbayu mpo panauNa ante kita ri pamulana. ¹⁶Pade nitoraku tesa i Pue Yesus bara ipia ivei: 'I Yohanes nombadiu tona ante uve, tapi komiu radiu ante Nosa Gasa nu Alatala!' ¹⁷Sampesuvu-sampesuvuku, nalantomo Alatala nombadekei Nosa Gasana ka tona ledo noagama Yahudi nasimbayu mpo nidekeiNa ka kita tempo kita nomparasaya i Pue Yesus Kristus. Jadi isema yaku sampe mamala kutagi Alatala ane Ia mboto madota nombadekei Nosa Gasa ka tona ledo noagama Yahudi?"

[†] *Nangoseaka atura agama Yahudi, ane toYahudi mosimporea ante tona ledo toYahudi, haitumo "tona ledo nisuna", ira rareke maruto bo ledo mamala movia ada agamara. Jadi nadea toYahudi anu nomparasaya i Yesus, ledo nadota nosimporea nte tona ledo toYahudi.*

¹⁸Tempo tona nasiromu ri sia nangepe tesa i Petrus, domo ira nebali. Ira nosangani-ngganimo nantoiya Alatala. Niulira, "Ane ivesia tano, todea ledo toYahudi muni nipaloga nu Alatala majea lako ri dosa-dosara bo mantarima katuvua nabelo sampe ri kasae-saena!"

Todea topomparasaya i Yesus ri ngata Antiokhia

¹⁹Namatepa i Stefanus nirempe watu, nadeamo topomparasaya i Yesus nipandasa sampe nadea nalai nosimpogaa-gaa hau ri umba-umba ngata. Naria sanu nalai sampe ri propinsi Fenisia, bo naria muni nalai hau ri levuto Siprus bo ngata Antiokhia. Nipatolelera kareba lako nte Alatala ri ngata-ngata nikalaura, tapi aga ka toYahudi. ²⁰Tapi naria muni roara lako ri levuto Siprus bo propinsi Kirene hau ri ngata Antiokhia bo nompatolele Kareba Belo i Yesus ka tona ledo noagama Yahudi. ²¹Kuasa nTupu naria nte ira sampe nadea toAntiokhia nomparasaya bo nombadekei katuvura ka i Pue Yesus.

²²Todea topomparasaya ri ngata Yerusalem nangepe kajadia haitu muni. Jadi nitudura i Barnabas hau ri ngata Antiokhia. ²³Nakavapa i Barnabas ri Antiokhia, nadamba mpuu rarana nanggita kabelo nu Alatala nte ira. Jadi nipakarosona rarara ala ira bate-batena mangoseaka i Pue Yesus ante mpuu-mpuu rarara. ²⁴I Barnabas haitu tona nabelo rarana, bo nikeniakei Nosa Gasa nu Alatala. Naroso mpuu pomparasayana. Bo nadea tona ri Antiokhia nikenina nomparasaya i Pue Yesus.

²⁵Naupu haitu i Barnabas hau ri ngata Tarsus mangelo i Saulus. ²⁶Nosinggavapa ia ante i Saulus, haumo ira randua ri ngata Antiokhia. I Barnabas bo i Saulus nonturo sumai sampae kasaena. Ira nasaro nasiromu nosangani-nggani nte todea topomparasaya bo nadea mpuu tona nipatudukira. Ri ngata Antiokhia haitumo topangoseaka i Yesus pamula-mulana niuli toKristen.

²⁷Ri tempo haitu muni naria bara sako-ndua topomparasaya lako ri Yerusalem hau ri ngata Antiokhia. Topomparasaya haitu nabi *apa naria pompakule nidekei nu Alatala ka ira mombasovadaka tesaNa*.²⁸ Saito ira nosanga i Agabus. Ia neangga ri tatangara bo ante pekeniaka Nosa Gasa nu Alatala, niulina kana majadi ara mpai ri njumangu dunia. (Ara mpai haitu mpuu-mpuu najadi tempo i Klaudius najadi Magau Mbaso). ²⁹Nangepe haitu, pura-pura topangoseaka i Yesus ri Antiokhia, nasintuvu mompakatu petulungi ka sampesuvura sampomparasaya anu nonturo ri bagia Yudea. Ira nombadekei nantuntuni pompakulera saito-saito. ³⁰Sintuvura haitu nipoviara mpuumo, nitudura i Barnabas bo i Saulus manggeni pedekeira haitu ka pakeni-pakeni ntopangoseaka i Yesus ri ngata Yerusalem.

Topangoseaka i Yesus nipandasa vaimo

12 Tempo haitu muni, Magau Herodes Agripa nompamula nompandasa bara sako-ndua topomparasaya. ² Nituduna tona mompatesi i Yakobus, sampesuvu i Yohanes, ante guma. ³ Nisani i Herodes poviana haitu nompakadamba rara ntoYahudi, jadi nipoviana vaimo mpo pangane. Ni-parentanamo tona mombasaka i Petrus muni. Haitu najadi tempo Posusa Roti Ledo Noragi. ⁴ Naupu i Petrus nisaka, nisuarakara riarar ntarunggu, bo Magau Herodes nantudu ampa lunu tantara mombajagai ia, ampa tantara salunu. Patuju i Herodes ala i Petrus ratangara ri ngayo ntodea maliutaka Eo Mbaso Paskah. ⁵ Jadi i Petrus nitaha riarar ntarunggu. Tapi todea topomparasaya i Yesus nosambaya njuu ka i Petrus ante mpuu-mpuu rarara.

I Petrus nikabasaka lako ri tarunggu

⁶ Bongina dopame Magau Herodes mombatangara i Petrus ri ngayo ntodea, i Petrus naturu ri tarunggu ri olo ntantara randua, nipou nu rante rompenga. Naria muni randua tantara ntanina nojaga ri vamba.

⁷ Sampesanika neongamo malaeka nTupu neangga ri sia, bo reme nevanta riarar ntombi nu tarunggu haitu. Malaeka haitu nombagoya-goya karo i Petrus bo nilikena. Nanguli malaeka, "Pembangumo masalisa!" Kaliu-liu nakabasaka mbotomo rante ase lako ri pale i Petrus. ⁸ Naupu sia malaeka nanguli, "Pasuamo baju-mu bo sapatumu." Jadi, nipasuana mpuumo bajuna bo sapatuna. Pade niuli nu malaeka vai, "Pasuamo baju ndoemu bo tuntunimo yaku!" ⁹ Pade nituntuninamo malaeka haitu nesuvu lako ri tarunggu, tapi dopa nisanina anu nipovia malaeka haitu mpuu-mpuu najadi. Nisarumakana aga pangipi.

¹⁰ Ira nolipa nombaliunaka ponturo ntopojaga vamba pamulana, bo vamba karanduana, sampe nakava ri bobaa ase hau riarar nu ngata. Bobaa ase haitu nate-ungge mbotomo. Nesuvumo ira nantuntuni dala sampenga, bo sampesanika nalipomo malaeka haitu nompalaisi i Petrus.

¹¹ Ri sia nanotomo rara i Petrus bo niulina, "Hitupa nisanikumole do aga pangipi! Tupu mpuu nombatudu malaekaNa mombakabasaka yaku lako ri kuasa Magau Herodes bo lako ri pura-pura anu rapovia ntoYahudi ka yaku." ¹² Naupu nompekirika kajadia haitu, haumo ia ri banua i Maria, tina Yohanes-Markus. Ri banua haitu nadea tona nasiromu nosambaya.

¹³ I Petrus nantanede vamba ri savalikuna bo saito batua mombine nosanga i Rode, nakava mombaungge vamba. ¹⁴ Niepena suara i Petrus, nadamba mpuumo ia. Bo kaliu-liu ia nesua mpanjili riarar nu ban-

ua, ledole nitorana nombaungge vamba ri savalikuna, bo niulikana ka todea ri sia i Petrus riarar ri savalikuna.

¹⁵ Tapi niulira ka ngana mombine haitu, "Nabaya iko!"

Tapi i Rode ledole naupu-upu nanguli ka ira i Petrus mpuu.

Bo ira aga nesana, "Bara aga malaekana."

¹⁶ Da notesa-tesa ira, i Petrus ledole nenonto-nonto nantanede vamba ri savalikuna. Kaupuna hau niunggera vamba. Nipeintara i Petrus mpuumo, jadi nokumaa puramo ira. Jadipa nesuamo i Petrus hau riarar banua, ¹⁷ bo nangangataka palena ala malino pura ira, pade nitesakana ira malaeka nTupu anu nanggeni ia nesuvu lako riarar ntarunggu. Bo niulina muni, "Uli kajadia hitu ka i Yakobus bo ka sampesuvuta ntanina." Naupu sia nalaimo i Petrus hau ri ponturo santanina.

¹⁸ Naeo mpadondo nasesa mpuumo tantara-tantara anu nojaga tarunggu haitu. Ira naingu bo naeka mpuu nompekirika anu najadi nte i Petrus. ¹⁹ Magau Herodes nantudu tona mangelo i Petrus, tapi ledole nikavara ia. Haitu sampe Magau Herodes nomparenta ala tantara sapulu aono topombajagai i Petrus, raparesa bo rapatesi.

Naupu haitu notuamo Magau Herodes lako ri bagia Yudea hau ri ngata Kaisarea, bo nonturo hamai bara sakuya kasaena.

Magau Herodes namate

²⁰ Magau Herodes narau mpuu ka tupu ngata Tirus bo Sidon. Jadi tupu nu ngata randua haitu nasintuvu nantudu tona hau merapi mosinggabelo ante i Herodes, sabana ngatara haitu nanjarumaka kandealako ri bagia poparenta i Herodes. Pamulana ira nombatarasi saito topotulungi nosanga i Blastus, anu nombaurusi banua Magau Herodes, sampe ia mosabingga ka ira. Naupu haitu hau ira nantingayo Magau Herodes merapi mosinggabelo.

²¹ Nanggava eo niovora, nipasua Magau Herodesmo pakea kamagauana bo hau nonturo ri gadera kamagauana bo notesa ka todea. ²² Todea haitu nongarengare nantoiya i Herodes. Niulira, "Hitu suara nu viata, ledole suara nu manusia!" ²³ Ri tempo haitumo malaeka nTupu nompakadua Magau Herodes, sabana ia ledole nompakaoge Alatala, ledole nitagina todea nanguli tesa haitu. Jadi da natuvu ia, nikande ndoromo sampe namate.

²⁴ Namatepa ia, kasae-sae nantambai-mbaimo kadea ntona nangepe Tesa nu Alatala, bo nompapasaya i Pue Yesus. ²⁵ Naupu i Barnabas bo i Saulus nanggeni pedekei ntoAntiokhia ka pakeni-pakeni ntopomparasaya ri ngata Yerusalem, nanjilimo ira hau ri ngata Antiokhia. Nikenira i Yohanes-Markus mosanggani-ngani nte ira.

I Barnabas bo i Saulus nipelisi bo nianggataka mompatolele Kareba Belo

13 Ri tatanga ntodea topomparasaya ri ngata Antiokhia naria bara sako-ndua guru bo nabi anu nompasimbayu Tesa nu Alatala, haitumo, i Barnabas, i Simeon anu nidae i Vuri, bo i Lukius toKirene, i Menahem anu nipakambaso nosanggani-nggani ante Magau Herodes Antipas, bo i Saulus. ² Naria saeo, todea topomparasaya pura-pura nosambaya bo nombatoiya Alatala bo nopuasa. Nosa Gasa nu Alatala nanguli ka ira, "Pelisi bo patani ka Yakumo i Barnabas bo i Saulus mantui pokarajaa nipakatantuKu ka ira." ³ Jadi naliu ira nopuasa bo nosambaya, nidikara palera ri balengga i Barnabas bo i Saulus, bo nianggatakara majadi suro mompatolele Kareba Belo.

I Barnabas bo i Saulus nanggeni Kareba Belo ri levuto Siprus

⁴ Jadi naupu i Barnabas bo i Saulus nitudu nu Nosa Gasa, hau ira ri pesampo Seleukia bo nesavi kapala hau ri levuto Siprus. ⁵ Nakava ri ngata Salamis ri levuto Siprus, nipatoleleramo tesa nu Alatala ri banua petupu ntoYahudi. I Yohanes-Markus muni nantuntuni nantungi ira ri polipara.

⁶⁸ Naupu ira noliu njumangu levuto Siprus, nakavamo ira ri ngata Pafos. Ri sia ira nosinggava nte toYahudi nosanga Bar-Yesus. I Bar-Yesus nosanga muni i Elimas riaru basa Yunani. I Elimas haitu toposibalimata bo niulina ia nabi nu Alatala, tano ledo nakana. Gubernur ri levuto haitu nosanga i Sergius-Paulus bo ia novega nte toposibalimata haitu. Gubernur haitu tona natau bo nanoto pekirina. Ia nompokio i Barnabas bo i Saulus, apa ia madota mangepe tesa nu Alatala. Tapi i Elimas, toposibalimata haitu, nangeva i Barnabas bo i Saulus sabana ledo nipokonona gubernur momparasaya i Yesus. ⁹ Tapi i Saulus, anu nidae muni i Paulus, nikenika Nosa Gasa nu Alatala. Nikanotosina toposibalimata haitu, ¹⁰ bo niulikana, "He, topebagiu nggaraka, ana nu Magau Seta! Ikomo nangeva pura-pura anu nabelo! Nakuya iko ledo nenonto nombatenggosi tesa nu Alatala nanoa? ¹¹ Hitupa Tupu mombahuku iko! Iko majadi maburo bo ledo mukita mata nu eo bara sako-eo kasaena!"

Nangepe haitu kaliu-liu naburomo mata i Elimas, nirasaina eva kulimu vuri nombabungu matana, damo nigayo-gayona luona nangelo tona mombanini ia. ¹² Nanggita kajadia haitu, niparasaya nu gubernurmo i Yesus. Nokumaa mpuu ia nangepe tesa i Pue Yesus, anu nipepatudukika i Paulus bo Barnabas.

I Paulus bo i Barnabas hau ri ngata Antiokhia ri propinsi Pisidia

¹³ Lako ri ngata Pafos ri levuto Siprus, i Paulus nte roana nesavi kapala ntasi hau ri ngata Perga ri propinsi Pamfilia. Nakava sumai i Yohanes-Markus nompalaisi ira bo nanjili hau ri ngata Yerusalem. ¹⁴ Lako ri ngata Perga, i Paulus bo i Barnabas nompapola polipara hau ri ngata Antiokhia ri propinsi Pisidia. Ri eo penonto, hau ira nesua nonturo riaru banua petupu ntoYahudi. ¹⁵ Naupu nibaca sanggato lako ri Buku Atura Agama bo Buku Nabi-nabi, pakeni-pakeni ri banua petupu haitu nantudu tona hau mompekutana i Paulus nte roana, "Sampesuvu-sampesuvu, ane maria tesamiau mompakaroso pomparasaya ntodea gahitu, radekei kami loga ka komiu motesa ka kami."

¹⁶ Jadi neanggamu i Paulus, bo nilaerakana palena, bo nanguli, "Sampesuvu-sampesuvuku toIsrael, bo pura-pura sampesuvuku ntanina ri sii, anu natundu nte Alatala. Epemo tesaku! ¹⁷ Alatala anu nisombata ntoIsrael nompelisi totua-totuata nggaulu majadi todeaNa. Tempo ira da nonturo ri tana Mesir, nipakadeaNa mulira. Naupu sia, nikenika ira mesuvu lako ri tana Mesir, ante kabarakaNa nambaso. ¹⁸ Patapulu-mpae kasaena Alatala nosabara nte pokainggura ri karava bai. ¹⁹ NiropusiNa papitu magau ante todea-todeara ri tana Kanaan, tana haitu nibagi-bagiNa ka toIsrael majadi tanara. ²⁰ Lako ri tempo ira hau ri tana Mesir sampe nesua ri tana Kanaan pataatu limapulu mpae kasaena.

Naupu tana Kanaan nibagi-bagiNa ka toIsrael, Alatala nompelisi ka ira topotangara-topotangara manggeniaka ira. Topotangara kaupuna haitumo Nabi Samuel. ²¹ Naupu sia, ira nerapi rapelisi ka ira magau anu manggeniaka ira. Jadi Alatala nompelisi ka ira i Saul, ana i Kish lako ri muli i Benyamin. Bo i Saul nanggeniaka ira patapulu mpae kasaena. ²² Tapi kaupuna i Saul nilesu nu Alatala, bo Alatala nompelisi i Daud majadi magaura. Hitumo anu niuli nu Alatala nombatesa Magau Daud: 'NikitaKu i Daud ana Isai. Ia nompakadamba raraKu bo nipoviana pura-pura dotaKu.' †

²³ Lako ri muli i Daud, Alatala nompelisi ka toIsrael saito Magau Topepakasalama nangoseaka pojanjiNa nggaulu, haitumo i Yesus. ²⁴ Dopame i Yesus nompamula pokarajaaNa, i Yohanes Topediu nangulika toIsrael ira kana majea lako ri dosara bo radiu nte uve, tandana ira mpuu-mpuu najea. ²⁵ Napara pokarajaana maupu, i Yohanes nanguli ka todea, 'Nantuntuni pang-gavamiu, isema yaku? Yaku hii ledo Magau nipopeamiu! Tapi pariaro! Magau haitu makava maupu pokarajaaku hitu. Ia nelabi kaogeNa pade

† Mazmur 89:21

yaku, sampe nau aga mombavole lui sapatuNa, ledo masipato yaku!"

²⁶ I Paulus nompapola tesana ivei: "Sampesuvu-sampesuvu muli i Abraham bo sampesuvu-sampesuvu ntanina anu natundu nte Alatala. Alatala nompakatu ka kita kareba anu mompakalanto berimba Alatala mompakasalama kita. ²⁷ Tona nonturo ri ngata Yerusalem bo pakeni-pakenira ledo nisanira i Yesus Magau Topepakasalama. Ledo muni nisanira batuana pepaduduki nu nabi-nabi anu nibaca ka ira ri eo-eo penonto. Haitumo sampe nihukura mate i Yesus. Bo poviara haitu nompakadupa anu niboto nu nabi-nabi pangane! ²⁸ Naupa ledo nikavara nau sangayaa salaNa anu masipato rahuku mate ka Ia, niperapira nte Gubernur Pilatus ala i Yesus rapatesi. ²⁹ Naupu nipandasara i Yesus, evamo nitulisi ri Buku Gasa, karo-batana nitoraka lako ri kayu salib bo niboli riaru nu dayo. ³⁰ Tapi Alatala nompakatu i mpanjili lako ri kamateNa. ³¹ Bara sakuya eo kasaena, nadea ngganina i Yesus nompopakita karoNa ka tona anu nantuntu ni Ia lako ri bagia Galilea hau ri ngata Yerusalem. Ira haitumo anu sii-sii najadi sabi-sabiNa ka todea toIsrael.

³² Jadi sampesuvu-sampesuvu, sii-sii kami nakava mompatolele Kareba Belo hitu ka komiu. Anu nijanji nu Alatala ka totua-totuata nggaulu, ³³ haitu nipakadupaNa ka kita tempo i Yesus nipakatuNa mpanjili. Naria nitulisi riaru Mazmur karanduana ivei: 'Ikomo AnaKu, eo hitu Yaku najadi TuamaMu.'

Mazmur 2:7

³⁴ Alatala nompakatu i Yesus mpanjili lako ri kamateNa. Bo domo Ia mamate atau mapopo riaru nu dayo, sabana Alatala nanguli: 'Anu nijanjiKu ka i Daud nggaulu nagasa bo natantu kadupana, Anu nijanjiKu haitu Kupakadupa ka Iko!'

Yesaya 55:3

³⁵ Ivesia muni batuana posambaya i Daud ri Buku Mazmur nanguli, 'Ledo rapalambaMiu Batua nipelisiMiu mapopo riaru nu dayo.'

Mazmur 16:10

³⁶ Tesa hitu ledo nambela i Daud, sabana naupu ia novia anu nitudu nu Alatala ka ia, namatemo ia. Bo ia nitana ri sinjori dayo ntutuana nggaulu, bo karo-batana napopomo. ³⁷ Tapi i Yesus nipakatu nu Alatala mpanjili lako ri kamateNa, i Yesus ledo napopo. ³⁸ Jadi sampesuvu-sampesuvu, kami nompopaisani ka komiu dosamiau namala raampungu nu Alatala sabana anu najadi nte i Yesus. ³⁹ Kita ledo namala rakabasaka lako ri dosata ane aga nangoseaka Atura-atura nipapola Nabi Musa. Tapi isema-sema nompapasaya i Yesus, rakabasaka lako ri pura-pura dosana bo majadi nanao ri panggita nu Alatala. ⁴⁰ Haitu sabana komiu kana

mainga ala nee majadi nte komiu anu nitulisi nu nabi-nabi ivei:

⁴¹ Alatala nanguli, 'Heh komiu anu ledo nompapasaya bo aga nongei-ngei, pariaramo tesaKu!

Komiu mahera manggita anu Kupovia tapi komiu aga maropu sanggani,

sabana tempo komiu da natuvu, Yaku movia anu ledo ntoto raparasayamiau, nau damo maria tona motesa pakalanto ka komiu.' "

Habakuk 1:5

⁴² Naupu sia, nesuvumo i Paulus bo i Barnabas lako ri banua petupu bo niperapi ntodea ala manjili vai ira ri eo penonto meonga mompapola anu nitesara pangane. ⁴³ Naupu puramo tona nesuvu lako ri banua petupu pangane, nadea toYahudi bo tona ntanina anu nesua agama Yahudi, nomporoa i Paulus bo i Barnabas. Suro-suro haitu nompakaroso rarara ala ira bate-batena manjarumaka kabelo nu Alatala.

⁴⁴ Eo penonto sunjuna haitu, pura-pura tona riaru ngata haitu nasiromu mangepe tesa nu Alatala.

⁴⁵ Nanggita todea haitu, nasiriati mpuumo rara nu pakeni ntoYahudi. Nisalaira i Paulus, bo nievara pura-pura anu niulina. ⁴⁶ Tapi i Paulus bo i Barnabas aga nantambai kabiara notesa ka ira ivei: "Masipato Tesa nu Alatala rapasimbayu ntani ruru ka komiu toYahudi. Tapi nipoaramiu tesa haitu. Nipakalantomiu mboto komiu ledo masipato manggava katuvu nabelo sampe ri kasae-saena. Sabana haitu, kami domo mompatolele tesa haitu ka komiu toYahudi! Hitupa kami hau nte tona ledo toYahudi, ⁴⁷ apa Tupu nompamenta ka kami ivei:

'NipelisiKu iko majadi reme anu mombavanta tona ledo toYahudi,

ala rasani ntona ri umba-umba ri dunia, Alatala mompakasalama manusia.' "

Yesaya 49:6; 42:6

⁴⁸ Tempo tona ledo toYahudi ri sia nangepe tesa haitu, nadamba mpuu rarara bo niulira, "Nabelo mpuu Tesa nu Alatala!" Isema-sema nipelisi nu Alatala manggava katuvua mabelo sampe ri kasae-saena, iramo nompapasaya i Yesus. ⁴⁹ Bo Tesa nu Alatala natolele ri umba-umba ri bagia haitu.

⁵⁰ Tapi tomaoge-tomaoge bo mombine-mombine anu naria nturona bo natundu nte Alatala, nipakapanentoYahudi sampe i Paulus bo i Barnabas nipandasa bo nipopalai lako ri ngata haitu. ⁵¹ Jadi i Paulus bo i Barnabas nombasapulai sovu lako ri kadara, tandana tona haitu nipoara nu Alatala. † Bo nalaimo ira hau ri ngata Ikonium. ⁵² Topangoseaka i Yesus ri ngata Antiokhia

† nombasapulai sovu lako ri kadara: Ane toYahudi manjili lako ri ngata ntona ledo toYahudi, biasana nisapulai sovu lako ri sapatu bo bajura apa nirekera tona ledo toYahudi naruto. I Paulus bo Barnabas novia ivesia muni ka toYahudi anu nompooa Kareba Belo, tandana ira muni nireke naruto ri panggita nu Alatala.

nadamba mpuu rarara, bo ira nikeniaika nu Nosa Gasa nu Alatala.

I Paulus bo i Barnabas ri ngata Ikonium

14 Anu najadi ri ngata Antiokhia najadi munimo ri ngata Ikonium. I Paulus bo i Barnabas hau ri banua petupu ntoYahudi, bo ri sia nitesa-tesara ka tona sampe nadea toYahudi bo tona ledo toYahudi nomparasaya i Yesus. ² Tapi toYahudi anu ledo nadota nomparasaya, aga nompakapane rara ntona ntanina ledo toYahudi sampe navuu matara nanggita topan-goseaka i Yesus. ³ I Paulus bo Barnabas nasae nonturo ri sia. Ledo naeka ira notesa i Pue Yesus ka tona. Nitesara pepotoveNa bo kabelo raraNa bo i Pue nombadekei kuasa ka ira movia kabaraka-kabaraka bo tanda-tanda nipokumaaka ala rasani ntodea tesa nu suro-suro haitu mpuu-mpuu nakana.

⁴ Tapi tona ri ngata haitu ledo nasintuvu. Naria nosabingga ka toYahudi, bo naria muni nosabingga ka suro-suro. ⁵ ToYahudi bo pakeni ntoYahudi nosang-gani-nggani ante tona ntanina ledo toYahudi, nasintuvu mompandasa bo mombarempa i Paulus bo i Barnabas ante vatu. ⁶ Tapi nisani i Paulus bo Barnabas nia ntona haitu, jadi nalaimo ira hau ri bagia Likaonia, haitumo ri ngata Listra, ngata Derbe bo ri ngata-ngata ntanina ri bagia haitu. ⁷ Nipatolelera muni Kareba Belo i Yesus ri sia.

I Paulus bo i Barnabas ri ngata Listra bo Derbe

⁸ Ri ngata Listra naria saito langgai napunggu lako ri pompoanakame. Ia ledo sanggani nolipa sabana kadana ledo naroso. ⁹ Topunggu haitu nonturo nangepe tesa i Paulus. I Paulus nanggita tona haitu bo nisanina tona haitu mamala rapakabelo sabana ni-parasayana mpuu. Jadi i Paulus nompeintaka ia, ¹⁰ bo nanguli ante suara namangga, "Peangga pakanoa!" Jadi, neanggamu topunggu nasalisa bo kalii-liu noli-pamo.

¹¹ Nanggita anu nipovia i Paulus, nongaremo todea ante basara mboto, haitumo basa Likaonia. Niulira, "Nanau ri duniama viata-viata mpo karo manusia!" ¹² I Barnabas niulira viata nosanga i Zeus, bo i Paulus niulira viata nosanga i Hermes, apa iamo topotesa.

¹³ Ri savaliku ngata haitu, naria banua petupu ka viata Zeus. Topojaga banua haitu nanggeni japi-japi pomava ante bunga-bunga hau ri bobaa nu ngata, sabana ia nosanggani-nggani nte todea madota mosambale japi haitu mombasomba i Paulus bo i Barnabas.

¹⁴ Niepepa i Paulus bo i Barnabas nia ntodea haitu, nibiteramo pakeara mboto, tandana nasusa mpuu rarara sabana todea haitu madota mombasomba ira. Nangovamo ira hau ri tatanga ntodea bo nongare nombatagi todea ivei: ¹⁵ "Nemo! Nee mpuu rasom-

bamiu kami! Kami hii manusia biasa nasimbayu mpo komiu! Kami nakava ri sii mompatolele Kareba Belo ka komiu ala komiu mompalaisi kabiasamiu anu ledo naria gunana, evamo nombasomba viata-viata. Komiu kana metupu nte Alatala anu natuvu sampe ri kasae-saena. Iamo nompajadi langi, tana, tasi, bo pura-pura isina. ¹⁶ Tempo nggaulu, Alatala nompalamba manusia natuvu nangoseaka dotara mboto. ¹⁷ Tapi nau ivesia, ledo nalinga raraNa nombadekei tanda-tanda ka kita ala rasanita Iamo Alatala. Ia nabelo mpuu nte kita, nidekeiNa ka kita uda lako ri langi, bo asele panggavi-ata ri tempona. NidekeiNa kandeaka ka kita bo nipakadambaNa rarata." ¹⁸ Nau suro-suro notesa ive-haitu, sakidepa ledo nipakulera mombataamaka todea manggeni pesomba ka ira.

¹⁹ Naupu haitu, bara sako-ndua toYahudi lako ri ngata Antiokhia ri propinsi Pisidia bo muni lako ri ngata Ikonium nakava ri ngata Listra. ToYahudi haitu nantana todea ri ngata Listra ala ira muni mangeva i Paulus sampe ira nombarempa i Paulus ante vatu bo niumbunjaira hau ri savaliku ngata. Niulira namatemo ia. ²⁰ Tapi tempo topomparasaya ri sia neangga nompatiku ia, nembangu mpanjili ia bo nesua riara nu ngata. Naeo mpadondo hau ia ri ngata Derbe nosang-gani-nggani ante i Barnabas.

I Paulus bo i Barnabas nanjili hau ri ngata Antiokhia ri propinsi Siria

²¹ Ri ngata Derbe, i Paulus bo i Barnabas nompatolele Kareba Belo bo nadea tona nomparasaya i Yesus. Naupu haitu nanjilimo ira randua hau ri ngata Listra. Lako ri ngata Listra hau ri ngata Ikonium pade napola hau ri ngata Antiokhia ri propinsi Pisidia. ²² Ri ngata-ngata haitu ira nompakaroso rara ntopangoseaka i Yesus bo nompopatora ira nee molengga-lengga momparasaya. Niulira, "Kita kana mombarasai kasusa bo kapari ruru pade mamala kita mombarasai kasana ri Poparenta nu Alatala." ²³ Ri ngata-ngata haitu i Paulus bo i Barnabas nanganggataka pakeni ntodea topangoseaka i Yesus. Ira nopuasa bo nosambaya, nerapi i Pue mombajagai pakeni haitu, apa Iamo panjarumakara.

²⁴ Naupu haitu i Paulus bo i Barnabas nompapola polipara noliu ri bagia Pisidia sampe nakava ri propinsi Pamfilia. ²⁵ Naupu ira nompatolele tesa nu Alatala ri ngata Perga, notuamo ira hau ri ngata Atalia ri bivi ntasi. ²⁶ Ri sia ira nesavi kapala mbaso bo nanjili hau ri ngata Antiokhia ri propinsi Siria. Ri ngata Antiokhia haitumo nipanganggataka ira bara ipia bo niposambayaka ntopangoseaka i Yesus. Niposambayaka ala Alatala mompoasi bo mombajagai ira riara pokarajaara anu dako nipakaupura sii-sii.

²⁷ Tempo nakava ri ngata Antiokhia, nipasiromura topomparasaya i Yesus bo nitesakara pura-pura anu nipovia nu Alatala ri polipara. Nitesara muni Alatala nombadekei loga ka tona ledotoYahudi momparasaya i Yesus. ²⁸ Nasae i Paulus bo i Barnabas nesai ri ngata Antiokhia nosangani-nggani ante topangoseaka i Yesus ri sia.

Polibu ri ngata Yerusalem

15 Naria bara sako-ndua toYahudi nakava ri Antiokhia lako ri bagia Yudea anu nomparasaya i Yesus. Ira nompatuduki topangoseaka i Yesus ri sia ivei: "Ane komiu ledoto rasuna nantuntuni Atura-atura nipapola Nabi Musa, komiu ledoto mamala rapakasalama." ² Tapi i Paulus bo i Barnabas mpuu-mpuu nosinjani nte ira bo nangeva pepatudukira. Jadi kaupuna, todea topomparasaya nompakatantu i Paulus bo i Barnabas ante bara sako-ndua topomparasaya ntanina lako ri sia, kana hau ri ngata Yerusalem ala molibu ante suro-suro bo pakeni ntopomparasaya ntanina hamai bo motesaki pepatuduki haitu.

³ Todea topomparasaya ri ngata Antiokhia nanggeni gi Paulus sampe nakava ri savaliku ngata. Lako ri ngata haitu ira noliu ri propinsi Fenisia bo bagia Samaria. Bo nitesara munimo ka topomparasaya ri sia nadea tona ledotoYahudi nombakabasaka pomparasayara nggaulu ala mangoseaka Alatala. Kareba haitu mpuu-mpuu nompakadamba rara ntopomparasaya ri sia.

⁴ Nakavapa ri ngata Yerusalem, i Paulus ante roana nikadambanaka nu suro-suro, pakeni-pakeni, bo todea topomparasaya ntanina. I Paulus nombatesa ka ira pura-pura anu nipovia nu Alatala ri polipara bara ipia nanggeni Kareba Belo ka tona ledotoYahudi.

⁵ Tapi bara sako-ndua toFarisi anu nomparasaya i Yesus neangga bo nanguli, "Ane tona ledotoYahudi nomparasaya i Yesus, ira kana rasuna bo rapatuduki mangoseaka Atura-atura nidekei Nabi Musa ka kita."

⁶ Jadi suro-suro bo pakeni-pakeni ntanina nolibu motesaki panggava ntoFarisi pangane. ⁷ Nasae mpuu ira nosinjula pekiri. Kaupuna neanggamo i Petrus bo nanguli, "Sampesuvu-sampesuvu! Nisanimiu mboto bara sakuya kasaena naliu, Alatala nompelisi yaku lako nte komiu mompatolele Kareba Belo ka tona ledotoYahudi ala ira muni mangepe bo momparasaya. ⁸ Bo Alatala anu nangisani isi rara ntai manusia, nantarima tona ledotoYahudi. Nisanita, sabana nidekeiNa Nosa Gasana ka ira, nasimbayu mpo nidekeiNa ka kita muni. ⁹ Alatala ledoto nompoposisala kita toYahudi ante ira ledotoYahudi. Ia nompakagasa rarara, sabana ira nomparasaya. ¹⁰ Jadi nakuya komiu ledoto nadota nantarima anu nipovia nu Alatala sii-sii? Nakuya komiu aga madota mompasuu ira mantuntuni atura-atura anu nakaja mpuu roaseaka? Totuata nggaulu bo kita

mboto ledoto nompakule nangoseaka atura-atura haitu. ¹¹ Tapi kita nomparasaya bo kita nipakasalama sabana kabelo rara i Pue Yesus. Bo ivesia muni ira!"

¹² Naupu i Petrus notesa ivesia, pura-pura tona nasiromu ri sia nalinomo bo nompetingai i Barnabas bo i Paulus nombasili tesa kabaraka-kabaraka bo tanda-tanda anu nipokumaaka nipoviara nte kuasa nu Alatala tempo ira naria ri ngata ntona ledotoYahudi.

¹³ Naupu ira notesa, nangulimo i Yakobus, "Sampesuvu-sampesuvu. Epero tesaku! ¹⁴ I Simon Petrus dako notentei ka kita tove nu Alatala ka tona ledotoYahudi. Lako ri pamulana, Alatala nompekirika ira. PatujuNa, rapelisiNa lako nte ira tona majadi todeaNa. ¹⁵ Haitu nasimbayu mpo anu niuli nu nabi-nabi nggaulu, apa naria nitulisi ivei:

¹⁶⁻¹⁷ Alatala nanguli: 'Maupu haitu, Yaku makava mpanjili ka muli ntoIsrael anu niparenta i Daud bara ipia. †

Kupoasi ira bo Kubangu mpanjili kamagaua i Daud bo Kubaruki anu nagero.

Kupovia haitu ala pura-pura manusia ntanina mangelo Yaku,

bo pura-pura tona ledotoYahudi anu nipelisiKu majadi todeaKu.'

Ivesiamo tesa nu Alatala ¹⁸ anu nompopaisani patujuNa lako nggaulunama."

Amos 9:11-12

¹⁹ I Yakobus nompapola tesana, "Jadi sampesuvu-sampesuvu, ivei panggavaku: nee rapakasusata katu-ntona ledotoYahudi anu natundu nte Alatala.

²⁰ Tapi kita kana motulisi sura manguli ka ira nee mangande kande anu naruto sabana nipesomba ka tupu-tupu ntanina, bo nee mangande bau nu binata nikoje, anu ledoto nisuvuraka raana, bo nee mangande raana. Bo muni ala ira nee mosampaturu ante tona ledoto bereira mboto. ²¹ Aga atura-atura haitu raperapita roaseakara ala mombajagai kasintuvura nte toYahudi, sabana nompamula lako ri nggaulunama, Atura-atura i Musa haitu nipatolelemo ri pura-pura ngata, bo nibaca ri eo-eo penonto ri banua-banua petupu ntoYahudi." ††

Sura nipakatu ka tona ledotoYahudi anu nomparasaya i Yesus

²² Nangepe tesa i Yakobus, nasitujumo suro-suro bo pakeni ntanina bo pura-pura topomparasaya mompelisi bara sako-ndua tona lako nte ira mboto ratudu hau ri ngata Antiokhia mosangani-nggani nte i Paulus bo i Barnabas mompasimbayu asele nu polibu ka topomparasaya hamai. Nipelisiramo i Silas bo i Yu-

† Yaku makava mpanjili ka muli ntoIsrael anu niparenta i Daud bara ipia. Basa Yunani: "Yaku mombabangu mpanjili banua i Daud."
†† Nisani ntodea, toYahudi narunggu mpuu rara nanggita tona novia anu pata-ngaya haitu.

das anu nidae muni i Barsabas. Tona randua haitu nibila ntodea topangoseaka i Yesus ri Yerusalem. ²³ Jadi nitulisira santau sura rakeni ntona randua pangane.

Sura haitu nanguli ivei:

“Sampesuvu-sampesuvu sampomparasaya anu ledo toYahudi, anu nonturo ri ngata Antiokhia bo ri propinsi Siria bo Kilikia:

Nadea tabe lako nte kami, suro-suro bo pakeni-pakeni ntodea topomparasaya.

²⁴ Niepe kami naria bara sako-ndua tona lako nte kami tou nte komiu nompakasusa bo nompakaingu komiu ante pepatudukira. Tapi kakanana ledo nitudu kami ira movia ivesia. ²⁵ Haitumo sabana kami nolibu ri sii bo kami pura-pura nasintuvu nompelisi bara sako-ndua tona, bo nombatudu ira tou nte komiu mompasimbayu asele polibu kami. Ira tou singgani-nggani ante sampesuvuta i Barnabas bo i Paulus anu nipotove kami. ²⁶ I Paulus bo i Barnabas mai, ledo natove rarara nte katuvura mboto, nau rapatesi ntona, ira bate-bate na mokarajaa ka Tuputa Yesus Kristus. ²⁷ Kami nantudu i Yudas bo i Silas tou nte komiu nosanggani-nggani ante i Paulus bo i Barnabas. Ira mompakapola isi nu sura hitu ka komiu ante tesara mboto.

²⁸ Sampesuvu-sampesuvu, hitumo asele polibu kami anu nipokono nu Nosa Gasa nu Alatala bo nipokono kami muni, ala komiu ledo mandasa mantuntuni atura-atura nakaja. Aga atura-atura hitu paraluu raoseakamiu:

²⁹ Nee rakandemi kande nipesomba ka tupu-tupu ntanina. Nee rakandemi raa, bo nee rakandemi bau lako ri binata nikoje, haitumo anu ledo nisuvuraka raana. Bo nee mosampaturu ante tona ledo bereimiu mboto. Ane raoseakamiu atura-atura haitu, nabelomo. Sampe ri siimo ruru isi sura kami.”

³⁰ Naupupa ira ampa nopalakana, notuamo ira hau ri ngata Antiokhia. Nakava sumai, nipasiromura puramo topomparasaya bo nidekeira sura haitu ka ira.

³¹ Nadamba mpuu rara ntodea topomparasaya nobaca sura haitu, apa isi sura haitu nompakavoe rarara.

³² Naliu haitu, i Yudas bo i Silas nasae notesa nte topomparasaya ri Antiokhia ala mompakadidi rarara bo mompakaroso pomparasayara, apa ira randua nabi anu nompakule mompasimbayu tesa nidekei nu Alatala ka ira.

³³ Naupu i Yudas bo i Silas nonturo sumai bara sakuya kasaena, nidekei ntoAntiokhiamu ira manjili hau ri ngata Yerusalem. Topomparasaya ri Antiokhia nanguli ka ira, “Pakabelo ri dala. Pakavote tabe kami ka tona nantudu komiu.” ³⁴ [Tapi kaupuna ledo hau i Silas. Niulina monturo ri ngata Antiokhia ruru.]

³⁵ I Paulus bo i Barnabas muni nonturo bara sakuya kasaena ri ngata Antiokhia. Ri sia ira nompatuduki bo nompatolele tesa i Pue Yesus, nosanggani-nggani ante roa deara ntanina.

I Paulus bo i Barnabas nosimpogaa

³⁶ Ledo nasae kaliuna haitu, i Paulus nanguli ka i Barnabas, “Hau kita manjili ri ngata-ngata nikalauta bara ipia nompatolele tesa nu Alatala. Kita kana hau manggita sampesuvu-sampesuvu anu nomparasaya i Yesus hamai, ala rakitata berimbamo katuvura.”

³⁷ Nangepe haitu nasitujumo i Barnabas. Ia madota manggeni i Yohanes-Markus muni, ³⁸ tapi i Paulus nanguli, “Ledo nabelo manggeni i Markus, apa nipalaisina kita bara ipia ri propinsi Pamfilia, bo ia ledo nokarajaa sampe naupu.” ³⁹ Jadipa i Paulus bo i Barnabas nosinggarau mpuumo bo kaupuna ira nosimpogaamo. I Barnabas nangala i Markus bo ira nesavi kapala hau ri levuto Siprus. ⁴⁰ I Paulus nompelisi i Silas momporoa ia. Bo topomparasaya ri ngata Antiokhia nosambaya ala Alatala mompoasi bo mombajagai ira randua riaru polipara. Naupu haitu nalaimo ira. ⁴¹ Ira nombalintiku pura-pura propinsi Siria bo Kilikia. Nipakarosora pomparasaya ntopangoseaka i Yesus hamai.

I Timotius nantuntuni i Paulus bo i Silas

16 I Paulus bo i Silas nompapola polipara hau ri ngata Derbe, pade napola hau ri ngata Listra. Ri sia naria saito topangoseaka i Yesus nosanga i Timotius. Tinana toYahudi anu nomparasaya i Yesus muni. Tapi tuamana toYunani. ² I Timotius nitoiya ntopomparasaya ri ngata Listra bo Ikonium pura-pura. ³ I Paulus madota i Timotius momporoa ia *tapi nantuntuni ada ntoYahudi ledo namala toYahudi mosinggani ante tona ledo nisuna*. Nisani ntodea tuama i Timotius toYunani *anu ledo nombasuna anara*. Jadi nisunana i Timotius ala i Timotius ratarima ntoYahudi ri ngata rakalaura. ⁴ Naupu i Timotius nisuna, nalaimo ira. Ri pura-pura ngata nikalaura nipasimbayura ka topangoseaka i Yesus kabotu polibu nu suro bo pakeni ntopomparasaya ri ngata Yerusalem. Bo nipatudukira tona hamai ala raoseakara atura-atura nipakatantu ri polibu haitu. ⁵ Jadi ivesiamo pomparasaya ntopangoseaka i Yesus nipakaroso, bo eo-eo nantambai kadea ntopomparasaya.

Anu nipopakita ka i Paulus ri ngata Troas

⁶ Nosa Gasa nu Alatala ledo nombadekei gi Paulus nompatolele tesa nu Alatala ri propinsi Asia. Jadi nipapolara polipara hau ri bagia Frigia bo Galatia. ⁷ Tempo ira nakava ri pobingga bagia Misia, ira madota mapola mesua ri propinsi Bitinia. Tapi Nosa Gasa i Yesus nombatagi ira mapola. ⁸ Jadi nolipamo ira nolihu ri bagia Misia sampe nakava ri ngata Troas ri bivi ntasi.

^{†9} Bongina haitu ri ngata Troas, naria anu nipopakita

† Ri sia i Lukas, topotulisi buku hitu, nompamula momporoa i Paulus riaru polipana.

nu Alatala ka i Paulus. Nikitana saito tona lako ri propinsi Makedonia neangga ri ngayona. Tona haitu nerapi mpuu-mpuu nte i Paulus, “Kaimo tumai mantulungi kami ri Makedonia!”¹⁰ Jadi naupu nikita i Paulus haitu, kaliu-liu nanggalivomo kami hau ri propinsi Makedonia, sabana nipekiri kami, Alatala mpuu-mpuu nantudu kami mompatolele Kareba Belo ka tona hamai.

Ri ngata Filipi i Lidia nomparasaya i Yesus

¹¹ Kami nompalaisi ngata Troas bo nesavi kapala mbaso hau ri levuto Samotrake. Kamailena napolamo kami sampe nakava ri ngata Neapolis[†] ri propinsi Makedonia. ¹² Lako ri sia kami nantende hau ri ngata Filipi, haitumo ngata mbaso ri propinsi Makedonia. Ngata Filipi haitu ngata ponturo ntodea nu Magau Mbaso. ^{††} Kami nonturo ri sia bara sako-mbongi kasae-na.

¹³ Ri eo penonto ntoYahudi, kami hau ri tinggi binangga ri savaliku bobaa nu ngata, sabana nisarumaka kami hamai rakasiromu ntoYahudi mosambaya. Jadi kami nonturo notesa-tesa ante mombine-mombine nasiromu ri sia. ¹⁴ Naria saito mombine ri sia lako ri ngata Tiatira nosanga i Lidia. Ia topobalu kae nosura sese mpalola, anu nasuli mpuu alina. Ia nombasomba Alatala mamimo. Tempo niepena tesa i Paulus, Alatala nompakanoto rarana sampe nitarimana pepatuduki haitu. ¹⁵ Naupu haitu i Lidia sambanua nidiu, tandana ira topangoseaka i Yesus. Naupu ira nidiu, i Lidia nombagaga kami hau ri banuana. Niulina, “Nikitamiu yaku hii mpuu-mpuu nomparasaya i Pue Yesus. Jadi kaimaimo monturo ri banua kami.” Nipasimbukuna kami hau ri banuana.

I Paulus bo i Silas nitarunggu ri ngata Filipi

¹⁶ Naria sanggani, tempo kami hau ri posiromu posambaya pangane, kami nosinggavaka saito batua mombine. Mombine haitu nipesua nu seta anu natau nombaboto anu majadi ri tempo makava. Ia nombaboto rasi ntona, jadi nadea saro nikavana ka tona nompobatua ia. ¹⁷ Mombine haitu nongare-ngare ri puri nantuntuni kami gi Paulus. Ia nongare iveri: “Tona hitu batua nu Alatala toNeliu KaogeNa! Ira nakava nompatolele ka komiu berimba komiu mamala rapakasalama!”¹⁸ Bara sako-eo kasaena mombine haitu ledo naupu-upu nongare ivesia. Kaupuna domo nosabara i Paulus nangepe mombine haitu, jadi neili nta-

[†] Ngata Neapolis ngata pesampo ri bivi ntasi. Tona hau ri ngata Filipi noliu ri Neapolis. Lako ri Neapolis hau ri ngata Filipi 16 kilometer kakavaona. ^{††} Ri ngata Filipi naria sikola dokutoro bo pokae bulava. Filipi nijaja ngata mbaso Roma, bo nadea tupu ngata nakava lako ri Roma. Ira nireke todea Magau Mbaso bo ledo paraluu nombayari balasitee. Ira nireke nalanga nturora bo ledo mamala sambara mompovia ira, evamo ira ledo mamala kaliu-liu rasaka atau raboba.

liku ia bo nanguli ka seta anu nombakuasai mombine haitu, “Ante kuasa i Yesus Kristus, kutudu iko palaimo lako ri mombine tutu!” Naupu sia, seta haitu nalai mpuumo lako ri mombine haitu.

¹⁹ Tempo nisani ntobatua mombine haitu domo namala ira manggava doi, nisakaramo i Paulus bo i Silas, bo niumbunjaira hau ri potomu mantingayo topoparenta ngata haitu. ²⁰ Nikenira i Paulus bo i Silas hau mantingayo topoparenta nu Magau Mbaso Roma, bo tona nompobatua mombine nanguli iveri: “Tona hitu toYahudi anu nompakagado ngata hitu. ²¹ Nipatudukira tona movia anu nitagi nu atura-atura ri ngatata hitu! Ledo mamala kita todea Magau Mbaso mantarima atau mangoseaka ada nipatudukira!”

²² Todea nu ngata nantuntuni nangeva i Paulus bo i Silas. Topoparenta nombaseri-seri pakeara randua bo nombatudu tona mombacambu ira. ²³ Naupu ira nicambu pakadua, nisuaraka ri ntarunggumo. Topojaga tarunggu nitudu mombajagai ira pakabelo-belo. ²⁴ Jadi nisuarakana ira ri tombi ntarunggu ri tatangana ntoto bo kadara nibalunggu ante kayu.

²⁵ Nitasere natanga bongina, i Paulus bo i Silas nosambaya bo nodade nantoiya Alatala. Tona ntanina nitarunggu ri sia nompetalingai ira nodade. ²⁶ Sampe-sani naria lingu narimboso mpuu sampe pandasi banua ntarunggu nogoya muni. Pura-pura vamba natebuka bo rante pobalunggu tona nitarunggu navole sanggani. ²⁷ Natekaja bo nembangumo topojaga tarunggu haitu. Nikitana pura-pura vamba nateungemo, nibituna gumana mompatesi karona mboto, apa nis-arumakana tona nitarunggu nalai puramo. ²⁸ Tapi i Paulus nongare ante suara namangga, “Nee mupatesi karomu! Da naria pura kami ri sii!”

²⁹ Topojaga tarunggu nerapi poindo bo nangova hau ri tarunggu. Nolete-letemo ia nantaputu ri ngayo i Paulus bo i Silas. ³⁰ Naupu sia, nikenina ira hau ri savalikuna bo nanguli, “Tua, nuapa kupovia ala yaku rapakasalama?”

³¹ Nesana i Paulus bo i Silas, “Parasayamo i Pue Yesus Kristus, bo komiu sambanua rapakasalama.”

³² Pade i Paulus bo i Silas nompasimbayu tesa i Pue Yesus ka topojaga tarunggu haitu, bo ka pura-pura tona riaru banuana. ³³ Ri tanga bongi haitu muni topo- jaga tarunggu nanggeni ira hau ri uve bo nompegasa bakara. Naupu haitu, kaliu-liu ira sambanua nidiu, tandana ira nomparasaya i Yesus. ³⁴ Naupu haitu, nikeninamo i Paulus bo i Silas hau ri banuana, bo nipakandena ira. Ira sambanua nadamba mpuu rarara sabana ira nomparasaya Alatalamo. Naupu sia, i Paulus bo i Silas nikeni mpanjili hau ri tarunggu.

³⁵ Naeo mpadondo topoparenta-topoparenta ri ngata Filipi nantudu polisi hau ri tarunggu, mompapola parenta ka topo- jaga tarunggu iveri: “Kabasakamo tona randua nitarunggu riavi!”

³⁶ Nangepe haitu topojaga tarunggu nanguli ka i Paulus, "Topoparenta ri ngata nomporenta yaku mombakabasaka komiu. Jadi hitupa komiu mamala manjili. Pakabelo-belo ri dala."

³⁷ Tapi i Paulus nanguli ka polisi nakava ri sia, "Kami hii todea nu Magau Mbaso Roma! Naupa ivesia, ledo nitangara kami, aga nicambu ri ngayo ntodea, bo nisuaraka riarar ntarunggu! Bo hitupa topoparenta-topoparenta mombatudu kami manjili nggalino-lino! Ledo madota kami! Kana ira mboto makava mom-popesuvu kami!"

³⁸ Polisi-polisi nompapola kareba haitu ka topoparenta ngata. Nieperapa i Paulus bo i Silas haitu todea nu Magau Mbaso Roma, naekamo ira. ³⁹ Jadi ira mboto hau nerapi ampu nte i Paulus bo i Silas. Naupu sia, nikenira randua suro haitu hau ri savalikuna, bo niperapira ala gi Paulus mompalaisi ngata haitu ⁴⁰ Jadi i Paulus bo i Silas nompalaisi tarunggu bo hau ri banua i Lidia. Ri sia ira nasiromu ante topangoseaka i Yesus bo nompakaroso rarara. Naupu haitu nalaimo ira lako ri ngata Filipi.

I Paulus bo i Silas ri ngata Tesalonika

17 I Paulus bo i Silas nompapola polipara noliu ri ngata Amfipolis bo ngata Apolonia sampe nakava ri ngata Tesalonika. Ri sia naria banua petupu ntoYahudi. ² Jadi i Paulus hau ri banua petupu haitu nangoseaka kabiasaan bo nosinjula pekiri ante tona nasiromu ri sia. Talu-minggu nosunju-sunju ri eo penonto, ia notesa isi Buku Gasa ka ira. ³ Lako ri Buku Gasa, nipopakitana ka ira bo nitenteina ka ira Magau Topepakasalama anu nijanji nu Alatala kana rapan-dasa bo rapatesi, bo matuvu mpanjili lako ri kamate-Na. Niulina, "I Yesus nipatoleleku ka komiu, Iamo Magau Topepakasalama nijanji nu Alatala." ⁴ Nangepe tesa i Paulus, bara sako-ndua toYahudi nomparasaya tesa haitu bo nantuntuni i Paulus bo i Silas. Ivesia muni toYunani, nadea natundu nte Alatala, bo mombine-mombine naria nturona ri ngata haitu, nadea muni nomparasaya.

⁵ Tapi toYahudi anu ledo nomparasaya i Yesus, nasiriati nanggita i Paulus bo i Silas, sabana nadea mpuu tona nomparasaya tesa i Paulus. Jadi nipasiromura tona aga notondodo-ndodo ri potomu, anu ledo naria pokarajaana. Nadeapa ira nasiromu, hau nipakagadoramo ngata haitu. Nakava ri banua i Yason anu niponturo i Paulus bo i Silas, nisuakira banua haitu rapangala i Paulus bo i Silas. Patujura ala gi Paulus mesuvu mantingayo todea. ⁶ Tapi ledo nikavara i Paulus bo i Silas ri sia. Jadi niumbunjairamo i Yason bo bara sako-ndua topomparasaya ntanina ri sia hau ri ngayo ntopoparenta-topoparenta ngata bo nongare, "I Paulus bo i Silas haitu nompakagado tona ri umba-

umba dunia! Sii-sii ira nakava nompakagado ngatata hitu muni! ⁷ I Yason hitu nantarima ira ri banuana. Pura-pura ira topomparasaya nombaliunaka atura-atura nipakatantu Magau Mbaso Roma, apa niulira da naria-pa magau ntanina nosanga i Yesus." ⁸ Nangepe tesa haitu, todea bo topoparenta ngata, nagado. ⁹ Kaupuna i Yason nte roa-roana topomparasaya haitu nipopovaya pade nikabasakaramo.

I Paulus bo i Silas ri ngata Berea

¹⁰ Bongina haitu topomparasaya ri ngata Tesalonika nantudu i Paulus bo i Silas hau ri ngata Berea. Nakava sumai, hau ira nesua ri banua petupu ntoYahudi.

¹¹ Tona ri ngata Berea nabelo rarara, ledo mpo tona ri ngata Tesalonika. Nadamba rarara nangepe kareba i Yesus bo eo-eo niparesara Buku Gasa ala rasanira bara makana tesa i Paulus bara ledo. ¹² Nadea ira toYahudi nomparasaya i Yesus, bo nadea muni toYunani anu naria nturona, nomparasaya muni, mombine bo langgai.

¹³ ToYahudi ri ngata Tesalonika nangepe i Paulus naria ri ngata Berea nompatolele Tesa nu Alatala. Jadi hau muni ira ri ngata Berea bo nipoviara kagado bo nipakapanera rara ntodea. ¹⁴ Jadi topomparasaya ri ngata Berea nasalisa nanggini i Paulus nesuvu lako ri ngata Berea hau ri bivi ntalinti. Tapi i Silas bo i Timotius da naboli ri ngata Berea. ¹⁵ Tona nanggini i Paulus, nomporea ia sampe nakava ri ngata Atena. Naupu sia nanjilimo ira hau ri ngata Berea, nanggini petevai i Paulus ka i Silas bo i Timotius ala ira masalisa mombatuntuni ia hau ri ngata Atena.

I Paulus ri ngata Atena

¹⁶ I Paulus da nompopea i Silas bo i Timotius ri ngata Atena, nasusa mpuu rarana nanggita kadea nu pinoito-pinoito nisomba ntoAtena. ¹⁷ Jadi, ri banua petupu, ia nosinjula tesa ante toYahudi bo tona ntanina anu nombasomba Alatala. Ivesia muni ri potomu, eo-eo ia nosinjula tesa ante isema-sema naria ri sia. ¹⁸ Nosinjula tesa muni ia nte guru-guru anu nangoseaka pepatuduki i Epikuros bo guru-guru nangoseaka pepatuduki anu niuli Stoa. Bara sako-ndua guru-guru haitu nosisanai ante i Paulus. Naupu sia, naria sanu nanguli, "Nuapa nisani ntona moitu? Pangisanina aga sakide, tapi tesana nadea!" Bo naria tona ntanina nanguli, "Ia bara madota mompopaisani viata-viata nisomba ntosangatana ka kita!" Niulikara ivesia apa i Paulus notesa i Yesus, bo nitesana muni tona natuvu mpanjili lako ri kamatena.

¹⁹ Jadi nikenira i Paulus hau ri polibu ri Bulu Areopagus. Nakava sumai niulikara ia, "Kami hii madota mangepe pepatuduki nabaru anu nipatolelemiu ²⁰ apa komiu nompatolele pepatuduki ntanina lako ri ntanina

anu niepe kami. Jadi kami madota mangisani batwana." ²¹ (Niulira ivesia apa pura-pura toAtena bo tosan-gatana anu nonturo ri Atena, nadamba mpuu nonturo-nturo nangepe bo nombajaritai tesa nabaru sampe nabiasa ledo ria tempona nombatui anu santanina.)

²² Jadi i Paulus neangga ri ngayo ntopolibu ri Bulu Areopagus haitu bo nanguli, "Heh komiu toAtena! Nikitaku riaru mpengaya-ngaya pokainggumiu, komiu mpuu-mpuu noagama. ²³ Apa tempo yaku nanjayo-njayo riaru ngatamiu nikitaku nadea pompakande via-ta. Bo nikavaku sangu pompakande anu naria nitulisi, 'Pompakande ka Tupu Ledo Nisani SangaNa.' Tupu haitu nisombamiu, nau ledo nisanimiu sangaNa. Tupu haitumo kupopaisani ka komiu ri sii.

²⁴ Alatala nompajadi dunia bo pura-pura isina. Iamo Tupu nu langi bo tana. Bo Ia ledo nonturo ri banua pesomba nipovia nu manusia. ²⁵ Ia ledo muni paraluu petulungi nu manusia, sabana Iamo nombadekei katuvuta bo nosata bo pura-pura niparaluuta. ²⁶ Lako ri saito manusia nipopomuliNa pura-pura todea ri dunia bo nituduNa ira hau monturo ri njumangu dunia. Lako ri pantepuuna nipakatantuNa ngata mbana raponturora, bo nipakatantuNa kasaena ira matuvu ri ngata haitu. ²⁷ Alatala novia ivesia ala kita manusia madota mosisani nte Ia. Bo ane raelo-elota Ia, raposinggavakata Ia. Apa kakanana, Ia napara nte kita pura-pura. ²⁸ Evamo niuli ntona, 'Kita natuvu, noli-pa, bo nonturo ri dunia hitu sabana kuasaNa.' Haitu nasimbayu muni ante anu niuli ntopovia dade ri ngatamiu ivei: 'Kita pura-pura hii, ana-anaNa.'

²⁹ Jadi sampesuvu-sampesuvu, kita hii ana-ana nu Alatala. Sabana haitu, ledo mamala kita mompakasimbayu Alatala ante lenje nipovia lako ri bulava bara sala-ka bara vatu, nantuntuni kapande nu manusia. ³⁰ Tempo nggaulu ane manusia nombasomba tupu-tupu ntanina, Alatala ledo nombahuku ira. NibotusiNa ledo rarekeNa kadoyora haitu. Tapi sii-sii, nituduNa pura-pura manusia ri umba-umba ri dunia majea lako ri dosara. ³¹ Apa nipakatantuNamo tempona bara maipia pura-pura manusia ri dunia ratangara ri kanoana. Pokarajaa motangara haitu nidekeiNa ka saito tona nipelisiNa lako ri nggaulunama. Alatala nompakatuvu mpanjili tona haitu lako ri kamateNa ala malanto ka pura-pura tona Ia mpuu-mpuu nipelisi nu Alatala majadi Topotangara pura-pura manusia."

³² Tempo todea nangepe tesa tomate natuvu mpanjili lako ri kamatena, naria sanu ira nompongirika i Paulus, sabana ledo niparasayara tomate mamala matuvu mpanjili. Tapi naria muni sanu nanguli, "Kami da madota mangepe hanupa tesamu tutu!" ³³ Naupu sia, i Paulus nompalaisi polibu haitu. ³⁴ Tapi naria tona lako ri sia nosabingga ka i Paulus bo nomparasaya i Yesus. Saito anu nomparasaya pangane nosanga i

Dionisius, ia topolibu ri Bulu Areopagus. Naria muni saito mombine nosanga i Damaris, bo naria muni bara sako-ndua tona ntanina.

I Paulus ri ngata Korintus

18 Naupu haitu i Paulus nompalaisi ngata Atena bo hau ri ngata Korintus. ² Nakava sumai, ia nosintomu ante toYahudi nosanga i Akwila anu nipoanaka ri propinsi Pontus. I Akwila ante bereina mombine i Priskila dako nakava ri ngata Korintus lako ri propinsi Italia. Ira nolinja hau ri Korintus sabana i Klaudius, Magau Mbaso, nompamenta pura-pura toYahudi kana mompalaisi ngata Roma ri propinsi Italia. I Paulus hau nantunggai ira randua, ³ bo nonturo nte ira sabana popaelo i Paulus nasimbayu ante popaelora, haitumo novia tenda. Ira tatalu nokarajaa nosinggani-nggani. ⁴ Ri eo-eo penonto i Paulus hau ri banua petupu ntoYahudi notesa nosinjula pekiri ante tona nasiromu ri sia, toYahudi bo toYunani. Ia nompasimbuku nanggeni ira momparasaya i Yesus.

⁵ Nakavapa i Silas bo i Timotius lako ri propinsi Macedonia, nikabasaka i Paulusmo pokarajaana novia tenda, bo eo-eo nipatolelena Kareba Belo lako nte Alatala ka toYahudi. Nipakalantona ka ira i Yesusmo Magau Topompakasalama manusia anu nijanji nu Alatala. ⁶ Tapi aga nievara bo nisalaira i Paulus. Jadi i Paulus nombavurenggenaka pakeana, tandana ia mompalaisi ira sabana nipoarara tesana. Niulina, "Ane komiu rahuku nu Alatala, salamiu mboto, ledo salaku! Mom-pamula sii-sii yaku hau mompatolele Tesa nu Alatala ka tona ledo toYahudi!" ⁷ Naupu sia, i Paulus nompalaisi ira bo hau nonturo ri banua ri sinjori nu banua petupu. Tupu nu banua haitu nosanga i Titius Yustus. Ia ledo toYahudi tapi ia nombasomba Alatala. ⁸ Pakeni ri banua petupu haitu nosanga i Krispus. Ira sambanua nomparasaya i Yesus muni. Nadea toKorintus ntanina nangepe kareba nikeni i Paulus, bo nomparasaya i Yesus bo nidiu, tandana ira topangoseaka i Yesus.

⁹ Naria sambongi, Tupu neonga nte i Paulus riaru pangipina, bo nanguli "Nee maeka ka tona! Nee menonto mompatolele TesaKu, ¹⁰ sabana Yaku nomporoa komiu. Nee maeka, ledo ria saitoa tona mamala movia anu nadaa ka komiu, apa ri ngata hitu nadea todeaKu." ¹¹ Sabana haitu, i Paulus nonturo ri ngata Korintus sampae santanga kasaena bo nompatuduki Tesa nu Alatala ka tona ri sia.

¹² Tempo i Galio najadi gubernur ri propinsi Akhaya, toYahudi ri ngata Korintus nasintuvu nangeva i Paulus. Ia nisakara bo nikenira ratangara ri ngayo Gubernur Galio ¹³ Nipangadura ia ivei: "Tona hitu nanggeni todea metupu nte Alatala ante pepatuduki nosisala ante Atura-atura nidekei Nabi Musa ka kami!"

¹⁴ I Paulus madota mesana, tapi Gubernur Galio kaliu-liu nanguli, "He, komiu toYahudi! Ane rapana ni-pangadukamiu tona nombaliunaka atura pomarenta, bara tona novia anu nadaa, masipato yaku mosabara mangepe pangaduamiu haitu. ¹⁵ Tapi haitu aga posisala panggava ka tesa-tesa bo sanga-sanga bo atura-atura agamamiu mboto! Kana rapasiayumi mboto. Yaku hii ledo mombatangara parakara ivehitu!"

¹⁶ Naupu haitu Gubernur Galio nompopalai ira lako ri banua potangara haitu. ¹⁷ Nesuvupa ira, nisakaramo pakeni ri banua petupu ntoYahudi anu nosanga i Sostenes, bo nibobara ia ri ngayo banua potangara. Tapi Gubernur Galio ledo ntoto nipeilina.

I Paulus nanjili hau ri ngata Antiokhia

¹⁸ Naliu haitu, da nadeapa mbongina i Paulus nonturo ri ngata Korintus, pade nopalakana nte topomparasaya hamai bo nesavi kapala ri pesampo Kengkrea hau ri propinsi Siria, nosanggani-nggani ante i Priskila bo i Akwila. Dopame ira nesavi kapala, i Paulus nombagausi buluana anu nipalambana mandoe nantuntuni ada ntoYahudi, sabana naria anu nijanjina ka Alatala. ¹⁹ Ri polipara haitu, ira nesai ri ngata Efesus. I Paulus nesua ri banua petupu bo nosinjula pekiri ante toYahudi ri sia. ²⁰ Niperapira i Paulus masae sakide monturo ante ira, tapi ledo nadota ia. ²¹ Ia nopalakana nte ira bo nanguli, "Ane rapodota nu Alatala, tumai vai yaku." I Priskila ante i Akwila naboli ri Efesus tapi i Paulus nesavi kapala ntasi bo napola sampe ri ngata Kaisarea.

²² Nesampo ri ngata Kaisareapa, nantendemo ia hau ri ngata Yerusalem ala mombadekei tabe ka topomparasaya hamai. Naupu sia, napolamo ia hau ri ngata Antiokhia. ²³ Bara sakuya kasaena ia nonturo ri Antiokhia, pade hau vaimo ia ri bagia Galatia bo Frigia ala mompakaroso pomparasaya ntopangoseaka i Yesus.

I Apolos ri ngata Efesus bo ri ngata Korintus

²⁴ Tempo haitu, naria saito toYahudi nosanga i Apolos. Ia lako ri ngata Aleksandria ri tana Mesir bo nakava ri ngata Efesus. I Apolos mai natau mpuu notesa, bo nisanina mpuu isi Buku Gasa. ²⁵ Ia nipatuduki ntona sampe nisanina tesa i Pue Yesus. Jadi tempo ia nakava ri ngata Efesus, nitesana kareba i Yesus ante mpuu-mpuu rarana bo nambela mpuu tesana, nau dopa nisanina pura-pura pepatuduki i Yesus. Aga pombadiu i Yohanes Topediu nisanina. ²⁶ Ledo naeka rara i Apolos notesa ri banua petupu ntoYahudi. Tempo i Priskila bo i Akwila nangepe ia, nikeniramo ia hau ri banuara. Bo ri sia nitesakara pakalanto nia nu Alata-

† naria anu nijanjina ka Alatala: Nantuntuni ada ntoYahudi, ane nipoviaramo anu nijanjira ka Alatala, nigaura buluara.

la mompakasalama manusia sabana anu nipovia i Yesus.

²⁷ Naliu haitu, i Apolos nonia hau ri propinsi Akhaya. Jadi topangoseaka i Yesus ri ngata Efesus nantulungi ia bo nompakatu sura ka topomparasaya ri propinsi Akhaya ala ira madota mantarima i Apolos sumai. Nadea tona ri propinsi Akhaya najadi topangoseaka i Yesus sabana kabelo nu Alatala, bo pepatuduki i Apolos mpuu-mpuu nantulungi ira. ²⁸ Nakuasa mpuu tesa i Apolos sampe nidagina pesanai ntoYahudi ri ngayo ntodea. Lako ri Buku Gasa nipakalantona ka ira i Yesusmo Magau Topompakasalama manusia anu nijanji nu Alatala.

I Paulus ri ngata Efesus

19 Tempo i Apolos da naria ri ngata Korintus, i Paulus nompesayo ngata-ngata ri buluna ri bagia Galatia bo Frigia, sampe nakava ri ngata Efesus. Ri sia ia nosinggava ante bara sako-ndua topomparasaya i Yesus. ² Nipekutanana ira, "Nitarimamiu Nosa Gasa nu Alatala tempo komiu nomparasaya i Yesus?"

Nesana ira, "Dopa. Dopa niepe kami naria Nosa Gasa!"

³ Nekutana vaimo i Paulus, "Ane ivesia, berimba komiu nidiu?"

Nesana ira, "Kami nidiu nangoseaka pepatuduki i Yohanes Topediu."

⁴ Nanguli i Paulus, "I Yohanes nombadiu tona, tandana najeamo ira lako ri dosara. Bo ia muni nompatuduki ka todea ira kana momparasaya saito tona makava maliu ia, haitumo i Yesus."

⁵ Naliu nangepe tesa i Paulus haitu, toEfesus nekidiu mpanjili, tandana niparasayaramo i Yesus. ⁶ I Paulus nombadika palena ri balenggara bo kaliu-liu Nosa Gasa nu Alatala nombakuasai ira. Pade ira notesa ante basa-basa nidekei nu Nosa Gasa ka ira bo nipasimbayura tesa lako nte Alatala. ⁷ Kadea ntona haitu, nitasere sapulu randua.

⁸ Talu-mbula kasaena i Paulus hau njuu ri banua petupu ntoYahudi ri ngata haitu. Ledo nakaja rarana nombatesa Poparenta nu Alatala bo nosinjula pekiri nte ira. Dotana ala ira momparasaya i Yesus. ⁹ Tapi bara sako-ndua ira nakaa bagara bo ledo nadota nomparasaya. Ira nanjalai nia nu Alatala ri ngayo ntodea, haitumo niaNa mompakasalama manusia sabana anu nipovia i Yesus. Haitumo sabana i Paulus nompalaisi ira, bo nikenina topangoseaka i Yesus hau ri sikola i Tiranus. Eo-eo ia nosinjula pekiri ante tona ri sia.

¹⁰ Aga ivesiamo nipovia i Paulus rompae kasaena, sampe pura-pura tona nonturo ri propinsi Asia, toYahudi bo tona ledo toYahudi, nangepe Tesa nTupu.

Ana-ana i Skewa

¹¹ Alatala nombadekei kuasa ka i Paulus novia kabaraka-kabaraka anu ledo ria kasimbayuna. ¹² Ane pasapu bara buya nariamo nipake i Paulus bo rakeni ka tona nadua, nabelomo ira, bo seta-seta nalai muni-mo. ¹³ Ri tempo haitu naria bara sako-ndua sando ntoYahudi hau ri umba-umba nompopalai seta lako ri karo ntona. Sando haitu nompesoba nompake sanga i Yesus munimo mompopalai seta-seta. Niulira, "Ante kuasa i Yesus anu nipatolele i Paulus, kami mompopalai iko!"

¹⁴ Naria balengga ntopanggeni pesomba Yahudi nosanga i Skewa. Papitu anana, langgai bayangi. Ira papitu haitu madota muni mompesoba mompopalai seta ante mompake kuasa i Yesus. Jadi naria saeo nipesobara nompopalai seta lako ri karo ntona.

¹⁵ Tapi nesanamo seta haitu, "Ane i Yesus, nisaniku Ia, bo i Paulus nisaniku munimo. Tapi komiu tu, isema?" ¹⁶ Tona nipesua nu seta haitu nekavantu bo nombabaga ira sampe pura-pura ira papitu namala nidagina. Nangova ira nalai lako ri banuana nabaka-baka, bo ira novuloamo sabana pakeara nisemparakasinamo.

¹⁷ Pura-pura toYahudi bo tona ledo toYahudi, anu nonturo ri ngata Efesus nangepe kajadia haitu. Noku-maa puramo ira bo niulira i Pue Yesus nakuasa mpuu. ¹⁸ Nadea topomparasaya i Yesus najea bo nangaku ri ngayo ntodea poviara nadaa. ¹⁹ Nadea muni ira anu nompake doa-doa, pakuli, bo pangisani nadaa, nompasiromu buku-buku pangisani nadaa, bo nipalabura ri ngayo ntodea. Ali nu buku-buku haitu, nitasere limapulu njobu doi salaka † kadeana. ²⁰ Jadi, lako ri kajadia-kajadia nabaraka evamo haitu, kadea-dea tona nangepe Tesa nTupu, bo kadea-dea tona nompasaya.

I Demetrius nompopeumba kagado ri ngata Efesus

²¹ Naliutaka kajadia-kajadia haitu, i Paulus nonia hau ri propinsi Makedonia bo Akhaya, pade mapola hau ri ngata Yerusalem. Niulina ka roana, "Maupu yaku hau ri ngata Yerusalem, pade hau ri ngata Roma." ²² Jadi nituduna randua topotulungi ia mokolu ka ia hau ri propinsi Makedonia. Sangara randua haitu, i Timotius bo i Erastus. Tapi i Paulus mboto da nonturo bara sakuyapa kasaena ri propinsi Asia.

²³ Ri tempo haitu, neumbamo kagado mbaso ri ngata Efesus sabana ledo nipokonora pepatuduki i Pue Yesus. ²⁴ Naria saito pande nu salaka nosanga i Demetrius ri ngata haitu. Pokarajaana novia banua-banua kodi lako ri salaka. Banua-banua haitu nolenje mpo banua petupu ka viata Artemis. Nadea mpuu doi nikava i Demetrius bo topokarajaa ka ia lako ri pokara-

jaara haitu. ²⁵ Ia nompasiromu pura-pura ira sampokarajaa bo pande-pande salaka ntanina, bo nanguli, "Sampesuvu-sampesuvu! Nisanimiu mboto nadea panggavata lako ri pokarajaata hitu ²⁶ Sii-sii nikitamiu bo niepemi mbotomo anu nipovia i Paulus! Ia nanguli ka todea, pinoito-pinoito nu viata nipovia mpale manusia, ledo viata mpuu. Bo nadeamo tona nompasaya pepatudukina haitu, ledo aga ri ngata Efesus hitu, tapi ri pura-pura propinsi Asia muni! ²⁷ Jadi, sampesuvu-sampesuvu, nee sampe pokarajaata hitu rapakadaa ntona. Ledo aga haitu, nee sampe banua petupu viata Artemis rapandaente ntona bo nee sampe i Artemis mboto domo rabila, tano i Artemis nisomba ntodea pura-pura ri Asia bo ri njumangu dunia!"

²⁸ Nangepe tesa i Demetrius, tona nasiromu haitu nobilisi mpuumo rarara, sampe ira nongare-ngare, "Matuvu Artemis, viata nisombata ntoEfesus!" ²⁹ Kagado haitu natolele sampe ri njumangu ngata Efesus. Todea nombasaka i Gayus bo i Aristarkhus, haitumo randua roa i Paulus sampolipa lako ri propinsi Makedonia. Ira niumbunjai ntodea hau nesua ri tana lapa rangata haitu. ³⁰ I Paulus madota mesua mantingayo todea ri sia tapi nitagi ntopangoseaka i Yesus. ³¹ Ivesia muni bara sako-ndua tomaoge toparenta ri propinsi Asia haitu, anu novega ante i Paulus. Nitadura tona hau mangulika i Paulus, "Nee mpuu mesua nte todea riaru nu kasiromu haitu!"

³² Todea nasiromu ri tana lapa sia nagado mpuumo. Naria sanu nongare ivei, naria muni sanu nongare iveitu, apa deanapa ira ledo nisanira nuapa patujura nasiromu ri sia. ³³ Naria saito toYahudi nosanga i Aleksander nipopokolu ntoYahudi ri ngayo ntodea. Bara sako-ndua tona lako ri todea haitu nombatentei ka ia nuapa najadi. †† I Aleksander nanganggataka palena, tandana ia madota motesa manjaliku karona ri ngayo ntodea. ³⁴ Tapi nisani ntodeapa ia toYahudi, nongaremo ira mpasanggani-nggani, "Nambaso kaoge i Artemis, viata nisombata ntoEfesus!" Aga haitu nisilisilira rojaa kasaena.

³⁵ Kaupuna, sekertaris ngata namalamo nompakalino todea. Nanguli ia ka ira, "Sampesuvu-sampesuvu toEfesus! Nisani ntona pura-pura, kita toEfesus hitumo tona nompicara banua petupu nu viata Artemis anu nelabi kaogena bo vatu nabaraka anu nanau lako ri langi! ³⁶ Ledo ria saitoa tona nombasapu haitu! Sabana haitu, kuperapi nte komiu, kalino puramo! Nepa ruru movia nuapa-nuapa ane dopa rapekiri pakabelo-belo ntani ruru! ³⁷ Tona nikenimiu ri sii, ledo nangangga nuapa-nuapa lako ri banua petupu viata Artemis anu nisombata, bo ledo muni nompakadaa sanga i Artemis.

³⁸ Ane i Demetrius ante roana sampokarajaa maria

† Sampeka doi salaka nasimbayu nte gaji ntona saeo nokarajaa.

†† Bara sako-ndua tona lako ri todea haitu nombatentei ka ia nuapa najadi. ATAU: Sanu ira nisarumakara iamo pakeni nu kagado.

pangaduara nte tona, aginapa parakara haitu rakenira ri ngayo ntopotangara. Naria mami jaa nipakatantu ka potangara bo naria topotangara nasadia mombatimba parakara. ³⁹ Ane da mariapa anu ntanina rapekutanamiu, haitu kana ratesa ri polibu ngata anu nipakatantu nu pomarenta. ⁴⁰ Apa anu najadi eo hitu mamala mompakadaa kita pura-pura! Pomarenta Magau Mbaso mamala mombarai kita topeeva, sabana ledo ria nuapa-nuapa mamala raulita mompakakana kagado hitu!" ⁴¹ Naupu sekertaris ngata notesa, nitudunamo todea manjili.

Polipa i Paulus lako ri propinsi Makedonia hau ri ngata Troas

20 Nalinopa kagado ri ngata Efesus, i Paulus nompasiromu topomparasaya ri sia bo notesa nompakaroso rarara. Naupu sia, ia nopalakanamo pade nipapolana polipana hau ri propinsi Makedonia. ² Riar mpolipana, ia nompesayo ngata-ngata ri Makedonia bo nompakaroso rara ntopomparasaya hamai ante mpengaya-ngaya pepangajari. Naupu haitu, napolamo ia hau ri propinsi Akhaya, tana ntoYunani. ³ Talumbula kasaena ia nonturo ri sia. Naupu sia, ia nonia mesavi kapala ntasi hau ri propinsi Siria. Tapi dopame ia nalai, niepena kareba naria toYahudi ri sia nasintuvu mompatesi ia ri dala. Jadi nipakatantuna manjili mantuntuni dala kabatana moliu ri propinsi Makedonia. ⁴ Naria bara sako-ndua tona nompороа i Paulus, haitumo, i Sopater ana i Pirus lako ri ngata Berea, i Aristarkhus bo i Sekundus toTesalonika, bo i Gayus lako ri ngata Derbe. Naria muni i Timotius, i Tikhikus bo i Trofimus, lako ri propinsi Asia pura. ⁵ Ira papitu nokolu ka kami bo i Paulus, bo nipopeara ri ngata Troas kami. ⁶ Naupu haitu pade nituntuni kami dala kabatana sampe ri ngata Filipi. Naliutaka eo mbaso ntoYahudi niuli Posusa Roti Ledo Noragi, kami nesavi kapala lako ri ngata Filipi. Lima-mbongi kami ri dala pade nosintomu ante roa-roa kami ri ngata Troas. Jadi kami nonturo ri sia saminggu kasaena.

I Eutikhus nanavu lako ri jendela

⁷ Bongi Aka, kami nasiromu nangande nosangganingani ante topomparasaya ri ngata Troas. I Paulus notesa sampe tanga bongi, apa patujuna maile mpadondona mompapola polipana. ⁸ Tombi nikasiromu kami haitu, ri tombi katatalu-unjuna. Nadea poindo nitunju ri sia. ⁹ Naria saito kabilasa nosanga i Eutikhus nonturo ri pelaba. Naroyo mpuu matana apa i Paulus ledo naupu-upu notesa. Nasae-sae kabilasa haitu namonjomo sampe nanavu lako ri pelaba ntombi katatalu-unjuna haitu hau ri tana. Tona nanau nangangataka ia, nikavara namatemo. ¹⁰ Tapi i Paulus nanau hau ri tambena bo nekadungga ntuobo ri bavo

kabilasa haitu, pade nikapuina. Nanguli i Paulus ka todea nombatagui tomate haitu, "Nee masusa raramiu, da matuvu ia!" ¹¹ Naliu haitu, nompene vai i Paulus hau ri tombi nikasiromura haitu, bo nitubi-tubina roti bo ira nangande nosangganingani. Naupu nangande, notesa vaimo ia sampe naeo. Naupu haitu nalaimo ia. ¹² Kabilasa namate nanavu haitu, natuvumo bo nikeni nu roana manjili ri banuana, bo nadamba mpuumo rarara pura-pura.

Polipa i Paulus lako ri ngata Troas hau ri ngata Miletus

¹³ Kami nesavi kapala mbaso bo nokolu hau ri ngata Asos mosinggavaka i Paulus sumai. Nipakatantu i Paulus ivesia, apa ia madota modala ri kabatana. ¹⁴ Nosinggavapa kami ante i Paulus ri ngata Asos, nesavi kapala sangganimo kami pura-pura hau ri ngata Metilene. ¹⁵ Lako ri sia nokapala vaimo kami, bo kamailena nakavamo ri tana nosinjambote nte levuto Khios. Bo kamailena vai nakavamo kami ri levuto Samos. Naliu sia, sambongipa nakavamo kami ri ngata Miletus, pesampo nu ngata Efesus. ¹⁶ Lako ri pamula polipa kami, i Paulus nompakatantu domo ia mesai ri ngata Efesus, ala nee masae gaga ri propinsi Asia. Apa nasara rarana hau mantuntuni eo mbaso Pentakosta ri ngata Yerusalem.

Tesa i Paulus ka pakeni ntopomparasaya lako ri ngata Efesus

¹⁷ Nakavapa ri ngata Miletus, i Paulus nompakatu kareba hau ri ngata Efesus nompokio pakeni ntopomparasaya sumai, makava mosinggava ante ia ri ngata Miletus. ¹⁸ Nakavapa ira, nangulimo i Paulus, "Sampe-suvu-sampesuvuku! Nisanimiu berimba katuvuku nte komiu, lako ri kakavaku pamulana ri propinsi Asia hitu sampe sii-sii. ¹⁹ Yaku nokarajaa ri sii ka i Pue Yesus ante ede raraku bo nadea uve matak. Nadea susa bo pari nirasaiku, sabana toYahudi nonia mompatesi yaku. ²⁰ Nisanimiu ledo nakaja raraku nompasimbayu anu noguna ka komiu. Yaku batena nompatuduki komiu ri kasiromu ntodea, bo ri banua-banuamiu. ²¹ Yaku nasaro nompaiinga komiu pura-pura, toYahudi bo tona ledo toYahudi, ala komiu majea lako ri dosamiu bo matundu nte Alatala bo momparasaya Tuputa Yesus.

²² Hitupa yaku hau ri ngata Yerusalem nangoseaka parenta Nosa Gasa nu Alatala ka yaku. Dopa nisaniku nuapa pura majadi nte yaku hamai. ²³ Aga nisaniku ri umba-umba ngata nikalauku, Nosa Gasa nompaisani ka yaku, yaku rasuaraka riar ntarunggu bo mombarasai kasusa bo kapari ri ngata Yerusalem. ²⁴ Tapi ledo kupotove katuvuku hitu. Nau yaku mpuumpuu rapatesi, ledo makuya, asaa kupakaupu pokara-

jaa nidekei i Pue Yesus ka yaku mompatolele Kareba Belo anu nombatesa kabelo nu Alatala nte kita.

²⁵ Sampesuvu-sampesuvuku. Nitunggaikumo komiu bo nipatudukikumo Poparenta nu Alatala ka komiu pura-pura. Bo sii-sii nisaniku domo rakitamiu hanupa lenjeku. ²⁶ Jadi eo hitu kuuli ka komiu ante raraku mpuu-mpuu, ane rapana maria komiu rapopogaa lako nte Alatala sampe ri kasae-saena, salamiu mboto.

²⁷ Apa, ledo nasau raraku nompatuduki ka komiu, pura-pura nia nu Alatala ka kita. ²⁸ Komiu kana mombajagai karomiu mboto. Jagai muni todea topomparasaya, anu niparasayaka Nosa Gasa ka komiu. Komiu kana mompiara todea nu Alatala, nasimbayu mpo topoevu mompiara bimmana. Apa Tuputa Yesus namate bo raaNa natiti mombasompo dosata ala kita majadi todeaNa. ²⁹ Nisaniku malai yaku lako ri sii, kana makava tona nadaa anu mompakasusa todea anu nipi-aramiu, nasimbayu mpo asulaku makava mombabaga bimba. ³⁰ Lako nte komiu mboto meumba tona mompatuduki anu ledo nakana. Rapoviara ivesia ala topangoseaka i Yesus domo mangoseaka dala nakana, tapi mangoseaka iramo. ³¹ Jadi komiu kana mainga! Toramo, sampesuvu-sampesuvuku. Talu-mpae kasae-na, eo bongi yaku ledo nenonto nompatuduki bo nompaiinga komiu saito-saito, bo nadea uve matakunatiti.

³² Jadi sampesuvu-sampesuvuku, hitupa yaku nekakai nte Alatala nerapi Iamo mombajagai komiu. Bo kuuli ka komiu, oseakamo tesa nu Alatala anu nompopaisani kabelo nu Alatala ka kita. Aga Iamo nakuasa mompakaroso pomparasayamiu bo mombadekei belo ka komiu, haitumo belo nipakasadiaNa ka tona nipelisiNa majadi todeaNa.

³³ Ledo ria sanggania nario matakun ka doi bara ka pakea ntona. ³⁴ Nisanimiu mboto yaku nokarajaa ante paleku mboto ala kualim boto anu niparaluuku bo anu niparaluu roa-roaku. ³⁵ Riara mpengaya-ngaya, katu-vaaku najadi jonjo ka komiu, haitumo, kita kana mokaarajaa ala rapakuleta mombatulungi tona ledo nompakule nokarajaa. Kita kana mompariara tesa i Pue Yesus anu nanguli: 'Nadambapa tona nombadekei pade tona nantarima.' "

³⁶ Naupupa i Paulus notesa, nantaputumo ia nosangani-nggani ante pura-pura ira lako ri ngata Efesus bo nosambaya. ³⁷ Notumangi puramo ira. Nikapuiria i Paulus bo niekira, mpo tona nosampesuvu mogaa. ³⁸ Nabuku mpuu rarara, sabana i Paulus nanguli ka ira, "Domo rakitamiu hanupa lenjeku!" Naliutaka sia, nikenira kami sampe ri kapala.

21 Ri sia kami nopalakana nte pakeni ntopomparasaya lako ri ngata Efesus, bo nipalaisi kamimo ira.

I Paulus hau ri ngata Yerusalem

Kami nesavi kapala bo kaliu-liu hau ri levuto Kos, bo kamailena nakavamo kami ri levuto Rodos. Lako ri sia kami napola hau ri pesampo kapala ri ngata Patara.

² Ri Patara kami nolinja ri kapala hau ri bagia Fenisia.

³ Kapala haitu nolipa sampe nikita kami levuto Siprus ri sabingga njidi kami. Tapi kapala nolipa njuu sampe ri propinsi Siria. Kami nesampo ri ngata Tirus sabana ri sia rapotauraka pangulaya kapala nipesavi kami. ⁴ Ri ngata Tirus haitu, kami hau nanggita topangoseaka i Yesus bo nonturo nte ira saminggu kasaena. Ante pekeniaka Nosa Gasa ira nompaiinga i Paulus, nee mantende hau ri ngata Yerusalem.

⁵ Tapi nagana saminggu kami nonturo ri sia, nipalaisi kamimo ira, bo nipapola kamimo polipa kami. Ira pura-pura nosangani-nggani ante anara bo bereira nanggeni kami hau ri savaliku ngata. Nakava ri talinti, nantaputu puramo kami bo nosambaya. ⁶ Naupu nopalakana, nesavi kapalamo kami. Bo ira topekeni pangane nanjili hau ri banuara.

⁷ Lako ri ngata Tirus haitu, kami nokapala sampe nakava ri ngata Ptolemais. Ri sia kami hau mosisani nte topangoseaka i Yesus bo mompapola tabe. Bo kami naturu nte ira sambongi.

⁸ Naeo mpadondo napolamo kami sampe nakava ri ngata Kaisarea. Ri sia, kami hau nonturo ri banua i Filipus, saito topompatolele Kareba Belo. Ia muni saito lako ri ira papitu anu nipelisi ri ngata Yerusalem bara ipia mantulungi suro-suro. ⁹ Naria ana i Filipus ampa randaa. Ira ampa mai nidekeika nu Alatala pompakule mompasimbayu tesa nitarimara lako nte Alatala.

¹⁰ Naliu bara sako-mbongi kami nonturo ri sia, nakavamo saito langgai nosanga i Agabus, lako ri bagia Yudea. Ia muni nidekeika nu Alatala pompakule mompasimbayu tesa nitarimana lako nte Alatala. ¹¹ I Agabus nakava nte kami ri banua i Filipus. Nialana sulepe i Paulus, bo nipouna ka kadana bo palena mboto pade niulina, "Iveimo niuli Nosa Gasa: ToYahudi ri ngata Yerusalem mombasaka tupu nu sulepe hitu, bo rapoura ivehitu, pade radekeira ka tona ledo toYahudi mombatarana."

¹² Nangepe haitu, kami bo pura-pura topomparasaya nonturo ri ngata Kaisarea, nerapi nte i Paulus, "Nee mpuu mapola hau ri ngata Yerusalem!"

¹³ Tapi nesana i Paulus, "Nakuya komiu notumangi nompakabuku raraku? Yaku hii nasadiamo hau ri ngata Yerusalem nau yaku rasaka, nau sampe rapatesi sabana pangoseakaku i Pue Yesus!" ¹⁴ Ledo nadota i Paulus nangepe tesa kami. Jadi nenontomo kami nombatagi ia. Niuli kami, "Damo dota nTupu majadi."

¹⁵ Naliu bara sako-mbongi kasaena kami nonturo ri sia, nanggaliwomo kami bo nantende hau ri ngata

Yerusalem. ¹⁶ Naria muni bara sako-ndua topomparasaya lako ri ngata Kaisarea nomporoa kami. Ira nanggeni kami hau ri banua i Manason ri Yerusalem, apa ri banuana haitu rapesai bo rapaturu kami. I Manason haitu tona lako ri levuto Siprus, bo ia nasaemo najadi topangoseaka i Yesus.

I Paulus nompelioda i Yakobus

¹⁷ Nakava kami ri ngata Yerusalem, topomparasaya ri sia nantarima kami ante damba rara. ¹⁸ Kamilena, i Paulus nosangani-nggani ante kami hau mosinggavante i Yakobus. Pura-pura pakeni ntopomparasaya ntanina naria ri sia muni. ¹⁹ Naupu i Paulus netabe, nitesana ka iramo pura-pura anu nipovia nu Alatala ri tatanga ntona ledo toYahudi tempo ia nompatolele Kareba Belo.

²⁰ Naupu nangepe tesa i Paulus, i Yakobus ante pakeni-pakeni ntanina, nantoiya Alatala. Niulira ka i Paulus, "Sampesuvu, kana rasanimiu nonjobu-njobumo toYahudi nomparasaya i Yesus, tapi ira pura-pura da batena nangoseaka Atura-atura agama anu nipapola Nabi Musa. ²¹ Niepera kareba anu nompakasala komiu. Niepera komiu nompatuduki pura-pura toYahudi anu nonturo ri ngata ntona ledo toYahudi, ala rakabasakara Atura-atura agama haitu. Niepera muni komiu nompatuduki domo paraluu ira mombasuna anara bo domo paraluu mantuntuni ada ntoYahudi. ²² Sii-sii kana raepe ntoYahudi anu nomparasaya i Yesus, komiu nakava ri sii. Jadi, berimbamo? ²³ Aginamo raoseakamiu tesa kami hitu: Naria ampa tona nte kami ri sii novia pojanji nte Tupu bo domo masae rapoviara ada pompakagasa karo nangoseaka adata. ²⁴ Agina komiu hau movia ada pompakagasa karo mosangani-nggani nte ira, bo komiu mombabayari pura-pura anu rapesombara. Naupu sia, ira mamala ragau, tandana nipakaduparamo pojanjira. Ivesiamo, rasani ntodea ledo nakana kareba niepera nombatesa komiu, apa komiu mboto nantuntuni Atura-atura agama anu nipapola Nabi Musa. ²⁵ Tapi tona ledo toYahudi anu nomparasaya i Yesus, nipakatu kamimo sura ka ira nompakatantu atura-atura anu paraluu raoseakara. Haitumo, ira ledo mamala mangande kande nipesomba ka tupu-tupu ntanina, ledo mamala mangande raa bara mangande bau nu binata nikoje, bo ledo mamala mosampaturu ante tona ledo bereira mboto."

²⁶ Nangepe haitu, nasitujumo i Paulus ante tesa i Yakobus bo pakeni ntanina haitu. Jadi naeo mpadondona hau mpuu ia nosangani-nggani ante tona ampa bo nipoviara ada pompakagasa karora. Naupu haitu, nesuamo ira riaru Banua nu Alatala bo nanguli ka topanggeni pesomba ri sia sako-mbongipa pade

maupu ada pompakagasa karora bo pesombara rakeni rapesomba ka Alatala.

I Paulus nisaka ri Banua nu Alatala

²⁷ Napara kaupuna pitu-eo nipakatantu ka ada pompakagasa karo, bara sako-ndua toYahudi lako ri propinsi Asia nanggita i Paulus riaru Banua nu Alatala. Nipakagadora todea ri sia bo nisakara i Paulus, ²⁸ bo nongare-ngare, "ToYahudi! Tulungimo kami! Hitumo tona hau ri umba-umba nompatuduki todea mangeva kita toYahudi. Nipatudukina tona mombabaliki Atura-atura agama anu nipapola Nabi Musa, bo nisalaina Banua nu Alatala hitu! Sii-sii nikenina tona ledo toYahudi nesua riaru Banua nu Alatala nompakaruto ponturo nagasa hitu!" ²⁹ (Niulira ivesia, sabana nikitaramo i Trofimus, tona ledo toYahudi lako ri ngata Efesus. I Trofimus nomporoa i Paulus riaru ngata. Nisarumakara i Paulus nanggeni ia nesua ri Banua nu Alatala, tano ledo.)

³⁰ Nangepe haitu, pura-pura tona ri ngata Yerusalem nagado mpuumo, bo ira mpasangani-nggani nangova hau ri Banua nu Alatala nombasaka i Paulus. Niumbunjaira i Paulus hau ri savalikuna bo niupira vamba Banua nu Alatala ala ledo magado riarana. ³¹ Tempo topegado haitu nompasimbuku mompatesi i Paulus, naria tona hau nopakiluka tadulako Magau Mbaso ivei: "Nagadomo njumangu ngata Yerusalem!"

³² Nangepe pakilu haitu, tadulako haitu kaliu-liu nangala tantara-tantarana bo hau nasalisa ri kagado haitu. Nanggitapa tantara-tantara nakava, nenontomo todea nombaboba i Paulus. ³³ Jadi tadulako haitu nombasaka i Paulus, bo nituduna tona nombarante ia ante rompenga rante. Naupu sia nipekutanana ka todea, "Isema tona hitu? Nuapa nipoviana?"

³⁴ Naria sanu nongare ivei, bo naria muni sanu nongare iveitu. Ivesia kagadona sampe ledo nisani nu tadulako nuapa kakanana najadi. Haitumo sabana niparentana ala i Paulus rakeni ri asrama nu tantara.

³⁵ Tempo tantara nanggeni i Paulus nakava ri tangga asrama haitu, topegado-topegado narau mpuu sampe i Paulus damo nikova ntantara nesua hau riaru asrama. ³⁶ Topegado haitu netuntuni ri puri bo nongare-ngare, "Patesimo ia!"

I Paulus nanjaliku karona mboto

³⁷ Ira da mesua riaru asrama nu tantara, i Paulus nanguli ka tadulako, "Tua, mamala yaku motesa sampalai nte komiu?"

Tadulako nesana, "Nisanimu tano nobasa Yunani! ³⁸ Ane ivesia, ledo iko tano toMesir nangeva pomaarenta bo nanggeni pata-njobu topepatesi nalai hau ri karava bai bara ipia?"

³⁹ Nesanamo i Paulus, "Ledo. Yaku hii toYahudi, lako ri Tarsus ngata mbaso ri propinsi Kilikia. Kuperapi, dekei kaku loga motesa ka todea hitu."

⁴⁰ Tadulako haitu nompaloga i Paulus motesa. Jadi i Paulus neangga ri tangga nu asrama bo nombalaeraka palena, ala ira malino mangepe tesana. Nalinomo ira sakide, bo nompamulamo i Paulus notesa ka ira ante basa Ibrani, basa ntoYahudi.

22 "Sampesuvu-sampesuvu pura-pura. Epemo tesaku manjaliku karoku hitu!" ² Tempo todea nangepe i Paulus notesa ante basa Ibrani, nalino ntoto ira, bo i Paulus nompapola tesana. ³ "Yaku hii toYahudi nipoanaka ri ngata Tarsus ri propinsi Kilikia. Tapi yaku nipakambaso ri sii ri ngata Yerusalem, bo neguru nte Guru Mbaso nosanga i Gamaliel. Yaku nipatudukina pakabelo-belo nantuntuni Atura-atura nipapola Nabi Musa ka totuata nggaulu. Yaku muni mpuu-mpuu nangoseaka parenta nu Alatala nasimbayu mpo komiu ri sii. ⁴ Haitu sampe nipandasaku topangoseaka pepaduduki i Yesus. Naria sanu nipatesiku, naria sanu nisakaku bo nisuarakaku riarar ntarunggu, langgai bo mombine. ⁵ Pakeni nTopanggeni Pesomba mboto bo pura-pura toPolibu Mbaso Agama Yahudi mamala mombasabiki tesaku hitu nakana. Apa ira mbotomo nombadekei ka yaku sura rakeni ka toYahudi ri ngata Damsyik. Sura haitu nombadekei kuasa ka yaku ala yaku mamala mombasaka topomparasaya pepaduduki i Yesus sumai bo manggeni ira tumai ri ngata Yerusalem bo rahuku."

I Paulus nombatesa berimba sampe ia najadi topangoseaka i Yesus

Suro-suro 9:1-19; 26:12-18

⁶ "Yaku da riarar mpolipaku, naparamo kami ri ngata Damsyik, nitasere tanga eo, sampesanika naria reme lako ri langi nareme mpuu nombavanta yaku.

⁷ Nadunggamo yaku bo niepeku suara nanguli, 'Saulus, Saulus! Nakuya iko nompandasa Yaku?'

⁸ Yaku nekutana, 'Isema komiu, Tua?'

Nesana suara haitu, 'Yakumo hii i Yesus toNazaret nipandasamu!' ⁹ Pura-pura tona nomporea yaku nanggi-ta reme haitu, tapi ledo niepera suara notesa ka yaku.

¹⁰ Jadi nekutana vai yaku, 'Nuapa masipato kupovia, Pue?'

Nesanamo i Pue, 'Peanggamo! Koimo pesua ri ngata Damsyik. Hamai pade rauli ka iko pura-pura anu nipakatantu nu Alatala kana mupovia.' ¹¹ Tempo haitu naburomo matakua sabana nivanta reme haitu. Jadi yaku damo ninini nu roaku nolipa hau nesua riarar ngata Damsyik.

¹² Ri Damsyik naria tona nosanga i Ananias. Ia tona nanoa bo natutu nangoseaka Atura-atura agama anu nipapola Nabi Musa. Pura-pura toYahudi nonturo ri ngata Damsyik mpuu-mpuu nombabila ia. ¹³ Ia nakava

neangga ri sinjoriku bo nanguli, 'Sampesuvuku Saulus, bulamo matamu. Iko mekita mpanjili.' Kalii-liu nabelomo matakua bo nikitaku i Ananias.

¹⁴ Naupu haitu, niulikana yaku, 'Alatala anu nipetupu ntotuata nggaulu, nompelisi iko ala musani anu nipodotana. NipelisiNa iko ala mukita i Yesus, Batua nu Alatala anu nangoseaka dotana, bo ala muepe mboto suara i Yesus. ¹⁵ Iko majadi sabiNa ka pura-pura tona bo mupatolele anu nikitamu bo anu niepemu. ¹⁶ Jadi, nuapa vai nipopeamu? Peanggamo, dekeimo karomu radiu, tandana iko nangoseaka i Yesus. Pekakaimo nte i Yesus ala raampungina dosamu.' "

Alatala nombasuro i Paulus mompatolele Kareba Belo ka tona ledo toYahudi

¹⁷ "Sampesuvu-sampesuvu, naupu haitu, nanjilimo yaku hau ri ngata Yerusalem, bo tempo yaku nosambaya ri Banua nu Alatala, yaku nikuasai Nosa Gasa.

¹⁸ Nikitaku i Yesus bo niulikaNa yaku, 'Palaisimo ngata Yerusalem masalisa, apa ledo ratarimara posabimu nombatesaki Yaku.'

¹⁹ Tapi nesana yaku, 'Pue, kana ratarimara tesaku, apa nisanira poviaku bara ipia. Nisanira yaku nesua ri banua-banua petupu nesaka, neboba, bo nombasuaraka topomparasaya Komiu riarar ntarunggu.

²⁰ Ivesia muni tempo sabiMiu i Stefanus nipatesira. Nisanira yaku mboto naria ri sia bo yaku nasituju ia rapatesi. Bo yakumo nombajagai pakea ntona nompatesi ia. Jadi kana raparasayara tesaku.'

²¹ Tapi nanguli vaimo i Pue ka yaku, 'Koimo. Yaku nantudu iko hau ri ngata-ngata nakavao, nte tona ledo toYahudi.' "

²² Todea haitu nalino nangepe tesa i Paulus. Tapi nieperapa ia hau nte ntona ledo toYahudi, domo nipokonora mangepe anu ratesana. Nongaremo ira ante suara namangga mpuu, "Patesimo tona tutu! Ia domo masipato matuvu!" ²³ Sii nongare-ngare, sii nomporetaka-taka bajura bo nikamburakara sovu ri laerava sabana nagigi mpuumo rarara. ²⁴ Haitu sampe tadulako Magau Mbaso nomparenta ala i Paulus rakeni riarar asrama tantara. Patujuna, i Paulus racambu bo raparesa ri sia ala rasani nuapa sabana toYahudi nongare-ngare ivesia ka ia.

²⁵ Tapi tempo i Paulus nipou racambu, niulikana balengga ntantara anu neangga ri sia, "Berimba? Masipato todea nu Magau Mbaso Roma racambu dopame ratangara?"

²⁶ Nangepe tesa i Paulus, balengga ntantara haitu hau ri ngayo nu tadulako bo nanguli, "Tua, agina rapekirimiu ntani ruru anu rapoviamiu ka tona haitu, sabana ia todea nu Magau Mbaso Roma!"

²⁷ Nangepe haitu hau tadulako nte i Paulus, bo nompekutana, "Ulimo ka yaku! Nakana iko todea nu Magau Mbaso Roma?"

Nesana i Paulus, "Iyo, nakana."

²⁸ Nanguli tadulako haitu, "Yaku hii najadi todea nu Magau Mbaso Roma sabana nadea mpuu nibayariku!"

Nesana i Paulus, "Tapi yaku hii todea nu Magau Mbaso Roma lako ri pompoanaka yaku."

²⁹ Nangepe haitu, kaliu-liu noura tantara-tantara anu nasadia mombacambu i Paulus. Tadulakora muni naeka, sabana nipoura i Paulus, tano i Paulus haitu todea nu Magau Mbaso.

I Paulus ri ngayo Polibu Mbaso Agama Yahudi

³⁰ Tadulako Magau Mbaso haitu mpuu-mpuu madota mangisani nuapa sabana toYahudi nompakasala i Paulus. Jadi kamaile napa nitudunamo balengga-balengga ntopanggeni pesomba ante pura-pura toPolibu Mbaso Agama masiromu. Bo nipekivolendam rante i Paulus pade nikenina hau mantingayo polibu haitu.

23 Nakava sumai, nikanoto i Paulusmo toPolibu Mbaso Agama bo niulina, "Sampesuvu-sampesuvuku. Sampe ri eo hitu, yaku natuvu nanao, nagasa ri panggita nu Alatala." ² Nangepe tesa i Paulus, narau mo i Ananias, Pakeni nTopanggeni Pesomba. Bo nituduna tona ri sinjori i Paulus mombasapa sumba i Paulus. ³ Nanguli i Paulus ka i Ananias, "Komiu mboto kana rasapa nu Alatala! Komiu aga nabelo ri sumba. Komiu nonturo ri situ mombatangara yaku nantuntuni Atura-atura agama anu nipapola Nabi Musa, tano komiu mboto nombaliunaka Atura-atura haitu apa nitudumiu tona mombasapa yaku."

⁴ Tona ri sinjori i Paulus nanguli ka ia, "Iko nombasalai Pakeni nTopanggeni Pesomba anu nipelisi nu Alatala!"

⁵ Nesana Paulus, "O, sampesuvu pura-pura, ledo nisaniku iamo Pakeni nTopanggeni Pesomba. Ane nisaniku, ledo kuuli tesa pangane, sabana riaru Buku Gasa nitulisi ivei: 'Nee mombasalai pakeni ntodeamu!' "

⁶ Nipeinta i Paulus naria toSaduki, bo toFarisi riaru Polibu Mbaso Agama haitu. Jadi, niulinamo ka ira pura-pura, "Sampesuvu-sampesuvu! Yaku hii toFarisi muni bo muli ntoFarisi! Yaku nitangara ri sii sabana yaku nomparasaya tona namate mpuu-mpuu matuvu mpanjili!"

⁷ Nangepe haitu, toFarisi bo toSaduki ri sia nosinggarau mbotomo, sampe Polibu haitu natebagi randua libu. ⁸ Haitu najadi sabana nantuntuni panggava ntoSaduki, tona namate ledo matuvu mpanjili. Pangulira muni ledo naria malaeka nTupu, bo ledo muni naria nyawa nu manusia. Tapi toFarisi niparasayara

pura. ⁹ Jadi nadaa mpuumo kagado. Neangga bara sako-ndua toFarisi anu najadi guru agama bo ira mpuu-mpuu nombabali tesa ntoSaduki. Niulira, "Ane panggava kami, i Paulus hitu ledo ntoto naria salana, nau aga sakide. Bara naria anitu bara malaeka nTupu notesa ka ia."

¹⁰ Posinggarau haitu mpuu-mpuu nakanano, sampe tadulako naeka mbelaka raposibitesi ntodea i Paulus. Sia sampe nituduna tantarana mangala i Paulus lako ri tatanga ntodea haitu bo nanggeni ia hau ri asrama tantara.

¹¹ Kamaile bongina, i Pue Yesus neangga ri sinjori i Paulus bo nanguli, "Pakaroo raramu. Nipatolelemumo tesaKu ri ngata Yerusalem, ivesia muni tesaKu kana mupatolele ri ngata Roma!"

ToYahudi Nasintuvu mompatesi i Paulus

¹²⁻¹³ Naeo mpadondo, nelabi patapulu toYahudi nonia mompatesi i Paulus. Ira pura-pura nosumpa ane dopame rapatesira i Paulus, dopa mangande, dopa manginu. ¹⁴ Hau ira ri ngayo balengga-balengga ntopanggeni pesomba bo totua-totua ntoYahudi bo nanguli, "Kami hii nosumpa puramo, kami dopa mangande dopa manginu, ane dopa rapatesi kami i Paulus! ¹⁵ Jadi, kami merapi komiu bo toPolibu ntanina mompakatu sura ka tadulako Magau Mbaso, merapi ala i Paulus rakeni mpanjili mantingayo Polibu Mbaso Agama Yahudi. Ulika ia da nariapa bara sako-ngaya rapekutanamiu nte i Paulus. Bo kami masadia mompatesi ia ri dala, dopame ia makava ri sii."

¹⁶ Tapi naria saito kabilasa, pinoana i Paulus, nangepe niara haitu. Hau ia ri asrama tantara bo nitesana nia ntona haitu ka i Paulus. ¹⁷ Naupu nangepe tesa nu pinoanana, i Paulus nompokio saito balengga ntantara bo nanguli ka ia, "Keni kabilasa hitu hau ri ngayo nu tadulako. Naria anu ratesana ka ia."

¹⁸ Balengga ntantara haitu nanggeni kabilasa hau ri ngayo nu tadulako bo nanguli, "I Paulus anu nitarunggu, nerapi yaku manggeni ngana hitu ri ngayomiu, apa naria anu ratesana ka komiu."

¹⁹ Tadulako haitu nombanini kabilasa haitu hau motesa ri santanina ala ledo raepe ntona. Nipekutanana, "Nuapa mutesa ka yaku?"

²⁰ Nesanamo kabilasa haitu, "ToYahudi nasintuvu merapi komiu manggeni i Paulus mantingayo Polibu Mbaso Agama maile. Raulira da nariapa bara sako-ngaya rapekutanara nte i Paulus. ²¹ Tapi kuperapi nte komiu, nee mpuu rapoiyomiu perapira haitu. Apa nelabi patapulu ira nasadiamo mombalava i Paulus ri dala. Ira pura-pura nosumpa ledo mangande bo ledo manginu ane dopa rapatesira i Paulus. Nasadiamo ira. Ira damo nompopea pesanamiu."

²² Nangepe haitu, tadulako nanguli, "Nee muuli ka isema-sema nipopaisanimumo nia haitu ka yaku." Bo nituduna kabilasa haitu manjili.

I Paulus niken i hau ri ngayo Gubernur Feliks

²³ Naupu haitu, tadulako nompokio randua tantarana, bo nanguli ka ira, "Pakasadiamo roatu tantara bi-asa bo pitupulu tantara mesavi jara, bo roatu tantara motavala. Bongina hitu tinti sasio, komiu kana malai lako ri sii hau ri ngata Kaisarea." ²⁴ Pakasadia muni jara rapesavi i Paulus. Kenimo ia bo jagaimo ia pakabelo-belo sampe makava ri ngayo Gubernur Feliks."

²⁵ Naupu sia, tadulako notulisi sura ka i Feliks ivei:

²⁶ "Gubernur Feliks nibilaku. Tabe lako nte yaku i Klaudius Lisias.

²⁷ I Paulus hitu nisaka ntoYahudi bo sakidepa nipate-siramo. Niepeku ia todea Magau Mbaso Roma, jadi nikeniku salunu tantara nompakasalama ia. ²⁸ Naupu haitu nikeniku ia hau ri Polibu Mbaso Agamara, sabana yaku madota mangisani nuapa ntoto salana nipangadukara. ²⁹ Ri sia, niepeku pangaduara aga nosinggambela ante atura-atura agamara mboto. Ledo ria salana anu masipato ratarunggu atau rahuku mate ka ia. ³⁰ Naupu haitu, niepeku naria nia ntoYahudi mompatesi ia. Jadi kalii-liu nituduku ia rakeni tou ri ngayomiu. Nituduku muni pura-pura topompangadu ia, kana tou manggeni pangaduara ri ngayomiu."

³¹ Naupu tadulako notulisi sura haitu, tantara-tantarana nangoseaka anu niparentana ka ira. Nialara i Paulus bo nikenira ia nalai bongina haitu sampe nakava ri ngata Antipatris. ³² Naeo mpadondo, pataatu tantara nolipa nggadamo nanjili, bo tantara nojara napolamo nanggeni i Paulus hau ri ngata Kaisarea.

³³ Nakavapa hamai, tantara nojara haitu nombadekei sura nu tadulakora ka gubernur, bo nidekeira munimo i Paulus ka ia.

³⁴ Naupu Gubernur Feliks nombaca sura haitu, nipekutanana i Paulus, "Ri umba ngatamu?" Nesana i Paulus, "Yaku toKilikia."

Nisani gubernurpa i Paulus lako ri propinsi Kilikia, anu nambela bagia niparentana, ³⁵ niulinamo, "Nabelomo. Kuparesa parakaramu, ane makava topangadu ri sii." Jadi nituduna tantara mombajagai i Paulus ri banua mbaso nipovia i Herodes bara ipia.

I Paulus nipangadu ntoYahudi

24 Lima-mbongi kaliuna, Pakeni nTopanggeni Pesomba nosanga i Ananias ante bara sako-ndua pakeni-pakeni ntoYahudi, notua hau ri ngata Kaisarea. Nikenira muni saito tona napande notesa nosanga i Tertulus. Ira nangingayo Gubernur Feliks, bo nipangaduramo sala i Paulus.

² I Paulus nipokio mantingayo Gubernur Feliks, bo i Tertulus nompangadu i Paulus ivei: "Gubernur nibilaku. Kami todea riaro pomparentamiu natuvu nasana. Lako ri kanotomiu nompamenta, nadeamo nipakabelo ri ngata kami. ³ Pura-pura panggaviamiu anu nompakabelo ngata kami hitu, nitarima kami nte damba rara. Ledo nabasa-basa kami manguli tarima kasi. ⁴ Pua, kami ledo madota masae gaga. Tapi nisani ntonamo kabelo raramiu, sampe kami merapi nte komiu ala raepemiu sampalai pangadua kami hitu. ⁵ Nikita kami i Paulus tuu topegado nadaa ntoto. Nipakagadona toYahudi ri umba-umba ngata. Ia muni pakeni ntona nangoseaka pepatuduki i Yesus toNazaret. ⁶ Ledo aga haitu, tapi ia madota mompakaruto Banua nu Alatala. Haitu sampe nisaka kamimo ia. [Patuju kami mombatangara ia mantuntuni atura-atura agama kami mboto. ⁷ Tapi Tadulako Lisias nangago ia lako nte kami, ⁸ bo niparentana ala pura-pura topangadu kana mantingayo komiu.] Jadi, Gubernur nibilaku, ane rapesamiu tona tutu, tantu rasaniamiu lako ri tesana mbotomo, pangadua kami hitu nakana."

⁹ ToYahudi ntanina ri sia nompangadu i Paulus muni, bo niulira tesa i Tertulus nakana mpuu.

I Paulus nanjaliku karona ri ngayo i Feliks

¹⁰ Naupu haitu, gubernur haitu nombalaeraka pale-na ka i Paulus ala ia mesana. Jadi i Paulus nanguli, "Gubernur nibilaku. Pua, nadamba raraku mombasaliku karoku ri sii ri ngayomiu, apa nisaniku komiu nompae-mpaemo najadi topotangara ri ngata hitu. ¹¹ Mamala rapekutanamiu mboto nte tona, aga sapulu rombongi kaliuna yaku nantende hau ri ngata Yerusalem hau metupu ri Banua nu Alatala. ¹² Ledo sanggania toYahudi gahaitu nanggava yaku nosinjanai, bara nompakagado todea ri Banua nu Alatala, bara ri banua-banua petupu, bara ri ngata. ¹³ Ledo muni namala ira mompopakita ka komiu pangaduara haitu nakana. ¹⁴ Tapi yaku kana mompangaku ri ngayomiu, yaku netupu nte Alatala nantuntuni pepatuduki i Yesus. Panguli ntoYahudi gahitu, pepatuduki haitu nasala. Tapi yaku bate-batena netupu nte Alatala anu nisomba ntotua kami nggaulu, bo nomparasaya pura-pura anu nitulisi riaro Buku Atura Agama bo Buku Nabi-nabi. ¹⁵ Yaku nasimbayu ante toYahudi gahitu, yaku muni nanjarumaka Alatala mompakatuvu pura-pura tona lako ri kamatera, tona nanoa bo muni tona nadaa. ¹⁶ Haitumo sabana yaku nasaro nompasimbuku mokainggu nabelo ala ledo maria nuapa-nuapa nipoviaku masala ri panggita nu Alatala bara ri panggita nu manusia.

¹⁷ Nasaemo yaku nompalaisi ngata Yerusalem. Tapi dopa nasae hitu, yaku nanjili hau ri ngata Yerusalem nanggeni doi petulungi ka tona napakasi ri sia, bo muni yaku madota mombadekei pesombaku ka Alatala.

¹⁸ Tempo yaku da naria ri Banua nu Alatala nanggeni pesombaku nompakaupu ada pompakagasa karoku, naria bara sako-ndua toYahudi lako ri propinsi Asia nanggava yaku. Ledo naria todea nosangani-nggani ante yaku, bo ledo muni naria kagado tempo haitu.

¹⁹ Kakanana ira lako ri Asia kana maria muni ri sii mompangadu yaku ri ngayomiu ane maria mpuu pangaduara ka yaku. ²⁰ Tapi ira ledo ria ri sii, jadi aginamo tona ri sii anu nompangadu yaku, manguli pakalanto sala nuapa nikavara tempo yaku naria ri ngayo Polibu Mbaso Agama Yahudi. ²¹ Ledo naria sala nikavara, aga sambela tesa niuliku ri ngayora anu ledo nipokonora, ivei: 'Yaku nitangara eo hitu, sabana yaku nomparasaya tona namate kana matuvu mpanjili.' "

²² Jadi Gubernur Feliks nompopenonto polibu haitu apa nisanina mami pepatuduki i Yesus. Niulina, "Kupakaupu parakara hitu ane mariamo Tadulako Lisias ri sii." ²³ Naupu haitu niparentana balengga ntantara ala i Paulus batena rajagai. Tapi nau nijagai, ledo nitarunggu ntoto apa nidekeira ia nolipa-lipa sakide bo ledo nitagi roana nakava mantulungi ia.

I Paulus ri ngayo i Feliks bo i Drusila

²⁴ Bara sako-mbongi kaliuna, nanjilimo Gubernur Feliks nosangani-nggani ante bereina nosanga i Drusila. I Drusila mai, toYahudi. I Feliks nantudu tona hau mangala i Paulus rakeni ri ngayona ala raepena i Paulus nombatentei pomparasayana i Yesus Kristus. ²⁵ I Paulus nanguli pokaingguta kana manoa, bo kita ledo mamala mangoseaka dota rarata nadaa, apa makava Eo Potangara ngena tempo Alatala mombat-angara pura-pura manusia.

Nangepe tesa i Paulus, naeka mpuumo i Feliks. Nanguli ia, "Ivesiamo ruru. Ane maria loga damo kupokio pade motesa vai kita." ²⁶ Kakanana nisarumaka i Feliks i Paulus mombadekei doi ka ia ala ia rakabasa-ka. Haitu sabana i Paulus nasaro nipokio i Feliks motesa-tesa ante ia.

²⁷ Rompae kaliuna, i Feliks nisambe, bo i Perkius Festus najadi gubernur ri bagia haitu. Tempo nolinja i Feliks, ia madota mangala rara ntoYahudi, jadi nipalambanamo i Paulus riara ntarunggu.

I Paulus nekitangara ri ngayo Magau Mbaso Roma

25 Naliu katalu-mbongina i Festus nakava ri bagia haitu, nantendemo ia lako ri ngata Kaisarea hau ri ngata Yerusalem. ² Nakava sumai, balengga-balengga ntopanggeni pesomba bo pakeni-pakeni ntoYahudi nakava nte ia mombatesa parakara i Paulus ka ia. Ira mpuu-mpuu nerapi nte i Festus, ³ ala lako ri kabelo rarana, ratuduna ala i Paulus rakeni tumai ri ngata Yerusalem. Tano mai, patujura mombalava i Paulus ri dala bo mompatesi ia.

⁴ Tapi i Festus nesana, "I Paulus da nijagai ri ngata Kaisarea, bo yaku mboto domo masae manjili hau. ⁵ Jadi, aginamo bara sako-ndua komiu anu naria ntur-omi, motua mosangani-nggani ante yaku hau ri ngata Kaisarea. Ane maria mpuu sala i Paulus, hamai pade kuepe pangaduamiu."

⁶ Dopa nasae i Festus nakava ri ngata Yerusalem, nitasere valu-mbongi bara sapulu-mbongi kasaena, nanjilimo ia hau ri ngata Kaisarea. Nakava sumai, kamaile-na nesuamo ia ri banua potangara bo nituduna tona manggeni i Paulus mantingayo ia.

⁷ Nakavapa i Paulus, toYahudi anu notua lako ri ngata Yerusalem pangane, neangga nombatiku ia bo nompangadu ia ka i Festus. Mpengaya-ngaya kasala bo kadaa nipangadukara. Tapi aga nikara-karara nggoo, ledo ria katantuna nuapa sala i Paulus.

⁸ Naupu ira nompangadu ia ivesia, i Paulus nanjaliku karona. Niulina, "Yaku hii ledo novia anu nadaa. Yaku ledo nombaliunaka Atura-atura agama Yahudi, bo ledo muni nompakaruto Banua nu Alatala. Ledo muni niliunakaku parenta Magau Mbaso."

⁹ Tapi i Festus madota mangala rara ntoYahudi, jadi nipekutanana nte i Paulus, "Madota iko hau ri ngata Yerusalem ala anu nipangadukara iko hitu ratangara ri ngayoku hamai?"

¹⁰ Nesana i Paulus, "Pua, ledo madota yaku, sabana hitu-hitu yaku neangga ri ngayomiu, apa komiu topotangara anu nipakatantu Magau Mbaso Roma mboto, bo ri siimo yaku masipato ratangara. Pua, nisanimiu mbotomo ledo naria salaku nte toYahudi. ¹¹ Ane rapana mpuu-mpuu niliunakaku atura-atura bara nipoviaku anu masipato rahuku mate ka yaku, nasadiamo yaku mamate! Tapi pangaduara hitu ledo nakana, jadi ledo naria saitoa mamala mombadekei yaku ka ira. Yaku mekitangara ri ngayo Magau Mbaso!" †

¹² Jadi naupu i Festus nosimpotesa ante roa-roana anu nangisani atura-atura negara, niulina ka i Paulus, "Iko nekitangara ri ngayo Magau Mbaso ri ngata Roma. Jadi iko kana hau mantingayo Magau Mbaso!"

I Paulus ri ngayo i Agripa bo i Bernike

¹³ Ledo nasae kaliuna haitu, nakavamo Magau Agripa ante i Bernike †† ri ngata Kaisarea mosisani nte i Festus sabana ia dako nilanti najadi gubernur. ¹⁴ Naliu bara sako-mbongi ira ri sia, i Festus nombatesa parakara i Paulus ka Magau Agripa. Nanguli i Festus, "Ri sii naria saito tona nosanga i Paulus. Ia nipalamba i Feliks riara ntarunggu. ¹⁵ Tempo yaku naria ri ngata Yerusalem, balengga ntopanggeni pesomba ante pakeni-pakeni ntoYahudi nompangadu tona haitu. Niper-

† Yaku mekitangara ri ngayo Magau Mbaso! Aga tona najadi todea Magau Mbaso namala mekitangara ri ngayo nu Magau Mbaso ane nirasaira potangara ka ira ledo nanao. †† I Bernike haitu tui mombine Magau Agripa.

apira yaku mombabotusi pehuku ka ia. ¹⁶ Tapi yaku nesana ka ira, 'Nantuntuni atura kami todea Magau Mbaso, ane tona nipangaduka, ia kana mosintingayo ante tona nompangadu ia, bo radekeika loga manjaliku karona. Ane dopa rapovia ivesia, dopa mamala ia rahuku.'

¹⁷ Jadi tempo tona nompangadu i Paulus nakava ri sii, ledo nipopeaku pakasae. Kamailena haitu nipasiromukumo polibu potangara bo niparentaku i Paulus rakeni rapoposintingayo nte tona nompangadu ia.

¹⁸ Tempo tona nompangadu ia neangga notesa, nis-arumakaku i Paulus mai novia anu nadaa mpuu. Tano, ledo ria kasalana. ¹⁹ Ira aga nosisala panggava ka agamara mboto, bo muni ka saito tona nosanga i Yesus. Tona haitu namatemo, tapi i Paulus nanguli Ia natuvu mpanjili. ²⁰ Yaku da naingu nompekirika bara berimba yaku mamala mombabotusi parakara haitu, jadi nipekutanaku i Paulus bara madota ia hau ri ngata Yerusalem ala parakarana ratangara hamai. ²¹ Tapi i Paulus nekitangara ri ngayo Magau Mbaso. Niperapina ala ia rajagai nu tantara sampe parakarana rabotusi ri ngayo Magau Mbaso. Haitu sabana niparentaku rajagai njuu ia sampe maria logaku mombatudu ia rakeni hau ri ngayo Magau Mbaso."

²² Nangepe haitu, nangulimo i Agripa ka i Festus, "Yaku muni madota mangepe tona haitu motesa."

Nesana i Festus, "Maile mamala komiu mangepe ia."

²³ Kamailena, nakavamo Magau Agripa bo i Bernike. Ira nitarima ante ada pebila ka magau. Ira nesua riarabanua polibu nosanggani-nggani ante tadulako-tadulako bo tona naria nturona ri ngata haitu. I Festus nomparenta tantarana manggeni i Paulus mesuamo. ²⁴ Nakavapa i Paulus, nangulimo i Festus, "Magau Agripa, bo pura-pura tona naria ri sii. Peintamo tona hitu! Pura-pura toYahudi nompangadu ia ri ngayoku, tona lako ri ngata Yerusalem, bo tona naria ri sii ri Kaisarea. Ira nongare-ngare nanguli ia masipato rahuku mate.

²⁵ Tapi niparesakumo ia, ledo naria sangayaa salana nikavaku sampe masipato rahuku mate ka ia. Kaupuna, ia mboto nekitangara ri ngayo Magau Mbaso ri ngata Roma. Sabana haitu, nipakatantukumo ia kana rakeni hau ri ngayo Magau Mbaso. ²⁶ Aga dopa nisaniku nuapa kutulisi ka Magau Mbaso, apa dopa ria katantuna kasalana. Haitumo sabana yaku nompopositingayo ia nte komiu pura-pura, nelabipa komiu, Magau Agripa nibilaku. Patujuku, ane maupu ia raparesata ri sii, kana mariamo anu mamala kutulisi ka Magau Mbaso. ²⁷ Nantuntuni panggavaku, ledo masipato tona rakeni ri ngayo Magau ane ledo natan-tu salana nipangaduka ntona."

I Paulus nanjaliku karona ri ngayo Magau Agripa

26 Magau Agripa nanguli ka i Paulus, "Iko radekei loga motesa manjaliku karomu."

Jadi i Paulus nolaeraka palena, bo notesa nombasaliku karona ivei: ² "Magau Agripa nibilaku. Nirasauku nauntu mpuu yaku namala manjaliku karoku ri ngayomiu manguli pura-pura pangadu ntoYahudi ka yaku. ³ Nelabipa vai, Pua, sabana komiu mpuu-mpuu nangisani pura-pura ada bo pepatuduki nipoposisala kami toYahudi. Sabana haitu, yaku merapi mpuu-mpuu nte komiu, mosabara mangepe tesaku hitu.

⁴ Nisani ntoYahudi pura-pura dala nggatuvuku lako ri pantepuuna. Lako ri kakodiku yaku nonturo ri tatangara ri ngata Yerusalem. ⁵ Nasaemo nisanira yaku. Ane rapodotara, ira mboto mamala majadi sabi katuvuku hitu. Nompamula lako ri pantepuuna, nioseakaku pepatuduki ntoFarisi, anu mpuu-mpuu natutu nangoseaka pura-pura atura agama kami ntoYahudi. ⁶ Hitupa yaku neangga ri ngayomiu ri sii ratangara, sabana yaku nanjarumaka Alatala mompakadupa pojanjiNa ka totua kami nggaulu. ⁷ Kami toYahudi, muli lako ri sapulu randua ana i Israel, nanjarumaka pojanji haitu rapakadupa nu Alatala. Haitumo sampe kami ledo nabasa-basa eo bongi netupu nte Alatala. O Magau nibilaku! Yaku nipangadu ntoYahudi sabana yaku nomparasaya pojanji haitu, nasimbayu nte ira! ⁸ Nakuya sampesuvuku toYahudi ledo nompakule nomparasaya Alatala mompakatuvu mpanjili tona namate?

⁹ Ivesia muni yaku bara ipia. Nisarumakaku kana kupasimbuku mangeva tona nomparasaya i Yesus toNazaret. ¹⁰ Bo nipoviaku mami ivesia ri ngata Yerusalem. Balengga-balengga ntopanggeni pesomba nombadekei sura kuasa ka yaku bo nadea todea nu Alatala nisuarakaku riararanturunggu. Ledo aga haitu, ane ira nihuku mate, nadamba raraku. ¹¹ Nadea ngganimo yaku nompandasa ira riarabanua petupu. Nipasimbukuku nobarusu ira ala domo raoseakara i Yesus. Nagigi mpuu raraku nompekirika ira sampe yaku hau nangelo ira ri ngata-ngata nakavao."

I Paulus nombatesa berimba sampe ia najadi topangoseaka i Yesus

Suro-suro 9:1-19; 22:6-16

¹² "Ivesia muni patujuku hau ri ngata Damsyik ante sura kuasa lako ri balengga-balengga ntopanggeni pesomba. ¹³ Magau nibilaku! Tempo yaku da ri dala, nitasere tanga eo, nikitaku reme lako ri langi naremepa pade pevanta nu eo. Reme haitu nombavanta yaku ante roa-roaku sampolipa. ¹⁴ Kami pura-pura nadung-

† Ri bara sakuya naskah njae nitulisi ivei: Lako ri pantepuuna yaku nonturo ri tatangara ri ngata pompoanaka yaku bo muni ri Yerusalem.

ga ri tana, bo niepeku suara nanguli ante basa Ibrani ivei: 'Saulus, Saulus! Nakuya iko nompandasa Yaku? Iko aga mompakasusa karomu mboto ane batena mueva pekeniaka nTupumu!'

¹⁵ Nesana yaku, 'Isema komiu, Pua?'

Nanguli vaimo suara haitu, 'Yakumo hii i Yesus, tona nipandasamu! ¹⁶ Peanggamo! Yaku neonga mangang-gataka iko majadi batuaKu bo sabiKu. Iko kana mompatolele ka tona ntanina anu nikitamu eo hitu bo anu Kupopakita ka iko ri tempo makava. ¹⁷ Ane toYahudi bara tona ledo toYahudi mompakasusa iko, Kukabasa-ka iko lako ri kuasara. Kutudu iko manggeni TesaKu ka tona ledo toYahudi. ¹⁸ Kutudu iko hau mombabuka matara, ala ira domo matuvu ri kalandana tapi matuvu riaru reme nu Alatala, ala ira rakabasaka lako ri kuasa Magau nu Seta bo matundu nte Alatala. Bo dosa-dosara raampungu bo ira majadi todea nu Alatala anu nipelisiNa, sabana pomparasayara Yaku.' "

I Paulus notesa pokarajaana

¹⁹ "Magau Agripa, haitu sabana yaku hii batena nanggoseaka anu nipopakita nu Alatala ka yaku. ²⁰ Yaku nompatolele ka pura-pura tona, kita kana majaan lako ri dosa-dosata bo mombadekei katuvuta ka Alatala. Ane kita mpuu-mpuu majaan lako ri dosa-dosata haitu, kana rapopakitatamo ante pokainggu mabelo. Pamula-mulana nipatoleleku kareba haitu ka toYahudi ri ngata Damsiyik, pade hau ri ngata Yerusalem bo njumangu bagia Yudea. Bo nitesaku muni ka tona ledo toYahudi. ²¹ Haitumo sabana toYahudi nombasaka yaku riaru Banua nu Alatala bo nompasimbuku mompatesi yaku. ²² Tapi sampe sii-sii yaku da nisaliku nu Alatala sampe da namalapa yaku neangga nosabi ka pura-pura tona, tona nalanga pangana bo todea biasa. Anu nitesaku hitu ledo nosisala ante anu niboto i Musa bo nabi-nabi ntanina nggaulu, ²³ haitumo, Magau Topepakasalama anu nijanji nu Alatala, kana mombarasai susa bo mamate. Ia kana majadi tona paratama anu namate bo natuvu mpanjili ala rakeniNa reme ka pura-pura manusia, ka toYahudi bo tona ledo toYahudi, *ala rasanira berimbana Alatala mompakasalama manusia.*"

²⁴ Da notesa i Paulus nanjaliku karona, nongaremo Gubernur Festus, "Nabayamo iko, Paulus! Pangisanimu nadea tutu nompakabaya iko!"

²⁵ Tapi nesnamo i Paulus, "Yaku hii ledo nabaya. Tesa-tesa niuliku hitu nakana bo nesuvu lako ri pekiriku nanoto. ²⁶ Nisani Magau Agripa mboto anu nitesaku pangane. Haitu sampe yaku ledo naeka notesa ivesia ri ngayona. Nisaniku ledo ria nuapa-nuapa dopa nisanina apa kajadia haitu ledo nitabuniaka."

²⁷ Pade niuli i Paulus ka magau, "Magau Agripa nibi-

laku, ledo niparasayamiu anu niuli nabi-nabi nggaulu? Nisaniku niparasayamiu muni!"

²⁸ Nanguli Magau Agripa ka i Paulus, "Nisarumakamu yaku hii mamala kaliu-liu mupajadi toKristen?"

²⁹ Nesnamo i Paulus, "Bara masae bara ledo, kuperapi nte Alatala ala komiu bo gubernur, bo pura-pura tona nangepe tesaku eo hitu, majadi toKristen nasimbayau mpo yaku. Aga ledo nirante mpo yaku."

³⁰ Kaupuna neanggamo Magau Agripa, gubernur, i Bernike, bo pura-pura tona ntanina nomporea ira, bo nesuvumo lako ri polibu haitu. ³¹ Dopame nesuvu, nosiulikamo ira, "Ledo ria nuapa-nuapa nipovia ntona haitu anu masipato rahuku mateka atau ratarunggu ka ia."

³² Nanguli Magau Agripa ka Gubernur Festus, "Ane rapana tona haitu ledo nekitangara ri ngayo nu Magau Mbaso, mamala rakabasakata."

I Paulus nesavi kapala hau ri ngata Roma

27 Naupu haitu Gubernur Festus nompakatantu i Paulus bo kami anu nomporea ia, kana mesavi kapala ntasi hau ri ngata Roma ri propinsi Italia. Jadi i Paulus ante bara sako-ndua tona ntanina anu nitavani, niparasayaka i Yulius, saito balengga ntantara lako ri tantara-tantara Magau Mbaso. ² Kami nesavi kapala mbaso anu nakava lako ri ngata Adramitium. Kami nesavi lako ri ngata Kaisarea ante patuju mesai ri pesampo-pesampo ri talinti propinsi Asia. Naria muni saitopa tona nomporea kami, haitumo i Aristarkhus lako ri ngata Tesalonika ri propinsi Makedonia. ³ Kamailena haitu, kapala kami nesampo ri ngata Sidon. I Yulius nabelo mpuu nte i Paulus, sampe nidekeina i Paulus hau nanggita roa-roana ri ngata Sidon ala mamala radekeira ka ia bara nuapa raparaluuna. ⁴ Lako ri sia kami nompapola polipa kami. Tapi kapala kami nosintomuka poiri, jadi kami nomparinjoso ri bivi ntalinti levuto Siprus anu natelendu sakide lako ri poiri haitu. ⁵ Kami nokapala ri tasi luo anu napara propinsi Kilikia bo Pamfilia, sampe nakava ri ngata Mira ri propinsi Likia. ⁶ Ri ngata Mira, i Yulius nanggava kapala mbaso anu nakava lako ri ngata Aleksandria hau ri propinsi Italia. Jadi nituduna kami molinja ri kapala haitu.

⁷ Bara sako-mbongipa kasaena, kapala haitu aga nompante nolipa. Nandasa mpuu kami. Nasae pade nakava ri pesampo Knidus. Lako ri sia, domo nipakule kami nompapola polipa kami nantuntuni nia pamulana, sabana peburu mpoiri dopa nabelo. Jadi kapala kami nombaliunaka Uju Salmone hau nomparinjoso ri bivi ntalinti levuto Kreta ri bagia puluna, ala ledo mam-bela poiri narimboso gaga. ⁸ Nasusa mpuu kami nomparinjoso ri bivi ntalinti ri sabingga puluna lako ri levuto Kreta. Kaupuna nakavamo kami ri pesampo kodi nosanga Pesampo Nagaya, napara ngata Lasea.

⁹ Naulia mpuu kapala kami, sampe naliumo eo mba-so puasa ntoYahudi † nikava kami. Tempona haitu domo mamala rapolipaka mokapala sabana tempo mpoi. Jadi i Paulus nompopatora ira riaru kapala, ¹⁰ "Sampesuvu-sampesuvu, nantuntuni panggavaku, ane kita mompapola polipata hitu, kana mandasa mpuu kita ngena. Kana marugi kita, ledo aga pangu-laya kapala hitu, tapi kita muni mamate!" ¹¹ Tapi i Yulius ledo nipangalana tesa i Paulus, nipangalanapa tesa ntopompajala kapala bo tupu nu kapala pade tesa i Paulus. ¹² Pesampo Nagaya haitu ledo mami nabelo rapesampo masae ri tempo mpoi. Sabana haitu, deanapa topesavi kapala kami nanguli, "Agina malai kita lako ri pesampo hitu bo rapasimbukuta mapola hau ri pesampo Feniks bo mesampo hamai sampe maupu tempo mpoi." Ngata Feniks haitu pesampo ri levuto Kreta anu natelendu lako ri poi ri tempo mpoi, sabana notingayo bagia tasi mpanau.

Poiri narimboso rantasi

¹³ Tempona haitu, nompamula naole-olemo poi ri neburu lako ri puluna. Haitu sampe nisarumaka nu anabua kapala da mamala kami mapola hau ri pesampo Feniks. Jadi nianggatakaromo talonto kapala, bo kapala nolipa nomparinjoso ri talinti levuto Kreta. ¹⁴ Tapi ledo nasae lako rahaitu, nakavamo poi ri narimboso lako ri levuto Kreta, anu niuli ntona "Poiri Mbaso lako ri tasi mpandake". ¹⁵ Kapala kami nirumpa mpoi rimbosu bo domo nompakule nantingayosi poi. Jadi nipalamba kamimo kapala naave niken mpoi. ¹⁶ Tempo kami naave niken mpoi, nalendumo sakide poi tempo kami noliu sabingga puluna lako ri sangu levuto kodi nosanga Kauda. Tempo haitu nandasa mpuu kami nompasimbuku nombataja mangore sakaya kodi riaru nu kapala mbaso. Sakaya kodi haitu biasa nitaja ri puri nu kapala. ¹⁷ Namalapa sakaya kodi nianggataka bo niboli riaru nu kapala mbaso, ana-anabua kapala nompou ntiku karo nu kapala mbaso ante kaloro ala maroso. Naupu haitu nipopanauramo somba nu kapala, ala ledo magasi ntoto polipana, sabana ira naeka kapala mombarumpa bone anu nasore napara talinti tana Libia. Jadi ivesiamo kapala kami nipalambara niken mpoi.

¹⁸ Ledo nenonto poi narimboso haitu nombaburu kapala kami, sampe naeo mpadondo sagaa pangulaya kapala nitedeakara rantasi ala mangaa sakide kapala ala ledo malodo. ¹⁹ Kamailenapa nitedeakaramo pareva-pareva nu kapala rara ntasi. ²⁰ Bara sako-mbongi kasaena, ledo nikita kami eo bara betue, bo poi muni ledo naole-ole neburu. Kaupuna domo ria panjarumaka kami matuvu!

† puasa ntoYahudi haitumo Eo Mbaso Posompo Dosa anu najadi ri bula Oktober. Tempo haitu nompamula tempo napoi bo nauda bo domo nabelo molipa kapala nosomba.

²¹ Bara sako-mbongi kasaena, tona riaru kapala haitu ledo nangande. Jadi neanggamu i Paulus ri tatangara bo nanguli, "Sampesuvu-sampesuvu! Ane nioseakamiu tesaku bara ipia nanguli nee rapalaikata levuto Kreta, ledo mandasa kita bo ledo marugi ivehitu! ²² Tapi sii-sii kuperapi nte komiu pakaroso raramiu! Ledo ria saitoa kita mamate ngena, tapi kapala hitu tantu marugi. ²³ Nisaniku haitu sabana ibongi Alatala anu nisombaku bo anu nombajagai yaku, nantudu malaekana tumai nte yaku. Malaeka haitu nanguli, ²⁴ "Nee maeka, Paulus! Iko kana mapola mantingayo Magau Mbaso. Lako ri kabelo nu Alatala nte iko, pura-pura tona nosanggani-nggani ante iko ri kapala hitu masalama pura." ²⁵ Jadi sampesuvu-sampesuvu, pakaroso raramiu, sabana yaku nomparasaya Alatala, anu niuli-Na ka yaku natantumu majadi! ²⁶ Tapi kapalata hitu magero ngena mombarumpa levuto."

²⁷ Nagana kasapulu pata-mbongina kapala kami niburu mpoi hau tumai ri Tasi Adria, † nitasere natanga bongina, anabua kapala nombarasai kapala domo nakavao lako ri kabatana. ²⁸ Sabana haitu, niukurura kandala nu tasi ante vatu nipantoesi, ropulu ndapa kandala nu uve. Ira noenju hauna sakidepa, bo niukurura vaimo, sapulu alima ndapapa kandala nu tasi. ²⁹ Naupu haitu niulurakara ampa talonto ‡ lako ri bagia puri nu kapala ala mompopetaa kapala, apa ira naeka kapala kami mombarumpa vatu oti. Ira nosambaya, nerapi masalisa maeso. ³⁰ Tapi bara sako-ndua anabua nu kapala haitu nompasimbuku malai nggalino. Niulira raulurakara talonto lako ri kolu nu kapala, tano sakaya kodi niulurakara hau rara ntasi rapesavira malai. ³¹ Nanggita poviara haitu, i Paulus nanguli ka i Yulius bo tantara-tantarana, "Ane malai ana-anabua kapala hitu, ledo maria tona matau mompapala kapala, bo ledo ntoto maria kita masalama!" ³² Nangepe tesa i Paulus, tantara-tantara nopudusi kaloro sakaya kodi bo nipalambara sakaya kodi haitu maave, ala anabua kapala domo mamala malai lako ri kapala mbaso.

³³ Napara naeo, nitudu i Paulusmo pura-pura tona mangande. Niulina, "Sapulu pata-mbongimo kasaena komiu aga nompopea-pea, ledo nangande nuapa-nuapa! ³⁴ Sabana haitu, kuuli ka komiu, kana mangande nau aga sakide, ala maroso mpanjili komiu bo mamala masalama lako ri kasusa hitu. Kita pura-pura masalama ngena, ledo makuya kita. Ledo ria buluata maronto, nau aga sambesa, ledo pura." ³⁵ Naupu notesa ivesia, nialanamo roti bo niulina tarima kasi ka Alatala ri ngayora pura-pura. Nitubi-tubina roti haitu, bo nangandemo ia. ³⁶ Jadi naroso mpanjili rarara, bo nangande munimo ira. ³⁷ Kadea kami pura-pura riaru ka-

†† Tasi Adria, haitumo ri bagia Tasi Tatanga. ‡ Talonto haitu nipovia lako ri ase, nolenje mpo meka tapi nambaso bo nantamo. Nisoo nte kaloro bo nitendeaka riaru ntasi. Talonto haitu mekai ri vatu rantasi ala domo molipa kapala.

pala haitu, roatu pitupulu bo aono. ³⁸ Naupu nangande sampe nabosu puramo, gando niken kapala haitu nitedakara rara ntasimo ala mangaa sakide kapala.

Kapala nombarumpa bone

³⁹ Naeopa, topompajala kapala haitu nanggita kabatana tapi ledo nisanira kabatana mbana haitu. Niki-tara sangu sidu nu tasi ante talintina. Patujura ala kapala nipesavira haitu rapopesampora ri talinti haitu. ⁴⁰ Naupu sia, nipudusira kaloro-kaloro nu talonto bo talonto haitu nipalambaramo naboli nalonju rantasi. Nivolera kaloro-kaloro pompou guli ala kapala mamala raguli. Niorera somba ri kolu nu kapala ala poiri mombaburu kapala hau ri talinti. ⁴¹ Tapi dopame nakava ri talinti, norumpa bone nobunti riaro ntasimo kapala kami. Bagia kolu nu kapala nesua riaro bone sampe kapala domo namala molipa, bo bagia ri puri nu kapala narupusaka nirumpa nu balumba mbaso.

⁴² Netaapa kapala haitu, tantara-tantara madota mompatesi pura-pura tona nitavani ala ledo ria saitoa morabu hau ri kabatana bo malai. ⁴³ Tapi i Yulius nantagi ira, sabana ia madota mompakasalama i Paulus. Nituduna pura-pura tona natau norabu mokolu motingganavu rara ntasi morabu hau ri kabatana. ⁴⁴ Tona ntanina metuntuni mombasaka dopi bo kayu binggabingga nu kapala. Ivesiamo kami pura-pura nasalama nesore ri kabatana.

I Paulus ri levuto Malta

28 Nasalama puramo kami nesore ri kabatana, pade nisani kami levuto haitu nosanga Malta.

² Tona nonturo ri levuto haitu najole mpuu nte kami. Nikadambanakara kami pura-pura ante belo bo nipanakira apu rapanderu kami, sabana naranindi bo nompamulamo nauda. ³ I Paulus hau nompasiromu tinggu-tinggu kayu bo nidikana ri apu. Da nompadumpu apu, nesuvumo sanggayu ule mpolari lako ri kayu sabana kapane nu apu, bo ule haitu nanteo pale i Paulus. ⁴ Nikita ntupu ngata ule haitu noloe ri pale i Paulus, nisarumakara i Paulus mamate. Nosimpotesamo ira, "Natantumo tona moitu topepatesi, apa nau ia nasalamamo lako ri tasi, Viata Topotangara ledo mompalamba ia matuvu." ⁵ Tapi i Paulus aga novebataka ule haitu hau ri mata nu apu, bo ledo ntoto nirasaina duana. ⁶ Nisarumaka ntupu ngata haitu bara mebangga pale i Paulus, bara sampesanika ia madungga bo mamate. Tapi nasaemo nipopeara, ledo nakuya-kuya i Paulus. Nanggita haitu pekirira nabali, bo nisarumakara i Paulus haitu viatamo.

⁷ Ledo nakavao lako ri sia, naria tana i Publius. Ia gu-bernur levuto Malta. Nitarimana ante damba rara kami bo talu-mbongi kasaena kami nonturo ri banuana.

⁸ Tempo haitu, tuama i Publius kambale-mbale naturu apa nakokora bo nabunjoro. Jadi i Paulus hau nesua nte ia, nombadika palena ri karo ntotua bo nosambaya. Naliu haitu nabelomo totua. ⁹ Nangepepa kajadia haitu, pura-pura tona nadua ri levuto haitu nakavante i Paulus, bo nipakabelona muni ira. ¹⁰ Nadea hadia nidekeira ka kami, tandana pobilara kami. Bo bara sakuya kasaena naliutaka haitu tempo kami manggali-vo malaimo, pura-pura anu niparaluu riaro polipa kami, nikenira hau ri kapala nipesavi kami.

I Paulus nakava ri ngata Roma

¹¹ Talu-mbula kasaena kami nonturo ri levuto Malta, pade nesavi kapala mompapola polipa kami hau ri ngata Roma. Kapala nipesavi kami nakava lako ri ngata Aleksandria bo nesampo ri levuto Malta nompopea maupu tempo mpoiri. Kapala haitu nosanga "Viata Narapi" †. ¹² Nolipamo kapala kami sampe nakava ri ngata Sirakusa, bo naturu ri sia talu-mbongi kasaena. ¹³ Lako ri sia kapala kami nomparinjoso ri talinti sampe nakava ri ngata Regium. Kamailena nompamulamo poiri neburu lako ri puluna, bo eo karanduana nakavamo kami ri pesampo Putioli ri propinsi Italia, bo nanaumo kami. ¹⁴ Ri sia kami nosintomu ante bara sako-ndua sampesuvu sampomparasaya, bo nikenira kami hau monturo ante ira pitu-mbongi kasaena. Naupu haitu, napolamo kami hau ri ngata Roma.

¹⁵ Sampesuvu-sampesuvu sampomparasaya ri ngata Roma nangepe kareba naparamo kami, nakavamo ira mombatomunaka kami ri ngata Potomu Apius bo ri ngata Banua Tatalu. Nosinggavapa kami ante ira, i Paulus nanguli tarima kasi ka Alatala, bo narosomorarana.

I Paulus notesa ka toYahudi ri ngata Roma

¹⁶ Nakavapa kami ri ngata Roma, nidekeimo loga ka i Paulus monturo ri banua mboto ante tantara saito anu mombajagai ia ri sia.

¹⁷ Nagana talu-mbongi ri sia, i Paulus nompokio toYahudi anu naria nturona ri sia. Nasiromupa ira, nangulimo i Paulus, "Sampesuvu-sampesuvuku! Yaku ledo novia sala nuapa-nuapa ka sampesuvuta toYahudi bo ledo muni niliunakaku ada nitarimata lako ri totuata nggaulu. Tapi nau ivesia, yaku nisaka ri ngata Yerusalem bo nidekei ka pomarenta Magau Mbaso Roma. ¹⁸ Naupu parakaraku niparesara, ira madota mombakabasaka yaku, sabana natantumo ledo ria salaku masipato rahuku mate ka yaku. ¹⁹ Tapi naria sanu toYahudi kana nangeva yaku, ledo nipokonora rakabasaka yaku. Ledo ria dala ntanina, jadi yaku nekitangara ri ngayo Magau Mbaso ri ngata Roma. Naupa ivesia, le-

† *Viata Narapi. Basa Yunani "Dioskuri". Kapala haitu nipoposanga nantora ana rapi i Zeus, viata ntoRoma.*

do ria pangaduaku nuapa-nuapa ka sampesuvuku toYahudi. ²⁰Jadi haitu sampe yaku nerapi mosintomu ante komiu. Yaku madota mombatesa ka komiu parakaraku hitu. Kakanana yaku hii nibalunggu sabana yaku nomparasaya Magau Topepakasalama anu nitongorakata ntoIsrael pura-pura.”

²¹Nangepe tesa i Paulus, nesanamo toYahudi, “Ledo ria nitarima kami sura lako ri bagia Yudea nombatesa iko. Bo dopa muni naria tona lako rumai nakava nanggeni kareba bara nanguli naria anu nadaa nipovi-
amu. ²²Tapi kami madota mangepe komiu motesa anu niparasayamiu, sabana nisani kami, ri umba-umba nialai ntona pepatuduki nioseakamiu tutu.”

²³Jadi nipakatantura eo rakasiromura ante i Paulus. Nanggavapa eo niovora, nadea tona nakava nasiromu ri banua i Paulus. Lako ri mpadondona sampe nggoviana i Paulus nombatesa Poparenta nu Alatala ka ira bo nombatentei pepatuduki i Yesus. Nibacana lako ri Buku Atura Agama nitulisi Nabi Musa bo Buku Nabinabi ntanina, ala rasanira tesana nakana bo raparasyara i Yesus mpuu-mpuu Magau Topepakasalama. ²⁴Naria tona nomparasaya anu niuli i Paulus, tapi naria muni ledo nomparasaya. ²⁵Kaupuna, nipalaisiramo ponturo haitu apa da nosisalapa panggavara ante pepatuduki i Paulus. Tapi dopame ira nalai, i Paulus nanguli ka ira, “Nakana ntoto Tesa Nosa Gasa nu Alatala anu nipasimbayu Nabi Yesaya ka totuata nggaulu ivei:

²⁶Alatala nanguli,

‘Koi uli ka todea toYahudi ivei:

Komiu masaro mangepe, tapi ledo rasanimiu batuanana.

Komiu masaro manggita, tapi ledo rasanimiu anu najadi.

²⁷Haitu majadi, sabana tona gahaitu nakaa bagara, ira netibongomo, bo matara nipiriramo. Ane ledo nipoviara ivehaitu, rakita nu matara anu najadi, bo raepe ntalingara bo rasanira batuanana, bo rapahara anu nakana bo manjili mpanjili nte Yaku ala Kupakabelo ira.’”

Yesaya 6:9-10

²⁸Kaupuna i Paulus nanguli, “Sampesuvu-sampesuvuku. Kareba Belo nanguli berimba Alatala mompakasalama manusia. Jadi *nau ledo ratarimamiu*, kana rasanimiu, Kareba Belo haitu nipatolelemo ka tona ledo toYahudi bo iramo mangoseakana.”

²⁹[Naupu i Paulus nanguli tesa-tesa haitu, toYahudi nompalaisi banua haitu nosinjanai-naimo.]

³⁰Rompae kasaena i Paulus nonturo ri ngata Roma ri banua nisewana mboto. Nadea tona nakava nosinggava nte ia bo nadamba rarana nantarima ira pura-pura.

³¹Ledo nakaja rarana nompopaisani ka ira kareba Poparenta nu Alatala bo nipatudukina muni ka ira kareba i Pue Yesus Kristus. Pura-pura anu nipoviana haitu ledo naria nitagi ntona.

19-May-2009@12:42, Backup Description=19-May-2009@09:53, snave -

26-May-2009@11:04, Backup Description=26-May-2009@11:03, B Altork -

26-May-2009@11:03, B Altork -

Roma

Vamba nu Tesa

Ngata Roma nggaulu ngata mbaso mpuu bo ngata niponturo Magau Mbaso Kaisar anu nombakuasai ngata dea ntanina. I Paulus notulisi sura hitu ka topomparasaya ri Roma ala mompatuduki isi agama Kristen ka ira. Nau dopa naloga ia hau ri ngata Roma, ia nonia hau mosinggava nte ira. Bo nitesana niana haitu riana sura hitu (1:10-13; 16:22-29).

Tesa nopoko rakava ri 1:17 ivei: <<Kareba Belo nompopaisani dala ka kita majadi manoa ri panggita nu Alatala, haitumo, momparasaya i Yesus. Ledo ria dala ntanina, aga momparasaya lako ri pantepuuna sampe ri kaupuna.>>

Riara sura hitu i Paulus nombatentei tesa nopoko: pura-pura manusia, toYahudi bo tona ledo toYahudi, paraluu raposinggabelo nte Alatala sabana pura-pura manusia nikuasai dosa. Manusia ledo majadi manoa ri panggita nu Alatala ane aga nangoseaka Atura agama nipapola Nabi Musa, sabana ledo nipakulera nangoseaka atura haitu (3:27-28; 4:15). Manusia nipoposinggabelo nte Alatala ane nomparasaya i Yesus Kristus. Alatala nombatolo dosa manusia ante kamate i Kristus (3:24-25; 5:8). Isema-sema mosangu rara nte i Kristus manggava katuvu nabaru. Ia matuvu mosinggabelo nte Alatala, bo Nosa Gasa mombakabasaka ia lako ri kuasa dosa bo kamatea. Ri pasal 5-8 i Paulus nombatentei patuju atura agama bo kuasa Nosa Gasa riara katuvu ntopomparasaya. I Paulus notulisi nia nu Alatala ka toYahudi muni, anu niuli muli i Israel bo toIsrael (pasal 9-11). ToYahudi muli i Abraham, anu nipelisi nu Alatala nggaulu majadi todeana. Tapi tempo i Yesus nakava ri dunia, deanapa toYahudi nompoara Ia. Jadi nikita toYahudi eva domo nipeili nu Alatala bo domo todeana. Niuli i Paulus, deanapa toYahudi sii-sii domo todeana nu Alatala apa ira ledo nadota nomparasaya i Yesus (10:1-4). Lako ri pesapuakara haitu sampe naria dala ka kita tona ledo toYahudi rapakasalama (11:11-15, 30-31). Nia nu Alatala haitu niboto riara Buku Gasa (9:25-29; 10:19-21). Patuju nu Alatala ala kaupuna toIsrael bo pura-pura manusia ntanina mala rapakasalama. (11:26) Kaupuna, i Paulus notulisi pokainggu masipato ka topomparasaya.

Isi nu Sura

Tesa pantepuuna (1:1-15)

Isi pepatuduki nopoko (1:16-17)

Pura-pura manusia nasala ri panggita nu Alatala (1:18-3:20)

Berimba manusia majadi manoa ri panggita nu Alatala (3:21-5:21)

Kita nikabasaka lako ri kuasa nu dosa sabana kita nosangu rara nte i Kristus (Pasal 6); Kita nikabasaka lako ri Atura agama (Pasal 7); Nosa Gasa nombadekei katuvu nabaru ka kita (Pasal 8)

Nuapa sabana deanapa toYahudi sii-sii ledo bagia nu Alatala (Pasal 9-11)

Pokainggu masipato ka topomparasaya i Yesus (12:1-15:13)

Pokarajaa i Paulus nanggeni Kareba Belo ka tona ledo toYahudi, bo niana hau mosinggava nte toRoma (15:14-33)

Petabe bo pepatuduki kaupuna (Pasal 16)

1 Sampesuvu-sampesuvu ri ngata mbaso Roma: Sura hitu lako nte yaku i Paulus, batua i Yesus Kristus. Alatala nompelisi bo nombasuro yaku mompatolele Kareba Belo lako nte Ia. ² Kareba haitu nijanjiNa nggaulu bo nipopaisaniNa ka nabi-nabiNa. Pura-pura haitu nitulisi riara Buku Gasa. ³⁴ Kareba Belo haitu notesaki Ana nu Alatala, haitumo Tuputa Yesus Kristus. I Yesus najadi manusia apa Ia nipoanaka lako ri muli Magau Daud. KagasaNa nasimbayu nte kagasa nu Alatala sabana Ia Ana nu Alatala mami. Nisanita Ia

mpuu-mpuu Ana nu Alatala sabana Alatala nompakatuvu Ia mpanjili lako ri kamateNa ante kuasa nipokumaaka. ⁵ Alatala nabelo raraNa nte yaku bo yaku nipajadiNa suroNa sabana i Yesus. Yaku nipo-suroNa mompatolele Kareba Belo ka tona ri umbamba ri dunia bo manggeniaka ira momparasaya bo matundu nte i Yesus, ala Ia rabila bo rapakaoge ⁶ Komiu ri ngata Roma muni nireke todeana anu nipokio nu Alatala mangoseaka i Yesus Kristus.

⁷Jadi siamo sampe nitulisiku sura hitu ka komiu pura-pura ri ngata Roma, komiu anu nipotove nu Alatala bo nipokioNa majadi todeaNa. Kuperapi Tuamata Alatala bo i Pue Yesus Kristus mombadekei belo ka komiu bo mompakatinonto raramiu.

I Paulus madota hau manggita topomparasaya i Yesus ri ngata Roma

⁸I Yesus Kristus mosinggava nte yaku nosukuru nte Tupuku Alatala. Pamula-mulana yaku nosukuru sabana lele pomparasayamiu i Yesus niepe ntonamo ri umba-umba ri dunia. ⁹Nisani nu Alatala yaku nasaro nosambaya ka komiu. Yaku batena ante rara mpuu-mpuu nombatui pokarajaa nidekei nu Alatala ka yaku, haitumo nompatolele Kareba nu AnaNa. ¹⁰Kuperapi mpuu-mpuu nte Alatala, ane rapodotaNa, rapalogaNa yaku tou mosinggava nte komiu. ¹¹Apa naoge mpuu raraku mosinggava nte komiu ala yaku mamala mombabagi pedekei nu Alatala ka komiu, haitumo Nosa Gasa anu mompakaroso pomparasayamiu. ¹²Patujuku ala yaku muni rapakaroso sabana pomparasayamiu, jadi kita mpasangani-nggani mosipakaroso rara.

¹³Sampesuvu-sampesuvu, kana rasaniamiu nadea ngganimu yaku nonia tou mosinggava nte komiu tapi nasaro natelava sampe sii-sii. Patujuku mosinggava nte komiu ala madea komiu mangoseaka i Pue Yesus nasimbayu mpo anu najadi nte tona ledo toYahudi ri ngata ntanina. ¹⁴Yaku madota mosinggava nte komiu sabana kana kupatolele Kareba Belo ka pura-pura tona ri dunia, ledo nipelisiku bara tona ri kota, bara tona ri bulu, bara toposikola bara ledo. ¹⁵Haitumo sampe naoge raraku nompatolele Kareba Belo ka komiu toponturo ri ngata Roma muni.

Isi sura i Paulus: Kareba Belo nompopaisani berimba sampe manusia mamala majadi manoa ri panggita nu Alatala

¹⁶Ledo naeya matakun nompatolele Kareba Belo. Apa Kareba Belo haitu pareva nu Alatala mompakasalama pura-pura tona anu nompapasaya i Yesus, pamula-mulana toYahudi, bo muni tona ledo toYahudi. ¹⁷Kareba Belo nompopaisani dala ka kita majadi manoa ri panggita nu Alatala, haitumo mompapasaya i Yesus. Ledo ria dala ntanina, aga mompapasaya lako ri pantepuuna sampe ri kaupuna. Apa nitulisi ri Buku Gasa ivei: <<Tona nanao ri panggita nu Alatala matuvu mabelo sabana pomparasayana.>>

† ATAU: Alatala nombadekei bago ka yaku nompatolele Kareba Belo ka pura-pura tona ri dunia. Jadi niraiku noinda ante todea, bo yaku nombayari inda haitu ante nompatolele Kareba haitu, ledo nipelisi bara tona nonturo ri kota bara ri bulu, bara toposikola bara ledo.

Pura-pura manusia nasala ri panggita nu Alatala (1:18-3:20)

Manusia nasala apa nau nisanira Alatala naria, ledo nipetupura

¹⁸Lako ri suruga Alatala nombahuku manusia anu ledo natundu nte Ia bo nokainggu nadaa. Pokainggura nadaa haitu nombalava tona mangisani pepatuduki nakana. ¹⁹Nisani nu manusia inggu nu Alatala, sabana Alatala mboto nompopaisanina ka ira. ²⁰Lako ri tempo dunia nipajadi nu Alatala sampe sii-sii, nisani nu manusia kuasaNa ledo naupu-upu bo Ia mpuu-mpuu Alatala. Nau ledo nikitata lenjeNa, nisanita Ia Alatala apa nisanita ingguNa lako ri pura-pura anu nipajadiNa ri dunia. Jadi ledo ria tona mamala manguli <<Ledo nisani kami!>> ²¹Nisanira Alatala naria bo nisanira Ia masipato rabila, tapi ledo nibilara, bo ledo muni niulira tarima kasi nte Ia. Ira aga nompekirika anu ledo ria gunana. Pekirira nadoyo bo ledo nipahara anu nakana. ²²Pangulira iramo tonoto pekiri, tano aga todoyo! ²³Ira ledo nadota netupu nte Alatala anu bate-na natuvu bo ledo mamate. Ira aga netupu nte anu nipoviara mboto nolenje mpo manusia, mpo tonji, mpo ule, bo mpo binata ntanina, anu kana mamate.

²⁴Manusia ledo nadota netupu nte Alatala, jadi Alatala nompalamba ira nangoseaka dota rarara mboto bo nokainggu nadaa, sampe posipogaura mpuu-mpuu nepakaeya. ²⁵Ira nombasapuaka pepatuduki nakana anu notesaki inggu nu Alatala. Ira aga nangoseaka pepatuduki nasala. Ira ledo nadota nombasomba bo nangoseaka Alatala Topepajadi, ira aga nombasomba bo nangoseaka anu nipajadiNa. Kakanana aga Alatala Topepajadi masipato ratoiyata sampe ri kasae-saena. Amin.

²⁶Ira ledo nadota netupu nte Alatala, jadi Alatala nompalamba ira mangoseaka dota rarara nabuga anu nepakaeya. Mombine-mombine domo nompokono langgai mpo biasana najadi nte manusia, tapi noberei simbo mombinemo. ²⁷Ivesia muni langgai, domo mombine nipokonora tapi damo ira simbo langgai nosipogau. Pokainggura nepakaeya, langgai simbo langgai sampe kaupuna ira nantarima pobalasi anu masipato ka pokainggura nadaa.

²⁸Tona gahaitu ledo nadota mosisani ante Alatala. Jadi Alatala nompalamba ira rakeniaka mpekirira nadaa sampe ira novia anu ledo masipato rapoviara. ²⁹Mpengaya-ngaya pekiri nadaa bo natenggo rarara. Ledo naosa rarara ante anu naria nte ira, navau rarara, nasiriati, nepatesi, nebagiu, bo nosinggarau. Ira nomboli rau rara, nantunturaka tona ³⁰bo nompakadaa sanga ntona ntanina. Navuu matara nte Alatala, ira

najampa, nalanga rara bo nangoe. Ira natau nangelo akala movia anu nadaa bo ledο natundu nte totuara.
³¹ Ira nadoyo, ledο namala raparasaya, ledο ria tovera bo ledο ria asi matara nanggita singgamanusiara.
³² Nisanira mami parenta nu Alatala anu nanguli tona nokainggu ivesia masipato rahuku mate. Tapi nau nisanira pokainggura haitu nadaa, kana nipoviara. Bo ane maria tona ntanina mantuntuni pokainggura nadaa, nadamba rarara.

Potangara nu Alatala nanao, Ia ledο nompelenje

2 Jadi sampesuvu-sampesuvu, ane komiu nompakasala tona ntanina, ledο mamala raulimiu <<Yaku ledο nasala.>> Apa pokainggumiu mboto nasimbayu nte pokainggura. Jadi ane komiu nompakasala tona ntanina, batuana komiu nompakasala karomiu mboto. ² Nisanita ane Alatala mombahuku tona nokainggu ivehaitu, tantu botu potangaraNa mpuu-mpuu nanao. ³ Tapi berimba komiu? Pokainggumiu nasimbayu nte pokainggura! Jadi nee rasarumakamiu Alatala mombahuku tona ntanina, tapi komiu ledο rahukuNa! ⁴ Alatala mpuu-mpuu nabelo raraNa, Ia nosabara, bo ledο nasalisa nombahuku dosa-dosamiu. Tapi nipandaentemiu kabelo raraNa. Ledο nisanimiu? Alatala nabelo nte komiu sabana Ia madota komiu majea lako ri dosamiu.

⁵ Tapi nau nisanimiu tona nokainggu nadaa kana rahuku, da nakaa bagamiu, bo komiu ledο nadota najea. Sabana haitu, komiu mbotomo nantambai kantomu nu pehuku rapambela ka komiu ri Eo Potangara. Ri Eo Potangara Alatala mombatangara pura-pura manusia ante nanao bo Ia mombahuku pura-pura tona novia nadaa. ⁶ Apa Alatala mombabalasi pokainggu ntona pura-pura. ⁷ Sanu tona ledο nasau rarara nokainggu nabelo sabana ira madota ratoiya bo rabila nu Alatala, bo madota manggava katuvu nabelo anu ledο maupu-upu. Bo Alatala mombadekei katuvu nabelo sampe ri kasae-saena ka tona gahaitu. ⁸ Tapi ane tona aga nompekirika karora mboto, bo ledο nadota nangoseaka dota nu Alatala, tapi aga nangoseaka dota nu rarara nadaa, tona gahaitumo rapokarau nu Alatala bo rapambela pehuku. ⁹ Isemasema nokainggu nadaa kana mandasa bo mombarasai kasusa, pamula-mulana toYahudi bo muni tona ledο toYahudi. ¹⁰ Tapi pura-pura tona nokainggu nabelo kana ratoiya bo rabila bo manggava katuvu nabelo lako nte Alatala, pamula-mulana toYahudi bo muni tona ntanina, ¹¹ sabana Alatala ledο nompelenje.

Atura-atura agama Yahudi anu nipapola Nabi Musa, bo atura-atura agama riana naita

¹² Tona ledο toYahudi ledο nangisani Atura-atura agama Yahudi anu nipapola Nabi Musa. Tapi ane ira

novia dosa, ira kana rahuku nau ledο nisanira Atura agama Yahudi. Tapi ane toYahudi anu nangisani Atura agama bo nipoviara dosa, ira kana rahuku nantuntuni Atura agamara haitu. ¹³ Apa ledο topangepe Atura agama nanao ri panggita nu Alatala, tapi topangoseaka Atura haitu nireke nu Alatala nanao. ¹⁴ Tona ledο toYahudi ledο nisanira Atura agama Yahudi. Tapi biasa pekiri rara ntaira mboto nanggeni ira nokainggu nabelo, nasimbayu mpo pokainggu niuli riana Atura agama. Nau ledο nisanira Atura agama Yahudi, pekiri rara ntaira mboto najadi Atura agama ka ira. ¹⁵ Lako ri pokainggura nisanita naria parenta lako ri Atura agama nitulisi riana ntaira. Lako ri pekiri rara ntaira muni nisanita naria parenta riana ntaira, apa neumba lako riana ntaira mboto: <<pokaingguku hitu nasala,>> atau: <<pokaingguku hitu nabelo.>> ¹⁶ Jadi, ivesiamo majadi ri Eo Potangara. Nangoseaka Kareba Belo anu nipatoleleku, ri Eo Potangara Alatala mombatudu i Yesus Kristus mombatangara pura-pura anu nitabuniaka riana ntai nu manusia.

Nau nisani ntoYahudi Atura agama, ledο nioseakara.

¹⁷ Tapi berimbamo komiu? Komiu nompangaku karomiu toYahudi. Komiu nanjarumaka Atura-atura agama Yahudi. Komiu nangoeki posisanimiu nte Alatala. ¹⁸ Nisanimiu dota nu Alatala bo nisanimiu nompelisi anu nabelo sabana komiu nipatuduki ante Atura-atura agama. ¹⁹ Niulimiu komiumo natau nanggeni tona anu dopa nisanira pepaduduki nakana. Niulimiu komiumo natau nanggeni tona natuvu riana kalandana anu dopa nosisani nte Alatala. ²⁰ Niulimiu komiumo natau nompatuduki tona nadoyo bo nompaguru tona dopa nanoto, sabana nisanimiumo Atura agama bo riana Atura agama naria mpengaya-ngaya pangisani bo pepaduduki nakana. ²¹ Jadi komiu nompatuduki tona ntanina, tapi nakuya ledο nipatudukimiu karomiu mboto? Komiu nompatuduki ka tona ntanina, <<Nee mangangga>>, tapi komiu mboto nangangga! ²² Komiu nompatuduki ka tona, <<Nee mobualo,>> tapi komiu mboto nobualo! Komiu narau nanggita topompakande viata, tapi komiu mboto nangala anu naria riana banua petupu viata haitu! ²³ Komiu nangoe sabana naria Atura agama nte komiu. Tapi nipandaentemiu Alatala apa ledο nioseakamiu AturaNa! ²⁴ Riana Buku Gasa nitulisi ivei: <<Alatala nipakadaa ntona ledο toYahudi sabana pokainggumiu ntoYahudi.>> †

Suna nakana ri panggita nu Alatala

²⁵ Kita toYahudi nisuna, tandana kita todea nu Alatala. Ada posuna haitu naria gunana ane mpuu-mpuu nioseakata Atura agama. Tapi ane niliunakata Atura haitu, ada posuna ledο ria batuana, apa kita nasim-

† Yesaya 52:5

bayu ante tona ledo toYahudi anu ledo nisuna. ²⁶ Tona ledo toYahudi ledo nisuna, tapi ane raoseakara parenta riara Atura agama, rareke nu Alatala nasimbayun te todeaNa nisuna. ²⁷ Ane ivesia, pokainggu ntona ledo toYahudi nompopakita kasala ntoYahudi. Sabana, kita toYahudi naria Atura agama nitulisi, bo kita muni nisuna tandana kita todea nu Alatala, tano mai kita ledo nangoseaka parentaNa. Ira ledo nisuna tapi iramo anu nangoseaka parenta-parenta riara Atura agama. ²⁸ Jadi toYahudi anu mpuu-mpuu todea nu Alatala, ledo aga toYahudi ri sumba. Bo tona mpuu-mpuu nisuna, ledo aga nisuna ri karora. ²⁹ Tapi toYahudi anu mpuu-mpuu todea nu Alatala, haitumo tona mpuu-mpuu rarana nangoseaka Alatala. Bo tona mpuu-mpuu nisuna, nisuna riara ntaira. Batuana, ira najadi todea nu Alatala sabana pokarajaa Nosa Gasa nu Alatala riara ntaira, ledo sabana pangoseakara atura-atura nitulisi. Tona ivehaitu ratoiya nu Alatala, nau ledo nitoyia nu manusia.

Alatala nanao bo Ia mombahuku tona nasala

3 *ToYahudi bo tona ledo toYahudi nasimbayu, pura-pura nasala ri panggita nu Alatala.* Jadi, ane ivesia, nuapa pelabina toYahudi? Nuapa gunana mangoseaka ada posuna? ² Tantu nadea pelabina, naria mami gunana. Pamula-mulana, Alatala nombadekei tesaNa ka toYahudi nggaulu. ³ Sanu toYahudi ledo naroo nomparasaya pojanji nu Alatala. Tapi nau ivesia, nee rasarumakamiu Alatala ledo mompakadupa pojanjiNa. ⁴ Natantu rapakadupaNa, sabana nau pura-pura tona nodava, Alatala batena nanao. Apa nitulisi riara Buku Gasa ivei:

<<Ane Komiu motesa, tantu rasani ntodea tesaMiu nakana.

Bo ane Komiu rarai ntona, natantu Komiu majadi padagi.>>

Mazmur 51:6

⁵ Bara naria tona nanguli Alatala ledo nanao ane Ia rahukuNa kadaata, sabana kadaata haitu aga nompakalanto kanoa nu Alatala. ⁶ Tapi panggava haitu ledonakana! Ane rapana Alatala ledo nanao, tantu Ia ledon mamala mombatangara pura-pura manusia.

⁷ Bara naria tona nanguli ivei: <<Ane pokaingguta natenggo nompakalanto kanoa nu Alatala sampe Ia rapakaoge ntona, nakuya Ia nombahuku kita topovia dosa?>> ⁸ Ane ivesia, tantu rauli ntona: <<Aginapa kita mokainggu madaa ala malantopa anu nabelo!>> Naria mamimo tona nombasalai yaku, nanguli yaku mboto nompatuduki ivesia! Tapi ledon ntoto nakana! Tona nanguli yaku nepatuduki ivesia, iamo masipato rapambela pehuku nu Alatala!

Ledo ria saitoa tona nanao ri panggita nu Alatala

⁹ Jadi, ri panggita nu Alatala, ledon nabelopa kita toYahudi pade tona ntanina. Apa, evamo niuliku pangane, pura-pura manusia nikuasai nu dota rara novia dosa, toYahudi bo tona ledon toYahudi. ¹⁰ Evamo nitulisi riara Buku Gasa ivei: <<Ledon ria saitoa tona nanao, nau saitoa ledon ntoto ria.

¹¹ Ledon ria saitoa tona nombapaha pepatuduki nu Alatala, bo ledon muni naria saitoa anu nangelon posisani nte Alatala.

¹² Pura-pura tona nasalandala lako ri dala nakana, katuvura domo ria gunana. Ledon ria tona nokainggu nabelo, nau saitoa ledon ntoto ria.

Mazmur 14:1-3, 53:1-3

¹³ Tesa-tesara nadaa mpuu, nasimbayu mpo soa dayo ntomate nateungge. Tesa pebagiu nesuvu lako ri sumbara. Tesara nombagerosi tona ntanina nasimbayu mpo peteo nu ule nobisa.

Mazmur 5:10, 140:4

¹⁴ Ira nepindasi bo nombasalai tona ntanina.

Mazmur 10:7

¹⁵ Ira nasadia nosibaga bo nompatesi tona ntanina.

¹⁶ Ri umba-umba nikalaura, nipakadaara bo nipakasusara tona ntanina.

¹⁷ Ledon nisanira matuvu mosinggabelo.

Yesaya 59:7-8

¹⁸ Bo ledon ntoto nibilara Alatala.>>

Mazmur 36:2

¹⁹ Jadi lako ri tesa ri Buku Gasa, nisanita ledon ria manusia nanao. Nisanitamo pura-pura anu nitulisi riara Atura agama nambela ka toYahudi anu natundu ri Atura haitu. Jadi ledon ria saitoa tona namala manguli karona mboto nanao. Pura-pura manusia masipato rapambela pehuku nu Alatala. ²⁰ Ledon ria saitoa tona majadi manoa ri panggita nu Alatala sabana nangoseaka Atura-atura agama. Apa Atura haitu aga nompopaisani ka kita pura-pura manusia nadosa.

Berimba manusia majadi manoa ri panggita nu Alatala (3:21-5:21)

Kita majadi manoa ri panggita nu Alatala sabana pomparasayata i Yesus

²¹ Tapi sii-sii, Alatala nompopaisani berimba manusia mamala majadi manoa ri panggitaNa. Kita ledon majadi manoa ante mangoseaka atura-atura agama. Cara manusia majadi manoa niboto riara Buku Atura Agama bo riara Buku Nabi-nabi. ²² Haitumo, Alatala mombareke kita nanao ane kita nomparasaya i Yesus Kristus. Isema-sema nomparasaya i Kristus, tantu rareke nu Alatala nanao, sabana Alatala ledon nompelenje.

²³ Pura-pura manusia nadosa bo ledo masipato mang-gava bagia ri kaoge nu Alatala. ²⁴ Tapi Alatala nombareke kita nanao ri panggitaNa sabana kamate i Yesus Kristus anu nombakabasaka kita lako ri pehuku nu dosa. Haitu nipovia nu Alatala ka kita lako ri kabelo raraNa, ledo nibayarita. ²⁵ Alatala nombadekei i Yesus Kristus rapatesi bo raaNa natiti. Ia nihuku raposompo dosa manusia. Jadi lako ri raaNa natiti, dosata namala raampungi ane kita nomparasaya i Yesus. Tempo nggaulu, Alatala nompalamba dosa manusia. Ledo nihukuNa sabana posabaraNa. Tapi ane ledo rahukuNa dosata, tantu Ia ledo nanao. Jadi ante kamate i Yesus, Alatala nompopakita kanoaNa. ²⁶ PatujuNa, ala sii-sii rasani ntona Ia nanao, apa nihukuNamo dosata ante kamate i Yesus. Jadi nisanita Ia nanao bo nisanita muni Ia nompakule nompakanoa topomparasaya i Yesus.

²⁷ Jadi domo mamala kita malanga rarata. Apa Alatala nantarima kita sabana pomparasayata, ledo sabana kita nangoseaka atura-atura. ²⁸ Apa poko nu tesa ivei: kita najadi nanao ri panggita nu Alatala sabana pomparasayata, ledo sabana pokaingguta nangoseaka Atura agama. ²⁹ Tantumo Alatala ledo aga Alatala ntoYahudi, tapi Alatala ntona ledo toYahudi muni. ³⁰ Alatala aga saito, bo Iamo nompakanoa toYahudi ane ira momparasaya i Yesus, bo Ia muni mompakanoa tona ledo toYahudi ane ira momparasaya i Yesus. ³¹ Jadi, kita nireke nanao sabana pomparasayata i Yesus. Tapi nee rapekirimiu Atura agama ledo noguna. Ledo ntoto nakana! Kakanana, lako ri pomparasayata haitu kita nompakaoge Atura agama.

Jonjo katuvu i Abraham: ia najadi nanao ri panggita nu Alatala lako ri pomparasayana, ledo lako ri pokaingguna

4 Jadi pekirimo i Abraham, totua ntoYahudi nggaulu. Berimba sampe ia najadi nanao ri panggita nu Alatala? ² Ane rapana i Abraham nireke nanao sabana pokaingguna nabelo, mamalamo ia mantoiya karon mboto. Tapi ledo namala ia mantoiya karon ivesia ri ngayo nu Alatala, ³ apa nitulisi riara Buku Gasa ivei:

<<I Abraham nomparasaya Alatala, bo lako ri pomparasayana haitu ia nireke nu Alatala nanao.>>

Kajadia 15:6

⁴ Rapana, ane tona nokarajaa nangande gaji, gajina ledo nireke pedekei, tapi anu masipato ratarimana aga sambei nu lengena. ⁵ Tapi ledo ivesia kita ante Alatala. Alatala nombareke kita nanao, ledo sabana kita nokarajaa nompasimbuku nokainggu nabelo. Tapi kita nireke nanao sabana kita nomparasaya Alatala anu nompakule nombareke tona nadosa mpo tona ledo nasala. Jadi kita nireke nanao lako ri pomparasayata. ⁶ Pepatuduki haitu nasimbayu nte tesa Magau

Daud nggaulu. Apa i Daud notesaki kasana ntona anu nireke nu Alatala nanao, ledo lako ri pokaingguna.

⁷ Ivei tesa i Daud:

<<Nasana mpuu tona salana niampungimo, bo dosana nilalisimo. ⁸ Nasana mpuumo tona dosana domo nireke nu Alatala.>>

Mazmur 32:1-2

I Abraham nireke nanao sabana pomparasayana, ledo sabana ia nisuna

⁹ Kasana nitesa Magau Daud haitu ledo aga nambela nte toYahudi anu nangoseaka ada posuna, tapi nambela muni nte tona ledo toYahudi anu ledo nangoseaka ada posuna. Evamo niuliku pangane, i Abraham nireke nu Alatala nanao lako ri pomparasayana. ¹⁰ Ipia i Abraham najadi nanao ri panggita nu Alatala? Naupu ia nisuna? Atau dopame ia nisuna? Natantu ia nireke nanao dopame ia nisuna. ¹¹ Damo nggapurina pade nisuna ia, bo posuna haitu najadi tandana ia nanao ri panggita nu Alatala. Nalantomo i Abraham najadi nanao ri panggita nu Alatala sabana pomparasayana dopame ia nisuna. Jadi haitumo sampe namala raulita i Abraham rapotuama ntona pura-pura anu nomparasaya Alatala. Apa nau ira ledo nangoseaka ada posuna, ira muni nireke nu Alatala nanao sabana pomparasayara, nasimbayu mpo i Abraham. ¹² Bo i Abraham muni rapotuama ntoYahudi, haitumo ira anu ledo aga nangoseaka ada posuna tapi nangoseaka jonjo pomparasaya i Abraham dopame ia nisuna.

I Abraham nantarima anu nijanji nu Alatala sabana pomparasayana, ledo sabana pangoseakana Atura-atura agama

¹³ Tempo nggaulu Alatala nojanji ka i Abraham bo muli-mulina, dunia majadi bagiara. Alatala nojanji ivesia ledo sabana i Abraham nangoseaka Atura-atura agama, tapi sabana niparasayana Alatala bo Alatala nombareke ia nanao ri panggitaNa. ¹⁴ Ane aga topan-goseaka Atura agama mantarima anu nijanji nu Alatala, batuana ledo ntoto maria gunana momparasaya Alatala, bo ledo madupa pojanji nu Alatala *apa ledo nipakuleta mpuu-mpuu nangoseaka Atura agama.* ¹⁵ Ane kita aga mompasimbuku mangoseaka Atura agama, kita aga mambela pehuku nu Alatala sabana kita nasaro nombaliunaka AturaNa. Ane rapana ledo maria Atura agama, tantu ledo maria nuapa-nuapa raliunakata bo kita ledo masala.

¹⁶ Jadi kita mantarima anu nijanji nu Alatala sabana pomparasayata nggoo, ala malanto anu nidekeiNa haitu nidekeiNa bayangi lako ri kabelo nu raraNa. Jadi, anu nijanji nu Alatala nambela ka pura-pura muli i Abraham, ledo aga ka toYahudi anu nompasimbuku nangoseaka Atura agama, tapi isema-sema nanjaru-

maka Alatala nasimbayu mpo i Abraham nanjarumaka Alatala. Apa i Abraham rapotuamata mpasinggani, *haitumo, ia najadi jonjo pomparasaya ka kita pura-pura*.¹⁷ Riara Buku Gasa tesa nu Alatala ka i Abraham nitulisi ivei: <<Yaku nangangataka iko majadi tuama ngata mbaso dea.>> Bo i Abraham nomparasaya tesaNa. Alatalamo nakuasa nompakatuvu tomate, bo nipakuleNa nombasovadaka tesaNa nanggasingai anu dopa naria, najadi naria.

¹⁸ Nau domo ria panjarumaka i Abraham momuli, ia batena nomparasaya bo nanjarumaka Alatala. Ni-parasayana ia majadi tuama ngata mbaso dea, nantuntuni tesa nu Alatala ka ia ivei: <<Kadea nu mulimu bara maipia masimbayu mpo betue ri langi.>> ¹⁹ Tempo i Abraham nangepe pojanji haitu, domo masae magana saatu-mpae umuruna bo karonu mpo karo ntomate sabana natuamo, bo domo rapakulena momuli. Tapi nau nisanina karonu natuamo bo bereina i Sara naliumo umuru poana, ia bate-batena nomparasaya. ²⁰ Ia ledole nolingga-lengga nomparasaya anu nijanji nu Alatala ka ia, bo pomparasayana nompakaroso rarana. Ia nantoiya bo nombabila Alatala sabana ²¹ ni-parasayana mpuu Alatala nompakule mompakadupa pojanjiNa. ²² Jadi i Abraham nireke nu Alatala nanao sabana pomparasayana haitu. ²³ Nitulisi ri Buku Gasa ivei: <<ia nireke nu Alatala nanao.>> Tesa haitu ledole aga nipambela ka i Abraham, ²⁴ tapi nipambela ka kita muni. Kita muni rareke nu Alatala manoa ane raparasayata Alatala, anu nompakatuvu mpanjili Tuputa i Yesus lako ri kamateNa. ²⁵ I Yesus nidekei nu Alatala rapatesi mombasompo dosata bo naupu haitu Ia nipatuvu mpanjili ala kita mamala majadi manoa ri panggita nu Alatala.

Kita nipoposinggabelo ante Alatala

5 Kita najadi nanao ri panggita nu Alatala sabana kita nomparasaya i Yesus. Jadi sii-sii kita natuvu nosinggabelo ante Alatala sabana anu nipovia nTuputa Yesus Kristus ka kita. ² Kita nomparasaya i Yesus, jadi nidekeiNa ka kita loga mombarasai kabelo rara nu Alatala bo sii-sii nirasaitamo riara nggatuvuta. Nadamba mpuu rarata sabana naroso panjarumakata rakavata bagia ri kaoge nu Alatala. ³ Bo ledole aga haitu, kita nadamba sabana nirasaita kasesa bo kapari, apa nisanita lako ri kasesa bo kapari haitu rarata majadi maroso. ⁴ Ane maroso rarata, rapakuleta mombatidamaka tempo rapesori bo pokaingguta haitu rapokono nu Alatala. Bo ane rasanita pokaingguta nipokono nu Alatala, panjarumakata nte Ia mantambai maroso. ⁵ Ane kita manjarumaka Alatala, ledole masoa bukuta. Nisanita Ia mpuu-mpuu mompakadupa pura-pura pojanjiNa, sabana nirasaita tove nu Alatala

riara ntaita lako ri pokarajaa nu Nosa Gasa anu nidekei nu Alatala ka kita.

⁶ Iweimo tove nu Alatala ka kita: ri tempo nipakatantu nu Alatala, tempo kita ledole nompakule mangoseaka dotaNa, i Kristus namate nanjambei kita anu ledole natundu nte Alatala. ⁷ Nakura nikavata tona nasadia mamate manjambei roa anu ledole nasala pokaingguna. Ane roana tona nabelo mpuu, bara maria nte saito masadia mamate manjambei ia. ⁸ Tapi ledole ivesia tove nu Alatala. Alatala nompopakita kambaso nu toveNa ka kita tempo kita da nadosa. Apa tempo kita da nadosa, i Kristus namate manjambei kita.

⁹ Kita najadi nanao ri panggita nu Alatala sabana raa i Yesus anu namate mombasompo dosata. Jadi, natan-tumo i Yesus mombakabasaka kita lako ri pehuku nu Alatala anu makava ngena. ¹⁰ Bara ipia, tempo kita da nangeva Alatala, nidekeiNa AnaNa mamate mombasambe kita, ala kita rapoposinggabelo mpanjili ante Ia. Sii-sii kita nosinggabelo ante Alatala, jadi natan-tumo kita rapakasalama lako ri pehuku bara maipia, sabana i Kristus bate-batena natuvu. ¹¹ Bo ledole aga haitu. Nadamba rarata sabana posangu rarata nte Alatala, anu nirasaita sabana anu nipovia nTuputa Yesus Kristus. Apa lako nte i Yesus Kristus kita nipoposinggabelo nte Alatala.

Asele anu nipovia i Adam bo asele anu nipovia i Kristus

¹² Dosa neumba ri dunia sabana saito manusia nombaliunaka parenta nu Alatala, haitumo i Adam. Bo lako ri dosa i Adam haitu sampe naria kamatea ri dunia. Ivesiamo pura-pura manusia kana mamate apa pura-pura manusia novia dosa. ¹³ Dopame naria Atura agama nipapola Nabi Musa, manusia novia dosa mami-mo. Tapi dosa-dosa haitu ledole nireke nu Alatala, sabana dopa ria Atura agama raliunakara. ¹⁴ Tapi naupa ivesia, nompamula lako ri tempo i Adam sampe ri tempo i Musa pura-pura manusia kana mamate, nau dosara ledole nasimbayu nte dosa i Adam anu nombaliunaka anu niparenta nu Alatala ka ia.

I Adam namala rapasimbayu ante tona neonga nggapurina, haitumo i Yesus. Kasimbayuna, asele anu nipoviara nambela pura-pura manusia.

¹⁵ Tapi asele anu nipovia i Adam bo asele anu nipovia i Yesus nosisala muni. Pedekei bayangi nidekei nu Alatala ka kita naogepa pade peliunaka i Adam. Lako ri peliunaka i Adam, pura-pura manusia mamate. Tapi naogepa pepotove nu Alatala bo pedekeiNa ka manusia. Pedekei nu Alatala, haitumo, Ia nompakasalama manusia sabana anu nipovia i Yesus Kristus lako ri kabelo raraNa. ¹⁶ Asele pedekei nu Alatala ledole nasimbayu ante asele dosa i Adam. I Adam nombaliunaka parenta nu Alatala sanggani. Aselena, ia nireke nasala ri panggita nu Alatala bo masipato rahuku. Tapi lako ri

pedekei nu Alatala bayangi, dosata nadea nipakalaliNa bo kita nipajadiNa nanao ri panggitaNa. ¹⁷ Nompamula lako ri peliunaka ntona saito, pura-pura manusia mamate. Tapi naogepa aselena lako ri anu nipovia ntona, i Yesus Kristus! Alatala mpuu-mpuu nabelo nte kita bo nidekeiNa ka kita pedekei bayangi, haitumo, kita nipajadiNa nanao ri panggitaNa sabana anu nipovia i Yesus. Isema-sema nantarima pedekeiNa haitu manggava kuasa bo katuvu nabelo sampe ri kasae-saena.

¹⁸ Jadi, lako ri dosa i Adam sampe pura-pura manusia masipato rahuku sabana dosara. Tapi i Yesus nangoseaka dota nu Alatala bo lako ri anu nipoviaNa, pura-pura manusia mamala majadi manoa ri panggita nu Alatala bo manggava katuvua mabelo. ¹⁹ I Adam ledo natundu nte Alatala. Aselena, pura-pura manusia najadi nadosa. Tapi i Yesus natundu nte Alatala. Aselena, pura-pura manusia mamala majadi manoa ri panggita nu Alatala.

²⁰ Atura agama nidekei nu Alatala ala mantambai kadea dosa nipovia nu manusia. Tapi nau dosa manusia nantambai kadeana, pepotove nu Alatala naogepa.

²¹ Bara ipia dosa nakuasa riaru nggatuvu manusia sampe pura-pura manusia kana mamate bo rapopogaa lako nte Alatala. Tapi sii-sii, pepotove nu Alatala nakuasa riaru nggatuvuta. Apa lako ri pepotoveNa haitu, Alatala nombareke kita nanao ri panggitaNa bo nidekeiNa ka kita katuvua nabelo sampe ri kasae-saena. Haitu pura nipoviaNa sabana Tuputa i Yesus Kristus.

Kita nikabasaka lako ri kuasa nu dosa sabana kita nosangu rara ante i Yesus Kristus (6:1-8:39)

Kita topomparasaya nikabasaka lako ri kuasa nu dosa

6 *Nau dosa manusia nantambai kadeana, naogepa pepotove nu Alatala.* Jadi, berimbamo? Mabelo ane kita batena movia dosa ala mantambai pepotove nu Alatala ka kita? ² Tantu ledo! Ledo masipato kita bate-batena movia dosa, sabana namala raulita kita namate nosangani ante i Kristus ala kita domo rakuasai nu dosa. ³ Tantu nisanimumo tempo kita nidiu, kita nipakasangu ante i Kristus. Batuana, kita muni namate nosangani-nggani ante Ia. ⁴ Jadi tempo kita nidiu, mamala raulita kitamo anu namate bo nitana nosangani-nggani ante i Kristus. Haitu najadi ala kita matuvu ante pokainggu nabaru, nasimbayu mpo i Kristus nipakatuvu mpanjili lako ri kamateNa ante kuasa nTuamata Alatala anu naoge.

⁵ Jadi, ane kita nireke namate nosangani-nggani nte i Yesus tempo kita nidiu, natantumona kita muni ra-

pakatuvu mpanjili nasimbayu mpo Ia. ⁶ Nisanita katuvuta nokolu nireke namate nosangani-nggani ante i Kristus ri kayu salib, ala kuasa nu dosa riaru nggatuvuta rapakaropu, bo kita domo rakuasai nu dosa. ⁷ Apa ane tona namatemo, nikabasakamo lako ri kuasa nu dosa. ⁸ Jadi ane kita mpuu-mpuu nireke namate nosangani-nggani ante i Kristus, niparasayata kita matuvu mosangani-nggani ante Ia. ⁹ Apa nisanita i Kristus nipakatuvu mpanjili lako ri kamateNa bo Ia domo mamate. Kamatea domo mamala mombakuasai Ia. ¹⁰ Ia namate aga sanggani, ala mombadagi kuasa nu dosa sampe ri kasae-saena. Bo sii-sii, Ia bate-batena natuvu nompakadamba rara nu Alatala. ¹¹ Ivesia muni kita, kita kana rareketa namatemo nosangani-nggani nte i Kristus bo nikabasakamo lako ri kuasa nu dosa. Jadi sii-sii kita kana matuvu bo mompakadamba rara nu Alatala, sabana kita nosangu rara ante i Yesus Kristus.

¹² Jadi nee rapalamba dosa mombakuasai katuvumiu ri dunia hitu, ala komiu ledo mangoseaka dota raramiu anu nadaa. ¹³ Bo nee rapalamba karomiu movia nadaa. Tapi dekeimo katuvumiu ka Alatala apa kita nikabasakamo lako ri kamatea bo nitarimatamo katuvu nabaru. Dekeimo katuvumiu ka Alatala ala karomiu rapake movia anu nanao. ¹⁴ Nee radekei karomiu rakuasai nu dosa, apa kita domo nipou Atura agama. Tapi kita nanjarumaka pepotove nu Alatala.

Kita topomparasaya nirapaka batua nikabasaka lako ri madikana nokolu, haitumo dosa, bo natundu nte madika nabaru, haitumo Alatala.

¹⁵ Jadi, ane kita domo nipou Atura agama, tapi nanjarumaka pepotove nu Alatala, berimbamo? Mamala kita batena movia dosa? Ledo ntoto mamala! ¹⁶ Nisanimiu mboto ane kita matundu nte tona bo mangoseaka parentana, kita majadi batuana. Ivesia muni ante dosa. Ane kita batena mangoseaka dota rarata anu nadaa, kita majadi batua nu dosa bo kaupuna kita mamate bo rapopogaa lako nte Alatala. Tapi ane kita matundu nte Alatala, kita majadi batuaNa bo kita rapakanoa ri panggitaNa.

¹⁷ Bara ipia, dopame niparasayamiu i Yesus, komiu najadi batua nu dosa. Tapi nosukuru mpuu nte Alatala! Sii-sii komiu mpuu-mpuu nangoseaka papatuduki nakana anu nipatolele ka komiu. ¹⁸ Komiu nikabasakamo lako ri kuasa nu dosa bo sii-sii komiu najadi batua nu Alatala anu nangoseaka dotaNa.

¹⁹ Yaku nompake porapa batua ala ledo makaja rapahamiu papatudukiku, apa kita manusia da nakura pompahata. Bara ipia komiu nipobatua nu dosa sabana komiu nompalamba karomiu nangoseaka dota raramiu nadaa sampe pokainggumiu nantambai kadaana. Jadi hitupa, dekeimo katuvumiu ka Alatala

ala komiu majadi batuaNa anu nanao bo mpuu-mpuu majadi todeaNa.

²⁰ Bara ipia, tempo komiu da nipobatua nu dosa, ledo nipeilimiu dota nu Alatala. ²¹ Belo nuapa nitari-mamiu lako ri katuvumiu nokolu? Tantu ledor ia. Komiu aga naeya matamiu nantora pokainggumiu bara ipia! Asele pokainggu ivehaitu aga nanggeni kamate anu nompogaa kita lako nte Alatala. ²² Tapi siii komiu nikabasakamo lako ri kuasa nu dosa bo najadi batua nu Alatala. Haitu mpuu-mpuu nanggeni belo ka komiu, sabana komiu nompakule natuvu mpo todea nu Alatala bo kaupuna komiu matuvu mabelo sampe ri kasae-saena. ²³ Isema-sema novia dosa manggava tambo, bo tambo haitu kamatea anu mompopogaa ia lako nte Alatala. Tapi pedekei bayangi lako nte Alatala ka kita, haitumo kita matuvu mabelo sampe ri kasae-saena. Kita nanggava pedekei bayangi sabana kita nosangu rara ante Tuputa i Yesus Kristus.

Kita topomparasaya i Yesus domo nipou Atura-atura agama

7 Sampesuvu-sampesuvu, nisanimumo atura-atura pomarenta. Jadi, natantu rasanimumo anu kuulihitu. Kita manusia natuvu ri tambe kuasa atura nu pomarenta, tapi ane namatemo kita, atura-atura haitu domo mambela nte kita. ² Jonjona, saito mombine nipoberei. Ane bereina langgai da natuvu, mombine haitu da nipou nu atura-atura poberei. Tapi ane namatemo langgai, mombine haitu nakabasakamo lako ri atura-atura poberei anu nompakaroso pobereira njamboko. ³ Jadi, ane rapana mombine haitu mangala langgai ntanina tempo bereina da natuvu, haitu niulinobualo. Tapi ane namatemo bereina langgai, ia domo nipou atura-atura poberei. Jadi ane ia rapoberei langgai ntanina vai, ia ledor rareke nobualo.

⁴ Sampesuvu-sampesuvu, ivesia muni ante kita. Bara ipia kita nipou nu Atura agama. Tapi kita namatemo nosanggani-nggani ante karo i Kristus, jadi kita domo nipou nu Atura-atura agama. Kuasa Atura-atura haitu domo mambela kita. Bo siii-kita najadi todea ntosaitoNamo, haitumo i Kristus anu natuvu mpanjili lako ri kamateNa ala katuvuta moguna ka Alatala. ⁵ Bara ipia, dopame kita nompomparasaya i Yesus, kita natuvu nangoseaka dota rarata anu nadaa. Anu nitagi nu Atura agama, aga haitumo nipodotata rapovia. Jadi, nipaketa karota novia dosa sampe kita masipato rahuku mate bo rapopogaa lako nte Alatala. ⁶ Tapi siii-kita, kita nikabasakamo lako ri kuasa Atura agama anu nompou kita bara ipia, sabana kita namate nosanggani-nggani ante i Kristus. Jadi kita domo nangoseaka dala nokolu, haitumo kita domo nangoseaka atura-atura nitulisi. Siii-kita nangoseaka dala nabaru, haitumo kita nangoseaka dota nu Alatala ante petulungi Nosa Gasa.

Atura-atura agama nompakalanto kita nadosa

⁷ Niuliku pangane i Kristus nombakabasaka kita lako ri Atura agama. Jadi ane ivesia, nuapa raulita? Nadaa Atura agama? Tantu ledor! Atura-atura agama nabelo, sabana lako ri Atura haitu nisanita nuapa niuli dosa. Ane rapana ledor ia parenta nanguli <<Nee maino ka mbara-mbara ntona,>> ledor kusani kadaa nu dota anu naria riar ntaiku. ⁸ Tapi niepekupa Atura agama anu nanguli <<Nee maino,>> dosa nanggava loga nokarajaa riar ntaiku sampe aga nantambai dota raraku maino ka anu ntona. Ane rapana ledor ia Atura agama nombatuduaka dosaku, dosa ledor mombakuasai katuvuku.

⁹ Bara ipia, dopame nisaniku Atura agama, yaku natuvu nasana. Tapi nisanikupa Atura agama, dosa anu naria mami riar ntaiku nompamula naroso, ¹⁰ bo nanotomo raraku yaku masipato rahuku mate bo rapopogaa lako nte Alatala. Kakanana, patuju nu Atura agama ala yaku manggava katuvua nabelo. Tano, nisanikupa Atura haitu, *yaku aga nombaliunakana sampe* yaku masipato rahuku mate bo rapopogaa lako nte Alatala. ¹¹ Nisanikupa Atura agama, dosa nanggava loga mombabagiu yaku. Namala raulita: lako ri Atura agama, dosa nompakanavu yaku sampe yaku masipato rahuku mate bo rapopogaa lako nte Alatala.

¹² Jadi, Atura agama nagasa bo parenta-parenta nu Alatala nagasa, nanao bo nabelo. ¹³ Ane ivesia, nuapa batua? Anu nabelo nompakadaa yaku? Tantu ledor! Dosamo mai anu nompakadaa yaku! Atura agama nabelo nipake nu dosa nompakanavu yaku sampe yaku masipato rahuku mate bo rapopogaa lako nte Alatala. Atura agama nabelo haitu, nompakalanto naria dosa riar ntaiku, bo nompakalanto nadaa mpuu dosa.

Posibali riar ntai manusia

¹⁴ Sampesuvu-sampesuvu, nisanita Atura agama mpuu-mpuu nabelo sabana Atura haitu lako nte Nosa Gasa nu Alatala. Tapi yaku hii aga manusia nalente, yaku nipobatua nu dosa. ¹⁵ Ledor ntoto nipahaku pokaingguku mboto. Pokainggu nabelo anu nipokonoku kupovia, ledor sia nipoviaku. Pokainggu anu nipovuu matak, haitumo nipoviaku! ¹⁶ Tapi ane kupovia pokainggu anu ledor nipokonoku, batua yaku nangaku Atura agama nabelo. ¹⁷ Jadi, ledor yaku anu novia pokainggu nadaa, tapi dosa anu naria mamimo riar ntaiku noviana. ¹⁸ Nisaniku ledor ia anu nabelo riar ntaiku, apa yaku manusia nadosa. Yaku madota mokainggu mabelo, tapi ledor nipakuleku. ¹⁹ Pokainggu nabelo anu nipokonoku, ledor nipoviaku. Pokainggu nadaa anu ledor nipokonoku, haitumo nipoviaku. ²⁰ Tapi ane kupovia pokainggu anu ledor

nipokonoku, batuana ledo yaku noviana. Dosa anu naria riaru ntaiku noviana.

²¹ Jadi anu najadi riaru nggatuvuku ivei: yaku madota mokainggu nabelo, tano aga pokainggu nadaa nipoviaku. ²² Pekiri riaru ntaiku, nipokonoku atura nu Alatala. ²³ Tapi ledo nioseakaku atura nu Alatala sabana naria kuasa ntanina nombadagi yaku. Riaru ntaiku, yaku madota mangoseaka atura nu Alatala, tapi kuasa nu dosa riaru nggatuvuku nosibali ante pekiri riaru ntaiku, sampe yaku nipobatua kuasa nu dosa haitu. ²⁴ Nasilaka mpuumo yaku! Isemamo mamala mombakabasaka yaku lako ri karo anu nanggeni kamate hitu? ²⁵ Yaku nosukuru nte Alatala! Apa Tuputa Yesus Kristus mombakabasaka yaku!

²⁶ Jadi iveimo katuvuku: riaru ntaiku yaku madota mangoseaka atura nu Alatala, tapi yaku da nikuasai nu dosa sabana dota nu raraku nadaa.

Nosa Gasa nu Alatala nombakabasaka kita lako ri kuasa nu dosa ala kita mangoseaka dota nu Alatala

8 Jadi sii-sii domo ria pehuku rapambela ka tona nosangu rara ante i Yesus Kristus. ² Apa Nosa Gasa anu nanggeni kita natuvu nosangu rara nte i Yesus Kristus, nombakabasaka kita lako ri kuasa dosa bo kamatea. ³ Atura agama ledo namala mombakabasaka kita lako ri kuasa dosa sabana kita manusia ledo nompakule mangoseaka Atura haitu. Tapi anu ledo namala nipovia nu Atura agama, namala nipovia nu Alatala. NituduNa AnaNa mboto tumai ri dunia, bo AnaNa najadi manusia ante karo nasimbayu mpo karo nu manusia nadosa ala Ia mombarasai pehuku nu Alatala ri karoNa sabana dosata. Bo ante pohuku karo i Yesus, Alatala nombadagi kuasa nu dosa riaru ntaita. ⁴ Alatala novia haitu ala kita mpuu-mpuu mompakule mokainggu manoa, mangoseaka parenta ri Atura agama. Apa kita domo natuvu nangoseaka dota rarata anu nadaa. Sii-sii kita nangoseaka dota Nosa Gasa nu Alatala.

⁵ Isema-sema natuvu nangoseaka dota rarana nadaa aga nompekirika anu nipodota rarana nadaa haitu. Tapi isema-sema natuvu nangoseaka dota Nosa Gasa nu Alatala, aga dota nu Nosa Gasa nipekirikara. ⁶ Ane pekirira nikuasai dota rara nadaa, ira mamate bo rapopogaa lako nte Alatala. Tapi ane pekirira nikuasai nu Nosa Gasa nu Alatala, ira matuvu mabelo bo mosinggabelo ante Alatala. ⁷ Ane pekiri ntona nikuasai nu dota rara nadaa, ira nangeva Alatala. Ledo nioseakara parentaNa sabana ledo nipakulera. ⁸ Jadi, tona nangoseaka dota rarara nadaa ledo nipakulera mompakadamba rara nu Alatala.

⁹ Tapi komiu domo nangoseaka dota raramiu nadaa. Komiu nangoseaka dota Nosa Gasa nu Alatala ane Nosa Gasa mpuu-mpuu nonturo riaru ntaimiu. Isema-

sema ledo ria Nosa Gasa i Kristus riaru ntaina, ia ledo todea i Kristus. ¹⁰ Tapi ane i Kristus mpuu-mpuu nonturo riaru ntaita, nau karota mamate sabana dosa, Nosa Gasa nombadekei katuvua mabelo sampe ri kasae-saena sabana kita najadi nanao ri panggita nu Alatala. ¹¹ Alatala nompakatuvu mpanjili i Yesus ante kuasa Nosa Gasa, bo Nosa Gasa muni nonturo riaru ntaita. Jadi nau karota mamate, Alatala mompakatuvu mpanjili karota ante kuasa Nosa Gasa anu nonturo riaru ntaita.

¹² Jadi, sampesuvu-sampesuvu, kita masipato matuvu mangoseaka dota nu Alatala. Ledo masipato kita mangoseaka dotata mboto nadaa. ¹³ Sabana, ane kita matuvu mangoseaka dotata mboto nadaa, kita mamate bo rapopogaa lako nte Alatala. Tapi ane rakabasakata pokaingguta nadaa ante kuasa lako nte Nosa Gasa nu Alatala, kita matuvu mabelo sampe ri kasae-saena.

Nisanita kita ana-ana nu Alatala sabana Nosa Gasa nosabikina

¹⁴ Isema-sema nikeniake Nosa Gasa nu Alatala, iramo ana-ana nu Alatala. ¹⁵ Nosa Gasa anu nidekei nu Alatala ka kita, ledo manggeni kita majadi batua sampe kita matuvu ante eka rara. Tapi Nosa Gasa haitu nanganggatake kita majadi ana-ana nu Alatala. Ante pekeniake Nosa Gasa kita mamala mekakai nte Alatala, <<O, Tata, Komiumo Tuama kami!>> ¹⁶ Nosa Gasa nosanggani-nggani nte rarata mboto nanguli ka kita, kitamo ana-ana nu Alatala. ¹⁷ Bo ane kita mpuu-mpuu ana-ana nu Alatala, natantumo kita mantarima belo nipakasadia nu Alatala ka ana-anaNa. Kita muni mantarima pura-pura anu nipakasadia nu Alatala ka i Kristus, sabana ane kita mombarasai kasusa bo kapari mpo anu nirasaiNa, kita muni rapakaoge nasimbayu mpo Ia.

Kabelona ratarimata bara maipia nelabipa pade kandasana nirasaita sii-sii

¹⁸ Niparasayaku kasusa bo kapari nirasaita sii-sii damo njongona ane rapoposisala ante kabelo rarasaita bara maipia. ¹⁹ Sii-sii pura-pura isi nu dunia ante lentora rarara nantongoraka tempona Alatala mompakita kaoge nu ana-anaNa. ²⁰ Apa nggaulu dunia bo isina nipindasi sampe katuvura ledo nasiayu bo domo ria gunana. Haitu najadi ledo lako ri dotara mboto, tapi lako ri dota nu Alatala. Tapi nau ivesia, naria muni panjarumaka. ²¹ Haitumo, pura-pura isi nu dunia nanjarumaka makava tempona bara maipia, dunia rakabasaka lako ri kuasa manggeni kamatea, bo dunia mpuu-mpuu makabasaka bo mombarasai kaoge anu radekei ka ana-ana nu Alatala nosanggani-nggani nte ira. ²² Apa nisanita pura-pura isi nu dunia nandasa

sampe sii-sii *nantongoraka tempona Alatala mompakabelo puramo*. Kandasana nasimbayu mpo kandas mombine tempo noana. ²³ Ledo aga dunia nandasa, tapi kita topomparasaya muni nandasa nirasaita, nantongoraka tempona Alatala mombakabasaka karota lako ri kuasa kamatea, bo mombadekei belo ka kita ana-anaNa. Nisanita tempo haitu kana makava, sabana nitarimatamo Nosa Gasu nu Alatala, tandana Alatala mpuu-mpuu mompakadupa pojanjiNa ka kita. ²⁴ Sii-sii kita nikabasakamo lako ri pehuku nu dosata sabana kita nanjarumaka Alatala. Kita nanjarumaka Ia mombadekei ka kita pura-pura anu nijanjiNa ka kita. Bo ane raulita kita nanjarumaka, batuana dopa nitari-ma anu nisarumakata. Apa ledo ria tona manjarumaka anu nariamo nte ia. ²⁵ Jadi ane kita nanjarumaka ratari-mata anu dopa nitarimata, kita mosabara mantongoraka.

Nosa Gasu nu Alatala nantulungi kita mosambaya

²⁶ Nosa Gasu nu Alatala muni nantulungi kita riaru kalenteta. Ledo nisanita mpuu nuapa masipato raulita ri posambayata. Tapi Nosa Gasu mboto nomperapi lako nte Alatala ka kita ante pekakai anu neliu lako ri pompakule basa manusia. ²⁷ Bo nisani nu Alatala isi rara ntai manusia, bo nisaniNa patuju nu Nosa Gasu haitu, sabana Nosa Gasu nosambaya ka todea nu Alatala, nangoseaka dota nu Alatala mboto.

Alatala nanggeni belo ka kita riaru mpengaya-ngaya

²⁸ Bara nuapa-nuapa majadi, nisanita Alatala nom-pasiayuna ala manggeni belo ka kita topompotove Ia, haitumo kita anu nipokioNa majadi todeaNa nangoseaka niaNa mboto. ²⁹ Apa lako ri lamba pamulana, kita nipelisiNa bo nipakatantuNa majadi nasimbayu mpo AnaNa i Yesus. PatujuNa ala i Yesus majadi Ana Lumbua bo kita todea majadi tueiNa. ³⁰ Bo kita anu nipakatantuNa lako ri lamba pamulana haitu, nipokioNa majadi todeaNa. Bo kita anu nipokioNa majadi todeaNa, nirekeNa nanao ri panggitaNa. Bo kita anu nirekeNa nanao, radekeiNa bagia ri kakuasaNa bo kaogeNa mboto.

Ledo ria sangayaa anu namala mompopogaa kita lako ri tove nu Alatala

³¹ Jadi sampesuvu-sampesuvu. Ane rapekiritu pura-pura anu nipovia nu Alatala ka kita, maroso rarata. Apa ane Alatala mosabingga ka kita, isema mompakule mangeva kita? ³² Ledo natove raraNa nte AnaNa mboto, nidekeiNa rapatesi mantolo dosata. Sabana haitu, nisanita kana radekeiNa muni ka kita mpengaya-ngaya anu niparaluuta ante joi raraNa. ³³ Isema mabia mompangadu kita anu nipelisi nu Alatala? Ledo ntoto ria! Apa Alatala mboto nanguli kita

ledo nasala. ³⁴ Isema mabia mompakasala kita? Ledo ntoto ria, sabana i Kristus namate mantolosi dosata. Bo ledo aga haitu, Ia nipakatuvu mpanjili bo nonturo ri panggana nu Alatala ri suruga, bo Iamo nanjaliku kita ri ngayo nu Alatala.

³⁵ Jadi, nuapa mamala mompopogaa kita lako ri tove i Kristus? Natantu ledo ria! Nau kita masusa atau mapari atau rapandasa ntona, nau kita maara mpai atau ledo ntoto ria pakea, nau kita rakava nu susa bara rapatesi, i Kristus bate-batena mompotove kita. ³⁶ Riaru Buku Gasu nitulisi ivei:

<<O, Pue, eo bongi naria tona madota mompatesi kami sabana kami nomparasaya Komiu.

Kami nireke mpo bimba aga nipatuvu rasambale.>>

Mazmur 44:23

³⁷ Tapi nau bara nuapa-nuapa majadi nte kita, kita mpuu-mpuu padagi ante petulungi i Kristus anu mompotove kita! ³⁸ Apa niparasayaku, nau sangaya ledo ria mompakule mompopogaa kita lako ri toveNa. Nau mamate nau matuvu, Ia bate-batena mompotove kita. Ledo ria malaeka atau seta atau kuasa ntanina, ledo ria nuapa-nuapa najadi sii-sii atau nuapa-nuapa majadi bara maipia, ³⁹ ledo ria kuasa-kuasa ri laerava atau kuasa-kuasa ri tana, atau nuapa-nuapa ntanina anu nipajadi nu Alatala, nau sangaya ledo ria mompakule mompopogaa kita lako ri tove nu Alatala. ToveNa haitu nipopakitaNa ante anu nipovia nTuputa i Yesus Kristus ka kita.

ToYahudi bo Kareba Belo (Pasal 9-11)

Nasusa rara i Paulus sabana ledo nadea toYahudi nomparasaya i Yesus

9 Yaku nosangu rara ante i Kristus, jadi yaku ledo nodava. Pekiri rara ntaiku nikenika Nosa Gasu, bo pekiri rara ntaiku muni nanguli yaku ledo nodava. Anu kuuli hitu mpuu-mpuu nakana, ledo aga davaku: ² nabuku mpuu raraku bo ledo naupu kasusa raraku nompekirika sampesuvuku toYahudi apa ledo nadea ira nomparasaya i Yesus. ³ Ane rapana mamala, aginapa yaku rapindasi nu Alatala bo rapopogaa lako nte i Kristus, asaa sampesuvuku toYahudi momparasaya. ⁴ Iramo toIsrael, todea nu Alatala, anu nantarima mpengaya belo lako nte Ia. NianggatakaNa ira najadi ana-anaNa mboto bo nipopakitakaNa ka ira kuasaNa bo kaogeNa. NipoviaNa pojanji nte ira, bo nidekeikaNa Atura-atura agama ka ira. NipatudukikaNa ka ira adada metupu nte Ia. Nadea mpuu janji nu Alatala ka toIsrael. ⁵ Ira muli i Abraham, i Ishak bo i Yakub, totua toIsrael nggaulu anu nipelisi nu Alatala. Bo tempo i Kristus najadi manusia, Ia nipoanaka lako ri muli ntoIsrael. Iamo nombakuasai pura-pura. Iamo Alatala anu masipato ratoiya sampe ri kasae-saena. Amin! †

Ledo pura-pura muli i Abraham nipelisi nu Alatala majadi todeaNa

⁶ Nau nadea toYahudi ledo nomparasaya i Yesus, ledo mamala raulita Alatala ledo nompakadupa pojanjiNa nte toYahudi! Apa ledo pura-pura muli i Israel nipelisi nu Alatala majadi todeaNa. ⁷ Bo ledo muni pura-pura muli i Abraham nireke mulina mpuu, anu masipato mantarima belo nijanji nu Alatala. Apa Alatala nanguli ka i Abraham ivei: <<Aga mulimu lako nte i Ishak rareke mulimu.>> ⁸ Batuana, ledo sambara tona nipomulika lako ri karo i Abraham najadi ana-ana nu Alatala. Aga tona nipoanaka nangoseaka pojanji nu Alatala najadi ana-ana nu Alatala mpuu. ⁹ Apa iveimo pojanji nu Alatala nte i Abraham: <<Sampaepa, tumai vai Yaku, bo dopame makava Yaku, bereimu i Sara moanaka saito ngana langgai.>>

¹⁰ Bo ledo aga haitu, lako ri tesa i Esau bo i Yakub, nisanita Alatala nompelisi tona nangoseaka dotaNa mboto. I Esau bo i Yakub narapi bo ira nipoanaka i Ribka. Ira nosangu tuama, haitumo i Ishak, totuata nggaulu. ¹¹⁻¹² Dopame i Ribka noana, Alatala nanguli ka ia ivei: <<Ngana lumbua matundu nte tueina.>> Tempo haitu, ngana randua pangane dopa nipoanaka bo dopa novia nuapa-nuapa nabelo atau nadaa. Tapi Alatala nompakatantu mamimo ngana mbana nipelisiNa mantarima belo lako nte Ia. PatujuNa ala malanto ka kita, ane Alatala nompelisi tona manggava belo lako nte Ia, ledo nipelisiNa nangoseaka pokainggura, tapi nipelisiNa nangoseaka dotaNa mboto. ¹³ Haitumo batuana tesa nu Alatala ri Buku Gasa anu nanguli ivei: <<I Yakub nipelisiKu, tapi i Esau nipoaraKu.>>

Alatala mboto nompakatantu isema manggava belo lako nte Ia

¹⁴ Jadi ane Alatala nompelisi saito bo nompoara to-saitona, nee rasarumakata Ia ledo nanao! Ledo ntoto nakana! ¹⁵ Apa niuliNa ka Nabi Musa nggaulu ivei: <<Yaku mboto nompakatantu isema Kupoasi bo isema Kupotove.>> ¹⁶ Jadi haitumo sampe nisanita Alatala nompelisi tona ledo sabana dota ntona haitu atau pokainggu ntona haitu, tapi sabana kabelo rara nu Alatala. ¹⁷ Riara Buku Gasa nitulisi tesa nu Alatala ka Firaun, Magau ri tana Mesir nggaulu, ivei: <<Yaku nanggataka iko majadi magau. PatujuKu ala lako ri anu Kupovia riara nggatuvumu, Kupopakita kuasaKu bo sangaKu raepe ntona ri njumangu dunia.>> ¹⁸ Jadi, Alatala nompoasi isema-sema nipodotaNa rapoasiNa bo Ia nompakakaa baga isema-sema nipodotaNa rapakakaaNa.

† Iamo Alatala anu masipato ratoiyata sampe ri kasae-saena, Amin! Alatala masipato ratoiya sampe ri kasae-saena, Amin!

¹⁹ Jadi natantumo maria tona mompekutana ivei: <<Ane Alatala nompakatantu isema rapoasiNa bo isema rapakakaaNa, nakuya tano da nipakasalaNa manusia? Rapakuleta tano mangeva dotaNa?>> ²⁰ Tapi sampesuvu-sampesuvu, ledo masipato kita mombasanai Alatala! Ledo masipato kura manguli ka topomandu, <<Nakuya nimandukamu yaku ivei?>> ²¹ Natantu topomandu kura nakuasa momandu tana lei nangoseaka dotana mboto. Lako ri salemo tana lei, mamala ramanduna rongaya kura, sangu kura nagaya bo sangu kura biasa.

²² Ivesia muni ante Alatala. Ia nakuasa movia nuapanuapa nipodotaNa nte kita manusia. Ia nasadia mombahuku tona nadaa bo mompopakita kuasaNa. Tapi Ia nosabara nte tona anu nompakarau Ia bo masipato rahuku sampe ri kasae-saena. ²³ Ia nosabara nte ira ala mompopakita kambaso nu kaogeNa ka kita anu nipoasiNa bo nipasadiaNa mami lako ri nggaulunama manggava bagia ri kaogeNa. ²⁴ Bo kitamo hii anu nipasadiaNa manggava belo haitu. Sanu kita nipokioNa lako nte toYahudi bo sanu nipokioNa lako nte tona ledo toYahudi.

Tesa riara Buku Gasa nombaboto tempo Alatala mompelisi tona ledo toYahudi majadi todeaNa

²⁵ Riara buku Nabi Hosea, Alatala nanguli ivei: <<Tona ledo todeaKu, Kuuli todeaKu. Tona ledo nipopakitaKuka toveKu, Kupopakitaka toveKu.

Hosea 2:22

²⁶ Bo ri umba nipanguli nu Alatala ka ira, <Komiu ledo todeaKu>, ri situ munimo, ira rauli ana-ana nu Alatala anu Natuvu.>>

Hosea 1:10

²⁷ Tapi nalonto mpuu tesa Nabi Yesaya nanguli toYahudi ivei: <<Muli i Israel nadea mpuu, nasimbayu kadeana mpo bone ri bivi ntalinti.

Tapi naupa ivesia, aga sabagia kodi ira rapakasalama. ²⁸ Apa Tupu kaliu-liu mombatangara pura-pura manusia ri dunia ante nanao. bo pehukuNa haitu ledo mamala ratavari.>>

Yesaya 10:22-23

²⁹ Naria tesa Nabi Yesaya ntanina nanguli ivei: <<Ane rapana Alatala anu Nelabi KakuasaNa ledo nomboli muli ka kita, tantu kita mpuu-mpuu maropu, nasimbayu nte tupu ngata Sodom bo Gomora nggaulu.>>

Yesaya 1:9

ToYahudi ledo nadota nomparasaya i Yesus sampe ira ledo nireke todea nu Alatala

³⁰ Jadi kambukuna ivei: Tona ledo toYahudi ledo nompasimbuku majadi manoa ri panggita nu Alatala. Tapi Alatala noreke ira nanao sabana niparasayara Ia. ³¹ Tapi toIsrael nasaemo nompasimbuku mangoseaka atura-atura ala ira rareke manoa ri panggita nu Alatala. Tapi ira ledo najadi nanao. ³² Nuapa sabana? Sabana ira aga nanjarumaka pompasimbukura mboto nangoseaka atura agama, ledo nanjarumaka pomparasayara Alatala. Ira mpo tona natepasunu ri watu pasunu, batuana: ira ledo nadota nomparasaya Magau Topepakasalama. ³³ Haitu niboto riaru Buku Gasa ivei:

<<Pariaramo! Ri Bulu Sion ri Yerusalem, Yaku nomboli saito Magau anu nirapaka watu mbaso.

Nadea tona matepasunu ri watu haitu bo madungga.

Tapi isema-sema momparasaya Magau haitu ledo manjoso rara.>>

Yesaya 28:16

10 Sampesuvuku sampomparasaya! Naoge mpuu raraku ala sampesuvuku toIsrael mamala rapakasalama. Yaku nasaro nosambaya ka ira. ² Yaku nosabiki, ira mpuu-mpuu madota mompakadamba rara nu Alatala. Tapi ledo nisanira mpuu dala nakana mompakadamba raraNa. ³ Apa ledo nipokonora nantarima cara nu Alatala mompakanoa manusia. Jadi ira ledo nadota nomparasaya i Kristus ala majadi manoa ri panggita nu Alatala. Ira aga nadota nangoseaka carara mboto, haitumo, ira nompasimbuku mangoseaka atura agama apa nisarumakara haitumo mompakanoa ira ri panggita nu Alatala. ⁴ Tapi Atura-atura agama domo niparaluu, sabana nariamo i Kristus. Jadi isema-sema nomparasaya i Kristus, majadi nanao ri panggita nu Alatala

Isema-sema nomparasaya i Yesus rapakasalama

⁵ Nabi Musa notesa tona najadi nanao ri panggita nu Alatala sabana nioseakara Atura agama. Niulina ivei:

<<Isema-sema nangoseaka pura-pura parenta riaru Atura agama, ia manggava katuvu nabelo.>>

Imamat 18:5

⁶ Tapi tona najadi nanao ri panggita nu Alatala sabana pomparasayana, ledo paraluu mompekutana ivei: <<Isemamo mompakule mompene hau ri suruga manggeni i Kristus tumai mombatulungi kita?>> ⁷ Ledo muni paraluu rapekutanana: <<Isemamo mamala manau ri dunia ntomate manganggataka i Kristus lako ri kamateNa?>>

⁸ Ledo paraluu mompekutana ivehaitu sabana, evamo niuli riaru Buku Gasa ivei:

<<Kareba nu Alatala naparamo ante komiu, nariamo ri sumbamiu bo riaru naimiu.>>

Ulangan 30:12-14

Kareba haitumo nanggeni tona nomparasaya bo haitumo kareba nipatolele kami. ⁹ Ane kita mompangaku ante sumbata, <<I Yesusmo Tupu,>> bo ane kita momparasaya riaru ntaita Alatala nompakatuvu mpanjili Ia lako ri kamateNa, kita rapakasalama. ¹⁰ Apa kita nomparasaya i Yesus riaru ntaita sampe Alatala nombareke kita nanao ri panggitaNa. Bo kita mompangaku i Yesus ante sumbata sampe kita nipakasalama. ¹¹ Riaru Buku Gasa nitulisi ivei:

<<Isema-sema momparasaya Ia, ledo manjoso rara.>>

Yesaya 28:16

¹² Tesa-tesa hitu nambela ka pura-pura tona sabana ledo ria posisalana toYahudi bo tona ledo toYahudi. Aga saito Alatala, bo Ia Tupu nu manusia pura-pura. Ia nabelo raraNa nte pura-pura tona anu nekakai nte Ia.

¹³ Apa <<isema-sema mekakai nte Tupu, rapakasalama.>> †

¹⁴ Tapi berimbamo tona mekakai nte i Pue ane dopa niparasayara Ia? Bo berimbamo ira momparasaya Ia ane dopa niepera karebaNa? Bo berimbamo raepera karebaNa ane dopa ria tona nompatolele kareba haitu ka ira? ¹⁵ Bo berimba munimo tona nompatolele Kareba Belo ane dopa ria tona mombasuro ira manggeni kareba haitu? Riaru Buku Gasa nitulisi ivei:

<<Nabelo mpuu tona nakava nanggeni kareba nabelo lako nte Alatala!>>

Yesaya 52:7

ToYahudi nangepe Kareba Belo, tapi ledo nadea ira nadota nomparasaya

¹⁶ Tapi ledo pura-pura tona nomparasaya Kareba Belo haitu. Naria tesa Nabi Yesaya nggaulu nanguli ivei: <<Pue, ledo nadea tona nomparasaya tesa nikeni kami!>>

Yesaya 53:1

¹⁷ Jadi, manusia nomparasaya i Kristus sabana niepera Kareba Belo. Bo niepera kareba sabana naria tona nompatolele tesa i Kristus ka ira.

¹⁸ Tapi berimbamo? Dopa niepe ntoYahudi Kareba Belo? Natantu nieperamo apa nitulisi riaru Buku Gasa ivei:

<<Kareba nantesaki Alatala nipatolele ri njumangu dunia,

Bo napola sampe ri lapi-lapi nu bulu.>>

Mazmur 19:5

¹⁹ Jadi berimbamo? Dopa nisani ntoYahudi batuana Kareba Belo? Natantu nisaniramo! Pamula-mulana naria tesa nu Alatala nipasimbayu Nabi Musa ivei:

† Yoel 2:32

<<Yaku mompakasiriatu komiu manggita toveku ka tona ledu todeaku.

Madua ramiu manggita asi mataku nte tona ledu nosisani nte Yaku.>>

Ulangan 32:21

²⁰ Naupu sia, Nabi Yesaya nabia nompasimbayu tesa nu Alatala ivei:

<<Tona ledu nangelo posisani nte Yaku, iramo mantarima Yaku.

Bo Kupopaisani karoKu ka tona ledu nompasimbuku mangisani isema Yaku.>>

Yesaya 65:1

²¹ Tapi ane toYahudi, ivei Alatala nanguli ira:

<<Njumaeo ntua Yaku nombaduduaka paleku mantarima ira, tapi ira aga nesapuaka bo batena nakaa bagara.>>

Yesaya 65:2

Alatala ledu nampoara toYahudi

11 Jadi, berimbamo? Alatala nampoara todeana toYahudi? Natantumo ledu! Apa yaku mboto toYahudi, muli i Abraham, bo lako ri valaa i Benyamin.

² Alatala ledu nampoara todeana anu nipelisiNa lako bara ipiame. Toramo tesa Nabi Elia nitulisi ri Buku Gasa. Tempo ia nompangadu toIsrael ri ngayo nu Alatala niulina ivei:

³ <<Pue, nabi-nabiMiu nipatesira, bo Lanta PesombaMiu nigerosiramo. Damo saitoku hii nabi naboli, bo ira nompasimbuku mompatesi yaku muni.>>

1 Raja 19:10,14

⁴ Toramo pesana nTupu ivei: <<Ledu aga saitomu. Da nariapa pitu-njobu topangoseaka Yaku. Ira niboliKu majadi bagiaKu mboto. Ira ledu sanggani nombasomba viata Baal.>> ⁵ Ivesia muni sii-sii. Nau damo deanapa toYahudi ledu nompasaya i Yesus, naria muni sanu nompasaya sabana iramo nipelisi nu Alatala lako ri nggaulunama majadi bagiaNa. Ira nipelisiNa sabana kabelo nu ranaNa ⁶ ledu sabana pokainggura. Apa ane rapana Alatala mompelisi tona sabana pokainggura nabelo, batuana, ledu lako ri kabelo nu ranaNa mpuu nompelisiNa.

⁷ Jadi, kambukuna, todeana toYahudi *nadota najadi nanao ri panggita nu Alatala, tapi* ledu nikavara anu nielora. Topanggavana aga sakide, haitumo tona nipelisi nu Alatala. ToYahudi ntanina aga nakaa bagara. ⁸ Evamo nitulisi riaru Buku Gasa ivei:

<<Alatala nompakakumba pekirira.

Ia nompakaburo matara

sampe ledu nipakulera nanggita dala nakana,

bo Ia nompakabongo talingara

sampe ledu nipakulera mangepe pepatuduki nakana sampe sii-sii.>>

Ulangan 29:4, Yesaya 29:10

⁹ Bo Magau Daud muni nantesaki toYahudi anu ledu nompasaya ivei:

<<Pue, kuperapi pura-pura anu niporasa ntona hitu majadi tolia ka ira, sampe ira rapambela silaka bo pehuku, pobalasi pokainggura nadaa!

¹⁰ Pakaburo pekirira sampe ledu mamala rakitara dala nakana.

Bo pakandasamo ira sampe ira bate-batena mabundu nte kasusara!>>

Mazmur 69:23-24

Alatala nompasalama tona ledu toYahudi ala toYahudi masiriatu sampe ira muni madota nompasaya i Yesus bo rapakasalama.

¹¹ Jadi, deanapa toYahudi nanavu sabana ira ledu nompasaya. Tapi nee rapekirimiu ira nanavu sampe ri kasae-saena! Ledu ivesia patuju nu Alatala! Lako ri pesapuaka ntoYahudi haitu, tona ledu toYahudi nanggava loga *nompasaya bo rapakasalama*. Kaupuna, toYahudi masiriatu manggita ira *apa ira muni madota rapakasalama*. ¹² Deanapa toYahudi nesapuaka bo nampoara i Kristus. Sabana haitu, nadea tona ledu toYahudi nanggava belo lako nte Alatala. Jadi, ane tona ntanina nanggava belo sabana pesapuaka ntoYahudi, nemopa ane toYahudi majea bo nompasaya! Natantu melabi kadea belo rakavara.

¹³ Sii-sii kupambela tesaku hitu ka komiu, tona ledu toYahudi. Yakumo hii suro i Yesus anu nisuroNa manggeni Kareba Belo ka komiu tona ledu toYahudi. Bo pokarajaaku haitu nirekeku nabelo mpuu. ¹⁴ Apa nisarumakaku maria sanu sampesuvuku toYahudi masiriatu manggita komiu, sampe ira muni mamala kukeni nompasaya i Yesus bo rapakasalama. ¹⁵ Apa tempo Alatala nampoara toYahudi, dala nibuka ka pura-pura tona ntanina ri dunia rapoposinggabelo mpanjili ante Alatala. Jadi nelabipa kabelona ane toYahudi ratarima nu Alatala mpanjili! Apa kajadia haitu masimbayu mpo tona namate matuvu mpanjili!

Porapa kayu zaitun

¹⁶ Ane santubi roti niala ntani ruru bo nidekei ka Alatala, nasimbayu mpo pura-pura roti haitu nidekei ka Alatala. Bo ane kale nu kayu nireke Alatala tupuna, batuana tinggu-tingguna muni Ia tupuna. *ToIsrael nggaulu nireke Alatala tupura, ivesia muni, muli ntoIsrael nireke Alatala tupura.*¹⁷ ToYahudi namala nirapaka kayu zaitun niipara nu Alatala. † Bo sanu tingguna nikotosi nu Alatala. Komiu tona ledu toYahudi anu nompasaya i Yesus, nirapaka tinggu-tinggu lako ri kayu zaitun anu ledu niipara. Tinggu-tinggu haitu niala

† *ToYahudi nirapaka kayu zaitun. Kalena nirapaka totua ntoYahudi nggaulu anu najadi bagia nu Alatala. Tingguna nirapaka mulira.*

nu Alatala bo nipatakaNa † ri bela ntinggu nikotoNa pangane ala tinggu-tinggu nabaru haitu matuvu bo movua lako ri kayu nipiaraNa. *Ivesiamo komiu nantari-ma belo lako nte Alatala, nasimbayu mpo belo nitari-ma ntoYahudi nggaulu.*

¹⁸ Jadi, sampesuvu-sampesuvu, nee malanga raramiu manggita toYahudi anu nipoara mpo tinggu nikoto pangane. Toramo! Komiu mboto nasimbayu mpo tinggu. Ledo tinggu nompakatuvu kalena tapi kalena nompakatuvu tingguna. ¹⁹ Bara raulimiu ivei: <<Tinggu-tinggu pangane nikoto ala kami mamala rapataka ri belana.>> ²⁰ Haitu nakana mami, tapi toramo, ira nipoara sabana ira ledo nomparasaya, bo komiu nitarima sabana komiu nomparasaya. Jadi nee malanga raramiu, agina komiu maeka! ²¹ Apa ane Alatala nompoara toYahudi anu nirapaka tinggu nu kayu mami, nee rasarumakamiu Ia ledo mompoara komiu ane ledo raparasayamiu! ²² Jadi lako rahaitu nisanita kabelo rara nu Alatala, bo nisanita Ia nasadia mombahuku. Ia nombahuku topesapuaka, tapi nabelo raraNa nte komiu anu nomparasaya, asaa komiu maroo manjaru-maka kabeloNa haitu. Ane ledo, komiu muni rapoaraNa!

²³ Ane ira toYahudi domo mombasapuaka Alatala tapi majea bo momparasaya, ira ratarima nu Alatala mpanjili. Bo Ia nakuasa mantarima ira mpanjili.

²⁴ Komiu tona ledo toYahudi nasimbayu mpo tinggu kayu anu ledo nipiara. Naupa ivesia, komiu nipataka ri kayu nipiara. Jadi ane tinggu kayu ledo nipiara namala rapataka ri kayu nipiara, natantu tinggu kayu nipiara mamala rapataka mpanjili ri batana mboto.

Kaupuna rapakasalama muni toYahudi

²⁵ Sampesuvu-sampesuvu sampomparasaya! Ledo mabelo malanga gaga raramiu. Jadi yaku madota ala rasanimiu nia nu Alatala anu dopa nisani nu manusia nggaulu, haitumo, anu majadi nte toYahudi. Sii-sii nadea toIsrael nakaa bagara bo ledo nomparasaya. Tapi kakaa bagara haitu aga sampalai, sampe magana kadea ntona ledo toYahudi anu momparasaya i Yesus.

²⁶ Jadi maupu sia pade rapakasalama pura-pura toIsrael. Kajadia haitu nitulisi ri Buku Gasa ivei:

<<Makava tempona Magau anu Mompakasalama manusia makava lako ri Bulu Sion ††,

bo rapakalipoNa pura-pura kadaana lako ri muli i Yakub ‡.

Yesaya 59:20-21

† nipatakaNa: basa Indonesia <<dicangkokkan>>. Tinggu lako ri kayu sanggayu nipataka bo nipou ri kayu santanina sampe nosintaka mpuumo bo puu nu kayu haitu mpuu-mpuu noili bo nompakatuvu tinggu pangane. †† makava lako ri Bulu Sion: batuana, Topepakasalama haitu makava lako nte toYahudi mboto. ‡ muli i Yakub, batuana, toYahudi, apa ira pura muli i Yakub, tupu i Abraham.

²⁷ Bo haitumo pojanjiKu nte ira tempo Yaku mombaampungu dosa-dosara.>>

Yeremia 31:33-34

²⁸ Sii-sii toYahudi nireke bali nu Alatala sabana ira ledo nadota nomparasaya Kareba Belo. Bo haitumo anu nanggeni belo ka komiu tona ledo toYahudi. Tapi nau-pa ivesia, toYahudi da nipotove nu Alatala, sabana Ia nompelisi ira nggaulu majadi todeaNa, bo kana nitorana pojanjiNa nte totuara nggaulu. ²⁹ Apa ane Alatala nompelisi bo nombadekei belo ka tona, ledo rabalikiNa anu nipoviaNa haitu. ³⁰ Bara ipia komiu tona ledo toYahudi ledo natundu nte Alatala. Tapi sii-sii komiu nipoasiNa bo niampungina sabana pesapuaka ntoYahudi. ³¹ Ivesia muni toYahudi. Sii-sii ira ledo natundu nte Alatala ala komiu rapoasiNa bo raampungina. Tapi makava tempona bara maipia, ira muni rapoasi nu Alatala nasimbayu mpo komiu. ³² Alatala nompakalanto pura-pura manusia nesapuaka *bo masipato rahuku*, ala Ia mamala mompoasi bo mombaampungu pura-pura manusia.

Alatala masipato ratoiyata sabana kabelo nu raraNa ka manusia

³³ Nambaso mpuu kabelo nu Alatala! NotoNa bo pangisaniNa ledo ria pantaana! Ledo ria saitoa nompakule mombapaha pobotusiNa, atau mompakalanto anu nipoviaNa. ³⁴ Riaru Buku Gasa nitulisi ivei:

<<Isema nangisani pekiri nu Alatala? Isema mompakule mompatuduki Ia?

Yesaya 40:13

³⁵ Isema nombadekei sangaya ka Ia sampe Ia masipato mompopanjili ka ira balasina? Natantu ledo ntoto ria!>>

Ayub 41:2

³⁶ Apa pura-pura anu naria, nopuna lako nte Alatala bo natuvu lako ri kuasaNa bo Iamo Tupuna. Iamo masipato ratoiyata bo rabilata sampe ri kasae-saena! Amin!

Pokainggu masipato ka topomparasaya i Yesus (12:1-15:13)

12 Sampesuvu-sampesuvu, Alatala mpuu-mpuu nabelo nte kita! Sabana haitu, kuperapi ante mpuu-mpuu, dekeimo karomiu ka Alatala mpo pesomba natuvu, anu nipatani ka Alatala, anu mompakadamba raraNa. Haitumo ada pesombamiu nakana. ² Domo rapasialamiu kabiasa ntona ledo no-sisani nte Alatala. Dekeimo Alatala mompakabaru pekirimiu ala inggumiu mabali. Ane ivesia, rasanimiu anu mpuu-mpuu dota nu Alatala, haitumo, rasanimiu anu nabelo, anu nipokono nu Alatala, bo anu ledo nasala ri panggitaNa.

Pedekei nu Alatala kana rapaketa mantulungi todea topomparasaya

³ Lako ri kabelo rara nu Alatala, yaku nianggatakaNa majadi suroNa. Jadi sia sampe kuuli ka komiu pura-pura, Nee rapekirita karota mboto naoge ane ledo ivesia kakanana. Kita kana manoa bo manoto mompekirika karota mboto, nangoseaka suka pomparasaya nibagi nu Alatala ka kita saito-saito. ⁴ Ri karota nadea sipa, bo sipa haitu simbo ntanina gununa. ⁵ Ivesia muni kita topomparasaya i Kristus. Nau kita nadea, kita najadi sangu riara i Kristus. Bo kita nosidai mpo sipa-sipa nu karo. ⁶ Kita simbo nidekeika pompakule-pompakule ledo nasimbayu, nangoseaka anu nidekei nu Alatala ka simbo saito lako ri kabelo raraNa. *Jadi sabana haitu, kita kana mpuu-mpuu mompake pompakuleta haitu.* Isema-sema nidekeika pompakule mompatolele tesa lako nte Alatala, kana rapoviana mangoseaka pomparasaya naria nte ia. ⁷ Isema-sema nidekeika pompakule mantulungi tona ntanina, kana ratulungina mpuu ira. Isema-sema nidekeika pompakule mompaguru, kana mompaguru mpuu-mpuu. ⁸ Isema-sema nidekeika pompakule mompakaroso rara ntona ntanina, kana rapakarosona mpuu-mpuu. Isema-sema nidekeika pompakule mombadekei anu naria nte ia ka tona ntanina, kana radekeina ante joi rarana. Isema-sema nidekeika pompakule manggeniaka todea, kana rakeniakana ira ante rarana mpuu-mpuu. Isema-sema nidekeika pompakule mompoasi tona nandasa, kana rapoasina ante damba rarana.

Pokaingguta kana mabelo nte tona pura-pura

⁹ Kita kana mpuu-mpuu mompotove roata. Nee aga mosimpotove ri sumba. Kabasakamo anu nadaa, bo oseakamo anu nabelo ¹⁰ Posimpotovemo mpo posimpotove ntali sampesuvu. Bila ntanimo roamiu pade karomiu mboto. ¹¹ Kana matutu mokaarajaa, nee masanda! Kana madidi raramiu mokaarajaa ka Tupu. ¹² Kana madamba raramiu sabana komiu nanjarumaka anu rapovia nTupu ka komiu. Kana mosabara tempo masusa. Nee masau raramiu mosambaya. ¹³ Tulungimo roa sampomparasaya anu napepa, bo tarimamo torata riara banuamiu.

¹⁴ Ane maria tona mompandasa komiu, nee ratundamiu ia tapi perapi Alatala mombadekei belo ka ia. ¹⁵ Ane roamiu madamba, komiu kana madamba mosangani-nggani ante ia, bo ane roamu motumangi nabuku rarana, komiu kana motumangi mosangani-nggani ante ia. ¹⁶ Komiu kana matuvu mosintuvu nte roa. Nee malanga raramiu tapi komiu kana masa-

dia mosimporoa ante tona naede katuvuna. † Nee rapekiri karomiu napandepa pade kakanana.

¹⁷ Ane maria tona mompakadaa komiu, nee rabalasi ante daa! Poviamo anu nireke ntodea nabelo. ¹⁸ Pasimbukumo matuvu mosinggabelo ante pura-pura tona, sampe ri pompakulemiu. ¹⁹ Sampesuvu-sampesuvuku. Nee rabalasi tona novia daa nte komiu, tapi palambamo Alatala mombabalasi ira. Sabana riara Buku Gasa nitulisi ivei:

<<Yakumo mombabalasi,
Yakumo mombahuku ira.>>
Ivesia tesa nTupu.

Ulangan 32:35

²⁰ Jadi, *oseakamo pepatuduki ri Buku Gasa anu nanguli ivei:*

<<Ane maara tai nu balimiu, pakande ia. Ane mabai tambolona, painu ia. Sabana, ane ivesia rapoviamiu ka ia, kaupuna maeya mboto matana.>>

Amsal 25:21-22

²¹ Nee rabalasi pokainggu ntona nadaa ante pokainggu nadaa. Ane ivesia, nidagimo kita, nidagi nu daa. Aginamo pokainggu nadaa rabalasi ante pokainggu nabelo, ala belota mombadagi anu nadaa.

Kita kana matundu nte pomarenta

13 Pura-pura kita kana matundu nte pomarenta sabana ledo ria pomarenta anu ledo nanggava kuasana lako nte Alatala. Pura-pura pomarenta anu naria nipakakuasa nu Alatala. ² Jadi isema-sema mangeva pomarenta, nangeva anu nipakatantu nu Alatala mboto. Bo isema-sema mangeva pomarenta natantumo rahuku. ³ Apa tona nokainggu nabelo ledo paraluu maeka ka pomarenta. Aga tona nokainggu nadaa masipato maeka ka pomarenta. Jadi ane ledo madota kita matuvu maeka nte pomarenta, kita kana movia anu nabelo, bo kita ratoiya ntopeparenta. ⁴ Apa pomarenta nantulungi Alatala apa ira nokarajaa manggeni belo ka kita. Tapi ane madaa poviata, masipato kita maeka nte pomarenta sabana pomarenta mpuu-mpuu nakuasa mombahuku tona nadaa. Apa ira topotulungi Alatala bo ane rahukura tona novia nadaa, ira novia dota nu Alatala. ⁵ Haitu sabana kita masipato mangoseaka parenta nu pomarenta. Kita matundu ala ledo rapambela pehuku. Tapi ledo aga haitu, kita muni matundu sabana pekiri rara ntaita mboto nanguli kita masipato matundu nte pomarenta.

⁶ Ivesia muni sampe kita masipato mombayari bala-sitee, apa topeparenta nantulungi Alatala tempo ira nompapola bagora. ⁷ Dekei ka pura-pura tona anu masipato radekei ka ira. Bayarimo balasitee ka tona nipakatantu mantarima balasitee. Bo bayarimo bea ka

† komiu kana masadia mosimporoa ante tona naede katuvuna. komiu kana masadia mombatui pokarajaa ntopetudu.

tona nipakatantu mantarima bea. Pekoumo nte tona anu masipato rapekou, bo bilamo tona masipato rabilala.

Kita kana mosimpotove sabana naparamo tempona i Yesus meonga mpanjili

⁸ Nee kita moinda nte tona ntanina, tapi kita kana batena mosimpotove. Aga haitu inda masipato ka kita. Apa isema-sema nompotove singgamanusiana, nireke nioseakanamo pura-pura Atura agama. ⁹ Riara Atura haitu naria parenta-parenta ivei: <<Nee mobualo, nee mepatesi, nee mangangga, nee mario mata manggita anu ntona.>> Pura-pura parenta haitu bo parenta-parenta ntanina namala nipakambuku majadi sangu parenta, haitumo: <<Potovemo singgamanusiamu nasimbayu mpo pompotovemu karomu mboto.>>

¹⁰ Isema-sema mompotove singgamanusiana, natan-tumo ledo rapoviana anu nadaa ka ira. Jadi ane nipotoveta singgamanusiata, nireke nioseakata puramo Atura agama.

¹¹ Poviamo pura-pura haitu, apa nisanimiu sii-sii temponamo kita membangu lako ri paturuta bo mainga. Kita kana mainga sabana kakava i Kristus mompakasalama kita naparapa sii-sii pade tempo kita pamulana nomparasaya Ia. ¹² Nasaemo bongina, naparamo maeso. Jadi sia sampe kita kana mombakabasaka pokainggu nadaa nipovia ntona natuvu ri kalandana, bo mompake pareva posieva anu masipato ka tona natuvu riara karemena. ¹³ Kita kana matuvu ante pokainggu masipato ka tona natuvu riara karemena. Nee masiromu mangande mompebasa bo manginu sampe malangu. Nee mosipogau ante tona ledo bereimiu mboto bo nee mangoseaka dota raramiu nadaa. Nee mosinggarau atau masiriati.

¹⁴ Tapi kita kana mompasiala pokainggu i Pue Yesus Kristus. Haitumo pareva posieva rapasuata. Bo nee rapaloga karomiu mangoseaka dota raramiu nadaa.

Nee mombasalai sampesuvumiu sampomparasaya ane panggavana nosisala ante panggavamiu

14 Naria topomparasaya dopa naroso pomparasayara, sampe da naingu rarara pokainggu mbana raoseakara. Tona ivehaitu kana ratarimata ante nabelo, bo nee rapakasala panggavara. ² Rapana, naria tona nomparasaya ia namala mangande mpengaya-ngaya kande. Tapi tona ntanina anu dopa naroso pomparasayana, nanguli ledo nipokono nu Alatala kita mangande bau, aga uta-uta mamala rakandeta. ³ Tona nangande mpengaya-ngaya kande ledo masipato momparitambe tona ledo nangande bau. Bo tona ledo nangande bau, ledo muni masipato manjalai tona nangande mpengaya-ngaya kande. Sabana topan-gande mpengaya-ngaya haitu muni nitarima nu Alata-

lamo majadi todeana. ⁴ Roata haitu batua nu Alatala, ledo batuata. Ledo masipato kita manjalai batua ntonanina. Bara makana bara masala batua haitu, haitu urusa nu tuana mboto, ledo urusata. Bo tona nangande mpengaya-ngaya kande haitu tantu rareke nakana sabana Tupu nakuasa nombatulungi ia novia anu nakana.

⁵ Naria muni topomparasaya nanguli naria eo nopokopa pade eo-eo ntanina. Tapi topomparasaya ntanina nanguli pura-pura eo nasimbayu. Ledo nakuya, asaa pura-pura tona mpuu-mpuu nomparasaya riara ntaira Alatala nompokono anu nipoviara.

⁶ Tona nompakaoge eo nipakatantu, sabana ira madota mompakadamba Tupu. Bo ivesia muni tona anu nangande mpengaya-ngaya kande. Nikandera mpengaya-ngaya kande sabana ira madota mompakadamba Tupu, bo niulira tarima kasi ka Alatala. Tona ledo nangande bau haitu, ledo nikandera sabana ira madota mompakadamba Tupu, bo ira muni nanguli tarima kasi ka Alatala. ⁷ Kita topomparasaya natuvu ledo aga nompakadamba karota mboto. Bo kita namate ledo aga nangoseaka dotata mboto. ⁸ Ane kita da natuvu, kita natuvu mompakadamba Tupu, bo ane kita mamatemo, kita mamate mangoseaka dota nTupu. Nau da natuvu nau namatemo, kita batena todeana nTupu. ⁹ Haitumo sabana i Yesus Kristus namate bo natuvu mpanjili lako ri kamateNa, ala Ia mamala majadi Tupu nu pura-pura manusia, nau tona da natuvu nau tona namatemo.

¹⁰ Jadi, nee rapakasala roa-roamiu sampomparasaya. Bo nee raparitambemiu ira. Apa kita pura-pura kana mantingayo Alatala bara maipia bo Ia mombatangara kita pura-pura. ¹¹ Nisanita haitu sabana nitulisi riara Buku Gasa ivei:

<<Alatala nanguli, <TesaKu hitu mpuu-mpuu nakana: pura-pura tona kana mantaputu ri ngayoKu. Pura-pura tona kana mompangaku Yakumo Tupura!>>

Yesaya 45:23

¹² Jadi, sampesuvu-sampesuvu, kita simbo mantingayo Alatala bo mesana tempo Ia mompekutana anu nipoviata.

Nee sampe anu rapoviata mompakeni roa-roata movia dosa

¹³ Jadi, nemo raposipakasalata. Agina kita mompasimbuku nemo rapoviata nuapa-nuapa anu mompakeni roata sampomparasaya manavu riara dosa.

¹⁴ Yaku nosangu rara ante i Pue Yesus, jadi nisaniku mpuu ledo ria kande nuapa-nuapa nipopali ri panggita nu Alatala. Tapi ane maria tona nomparasaya sangaya kande nipopali, ia mpuu-mpuu masala ane rakandena. ¹⁵ Ane rapana yaku mompakadua rara

roaku sampomparasaya sabana nikandeku anu nirekena nipopali, yaku muni madosa apa yaku natuvu ledo nompotove roa. Jadi nee sampe pomparasaya nu roa rapakagero sabana kandeana nikandeta. Apa ira muni sampesuvuta sampomparasaya, anu nitoloki i Kristus ante kamateNa. ¹⁶Jadi, ane maria anu nireketa nabelo, tapi anu haitu nombabato pomparasaya nu roata, agina nee rapoviata, ala pokaingguta ledo rasalai ntona. ¹⁷Apa anu nopoko riaru Poparenta nu Alatala, ledo anu nikandeta atau niinuta. Anu nopoko, kita manoa rarata, bo matuvu mosinggabelo ante roata, bo madamba rarata sabana Nosa Gasa nu Alatala naria riaru ntaita. ¹⁸Ane ivesia pangoseakata i Kristus, kita mompakadamba rara nu Alatala, bo roata muni mombabila kita.

¹⁹Haitu sampe kita kana mompasimbuku matuvu mosinggabelo ante roata, bo mosipakaroso rara. ²⁰Nee rapakagerota anu nabelo nipovia nu Alatala riaru nggatuvu roata, sabana nikandeta anu nireke nu roa nipopali. Kakanana pura-pura kandeana namala rakande, ledo ria nipopali. Tapi kita nasala ane anu nikandeta mompakeni roata manavu riaru dosa. ²¹Agina domo mangande bau atau manginu panginu anu nepakalangu atau movia nuapa-nuapa anu mompakeni roata manavu riaru dosa. ²²Ane niparasayata pokaingguta haitu ledo nasala, aginamo rabolita pomparasayata haitu riaru ntaita ri ngayo nu Alatala. Nasana mpuu kita ane nipoviata anu niparasayata riaru ntaita nabelo, bo ane pekiri rara ntaita mboto ledo nanjalai kita. ²³Tapi ane nonggai rarata nangande, nasala kita ane rakandeta kandeana haitu, apa ledo nioseakata anu niparasayata. Bo nuapa-nuapa nipoviata anu ledo nangoseaka pomparasayata, pokainggu haitu dosa.

Kita kana mantulungi roa-roata, nee aga mompekirika kasana rarata mboto

15 Kita anu naroso pomparasayata masipato mosabara nte roata anu da nonggai rarana sabana dopa naroso pomparasayana. Nee aga mompekirika kasana nu rarata mboto. ²Kita masipato movia anu manggeni belo ka roata bo mompakasana rarana, ala mompakaroso pomparasayana. ³Apa i Kristus muni ledo aga nangelo kasana nu ranaNa mboto, *tapi Ia nompasimbuku mompakasana rara nu Alatala nau nislai ntona*. Riaru Buku Gasa naria tesa *nombaboto anu rauli i Yesus* ivei: <<Pura-pura tesara nombasalai Alatala nambela Yaku.>> ¹⁴Pura-pura anu nitulisi riaru Buku Gasa nggaulu nitulisi mompatuduki kita. Lako ri pepatuduki nikavata ri Buku Gasa kita majadi mosabara riaru kasusa bo rarata rapakaroso ala kita maroo manjarumaka Alatala.

† Mazmur 69:8

⁵Alatala anu nompakaroso rarata bo nompakatetida rarata tempo kita nombarasai kasusa. Sia sampe kuperapi Alatala mombatulungi komiu matuvu mosinggabelo nte roa riaru pangoseakamiu i Yesus Kristus, ⁶ala komiu mosangu rara bo mosangu suara mompakaoge Alatala, Tuama nTuputa i Yesus Kristus.

Kita kana mositarima belo, sabana Alatala nantarima kita pura-pura, nau toYahudi, nau tona ledo toYahudi

⁷Jadi sampesuvu-sampesuvu, kita kana mositarima belo, nasimbayu mpo i Kristus nantarima kita. Ane mositarima belo kita, Alatala rabila bo ratoiya ntona. ⁸Toramo, i Kristus nakava ri dunia mombatulungi toYahudi, ala pojanji nu Alatala ka totuara nggaulu madupa bo rasani ntona pura-pura, tesa nu Alatala namala raparasaya. ⁹Bo muni i Kristus nakava ala tona ledo toYahudi mantoiya Alatala, sabana kabelo raraNa nte ira. Riaru Buku Gasa naria tesa *nombaboto tempona tona ledo toYahudi mantoiya Alatala mosanggani-nggani nte toYahudi* ivei:

<<O Pue, yaku mombabila Komiu ri ngayo ntona ledo toYahudi.

Yaku modade mombatoiya Komiu.>>

2 Samuel 22:50; Mazmur 18:50

¹⁰Bo naria tesa ntanina riaru Buku Gasa nanguli ivei: <<Komiu tona ledo toYahudi

kana madamba mosanggani-nggani ante todea nu Alatala anu nipelisiNa nggaulu.>>

Ulangan 32:43

¹¹Bo naria vai ntanina tesa nu Alatala nanguli ivei: <<Komiu tona ledo toYahudi kana ratoiyamiu Alatala. Pura-pura manusia kana mombatoiya Ia.>>

Mazmur 117:1

¹²Bo naria muni tesa nitulisi Nabi Yesaya ivei:

<<Lako ri muli i Isai meumba saito mulina anu momparenta tona ledo toYahudi. Bo ira manjarumaka Ia.>>

Yesaya 11:10

¹³Alatala mpuu-mpuu puna panjarumakata! Kuperapi Ia mompakadamba mpuu raramiu bo mombadekei ka komiu katuvua mabelo sabana komiu nomparasaya Ia. Kuperapi panjarumakamiu nte Ia mantambai maroso ante kuasa lako ri Nosa GasaNa.

Patuju i Paulus motulisi sura hitu

¹⁴Sampesuvu-sampesuvuku, nisaniku mboto komiu batena nokainggu nabelo nte tona ntanina, bo nisanimiumo pura-pura anu masipato rapoviamiu, bo nipakulemiu mosipakaroso rara. ¹⁵Tapi naupa ivesia, nabia yaku notulisi bara sako-ngaya ka komiu pangane. Patujuku mompopatora komiu, sabana haitumo pokarajaa nidekei nu Alatala ka yaku lako ri kabelo

raraNa. ¹⁶ Ia nanganggataka yaku nokarajaa ka i Yesus Kristus nanggeni karebaNa ka tona ledo toYahudi. Bo pokarajaaku haitu namala rarapaka pokarajaa ntopanggeni pesomba, sabana yaku nompatolele Kareba Belo lako nte Alatala ka tona ledo toYahudi, bo ira anu nomparasaya i Kristus nirekeku pesomba nipesombaku ka Alatala. Bo pesombaku haitu tantu nitarima nu Alatala sabana Nosa Gasa nompakagasa ira bo nompatani ira majadi bagia nu Alatala.

¹⁷ Jadi yaku nadamba nompekirika pokarajaa nituiku ka Alatala, sabana yaku nosangu rara ante i Yesus Kristus. ¹⁸ Ledo mabia yaku motesaki anu nipoviaku mboto. Aga anu nipoviaku ante kuasa i Kristus riaranggatuvuku kutesaki. Nadea tona ledo toYahudi nangoseaka i Kristus sabana pepatudukiku bo pokarajaaku, ¹⁹ bo sabana kabaraka-kabaraka bo tanda-tanda nipokumaaka nipoviaku ante kuasa Nosa Gasa. Lako ri ngata Yerusalem sampe ri tana Ilirikum, nipatoleleku pura-pura Kareba Belo i Yesus Kristus ka tona. ²⁰ Riarapokarajaaku haitu yaku bate-batena nompasimbuku nompatolele Kareba Belo ka tona anu dopa niepera sanga i Kristus. Yaku ledo madota mombangu banua ri bavo pandasi nipovia ntona ntanina. ²¹ Tapi yaku madota mompakadupa anu nitulisi riaru Buku Gasa ivei:

<<Tona dopa nipatoleleka kareba, rasanira isema Ia.
Tona dopa nangepe karebaNa,
mangepe bo mombapaha.>>

Yesaya 52:15

I Paulus nonia hau ri ngata Roma

²² Sampesuvu-sampesuvu, yaku nasaro nilava tou nte komiu sabana pokarajaaku haitu. ²³ Tapi sii-sii, naupumo pokarajaaku ri sii. Nompae-mpaemo yaku madota tou mosinggava nte komiu. ²⁴ Jadi yaku nonia ane hau ri tana Spanyol ngena, mesai sampalai nte komiu ala kita madamba mpasanggani-nggani sampalai. Bo kusarumaka komiu mamala mombatulungi yaku mompapola polipaku hau ri tana Spanyol.

²⁵⁻²⁶ Tapi yaku hau ri ngata Yerusalem ntani ruru. Apa topomparasaya i Yesus ri propinsi Makedonia bo Akhaya nompakatantu mompakatu doi petulungi ka topomparasaya napakasi ri ngata Yerusalem. Jadi, yaku manggeni petulungira haitu hau ri Yerusalem. ²⁷ Niara haitu nipoviara lako ri dotara mboto, ledo nipasuu. Tapi kakanana, masipato muni ira mantulungi roara toYahudi sampomparasaya. Apa lako ri toYahudi sampe tesa nu Alatala nikenika tona ledo toYahudi. Jadi masipato mpuu tona ledo toYahudi mantulungi toYahudi ante mbara-mbara lako ri dunia hitu. ²⁸ Jadi yaku hau ri ngata Yerusalem ntani ruru manggeni doi petulungi anu nipasiromu ka topomparasaya hamai.

Maupu kudekei doi haitu ka ira ri Yerusalem, pade mesai ri ngatamiu kupoliu hau ri tana Spanyol. ²⁹ Bo nisaniku ane yaku makava nte komiu, natantumomadea belo lako nte i Kristus kukeni ka komiu.

³⁰ Sampesuvu-sampesuvu, kita nosangu rara ante Tuputa Yesus Kristus bo kita nosimpotove sabana pokarajaa Nosa Gasa riaru ntaita. Sabana haitu, kuperapi nte komiu, pekakaimo mpuu-mpuu nte Alatala mosanggani-nggani ante yaku, mosambaya ka yaku. ³¹ Posambayamo ala yaku ledo rapakadaa ntoYahudi ri bagia Yudea anu ledo nomparasaya i Yesus. Bo posambayaka munimo ala topomparasaya ri Yerusalem mantarima mabelo doi petulungi kukeni hitu. ³² Kuperapi muni, ane rapodota nTupu, yaku mamala tou mesai nte komiu ante damba nu raraku, bo kita mamala mosipakavoe rarata. ³³ Kuperapi Alatala, anu nombadekei katuvua nabelo, mombatulungi komiu pura-pura. Amin.

Petabe

16 Ante suraku hitu, kupopaisani ka komiu i Febe, sampesuvuta sampomparasaya. Ia sampesuvuta mombine anu nantulungi pakeni ntodea topomparasaya ri ngata Kengkrea. ² Kuperapi komiu mantarima ia sabana pomparasayana i Pue Yesus, apa ivesia mamimo kita todea nu Alatala masipato mantarima roata sampomparasaya. Ane maria anu niparaluuna, tulungimo ia, sabana ia mboto nadea tona nitulungina, yakumo hii saito.

³ Pakavote tabeku ka i Priskila bo i Akwila. Ira njamboko roaku sampokarajaa nanggeni Kareba Belo i Yesus Kristus. ⁴ Ira sakidepa namate nantulungi yaku. Yaku nosukuru nte ira, bo ledo aga yaku, tapi pura-pura todea topomparasaya anu ledo toYahudi. ⁵ Pakavote muni tabeku ka todea topomparasaya anu nodade ri banuara.

Pakavote tabeku ka i Epenetus nipotoveku. Iamo tona paratama nomparasaya i Yesus Kristus ri propinsi Asia. ⁶ Bo pakavote muni tabeku ka i Maria. Ia nokarajaa ntamo ka komiu. ⁷ Pakavote tabeku ka i Andronikus bo i Yunias, sampesuvuku toYahudi. Ira muni nitarunggu nosanggani-nggani ante yaku bara ipia. Pura-pura suro i Yesus nombabila ira. Dopame yaku nomparasaya i Yesus, lave nomparasayamo ira.

⁸ Pakavote tabeku ka i Ampliatu anu nipotoveku, apa kami randua nosangu rara nte Tupu. ⁹ Pakavote tabeku ka i Urbanus, roata sampokarajaa nompatolele Kareba i Kristus. Bo pakavote tabeku ka i Stakhis nipotoveku. ¹⁰ Pakavote tabeku ka i Apeles. Nadea kasusa nirasaina, tapi ia bate-batena nangoseaka i Kristus. Bo pakavote tabeku ka gi Aristobulus sambanua.

¹¹ Pakavote tabeku ka i Herodion, roaku toYahudi, bo

muni ka sampesuvuku sampomparasaya ri banua i Narkisus.

¹² Pakavote muni tabeku ka i Trifena bo i Trifosa. Randua mombine haitu nokarajaa ntamo ka Tupu. Bo pakavote tabeku ka i Persis anu nipotoveta. Ia muni mombine anu nokarajaa ntamo ka Tupu. ¹³ Pakavote tabeku ka i Rufus anu nipelisi nTupu, bo nitoyia ntona. Bo pakavote muni tabeku ka tinana anu nirekeku tinaku muni. ¹⁴ Pakavote tabeku ka i Asinkritus, i Flegon, i Hermes, i Patrobas, i Hermas bo pura-pura sampesuvu sampomparasaya anu nosangani-nggani nte ira. ¹⁵ Pakavote tabeku ka i Filologus bo i Yulia, i Nereus bo sampesuvuna mombine, bo ka i Olimpas bo ka pura-pura topomparasaya nosangani-nggani nte ira.

¹⁶ Posipakavotemo tabe ante mpuu-mpuu rara, mpo sampesuvu sampomparasaya i Kristus. Pura-pura topomparasaya i Kristus ri sii nompakavote tabera ka komiu muni.

Pepatuduki kaupuna

¹⁷ Sampesuvu-sampesuvuku, kuperapi ante mpuu-mpuu ala komiu mainga nte tona anu nomposibali todea topomparasaya bo madota mompakanavu komiu ante pepaduduki anu nangeva pepaduduki nakana nipatuduki ka komiu. Tumo mosimporoa ante tona ivehaitu! ¹⁸ Sabana, tona nokainggu ivehaitu ledo nokarajaa ka Tuputa i Kristus, tapi aga nangoseaka dotara mboto. Tona dopa nisanina belo pepaduduki nakana, nibagiura ante tesa-tesara napande bo namomi.

¹⁹ Komiu, nisani ntona ri umba-umba komiu naroo nangoseaka pepaduduki lako nte Alatala. Haitumo sampe yaku nadamba nompekirika komiu. Tapi yaku madota ala komiu mapande mangisani anu nabelo, tapi nee mpuu mapande mangisani anu nadaa. ²⁰ Ku-

perapi Alatala, anu nombadekei katuvua nabelo, masalisa mompakaropu kuasa Magau nu Seta bo radekeiNa ka komiu kuasa mombadagina. Kuperapi kabelo rara nTuputa Yesus Kristus bate-batena maria nte komiu.

²¹ I Timotius, roaku sampokarajaa nompakavote tabe ka komiu. Ivesia muni i Lukius, i Yason bo i Sosipater, roa-roaku toYahudi.

²² Yaku, i Tertius, nipopale i Paulus notulisi sura hitu. Yaku sampesuvumi sampomparasaya bo yaku muni nompakavote tabeku ka komiu pura-pura.

²³ Tarima muni tabe lako nte i Gayus. Yaku i Paulus, nipalogana nonturo ri banuana, bo topomparasaya ri sii muni biasa nasiromu nodade ri banuana. Tarimamo tabe lako nte i Erastus, topompasiayu doi ri ngata hitu. Bo tarima muni tabe lako nte sampesuvuta i Kwartus. ²⁴ [Kuperapi Tuputa Yesus Kristus bate-batena mabelo nte komiu pura-pura. Amin.]

Dade pombatoiya Alatala

²⁵ Ratoiyata Alatala! Ia nakuasa mompakaroso pomparasayamiu mpo niuli ri Kareba Belo nipatoleleku, haitumo kareba i Yesus Kristus. Kareba i Kristus haitumo nia nu Alatala anu nitabuniakaNa lako ri lamba pamulana. ²⁶ Tapi ri tempo sii-sii, nia haitu nipopaisani ka kita riaru buku nitulisi nu nabi-nabi nggaulu. Bo Alatala anu natuvu sampe ri kasae-saena, nantudu ala niana haitu rapopaisani ka tona ri umba-umba ala pura-pura manusia mamala momparasaya bo matundu nte i Kristus. ²⁷ Iamo Alatala anu nangisani pura-pura! Ledo ria simbayuNa! Ia masipato ratoiyata sampe ri kasae-saena ante petulungi i Yesus Kristus. Amin. 19-May-2009@12:42, Backup Description=19-May-2009@09:53, snave - 26-May-2009@11:04, Backup Description=26-May-2009@11:03, B Altork - ❖❖❖

1 Korintus

Vamba nu Tesa

Sura hitu nitulisi i Paulus ka topomparasaya ri ngata Korintus. Ngata Korintus ngata mbaso ri propinsi Akhaya anu nikuasai pomarenta Magau Mbaso Roma. Sii-sii ngata haitu nambela negara Yunani. Nadea ngaya tona nonturo ri Korintus, apa Korintus mai ngata pogade.

Bara ipia i Paulus nonturo ri Korintus sampae santanga kasaena nompatolele Kareba Belo ka tona hamai (Suro-suro 18:1-11). Nadea toKorintus nompapasaya i Yesus tempo haitu. Naliu i Paulus nompalaisi ngata Korintus, nakavamo saito topomparasaya i Yesus anu napande nompatuduki Tesa nu Alatala, sangana i Apolos (Suro-suro 18:24-19:1). Ia nompatuduki bo nantulungi topomparasaya i Yesus ri ngata Korintus.

I Paulus notulisi sura hitu sabana nitarimana sura lako nte toKorintus nompekutana bara sako-ngaya. Bo niepena muni topomparasaya ri ngata Korintus nosipobali bo gaura ledο natumutoa. Naria muni guru-guru mpodava nakava ri ngata Korintus nangeva i Paulus bo nanguli i Paulus mai ledο suro i Yesus mpuu.

Nipokonorapa i Apolos bo pakeni ntanina. Jadi i Paulus notulisi sura hitu mesanaka pompekutanara bo mompatuduki ira mombakabasaka pokainggu-pokainggu anu ledο masipato rapovia ntopomparasaya i Yesus.

Isi nu Sura

Pantepuuna (1:1-9)

Topomparasaya ri Korintus nosipobali (1:10-4:21)

Pepatuduki pokainggu nabelo ka tona njamboko (Pasal 5-7)

Pepatuduki kande nipakande ka tupu-tupu ntanina (8:1-11:1)

Pokainggu masipato ka mombine riarasiromu ntopomparasaya (11:2-16)

Mangande roti bo manginu uve anggur mombatora kamate i Yesus (11:17-34)

Pompakule lako ri Nosa Gasa nu Alatala bo pepotove (Pasal 12-14)

Tona namatemo rapakatuvu mpanjili (Pasal 15)

Doi rapasiromu rapakatu ka topomparasaya ri bagia Yudea (16:1-4)

Tesa Kaupuna (16:5-24)

Petabe

1 ¹⁻² Sampesuvu-sampesuvu, todea nu Alatala ri ngata Korintus:

Komiu nipelisi nu Alatala majadi todeaNa mboto sabana komiu nosangu rara ante i Yesus Kristus. Komiu nipokio majadi todea nu Alatala mosanggani-nggani ante pura-pura tona ri umba-umba dunia anu nekakai nte i Yesus Kristus, Tupura bo Tuputa muni.

Sura hitu lako nte kami, i Paulus bo sampesuvuta sampomparasaya i Sostenes. Yaku nipelisi nu Alatala majadi suro i Yesus Kristus nangoseaka dota nu Alatala mboto. ³ Kuperapi Tuamata Alatala bo Tuputa Yesus Kristus mombadekei belo ka komiu bo mompakati-nonto raramiu.

I Paulus notarima kasi sabana Alatala nantulungi toKorintus

⁴ Yaku ledο nenonto nanguli tarima kasi nte Alatala, sabana kabelo raraNa nte komiu anu nosangu rara ante i Yesus Kristus. ⁵ Katuvumiu nipakasugiNa riarasiromu mpengaya-ngaya sabana komiu nosangu rara ante i Yesus Kristus. NidekeiNa ka komiu kapande notesa bo mpengaya-ngaya pangisani nabelo. ⁶ Haitu nompakalanto Kareba i Kristus anu nipatolele kami ka komiu, mpuu-mpuu nalonto riarasiromu ntaimiu. ⁷ Jadi, ledο ntoto nakura pompakule nidekei nu Nosa Gasa ka komiu sii-sii, komiu ranja nantongoraka peonganTuputa i Yesus Kristus mpanjili ri dunia. ⁸ Alatala mompakaroso komiu sampe ri kaupuna ala tempo Tuputa Yesus Kristus makava mpanjili ri dunia, ledο maria salamiu rakavaNa. ⁹ Alatala namala raparasaya mompakadupa pojanjiNa ka kita. Bo Iamo nompokio komiu majadi nosangu rara ante AnaNa Yesus Kristus, Tuputa.

Topomparasaya ri ngata Korintus nosipobali

¹⁰ Sampesuvu-sampesuvu, ante kuasa nidekei nTuputa Yesus Kristus ka yaku, kuperapi nte komiu ala komiu mosangu rara. Nemo sampe magero sintuvu-miu. Komiu kana masintuvu mosangu rara bo mosangu patuju. ¹¹ Niuliku ivesia sabana naria ira lako ri banua i Kloe nanguli ka yaku sanu komiu nosipobali. ¹² Batuana, sanu komiu nanguli, "Yaku hii topangoseaka i Paulus." Naria sanu nanguli, "Yaku hii topangoseaka i Apolos." Naria ntanina nanguli, "Yaku hii topangoseaka i Petrus †." Naria muni ntanina nanguli, "Yaku hii topangoseaka i Kristus." ¹³ Natebagi-bagi tano i Kristus? Ledo yaku nipaku ri kayu salib mombasambe komiu! Tempo komiu nidiu, ledo tandana komiu najadi topangoseaka yaku! ¹⁴ Yaku nosukuru sabana ledo ria komiu ntanina nidiuku, aga i Krispus bo i Gayus, ¹⁵ mbelaka maria tona manguli ia nidiu tandana ia najadi topangoseaka yaku! ¹⁶ (Bo nitoraku muni, gi Stefanus sambanua nidiuku. Tapi ntanina lako nte ira gahaitu, ledo nitoraku bara da nariapa ntanina nidiuku. Domo nitoraku.) ¹⁷ Yaku ledo nitudu i Kristus mombadiu tona, tapi mompatolele Kareba Belo. Bo ane mompatolele Kareba haitu, yaku ledo notesa nangoseaka kapande nu manusia, mbelaka maria tona aga momparasaya sabana kapandeku motesa bo ledo rasanira mpuu kuasa i Kristus mompakasalama ira ante kamateNa ri kayu salib.

Kuasa bo kapande nu Alatala nikita ri katuvu bo kamate i Kristus

¹⁸ Kami mompatolele kareba kamate i Kristus ri kayu salib nombasompo dosa manusia. Ane tona damo kapesuana ri narakaa nangepe kareba haitu, niulira tesa ntodoyo, ledo ria batuana. Tapi kita anu nipakasalama, nisanita kamate i Kristus nompopakita kuasa nu Alatala mboto! ¹⁹ Apa ri Buku Gasa Alatala notesa ivei:

"Kulava nia ntona napande bo Kupakaingu pekiri ntona natau."

Yesaya 29:14

²⁰ Jadi nuapa gunana tona napande? Nuapa gunana tona natau? Nuapa gunana tona napande notesa ri dunia hitu? Alatala nompakalanto pura-pura kapande nu manusia ledo ria gunana. ²¹ Alatala napande mpuu, bo nipakatantuNa manusia ledo mamala mosisani ante Ia ane aga manjarumaka kapandera mboto. Tapi nibotusiNa mompakasalama isema-sema momparasaya Kareba Belo nipatolele kami. Tano mai tona ri dunia nanguli Kareba haitu aga tesa ntodoyo. ²² ToYahudi ledo nadota momparasaya ane ledo rakitara

† Petrus Ri basa Yunani nitulisi "Kefas" ri sii bo muni ri 3:22, 9:5, 15:5.

tanda nipokumaaka. Bo toYunani ledo nadota momparasaya ane ledo ratesa ka ira ante kapande nu manusia. ²³ Tapi kami aga mompatolele Kareba kamate i Kristus ri kayu salib. KamateNa haitu nompakadua rara ntoYahudi, bo nireke ntoYunani aga tesa ledo ria gunana. ²⁴ Tapi ane tona nipokio nu Alatala majadi todeana, nau toYahudi, nau toYunani, nisanira kamate i Kristus haitu nompopakita kuasa bo kapande nu Alatala ka ira. ²⁵ Apa kareba kamate i Kristus, anu nireke manusia ledo ria gunana, haitumo nompopakita kapande nu Alatala. Bo kapande nu Alatala neliupa pade kapande nu manusia. Panguli nu manusia, kamate i Kristus aga nompopakita kalente nu Alatala, tano mai anu niuli kalente nu Alatala haitu, nakuasapa pade pura-pura kuasa nu manusia.

²⁶ Sampesuvu-sampesuvu, toramo katuvumiu bara ipia tempo Alatala nompokio komiu majadi todeana. Ledo nadea komiu napande ri panggita ntona ri dunia. Ledo nadea komiu nakuasa bo ledo nadea naria nturona. ²⁷ Tapi Alatala nompelisi tona nireke nadoyo ri panggita ntona ri dunia, ala tona natau maeya matara. NipelisiNa tona ledo nakuasa ri panggita ntona ri dunia, ala tona nakuasa maeya matara. ²⁸ NipelisiNa tona ledo ria nturona, tona nislai bo tona nireke ledo ntoto ria gunana ri panggita ntona ri dunia, ala malanto anu nitoyia nu manusia ri dunia hitu ledo ria gunana. ²⁹ Patuju nu Alatala ala nee maria manusia mangoe ri ngayo nu Alatala, manguli kapandena mboto sampe ia nipelisi nu Alatala.

³⁰ Lako nte Alatala sampe kita najadi nosangu rara ante i Yesus Kristus. Bo lako nte i Kristus sampe nisani-ta kapande nu Alatala. Ia nompoposinggabelo kita ante Alatala sampe kita najadi todeana nagasa nipatani ka Alatala. Bo Iamo nombakabasaka kita lako ri pura-pura anu nadaa. ³¹ Jadi evamo nitulisi riaru Buku Gasa, "Isema-sema madota mantoyia bara nuapa, aginapa ia mantoyia anu nipovia nTupu!"

Yeremia 9:24

I Paulus mompatolele Kareba Belo ante kuasa lako nte Alatala, ledo ante kapande nu manusia

2 Sampesuvu-sampesuvu, tempo yaku nakava nte komiu nanggeni Kareba Belo lako nte Alatala, †† yaku ledo notesa ante tesa-tesa nagaya bo napande. ² Apa nipakatantukumo yaku aga motesa i Yesus Kristus bo kamateNa ri kayu salib. ³ Jadi tempo yaku naria nte komiu, yaku nalente bo nolete naeka. ⁴ Tesa nipatoleleku ledo niuliku ante tesa-tesa mpeopa anu nopuna lako ri kapande nu manusia. Tapi tempo yaku mompatolele kareba haitu, nikitamiumo kuasa lako ri Nosa Gasa nu Alatala. ⁵ Nipoviaku ivesia ala mompara-

†† Kareba Belo lako nte Alatala. Nangoseaka bara sakuya naskah kuno: nia nu Alatala anu dopa nisani ntona ri dunia.

sayamiu ledo mopuna lako ri kapande nu manusia tapi mopuna lako ri kuasa nu Alatala.

Kapande nakana lako nte Alatala

⁶ Naupa ivesia, ane kami notesa ka topomparasaya anu naroso pomparasayana, naria muni kapande nipasimbayu kami ka ira. Tapi kapande haitu ledo nasimbayu ante kapande lako ri dunia nadaa hitu atau kapande ntopoparenta ri dunia nadaa hitu, apa kuasara nalipo-lipomo. ⁷ Kapande nipatolele kami, iamo kapande lako nte Alatala. Kapande haitu ledo nisani ntona ri dunia. Tapi dopame dunia nipajadi, Alatala nonia mamimo mompopaisani kapandeNa haitu ka kita sii-sii. Haitu nipoviaNa ala manggeni belo ka kita. ⁸ Ledo ria saitoa topoparenta ri dunia nadaa hitu nangisani patuju nu Alatala haitu. Apa ane rapana nisanira patujuNa haitu, natantumoleto ledo rapakura ri kayu salib i Pue anu nakuasa. ⁹ *Nau ledo nisani ntopoparenta ri dunia, Alatala nompopaisanina ka kita, evamo nitulisi riaru Buku Gasa,*
 “Dopa nikita nu manusia,
 dopa niepe ntalingara,
 bo dopa muni nesua ri pekirira
 pura-pura belo nipakasadia nu Alatala ka tona nompotove Ia.”

Yesaya 64:4

¹⁰ Tapi belo nipakasadia nu Alatala haitu, nipopaisaniNa ka kita lako ri Nosa Gasana. Apa Nosa Gasa nu Alatala nangisani mpengaya-ngaya, sampe nau patuju nu Alatala anu dopa nisani nu manusia, nisaniNa pura. ¹¹ Anu nangisani pekiri manusia saito, aga tona haitu mboto. Ivesia muni anu nangisani pekiri nu Alatala aga Nosa Gasana mboto. ¹² Ledo kapande lako ri dunia hitu nitarimata, tapi Nosa Gasa nu Alatala nitari-mata ala rasanita pura-pura anu nidekei nu Alatala ka kita lako ri kabelo raraNa.

¹³ Jadi ane kami nompatuduki nombatesa Alatala, kami ledo notesa ante tesa-tesa napande nipatuduki ka kami nangoseaka kapande nu manusia, tapi ante tesa-tesa nipatuduki nu Nosa Gasa ka kami. Kami nombat-entei pepatuduki lako nte Nosa Gasa ka tona naria Nosa Gasa haitu. ¹⁴ Tona nangoseaka dotana mboto bo ledo naria Nosa Gasa nu Alatala nte ia, ledo nitari-mana pepatuduki lako nte Nosa Gasa sabana nirekena pepatuduki haitu aga tesa ntodoyo. Ledo nipakulena mombapaha batuana sabana pepatuduki haitu aga namala rapaha ntona ante pekeniaka Nosa Gasa.

¹⁵ Tona naria Nosa Gasa nu Alatala nte ia, nompakule nomparesa bo nompaha mpengaya-ngaya. Tapi tona ledo naria Nosa Gasa nte ia, ledo nompakule mombapaha pekiri ntona naria Nosa Gasa. ¹⁶ Evamo nitulisi riaru Buku Gasa ivei:

“Isema rapakulena mangisani pekiri nTupu sampe rapakulena mompatuduki Ia?”

Yesaya 40:13

Tapi kita topomparasaya, pekirita nasimbayu ante pekiri i Kristus!

Topomparasaya ri Korintus ledo nasintuvu

3 Sampesuvu-sampesuvu, tempo yaku naria nte komiu, ledo nitesaku ka komiu nasimbayu mpo nitesaku ka tona nikuasai Nosa Gasa nu Alatala. Tapi nitesaku ka komiu nasimbayu mpo nitesaku ka tona anu da nangoseaka dota rarara nadaa bo ledo naria Nosa Gasa, apa pomparasayamiu i Kristus dopa naroso. Komiu da mpo ngana kodi. ² Ledo nipakule ngana kodi nangande kande ntotua. Ivesia muni komiu. Tempo haitu, nipatudukiku ka komiu pepatuduki masipato ka tona dopa naroso pomparasayara, sabana dopa nipakulemiu mantarima pepatuduki nakaja. Bo sampe sii-sii dopa muni nipakulemiu mantarimana ³ apa komiu da nangoseaka dota raramiu nadaa. Komiu da nasiriati bo nosipobali. Pokainggu ivehaitu nompopakita komiu da nangoseaka dota raramiu nadaa nasimbayu mpo tona ledo nosisani ante Alatala. ⁴ Saito nanguli, “Yaku hii topan-goseaka i Paulus,” bo saito vai nanguli, “Yaku hii topangoseaka i Apolos.” Pokainggumiu haitu nompakalanto komiu da mpo tona ledo nosisani ante Alatala.

Topokarajaa ka Alatala nirapaka topotuda bo topovia banua

⁵ Pekirimo! Isema yaku? Bo isema i Apolos? Kami aga batua-batua nu Alatala nanggeni komiu nompapasaya i Yesus. Kami aga batua anu simbo nokarajaa pokarajaa nidekei nu Alatala ka kami. ⁶ Yaku hii nirapaka topotuda bo i Apolos nirapaka topodundusi. Tapi Alatalamo anu nompakatuvu tuda-tuda. ⁷ Topotuda bo topodundusi ledo masipato raparibavo. Anu nopoko, iamo Alatala, apa Iamo topompakatuvu tuda-tuda. ⁸ Topotuda bo topodundusi nasimbayu, bo ira simbo mantarima tambo nangoseaka kantamo pokarajaara mboto. ⁹ Apa kami bo i Apolos nosampokarajaa ante Alatala, bo komiumo nirapaka talua nu Alatala.

Komiu muni nirapaka banua nu Alatala. ¹⁰ Yaku hii mpo topande novia banua. Lako ri kabelo rara nu Alatala, nianggatakaNa bo nipopompakuleNa yaku novia pandasi banua, bo tona ntanina nombabangu banua ri bavo nu pandasi haitu. Tapi simbo rabanguna pakabelo-belo. ¹¹ Apa pandasi anu nipovia mamimo, haitumo i Yesus Kristus. Ledo ria pandasi ntanina. ¹² Ane topokarajaa ka Alatala nabelo pokarajaana, ia namala rarapaka topovia banua anu nombabangu ante bulava, salaka, bo vatu nasuli ri bavo nu pandasi

haitu. Ane topokarajaa ka Alatala ledo nabelo pokarajaana, ia namala rarapaka topovia banua anu nombangu ante kayu bara jono bara kada mpae. ¹³ *Rapana ane mapapu banua, tantu pareva nabelo nipake novia banua haitu maboli, tapi pareva ledo nabelo mapapu puramo. Ivesia muni ante pokarajaa ntopokarajaa ka Alatala.* Kabelo nu pokarajaara saito-saito kana rapakalanto bara maipia tempo i Yesus makava mpanjili ri dunia. Pokarajaara haitu rauji nu Alatala ala malanto pokarajaara haitu bara mabelo bara ledo. ¹⁴ Ane nabelo pokarajaara rakita nu Alatala, topokarajaa haitu manggava tambo lako nte Alatala. ¹⁵ Tapi ane ledo nabelo pokarajaana rakita nu Alatala, ledo maria tambo radekei ka ia. Malipo tambona tapi karonu masalama. Ia masimbayu mpo tona napapu banuana bo damo karonu nggoo ledo nikande nu apu.

¹⁶ Sampesuvu-sampesuvu, ledo nisaniamiu komiu nasimbayu mpo banua niponturo nu Alatala? Bo Nosa GasaNa nonturo ri tatangamiu. ¹⁷ Isema-sema mombagero banua niponturo nu Alatala haitu, ia kana rahuku nu Alatala, sabana banua haitu nagasa. Toramo! Komiumo banua haitu!

¹⁸ Nee mombabagiu karomiu mboto! Ane maria nte komiu tona nompekiri karonu mboto napande ri panggita nu manusia, agina ia majadi madoyo ri panggita nu manusia ala ia mpuu-mpuu majadi mapande.

¹⁹ Apa anu nireke napande ri panggita nu manusia nadoyo ri panggita nu Alatala. Evamo nitulisi riaru Buku Gasa ivei:

“Alatala nompakanavu tona natau ante akalara mboto.”

Ayub 5:13

²⁰ Bo naria tesa ntanina nanguli ivei:

“Nisani nTupu ledo ria gunana pekiri ntona natau ri dunia.”

Mazmur 94:11

²¹ Jadi ane ivesia, tumo mangoe ka pakeni-pakenimiu ri dunia hitu. Kakanana pura-pura nidekei nu Alatala ka komiu majadi anumiu. ²² I Apolos, i Petrus, bo yaku nidekei nu Alatala ka komiu majadi topotulungi komiu. NidekeiNa muni katuvu nabaru ka komiu bo nikabasakaNa komiu lako ri kamate. Nuapa-nuapa naria riaru dunia hitu, nuapa-nuapa najadi sii-sii bo nuapa-nuapa majadi bara maipia nipakatantu nu Alatala manggeni belo ka komiu. Pura-pura haitu bagiamiu, ²³ bo komiu bagia i Kristus, bo i Kristus bagia nu Alatala.

Pura-pura suro i Yesus batua nu Alatala

4 Jadi kami pakenimiu kana rarekemiu batua i Kristus. Kami hii niparasayaka nu Alatala mompatolele tesaNa anu dopa nisani ntodea ri dunia. ² Bo

† ri tatangamiu ATAU: riaru ntaimiu.

anu nopoko ka batua, ira kana matutu mangoseaka parenta nu madikara. ³ *Jadi bara maria nte komiu tona madota momparesa pokarajaa kami bo mompakatantu bara mabelo bara ledo.* Tapi yaku hii, ledo kupeili bara komiu bara tona ntanina mombatangara yaku. Ledo muni kutangara karoku mboto. ⁴ Nabula raraku. Pangisaniku mboto, ledo naria anu masipato rapakasala riaru nggatuvuku. Tapi ledo kabula raraku hitu mompakatantu yaku manoa ri panggita nu Alatala. Aga i Pue Yesus mamala mombobotusi bara nasala yaku bara ledo. ⁵ Jadi nee komiu masalisa mompakatantu sala ntona ane dopa nakava tempona. Popea sampe i Pue Yesus makava mpanjili ri dunia. Iamo mompakalanto pura-pura anu nitabuniaka ri kalandana sii-sii. Iamo mompakalanto mpengaya-ngaya patuju nitabuniaka riaru ntai manusia. Ri tempo haitu, Alatala mombotoiya isema-sema masipato ratoiyana.

ToKorintus masipato mompakaede rara nangoseaka jonjo i Paulus bo i Apolos

⁶ Sampesuvu-sampesuvuku, porapa nitesaku ri bavona nipambela ka kami bo i Apolos ala mantulungi komiu. Nialaku jonjo kami randua ala komiu mamala meguru nee meliu lako ri anu nitulisi riaru Buku Gasa. Patujuku ala ledo malanga raramiu bo ledo mantoiya saito batua i Kristus bo manjalai batua ntanina. ⁷ Isema nanguli komiu nelabipa pade tona ntanina? Nuapa naria nte komiu anu ledo nidekei nTupu ka komiu? Jadi nakuya komiu nangoe-ngoe? Nisarumakamiu anu naria nte komiu asele mpoviamiu mboto? ⁸ Natantu nisarumakamiu nagana puramo nte komiu, nakalumanamo komiu riaru mpengaya-ngaya. Nisarumakamiu komiu nomparenta mpo magaummo bo kami ledo. Mabelo mpuu ane makana komiu najadi magau, ala kami muni mamala momparenta mosanggani-nggani nte komiu!

⁹ Tapi kami dopa najadi magau ri dunia. Nangoseaka panggavaku, kami suro-suro i Yesus nipajadi nu Alatala tona nelabi napakasi ri dunia. Kami nasimbayu mpo tona niken rahuku mate ri ngayo ntodea, apa kami nikanoto nu isi dunia pura-pura, nau manusia nau malaeka-malaeka nTupu. ¹⁰ Kami nireke ntona todoyo sabana kami nangoseaka i Kristus. Tapi nangoseaka pekirimiu, komiumo topomparasaya nanoto! Kami nireke ntona nalente tapi nangoseaka pekirimiu, komiumo naroso! Kami nisalai ntona tapi komiu nitoiya ntona! ¹¹ Sampe sii-sii kami nasaro naara tai bo nabai tambolo. Kami nopakea nte sanjia-njia, kami niboba ntona bo ledo ria ponturo nikaroo kami. ¹² Kami nokarajaa ntamo ante pale kami mboto nangelo katuvua. Ane nipindasi ntona kami, kami nerapi Alatala mombadekei belo ka tona haitu. Ane nipandasa ntona kami, kami bate-batena nosabara. ¹³ Ane nisalai ntona

kami, kami nesana ante tesa nalusu. Kami nipeinta mpo rumpu ri dunia hitu. Sampe sii-sii kami nipeinta mpo tai.

¹⁴ Sampesuvu-sampesuvuku, patujuku notulisi hitu ka komiu ledo mompakaeya komiu, tapi mompatuduki komiu mpo ana-anaku anu nipotoveku. ¹⁵ Apa nau nonjobu-njobu guru nompatuduki komiu mangoseaka i Kristus, ledo naria najadi tuamamiu. Aga yakumo najadi mpo tuamamiu sabana yaku anu paratama nanggeni Kareba Belo ka komiu bara ipia. ¹⁶ Yaku nompotove komiu mpo anaku mboto. Jadi haitu sampe yaku mpuu-mpuu merapi nte komiu, pasialamo pokaingguku. ¹⁷ Kutudu i Timotius tou nte komiu *mombatulungi komiu mompasiala pokaingguku*. Ia topomparasaya i Pue, bo ia mpo anaku mboto anu nipotoveku, bo ia namala raparasaya. Ia mompopatora ka komiu pokaingguku nangoseaka i Yesus Kristus, nasimbayu mpo nipatudukiku ka pura-pura topomparasaya i Yesus ri umba-umba ngata.

¹⁸ Naria bara sako-ndua komiu nalanga rara, sabana niulimiu yaku domo tou nte komiu. ¹⁹ Tapi ane rapodota nTupu, masalisa yaku tou nte komiu. Bo ane makava yaku, kupeinta mboto nuapa rapovia ntona nalanga rarana haitu. Kupeinta ira bara mpuu-mpuu nakuasa atau aga notesa nggoo. ²⁰ Apa ane tona naja-di todea riaru Poparenta nu Alatala, kuasa nu Alatala rakita riaru nggatuvuna, ledo aga tesa-tesa nggoo. ²¹ Jadi ane yaku tou nte komiu ri situ, umbana rapokononmiu? Paraluu yaku makava mompokarau komiu apa pokainggumiu dopa nabali? Atau yaku makava ante lusu rara bo asi mata apa nibalikimiumo pokainggumiu?

Pehuku ka tona nompogau berei ntuamana mboto

5 Niepeku lлена naria saito komiu nokainggu nabuga ntoto. Ia nompogau berei ntuamana mboto. Iyapa tona ledo nompomparasaya Alatala, ledo nokainggu nadaa ivehaitu! ² Kakanana masipato mabuku raramiu bo maeya matamiu, bo masipato komiu mompopalai topogau haitu lako ri tatangamiu, domo radekei ia masiromu nte komiu mombasomba Alatala. Tapi ledo ivesia komiu. Komiu da nalanga raramiu, nau pokainggu roamiu ivesia! ³⁻⁴ Sii-sii yaku nakavao nte komiu, tapi pekiriku naria ri situ nte komiu. Nau karoku ledo ria ri situ nte komiu, yaku da nakuasa moparenta komiu. Jadi, ante kuasa nidekei nTuputa i Yesus ka yaku suroNa, nipakatantukumomo pehuku anu masipato rapambela ka tona nokainggu nadaa ivehaitu. Jadi komiu kana masiromu mosang-gani-nggani, bo pekiriku maria ri situ nte komiu. Ante kuasa nidekei nTuputa i Yesus ka kita, ⁵ kutudu komiu mombadekei tona haitu riaru kuasa Magau nu Seta.

Povia ivesia ala karonu rahuku † bo kaupuna nyawana rapakasalama tempo i Yesus makava mpanjili ri dunia.

⁶ Ledo masipato malanga raramiu bo mangoe ka pokainggu ivehaitu. Ledo nisanimiu tona nokainggu nadaa namala manggeni tona ntanina movia nadaa? Tona nokainggu nadaa nasimbayu mpo raga sakide anu namala mompopenggamba pura-pura gando. ⁷ Jadi tedeakamo raga njaena, *haitumo suvurakamo tona nokainggu nadaa*, ala komiu majadi todea magasa nasimbayu mpo gando nabaru dopa nambela raga. Bo komiu nagasa mami, apa i Kristus nipatesi mombasompo dosata nasimbayu mpo ana bimba nipatesi ri Posusa Paskah ntoYahudi. ^{††} Sabana haitu, kita muni mosusa madamba. Kita kana mombatedaka raga njae bo mangande roti ledo noragi. Batuana, kita kana menonto mokainggu nadosa bo matuvu ante pokainggu nabelo bo nanao.

⁹ Riaru suraku bara ipia nitulisiku nemo mosimporoa nte tona nokainggu nabuga. ¹⁰⁻¹¹ Anu nipatujuku, nemo mosimporoa ante tona nangaku nompomparasaya i Yesus, tano mai pokaingguna nabuga, nadoko, nompakande tupu-tupu ntanina, nanjalai tona ntanina, topanginu, atau topangangga. Nemo mosimporoa ante tona ivehaitu. Nau aga mangande mosang-gani-nggani nemo! Patujuku ledo mombatagi komiu mosimporoa ante tona anu ledo nosisani ante Alatala bo nokainggu nabuga, anu ledo ria kabasa-basana manggava untu ka karonu mboto, topebagiu, bo topompakande tupu-tupu ntanina. Ledo ira nipatujuku. Apa ane komiu ledo moroa nte tona nadosa ri dunia, natantu komiu kana molinja lako ri dunia hitu!

¹²⁻¹³ Ledo urusaku mombatangara tona ledo topomparasaya. Alatala mombatangara ira. Tapi kita kana mombatangara todea topomparasaya. Jadi evamo nitulisi riaru Buku Gasa, "Popalaimo tona nadaa lako ri tatangamiu!" ‡

Ledo masipato topomparasaya mompangadu sampesuvuna sampomparasaya ri ngayo ntopotangara anu ledo nompomparasaya

6 Berimba sampe sanu komiu nabia nompangadu sampesuvumiu sampomparasaya ri ngayo ntopotangara anu ledo nompomparasaya i Yesus? Ane naria posinggarau, nakuya ledo nikenimiu parakaramiu ratangara ntodea nu Alatala? ² Ledo nisanimiu kita todea nu Alatala mombatangara pura-pura tona ri dunia bara maipia? Jadi ane pura-pura tona ri dunia ratangaramiu, natantu rapakulemiumo mombatan-

† ala karonu rahuku ala karonu rahuku sampe ia menonto nangoseaka dota rarana nadaa. †† Ri Posusa Paskah, toYahudi nantedeaka pura-pura raga lako ri banuara, pade nangande roti anu ledo nipovia ante raga. Nisambalera muni sanga bimba bo nikandera mantora tempo Alatala nombakabasaka ira lako ri pehuku anu nipambela ka toMesir nggaulu. Peinta Pesuvu 12. ‡ Ulangan 13:5, 17:7

gara parakara-parakara nangaa ri tatangamiu mboto!
³ Ledo nisanimiu kita topomparasaya mombatangara malaeka-malaeka nTupu bara maipia? Jadi ane rapakulemiu mombatangara malaeka, natantu rapakulemiu mompakaupu parakara biasa ri katuvumi eo-eo. ⁴ Jadi ane maria parakara ivehaitu, rapokuya rakenimiu ratangara ntona anu ledo masipato mangurusi todea topomparasaya? ⁵ Niuliku ivesia ala maeya matamiu. Kakanana suga mariamo nte saito komiu nanoto anu nompakule mombatangara parakaramiu simbo topomparasaya. ⁶ Tapi ledo ivesia nipoviamiu. Komiu aga nosipangadu ntali sampesuvu sampomparasaya bo nanggeni parakara haitu ratangara ntona ledo topomparasaya i Yesus!

⁷ Parakara-parakara haitu, nemopa posipangadu, tandana komiu ledo nokainggu mpo topangoseaka i Yesus. Ane maria tona mombabagiu komiu atau mompakarugi komiu, dekeikamo! Aginapa komiu rabagiu atau rapakarugi ntona pade mompangadu sampesuvumi sampomparasaya! ⁸ Tapi ledo ivesia nipoviamiu! Komiu mbotomo nombabagiu bo mompakarugi tona bo nipoviamiu muni ka sampesuvumi sampomparasaya!

⁹ Jadi, ledo nisanimiu tona ledo nangoseaka dota nu Alatala ledo ntoto manggava bagia riaru Poparenta nu Alatala? Nee sampe komiu rabagiu! Tona nokainggu nabuga, tona nompakande tupu-tupu ntanina, tona nobualo, bo tona nompogau simbo langgai atau simbo mombine, ira pura-pura ledo ntoto manggava bagia riaru Poparenta nu Alatala. ¹⁰ Ivesia muni ante topangangga, tona ledo ria kabasa-basana manggava untu ka karona mboto, tona nanginu sampe nalangu, tona nanjalai-lai roa, bo topeago. Ira muni ledo ntoto manggava bagia riaru Poparenta nu Alatala. ¹¹ Bara ipia bara sako-ndua komiu nokainggu ivesia muni. Tapi katuvumi nipakagasa nu Alatala. Komiu najadi todeaNa nipatani ka Ia, bo komiu nipakanoa ri panggitana. Haitu pura-pura najadi ante kuasa Nosa Gasa nu Alatala sabana komiu nomparasaya i Pue Yesus Kristus.

Kita masipato matuvu ante pokainggu nabelo ala Alatala rabila

¹² Sanu komiu nanguli kita mamala movia nuapa-nuapa nipodotata. Tapi panguliku ledo pura-pura pokainggu nanggeni belo ka kita. Nakana kita mamala movia nuapa-nuapa nipodotata, tapi ledo kupalamba karoku rakuasai nuapa-nuapa. ¹³ Sanu muni nanguli kande nipasadia rakande, bo tailiko nipovia rapangisi kande. Bo kande bo tailiko rapakaropu nu Alatala pura bara maipia. *Jadi, nisarumakamiu ledo makuya nuapa-nuapa rapoviata ante karota. Kakanana ledo ivesia.* Karota ledo nipovia mompogau tona ledo berei-

ta mboto. Tapi karota nipovia ala rapaketa movia dota i Pue. Iamo Tupu nu karota. ¹⁴ *Bo karota ledo ratedaku nu Alatala.* Ante kuasaNa mboto Alatala nompakatuvu mpanjili i Pue Yesus lako ri kamateNa, bo ivesia muni kita rapakatuvuNa mpanjili lako ri kamateta.

¹⁵ Ledo nisanimiu karota nasimbayu ante sipa nu karo i Kristus? Jadi ledo ntoto masipato kita mompake karota, anu nasimbayu ante sipa nu karo i Kristus, bo mompogau bajinga. ¹⁶ Ledo nisanimiu tona nompogau bajinga najadi saito ante ia? Nisanita apa nitulisi riaru Buku Gasa ivei:

"Ane tona moberei, ira randua majadi saito."

Kajadia 2:24

¹⁷ Tapi isema-sema nomparasaya i Pue Yesus, najadi nosangu rara nte Ia.

¹⁸ Nemo mpou rapogaumi tona ledo bereimiu mboto! Apa dosa haitu ledo ria kasimbayuna. Isema-sema nompogau tona ledo bereina mboto, mpoumpou nompakagero posangu rarana ante i Pue. ¹⁹ Ledo nisanimiu karomi nasimbayu mpo banua petupu anu niponturo Nosa Gasa nu Alatala? Ia natetida riaru ntaimiu. Alatala mboto nombadekei Nosa Gasa ka komiu. Iamo Tupu nu karomi, ledo komiu mboto tupuna. ²⁰ Komiu nitulosi nu Alatala bo nibayariNa pakaupumo. Haitumo sabana komiu masipato matuvu ante pokainggu nabelo ala Alatala rabila.

Pepatuduki i Paulus ka topoberei

7 Hitupa yaku madota mesanaka pompekutanamiu anu nitulisimiu riaru sura. Ane langgai ledo moberei, nabelo. ² Tapi nabelopa ane langgai simbo maria bereina mboto, bo mombine simbo maria bereina mboto ala ledo rapesori mogau sala. ³ Berei langgai kana mangoseaka dota bereina mombine mosampaturu, bo ivesia muni berei mombine. ⁴ Sabana ledo aga berei mombine nakuasa mompakatantu nuapa rapovia ri karona mboto, tapi bereina langgai muni. Bo ivesia muni ledo aga berei langgai nakuasa mompakatantu nuapa rapovia ri karona mboto, tapi bereina mombine muni. ⁵ Nee mogaa mosampaturu ane ledo ria posimpoiomi njamboko. Ane rapana komiu mangelo loga mosambaya, ledo makuya komiu mogaa mosampaturu bara sakuya kasaena ane raposimpoiomi njamboko. Tapi ane maupumo tempo nipakatantu haitu, komiu kana manjili mosampaturu ala nee komiu rapesori Magau nu Seta mogau sala sabana komiu ledo mamala mantaamaka dota raramiu. ⁶ Tesaku hitu ledo parenta, tapi ane tona njamboko nosimpoiyo ledo mosampaturu bara sakuya kasaena, namala, ledo nakuya. ⁷ Kakanana nipokonokupa ane pura-pura tona maloa mpo yaku. Tapi pura-pura tona

† *nompakagero posangu rarana nte i Pue: basa Yunani: novia dosa ka karona mboto.*

nidekeika pompakulena mboto lako nte Alatala. Naria tona nompakule matuvu maloa sampe mamate, tapi naria ntanina ledο nidekeika pompakule haitu.

⁸ Kapolana, ane tona dopa noberei † bo timbala-timbala, nabelopa ane ira matuvu maloa masimbayu mpo yaku. ⁹ Tapi ane ledο rapakulera mantaamaka dotara, agina moberei. Apa nabelopa moberei pade mandasa mantamaaka dota moberei.

¹⁰ Ivei parentaku ka komiu topoberei. Papatuduki hitu ledο lako nte yaku mboto, tapi tesa i Pue Yesus. Berei mombine ledο mamala mogaa ante bereina langgai. ¹¹ Tapi ane rapana ia mogaa, domo mamala ia moberei. Ia kana maroo matuvu maloa atau manjili mpanjili nte bereina langgai. Bo berei langgai ledο mamala mogaa nte bereina mombine.

¹² Bo iveimo papatudukiku ka tona ntanina *haitumo*, *tona noberei nte tona ledο topomparasaya i Kristus*. Papatuduki hitu lako nte yaku mboto, ledο ria parenta niuli i Pue Yesus bara ipia ri dunia. Ane naria langgai topomparasaya bo bereina mombine ledο nomparasaya i Kristus, tapi mombine haitu madota maroo matuvu mosanggani-nggani nte ia, langgai haitu ledο mamala mogaa nte bereina. ¹³ Bo ane naria mombine topomparasaya bo bereina langgai ledο nomparasaya i Kristus, tapi langgai haitu madota maroo matuvu mosanggani-nggani ante ia, mombine haitu ledο mamala mogaa ante bereina haitu. ¹⁴ Apa ana-anara nireke bagia nu Alatala sabana saito totuara nomparasaya i Kristus. Bereina anu ledο nomparasaya i Kristus nireke bagia nu Alatala sabana bereina topomparasaya. Ane ledο ivesia, ana-anara masimbayu mpo ana-ana ntona ledο nomparasaya.

¹⁵ Tapi ane berei langgai atau berei mombine anu ledο nomparasaya i Kristus madota mogaa ante bereina topomparasaya, nee ratagi ira mogaa. Ane ivesia, berei langgai atau mombine topomparasaya domo nipou ada poberei, apa Alatala madota ala komiu matuvu mosinggabelo. ¹⁶ Tapi dopa nisanimiu anu majadi. Bara berei mombine topomparasaya mamala manggeni bereina langgai momparasaya i Kristus bo rapakasalama. Bara berei langgai topomparasaya mamala manggeni bereina mombine momparasaya bo rapakasalama.

Kita kana matuvu batena mpo tempo kita nipokio nu Alatala majadi topomparasaya i Kristus

¹⁷ Pura-pura tona kana matuvu nangoseaka pantuu i Pue Yesus ka ia. Pura-pura kana matuvu batena mpo tempo ia nipokio nu Alatala momparasaya i Kristus. Haitumo atura nipatudukiku ka pura-pura topomparasaya. ¹⁸ Jonjona, ane toYahudi anu nisuna tempo ia nipokio nu Alatala majadi topomparasaya i Kristus,

† *tona dopa noberei: tobalu.*

nee ia mompasimbuku mompakalipo tanda posuna haitu. Ivesia muni ane tona dopa nisuna tempo ia nipokio nu Alatala majadi topomparasaya i Kristus, nee ia merapi rasuna. ¹⁹ Apa ledο ria gunana ane kita mangoseaka ada posuna bo ledο muni naria gunana ane kita ledο mangoseaka ada haitu. Anu noguna nto-to, haitumo, mangoseaka parenta-parenta nu Alatala.

²⁰ Pura-pura tona kana matuvu batena mpo tempo ia nipokio nu Alatala majadi topomparasaya i Kristus.

²¹ Ane komiu najadi batua tempo komiu nipokio nu Alatala, nee masusa raramiu mompekirika haitu, ledο nakuya komiu najadi batua. Tapi ane rakavamiu loga makabasaka lako ri pepobatua, aginamo komiu makabasaka. ²² Toramo! Tona anu najadi batua tempo ia nipokio majadi topomparasaya i Yesus, naupa ia batua tapi nikabasaka i Pue Yesusmo ia lako ri dosana. Bo tona ledο nipobatua tempo ia nipokio nu Alatala, ia najadi mpo batua sabana ia nekou nte i Kristus.

²³ Toramo! Komiu nitolosi nu Alatala bo nibayariNa pakaupu. Sabana haitu, nee sampe komiu majadi batua nu manusia. ²⁴ Jadi sampesuvu-sampesuvu, nau bara berimba pantuu ka komiu tempo komiu nipokio majadi topomparasaya i Kristus, komiu kana batena matuvu mosanggani-nggani ante Alatala riara nggatu-vu nituu ka komiu.

Papatuduki ka tona dopa noberei bo timbala-timbala

²⁵ Ane pompekutanamiu ka tona dopa noberei, †† ledο ria parenta lako nte i Pue Yesus. Tapi kutesa ka komiu panggavaku mboto. Bo tesaku hitu masipato raparasayamiu sabana pompakule nidekei nTupu ka yaku lako ri pompotoveNa. ²⁶ Jadi ivei panggavaku: nantora mpengaya-ngaya pepandasa nirasai ntopomparasaya sii-sii, nabelopa ane katuvumiu ledο rabalikimiu. ²⁷ Rapana, ane komiu nobereimo, nemo raelomiu dala mogaa ante bereimiu. Ane komiu dopa noberei, domo mangelo poberei. ²⁸ Tapi ane rapana komiu moberei, haitu ledο madosa. Bo ane randaa moberei ledο rapodosana. Tapi toramo, topoberei tantu mantingayo mpengaya-ngaya kasusa riara nggatu-vura. Bo anu kupodota ala komiu ledο rapambela kasusa haitu.

²⁹ Sampesuvu-sampesuvuku, patujuku ivei: kita topomparasaya kana mantora tempota domo masae. Jadi nompamula sii-sii tona nobereimo nee aga mompekirika bereina. ³⁰ Bo tona notumangi ante susa rara, nee aga mompekirika kasusa rarana. Tona nadamba nemo aga mompekirika kadamba nu rarana. Tona nopagoli nemo aga mompekirika balu-baluna. ³¹ Bo tona mompasimbuku mbara-mbara dunia hitu nemo aga mompekirika mbara-mbarana. Apa dunia nisanita sii-sii, domo masae malipo.

†† *Tona dopa noberei: randaa-randaa.*

³² Anu nipodotaku ala komiu matuvu ledo masesa rara. Tona dopa noberei namala mompakasangu pekirina ka pokarajaa i Pue. Nipekirikana berimba ia mamala mompakadamba rara i Pue. ³³ Tapi tona nobereimo kana mompekirika mpengaya-ngaya ri dunia hitu. Ia kana mompekirika berimba ia mompakadamba rara bereina mombine ³⁴ sampe pekirina matebagi-bagi. Mombine-mombine domo noberei bo randaa-randaa namala mompakasangu pekirira ka i Pue. Nipekirikara berimba katuvura bo pekiri rara ntaira mamala magasa ri panggita nu Alatala. Tapi mombine-mombine nobereimo kana mompekirika mpengaya-ngaya ri dunia hitu. Kana rapekirikara berimba mompakadamba rara bereina langgai. ³⁵ Yaku notesa ivesia ka komiu ala mantulungi komiu, ledo ala mompandasa komiu ante mpengaya-ngaya atura. Tapi patujuku ala komiu movia anu nakana bo masipato ri panggita nu Alatala, bo ala komiu maroo mangoseaka i Pue ante pekiri ledo matebagi-bagi.

³⁶ Ane maria langgai nompekirika pokaingguna domo masipato nte tengeana, bo tengeana haitu nantambaimo umuruna † sampe nirasaina ira kana moberei, agina ia movia anu nipodotana haitu. Agina ira moberei, haitu ledo rapodosana. ³⁷ Tapi ane maria langgai nompekiri nabelopa ia ledo mompoberei tengeana, bo ane katantuna haitu nipoviana mboto bo ledo nipasuu ntona, bo ane ia mamala mombakuasai dotana, nabelopa ia ledo moberei. ³⁸ Jadi langgai anu mompoberei tengeana novia anu nabelo, tapi langgai ledo mompobereina novia anu nelabipa kabelona.

³⁹ Mombine anu nobereimo nikingisi nu ada poberei ane bereina langgai da natuvu. Tapi ane bereina langgai namatemo ia mamala rapoberei nu langgai ntanina anu nipokonona. Tapi ia kana moberei ante langgai anu nomparasaya i Pue Yesus. ⁴⁰ Nangoseaka pangavaku, masanapa ia ane ledo moberei mpanjili. Nau pangavaku mboto, niparasayaku Nosa Gasa nangge-niaka yaku.

Pepatuduki ka kandeana nipakande ka tupu-tupu ntanina

8 Kapolana, nipekutanamiau kandeana nipakande ka tupu-tupu ntanina. Nakana mami niulimiu kita pura-pura napande. *Nisanita ledo ria tupu ntanina aga Alatala.* Tapi kuuli ka komiu, kapande nompakalanga rarata. Aginapa mompotove roa sabana pepotove nompakaroso rara ntona. ² Isema-sema nompekiri nadeamo nisanina, kakanana dopa nisanina mpuu anu masipato rasanina. ³ Tapi isema-sema mpuu-mpuu mompotove Alatala, ia niposisani nu Alatala.

† *tengeana haitu nantambaimo umuruna ATAU: ia domo nompakule nantaamaka dota nu rarana moberei.*

⁴ Jadi ane motesa kandeana nipakande ka tupu-tupu ntanina, nisanitamo pinoito nogambara anu ledo nakana. Bo nisanita muni Alatala aga saito, ledo ria ntanina. ⁵ Naria mamimo mpengaya-ngaya anu nisomba nu manusia, anu niuli tupu bo karampua nau ri langi nau ri tana. ⁶ Tapi ane kita topomparasaya, nisanita aga saito Alatala nakana. Iamo Tuamata anu nompajadi pura-pura anu naria ri dunia. Iamo nombadekei katuvu ka kita ala kita mombasomba Ia. Bo aga saito Tuputa, i Yesus Kristus anu nipopale nu Alatala nompajadi pura-pura anu naria, bo lako nte Ia sampe natuvu kita.

⁷ Tapi naupa ivesia, ledo pura-pura topomparasaya nangisani anu haitu. Dopame ira nomparasaya i Kristus, sanu topomparasaya nabiasa nompakande tupu-tupu ntanina. Jadi sampe sii-sii ane rakandera kandeana nipakande ka tupu-tupu ntanina, kandeana haitu nirekera mpuu-mpuu kandeana nu tupu-tupu haitu. Ane mangande kandeana haitu, nirasaira nadosa, apa dopa naroso pomparasayara. ⁸ Kandeana ledo ntoto mantambai posinggabelota nte Alatala bo ledo muni mogaaraka kita lako nte Alatala. Ane rakandeta, ledo mauntu kita. Bo ane ledo rakandeta, ledo muni marugi.

⁹ Tapi sampesuvu-sampesuvu, pakabelo-belo! Nau nisanimiu ledo makuya mangande kandeana haitu, nee sampe tona anu dopa naroso pomparasayana rapakenimiu mangande kandeana haitu, sampe ia manavu riaradosa. ¹⁰ Patujuku ivei: Nisanimiu ledo nakuya mangande kandeana haitu. Tapi rapana, komiu hau mangande ri banua pesomba ka viata, bo rakita ntona anu dopa naroso pomparasayana. Natantumo ia muni mabia mangande kandeana nipesomba ka viata atau tupu-tupu ntanina haitu. ¹¹ Kaupuna, anu nisanimiu haitu nompakagero pomparasayana *apa nituntunina komiu novia anu nirasaina nadosa.* Tano mai ia sampesuvumiu sampomparasaya anu nitolo ante raa i Kristus. ¹² Pokainggumiu ante sampesuvumiu haitu nasala sabana pokainggumiu nanggeni ia novia anu nirasaina nadosa sabana pomparasayana dopa naroso. Bo pokainggumiu haitu nadosa ri panggita i Kristus. ¹³ Jadi, sampesuvu-sampesuvu, ane kandeana anu nikandeku nompakagero pomparasaya nu sampesuvuku, domo kukande kandeana haitu ala nee yaku nompakagero pomparasayana.

I Paulus nanjaliku karonu mboto: ia mpuu-mpuu suro i Yesus

9 Yaku hii nakuasa novia nuapa-nuapa nipodotaku. Yaku hii suro i Yesus. Yaku mboto nanggita Tuputa i Yesus. Bo komiu mbotomo asele pokarajaa nipoviku ka i Pue. ² Nau ri panggita ntona ntanina yaku ledo nireke suro i Pue Yesus, natantu kana rarekemiumo

yaku suroNa mami! Pomparasayamiu i Pue Yesusmo nompakalanto yaku hii mpuu-mpuu suroNa.

³ Ane maria tona mompakasala yaku sabana pokaingguku mpo suro i Pue, ivei pesanaku: ⁴ Kami suro i Yesus natantumo masipato mantarima kandea bo panginu lako nte todea topomparasaya. ⁵ Natantumo kami muni masipato moberei nte topomparasaya bo manggeni berei kami mosanggani-nggani riara polipa kami, nasimbayu mpo anu nipovia nu suro-suro ntanina bo sampesuvu-sampesuvu i Pue Yesus mboto bo i Petrus. ⁶ Atau nisarumakamiu aga yaku bo i Barnabas kana mokarajaa ante pale kami mboto mompaelo? Ledo masipato kami muni ratande ntodea topomparasaya?

⁷ Natantu ledo ria saitoa tantara nombatanggu katuvuna mboto tempo posieva. Katuvuna kana ratanggu pakenina. Topokarajaa talua anggur masipato mangande asele ntaluana. Bo topoevu tovau atau bimba masipato manginu susu lako ri binatangana. ⁸ Porapa haitu lako ri katuvuta eo-eo. Tapi naria muni pepaduduki nasimbayu riara Atura-atura agama Yahudi. ⁹ Riara Buku Atura Agama nitulisi Nabi Musa, nitulisi ivei: "Nee mombaramu sumba nu japi tempo mantulungi tupuna moini pae. Palambakamo rakan-dena sakide pae!" [†] Jadi berimba nitaseremi, aga japi nipariara nu Alatala? ¹⁰ Natantu kitamo nipatujuNa ante tesa haitu! Tesa haitu nitulisi rarapaka katuvuta manusia. Topopajeko bo topomporo kana mokarajaa ante manjarumaka mantarima sabagia lako ri asele ntana nikarajaara haitu. ¹¹ Kami suro-suro i Yesus nombasavu Tesa nu Alatala riara ntaimiu. Jadi, ledo masipato kami manjarumaka petanggumiu sakide? ¹² Iyapa guru-guru ntanina masipato manjarumaka petanggumiu, nemopa kami!

Tapi kami ledo sanggania nerapi petulungi haitu. Kami aga nombatidamaka riara mpengaya-ngaya kasusa ala ledo mompakantamo tona mombatanggu katuvua kami sampe mombalava ira mantarima Kareba Belo i Kristus. ¹³ Natantu nisanimumo topokarajaa ri Banua nu Alatala nanggava kandeara lako ri pesomba nipesomba ka Tupu ri Banua nu Alatala haitu. Bo tona nombatulungi todea nanggeni pesombara ri lanta pesomba nanggava sabagia lako ri anu nipesomba haitu. ¹⁴ Ivesia muni i Pue Yesus nompakatantu ala topanggeni Kareba Belo matuvu lako ri petulungi ntona anu nantarima Kareba Belo haitu.

¹⁵ Tapi nau naria nturoku merapi ivesia, ledo sanggania niperapiku ratanggumiu. Bo ledo muni nitulisiku sura hitu ala komiu mompamula mombatanggu katuvuku! Nadamba raraku sabana dopa niperapiku nte komiu bo aginapa yaku mamate pade kadambaku haitu rapakalipo ntona! ¹⁶ Apa ane yaku mompatolele

Kareba Belo, ledo masipato yaku mangoe bo mompakalanga rara, sabana yaku nisuro nu Alatala mompatolele. Mandasa yaku ane ledo kupatolele Kareba Belo! ¹⁷ Ane rapana dotaku mboto mompatolele Kareba haitu, tantu masipato yaku manggava tambo. Tapi ledo ivesia yaku. Yaku mompatolele Kareba Belo, ledo lako ri dotaku mboto. Bara kupodota bara ledo, kana kupatolele Kareba Belo apa haitumo pokarajaa niparasaya nu Alatala ka yaku. ¹⁸ Jadi nuapa tamboku? Nadamba raraku mompatolele Kareba Belo ledo nerapi gaji bo ledo muni nerapi petulungi anu masipato kutarima lako ri pokarajaaku nompatolele Kareba Belo. Kadambaku haitumo nirekeku tamboku.

¹⁹ Yaku hii ledo batua ntona, namala natuvu nangoseaka dotaku mboto. Tapi nitunggaiku natuvu mpo batua ka pura-pura tona. Nipoviaku ivesia ala madea mpuu tona kukeni mompapasaya i Yesus. ²⁰ Jonjona, ane yaku nosanggani-nggani nte toYahudi, yaku nokaingguku mpo toYahudi. Ane yaku nosanggani-nggani nte tona anu nangoseaka Atura-atura agama Yahudi, yaku nangoseaka Atura-atura haitu naupa yaku mboto domo nipou nu Atura-atura haitu. Patujuku ala mamala kukeni ira mompapasaya i Yesus.

²¹ Ivesia muni ane yaku nosanggani-nggani nte tona ledo nisanina Atura-atura agama Yahudi, yaku nokaingguku mpo tona ledo nangisani Atura-atura haitu. Patujuku ala mamala kukeni ira mompapasaya i Yesus. Tapi nee rauli yaku ledo nangoseaka parenta-parenta nu Alatala, apa yaku hii mpuu-mpuu nangoseaka parenta-parenta i Kristus! ²² Ane yaku nosanggani-nggani nte tona ledo naroso pomparasayana, yaku najadi nasimbayu mpo ira ala yaku mamala mantulungi mompakaroso pomparasayara. Yaku nangoseaka mpengaya-ngaya pokaingguku bo kabiasa ntona ala yaku mamala manggeni sanu ira mompapasaya.

²³ Haitu pura-pura nipoviaku ala madea mpuu tona mompapasaya Kareba Belo bo ala yaku mboto manggava belo nijanji ri Kareba Belo haitu.

²⁴ Natantu nisanimumo ri posilumba, pura-pura topangova mangova, tapi aga saito nanggava hadia padagi. Jadi komiu muni kana mokaingguku mpo topangova: pasimbukumo ante mpuu-mpuu rara ala rakavamiu hadia. ²⁵ Tona nantuntuni posilumba kana meguru mombakuasai karona mboto riara mpengaya-ngaya. Rapoviana ivesia ala manggava hadia padagi anu ledo mainti, haitumo sangaya talidangga bunga anu aga sampalai malelemo. Tapi kita hitu neguru mombakuasai karota ala rakavata hadia mainti sampe ri kasae-saena. ²⁶ Jadi haitumo sabana yaku ledo nangova sambara. Yaku ledo nojaguru mpo tona aga nombajaguru luona. ²⁷ Tapi yaku neguru mombakuasai karoku mboto ala ledo mangoseaka dota raraku nadaa, mbelaka maupu kupatolele Kareba Belo ka tona ntanina, yaku mboto ledo manggava hadia.

† Ulangan 25:4

Pepatora lako ri katuvu ntoIsrael nggaulu

10 Sampesuvu-sampesuvuku, toramo anu najadi ante totuata nggaulu tempo ira nangoseaka Nabi Musa. Ira pura-pura nilenduti nu tinja kulimu tandana Alatala nosangani-nggani nte ira, bo pura-pura ira nasalama nombavote Tasi Lei. ¹² Ira pura-pura nilenduti nu kulimu bo noliu rantasi, nangoseaka i Musa. ¹¹ Ivesia muni kita nidiu tandana kita topan-goseaka i Yesus. ³⁴ Ira pura-pura nangande kandeana nasimbayu, anu nidekei nu Alatala ante kuasaNa. Bo ira pura-pura nanginu uve nasimbayu, anu nipopoili nu Alatala lako ri vatu. Bo vatu haitu nirapaka i Kristus mboto anu naria nosangani-nggani nte ira. ⁴⁵ Tapi naupa nadea belo nidekei nTupu ka ira, nadea ira ledo nipodamba nu Alatala sampe ira nipakamate nggalako dala ri karava bai.

⁶ Haitu pura-pura najadi jonjo mompopatora ka kita ala kita nee maino ka anu nadaa mpo anu nipovia nto-tuata haitu. ⁷ Jadi nee kita metupu nte tupu-tupu ntanina mpo anu nipovia roara ntanina. Riara Buku Gasa naria nitulisi pokainggura *tempo nombasomba japi bulava* haitu ivei:

“Todea haitu nonturo nangande nompebasa, nanginu, nosusa-susa sampe nadea poviara ledo masipato.”

Pesuvu 32:6

⁸ Nee kita mosimpogau ante tona ledo bereita mboto mpo anu nipovia roara ntanina. Toramo! Riara saeo, ropulu bo talu-njobu ira namate singgani-nggani ¹¹ sabana poviara haitu. ⁹ Nee kita mangopa rau nTupu mpo anu nipovia roara ntanina sampe ira namate niteo nu ule! ¹⁰ Bo nee kita mongau mpo pongau roara ntanina. Topongau haitu nipatesi nu malaeka kamatea. ¹¹

¹¹ Haitu pura-pura najadi nte ira ala mompopatora ka tona ntanina. Bo kajadia-kajadia haitu nitulisi riara Buku Gasa ala majadi pepatora ka kita anu natuvu siisii ri tempo napara kaupnu dunia. ¹² Jadi isema-sema nompekiri narosomo pomparasayana bo ledo mamal rapesori, pakabelo-belo! Nee sampe ia muni manavu riara dosa! ¹³ Pura-pura pesori anu nambela komiu nasimbayu ante pesori-pesori anu nipambela ka pura-pura manusia. Tapi Alatala namala raparasaya mantulungi komiu. Ledo rapalambaNa komiu rapesori ante pesori anu melabi lako ri pompakulemiu. Tempo komiu rapesori, Ia mompopaisani dala ka komiu ala komiu maroso bo maroo raramiu mombatidamaka riara pesori haitu.

† *Peinta Pesuvu 14:19-22. Tasi Lei nasimbayu nte Tasi Siroyo.*
 †† *nilenduti nu kulimu bo noliu rantasi. Basa Yunani: ira nidiu riara kulimu bo tasi, tandana ira topangoseaka i Musa.* ‡ *Pesuvu 16:4, 35; 17:5-6, Bilangan 20:7-11* †† *Bilangan 25:1-9* †† *Bilangan 21:4-7; Mazmur 78:18* ††† *Bilangan 14:1-38; 16:41*

Ledo ntoto masipato topomparasaya mangande ri posusa mombabila tupu-tupu ntanina

¹⁴ Jadi sampesuvu-sampesuvu nipotoveku, haitumo sabana kuuli ka komiu, nee mpuu metupu nte tupu-tupu ntanina. ¹⁵ Komiu tona napande, jadi coba taseremi mboto tesaku hitu bara nakana bara ledo. ¹⁶ Tempo kita nanginu uve anggur nantora raa i Kristus natiti ri kayu salib, niulita tarima kasi ka Alatala bo nanginu sanggani-nggani. Haitu tandana kita todea i Kristus anu nitolosiNa ante raaNa. Bo tempo kita notubi-tubi roti bo nangande nosangani-nggani nantora kamate i Kristus, haitu tandana kita bagia nu karo i Kristus. ¹⁷ Nau kita nadea, kita pura-pura najadi sanga karo sabana roti sanga haitu nikandeta nosangani-nggani.

¹⁸ Pekiri munimo kabiasa ntoYahudi. Ira nasiromu nangande sabagia kandeana nipesomba ka Alatala ri lanta pesomba. Isema-sema nangande kandeana haitu, nireke ia muni nombasomba Alatala nosangani-nggani nte topesomba. *Ane ivesia, tantu isema-sema nangande kandeana nipesomba ka tupu ntanina, nireke ia muni nombasomba tupu ntanina haitu.* ¹⁹ Jadi nuapa patuju ntesaku hitu? Panguliku nakana tupu-tupu ntanina haitu? Naria gunana kandeana nipakandeka tupu-tupu ntanina? Natantu ledo! ²⁰ Tapi patujuku ivei: Kandeana nipakande ntona ka tupu-tupu ntanina kakanana nipakande ka seta-seta, ledo nipakande ka Alatala. Bo patujuku ala komiu ledo mosangani-nggani mantuntuni tona nombasomba seta-seta. ²¹ Ledo ntoto masipato komiu manginu uve anggur mantora kamate i Pue Yesus bo rainumiu muni panginu ri posusa mombabila seta-seta. Ledo ntoto masipato komiu monturo mangande roti mantora kamate i Pue Yesus, bo rakandemiu muni kandeana ri posusa pombabila seta-seta. ²² Kita aga mombaopa rau rara nTupu ane ratuntunita toposomba seta-seta! Atau nisaramakamiu kita nakuasapa pade Tupu?

Nee aga mompekirika kabelo karomiu mboto, tapi pekirika muni kabelo ntona ntanina

²³ Yaku namala novia nuapa-nuapa nipodotaku, tapi ledo pura-pura nanggeni belo ka yaku. Yaku namala novia nuapa-nuapa nipodotaku, tapi ledo pura-pura mompakaroso rara ntodea topomparasaya. ²⁴ Nee aga mompekirika kabelo karomiu mboto, tapi pekirika muni kabelo ntona ntanina.

²⁵ Komiu mamala mangande mpengaya-ngaya bau nipobalu ri potomu. Ledo paraluu rapekutanamiu bau haitu bara nipesomba ka tupu-tupu ntanina. Ledo paraluu monggai-nggai raramiu nompekirika bara nasala mangande bara ledo. ²⁶ Apa riara Buku Gasa nitulisi ivei:

"Njumangu dunia bo pura-pura isina anu nTupu."

Mazmur 24:1

²⁷ Ane komiu ragaga ntona ledo topomparasaya mangande ri banuana, bo komiu madota mangande ante ia, kandemo nuapa-nuapa ratibo ka komiu. Ledo paraluu rapekutana kande haitu bara nipakande ka tupu-tupu ntanina. Ledo paraluu monggai-nggai raramiu mompekirika bara nasala bara ledo. ²⁸ Tapi ane maria tona manguli ka komiu, "Kande haitu nipakande ka tupu-tupu ntanina," nee rakandemiu kande haitu ala ledo monggai rara nu roa mompekirika bara nasala bara ledo. ²⁹ Patujuku, ledo ponggai raramiu nipekiriku tapi ponggai rara nu roa.

Tapi bara maria tona manguli, "Nakuya dotaku mamala ralava ntona ntanina? ³⁰ Ane kuuli tarima kasi ka Alatala dopame kukande kande haitu, nakuya rapakasala ntona yaku?"

³¹ Jadi sampesuvu-sampesuvu, nuapa-nuapa rapoviamiu, nau mangande nau manginu, nau povia ntanina, povia puramo ala Alatala rabila bo ratoiya. ³² Nee sampe pokainggumiu manggeni tona ntanina manavu riaru dosa, nau toYahudi nau tona ledo toYahudi, nau todea topomparasaya Alatala. ³³ Yaku mboto nompasimbuku matuvu mompakadamba pura-pura rara ntona riaru mpengaya-ngaya pokaingguku. Yaku ledo aga nompekirika kabelo karoku mboto tapi yaku nompekirika kabelo ntona pura-pura, ala ira pura-pura mamala rapakasalama.

11 Jadi pasialamo pokaingguku nasimbayu mpo yaku mboto nompasiala pokainggu i Kristus.

Pokainggu mombine riaru kasiromu ntopomparasaya

² Sampesuvu-sampesuvu, yaku nantoiya komiu sabana komiu batena nantora yaku riaru mpengaya-ngaya, bo komiu naroo nangoseaka pepatuduki nipatudukiku ka komiu. ³ Tapi hitu paraluu rasanimiu: langgai pakeni nu bereina mombine, i Kristus pakeni nu langgai, bo Alatala pakeni i Kristus. ⁴ Jadi ane riaru kasiromumiu naria langgai nosambaya atau nompasimbayu tesa nitarimana lako nte Alatala bo nibonggona balenggana, ia ledo nombabila i Kristus, pakenina. ⁵ Bo ane riaru kasiromumiu naria mombine nosambaya atau nompasimbayu tesa nitarimana lako nte Alatala bo ledo nibonggona balenggana, ledo nabelo. Apa *nangoseaka kabiasata*, mombine ledo nombabonggo balenggana ledo nombabila bereina langgai pakenina. Ledo ria posisalana mombine haitu ante mombine nigau buluana tandana ledo ria eya nu matana. ⁶ Ane mombine ledo madota nombabong-

† *Tempo haitu, langgai nolelaka pobonggo balenggana tempo netupu, tandana ia nombabila bo natundu nte tupuna.* †† *Nantun-tuni kabiasa ntona tempo haitu, mombine kana nombabonggo balengga ane nesuvu. Aga mombine nasavidu ledo nombabonggo balenggana.*

go balenggana, aginamo ragausi buluana. Tapi ane maeya matana buluana ragau, agina rabonggona balenggana.

⁷ Ledo masipato langgai mombabonggo balenggana tempo nosambaya atau nompasimbayu tesa nu Alatala, sabana ia nipajadi mpo polenje nu Alatala mboto ala kaoge nu Alatala rakita. Tapi mombine nipajadi ala kaoge nu langgai rakita. ⁸ Apa ri pamulana langgai ledo nipajadi lako ri mombine, tapi mombine nipajadi lako ri langgai. ⁹ Bo ivesia muni mombine nipajadi nu Alatala ala maria roa nu langgai, ledo langgai nipajadi ala maria roa nu mombine. ¹⁰ Haitu sampe mombine masipato mombabonggo balenggana tandana ia nekou nte bereina langgai, ‡ bo muni sabana pokaingguna haitu rakita nu malaeka-malaeka nTupu.

¹¹ Tapi toramo! Riaru nggatuvuta topomparasaya i Pue Yesus, langgai bo mombine nosiparaluu. ¹² Naupa ri pamulana mombine nipajadi lako ri karo langgai, hitupa pura-pura langgai nipoanaka nu mombine. Bo pura-pura langgai bo mombine nopuna lako nte Alatala.

¹³ Pekirimiu mbotomo. Masipato mombine mosambaya ka Alatala riaru kasiromumiu ante balengga ledo nibonggo? Natantu ledo. ¹⁴ Nangoseaka kabiasa naria nte kita mboto, nisanita ane langgai nandoe buluana, haitu nepakaeya. ¹⁵ Tapi ane mombine nandoe buluana, haitu nompakagaya ia. Apa mombine nipopobulua rapotutui balenggana.

¹⁶ Ane maria tona madota mosinjanaika pepatuduki hitu, aga sangaya kuuli ka ira: Ledo ria kabiasa ntanina nioseaka kami bo pura-pura todea topomparasaya Alatala.

Pokainggu masipato tempo manginu uve anggur bo mangande roti mantora kamate i Yesus

¹⁷ Kapolana, naria bara sako-ngaya kuuli ka komiu. Tapi ledo mpuu kutoiya pokainggumiu. Sabana, ane komiu nasiromu nosangani-nggani mombasomba Alatala, kasiromumiu haitu ledo nanggeni belo ka komiu, tapi aga nanggeni daa. ¹⁸ Paratama, niepeku ane komiu nasiromu, komiu natebagi-bagi bo nosinjana. Bo tantu nakana sanu kareba haitu. ¹⁹ Komiu kana matebagi-bagi mami ala rasani isema komiu mpuu-mpuu nangoseaka i Yesus! ²⁰ Tempo komiu nasiromu mosangani-nggani, pokainggumiu ledo masipato ka tona masiromu mangande roti bo manginu uve anggur mantora kamate i Pue Yesus. ²¹ Apa ane komiu nangande, komiu aga nompago mangala kandeamiu bo panginumiu mboto bo ledo nompopea roa sampe naria tona ledo nanggava kande nuapanuapa, bo naria ntanina aga nanginu sampe nalangu.

‡ *tandana ia nekou ante bereina langgai tandana naria nturona nosambaya bo nompakasimbayu tesa nitarimana lako nte Alatala, ATAU: tandana ia nombakuasai karonu mboto.*

²² Nakuya ivesia? Ledo ria banuamiu mboto rapangan-demi bo rapanginumiu? Nakuya komiu nompan-daente kasiromu ntodea topomparasaya Alatala? Nakuya komiu nompakaeya tona ledo nompakule manggeni kande ri kasiromu haitu? Nuapa masipato kuuli ka komiu? Masipato kutoiya pokainggumiu haitu? Natantu ledo! Ledo ntoto masipato kutoiya pokainggumiu tutu!

²³ Nipatudukikumo ka komiu bara ipia batuana nangande bo nanginu nosanggani-nggani mantora kamate i Yesus. Papatuduki haitu nitarimaku lako nte i Pue Yesus mboto. Bonggi i Pue Yesus nipobalu ka baliNa, nialaNa roti, ²⁴ bo niuliNa tarima kasi ka Alatala. Naupu haitu nitubi-tubiNa roti haitu bo niuliNa, "Roti hitu karoKu Kudekei mombatolosi komiu. Kandemo roti hitu mantora Yaku." ²⁵ Bo ivesia muni naupu ira nangande, nialaNa saboda uve anggur bo niuliNa, "Panginu hitu tandana Pojanji nu Alatala nabaru rapakaasa ante raaKu. Nggani-nggani komiu manginu panginu ada hitu, inumo rapombatora Yaku." ²⁶ Apa nggani-nggani komiu mangande roti bo manginu uve anggur hitu, komiu mompatolele kareba kamate i Pue Yesus sampe Ia makava mpanjili ri dunia hitu.

²⁷ Jadi, isema-sema nangande roti atau nanginu uve anggur i Pue Yesus ante pekiri ledo masipato, ia nadosamo ri ngayo i Pue Yesus sabana nipandaentena karoNa bo raaNa. ²⁸ Jadi pura-pura tona kana raparesana ntani ruru rara ntaina mboto. Bo maupu haitu pade mamala ia mangande roti bo manginu uve anggur haitu. ²⁹ Apa tona anu mangande roti bo manginu uve anggur haitu bo ledo nipekirina posidaina ada haitu ante karo i Kristus, natantum rahuku nu Alatala, sabana ia aga nompongeika kamate i Pue Yesus. ³⁰ Haitu sampe nadeamo komiu ri situ nalente bo nadua, bo bara sako-nduamo komiu namate. ³¹ Tapi ane raparesata ntani ruru rara ntaita dopame mangande roti bo manginu uve anggur haitu, kita ledo rapambela pehuku. ³² Tapi ane rapana kita rapambela pehuku nu Alatala sii-sii, patujuNa kita rapatuduki ala nee sampe kita rapakaropu mosanggani-nggani ante tona ri dunia anu ledo natundu nte Alatala.

³³ Jadi sampesuvu-sampesuvuku, ane komiu masiromu mangande roti bo manginu uve anggur mantora kamate i Pue Yesus, komiu kana mosipopea pura bo mangande mosanggani-nggani. ³⁴ Ane maria tona naara taina, agina ia mangande ntani ruru lako ri banuana mboto. Nee sampe masiromu mosanggani-nggani bo aga rapambela pehuku nu Alatala. Bo ane yaku tou nte komiu ngena, damo kupakasiayu parakara-parakara ntanina.

† ia aga nompongeika kamate i Pue Yesus. Basa Yunani: ia aga nompongeika karo i Pue Yesus.

Pompakule nidekei nu Nosa Gasa nu Alatala

12 Kapolana, sampesuvu-sampesuvu. Kutesaki pompakule nidekei nu Nosa Gasa nu Alatala ala rasanimiu mpuu-mpuu anu nakana. ² Nisanimiu mbotomo tempo komiu dopa nomparasaya i Yesus, komiu nasaro nasalandala nikeniake ntupu-tupu ntanina anu ledo nosuara. ³ Haitu sampe kuuli ka komiu, *komiu kana mompoposisala anu nadaa bo anu nabelo*. Ane tona nikeniake Nosa Gasa nu Alatala, ledo raulina, "Nasurukavumo i Yesus." Bo ivesia muni ledo rapakule ntona mompangaku, "I Yesus, Iamo Tupu" ane tona haitu ledo nikeniake Nosa Gasa nu Alatala.

⁴ Naria mpengaya-ngaya pompakule lako nte Nosa Gasa, tapi pura-pura pompakule haitu nopuna lako ri sangu Nosa Gasa. ⁵ Naria mpengaya-ngaya pokarajaa nipoviata ka i Yesus, tapi aga saito Tupu rapokara-jaakata. ⁶ Bo naria mpengaya-ngaya cara Alatala nompopakita kuasaNa riaranggatuvuta bo aga saito Alatala nokarajaa riarangntaita pura-pura bo nombatulungi kita riarangmpengaya-ngaya.

⁷ Kita pura-pura simbo nidekeika pompakule lako ri Nosa Gasa nu Alatala ala manggeni belo ka tona ntanina. ⁸ Saito tona nidekeika nu Nosa Gasa pompakule mapande motesa. Tona ntanina nidekeika nu Nosa Gasa haitu muni pompakule mombatentei anu nipopaisani nTupu ka ia. ⁹ Tona ntanina nidekeika nu Nosa Gasa pompakule mompapasaya i Yesus nelabi pade biasa. Bo tona ntanina nidekeika nu Nosa Gasa kuasa mompakabelo dua-dua ntona. Bo haitu pura-pura lako nte Nosa Gasa pangane. ¹⁰ Bo tona ntanina nidekeika pompakule movia kabaraka. Tona ntanina nidekeika pompakule mompasimbayu tesa nitarimana lako nte Alatala, bo tona ntanina nidekeika pompakule mompoposisala anu nopuna lako ri Nosa Gasa bo anu nopuna lako ri kuasa-kuasa ntanina. Bo tona ntanina nidekeika pompakule notesa basa-basa anu nopuna lako ri Nosa Gasa. Bo sanupa vai nidekeika pompakule mombabatulasi tesa-tesa lako ri basa-basa haitu. ¹¹ Pura-pura haitu nipovia nu Nosa Gasa sangu haitu. Ia nobagi pompakule-pompakule simbo ntanina, nangoseaka dota nu Nosa Gasa mboto.

Kita topomparasaya i Kristus nirapaka sangu karo, nadea sipa

¹² Karota sangu nau mpengaya-ngaya sipana. Bo nau mpengaya-ngaya sipa, batena sangu karo. Ivesia muni kita topomparasaya i Kristus. Kita namala nirapaka sangu karo. Nau nadea ngayana kita, kita pura-pura aga sangu karo i Kristus. ¹³ Sanu kita toYahudi, sanu ledo. Sanu kita batua, sanu ledo. Tapi kita pura-pura nidekeika nu Alatala Nosa Gasa sangu haitu ala kita

majadi sangu karo. Bo Nosa Gasa sangu haitu nonturo riara ntaita pura-pura. †

¹⁴ Karota ledo aga sangu sipana tapi nadea. ¹⁵ Ane rapana kadata manguli, "Yaku ledo sipa nu karo sabana yaku ledo pale," natantumo haitu ledo nakana. Kada haitu sipa nu karota mami. ¹⁶ Bo ane rapana talingata manguli, "Yaku ledo sipa nu karo sabana yaku ledo mata," natantumo haitu ledo muni nakana. Talinga haitu batena sipa nu karota muni. ¹⁷ Ane rapana pura-pura karota majadi mata, berimba kita meepe? Bo ane rapana pura-pura karota majadi talinga, berimbamo kita meenga? ¹⁸ Alatala nompakatantu pura-pura sipa nu karo nipataka ri kasipatona nangoseaka dota nu Alatala mboto. ¹⁹ Ane rapana aga sangu sipa nu karo, natantumo ledo ntoto ria karota. ²⁰ Nadea mami sipa nu karota, tapi karo aga sangu.

²¹ Jadi mata ledo mamala manguli ka pale, "Yaku ledo nomparaluu iko!" Bo ivesia muni balengga ledo mamala manguli ka kada, "Yaku ledo nomparaluu iko!"

²² Tapi sipa-sipa nu karo anu nireke nalente bo ledo ria gunana, kita ledo mamala matuvu ane ledo ria sipa haitu. ²³ Bo sipa anu nireke ledo nagaya, sipa-sipa haitumo nipiara pakabelo-belo. Bo sipa-sipa anu ledo nabelo nikita ntona, sipa-sipa haitumo nitampunisita nte baju. ²⁴ Tapi sipa-sipa nagaya ledo paraluu rapiara ivesia. Alatala mboto nombasunju karota ala sipa-sipa anu nireke ledo nagaya, haitumo rapiara mpuu.

²⁵ Ivesiamo karota matuvu masiayu bo pura-pura sipa mosioseaka. ²⁶ Ane nadua sangu sipa, pura-pura sipa nu karo haitu nombarasaina muni. Ane sangu sipa nibila, pura-pura sipa nu karo muni nadamba.

²⁷ Komiu pura-pura nirapaka karo i Kristus bo komiu saito-saito simbo nirapaka sipa nu karoNa. ²⁸ Ri tatangamiu sampomparasaya, Alatala nanganggataka tona mantui mpengaya-ngaya bago. Pamulana naria tona nianggatakaNa majadi suroNa. Bo karanduana, naria tona nianggatakaNa majadi nabi mompasimbayu tesa nitarimana lako nte Alatala. Katataluna, naria anu nianggatakaNa majadi guru. Bo naria muni nidekeikaNa pompakule movia kabaraka. Naria nidekeikaNa pompakule mompakabelo dua-dua ntona. Naria nidekeikaNa pompakule mantulungi tona ntanina, naria nidekeikaNa pompakule manggeniaka todea, bo naria nidekeikaNa pompakule motesa basabasa anu nopuna lako ri Nosa Gasa. ²⁹ Natantumo ledo pura-pura tona nianggataka majadi suro! Ledo pura-pura tona majadi nabi anu mompasimbayu tesa nitarimana lako nte Alatala. Ledo muni pura-pura tona nianggataka majadi guru. Ledo pura-pura tona nidekeika pompakule movia kabaraka. ³⁰ Ledo pura-

† Basa Yunani: Ivesia muni kita. Kita pura-pura najadi aga sangu karo sabana nidu ante Nosa Gasa. Nau kita toYahudi atau ledo toYahudi, batua atau ledo, kita pura-pura nipainu Nosa Gasa sangu haitu.

pura tona nidekeika pompakule mompakabelo tona nadua, atau motesa basabasa anu nopuna lako ri Nosa Gasa, atau mombabatuasi tesa lako ri basabasa haitu.

³¹ Jadi pasimbukumo ante mpuu-mpuu raramiu manggava pompakule-pompakule lako nte Nosa Gasa anu noguna mpuu. Bo sii-sii kupopakita ka komiu sangaya anu nelabi kabelona.

Nompotove tona ntanina nabelopa pade mpengaya-ngaya pompakule nidekei nu Nosa Gasa

13 Ane rapana kupakule motesa mpengaya-ngaya basabasa manusia bo basabasa malaeka, tapi ane ledo kupotove tona ntanina, tesa-tesaku haitu ledo ntoto ria gunana. Tesaku haitu nasimbayu mpo goo naoni atau gimba nitinti pakamangga, ledo ria isina. ² Bo ane kupakule mompasimbayu tesa-tesa nitari-maku lako nte Alatala, bo ane kusani mpengaya-ngaya anu nitabuniaka bo kusani muni mpengaya-ngaya pangisani ntanina, bo pomparasayaku maroso mpuu sampe yaku mamala mantudu bulu molinja, tapi ane ledo kupotove tona ntanina, katuvuku ledo ntoto ria gunana. ³ Bo ane kudekei pura-pura mbara-mbaraku ka tona napakasi, bo kudekei karoku mboto rapatesi rapalabu ntona *sabana pomparasayaku i Yesus*, tapi ane ledo kupotove tona ntanina, pura-pura anu nidekeiku ledo ntoto naria gunana.

⁴ Tona nompotove roana nandoe posabarana bo nabelo rarana. Ia ledo nasiriati, ledo nangoe, bo ledo nalanga rarana. ⁵ Ia ledo nasodo nte roa bo ledo aga nangelo kabelo nu karona mboto. Ia ledo nasalisa narau bo ledo nompariara kasala nipovia ntona ka ia. ⁶ Tona nompotove roa ledo nadamba nanggita pokainggu nadaa tapi nadamba nanggita pokainggu nanoa. ⁷ Ia nombatidamaka riara mpengaya-ngaya anu najadi. Ia ledo nenonto nomparasaya, batena nanjarumaka Alatala, bo nosabara nau bara nuapa-nuapa najadi.

⁸ Pepotove ledo maupu-upu. Ane pompakule mompasimbayu tesa nitarima lako nte Alatala, makava tempona pompakule haitu menonto. Bo ane pompakule motesa ante basabasa nopuna lako nte Nosa Gasa, makava tempona pompakule haitu malipo. Bo ane anu nipopaisani nTupu ka kita, makava tempona pangisanita domo raparaluu. ⁹ Apa pangisanita da nakura, bo pompakuleta mompasimbayu tesa lako nte Alatala dopa nagana. ¹⁰ Tapi tempo Alatala mompakabelo mpengaya-ngaya bara maipia, domo raparaluuta pompakule-pompakule anu da nakura haitu.

¹¹ Jonjona, tempo yaku da nangana yaku notesa mpo ngana, raraku mpo rara nu ngana, yaku nompekiri mpo ngana. Tapi nambasopa yaku, inggu-inggu ngana haitu nikabasakaku puramo. ¹² Anu nikitata sii-sii

nasimbayu mpo vayo nu lenje navuyo-vuyo riaru pompevayo. Tapi ri tempo makava malanto rakitata mpo tona mosinggita lenje. Sii-sii pangisaniku da nakura, tapi tempo bara maipia malanto kusani pura-pura nu apa, nasimbayu mpo Alatala nangisani pura-pura karoku hitu.

¹³Jadi pura-pura pompakule maupu tapi naria talungaya anu ledo maupu-upu, haitumo pomparasaya, panjarumaka bo pepotove. Bo lako ri talungaya haitu, nopokopa pepotove.

Mompasimbayu tesa nitarimata lako nte Alatala, nogunapa ka tona ntanina pade mompake basa-basa anu nopuna lako ri Nosa Gasa

14 Jadi sampesuvu-sampesuvu, pasimbukumo mompasimbayu mompotove tona ntanina. Bo pasimbuku munimo manggava pompakule-pompakule lako nte Nosa Gasa. Bo pompakule nogunapa haitumo pompakule mompasimbayu tesa nitarimata lako nte Alatala. ²Ane tona notesa basa-basa nopuna lako nte Nosa Gasa, ia notesa ka Alatala, ledo notesa ka roa. Apa ledo nisani nu roa batua ntesana. Ia notesa ante pekeniaka Nosa Gasa, bo nitesana anu dopa nisani nu manusia. ³Tapi ane tona mompasimbayu tesa nu Alatala, ia notesa ka manusia bo tesana haitu mompakaroso rara roa ntanina bo mompakadidi rarara, bo mompakavoe rarara. ⁴Tona mompake basa nopuna lako ri Nosa Gasa mompakaroso pomparasayana mboto. Tapi tona mompasimbayu tesa nu Alatala, mompakaroso pomparasaya ntodea topomparasaya. ⁵Dotaku ala komiu pura-pura mompake basa-basa nopuna lako ri Nosa Gasa. Tapi mabelopa ane komiu mompasimbayu tesa nu Alatala. Apa mompasimbayu tesa nu Alatala nogunapa pade mompake basa-basa nopuna lako ri Nosa Gasa. Tapi ane maria tona mompakule mombabatuasi tesa-tesa nopuna lako nte Nosa Gasa haitu, naria gunana apa todea topomparasaya mamala mangisani batua bo pomparasayara rapakaroso.

⁶Sampesuvu-sampesuvu, ane rapana yaku makava nte komiu bo mompake basa-basa nopuna lako nte Nosa Gasa, nuapa gunana haitu ka komiu? Natantu ledo ntoto ria gunana. Tapi kana mariapa gunana ka komiu ane kupakalanto pepatuduki nitarimaku lako nte Alatala, atau kutentei ka komiu pangisaniku Alatala, atau kupasimbayu tesa nitarimaku lako nte Alatala, atau kupatuduki komiu. ⁷Pekirimo pareva-pareva musi anu ledo noinosa, evamo suli bara koronjo. Ane pareva musi haitu ledo rapopomoni pakalanto, berimba rasani ntona dade mbana nipodadeka? ⁸Bo ane tabue ledo rapopomoni pakalanto mompokio tantara hau mangeva balira, natantu ledo maria tantara mompakasadia karonu hau mosieva ante balira. ⁹Ivesia

muni ante pompakule mompake basa-basa anu nopuna lako ri Nosa Gasa. Ane komiu motesa basa-basa anu ledo nisani nu roa-roamiu, berimba rasanira patuju ntesamiu? Tesa-tesamiu ledo ria gunana. Komiu aga nasimbayu mpo tona notesa ka luona.

¹⁰Ri dunia hitu nadea ngayana basa, ledo nisaniku sakuya kadeana. Bo pura-pura basa haitu simbo naria batua. ¹¹Tapi ane ledo nisanita batua nu basa nipake ntona, tantu rareketa tosangata ia, bo ivesia muni kita rareke ntona haitu tosangata ane raepena basa nipaketa. ¹²Jadi ivesia muni komiu. Ane komiu mompake basa nopuna lako nte Nosa Gasa, tantu ledo rasani nu roa batua. Komiu mpuu-mpuu madota manggava pompakule lako nte Nosa Gasa nu Alatala. Tapi aginapa komiu merapi Tupu mombadekei ka komiu pompakule mantulungi topomparasaya bo mompakaroso pomparasayara.

¹³Haitumo sampe niuliku ka komiu: isema-sema mompake basa-basa nopuna lako nte Nosa Gasa kana mosambaya bo merapi ala ia radekeika pompakule mombabatuasi tesa-tesa haitu ala rasani nu roa batua ntesana. ¹⁴Apa ane kita mosambaya mompake basa anu nopuna lako nte Nosa Gasa, rara ntaita mosambaya, tapi pekirita ledo najala. ¹⁵Jadi nuapa masipato rapoviata? Ivei: kita kana mosambaya ante rara ntaita mompake basa nopuna lako nte Nosa Gasa, tapi kita kana mosambaya ante pekirita muni. Kita kana modade ante rara ntaita mompake basa nopuna lako ri Nosa Gasa, tapi kita kana modade ante pekirita muni.

¹⁶Rapana kita manguli tarima kasi ka Alatala ante mompake basa nopuna lako ri Nosa Gasa. Ane maria tona ntanina mangepena, berimbamo ia manguli "Amin! Nakana tu!" ane ledo nisanina batua tesata? ¹⁷Nau posambayata haitu mabelo mpuu, tapi ledo ria gunana ka tona ntanina, sabana pomparasayana ledo nipakaroso nangepe posambayata.

¹⁸Yaku nosukuru nte Alatala sabana yaku nidekeika pompakule mompake basa-basa anu nopuna lako ri Nosa Gasa nelabipa pade komiu pura-pura. ¹⁹Tapi nau ivesia, ane masiromu todea topomparasaya, aginapa kupake lima-mbela tesa anu nisani ntodea ala mombatulungi ira. Haitu nelabipa kabelona pade mompake sapulu njobu-mbela tesa riaru basa anu ledo nisani ntona batua.

²⁰Sampesuvu-sampesuvuku, tumo mompekiri mpo ngana-ngana. Komiu kana manoto mpo tona nambasomo. Tapi ane anu daa, komiu kana masimbayu mpo ngana kodi anu dopa nisanina novia nadaa. ²¹Riaru Buku Gasa nitulisi ivei:

Alatala nanguli:

"Kutesa ka todeaKu ante sumba ntosangatana anu nobasa ntanina.

Tapi nau ivesia, ledo rapetalingaira tesaKu."

Yesaya 28:11-12

²²Jadi ane nipaketa basa-basa anu nopuna lako nte Nosa Gasa, tesata haitu tandana kuasa nu Alatala ka tona ledo nomparasaya, ledo ka topomparasaya. Tapi ane nipasimbayuta tesa nu Alatala, tesata haitu tandana kuasa nu Alatala ka topomparasaya, ledo ka tona ledo nomparasaya. ²³Rapana komiu topomparasaya masiromu sanggani bo pura-pura komiu mompake basa-basa nopuna lako nte Nosa Gasa. Ane maria tona dopa nisanina Tesa nu Alatala atau tona ledo nomparasaya mesua ri sia, nuapa majadi? Natantumo rapekirira komiu togila. ²⁴Tapi ane komiu pura-pura mompasimbayu tesa nitarimamiu lako nte Alatala bo tona ledo nomparasaya atau tona dopa nisanina Tesa nu Alatala mangepe tesamiu haitu, masilonto riarantaina ia nadosa. Pura-pura pokaingguna rapakalanto lako ri tesa-tesa haitu. ²⁵Pura-pura pekirina anu nitabuniakana riarantaina rapakalanto sampe ia kana mantaputu mombasomba Alatala bo manguli, "Mpuu-mpuu Alatala naria ri tatangamiu ri sii."

Tona nasiromu mombasomba Alatala kana masiayu.

²⁶Jadi sampesuvu-sampesuvuku, nuapa rapoviata? Ivei: ane kita masiromu mombasomba Alatala, saito-saito simbo maria bagiana. Sanu tona modade, sanu mompatuduki, sanu mompakalanto tesa nitarimana lako nte Alatala. Sanu tona motesa riarabasa-basa nopuna lako nte Nosa Gasa, bo tona ntanina mombabatuasi tesa-tesa haitu ala rasani ntodea batuana. Pura-pura anu nipoviamiu haitu kana rapovia ala mompakaroso pomparasaya ntodea. ²⁷Ane maria tona motesa mompake basa-basa anu nopuna lako nte Nosa Gasa, nee meliu lako ri randua atau tatalu topotesa, bo saito-saito ira kana mosimpaleliu motesa. Bo kana maria tona mompakule mombabatuasi tesara haitu. ²⁸Ane ledo ria tona mompakule mombabatuasi tesara haitu, agina topotesa basa haitu malino riarakasiromu haitu. Agina basa haitu rapakera riarantaira mboto ka Alatala.

²⁹Ane tona mompasimbayu tesa nitarimana lako nte Alatala, nabelo ane randua atau tatalu motesa. Tona ntanina kana mompetingai pakabelo-belo ala rataserera anu nitesa haitu bara lako nte Alatala bara ledo. ³⁰Tapi ane maria tona ntanina nonturo ri sia, bo sampesanika naria tesa lako nte Alatala netuu riarantaina, topotesa pamulana kana menonto ala tona karanduana haitu mamala mompasimbayu tesa nu Alatala anu dako netuu riarana. ³¹Ane ivesia, komiu pura-pura mamala mompasimbayu tesa nu Alatala mosimpaleliu saito-saito ala pura-pura topomparasaya mamala rapatuduki bo rapakaroso. ³²Toramo! Tona mompakule mompasimbayu tesa nitarimana lako nte Alatala, mompakule nombakuasai karonamboto, hai-

tumo ia namala notesa atau menonto notesa nantuntuni dotana mboto. ³³Apa Alatala nompokono anu natinonto. Ledo nipokonoNa nagado.

Poviamo anu nabiasa nipovia ri pura-pura kasiromu ntodea topomparasaya. ³⁴Mombine-mombine kana malino tempo todea topomparasaya masiromu. Ira ledo nipaloga motesa-tesa. Ira kana mekou mangoseaka anu nitulisi riaraturaturagama. ³⁵Ane ira madota mangisani bara nuapa, aginamo rapekutana nte bereira tempo manjili ri banuara mboto. Sabana, ledo masipato mombine motesa-tesa mompakagado kasiromu ntopomparasaya. ³⁶Berimba? Nasituju komiu ante atura-atura haitu? Toramo, Tesa nu Alatala ledo nopuna lako nte komiu! Bo ledo aga komiu nipatoleleka tesa haitu!

³⁷Ane maria tona mompekiri ia nabi anu nidekeika mompakule mompasimbayu tesa nitarimana lako nte Alatala, atau maria mompakule ntanina lako nte Nosa Gasa, tantu rasanina tesa-tesa nitulisiku hitu parenta lako nte i Pue Yesus. ³⁸Tapi ane ia ledo madota mantarima tesaku hitu, nee rapariamiu tesana.

³⁹Jadi sampesuvu-sampesuvuku, pasimbukumo ante mpuu-mpuu raramiu manggava mompakule mompasimbayu tesa nitarimamiu lako nte Alatala. Bo nee ratagi tona mompake basa-basa nopuna lako nte Nosa Gasa. ⁴⁰Tapi pura-pura anu rapoviamiu kana masipato bo masiayu.

I Yesus Kristus mpuu-mpuu namate bo natuvu mpanjili

15 Kapolana sampesuvu-sampesuvu. Yaku madota mompopatora ka komiu Kareba Belo anu nipatoleleku ka komiu. Nitarimamiumo Kareba haitu bo naroso pomparasayamiu i Kristus sampe sii-sii. ²Kareba Belo haitu namala manggeni komiu rapakasalama ane komiu bate-batena mompasaya tesa nipatoleleku ka komiu. Ane ledo, pomparasayamiu tutu ledonakana.

³Nitarimaku kareba nelabi nopoko bo haitumo nipasimbayuku ka komiu. Haitumo, i Kristus namate sabana dosata bo haitu najadi nangoseaka anu nitulisi riarabuku Gasa. ⁴Ia nitana ri dayo, bo ri eo katataluna nipakatuvu mpanjili bo haitu muni najadi nangoseaka anu nitulisi riarabuku Gasa. ⁵Naupu haitu nipopakitaNa karoNa ka i Petrus bo ka ana-anaguruNa sapulu randua. ⁶Bo naupu haitu nipopakitaNa karoNa ka salunu topangoseaka Ia nelabi lima-atu tona kadeana. Nau bara sako-ndua ira namatemo, deanapa ira da natuvu sampe sii-sii. ⁷Naupu haitu nipopakitaNa karoNa ka i Yakobus, bo ka pura-pura tona najadi suroNa. ⁸Bo kaupuna nipopakitaNa munimo karoNa ka yaku, nau yaku nasimbayu mpo ngana nesuvudopa nagana mbulana. ⁹Yaku hii suro i Yesus natueipa

pade suro-suro ntanina. Kakanana yaku hii ledo masipato rauli suro i Yesus sabana yaku nompandasa todea topomparasaya Ia bara ipia. ¹⁰ Tapi lako ri pepotove nu Alatala, yaku najadi suro i Pue Yesus. Bo pepotoveNa haitu naria aselena riar nggatuvuku. Yaku nokarajaa nelabipa kantamona pade suro-suro i Yesus ntanina. Tapi kakanana ledo yaku anu nokarajaa nta-mo ivesia. Alatala anu nompotove yaku, Iamo nokarajaa nosanggani-nggani ante yaku. ¹¹ Jadi nau yaku nau suro-suro ntanina nompatolele Kareba Belo ka komiu, ledo nakuya. Anu nopoko, kami nompatolele Kareba Belo bo komiu nompasayana.

Ane rapana i Kristus ledo nipakatuvu mpanjili, pomparasayata ledo ria gunana

¹² Kami nompatolele ka komiu tesa nanguli i Kristus nipakatuvu mpanjili. Jadi nakuya naria sanu komiu nanguli tona namatemo ledo rapakatuvu mpanjili? ¹³ Ane rapana makana tona namatemo ledo rapakatuvu mpanjili, batuana i Kristus muni ledo nipakatuvu mpanjili. ¹⁴ Bo ane i Kristus ledo nipakatuvu mpanjili, ledo ntoto ria gunana kami nompatolele Kareba Belo, bo ledo muni naria gunana pomparasayamiu. ¹⁵ Bo ledo aga haitu. Ane rapana tesara makana, batuana kami nodava, sabana kami nanguli Alatala nompakatuvu i Kristus mpanjili lako ri kamateNa. Tapi ane rapana makana tona namate ledo rapakatuvu mpanjili, batuana Alatala ledo nompakatuvu mpanjili i Kristus. ¹⁶ Apa ane tona namate ledo rapakatuvu mpanjili, natantumo i Kristus muni ledo nipakatuvu mpanjili. ¹⁷ Bo ane i Kristus ledo nipakatuvu mpanjili, pomparasayamiu ledo ntoto ria gunana, komiu bate-batena nadosa. ¹⁸ Bo topomparasaya Ia anu namatemo domo ria panjarumakara, naropumo ira! ¹⁹ Ane panjarumakata i Kristus aga noguna tempo kita natuvu ri dunia hitu, kitamo tona nelabi napakasi ri dunia.

I Kristus mpuu-mpuu nipakatuvu mpanjili, jadi kita muni rapakatuvu mpanjili

²⁰ Tapi i Kristus mpuu-mpuu nipakatuvu mpanjili. Bo katuvuNa mpanjili haitu najadi panggingisi nompakatantu pura-pura topangoseaka Ia anu namatemo, rapakatuvu mpanjili muni. ²¹ Lako ri pokainggu ntona saito, pura-pura manusia kana mamate. Ivesia muni lako ri povia ntosaitoNa, manusia mamala rapakatuvu mpanjili. ²² Pura-pura manusia nireke nosangu ante i Adam apa kita pura-pura mulina. I Adam namatemo, jadi pura-pura manusia kana mamate munimo. Tapi i Kristus nipakatuvu mpanjili. Jadi isema-sema nosangu rara nte i Kristus, ia muni rapakatuvu mpanjili. ²³ Tona namatemo kana rapakatuvu mpanjili nangoseaka sunjuna nipakatantu. I Kristus tona pamulana nipakatuvu mpanjili. Bo maliu haitu tona nosangu rara nte Ia ra-

pakatuvuNa mpanjili tempo Ia makava mpanjili ri dunia. ²⁴ Maliu haitu pade makava kaupu nu dunia. Tempo haitu i Kristus mombadagi pura-pura tupu ntanina bo anu nakuasa, bo Ia moparenta mpo Magau. Maliu haitu, radekeiNa PoparentaNa ka TuamaNa Alatala. ²⁵ Apa i Kristus kana moparenta mpo Magau sampe pura-pura baliNa rapopekou nu Alatala nte Ia. ²⁶ Pade Ia mompakaupu baliNa kaupuna, haitumo kamatea. ²⁷ Nitulisi riar Buku Gasa ivei: "Alatala mompopekou pura-pura anu naria ri ngayoNa."

Mazmur 8:7

Jadi nisanita pura-pura mekou nte i Kristus. Aga Alatala mboto ledo mekou nte i Yesus, sabana Iamo anu nompopekou pura-pura anu naria nte i Kristus. ²⁸ Tempo pura-pura anu naria mekou nte i Kristus, Ia mboto mekou nte TuamaNa, apa evamo niuliku pangane Alatalamo anu nompopekou pura-pura nte Ia. Kaupuna Alatala moparenta mpengaya-ngaya anu naria.

Ane rapana tona namate ledo rapakatuvu mpanjili, tantu pokarajaa nipoviata ka i Pue ledo ria gunana

²⁹ Ane tona namate ledo rapakatuvu mpanjili, rapokuya naria tona nidiu manjambei tona namatemo? Nuapa gunana movia ada haitu ane tona namate ledo ntoto rapakatuvu mpanjili? ³⁰ Bo ane tona namate ledo rapakatuvu mpanjili, rapokuya kami mantingayo kasusa bo kapari eo-eo? ³¹ Sampesuvu-sampesuvu, eo-eo nisarumakaku yaku rapatesi sabana pokarajaaku nompatolele Kareba Belo. Nisani nu Alatala nadamba mpuu raraku sabana komiu nosangu rara nte Tuputa i Yesus Kristus. Ivesia muni nisaniNa tesaku hitu nakana mpuu, yaku ledo nodava! ³² Yaku nosieva ante tona nadaa ri ngata Efesus anu nasimbayu mpo binatabinata nasoa. Nuapa gunana yaku matuvu mantingayo kasusa ivehaitu ane ledo ria panjarumakaku yaku rapakatuvu mpanjili? Ane tona namate ledo rapakatuvu mpanjili, agina kita matuvu mpo panguli ntona ivei: "Kamaimo kita mangande bo manginu bo madambadamba eo hitu, sabana maile bara mamatemo kita, bo katuvuta maupumo."

³³ Tapi nee sampe komiu rabagiu ntona anu nanguli tomate ledo rapakatuvu mpanjili. Toramo! Ane kita movega ante tona nadaa, tantu rapasialata pokainggura. ³⁴ Jadi pakanoto mpanjili pekirimiu bo tumo rapovia dosa! Da nariapa sanu komiu dopa nosisani belo nte Alatala. Niuliku ivesia ala maeya matamiu.

Karo ntona nipakatuvu mpanjili

³⁵ Tantu maria tona ntanina mompekutana, "Berimbamo tomate rapakatuvu mpanjili? Berimba karora ane rapakatuvu mpanjili?" ³⁶ Nadoyo mpuu komiu

mompekutana ivesia! Nau bara nuapa ratuda ri talua, ledo matuvu ane anguna ledo ralovu ri tana ntani!
³⁷ Bo anu nitudamiu haitu aga batuna nggoo, nau angu gando bara angu tuda-tuda ntanina. Ledo nituda njumanggayu, aga anguna nituda. ³⁸ Tapi Alatala nompakatuvu angu-angu nituda haitu nangoseaka dotaNa sampe pura-pura ngaya anguna najadi tuda-tuda nangoseaka ngayana mboto.

³⁹ Ane rapekiritu pura-pura anu natuvu ri dunia hitu, ledo nasimbayu lenjena. Manusia sangaya lenjena. Tonji ntanina lenjena. Bau ntasi ntanina muni lenjena. Mpengaya-ngaya binata simbo ntanina lenjena. ⁴⁰ Bo ivesia muni anu ri langi evamo mata nu eo, bula, bo betue-betue, ledo nasimbayu ante anu ri tana. Anu ri langi sangayana kagayana bo anu ri tana sangayana kagayana. ⁴¹ Kagaya nu mata eo sangayana, bo kagaya nu bula sangayana muni. Bo kagaya nu betue sangayana muni, bo betue mboto simbo nosisala kagayana.

⁴² Ivesia muni ante karobata ntomate anu rapakatuvu mpanjili. Karobata anu nitana mapopo. Tapi ane karobata rapakatuvu mpanjili domo mamate domo mapopo. ⁴³ Karobata anu nitana ledo namala novia nu apa-nuapa bo nadaa nikita. Tapi ane rapakatuvu mpanjili, maroso bo magaya rakita. ⁴⁴ Karobata anu nitana, karo manusia biasa lako ri dunia hitu. Tapi ane rapakatuvu mpanjili, karo haitu majadi karo masipato matuvu ri suruga.

Naria karo manusia biasa, bo naria muni karo masipato matuvu ri suruga. ⁴⁵ Riara Buku Gasa naria nitulisi ivei:

“Manusia paratama, i Adam, nipakatuvu nu Alatala.”

Kajadia 2:7

Tapi i Adam kaupuna, haitumo i Kristus, nombadekei katuvu nabelo sampe ri kasae-saena. ⁴⁶ Anu najadi nokolu ledo karo anu masipato monturo ri suruga, tapi karo manusia biasa. Karo anu masipato monturo ri suruga najadi ri puri. ⁴⁷ Manusia paratama haitu nipajadi lako ri tana bo nonturo ri dunia hitu. Tapi i Kristus, anu nireke i Adam karanduana, nopuna lako ri suruga. ⁴⁸ Manusia ri dunia hitu natuvu nasimbayu mpo i Adam anu nipajadi lako ri tana. Tapi tona anu nosangu rara ante i Kristus manggava katuvua lako ri suruga, nasimbayu mpo katuvua i Kristus. ⁴⁹ Sii-sii karota nanjava karo i Adam anu nipajadi lako ri tana. Tapi bara maipia kita anu nosangu rara nte i Kristus, karota manjava karo i Kristus anu nopuna lako ri suruga.

⁵⁰ Sampesuvu-sampesuvu, iveimo patujuku: karota ri dunia hitu nipovia lako ri isi bo raa. Kita ledo mamala monturo ri Poparenta nu Alatala ri suruga ante karota anu mamate bo mapopo, sabana ri suruga ledo ria kamatea. ⁵¹ Pariaramo! Kupopaisani ka komiu anu nitabuniaka nu Alatala lako ri lamba pamulana! Ledo pura-pura kita mamate, tapi kita pura-pura kana raba-

liki nau kita da natuvu atau namatemo. ⁵² Riara sampida mata tempo tabue i Pue rapopomoni ri kaupu nu dunia, tona anu namatemo rapakatuvu mpanjili ante karo anu domo mapopo, bo kita pura-pura anu da natuvu rabaliki muni. ⁵³⁻⁵⁴ Apa karota anu mamate bo mapopo kana rabaliki majadi karo anu domo mamate domo mapopo. Bo tempo karota mpuu-mpuu nibaliki, madupamo tesa nitulisi riara Buku Gasa ivei:

“Alatala nompakaupu kamatea, manusia domo mamate!”

Yesaya 25:8

⁵⁵ “Heh, kamatea! Nidagimo iko!”

Domo ria kuasamu mompandasa manusia!” †

Hosea 13:14

⁵⁶ Manusia naeka ka kamatea sabana nisanira ane mamate ira kana rahuku sabana dosara. Bo manusia nadosa sabana niliunakara Atura agama. ††

⁵⁷ Tapi kita nosukuru nte Alatala! Iamo nombakabaska kita lako ri kuasa nu dosa bo Atura agama sampe kita majadi padagi sabana anu nipovia nTuputa Yesus Kristus!

⁵⁸ Jadi sampesuvu-sampesuvu nipotoveku, pakaroso pomparasayamiu bo nee molengga-lengga. Pasimbuku ante mpuu-mpuu raramiu mantui pokarajaa nidekei i Pue Yesus ka komiu, apa nisanimiu ledo ria nuapa-nuapa anu ledo ria gunana rapoviamiu ka Ia. Natantu kana maria aselena.

Doi petulungi ka topomparasaya napakasi ri ngata Yerusalem

16 Kapolana, sampesuvu-sampesuvu, kutesa doi rapasiromumiu mombatulungi sampesuvuta sampomparasaya napakasi ri ngata Yerusalem. Kana rapoviamiu mpo niparentaku ka todea topomparasaya ri ngata Galatia. ² Haitumo, ri eo-eo Aka saito-saito komiu simbo kana mompatani sabagia lako ri doi panggavamiu nangoseaka kadea nu asele nikavamiu. Bo doi haitu kana rabolimiu sampe yaku tou nte komiu. Nee damo makava yaku ri situ pade rapasiromumiu doi haitu. ³ Ane makava yaku, kudekei sura popaisani ka tona anu rapelisiimi, bo ira kutudu manggeni doi petulungi lako nte komiu hau ri ngata Yerusalem. ⁴ Ane rapekirimiu mabelo muni yaku hau, raporoara yaku bo mosanggani-nggani kami hau.

Nia i Paulus bo roana

⁵ Maupu kupelioda ira ri propinsi Makedonia pade tou mompeinta komiu, apa yaku nonia moliu ri Makedonia mami. ⁶ Dotaku masae sakide monturo ante komiu, bara sampe maupu tempo ranindi, ala komiu

† *Basa Yunani: Heh kamatea, umba pedagimu? Heh kamatea, umbamo bisamu?†† Basa Yunani: Bisa nu kamatea iamo dosa, bo kuasa nu dosa iamo Atura agama.*

mamala mantulungi yaku riara polipaku hau ri ponturo ntanina. ⁷Yaku ledo madota aga mesai sampalai nte komiu sii-sii. Ane rapodota nTupu, yaku madota masae sakide monturo nte komiu. ⁸Tapi hitupa yaku maroo ri ngata Efesus sampe Eo Mbaso Pentakosta, ⁹apa nadea loga ka yaku ri sii mokarajaa anu mamala manggeni belo ka todea, naupa nadea muni topangeva yaku ri sii.

¹⁰Ane makava ri situ i Timotius, tarimamiu mabelo ia ala matinda rarana monturo nte komiu, apa ia muni nantui pokarajaa i Pue Yesus nasimbayu mpo yaku.

¹¹Jadi nee sampe maria tona manjauru ia. Tapi tulungimo ia mompapola polipana mabelo ala ia mamala manjili nte yaku, apa yaku nompopea kakavana ri sii nosanggani-nggani ante sampesuvu-sampesuvu sampomparasaya ntanina.

¹²Ane sampesuvuta i Apolos, nadea ngganimo nituduku tou mompelioda komiu mosanggani-nggani ante topomparasaya-topomparasaya ntanina. Tapi hitu-hitu ia dopa nadota tou. Ane maria loga nabelo ntanina ngena, pade tou ia.

Tesa kaupuna

¹³Komiu kana mainga bo nee menonto momparasaya i Kristus. Komiu kana maroso bo nee maeka ka nuapa-nuapa. ¹⁴Nuapa-nuapa rapoviamiu, poviamo ante pepotove.

¹⁵Sampesuvu-sampesuvu, natantu nisanimumo i Stefanus sambanua. Ira tona pamulana nomparasaya i Yesus ri propinsi Akhaya, bo ira nompasimbuku ante mpou-mpou rarara mantulungi todea nu Alatala. Jadi sampesuvu-sampesuvu, kuperapi nte komiu ante

mpou-mpou raraku, ¹⁶pekoumo nte tona ivehaitu bo nte pura-pura tona nokarajaa ntamo nosanggani-nggani nte ira nantulungi todea topomparasaya.

¹⁷Nadamba mpou raraku tempo i Stefanus, i Fortunatus bo i Akhaikus tumai nte yaku ri sii, sabana ira nanjambei komiu nantulungi yaku ri sii. ¹⁸Ira nompakasana raraku nasimbayu mpo raramiu nipakasana muni. Haitu sampe kuperapi nte komiu, bilamo tona ivehaitu!

¹⁹Nadea tabe lako nte todea topomparasaya ri propinsi Asia. Bo tarima muni nadea tabe lako nte i Akwila bo i Priskila nosanggani-nggani ante todea topomparasaya anu nasiromu ri banuara, apa komiu pura-pura nosampesuvu sabana pomparasayamiu i Pue Yesus. ²⁰Nadea muni tabe lako nte pura-pura topomparasaya ri sii. Posipakavotekamo tabe saito-saito ante pepotove.

²¹Paleku mboto notulisi hitu ivei: nadea tabe lako nte yaku, i Paulus.

²²Isema-sema ledo nompotove i Pue Yesus, masukavumo ia!

Maranata! Tupu kami, kakavamo! ²³Kuperapi i Pue Yesus mombadekei belo ka komiu. ²⁴Yaku nompotove komiu pura-pura anu nosangu rara ante i Yesus Kristus.

Tabe lako nte yaku,
I Paulus

19-May-2009@12:42, Backup Description=19-May-2009@09:53, snave -
26-May-2009@11:04, Backup Description=26-May-2009@11:03, B Altork - ❖❖❖

2 Korintus

Vamba nu Tesa

Ngata Korintus ngata mbaso ri propinsi Akhaya. I Paulus mboto tona paratama nompatolele Kareba Belo hamai (Suro-suro 18:1-17). Naliu i Paulus nompalaisi ngata Korintus bo napola hau ri ngata ntanina, nakavamo bara sako-ndua guru mpodava ri ngata Korintus. Niulira ledo nakana i Paulus najadi suro i Yesus bo ledo paraluu mekou nte pepatudukina. Niulira i Paulus ledo namala raparasaya apa nibalikina niana hau mompelioda toKorintus. Jadi nangepe lelana haitu, i Paulus nantudu i Titus manggeni tesana hau ri ngata Korintus. Tesa i Paulus haitu nangonteaka tona anu nompoara nturona najadi suro i Pue (2:3; 7:8-13).

Nanjilipa i Titus lako ri Korintus, nitesana ka i Paulus ivei: "Nadea topomparasaya ri ngata Korintus najeamo lako ri poviara nombasapuaka komiu, bo nalentoramo rarara manggita komiu. Tapi da naria sanu ira nompakakaa bagara, ledo nipokonora mekou nte komiu apa pangulira komiu ledo suro i Pue."

Nangepe tesa i Titus, i Paulus notulisi sura hitu anu nabiasa niuli. Riara sura hitu, i Paulus nombatesa pokarajaana nanggeni Kareba Belo (2:14-6:10). Nitesana muni pepotovena ka ira (6:11-13; 7:2-4, 13-16), bo kadamba nu rarana nangepe lelana najeamo ira lako ri poviara bara ipia (7:5-13). Naupu haitu, niperapina ala rapapolara mompasirumu doi petulungi ka topomparasaya napakasi ri bagia Yudea ala ane makava ia, doi haitu masadiamo rakenina hau ri bagia Yudea (Pasal 8-9). Naupu haitu, tesa i Paulus nangonteaka tona anu da nanjapuaka kuasana bo nturona najadi suro i Yesus (Pasal 10-13).

Isi nu Sura

Pantepuuna (1:1-11)

I Paulus ante todea topomparasaya ri ngata Korintus (1:12-7:16)

I Paulus nompakalanto berimba sampe nabali niana hau mompelioda toKorintus (1:12-2:13)

Pokarajaa i Paulus nanggeni Kareba Belo (2:14-6:10)

I Paulus nerapi toKorintus mosinggabelo mpanjili ante ia (6:11-7:16)

Doi petulungi rakeni ka topomparasaya napakasi ri bagia Yudea (Pasal 8-9)

I Paulus nanjaliku karona mboto, niulina ia mpuu-mpuu suro i Yesus, nionteakana tona nosapuaka nturona najadi suro (10:1-13:10)

Petabe kaupuna (13:11-13)

Petabe

1 Sampesuvu-sampesuvu todea nu Alatala ri ngata Korintus bo pura-pura topomparasaya ri njuman-gu propinsi Akhaya:

Sura hitu lako nte yaku, i Paulus, bo i Timotius sampesuvuta sampomparasaya. Yaku nipelisi nu Alatala najadi suro i Yesus Kristus nangoseaka dotaNa. ² Ku-perapi Tuamata Alatala bo Tuputa Yesus Kristus mombadekei belo ka komiu bo mompakatinonto raramiu.

Alatala mompakaroso rarata riara kasusa bo kapari

³ Ratoiyamo Alatala, Tuama nTuputa Yesus Kristus. Ia Tuamata anu naasi mataNa nanggita kita bo Iamo Alatala nompakaroso rarata riara mpengaya-ngaya.

⁴ Ia nompakaroso rara kami riara mpengaya-ngaya kasusa bo kapari nirasai kami, ala karoso rara nitarima

kami lako nte Alatala, rapake kami mompakaroso rara ntona ntanina anu nombarasai kasusa bo kapari.

⁵ Nadea kasusa bo kapari nirasai i Kristus, nambela munimo nte kami. Bo ivesia muni Alatala mpuu-mpuu nompakaroso rara kami sabana kami nosangu rara nte i Kristus. ⁶ Kami nombarasai kasusa bo kapari ala rapakule kami mompakaroso raramiu, bo ala komiu rapakasalama. Ane rara kami rapakaroso nu Alatala riara kasusa bo kapari, tantu raramiu muni rapakarosoNa sampe komiu mosabara mombatidamaka kasusa bo kapari nasimbayu mpo kasusa nirasai kami.

⁷ Haitu sampe ledo nonggai rara kami nompekirika komiu, nisani kamimo komiu mpuu-mpuu nombatidamaka riara kasusa bo kapari. Apa nisani kami ane komiu nombarasai kasusa bo kapari nasimbayu mpo kami, tantu raramiu muni rapakaroso nu Alatala, nasimbayu mpo kami.

⁸ Sampesuvu-sampesuvu, kami madota ala rasanimiu kasusa bo kapari nirasai kami ri propinsi Asia nadaa mpuu. Pepandasa nirasai kami neliu gagamo sampe naupu rara kami, domo nisarumaka kami matuvu.

⁹ Nirasai kami eva nihuku mate. Tapi haitu najadi ala kami ledo manjarumaka karoso kami mboto tapi manjarumaka Alatala anu nakuasa mompakatuvu mpanjili tona namate. ¹⁰ Jadi sampesuvu-sampesuvu, Alatala nompakasalama kami lako ri pepandasa anu nompakaviora rara haitu, sampe kami ledo namate. Bo Iamo bate-batena mompakasalama kami. Iamo nisarumaka kami bate-batena mompakasalama kami nggani-nggani kami mombarasai kasusa bo kapari.

¹¹ Nisani kami ane komiu muni mantulungi mosambayaka kami, Alatala bate-batena mompakasalama kami riara kasusa. RadekeiNa belo ka kami sabana madea tona mosambaya ka kami. Bo madea tona manguli tarima kasi ka Ia ane rakitara nipoiyona pomperapira ka kami.

I Paulus nanguli berimba sampe nabali niana hau mompelioda toKorintus

¹² Nadamba mpuu rara kami apa nisani kami nabula rara kami. Kami nasaro nokainggu nanao nte tona pura-pura, nelabipa nte komiu. Pura-pura anu nipovia kami, ledo ria nuapa-nuapa nitabuniaka kami. Patuju kami nanao, nangoseaka dota nu Alatala. Pokainggu kami ledo nangoseaka kapande nu manusia, tapi nangoseaka pompakule nidekei nu Alatala. ¹³⁻¹⁴ Apa anu nitulisi riara sura kami aga anu nalanto rabacamiu bo rapahamiu, ledo ria patuju ntanina nitabuniaka ri-arana. Sii-sii dopa nipahamiu ntoto patuju kami. Tapi nisarumakaku makava tempona rasanimiu mpuu-mpuu patuju kami, ala tempo i Pue Yesus makava bara maipia komiu madamba mompekirika kami nasimbayu mpo kadamba kami nompekirika komiu.

¹⁵⁻¹⁶ Nisaniku komiu mpuu-mpuu nadamba nompekirika yaku. Haitu sampe yaku nonia ronggani mesai nte komiu, ala komiu mamala mantarima belo ronggani kadeana lako nte yaku. Patujuku mesai mompelioda komiu ntani ruru pade mapola hau ri propinsi Makedonia. Bo tempo manjili lako ri Makedonia pade mesai vai mompelioda komiu ala komiu mamala mantulungi yaku mompapola polipaku hau ri bagia Yudea. ¹⁷ Tapi niaku haitu nabali. Bara raulimiu yaku aga nebalingoya. Atau raulimiu yaku nompakatantu niaku nangoseaka dotaku mboto, sanggani nanguli "Iyo," sanggani nanguli "Ledo." ¹⁸ Tapi ledo ivesia, sampesuvu-sampesuvu. Alatala namala raparasaya bo nisaniNa tesa kami ka komiu namala muni raparasaya. Ledo nebalingoya kami, ledo sanggani "Iyo" bo sanggani, "Ledo." ¹⁹ Apa i Yesus Kristus ledo nabali-bali. Iamo Ana nu Alatala anu nipatolele kami i

Silas bo i Timotius ka komiu. Ia ledo nebalingoya, ledo sanggani nanguli, "Iyo", bo sanggani nanguli, "Ledo." TesaNa bate-batena namala raparasaya. ²⁰ Apa pura-pura pojanji nu Alatala nipakadupa riara nggatuvu i Kristus. Haitu sampe kita anu nosangu rara ante i Kristus namala nanguli, "Amin! Nakana mpuu pojanji-pojanji nu Alatala!" Bo haitu najadi ala Alatala rabila bo ratoiya. ²¹ Alatala mboto mompakaroso kita pura-pura ala kita mosangu rara ante i Kristus. NipelisiNa kita majadi todeana ²² bo nidekeiNa Nosa Gasana riara ntaita, tandana kita todeana. Nosa Gasana haitu pangangisita ala rasanita janji nu Alatala ka kita mpuu-mpuu rapakadupana.

²³ Sampesuvu-sampesuvu, yaku ledo nodava. Alatala sabiku. NisaniNa isi rara ntaiku bo nisaniNa yaku ledo nanjili ri ngata Korintus mompelioda komiu sabana ledo nipokonoku makasara mangonteaka komiu bo mompakasusa raramiu. ²⁴ Kami ledo topeparenta anu aga nadamba nangulika komiu nuapa raparasayamiu bo nuapa rapoviamiu. Kakanana pomparasayamiu i Kristus naroso mamimo. Tapi kami aga madota mokarajaa mosanggani-nggani ante komiu ala komiu mpuu-mpuu madamba.

2 Jadi, nibotusikumo agina yaku domo tou ruru, apa ledo nipokonoku mompakasusa raramiu mpo anu najadi saeo. ² Apa, ane kupakasusa raramiu, isemapa vai mompakavoe raraku ane ledo komiu? ³ Bo haitumo patujuku notulisi sura ka komiu bara ipia. Apa ledaku tou ane aga masusa raraku manggita pokainggumiu. Kakanana komiu masipato mompakadamba raraku. Bo ane madamba yaku, tantu komiu muni madamba. ⁴ Tempo nitulisiku sura haitu ka komiu nasusa mpuu raraku, nantamo niraiku bo naoge uve matakunusu. Patujuku notulisi sura haitu ledo mompakasusa raramiu, tapi ala rasanimiu kambaso toveku ka komiu pura-pura.

Tona nihuku ntopomparasaya sabana novia dosa, hitupa kana raampungira

⁵ Ane tona anu novia dosa bara ipia, ia ledo nompakasusa raraku, tapi nompakasusa raramiu. Tapi ala tesaku ledo maliu gaga, aginapa kuuli ledo pura-pura komiu nipakasusana. ⁶ Deanapa komiu ri Korintus nombahuku ia. Jadi hitupa kuuli ka komiu naganamo pehuku nipambelamiu ka ia. ⁷ Hitupa komiu kana mombaampungia ia bo mompakavoe rarana. Nee sampe ia masusa gaga bo maupu rarana. ⁸ Jadi kuperapi nte komiu, popakitamo tovemiu ka ia. ⁹ Ri suraku bara ipia nituduku komiu nombahuku ia. Patujuku notulisi sura haitu ala kusani bara raoseakamiu pura-pura parentaku bara ledo. ¹⁰ Jadi hitupa naganamo. Isema-sema niampungimiumo, niampungiku munimo. Ane rapana tona haitu paraluu kuampungia, ni-

ampungikumo ri panggita i Kristus ala manggeni belo ka komiu pura-pura. ¹¹ Tona haitu niampungikumo ala nee sampe Magau nu Seta manggava loga mombadagi kita, sabana nisanita mamimo akalana.

Tempo i Paulus ri ngata Troas nakini rarana sabana dopa nakava i Titus nanggeni kareba lako ri Korintus

¹² Kapolana, tempo yaku nakava ri ngata Troas mompatolele Kareba Belo i Kristus, i Pue nombadekei ka yaku loga nabelo mokarajaa hamai. ¹³ Tapi ledo natin-da raraku sabana ledo niposinggavakuka sampesuvuta i Titus hamai, anu manggeni kareba lako nte komiu. Haitumo sabana yaku nopalakanamo nte toTroas, bo napola hau ri propinsi Makedonia.

Nadamba mpuumo rara i Paulus nangepe kareba niken i Titus

¹⁴ Yaku nosukuru nte Alatala! Ia batena nanggeniaka kami nosanggani-nggani nte Ia bo nitulungiNa kami najadi padagi sabana kami nosangu rara ante i Kristus. NitulungiNa kami nompatolele Kareba Belo i Kristus ri umba-umba ala pura-pura tona mangepena bo mosisani nte Alatala. Bo Kareba haitu nasimbayu mpo soa navangi nasilele nienga ri umba-umba. ¹⁵ Ri panggita nu Alatala, kami nompakadamba ranaNa nasimbayu mpo dupa vangi nitunju ka Ia. Apa kami nompatolele Kareba Belo i Kristus ka tona rapakasalama bo muni ka tona rapakaropu. ¹⁶ Ane tona rapakasalama, kami nienga mpo soa navangi mpuu, apa Kareba haitu nanggeni katuvua nabelo ka ira. Ane tona rapakaropu sabana nisapuakara Kareba haitu, kami mpo soa ntomate, apa Kareba haitu nompakatantu ira mamate bo rapopogaa lako nte Alatala. Isema mompakule mantui pokarajaa ivehaitu? Natantu nangoseaka mompakuleta mboto ledo ria saitoa. ¹⁷ Nadea tona nompatolele Tesa nu Alatala ala mangelo untu ka karora mboto. Tapi ledo ivesia kami. Patuju kami nagasa bo tesa kami nakana, apa kami nisuro nu Alatala mompatolele TesaNa. Jadi kami notesa ante kuasa i Kristus bo Alatala nanggita povia kami haitu.

ToKorintus nirapaka sura nitulisi i Kristus

3 Nee rapekirimiu kami nompamula vaimo mombatoiya karo kami mboto! Kami ledo nasimbayu mpo sanu tona nakava nte komiu nanggeni sura popaisani ala ratarimamiu ira, atau niperapira sura popaisani lako nte komiu rakeni ka tona ntanina. Kami ledo paraluu sura ivehaitu ² sabana katuvumiu mbotomo sura popaisani kami. Katuvumiu namala nirapaka sura nitulisi riarantai kami anu namala rabaca bo rasani ntona pura-pura. ³ Haitumo, katuvumiu nompopakita ka pura-pura tona, komiu mpuu-mpuu nompapasaya bo pomparasayamiu haitu asele pokarajaa

kami nanggeni tesa i Kristus ka komiu. Katuvumiu namala nirapaka sura popaisani kami anu nitulisi i Kristus mboto. Sura haitu ledo nitulisi antepopena bo tinta, bo ledo muni niuki ri sampeka vatu. [†] Tapi sura haitu nipovia Nosa Gasa nu Alatala anu natuvu riarantaimiu.

⁴ Kami nabia nanguli ivesia sabana kami nanjarumaka Alatala. Bo kami nanjarumaka Alatala sabana posangu rara kami nte i Kristus. ⁵ Tapi ledo nipakule kami mantui pokarajaa hitu ante kuasa kami mboto. Alatalamo anu nompopompakule kami. ⁶ Iamo nombadekei ka kami mompakule nompatuduki pojanjiNa nabaru ka tona. Pojanji nabaru haitu ledo atura-atura nitulisi, tapi nopuna lako ri Nosa Gasa nu Alatala. Atura-atura anu nitulisi nanggeni kamatea sabana ledo nipakule manusia mangoseakana, tapi Nosa Gasa nu Alatala nombadekei katuvua nabelo sampe ri kasae-saena.

Pojanji nabaru nipovia i Yesus nabelopa pade Atura-atura nipapola Nabi Musa

⁷ Atura-atura anu nanggeni kamatea niuki nu Alatala ri sampeka vatu bo nidekei ka Nabi Musa. Tempo haitu reme lako ri kaoge nu Alatala nikita bo nompopenggilalenje i Musa ^{††} sampe toIsrael ledo mompakule nangganotona naupa reme haitu nompamulamonalipo. Jadi ane ivehaitu kaoge nu Alatala nikita tempo Atura-atura anu nanggeni kamatea nidekei ka Nabi Musa, ⁸ natantumo nelabipa kaogeNa rakita riarapokarajaa Nosa Gasa! ⁹ Atura-atura nokolu nompakalanto manusia kana rahuku. Jadi nau damo naoge Atura-atura haitu, kana naogepa pojanji nabaru anu nompakanoa kita ri panggita nu Alatala. ¹⁰ Atura-atura nokolu naoge mpuu. Tapi ane kaoge haitu rapoposisala ante kaoge nu pojanji nabaru, namala raulita pojanji nokolu haitu domo ria kaogena. ¹¹ Ane Atura-atura anu ledo nainti ivesia nireke naoge, natantumo nelabipa kaogena pojanji anu bate-batena sampe ri kasae-saena.

¹² Kami nanjarumaka pojanji nu Alatala anu nabaru, anu ledo mabali-bali. Haitumo sampe kami nabia mpuu nompatolele Kareba Belo. ¹³ Kami ledo nombatabuniaka nuapa-nuapa. Kami ledo nasimbayu mpo i Musa nggaulu anu nombasalibumbuni lenjena ante kae ala ledo rakita ntoIsrael reme nTupu malipo lako ri lenjena. ¹⁴ Pekiri ntoIsrael haitu natetutui muni, ledo nisanira batuana anu najadi nte i Musa. Sampe sii-sii ane Atura-atura nokolu haitu rabaca ka ira, ledo nisanira mpuu batuana. Namala raulita da naria anu nombasalibumbuni pekirira. Pekiri manusia nisalibumbuni ivesia aga namala rabuka ane tona haitu mosan-

[†] niuki ri sampeka vatu: Sapulu Parenta nu Alatala anu nireke Pojanji nu Alatala Nokolu niuki nu Alatala ri sampeka vatu. Peinta Pesuvu 24:12; 32:16; Ulangan 4:13; 5:22. ^{††} Pesuvu 34:29-35

gu rara ante i Kristus. ¹⁵ Sampe sii-sii nggani-nggani Buku i Musa nibaca ka ira, pekirira da natesalibumbuni. ¹⁶ Tapi ane majea ira bo mangoseaka Tupu, posalibumbuti haitu kana matebuka. ¹⁷ Anu niuli "Tupu" ri sii, haitumo Nosa Gasa nu Alatala. Bo ane Nosa Gasa nu Alatala maria nte kita, kita mpuu-mpuu makabasa-ka lako ri pura-pura anu mompopogaa kita lako nte Alatala. ¹⁸ Sii-sii lenjeta ledo nisalibumbu mpo lenje i Musa nggaulu, apa kita nompopakita kaoge i Pue Yesus riaranggatuvuta. Bo kaoge haitu nakava lako nte Tupu, haitumo Nosa Gasa anu natuvu riarangntaita. Nosa Gasa sakide-sakide nombabaliki kita majadi nasimbayu mpo i Pue Yesus, ala sakide-sakide mantambaipa kaogeNa rakita riaranggatuvuta.

I Paulus nompatolele pakalanto Tesa nu Alatala

4 Jadi ledo naupu rara kami nompatolele Kareba Belo sabana pokarajaa hitu niparasaya nu Alatala ka kami lako ri kabelo raraNa. ² Tapi ane kami, kami domo nangoseaka pokainggu nadaa anu nepakaeya. Kami ledo nebagiu bo ledo nantenggoaka Tesa nu Alatala. Alatala sabi kami bo nikitaNa kami aga nompatolele anu nakana ala rasani ntodea kami namala raparasaya. ³ Ane da nariapa tona dopa nompaha Kareba Belo nipatolele kami, aga tona anu maropu bara maipia ledo nompahana, haitumo tona ledo nompapasaya. ⁴ Ira ledo nompapasaya sabana Magau nu Seta anu nombakuasai dunia hitu nompakaburo pekirira ala ledo rakitara reme nu Kareba Belo. Kareba Belo haitu nompakalanto kaoge i Kristus anu nasimbayu ntoto ante Alatala. ⁵ Kareba nipatolele kami haitu ledo kareba karo kami mboto. Tapi kareba haitu nompakalanto i Yesus Kristusmo Tuputa pura-pura, bo kami hitu najadi batua nisuro i Yesus mombatulungi komiu. ⁶ Tempo Alatala nompajadi dunia niuliNa, "Lako ri kalandana meumbamo reme!" [†] Ivesia muni nipakaremeNa pekirita ala pekirita majadi manoto bo rasanita kaogeNa. ToIsrael nggaulu nanggita kaoge nu Alatala nenggila ri lenje i Musa. Ivesia muni rasanita kaoge nu Alatala ane raposisanita i Kristus.

Alatala nombadekei karoso ka kami, manusia nalente, manggeni Kareba Belo

⁷ Kami manusia nalente niparasayaka pokarajaa nabelo mpuu, jadi kami nasimbayu mpo kura tana bisa, tapi isina noali mpuu. Alatala novia ivehaitu ala rasani ntona karoso nipokumaaka mombatui pokarajaa hitu, ledo nopuna lako nte kami mboto, tapi nopuna lako nte Ia. ⁸ Ntiku-ntiku topangeva kami, tapi kami ledo nidagi. Nasaro naingu rara kami tapi ledo naupu rara kami. ⁹ Kami nipandasa ntona tapi kami ledo nipalaisi nu Alatala. Naupa kami nasaro niboba

[†] *Kajadia 1:3*

sampe nadungga tapi kami ledo namate. ¹⁰ Kami nasaro nombarasai kasusa bo kapari nasimbayu mpo anu nirasai i Yesus tempo Ia nipatesi. Haitu najadi ala malanto i Yesus natuvu mpanjili, apa kuasaNa nikita riaranggatuvu kami. ¹¹ Ane da matuvupa kami, da mari-apa tona madota mompatesi kami sabana kami nangoseaka i Yesus. Haitu najadi ala malanto i Yesus natuvu mpanjili, apa kuasaNa rakita riaranggatuvu kami anu mamate. ¹² Jadi kami bate-batena nantingayo kamate ala manggeni komiu manggava katuvua nabelo sampe ri kasae-saena.

¹³ Riarang Buku Gasa nitulisi ivei: "Yaku nompapasaya, bo haitu sampe nabia yaku notesa." ^{††} Ivesia muni kami. Kami nompapasaya Alatala sampe kami nabia notesa ka tona. ¹⁴ Alatala nompakatuvu mpanjili i Pue Yesus lako ri kamateNa, bo nisani kami, kami muni rapakatuvuNa mpanjili nasimbayu mpo Ia. Bo nipapasaya kami Ia manggeni kami ri ngayo i Pue Yesus mosanggani-nggani ante komiu. ¹⁵ Pura-pura kasusa nirasai kami haitu, nanggeni belo ka komiu. Apa ane mantambai kadea ntona mombarasai pepotove nu Alatala, mantambai kadea ntona mosukuru nte Ia, sampe Ia mpuu-mpuu ratoiya bo rabila.

¹⁶ Jadi haitu sampe ledo naupu rara kami. Nau karo kami nantambai kalentena, tapi eo-eo rara kami nantambai karosona. ¹⁷ Kasusa nirasai kami ri dunia hitu nangaa bo aga sampalai. Bo kami mantarima belo sampe ri kasae-saena sabana nitidamaka kami riarangkasusa haitu. Kasusa nirasai kami sii-sii aga sakide kodi ane rapoposisala ante belo ratarimata bara maipia. ¹⁸ Jadi kami ledo nompariara kasusa bo kapari anu nikita ri dunia hitu, tapi kami nompariara belo anu dopa nikita anu nasadia ka kami. Apa, anu nikita ri dunia hitu aga sampalai, tapi belo anu dopa nikita haitu, bate-batena sampe ri kasae-saena.

Ledo naupu rarata riarangkasusa sabana nisanita kita manggava karo nabaru ri suruga

5 Karota ri dunia hitu nirapaka tenda niponturota sampalai. Bo nisanita ane mageromo tenda hitu, Alatala nombadekei ka kita banua ri suruga anu ledo nipovia manusia bo bate-batena sampe ri kasae-saena, haitumo karo nabaru. ² Tapi tempo kita da natuvu ri dunia hitu nasumu rarata, naoge rarata manggava karo nabaru lako ri suruga. ³ Apa ane rakavata karo nabaru haitu, nirapaka kita nompasua baju ala domo movuloo. ⁴ Tempo kita da natuvu ri dunia hitu nasumu rarata apa nirasaita nandasa katuvuta. Kita ledo madota mamate bo mogaa lako ri karota, tapi kita madota radekeika karo nabaru lako ri suruga ala karo anu mamate rasambe i ante karo anu matuvu sampe ri kasae-saena. ⁵ Alatala mbotomo nompakasadia kita

^{††} *Mazmur 116:10*

mantarima karo nabaru, bo nidekeiNa ka kita Nosa Gasana anu najadi panggangisita ala rasanita anu ni-janjiNa haitu mpuu-mpuu majadi.

⁶Jadi haitu sampe rara kami bate-batena naroso. Nisanita ane kita da natuvu nte karota ri dunia hitu, kita dopa nosangani-nggani ante i Pue Yesus ri suruga. ⁷Apa kita natuvu ri dunia hitu lako ri pomparasayata ledo lako ri anu nikitata. ⁸Jadi evamo niuliku ri bavona, narosomo rara kami. Kami madambapa mompalaisi karo kami hitu bo hau monturo mosangani-nggani nte i Pue. ⁹Jadi kami nompasimbuku mompakadamba raraNa, nau kami da natuvu ri dunia, nau kami mompalaisi dunia hitu. ¹⁰Apa kita pura-pura kana mantingayo i Kristus bara maipia ala ratangaraNa. Maupu ratangaraNa, simbo rakavata anu nipakatantu nangoseaka anu nipoviata tempo kita natuvu ri dunia hitu, bara povia nabelo bara povia nadaa.

I Paulus nompasimbuku manggeni tona mangoseaka i Kristus apa aga i Kristus mamala momposinggabelo manusia ante Alatala

¹¹Jadi naeka rara kami movia anu ledo rapokono nTupu, apa nisani kami Ia mombatangara kita pura-pura. Jadi haitumo sabana kami nompasimbuku manggeni tona momparasaya i Yesus. Nisani nu Alatalamo isi rara ntai kami. Bo nisarumakaku rasanimiu muni isi rara ntai kami bo domo monggai raramiu mompekirika kami. ¹²Nee rapekimiu kami nantoiya karo kami vaimo! Ledo ivesia. Patujuku ala komiu madamba mompekirika kami, bo ala rasanimiu mesanaka tona anu nompoara kami. Apa tona haitu aga nadamba ka nturora ri dunia tapi ledo nipeilira rara ntaira.

¹³Niuli ntona kami nabaya. Kami nipeinta nabaya, sabana kadidi rara kami novia pokarajaa nidekei nu Alatala ka kami. Bo ane niulimiu kami nanoto, nisanimiu kami nokarajaa ivesia ala manggeni belo ka komiu. ¹⁴Tove i Kristus nombakuasai kami sampe kami nokainggu ivesia. Apa niparasaya kami, saito tona namate nanjambei kita pura-pura, jadi nasimbayu mpo kita pura-pura namate. ¹⁵Bo i Kristus mpuu-mpuu namate nanjambei kita pura-pura. Patuju nu kamateNa haitu ala kita anu da natuvu ri dunia hitu domo matuvu mangoseaka dotata mboto, tapi dota i Kristus anu namate bo natuvu mpanjili ala manggeni belo ka kita.

¹⁶Jadi haitumo sabana kami domo nombareke tona bara nabelo bara nadaa nangoseaka pekiri manusia. Bara ipia ivesia mami kami nombareke i Kristus, tapi hitupa domo. ¹⁷Ane tona nosangu rara ante i Kristus, ia najadi manusia nabaru. Katuvuna nggaulu naliumo bo katuvuna nabaru mpuu-mpuu nariumo. ¹⁸Alatalamo anu mompakajadi pura-pura haitu. NipoposinggabeloNa kita nte Ia ante kamate i Kristus. Bo ni-

parasayaNa ka kami pokarajaa mompatolele kareba posinggabelo ka tona ntanina ala ira muni mamala mosinggabelo nte Ia. ¹⁹Jadi siimo kareba nipatolele kami: Alatala nompoposinggabelo mpanjili manusia nte Ia sabana anu nipovia i Kristus. Domo nirekeNa dosa-dosata. Bo niparasayaNa ka kami pokarajaa mompatolele TesaNa ka tona ntanina ala ira muni mamala mosinggabelo nte Ia.

²⁰Jadi kami hii niposumba i Kristus. Ante potesa kami, Alatala mboto nompasimbayu tesaNa ka komiu. Jadi ante kuasa i Kristus kami merapi mpuu-mpuu nte komiu, posinggabelomo nte Alatala! ²¹I Kristus ledo ntoto nadosa. Tapi Alatala nompoposimbuaka ka Ia dosata bo nipoviaNa Ia mpo tona nadosa ala manjambei kita. Alatala novia haitu ala kita anu nosangu rara nte i Kristus majadi manoa ri panggitaNa.

6 Jadi kami hii nokarajaa nosangani-nggani ante Alatala mompatolele TesaNa ka manusia. Haitumo sabana kami merapi nte komiu ante mpuu-mpuu rara, nee sampe kabelo rara nu Alatala nte komiu haitu ledo maria aselena riaranggatuvumiu. ²Ri Buku Gasa, Alatala nanguli ivei:

“Ri tempo nipakatantuKu niepeKumo pekakaimu, bo ri eo nipakatantu mompakasalama iko, nitulungiKumo iko.”

Yesaya 49:8

Pariaramo pakabelo-belo! Hitumo tempona nipakatantu nu Alatala! Eo hitumo tempona Alatala mompakasalama komiu!

Batua nu Alatala kana mombajagai pokaingguna ala pokarajaana ledo rasalai

³Kami nompasimbuku matuvu ante pokainggu nabelo ala ledo maria tona manjalai pokarajaa kami mompatolele Tesa nu Alatala. ⁴Nau bara nuapa-nuapa najadi, kami batena nokainggu nabelo ala malanto kami mpuu-mpuu batua nu Alatala. Kami batena nosabara naupa kami nombarasai mpengaya pepandasa bo kasusa. ⁵Kami niboba bo nisuaraka riarangtarunggu. Todea nonasu nangeva kami, kami nokarajaa ntamo, biasa kami ledo namonjo, biasa ledo nangande. ⁶Riarangmpengaya haitu, nalantomo kami mpuu-mpuu batua nu Alatala, apa pokainggu kami nagasa, nisani kami Tesa nu Alatala, kami nosabara bo nabelo rara nte tona. Nosa Gasa nokarajaa riaranggatuvu kami bo kami mompotove tona ntanina ante rara mpuu-mpuu. ⁷Nalantomo kami batua nu Alatala sabana kami mompatolele pepatuduki nakana, bo kuasa nu Alatala nikita riaranggatuvu kami. Kami batena nokainggu nanao. Bo pokainggu nanao haitumo najadi pareva posieva kami, apa ane nanao pokainggu kami, kami mamala mangeva bali kami bo kami mamala manjaliku karo kami lako ri peeva nu bali.

⁸ Sanu tona nombabila kami, tapi sanu nanjalai kami. Sanu tona nantoiya kami tapi sanu nantunturaka kami. Nau kami nanao, niuli ntona topebagiu. ⁹ Sanu tona noreke kami hii ledo ria gunana, tapi sanu nombatesa kabelo pokarajaa kami bo kareba haitu nantolelemo. Nadea nggani kami sakidepa mamate, tapi peintamo, kami da natuvu! Kami nasaro nipandasa ntona tapi kami ledo namate. ¹⁰ Nau kami nasaro nipakasusa, tapi kami batena nadamba. Kami napakasi, tapi kamimo anu nanggeni belo ka tona nadea. Nikita eva ledo ria nuapa-nuapa nte kami, tapi kakanana mpengaya-ngaya naria nte kami.

I Paulus nanguli nipotovena toKorintus bo nipopatorana ira nee mosangu rara nte tona ledo nomparasaya i Yesus

¹¹ Sampesuvu-sampesuvu ri Korintus, nitesa kami isi rara kami ka komiu. Ledo nitabuniaka kami pepotove kami ka komiu. Kami mpuu-mpuu nompotove komiu. ¹² Pepotove kami ledo nakura, tapi nikitaku pepotovemiu ka kami nakuramo. ¹³ Yaku notesa ka komiu mpo ka ana-anaku mboto: potovemo kami nasimbayu mpo pompotove kami komiu!

¹⁴ Nemo mosangu rara nte tona ledo topangoseaka i Kristus. Ledo ntoto masipato. Berimbamo? Masipato tona nangoseaka dota nu Alatala masintuvu ante toposapuaka Alatala? Mamala reme ragalo ante landa? ¹⁵ Masipato i Kristus mosimporoa ante i Belial, Magau nu Seta? Masipato topomparasaya i Kristus mosimpovega nte tona ledo nomparasaya? ¹⁶ Masipato kita metupu nte Alatala ri BanuaNa bo metupu muni nte tupu-tupu ntanina? Natantu pura-pura haitu ledo ntoto masipato! Toramo! Kitamo anu najadi Banua nu Alatala, haitumo Alatala anu Natuvu sampe ri kasae-saena. Alatala mboto nanguli ivei:

“Yaku matetida ri tatangara bo monturo mosangganinggani ante ira.

Yaku majadi Tupura bo ira majadi todeaKu.”

Imamat 26:12; Yehezkiel 37:27

¹⁷ “Jadi, palaisimo tona anu ledo nosisani nte Yaku, bo kavaosimumo ira!

Ane ledo ratuimiu anu naruto ri panggitaKu, Kutari-ma komiu.”

Yesaya 52:11

¹⁸ Niuli muni ri Buku Gasa ivei:

“Yaku majadi Tuamamiu bo komiu majadi ana-anaKu. Ivesiamo panguli nTupu anu Neliu KakuasaNa.”

2 Samuel 7:14, 1 Tawarikh 17:13, Yesaya 43:6, Yeremia 31:9

7 Sampesuvu-sampesuvu nipotoveku. Pura-pura janji nu Alatala haitu nipambela ka kita. Jadi kita kana mombakabasaka pura-pura pokainggu bo pekiri nadaa. Kita kana mangoseaka Alatala ante rarata

mpuu-mpuu, bo kana maeka movia anu ledo rapokonona.

Kadamba nu rara i Paulus nangepe kareba toKorintus madota mosinggabelo mpanjili ante ia

² Sampesuvu-sampesuvu, kami madota ala komiu mompotove kami bo mantarima kami! Ledo ria sangania kami novia nadaa ka komiu, ledo ria saitoa nipakarugi kami. Ledo muni naria saitoa nibagiu kami ala mompakauntu karo kami mboto. ³ Patujuku ledo mompakasala komiu, apa kami mpuu-mpuu nompotove komiu evamo niuliku ri bavona. Matuvu atau mamate kami batena mompotove komiu! ⁴ Ledo nakaja raraku notesa pakalanto ka komiu. [†] Nadamba mpuumo raraku nantora komiu. Nau nadeamo susa bo pari nambela kami, hitupa narosomo raraku bo nelabi kadamba raraku nantora komiu.

⁵ Tempo kami nakava ri propinsi Makedonia, ledo najadi kami nangosanaka. Apa ri panggai panggana tona nompakasusa kami. Naria tona nangeva kami, bo riarantai kami mboto kami nombarasai naeka. Mpuu-mpuu eva maupu rara kami! ⁶ Tapi Alatala nompakaroso raronona naupu rarana, bo nipakarosona rara kami muni ante kakava i Titus. ⁷ Ledo aga kakava i Titus nggoo nompakaroso rara kami, tapi karebamiu nitesana mpuu-mpuu nompakadamba rara kami. Nitesana komiu nompakaroso rarana tempo ia nonturo ante komiu. Bo nitesana muni nalentoramo raramiu manggita yaku, bo nasusa raramiu nantora pokainggumiu bara ipia. Bo niulina komiu mpuu-mpuu madota manjaliku yaku ri ngayo ntopangeva yaku. Kadamba nu raraku mpuu-mpuu nelabi!

⁸ Naupa isi suraku bara ipia nompakasusa raramiu, ledo nanjoso raraku nantulisi sura haitu. Kakanana nanjosomo raraku bara ipia apa nikitaku suraku haitu nompakasusa raramiu. Tapi kasusa raramiu haitu aga sampalai. ⁹ Hitupa nadambamo raraku, ledo sabana raramiu nipakasusa, tapi sabana kasusa raramiu haitu nanggeni komiu majea lako ri pokainggumiu nasala. Kasusa nu raramiu haitu nangoseaka dota nu Alatala, apa nipakeNa kasusa raramiu haitu ala manggeni komiu majea. Jadi sura kami haitu ledo nompakarugi komiu. ¹⁰ Sabana, kasusa rara nangoseaka dota nu Alatala, nanggeni kita najea lako ri dosata sampe kita rapakasalama. Bo ledo ria saitoa tona manjoso rarana ane rapakasalama. Tapi kasusa rara biasana anu nirasai ntona ledo nosisani nte Alatala, ledo nanggeni kita majea aga nanggeni kita mamate bo rapopogaa lako nte Alatala.

¹¹ Kasusa raramiu nombaca suraku bara ipia mpuu-mpuu kasusa rara nangoseaka dota nu Alatala. Peinta-

[†] Ledo nakaja rara kami notesa pakalanto ka komiu. ATAU: Nisaniku komiu namala raparasaya.

mo anu najadi! Lako ri kasusa rara nirasaimiu haitu, komiu mpuu-mpuu nadota movia anu nanoa. Niulimiu komiu ledo nosabingga ka tona nompoara kami. Naraumo komiu nompekirika dosa nipovia nu roamiu haitu, bo naekamo raramiu mangoseaka pokaingguna. Nalentoramo raramiu manggita yaku. Nioseakami-umo anu niuliku ka komiu. Nasadiamo komiu nombahuku tona nasala haitu. Riara mpengaya-ngaya nipopakitamiumo komiu ledo nasala riara parakara bara ipia.

¹²Jadi patujuku notulisi sura haitu bara ipia, ledo aga mompakasala tona novia sala atau manjaliku tona nipakadaana. Alatalamo sabiku! Patujuku notulisi sura haitu, ala malanto ka komiu mboto tove miu nte kami nambaso mpuu. ¹³Jadi, narosomo rara kami nangepe anu nipoviamiu naupu nibacamiu sura kami.

Rara kami nipakaroso mpuu, bo nelabipa vai kadamba rara kami nanggita kadamba rara i Titus. Apa tempo nipeli odana komiu ri Korintus, rarana mpuu-mpuu naleva nanggita pokainggumiu. ¹⁴Dopame ia tou mompeli odana komiu, nitoyaku mamimo komiu nte ia. Bo pokainggumiu nikita i Titus ledo nompakaeya yaku. Pura-pura tesa kami ka komiu nakana, ivesia muni pura-pura potoyaku komiu nitesaku ka i Titus nakana muni. ¹⁵Tove i Titus ka komiu nantambai kambasona tempo nitorana komiu mpuu-mpuu nangoseaka anu niulina. Nitarimamiumo ia bo nibilamiu ia bo nekou nte ia. ¹⁶Nadamba mpuu raraku sabana komiu namala niparasaya riara mpengaya-ngaya.

ToMakedonia najadi jonjo nompasiromu doi petulungi ka topomparasaya napakasi ri bagia Yudea

8 Kapolana, sampesuvu-sampesuvu. Kami mompopaisani ka komiu anu najadi ri sii ri propinsi Makedonia. Alatala nabelo mpuu ka todea topomparasaya ri sii *sampe ledo natove rarara nombatulungi tona ntanina*. ²Nandasa mpuu kasusa bo kapari nira-saira, bo ira mboto napakasi mpai. Tapi naupa ivesia, nelabi kadambara sampe ledo mpuu natove rarara nombadekei ka tona ntanina. ³Nikitaku mboto ira nodekei, ledo aga nangoseaka pompakulera, tapi nelabi lako ri pompakulera. ⁴Dotara mboto, ira nerapi nte kami ante rarara mpuu-mpuu ala ira muni radekei-ka loga mombatulungi topomparasaya napakasi ri bagia Yudea. ⁵Anu nidekeira nelabi mpuu lako ri anu nisarumaka kami. Ledo aga doi nidekeira. Tapi nidekeira ntani ruru katuvura ka i Pue. Ira natundu nte Ia bo natundu muni nte kami, sabana haitumo dota nu Alatala.

⁶Jadi kami nerapi nte i Titus ala ia manjili tou nte komiu. Iamo anu nompamula bago nompasiromu doi petulungi haitu nte komiu bara ipia. Jadi haitumo sabana ia nitudu kami mompapola pokarajaa nabelo

haitu. ⁷Sampesuvu-sampesuvu, nabelo pura anu nipoviamiu. Pomparasayamiu mpuu-mpuu naroso. Napande mpuu komiu notesa. Nisanimiu pepatuduki nakana, naoge raramiu nombatulungi tona ntanina, bo naoge mpuu pompotovemiu kami. [†]Jadi ivesia muni mabelo rapasimbukumiu mombatulungi tona napakasi.

Dekei ante kamomi nu rara nangoseaka jonjo i Yesus mboto

⁸Ledo niparentaku komiu kana mombadekei maoge. Yaku aga mompopaisani ka komiu kambaso pepotove ntoMakedonia nantulungi tona ntanina. Patujuku ala kusani ane komiu muni mpuu-mpuu nompotove tona ntanina. ⁹Ledo paraluu kuparenta komiu apa nisanimiu mboto kambaso pepotove nTuputa i Yesus Kristus ka kita. Naupa Ia mpuu-mpuu nakalumana, nikabasakaNa pura-pura kakalumanaNa haitu ala mantulungi kita. Ia najadi manusia napakasi ala kita mamala majadi nakalumana ri panggita nTupu.

¹⁰Ivei panggavaku pompasiromu doi petulungi haitu. Nabelopa komiu mompakaupu bago nipamulamiu mpae naliu. Komiu tona pamulana nompekirika mompasiromu doi petulungi haitu bo komiu muni tona pamulana nompamula nompasiromu doi haitu. ¹¹Jadi hitupa papolamo bago haitu sampe maupu. Mabelo ane kadotamiu mompapola bago haitu sampe maupu, masimbayu ante kaoge nu raramiu nompamula bago haitu bara ipia. Dekeimo nangoseaka pompakulemiu. ¹²Apa ane rarata mpuu-mpuu mombadekei, pedekeita haitu ratarima nu Alatala nangoseaka anu naria nte kita, ledo nangoseaka anu ledo ria nte kita.

¹³Patujuku ala katuvumiu masimbayu. Patujuku ledo mompakantamo komiu sampe komiu mapepa bo tona ntanina mangaa. ¹⁴Sii-sii komiu nelabi nagana bo nipakulemiu mantulungi ira. Bo tempo bara maipia ane komiu makura bo ira melabi, ira muni mamala mombatulungi komiu. Ivesiamo katuvumiu masimbayu. ¹⁵Nisanita haitu nakana apa nitulisi riara Buku Gasa ivei:

“Tona nompasiromu nadea, ledo nelabi, bo tona nompasiromu sakide ledo muni nakura.”

Pesuvu 16:18

I Titus bo roana randua nitudu i Paulus hau ri ngata Korintus

¹⁶Kami nosukuru nte Alatala sabana Ia nompakaoge rara i Titus mompekirika kabelomiu nasimbayu mpo kami mboto. ¹⁷Naoge rara i Titus mombatulungi komiu sampe ia nompoyo pomperapi kami mompap-

[†] naoge mpuu pompotovemiu kami ATAU: naoge mpuu mompopotove kami komiu.

ola pompasiromu doi petulungi haitu. Bo ledo aga haitu, ia mboto nompakatantu kana tou nte komiu. ¹⁸ Bo nitudu kami muni saito sampesuvuta ntanina momporoa i Titus riaro polipana tou nte komiu. Sampesuvuta haitu mpuu-mpuu nibila ntopomparasaya sabana pokarajaana nompatolele Kareba Belo. ¹⁹ Ledo aga haitu, tapi ia muni nipelisi ntodea topomparasaya momporoa kami riaro polipa kami hau ri bagia Yudea manggeni doi petulungi haitu. Patuju nu polipa kami haitu ala Alatala rabila bo ratoiya ntona, bo ala rasani ntona kaoge nu rara kami mantulungi sampesuvuta napakasi.

²⁰ Patuju kami nantudu sampesuvuta haitu nosang-gani-nggani nte i Titus ala nee maria tona manguli kami ledo nanao nompasiayu pedekei nadea haitu.

²¹ Apa kami madota movia anu nanao ri panggita nu Alatala, bo muni ri panggita nu manusia.

²² Nitudu kami munimo saitopa sampesuvu ntanina mosangganika gi Titus. Nadea ngganimo nipopakitana kaoge nu rarana mantulungi tona ntanina. Bo siii naoge mpuu rarana mantulungi komiu pompasiayu pompasiromu doi petulungi haitu, sabana ia mpuu-mpuu nanjarumaka komiu muni madota mombatulungi tona napakasi. ²³ I Titus hii roaku sampokarajaa mantulungi komiu. Bo randua sampesuvuta ntanina anu momporoa ia, nisuro ntodea topomparasaya, bo nadea mpuu tona nombabila bo nombatoiya i Kristus sabana katuvu nu sampesuvuta randua haitu. ²⁴ Jadi kuperapi nte komiu popakitamo tovermiu ka ira tatalu ala rakita ntodea topomparasaya pepotovemi, bo rasanira muni tesa-tesa kami nombatoiya komiu ri ngayora bara ipia, mpuu-mpuu nakana.

I Paulus nantudu toKorintus mompakasadia doi petulungi

9 Kakanana ledo paraluu ntoto kutulisi ka komiu doi petulungi ka topomparasaya napakasi ri Yudea. ² Nisanikumomo kaoge raramiu mombatulungi ira. Nitoiyaku komiu ri ngayo ntoMakedonia. Niulikuka ira, lako ri mpae naliu komiu toAkhaya † nasadiamo mompakatu pedekeimiu. Kadidi raramiu nombadekei, mpuu-mpuu nompakadidi rarara sampe ira muni nadea nadota nombadekei doi petulungi. ³ Tapi *nau nisaniku komiu nasadia nombadekei*, nipekiriku nabelopa kutudu gi Titus mokolu tou nte komiu, ala ratulungira komiu mompakasadia doi petulungimiu. Jadi, tempo yaku makava ngena, masadiamo petulungimiu nangoseaka anu nitesaku ka toMakedonia. Nee-nee tesaku nombatoiya komiu haitu aga tesa nggoo! ⁴ Apa ane maria toMakedonia momporoa yaku ngena tou, bo ane rapana doi pedekeimiu dopa nipasiromumiu, natantu maeya mpuu mataku, nemopa komiu, apa ni-

† *propinsi Akhaya: Ngata Korintus ri propinsi Akhaya.*

uliku ka ira komiu mpuu-mpuu nasadia metulungi! ⁵ Jadi haitu sampe nipekiriku paraluu kutudu sampesuvu tatalu haitu mokolu tou nte komiu, ala ira mompasiayu pedekei anu nijanjimiu bara ipia. Nipoviaku ivesia ala masadiamo rakava kami. Bo malantomo petulungimiu haitu nidekei ante momi rara bo ledo aga nipasuu.

Ane kita nombadekei ka tona ntanina, kita manggava belo, bo Alatala rabila bo ratoiya

⁶ Pariaramo tesaku hitu: tona nosavu sakide, sakide muni rasombena. Bo tona nosavu nadea kana madea muni rasombena. ⁷ Pura-pura tona kana simbo mombadekei nangoseaka anu nipakatantu riaro ntanina mboto. Nee monggai rara mombadekei bo nee muni mombadekei sabana nirasai aga nipasuu. Sabana, Alatala nompotove tona nombadekei ante rara nadamba. ⁸ Alatala nakuasa mombadekei belo ka komiu sampe komiu bate-batena ledo makura nuapauapa. Bo belo haitu melabipa kaganana sampe komiu mamala movia mpengaya-ngaya anu nabelo mombatulungi tona ntanina. ⁹ Nitulisi riaro Buku Gasa ivei:

“Alatala nombabagi belo ka tona napakasi bo ledo natove raraNa.

Kabelo nu raraNa batena sampe ri kasae-saena.”

Mazmur 112:9

¹⁰ Alatala nombadekei savua ka toposavu, bo nidekeiNa asele poviata rakandeta. Bo ivesia muni radekeiNa ka kita anu rapaketa mombatulungi tona ntanina, bo ratambaikiNa ala madeapa mpuu asele lako ri kabelo rarata. ¹¹ Alatala mombadekei mpengaya-ngaya belo ka komiu ala komiu batena mompakule mombadekei ka tona ntanina. Bo tempo kami manggeni pedekeimiu haitu ka tona napakasi ri bagia Yudea, madea tona manguli tarima kasi ka Alatala. ¹² Jadi petulungi nidekeimiu haitu ledo aga mombatulungi todea topomparasaya anu napepa, tapi manggeni madea tona manguli tarima kasi ka Alatala. ¹³ Apa ane rakitara pedekei petulungimiu haitu, ira mantoiya bo nombabila Alatala, sabana rakitara komiu mpuu-mpuu nomparasaya Kareba Belo i Kristus bo natundu nte parentaNa. Bo ratoiyara Alatala sabana komiu ledo mpuu natove raramiu nobagi ka ira bo ka tona ntanina anu naria nte komiu. ¹⁴ Bo ira mosambayani komiu ante tovera apa pepotove nu Alatala anu nikita riaro nggatuvumiu mpuu-mpuu naoge.

¹⁵ Masipato mpuu kita motarima kasi nte Alatala, sabana pedekeiNa nelabi mpuu kabelona. Ledo rapakuleta mombasovadaka kabelo nu pedekeiNa haitu ka kita!

Kuasa i Paulus mantui pokarajaa najadi suro i Yesus

10 Hitupa yaku, Paulus, naria anu kuperapi nte komiu. Sanu tona ri situ nanguli yaku nabia notesa ri suraku, tapi ane nangingayo komiu, pangulira yaku aga naeka bo ledo nabia nanguli ri mata. Jadi ante raraku naede bo nalusu, nasimbayu mpo rara i Kristus, ² yaku mpuu-mpuu merapi: nee sampe da maria komiu manjauru kuasaku najadi suro i Yesus, ala ledo paraluu yaku marau tempo yaku makava ri situ nte komiu. Apa nasadia mami yaku mangonteaka tona nanguli kami nokainggu mpo tona ledo nosisani nte Alatala. ³ Kami aga manusia biasa, tapi ane kami nangeva pepatuduki anu ledo nakana, kami ledo nangeva mpo manusia biasa anu ledo nosisani nte Alatala. ⁴ Kami ledo nangeva ante pompakule nu manusia biasa. Tapi kami nangeva ante pompakule nidekei nu Alatala. Pompakule haitu nabaraka, jadi kami nompakule nombadagi nuapa-nuapa nangeva pepatuduki nakana. Kami namala nirapaka tantara anu nompakaropu kuasa nu balira nau bara berimba karosona. ⁵ Ante kuasa nu Alatala kami nompakule nombadagi pekiri ntopangeva pepatuduki nakana, pekiri ntona nasombo, bo pekiri ntona anu nombalava tona ntanina mosisani nte Alatala. Ante kuasa lako nte Alatala kami nanggeni ira nombabali pekirira sampe ira natundu nte i Kristus. ⁶ Jadi ane rakita kami komiu pura-pura mpuu-mpuu natundu nte i Kristus, masadiamo kami mombahuku tona ntanina anu ledo natundu.

⁷ Sampesuvu-sampesuvu, pekirikamo anu nikitamui! Ane maria tona nanguli ia mpuu-mpuu bagia i Kristus, kana ratorana kami muni bagia i Kristus, nasimbayu mpo ia. ⁸ Nau yaku madamba gaga mombatesa kuasa nidekei i Kristus ka kami, ledo maeya matakuku. Sabana kuasa haitu nidekei i Pue ka kami, ledo mompakagero pomparasayamui, tapi mompakaroso pomparasayamui. ⁹ Patujuku ledo momparangga komiu ante suraku. ¹⁰ Nisaniku naria tona nanguli ivei: "Riara sura-sura i Paulus tesana nalonto bo nasodo, tapi ane ia mboto naria nte kita, ingguna damo nanonto, bo tesana ledo ria gunana." ¹¹ Jadi tona nanguli ivesia kana rasanira, anu nitesa kami riara sura-sura, haitumo mpuu-mpuu rapovia kami ane tou nte komiu ngena.

I Paulus nanguli naria kuasana nompatuduki ira apa iamo nisuro nu Alatala manggeni Kareba Belo ri ngatara

¹² Natantu ledo mabia kami manguli karo kami nasimbayu ante ira anu nombatoiya karora mboto! Ledo mabia kami mompakasimbayu karo kami ante ira! Ira nantoiya karora nangoseaka panggitara mboto.

Nadoyo mpuu tona ivehaitu! ¹³ Tapi kami ledo ntoto nasimbayu ante ira! Ane kami mangoe karo kami mboto, kami ledo mombaliunaka anu masipato, haitumo kami aga mangoe pokarajaa niparasaya nu Alatala ka kami. Bo komiu pura-pura ri Korintus nambela bagia pokarajaa kami, apa Alatala nantudu kami manggeni Kareba Belo ri ngatamui. ¹⁴ Kami ledo nombaliunaka anu masipato raoe kami ane kami mangoe pokarajaa kami nte komiu. Ane rapana kami ledo nakava ri ngatamui bara ipia nanggeni Kareba Belo, natantu ledo maria kuasa kami mangoe pokarajaa kami ri bagiamui. Tapi naria kuasa kami mangoe pokarajaa kami nte komiu, apa kamimo paratama nakava ri ngatamui nanggeni Kareba Belo i Kristus. ¹⁵ Naria sanu tona nalanga rarana nangoe kabelo asele pokarajaara, tano mai aga asele pokarajaa ntona ntanina. Tapi ledo ivesia kami. Kami ledo nangoe karo kami mboto notesa pokarajaa anu ledo pokarajaa nidekei nu Alatala ka kami. Kami nanjarumaka ane pomparasayamui mantambai karosona, mantambaipa muni kadeana asele pokarajaa kami nte komiu. ¹⁶ Maluu haitu, mamala kami hau mompatolele Kareba Belo sampe ri ngata-ngata ntanina anu makavao lako nte komiu. Kami ledo madota mangoe pokarajaa nipovia kami ri bagia mpokarajaa ntona ntanina. ¹⁷ Riara Buku Gasa nitulisi ivei:

"Isema-sema madota mantoiya bara nuapa, aginapa ia mantoiya anu nipovia nTupu."

Yeremia 9:24

¹⁸ Sabana, tona nipokono nu Alatala ledo topantoiya karona mboto tapi tona nitoiya nu Alatala.

I Paulus ledo mpo suro-suro mpodava ri ngata Korintus

11 Sampesuvu-sampesuvu, kuperapi komiu mosabara ruru mangepe yaku motesa mpo todayo. Komiu nosabara mami nte yaku. ² Yaku mpuu-mpuu nompariarantaika komiu, nasimbayu mpo Alatala nompariarantaika komiu! Komiu nirapaka randa nagasa pokaingguna anu nipopotengeakuka saito langgai, haitumo i Kristus. *Batua porapa hitu, yakumo anu paratama nompatuduki komiu mompapasaya i Yesus. Dotaku ala komiu ledo molinja ntanina tapi bate-batena mompapasaya Ia.* ³ Tapi nakini mpuumo raraku, nee-nee raakalani ntona komiu sampe komiu domo ante raramui mpuu-mpuu mompotove i Kristus. Apa ivesia najadi nte i Hawa anu niakalani nu ule tempo nggaulu. ⁴ Nitesa kamimo i Yesus ka komiu bara ipia, bo nitarimamiumo Nosa Gasa bo niparasayamiumo Kareba Belo. Tapi hitupa nikitaku komiu nadamba nantarima tona ntanina anu nombatesa Yesus ntani-

† *mantambaipa muni kadeana asele pokarajaa kami nte komiu. ATAU: mantambaipa muni petoiyamui ka kami sabana pokarajaa kami ri tatangamui.*

na. Bo nasadia muni komiu nantarima kuasa ntanina bo nomparasaya kareba ntanina. ⁵ Niepemieumo tesa ntona anu nantoiya karo mboto, haitumo suro-suro anu ledo ria kasimbayuna. Jadi kana raepemiu muni tesaku hitu, apa yaku hii ledo ntoto natuei pade ira. ⁶ Naupa nakana yaku ledo napande notesa ri ngayo ntodea, ledo ivesia pangisaniku, apa nisaniku mpuu pepaduduki nakana. Haitu bate-batena nipopakita kami ka komiu riar mpengaya-ngaya pepaduduki bo pokainggu kami bara ipia.

I Paulus nanguli nuapa sabana ia ledo nerapi gaji lako nte toKorintus tempo nompatolele Kareba Belo ka ira

⁷ Tempo yaku nompatolele Kareba Belo ka komiu, yaku ledo ntoto nerapi gaji lako nte komiu. Yaku nompakaede raraku nokarajaa ante paleku mboto nompaelo ala manggeni belo ka komiu pura-pura. Jadi, berimba nirasaimiu? Nasala poviaku ivesia? ⁸ Tempo yaku nakava nombatulungi komiu yaku nitanggu ntodea topomparasaya lako ri ngata ntanina. Namala rauli yaku nompakarugi ira ala mamala mantulungi komiu. ⁹ Bo tempo yaku nonturo nte komiu, ane naria paraluuku, ledo nipakasesaku komiu. Apa nuapa-nuapa niparaluuku haitu nipakagana nu sampesuvu-sampesuvu sampomparasaya nakava lako ri propinsi Makedonia. Yaku bate-batena nompasimbuku ala ledo mompakasesa komiu mompekirika katuvuku. Bo bate-na kupasimbuku ivesia, ledo kuperapi nte komiu. ¹⁰ Ledo ria saitoa ri propinsi Akhaya mamala nombatagi yaku mantoiya pokaingguku haitu! Pepaduduki i Kristus anu naria riar ntaiku nakana. Ivesia muni tesaku hitu nakana! ¹¹ Nuapa sabana yaku ledo nadota nompakantamo komiu? Bara raulimiu ledo nipotoveku komiu. Ledo nakana! Nisani nu Alatalamo nipotoveku komiu!

¹² Tapi yaku bate-batena ledo merapi gaji lako nte komiu, ala suro-suro anu ledo ria kasimbayuna ri situ ledo maria loga mangoe manguli ira nokarajaa nasimbayu mpo kami. ¹³ Suro-suro anu ledo ria kasimbayuna haitu aga suro-suro mpodava! Topokarajaa natenggo. Niulira iramo suro-suro i Kristus, tano mai ledo! ¹⁴ Tapi kita ledo mahera manggita pokainggura haitu, sabana Magau nu Seta mboto nombabali karonala rasarumaka ntona ia malaeka nanggeni reme. ¹⁵ Bo kita ledo muni mahera ane batua nu Magau Seta mantabuniaka pokainggura nadaa bo nokainggu mpo topokarajaa anu nangoseaka dota nu Alatala. Tapi kaupuna ira rabalasi ante pehuku nangoseaka anu nipoviara.

Kasusa bo kapari nirasai i Paulus sabana ia suro i Yesus

¹⁶ Evamo niuliku pangane, nau yaku notesa mpo todayo, dekeimo loga ka yaku mangoe karoku mboto

sakide. Nee rapekirimiu yaku hii mpuu-mpuu todayo, tapi nau maria sanu manguli yaku todayo, dekeimo yaku muni mangoe karoku mboto. ¹⁷ Natantu ane kutoiya karoku mboto ri sii, yaku ledo notesa ante kuasa nTupu, tapi yaku notesa mpo todayo. ¹⁸ Nadea tona ntanina nangoe karora mboto bo anu nipoviara ante karosora mboto. Jadi ivesia muni yaku mangoe karoku. ¹⁹ Nikitaku komiu nadamba nosabara ante tona nadoyo, apa niulimiu komiu napande mpuu! ²⁰ Nosabara mpuu komiu ante pakeni anu nompamenta komiu mpo potudua, atau nompakaupu anumiu, atau nombaakalani komiu, atau nokainggu nasombo nte komiu, atau nosapa lenjemiu! ²¹ Ledo naeya mata kami nanguli kami ledo mabia mokainggu ivesia nte komiu!

Tapi ane maria tona mabia mangoe karora mboto, yaku muni mabia mangoe karoku mboto! Yaku notesa mpo todayo! ²² Berimbamo? ToIbrani ira? Yaku muni toIbrani. ToIsrael ira? Yaku muni toIsrael! Muli i Abraham ira? Yaku muni muli i Abraham! ²³ Batua i Kristus ira? Tesaku hitu eva tesa ntogila! Yaku batua i Kristus anu nelabi nabelopa pade ira! Nantamopa pokarajaaku pade pokarajaara! Nasaropa yaku nisuaraka riar ntarunggu pade ira! Yaku nicambu pakandasapa pade ira, bo nadea ngganimo yaku sakidepa namate!

²⁴ Lima-ngganimo yaku nicambu ntoYahudi, talu-pulu sio-mbela sanggani. ²⁵ Talu-ngganimo yaku niboba ntoRoma ante kayu. Sanggani yaku nirempe ntona ante vatu apa ira madota mompatesi yaku. Talu-ngganimo kapala-kapala nipesaviku natala rantasi, bo naria sanggani yaku nonanggo rara ntasi saeo sambongi. ²⁶ Nadea ngganimo nirasai kasusa riar mpolipaku. Naria uve lono. Naria muni topeago. Yaku nipandasa ntoYahudi bo muni tona ledo toYahudi. Yaku nombarasai susa riar ngata bo ri kataolosana bo rara ntasi. Bo yaku nombarasai susa lako nte tona nanguli ira sampesuvu sampomparasaya, tano mai ledo. ²⁷ Nabundumo yaku nokarajaa ntamo. Nadea ngganimo yaku ledo nakapo namonjo, ledo nangande, ledo nanginu. Nadea ngganimo yaku nombatidamaka ara ntai bo nindi bo ledo nagana pakea. ²⁸ Bo ntanina lako rahaitu, eo-eo nasesa raraku nompekirika pura-pura todea topomparasaya. ²⁹ Apa ane naria sampesuvu sampomparasaya nalente, yaku muni nombarasai kalentena haitu. Ane naria sanu nanavu riar dosa, yaku muni nasusa raraku nompekirika ira.

³⁰ Suro mpodava nangoe karora mboto, jadi yaku muni mangoe karoku mboto. Tapi ane yaku kana mantoiya karoku mboto, aginamo kalenteku kutoiya.

³¹ Alatala, Tuama nTuputa i Yesus, Iamo masipato raitoiya sampe ri kasae-saena! Bo nisaniNa anu nitesaku hitu nakana, yaku ledo nodava! ³² Tempo yaku ri ngata Damsyik, gubernur anu nipakakuasa Magau Aretas, nantudu tantarana mombajaga bobaa mbaso ngata haitu mombasaka yaku. ³³ Tapi roaku nantulungi yaku

malai. Niulurakara yaku riara karanji lako ri bolo ri tembo ngata hau ri savalikuna. Bo ivesiamo yaku nakabasaka lako ri kuasa nu gubernur haitu.

Anu nipopakita bo nipopaisani nu Alatala ka i Paulus

12 Yaku kana mangoe karoku mboto, nau ledo ria gunana. Jadi kutesa ruru anu nipopakita bo anu nipopaisani i Pue Yesus ka yaku. ² Sapulu pata-mpae naliu, naria saito topangoseaka i Kristus niposisaniku anu niore hau ri ponturo nu Alatala ri suruga. Ledo nisaniku ane karona mpuu-mpuu neore atau aga anu nipopakita ka ia. Aga Alatala nangisanina. ^{3,4} Kusili sangganipa: ia niore sampe nesua ri ponturo nelabi kabelona nosanga Firdaus. Ledo nisaniku bara karona mpuu-mpuu nioretaka atau aga anu nipopakita ka ia. Aga Alatala nangisanina. Bo hamai niepena tesa-tesa anu ledo nipakule mombasovadaka, tesa nabelo mpuu anu ledo masipato ratesa nu manusia. ⁵ Masipato yaku mangoe karo ntona ivehaitu sabana anu nikitana, tapi ledo kuoe karoku mboto. Yaku aga madota mangoe anu nompakalanto kalenteku. ⁶ Nau yaku madota mangoe karoku mboto, ledo aga tesa ntodoyo, ledo davaku, apa naria mpuu anu masipato kuoe. Tapi yaku ledo madota mangoe karoku mboto ala nee-nee yaku rabila ntona sabana anu nipopakita ka yaku. Aginamo ira mombabila yaku sabana anu nikitara riara nggatuvuku atau anu niepera lako ri tesaku.

⁷ Tapi ledo mabelo ane malanga gaga raraku nantora pura-pura anu nipokumaaka nipopakita i Yesus ka yaku. Haitumo sabana nidekeiNa dua mompandasa yaku. ^{††} Dua haitu nirapaka suro lako ri Magau nu Seta nompandasa yaku ala yaku ledo majadi masombo. ⁸ Talu-ngganimo niperapiku mpuu-mpuu nte i Pue Yesus ala suro lako ri Magau nu Seta haitu rapopalai lako nte yaku. ⁹ Tapi niuliNa ka yaku, "Nemo. Nipotoveku iko, bo haitu naganamo ka iko. Apa ane nalente iko, kuasaKu malanto mpuumo riara nggatuvumu." Jadi, haitumo sampe yaku nadamba nangoe anu nompopakita kalenteku, apa ane yaku nalente, kuasa i Kristus nokarajaa riara ntaiku. ¹⁰ Jadi ane nalente yaku, nadamba yaku. Ane yaku rasalai, atau mapepa atau rapandasa, atau rapakasusa sabana yaku nangoseaka i Kristus, nadamba yaku. Apa ane nalente yaku, kuasa i Kristus mpuu-mpuu nompakaroso yaku.

¹¹ Sampesuvu-sampesuvu, yaku hii notesa mpo todoyo, tapi komiu nompasuu yaku notesa ivesia! Kakanana komiumo masipato mombatoiya yaku, sa-

† Basa Yunani: Naria saito topangoseaka i Kristus niposisaniku anu niore—Kakanana i Paulus notesa karo mboto (peinta 12:7) tapi nitabuniaka sakide sampe niulina "topomparasaya nisaniku". Bara naeya matana ane ia ratoiya ntona sabana anu nipopakita i Yesus ka ia. †† Basa Yunani: "nidekeiNa karui ri karoku". Nadea topangisani Buku Gasa nanguli batuana karo i Paulus nambela dua. Tapi sanu nanguli batuana i Paulus nieva bo nipandasa nu balina.

bana naupa yaku hii ledo naria nturoku, yaku ledo nto-to nakura ane rapoposisala ante tona nirekemiu suro-suro anu ledo ria kasimbayuna! ¹² Tempo yaku naria ri situ nte komiu, nipoviaku tanda-tanda anu nompakalanto yaku mpuu-mpuu suro i Yesus. Yaku nosabara nokarajaa nau nadea kasusa nirasauku, bo nipoviaku tanda-tanda nipokumaaka bo kabaraka-kabaraka ante kuasa lako nte Alatala. ¹³ Ledo nipoposisalaku komiu ante todea topomparasaya ntanina. Aga sangaya ledo nipoviaku nte komiu, haitumo yaku ledo nekitanggu nte komiu. Nipekirimiu nasala yaku novia ivesia? Ledo ntoto!

Kakini rara i Paulus nompekirika toKorintus

¹⁴ Pariaramo tesaku hitu. Sii-sii nasadiamo yaku tou mompelioda komiu katalu-ngganina, bo yaku batena ledo mekitanggu nte komiu. Sabana, ledo kakalumanamiu nieloku tapi pepotovemiu! Apa ledo ngana anu masipato mompasiromu kakalumana ka totuana tapi totua masipato mompasiromu kakalumana ka ngana. ¹⁵ Jadi yaku nasadia mombadekei ka komiu pura-pura anu naria nte yaku, nau karoku mboto. Ane ivesia kambaso pepotoveku ka komiu, nakuya pepotovemiu ka yaku aga sakide?

¹⁶ Nisanimiu mbotomo yaku ledo sanggani nompakasusa komiu mompekirika katuvuku. Tapi da naria-pa tona nanguli yaku noakala. Pangulira yaku nombabagiu komiu ala manggava untu ka karoku mboto. ¹⁷ Berimbamo? Nariamo komiu niakalani ntona nituduku tou nte komiu, sampe yaku nanggava untu ka karoku mboto? Natantu ledo! ¹⁸ Nituduku i Titus tou nte komiu bara ipia nosanggani-nggani ante sampe-suvuta ntanina. Nariamo i Titus nombaalani komiu? Natantu ledo! Nisanimiu mbotomo kami randua nosangu rara bo pokainggu kami nasimbayu.

¹⁹ Nipekirimiu tesa kami hitu bara aga manjaliku karo kami ri ngayomiu? Sampesuvu-sampesuvu nipotoveku, ledo ntoto nakana! Pura-pura hitu nitesa kami sabana kami nosangu rara nte i Kristus bo Alatala mboto nanggita kami. Pura-pura anu nipovia kami, nipovia ala mompakaroso pomparasayamiu. ²⁰ Apa nakini raraku, nee-nee ane yaku tou nte komiu kukava komiu ledo mpo anu nisarumakaku, bo pokaingguku nte komiu ledo mpo anu nisarumakamiu. Nee-nee kukava komiu mosinggarau, bara masirati, bara marau, bara aga mompekirika karo mboto. Nee-nee kukava komiu mosisalai bara mositunturaka bara malanga rara bara mompakagado todea topomparasaya. ²¹ Nakini raraku ane tou nte komiu vai yaku, Alatala mompakaeya yaku ri ngayomiu, bo yaku motumangi ri ngayomiu sabana madea komiu anu nadosa bara ipia dopa najea lako ri pokainggura nadaa bo nabuga. Bara maria da nompogau tona ledo bereina

mboto, bara movia anu ledo ntoto masipato mpo anu nabiasa nipoviara bara ipia.

Pepatora-pepatora kaupuna

13 ¹⁻² Katalu-ngganikana hitu yaku makava nte komiu. Tempo yaku ri situ nte komiu karongganina bara ipia, nipopatoraku ka ira topovia dosa bo ka pura-pura tona ntanina, tumo rapovia dosa. Jadi hitupa nau yaku ledo ri situ nte komiu, kupopatora mpanjili ka komiu: tumo mpuu movia dosa! Riara Buku Gasa niuli ane maria tona nirai, kana maria randua atau tatalu sabi ala rasani kakanana, bara nasala ia bara ledo. Maupu sia pade mamala rahuku. † Ane makava ri situ yaku bo komiu dopa nenonto novia nadaa, domo maasi matakunanggita komiu tapi kuhuku mpuu! ³ Niperapimiu tandana yaku mpuu-mpuu niposuro i Kristus. Jadi ane kuhuku tona novia dosa rasanimumo yaku mpuu-mpuu niposumba i Kristus! Sabana ane Ia mangonteaka komiu Ia ledo malente, tapi Ia mpuu-mpuu makuasa. ⁴ I Kristus nalente mami tempo Ia nipaku ri kayu salib sampe namate. Tapi Ia natuvu mpanjili sabana kuasa lako nte Alatala. Kami anu nosangu rara ante i Kristus, nalente muni nasimbayu mpo Ia bara ipia. Tapi kami natuvu ante kuasa nu Alatala, nasimbayu mpo i Kristus, bo ane mantingayo komiu ngena kami, rakitamiu kuasa nidekei nu Alatala ka kami.

⁵ Sampesuvu-sampesuvu, paresa mbotomo karomiu ala rasanimiu bara mpuu-mpuu komiu nangoseaka i Kristus. Peinta mbotomo raramiu. Natantu rasanimumo i Yesus Kristus naria riara ntaimiu! Ane i Kristus ledo naria riara ntaimiu, batuana komiu ledo mpuu-mpuu topangoseaka Ia. ⁶ Nisarumakaku nisanimumo kami hii mpuu-mpuu suro i Kristus. ⁷ Kami nosambaya nerapi nte Alatala ala komiu nee movia dosa. Patuju

† Patuju i Paulus, tatalu sabi haitu talu-nggani ia nakava ri Korintus.

kami nosambaya ivesia, ledo mompopakita kami hitu mpuu-mpuu suro i Kristus. Tapi patuju kami ala komiu batena movia anu nabelo. Jadi nau sanu tona ri situ da nombareke kami ledo suro i Kristus, ledo makuya, asaa komiu movia anu nabelo! ⁸ Ane komiu mangoseaka anu nakana, ledo rapakule kami mangeva komiu. Kami aga madota mantulungi komiu mangoseaka anu nakana. ⁹ Nadamba mpuu rara kami ane kami nalente, asaa komiu maroso momparasaya. Jadi kami bate-batena mosambaya ala pokainggumiu majadi mabelo pura. ¹⁰ Haitu sampe nitulisiku sura hitu ka komiu dopame yaku tou, ala ane makava ri situ nte komiu yaku, ledo paraluu makasara yaku mompakabelo pokainggumiu ante kuasa nidekei nTupu ka yaku. Apa kuasa haitu nidekeiNa ka yaku ala mompakaroso komiu, ledo ala mompakagero komiu.

Petabe Kaupuna

¹¹ Jadi sampesuvu-sampesuvuku, pakadambamo raramiu. Pasimbukumo mompakabelo pokainggumiu mpanjili. Tarimamo pepatudukiku hitu! Komiu kana matuvu mosangu pekiri bo mosangu rara, bo mosing-gabelo. Bo Alatala, puna pepotove bo katinonto, mosanggani-nggani ante komiu.

¹² Posipakavotemo tabe saito bo saito ante tove. Bo tarimamo tabe lako ri pura-pura topomparasaya ri sii.

¹³ Kuperapi Tuputa Yesus Kristus mombadekei belo ka komiu, bo Alatala mompotove komiu, bo Nosa Gasa nu Alatala mompakasangu komiu bo momporoa komiu pura-pura.

Tabe lako nte yaku,
Paulus

19-May-2009@12:42, Backup Description=19-May-2009@09:53, snave -
26-May-2009@11:04, Backup Description=26-May-2009@11:03, B Altork - ❖❖❖

Galatia

Vamba nu Tesa

Propinsi Galatia niparenta Magau Mbaso ri ngata Roma. Sii-sii, Galatia ri bagia negara Turki. Toponturo ri propinsi Galatia ledo toYahudi. Baipia ira netupu nte viata-viata bo tupu-tupu ntanina. Tapi tempo i Paulus nakava nompatolele Kareba Belo ka ira, nadea ira nomparasaya i Kristus.

Tempo i Paulus nalai lako ri propinsi Galatia, nakavamo tona nanggeni pepatuduki nasala. Ivei pepatudukira: "Ledo nagana aga momparasaya i Yesus. Kita kana rasuna bo mangoseaka Atura-atura agama Yahudi ala kita mpuu-mpuu majadi manoa ri panggita nu Alatala."

Tempo i Paulus nangepe pepatuduki haitu, narau ia. Haitu sampe nitulisina sura hitu ka toGalatia. Riara sura hitu i Paulus nompakalanto kita majadi manoa ri panggita nu Alatala aga lako ri pomparasayata i Kristus, ledo sabana kita nisuna, ledo muni sabana nioseakata Atura-atura agama. Lako ri pomparasayata i Kristus, kita nireke muli i Abraham. Batuana, lako ri pomparasayata i Kristus, kita najadi nanao ri panggita nu Alatala bo kita manggava belo nijanji nu Alatala ka i Abraham (3:6-9).

I Paulus nanguli ia ledo nianggataka nu manusia manggeni Kareba Belo, tapi ia nianggataka i Yesus mboto. Bo Kareba Belo nipatolelena ka toGalatia nidekei i Yesus mboto ka ia (Pasal 1-2). Poko nu pepatudukina ivei: kita ledo majadi manoa ri panggita nu Alatala lako ri pangoseakata atura-atura agama, tapi kita majadi manoa lako ri pomparasayata i Yesus (Pasal 3-4). Kaupuna i Paulus nompatuduki pokainggu masipato ka topomparasaya i Yesus, haitumo, natuvu nangoseaka dota nu Nosa Gasa (Pasal 5-6).

Isi nu Sura

Tesa Pantepuuna (1:1-10)

I Paulus mpuu-mpuu suro i Yesus (1:11-2:21)

Ia ledo nianggataka nu manusia majadi suro, tapi nianggataka i Kristus mboto. Kareba Belo nipatolelena ledo lako nte manusia, tapi nitarimana lako nte i Yesus Kristus.

Pepatuduki i Paulus ka to Galatia, notesaki kabelo rara nu Alatala (Pasal 3-4)

Kita najadi nanao ri panggita nu Alatala sabana pomparasayata i Yesus, ledo sabana kita nangoseaka atura-atura agama.

Pepatora i Paulus ka toGalatia (5:1-6:10)

Ledo paraluu matundu nte atura agama, apa i Yesus nombakabasaka kita lako ri atura agama. Tapi nee aga mangoseaka dota rarata nadaa. Kita kana mangoseaka pekeniaka Nosa Gasa.

Petevai kaupuna (6:11-18)

1 ¹⁻² Sampesuvu-sampesuvu sampomparasaya i Yesus anu nasiromu ri umba-umba ri propinsi Galatia:

Sura hitu lako nte yaku i Paulus, suro i Yesus Kristus. Yaku ledo nisuro nu manusia bo ledo muni nianggataka nu manusia majadi suro. Tapi yaku nianggataka i Yesus Kristus mboto bo Tuamata Alatala anu nompakatuvu Ia mpanjili lako ri kamateNa.

Nadea tabe lako nte yaku, i Paulus, bo lako nte pura-pura sampesuvuta sampomparasaya anu nosanggani-nggani ante yaku ri sii. ³ Kuperapi Tuamata Alatala bo i Pue Yesus Kristus batena mabelo nte komiu bo mompakatinonto raramiu. ⁴ I Yesus nombadekei karoNa rapatesi mombasompo dosata nangoseaka dota nTuamata Alatala. PatujuNa ala Ia mamala mombakabasa-

ka kita lako ri kuasa nu dunia nadaa. ⁵ Alatala masipato rabila bo ratoiya sampe ri kasae-saena. Amin.

I Paulus nangonteaka toGalatia sabana ira nasalandala lako ri Kareba Belo

⁶ Nokumaa ntoto yaku nangepe komiu! Dopa nasae niparasayamiu Kareba Belo, nitubengosimumo Alatala! NipokioNa komiu majadi todeana sabana kabelo rara i Kristus nte komiu. Tano komiu aga nangoseaka pepatuduki ntanina anu niuli ntona "kareba belo".

⁷ Kakanana ledo ria "kareba belo" ntanina, aga Kareba Belo nipatolele kami ka komiu. Tapi naria tona nompakagado pekirimiu ante pepatudukira nasala. Patuju-ra aga mombabaliki Kareba Belo anu nantesaki i Kristus. ⁸ Tapi kuuli ka komiu, nau kami mboto atau malae-

ka lako ri suruga, isema-sema mompatolele kareba belo anu nosisala ante Kareba Belo nipatolele kami ka komiu bara ipia, tona haitu rapopogaa lako nte Alatala sampe ri kasae-saena.⁹ Tempo kami da naria nte komiu bara ipia, niuli kami mami ivesia, bo sii-sii kuuli vai sangganipa, ane maria tona mompatolele pepaduduki anu nosisala ante Kareba Belo nitarimami-umo, tona haitu rapopogaa lako nte Alatala sampe ri kasae-saena.

¹⁰ Jadi, berimbamo, sampesuvu-sampesuvu? Yaku nanguli ivesia mbeki ratoiya ntona? Ledo ntoto nakana! Yaku aga madota ratoiya nu Alatala. Bara nipekirimiu yaku aga madota mompakadamba rara nu manusia. Tapi haitu ledo muni nakana, apa ane rapana yaku da nompasimbuku mompakadamba rara nu manusia, ledo masipato yaku majadi batua i Yesus Kristus!

Kareba Belo nipatolele i Paulus nitarimana lako nte i Yesus, ledo nipeguruna nte manusia

¹¹ Sampesuvu-sampesuvu, kana rasanimiu Kareba Belo nipatoleleku ledo nopuna lako ri manusia.

¹² Kareba Belo ledo nitarimaku lako nte manusia, bo ledo muni manusia nompatuduki yaku. Tapi i Yesus Kristus mbotomo nompopaisani Kareba Belo haitu ka yaku.

¹³ Tantu niepemieumo tesa katuvuku bara ipia, tempo yaku da nantuntuni agama Yahudi. Yaku nompandasa todea topomparasaya i Yesus bo ledo naasi matakuku. Yaku batena nompasimbuku mompakaropu ira.

¹⁴ Natutupa yaku nangoseaka agama Yahudi pade pura-pura roaku toYahudi anu sanggatuvu nte yaku. Nadedi mpuu raraku nangoseaka pepaduduki bo ada-ada ntotua kami nggaulu.

¹⁵ Tapi dopame yaku nipoanaka, Alatala nompelisi yaku bo nompokio yaku majadi suroNa lako ri kabelo nu raraNa. ¹⁶ Ia nompopaisani AnaNa i Yesus ka yaku ala yaku mamala mompatolele Kareba Belo anu notesaki AnaNa haitu ka tona ledo toYahudi. Tempo yaku nipokio nu Alatala, yaku ledo kaliu-liu hau nte manusia merapi rapatuduki, *apa i Yesus mbotomo nompopaisani Kareba haitu ka yaku.*¹⁷ Yaku ledo muni kaliu-liu hau ri ngata Yerusalem manggita ira anu najadi suro i Yesus nokolupa pade yaku. Tapi yaku hau ri tana Arab, bo lako ri tana Arab nanjili vai hau ri ngata Damsyik.

¹⁸ Naliu talu-mpae pade hau ri ngata Yerusalem mosinggava nte i Petrus. Yaku nonturo nte ia aga sapulu lima-mbongi kasaena. ¹⁹ Tapi yaku ledo nanggita suro-suro ntanina, aga i Yakobus tuei i Pue Yesus. ²⁰ Tesa nitalisiku hitu nakana! Nisani nu Alatala mboto yaku ledo nodava! ²¹ Naupu haitu pade hau yaku ri bagia Siria bo Kilikia. ²² Sampe ri tempo haitu, todea topompara-

saya i Kristus ri bagia Yudea dopa nisanira lenjeku.

²³ Ira aga nangepe tesa ntona nanguli, "Topomparasaya kita topomparasaya bara ipia, anu madota mompakaropu kita, hitupa mompatolele Kareba Belomo!"

²⁴ Bo nitoyara Alatala sabana anu najadi ante yaku.

Suro-suro i Yesus ri ngata Yerusalem nanguli Kareba Belo niken i Paulus nakana

2 Naliu sapulu pata-mpae, sangganipa vai yaku hau ri ngata Yerusalem nosanggani ante i Barnabas. Bo nikeniku muni i Titus. ² Yaku hau ri Yerusalem sabana naria tesa nu Alatala nombatudu yaku hau. Nakavapa hamai, yaku aga nasiromu ante pakeni-pakeni ntodea topomparasaya, bo nipopaisaniku ka ira isi Kareba Belo anu nipatoleleku ka tona ledo toYahudi. Nakini raraku mbelaka rasalaira pepadudukiku sampe domo maria gunana pokarajaaku mompatolele Kareba Belo, nau anu nipoviaku bara ipia, atau anu da nipoviaku sii-sii. ³ *Tano ira nasituju nte pepadudukiku. Haitu nisaniku sabana* i Titus, toYunani anu nosanggani ante yaku hamai, ledo nipasuura rasuna. ⁴ Tapi naria tona ntanina madota mompasuu i Titus rasuna, nangoseaka atura agama Yahudi. Panguli ntona haitu, ira topomparasaya i Kristus, tano aga davara. Ira nesua nggalino-lino ri kasiromu kami bo nomata-matai kami. Patujura ala pura-pura topomparasaya matundu nte atura-atura agama Yahudi. Tapi kita ledo paraluu matundu nte atura-atura haitu ala majadi manoa ri panggita nu Alatala. Kita nikabasaka lako ri atura haitu sabana kita nosangu rara ante i Yesus Kristus. ⁵ Kami ledo ntoto natundu nte pepadudukira, nau aga sam-palai. Nitidamaka kami ala Kareba Belo ledo ragalo nte pepadudukira nasala, bo ala Kareba Belo nitarimamiu mpuu-mpuu nakana.

⁶ Jadi pakeni-pakeni ntodea topomparasaya anu nireke nalanga nturora nasituju ante Kareba Belo nipatoleleku. (Nau nalanga panggana nau ledo, nasimbayu ri panggikaku, sabana Alatala ledo nompelenje.) Ledo ria nuapa-nuapa nitambaira ka Kareba haitu.

⁷ Tapi nisaniramo yaku niparasaya nu Alatala manggeni Kareba Belo ka tona ledo toYahudi, nasimbayu mpo i Petrus niparasaya nu Alatala manggeni Kareba Belo ka toYahudi. ⁸ Alatala nombadekei pompakule ka i Petrus majadi suro ka toYahudi, bo Ia muni nombadekei pompakule ka yaku majadi suro ka tona ledo toYahudi. ⁹ I Yakobus, i Petrus bo i Yohanes, nireke pakeni ntodea topomparasaya i Yesus ri Yerusalem. Nikitara Alatala nombadekei pokarajaa nabelo ka yaku, haitumo majadi suroNa. Jadi ira nosijoko pale ante kami bo i Barnabas. Haitumo tandana kami pura-pura roa sampobago nanggeni Kareba Belo. Kami pura-pura nasituju ala kami bo i Barnabas manggeni Kareba Belo ka tona ledo toYahudi bo ira

manggeni Kareba Belo ka toYahudi. ¹⁰ Aga sangaya niperapira, haitumo ala kami ledo menonto mantulungi tona napakasi. Bo haitumo bago nipooge raraku bo nipoviaku mpuu-mpuu.

I Paulus nangonteaka i Petrus ri ngata Antiokhia

¹¹ Tempo i Petrus † nakava ri ngata Antiokhia bara ipia, nionteakaku nggamata-mata ia sabana pokaingguna hamai mpuu-mpuu nasala. ¹² Bara ipia ia ledo nompoposisala toYahudi ante tona ledo toYahudi. Ia nangande nosanggani-nggani ante sampesuvuta sampomparasaya ledo toYahudi. Naupu sia, nakavamo bara sako-ndua roa i Yakobus lako ri Yerusalem. *Iramo toYahudi anu nomparasaya i Yesus. Pangulira topomparasaya i Yesus kana rasuna nangoseaka atura agama Yahudi.* Nakavapa ira, domo nipeili i Petrus topomparasaya anu ledo toYahudi. Domo nabia ia nangande nosanggani-nggani nte ira, †† apa naeka ia rasalai ntopomparasaya toYahudi dako nakava haitu. ¹³ Bo topomparasaya ntoYahudi ntanina nompasiala pokainggu i Petrus muni nau nisanira ledo masipato. Sampe nau i Barnabas mboto natekeni nangoseaka pokainggura haitu. ¹⁴ Tapi nikitaku pokainggura haitu ledo nosinggambela ante pepatuduki nakana lako ri Kareba Belo. Haitu sampe nionteakaku i Petrus ri ngayora pura-pura ivei: “Komiu toYahudi, tapi komiu mboto nabiasa natuvu mpo tona ledo toYahudi, komiu domo paraluu mangoseaka ada ntoYahudi. Jadi rapokuya rapasuukamiu tona ledo toYahudi mangoseaka ada ntoYahudi?”

Manusia nireke nanao ri panggita nu Alatala lako ri pomparasayara i Yesus, ledo lako ri pangoseakara atura-atura agama

¹⁵ Sampesuvu-sampesuvu, kami toYahudi mami lako ri pompoanaka kami, kami ledo mpo tona ledo toYahudi anu niuli nadosa *sabana ledo nioseakara atura agama*.¹⁶ Tapi nau ivesia, nisani kami manusia nireke nanao ri panggita nu Alatala ledo sabana nangoseaka Atura-atura agama, tapi sabana pomparasayara i Yesus Kristus. Jadi kami mboto pomparasaya i Yesus Kristus ala majadi manoa ri panggita nu Alatala. Kami najadi nanao sabana pomparasaya kami i Kristus, ledo sabana nangoseaka Atura-atura agama! Apa ledo ria saitoa majadi manoa ri panggita nu Alatala sabana pangoseakana Atura-atura agama.

¹⁷ Jadi, ane kami toYahudi manjarumaka majadi manoa ri panggita nu Alatala lako ri posangu rara kami ante i Yesus Kristus, *batuana kami domo nanjarumaka Atura agama. Bo ane kami domo nanjarumaka*

† Petrus. Riaru basa Yunani: “i Kefas.” †† Nantuntuni ada ntoYahudi, toYahudi nitagi mangande nosanggani-nggani nte tona ledo nisuna, haitumo tona ledo toYahudi, mbelaka rakandera anu nitagi nu atura haitu bo mompakaruto karora mboto.

Atura agama, batuana kami najadi nasimbayu mpo tona ledo toYahudi anu niuli nadosa *sabana ledo nioseakara Atura agama*. Jadi berimbamo? Mamala raulita i Kristus nanggeni kami majadi nadosa? Natanu ledo! ¹⁸ Ane rapana yaku manjili manjarumaka Atura agama anu nikabasakakumo, tantu yaku nombaliunka Atura haitu! ¹⁹ Apa lako ri Atura agama *sampe nisaniku ledo kupakule majadi manoa ri panggita nu Alatala ante nangoseaka Atura haitu. Jadi sabana haitu, sii-sii* yaku nenontomo nanjarumaka Atura agama ‡ ala yaku mamala mpuu-mpuu matuvu nangoseaka dota nu Alatala. Tempo i Kristus namate ri kayu salib, yaku muni nireke namate nosanggani-nggani ante Ia. ²⁰ Jadi namala rauli ivei: nau yaku natuvu, domo aga yaku saitoku natuvu, tapi i Kristus natuvu riaru nggatuvuku. Bo ri katuvuku ri dunia hitu, yaku natuvu mpuu-mpuu pomparasaya Ana nu Alatala anu nompotove yaku bo nombadekei karoNa rapatesi manjambei yaku. ²¹ Yaku ledo nompoara kabelo rara nu Alatala haitu. Apa ane rapana kita mamala majadi manoa ri panggita nu Alatala ante mangoseaka Atura agama, tantumo kamate i Yesus Kristus ledo maria gunana!

Nosa Gasa nidekei sabana pomparasaya i Yesus, ledo sabana nangoseaka atura-atura agama

3 Nadoyo mpuu komiu toGalatia! Isema nanjalipuyo komiu sampe komiu domo nadota nangoseaka pepatuduki nakana? Nipakalantoku mpuu nanguli ka komiu bara ipia patuju kamate i Yesus Kristus ri kayu salib. ² Aga sangaya madota kusani lako nte komiu. Komiu nantarima Nosa Gasa nu Alatala sabana nangoseaka Atura agama? Atau nangepe bo pomparasaya Kareba Belo i Kristus? Tantu nitarimamiu Nosa Gasa apa niepemi bo niparasayamiu Kareba Belo. ³ Jadi nakuya komiu nadoyo gaga? Lako ri pamulana komiu pomparasaya i Kristus, nitarimamiu katuvu nabaru lako ri kuasa Nosa Gasa. Rapakulemiu mompapola katuvu nabaru ante pompakulemiu mboto? Tantu ledo! ⁴ Berimba? Ledo ria gunana pura-pura anu nirasaimiu bara ipia? Tantu naria pura gunana! ⁵ Alatala najoi rarna nompopanau Nosa Gasana ka komiu bo nipoviaNa kabaraka-kabaraka ri tatangamiu. Jadi berimba? NipoviaNa pura-pura haitu sabana komiu nangoseaka Atura agama? Tantu ledo! NipoviaNa pura-pura haitu sabana komiu nangepe bo pomparasaya Kareba Belo i Kristus!

Tona najadi nanao ri panggita nu Alatala sabana pomparasayana, iamo nireke muli Nabi Abraham

⁶ Pekirimo pomparasaya i Abraham. Nitulisi riaru Buku Gasa ivei: “I Abraham pomparasaya Alatala, bo

‡ Basa Yunani: “lako ri Atura agama, yaku namate ka Atura agama”

lako ri pomparasayana haitu ia nireke nu Alatala tona nanao." ⁷ Jadi, kana rasaniami, tona natuvu nomparasaya Alatala, iamo nireke muli i Abraham mpuu, sabana pomparasayana nasimbayu nte pomparasaya i Abraham. ⁸ Lako ri lamba pamulana Alatala nonia ala tona ledo toYahudi majadi manoa ri panggitaNa sabana pomparasayara. Jadi kareba nabelo haitu nipopaisaniNa nokolu ka i Abraham, evamo nitulisi ri Buku Gasa ivei: "Pura-pura manusia ri dunia manggava belo lako nte Yaku sabana komiu." ⁹ I Abraham nomparasaya bo Alatala nombadekei belo ka ia. Jadi ivesia muni pura-pura tona natuvu nomparasaya Alatala, radekeika belo muni nasimbayu ante belo nidekeiNa ka i Abraham.

Kita manggava belo nijanji nu Alatala ka i Abraham ledo sabana pangoseakata Atura-atura agama

¹⁰ Isema-sema nanjarumaka majadi manoa ri panggita nu Alatala sabana nioseakana Atura agama, iamo rahuku nu Alatala. Nisanita haitu sabana riaru Buku Gasa nitulisi ivei: "Isema-sema ledo natutu nangoseaka pura-pura parenta nitulisi riaru Buku Atura Agama, iamo rahuku nu Alatala." ¹¹ Nalanto mpuu ledo ria tona nireke nu Alatala nanao lako ri pangoseakana Atura agama, apa naria tesa ntanina ri Buku Gasa nanguli ivei: "Tona najadi nanao ri panggita nu Alatala sabana pomparasayana, iamo matuvu mabelo." ¹² Tapi ane tona natundu nte Atura agama, haitu ledo ntoto nasimbayu ante tona nomparasaya Alatala, *sabana tona natundu nte Atura agama nanjarumaka pompasimbukuna mboto, ledo nanjarumaka Alatala*. Evamo niuli riaru Atura agama ivei: "Isema-sema natutu nangoseaka pura-pura Atura agama, iamo matuvu mabelo." ¹³ *Kita manusia masipato rahuku nu Alatala, sabana kita pura-pura nombaliunaka AturaNa*. Tapi i Kristus nombakabasaka kita lako ri pehuku haitu, sabana tempo Ia namate ri kayu salib, Iamo nihuku manjambei kita. Nisanita i Kristus nihuku nu Alatala sabana naria tesa riaru Buku Gasa nanguli ivei: "Isema-sema namate niloe ri kayu, haitu tandana ia nihuku nu Alatala." ¹⁴ Patuju i Kristus nombadekei karoNa rapatesi ivesia, ala tona ledo toYahudi mamala muni manggava belo nasimbayu ante belo nijanji nu Alatala ka i Abraham nggaulu. Belo haitu ratarimara sabana ira nosangu rara nte i Yesus Kristus. Ivesia muni kita anu nomparasaya i Kristus manggava Nosa Gasa anu nijanji nu Alatala nggaulu.

Pojanji nu Alatala ka i Abraham bo mulina ledo mabalibali

¹⁵ Sampesuvu-sampesuvuku, kuala jonjo lako ri katuvuta eo-eo. Ane kita movia sura pojanji bo sura haitu nipakaasa nangoseaka ada nu pomarenta, isi nu sura haitu domo namala rapakalipo ntona atau ratambaiki isina. ¹⁶ Ivesia muni ante pojanji nu Alatala. Ia nombadekei pojanjiNa ka i Abraham bo mulina. Riaru Buku Gasa ledo nitulisi belo haitu radekei "ka muli-mulimu", batuana, ka muli dea i Abraham. Anu nitulisi, belo haitu radekei "ka mulimu", batuana ka saito muli i Abraham, haitumo i Yesus Kristus. ¹⁷ Patujuku ivei: Pojanji nu Alatala ante i Abraham nipakaasa nu Alatala mboto. Pata-atu talupulu mpae kaliuna haitu, Alatala nombadekei Atura agama anu nipapola Nabi Musa. Atura-atura agama haitu ledo namala mombabaliki pojanji nokolu sampe pojanji haitu domo madupa. Pojanji nu Alatala kana madupa pura. ¹⁸ Ane rapana tona mantarima belo sabana nioseakana Atura agama, batuana, belo haitu ledo nikavana lako ri pojanji nu Alatala, tapi aga lako ri pompasimbukuna mboto! Tapi, Alatala nombadekei belo ka i Abraham sabana pojanjiNa. Belo haitu pedekei bayangi lako ri kabelo rara nu Alatala.

Patuju Atura-atura agama

¹⁹ Jadi ane ivesia, nuapa tano patuju nu Atura agama? Alatala nombadekei Atura-atura agama naliutaka pojanjiNa ka i Abraham, ala malanto ka kita, manusia nadosa nombaliunaka dotaNa. PatujuNa ala Atura haitu rapake sampe kakava nu Muli i Abraham anu niboto riaru pojanjiNa nte i Abraham nggaulu, *haitumo i Yesus Kristus*. Alatala nombatudu malaekamalaekana manggeni Atura agama ka i Musa anu najadi topotariolo nompapola Atura haitu ka manusia. ²⁰ Topotariolo aga niparaluu ane maria randua tona nosijanji. Tapi tempo Alatala novia pojanjiNa ante i Abraham, ledo ria malaeka atau tona ntanina ri olona. Aga Alatala mbotomo nojanji.

²¹ Jadi nuapa batuana? Atura agama nositaliku ante pojanji nu Alatala? Tantu ledo. Ane rapana rapakuleta mangoseaka Atura agama sampe rakavata katuvua nabelo, tantu haitumo majadi dalata mompakanoa karota mboto ri panggita nu Alatala. ²² Tapi niuli ri Buku Gasa, pura-pura manusia nikuasai nu dosa. Jadi, ledo ria dala ntanina mompakanoa kita ri panggitaNa, aga momparasaya i Yesus Kristus. Katuvua mabelo nijanji nu Alatala radekeiNa ka isema-sema nomparasaya.

²³ Bara ipia, dopame kita nomparasaya i Yesus, kita da natundu nte Atura agama. Kita nirapaka tona nitarunggu apa kita nipou Atura agama sampe makava

† *Kajadia 12:3; 18:18; 22:18* †† *Ulangan 27:26* ‡ *Habakuk 2:4*
‡† *Ulangan 21:23*

tempona Alatala mompopaisani i Kristus ka kita, bo raparasayata Ia. ²⁴Jadi Atura agama haitu nirapaka topopaa ngana anu nombajagai kita sampe makava i Yesus Kristus, ala kita majadi manoa ri panggita nu Alatala sabana pomparasayata i Kristus. ²⁵Sii-sii nakavamo i Yesus bo manusia namala nomparasaya Ia ala majadi manoa ri panggita nu Alatala. Jadi kita domo paraluu matundu nte Atura agama.

²⁶Jadi, komiu pura-pura nosangu rara nte i Yesus Kristus, komiu najadi ana-ana nu Alatala sabana komiu nomparasaya i Kristus. ²⁷Komiu pura-pura nid-iu, tandana komiu topangoseaka i Kristus, bo ni-pasialamiumo inggu-inggu i Kristus. ²⁸Ri panggita nu Alatala domo ria posisalana toYahudi bo tona ledo toYahudi, batua bo tona ledo batua, langgai bo mombine. Komiu pura-pura nasimbayu ri panggitaNa sabana komiu nosangu rara ante i Yesus Kristus. ²⁹Jadi ane komiu todea i Yesus Kristus, komiu muni muli-muli i Abraham. Bo komiu muni masipato mantarima anu nijanji nu Alatala ka i Abraham.

4 ¹⁻²Anu nipatujuku ivei: rapana maria saito ana ntona nakalumana. Ia nijagai ntona nipakatantu ntuamana, bo kakalumanana niurusi ntona nipakakuasaka sampe makava tempona nipakatantu ntuamana. Nau ia masipato mantarima pura-pura kakalumana ntuamana bara maipia, tempo ia da nangana, katuvuna nasimbayu ante katuvu nu batua, *haitumo, katuvuna niurusi ntona ntanina*.³ Ivesia muni kita. Dopame nisanita pepatuduki nakana, kita nipobatu anu daa, anu nombakuasai dunia hitu. ⁴Tapi nakavapa tempo nipakatantu nu Alatala, nisuroNa AnaNa makava ri dunia. AnaNa haitu nipoanaka nu mombine, bo Ia natundu nte Atura-atura agama Yahudi. ⁵Ia nisuro nu Alatala mombakabasaka kita nipou nu Atura agama, ala kita mamala raanggataka majadi ana-ana nu Alatala.

⁶Alatala nompopanau Nosa Gasa nu AnaNa riarantaita sabana kita najadi ana-anaNa. [†]Bo lako ri pekeniaka Nosa Gasa riarantaita, kita nekakai nte Alatala nanguli, "Tata, Tuama nipotove kami!" ⁷Jadi, komiu domo batua tapi ana. Komiu najadi ana-ana nu Alatala bo natantum komiu muni radekeikaNa pura-pura anu nipakasadiaNa mami ka ana-anaNa.

Nakini rara i Paulus ka toGalatia

⁸Bara ipia, dopame nisanimiu Alatala, komiu nipobatua nu tupu-tupu ntanina anu nisarumakamiu nakuasa, tano mai, ledo Alatala. ⁹Tapi sii-sii nisanimiumo Alatala—atau nabelopa rauli, nisani nu Alatala komiu. Jadi nakuya komiu madota matundu mpanjili nte anu ledo nompakule mantulungi komiu majadi

[†] Alatala nompopanau Nosa Gasa nu AnaNa riarantaita sabana kita najadi ana-anaNa ATAU: Alatala nompopanau Nosa Gasa nu AnaNa riarantaita mompopakita kita najadi ana-anaNa.

manoa ri panggita nu Alatala? Nakuya komiu madota rapobatuara mpanjili? ¹⁰Komiu natutu nompakaoge eo-eo mbaso, bula-bula natantu, atau mpae-mpae natantu, apa da nisarumakamiu maria gunana mompakanoa komiu ri panggita nu Alatala. ¹¹Nakini mpuu raraku, nee-nee ledo maria gunana katiti nu iniku nompatuduki Kareba Belo ka komiu bara ipia!

¹²Sampesuvu-sampesuvuku, kuperapi ante mpuu-mpuu raraku ala rapasialamiu pokaingguku. Sabana *naupa toYahudi yaku, domo niouseakaku ada-ada ntoYahudi*, ala majadi masimbayu nte komiu tona ledo toYahudi.

Komiu nabelo mpuu nte yaku bara ipia. ¹³Nisanimiu mbotomo pamulana yaku nipaloga nompatolele Kareba Belo ka komiu sabana yaku nadua. ¹⁴Bo nau duaku haitu nompakasusa komiu, ledo ntoto narunggu raramiu bo ledo nipoaramiu yaku. Nitarimamiumo yaku, nitarimamiu mpo malaeka nu Alatala, atau mpo i Yesus Kristus mboto! ¹⁵Tempo haitu nasana mpuu raramiu nte yaku. Tapi nakuya sii-sii domo nasana raramiu nte yaku? Bara ipia nisaniku komiu mpuu-mpuu nasadia mantulungi yaku. Ane rapana mamala, nau matamiu mboto radekeimiu rasui ka yaku. ¹⁶Jadi, hitupa yaku nirekemiu balimiu sabana anu nakana nitesaku ka komiu?

¹⁷Tona ntanina ri situ nompasimbuku mpuu-mpuu mangala raramiu, tapi patujura ledo nabelo. Ira aga madota mompopogaa kita ala komiu mangoseaka ira ante raramiu mpuu-mpuu. ¹⁸Kakanana nabelo mompasimbuku ante mpuu-mpuu rara movia anu nabelo, asaa masaro ivesia, ledo aga tempo yaku nosangani ante komiu!

¹⁹Yaku mpuu-mpuu nompotove komiu! Komiu mpo anaku mboto! Yaku nandasa nompekirika komiu, nasimbayu mpo mombine nandasa mpuu tempo noana. Bo yaku batena masusa ivesia sampe inggu-inggu i Kristus mpuu-mpuu malanto rakita riaranngatuvumiu. ²⁰Nalentora mpuu raraku mosangani-ngangani nte komiu sii-sii, ala raepemiu tesaku bo rasanimiu pombarasaiku, sabana nasudumo raraku nompekirika komiu!

Tesa i Hagar bo i Sara nirapaka Atura agama bo pojanji nu Alatala

²¹Hee komiu anu madota matundu nte Atura agama *ala majadi manoa ri panggita nu Alatala!* Mai kuuli ka komiu anu nitulisi riaru Buku Atura Agama! ²²Nitulisi ivei: i Abraham randua anana, saito nipoanaka i Hagar, mombine anu najadi batua, bo saitopa nipoanaka i Sara, berei i Abraham anu ledo najadi batua. ²³Ana nu batua haitu nipoanaka nangoseaka dota nu manusia. Tapi ana nu mombine anu ledo najadi batua nipoanaka nangoseaka pojanji nu Alatala ka i Abraham.

²⁴ Tesa hitu najadi gambara ka kita. Randua mombine haitu nirapaka rongaya pojanji nu Alatala. I Hagar nirapaka pojanji nipovia nu Alatala nte todeaNa ri Bulu Sinai, haitumo Atura agama. Pura-pura tona anu nompasimbuku nangoseaka Atura agama natuvu mpo batua. ²⁵ I Hagar nirapaka Bulu Sinai ri tana Arab, bo nirapaka muni ka ngata Yerusalem ri dunia hitu, sabana tupu ngata Yerusalem nipobatua nu Atura agama.

²⁶ Tapi i Sara nirapaka Yerusalem ri suruga. I Sara nireke tinata, sabana ia ledο najadi batua, *bo kita ledο nipobatua nu Atura agama.*²⁷ Ia nitesaki riaru Buku Gasa ivei:

“Hee mombine nagampa, anu dopa sanggani noana! Komiu kana madamba, Komiu anu dopa sanggani nombarasai dua poana, komiu kana mongare ante damba raramiu, sabana mombine nipalaisi bereina manggava madeapa anana pade mombine anu naria bereina.”

Yesaya 54:1

²⁸ Sampesuvu-sampesuvu, komiu najadi ana-ana nu Alatala nangoseaka pojanjiNa, nasimbayu nte i Ishak anu nipoanaka nangoseaka pojanji nu Alatala. ²⁹ Tapi tempo nggaulu ana nipoanaka nangoseaka dota nu manusia, nompandasa tueina anu nipoanaka nangoseaka dota nu Nosa Gasa nu Alatala. Ivesia muni kita sii-sii. ³⁰ Tapi berimba niuli riaru Buku Gasa?

“Popalaimo mombine anu najadi batua ante anana, sabana anana haitu ledο mamala manggava bagia lako ri kakalumana ntuamana mosanggani-nggani ante ana nipoanaka mombine anu ledο najadi batua.”

^{†31} Jadi, sampesuvu-sampesuvu, kita ledο nasimbayu nte ana nu mombine anu najadi batua. Kita nasimbayu nte ana nu mombine anu ledο najadi batua, *sabana kita ledο nipobatua nu Atura agama, tapi kita nomparasaya pojanji nu Alatala.*

Nee rapobatua nu Atura agama apa kita nikabasaka i Kristusmo lako ri atura-atura haitu

5 I Kristus nombakabasaka kita lako ri Atura agama ala kita mpuu-mpuu makabasaka. Jadi pakaroomo raramiu ala komiu batena makabasaka. Nee rapalamba karomiu rapobatua mpanjili. ² Pariaramo! Yaku, i Paulus, nanguli ka komiu, ane komiu mompasimbuku rasuna nangoseaka Atura agama Yahudi, ala majadi manoa ri panggita nu Alatala, batuana i Kristus ledο ntoto ria gunana ka komiu! ³ Sangganipa vai kuuli ka komiu, isema-sema madota rasuna, ia masipato mangoseaka pura-pura Atura agama ntani-na muni. ⁴ Ane komiu mompasimbuku majadi manoa ri panggita nu Alatala ante mangoseaka Atura agama, komiu nopudusi posangu raramiu nte i Kristus. Komiu

† *Kajadia 21:10*

notubengosi kabelo rara nu Alatala. ⁵ Tapi sampesuvu-sampesuvu, ante petulungi Nosa Gasa nu Alatala, kami nanjarumaka majadi manoa ri panggita nu Alatala sabana pomparasaya kami i Kristus. Bo haitumo anu nipopeata ante mpuu-mpuu rarata! ⁶ Ane nosangu rara ante i Yesus Kristus kita, ledο ria gunana kita nisuna atau ledο nisuna. Aga nomparasaya i Kristus noguna. Bo ane kita mpuu-mpuu nomparasaya, rapotoveta roata.

⁷ Bara ipia nioseakamiu nabelo Kareba Belo. Jadi nakuya hitupa komiu domo nadota nangoseaka pepatuduki nakana? Isema nombalava komiu?

⁸ Natantu ledο Alatala, anu nompokio komiu majadi todeaNa. ⁹ Pepatuduki nasala nipatuduki ntona haitu nasimbayu mpo raga, sabana nau aga sakide raga rapake, pura-pura gando rapovia roti menggamba.

¹⁰ Tapi kita nosangu rara ante i Pue. Jadi niparasayaku komiu ledο mangoseaka pepatuduki nasala. Bo niparasayaku tona nompakagado pekirimiu ri situ kana rapambela pehuku nu Alatala, nau damo isema ia.

¹¹ Sampesuvu-sampesuvu, niuli ntona yaku mboto da nompatuduki tona kana rasuna ane madota majadi manoa ri panggita nu Alatala. Tapi ledο ntoto nakana! Ane rapana da nipatudukiku ivesia ka tona, nakuya bo da nipandasa ntoYahudi yaku? Ane rapana da nipatudukiku ivesia, natantu pepatudukiku ledο mompakadua rara ntoYahudi! Nadua rarara nangepe kamate i Kristus ri kayu salib. ¹² Aginamo topompakagado pomparasayamiu haitu ledο aga nombasuna karora mboto, aginamo ira mombatindi karora mboto! ††

Nee mangoseaka dota rara nadaa, tapi oseakamo dota nu Nosa Gasa

¹³ Sampesuvu-sampesuvu, komiu nipokio nu Alatala ala rakabasaka lako ri Atura agama. Aga nee sampe haitu majadi loga mangoseaka mpengaya-ngaya dota rara nadaa! Komiu kana mosimpotove bo mositulungi.

¹⁴ Naria parenta nanguli ivei: “Potovemo singgamanusiamiu nasimbayu mpo pompotovemi karomiu mboto.” † Ane raoseakamiu parenta sangu hitu, nasimbayu mpo nioseakamiu pura-pura Atura agama. ¹⁵ Tapi ane komiu batena nosinggarau bo nosipodua rara, pakabelo-belo! Magero singgani-ngganimo komiu ngena!

¹⁶ Patujuku ivei: komiu kana matuvu mangoseaka dota Nosa Gasa nu Alatala ala komiu ledο matuvu mangoseaka dota raramiu nadaa. ¹⁷ Apa dota rara nadaa nosieva nte dota nu Nosa Gasa. Rongaya haitu nosieva sampe kita ledο nasaro novia anu nipodotata mboto. ¹⁸ Tapi ane komiu nikenika Nosa Gasa nu

†† *Aginamo topompakagado pomparasayamiu haitu ledο aga nombasuna karora mboto, aginamo ira mombatindi karora mboto! ATAU: Aginamo topompakagado pomparasayamiu rapopalai lako nte komiu. ‡ Imamat 19:18*

Alatala, komiu ledo paraluu matundu nte Atura agama.

¹⁹ Nalanto mpuu pokainggu ntona anu nangoseaka dota rara nadaa. Jonjona ivei: ira nosipogau nte tona ledo bereira mboto. Pokainggura nabuga bo ledo nasi-pato. ²⁰ Ira netupu nte tupu-tupu ntanina bo nom-badoti tona ntanina. Ira nosipobali, nosibaga, nasiriati, nasalisa narau bo aga nangelo untu ka karora mboto. Ira nompopeumba posinggarau sampe nosinjabingga. ²¹ Nario matara nte mbara-mbara ntona, ira nanginu sampe nalangu bo nasiromu nangande bo nanginu sampe nabasa, bo nadea muni pokainggu ntanina ive-haitu. Jadi evamo niuliku ka komiu bara ipia, kupopatoro ka komiu sangganipa: tona nokainggu ivegahaitu ledo ntoto manggava bagia ri Poparenta nu Alatala.

²² Tapi ane tona nikenika Nosa Gasa nu Alatala, iveimo inggura: ira nosimpotove, ira nadamba bo nati-nonto rarara. Ira nosabara, nalusu bo nabelo rarara nte tona ntanina. Ira namala raparasaya, ²³ naede rarara, bo nombakuasai dota nu karora mboto. Ledo ria atura agama anu nombatagi pokainggu ivehaitu. ²⁴ Isema-sema nosangu rara ante i Yesus Kristus, nireke dota rarara nadaa namate nosanggani-nggani nte i Kristus tempo Ia nipaku ri kayu salib. Batuana, ira domo nikuasai dota rarara nadaa. ²⁵ Nosa Gasa nu Alatala nombadekei katuvu nabaru ka kita, jadi masipato kita matuvu mangoseaka dota Nosa Gasa haitu. ²⁶ Nee kita mompakalanga rarata, nee mosipodua rara bo nee masiriati.

Kita kana mositulungi bo nee mabasa movia anu nabelo

6 Sampesuvu-sampesuvu, ane rakavamiu roamiu sampomparasaya novia dosa, komiu anu natuvu nangoseaka Nosa Gasa nu Alatala kana manggeni ia manjili ri dala nakana. Tapi tesamiu ledo mamala makasara, kana malusu ramiu motesa ka ia. Bo pakabelo-belo! Nee sampe komiu mboto manavu riaro dosa! ² Ane roamiu sampomparasaya nombarasai susa bo pari, tulungimo ia. Apa ane komiu mositulungi, komiu mangoseaka parenta i Kristus. ³ Ane tona nompekiri karon nabelopa pade karo roa, tano ledo, ia aga nombabagiu karon mboto. ⁴ Aginapa simbo raparesana pokaingguna mboto ala rasanina bara nabelo pokaingguna bara ledo. Ane nabelo pokaingguna, mamala ia madamba mompekirika pokaingguna haitu. Ledo paraluu ia mompoposisala atau mompakasimbayu pokaingguna ante pokainggu ntona ntanina, ⁵ sabana saito-saito kana mombatunggu pokaingguna mboto.

⁶ Tona nipatudukika Tesa nu Alatala masipato mantulungi topompatuduki ia, bo nombabagi ka ia nuapanuapa nabelo naria nte ia.

⁷ Sampesuvu-sampesuvu, pakabelo! Ane rasarumakata kita mamala nombabagiu Alatala, kita aga nombabagiu karota mboto. Alatala ledo namala rapongei-ngeika! Nuapa nituda, haitumo rakato. ⁸ Batuana, ane tona batena natuvu nangoseaka dotararana nadaa, aselena, ia mamate bo rapopogaa lako nte Alatala. Tapi ane tona natuvu nangoseaka dota Nosa Gasa nu Alatala, rakavana katuvua nabelo sampe ri kasae-saena anu radekei nu Nosa Gasa. ⁹ Sabana haitu, nee mabasa rarata movia anu nabelo, sabana ane ledo maupu rarata movia anu nabelo, maka-va tempona ratarimata aselena. ¹⁰ Jadi tempo da naria loga kita kana movia anu nabelo ka pura-pura tona, nelabipa ka sampesuvuta sampomparasaya.

Pepatora kaupuna

¹¹ Sampesuvu-sampesuvu, peintamo! Yaku mboto notulisi bagia sura hitu ante paleku mboto! Peinta kambaso nu hurupu nipakeku!

¹² Tona nanggeni pepatuduki nasala haitu aga madota mompopakita pangoseakara Atura agama ala raitoia nu roara toYahudi. Haitumo sabana ira madota mompasuu komiu rasuna. Patujura ala ira ledo rapandasa ntoYahudi. Apa ane rasarumakara i Kristus anu namate ri kayu salib *bo domo raoseakara Atura agama*, rapandasa ntoYahudimo ira. ¹³ Tapi kakanana tona nangoseaka ada posuna, ira mboto ledo natutu nangoseaka pura-pura Atura agama. Ira aga madota komiu rasuna ala ira mamala mangoe sabana komiu nangoseaka parentara haitu. ¹⁴ Tapi yaku ledo ntoto madota mangoe ka nuapa-nuapa; yaku aga mangoeka anu nipovia nTuputa i Yesus Kristus ri kayu salib. Lako ri kamateNa haitu, nalantomo ka yaku ledo ria nuapanuapa riaro dunia anu namala mompakanoa yaku ri panggita nu Alatala. Jadi nikabasakakumo pura-pura anu ri dunia anu nisarumakaku bara ipia, bo yaku aga nanjarumaka i Kristus. ¹⁵ Ledo ria gunana nisuna atau ledo nisuna. Anu nopoko, Alatala nompajadi kita manusia nabaru. ¹⁶ Kuperapi Alatala nombadekei belo bo katinonto ka tona natuvu nangoseaka pepatuduki hitu, bo muni ka pura-pura todea nu Alatala, nau toYahudi, nau tona ledo toYahudi. †


¹⁷ Jadi kaupuna, tumo mompakasusa yaku, sabana bela-bela ri karoku †† najadi tanda yaku mpuu-mpuu batua i Yesus Kristus.

¹⁸ Sampesuvu-sampesuvuku, kuperapi Tuputa Yesus Kristus bate-batena mabelo nte komiu. Amin.

Taba lako nte yaku,
Paulus

† *bo muni ka pura-pura todea nu Alatala, nau toYahudi, nau tona ledo toYahudi ATAU: bo muni ka toIsrael anu najadi todea nu Alatala*
†† *Nadea nggani i Paulus niboba bo nicambu ntona sabana nompatolele Kareba Belo. Bela-bela ri karon lako ri peboba-peboba haitu.*

19-May-2009@12:42, Backup Description=19-May-2009@09:53, snave -

26-May-2009@11:04, Backup Description=26-May-2009@11:03, B Altork - 

Efesus

Vamba nu Tesa

Ngata Efesus ngata mbaso ri propinsi Asia anu nikuasai Magau Mbaso Roma nggaulu. (Sii-sii nambela negara Turki). Ri sia naria banua pesomba ka viata Artemis anu nisomba ntodea ri sia. Nitasere talu-mpae kasaena i Paulus nokarajaa nanggeni Kareba Belo ka toEfesus bo ka tona ri ngata-ngata ntanina ri propinsi Asia. (Peinta Suro-suro 19:8-10.) Sura ka toEfesus hitu nitulisina ka ira tempo ia nitarunggu ri ngata Roma.

Sura hitu notesaki nia nu Alatala ala "pura-pura anu naria ri suruga bo ri dunia rapoposinggabeloNa lako ri posangu rarara nte i Kristus, bo i Kristus mombabalenggai pura-pura" (1:10). Sura hitu muni nompokio todea nu Alatala mompariara nia haitu ala ira mpuu-mpuu matuvu mosangu rara nte i Kristus bo mosinggabelo ante sampesuvura sampomparasaya.

Ri bagia paratama sura hitu, i Paulus notesaki patuju nu Alatala mompoposinggabelo puramo. Niulina Alatala nompelisi todeaNa, bo niampungina bo nikabasakana ira lako ri kuasa nu dosa sabana anu nipovia i Yesus Kristus. NidekeiNa Nosa Gasana majadi pekangisi ala rasani ntodeaNa pojanjina haitu mpuu-mpuu majadi. Ri bagia karanduana, i Paulus nerapi toEfesus matuvu mosinggabelo bo mokainggu masipato ka topomparasaya i Kristus ala posangu rarara nte i Kristus mpuu-mpuu malanto ri katuvura singgani-nggani.

Ri sura hitu i Paulus nompake bara sako-ngaya porapa: i Yesus nirapaka Balengga bo todeaNa nirapaka sipa-sipa nu karoNa (1:10, 22-23; 4:4,15-16; 5:23-32). I Yesus nirapaka vatu pandasi, bo topangoseaka Ia nirapaka gana-gana nu banua nisunju ri bavona (2:20-21). Todea topomparasaya nirapaka berei mombine bo i Kristus nirapaka berei langgai (5:22-32). Topangoseaka i Kristus nirapaka tantara anu nangeva seta-seta ante pareva posieva nidekei nu Alatala (6:10-18).

Isi nu Sura

Pantepuuna (1:1-2)

Patuju nu Alatala ka topomparasaya (1:3-3:21)

Mpengaya-ngaya belo nidekei nu Alatala ka tona nosangu rara nte i Kristus (1:3-23)

Alatala nombadekei katuvu nabaru bo nipopakasanguNa toYahudi bo tona ledo toYahudi (2:1-3:13)

I Paulus nosambaya ala rasani ntoEfesus kambaso ntove i Kristus ka todeaNa (3:14-21)

Pokainggu anu masipato ka topomparasaya i Kristus (4:1-6:20)

Topomparasaya kana matuvu mosinggabelo bo mosipakaroso rara (4:1-16)

Tuumo mokainggu nadaa, poviame pokainggu nabelo (4:17-5:20)

Mpengaya-ngaya petevai (5:21-6:9)

Pakemo pareva-pareva posieva nidekei nu Alatala ala mombatidamaka peeva Magau nu Seta (6:10-20)

Tesa kaupuna (6:21-24)

1 Sampesuvu-sampesuvu anu najadi todea nu Alatala bo naroo nomparasaya i Yesus Kristus ri ngata Efesus:

Sura hitu lako nte yaku i Paulus, anu nianggataka najadi suro i Yesus Kristus nangoseaka dota nu Alatala.

2 Kuperapi Tuamata Alatala bo i Yesus Kristus batebatena mabelo nte komiu bo mompakatinonto raramiu.

Mpengaya-ngaya belo nidekei nu Alatala ka tona nosangu rara ante i Kristus

3 Ratoiyata Alatala, Tuama nTuputa Yesus Kristus! NidekeiNa ka kita mpengaya-ngaya belo lako ri suruga

sabana kita nosangu rara ante i Yesus Kristus.

4 Dopame dunia nipajadi, Alatala nompelisi kita majadi todeaNa anu nosangu rara nte i Kristus. Kita nipelisiNa majadi todea anu matuvu magasa bo ledo maria salata ri panggitaNa. **5** Lako ri lamba pamulana Ia nompakatantu manganggataka kita majadi ana-anaNa sabana Ia nompotove kita. Kita najadi ana-anaNa lako ri kamate i Yesus Kristus, sabana haitumo nia bo dota nu Alatala mami lako ri pamulana. **6** Alatala novia pura-pura haitu ala ratoiyata Ia. Nelabi mpuu kaoge nu toveNa ka kita! Lako ri kabelo nu raraNa, Ia nompobelabi bayangi toveNa ka kita anu nosangu rara ante AnaNa nipotoveNa.

⁷ Kita nikabasaka lako ri pehuku nu dosa sabana raa kamate i Kristus bo posangu rarata nte Ia. Dosata ni-ampungi nu Alatala sabana toveNa anu nelabi kaogena. ⁸ ToveNa haitu nipopelabiNa ka kita bo Ia muni mpuu-mpuu nompakanoto rarata bo nompopaisani patujuNa ka kita. ⁹ Alatala nompopaisani ka kita niaNa anu dopa nisani nu manusia bara ipia. Nangoseaka dotaNa mboto, Alatala nompakatantu lako ri nggaulu-name ala niaNa haitu rapakadupa i Kristus ¹⁰ ri tempo nipakatantuNa. Iweimo niaNa haitu: pura-pura anu naria ri suruga bo ri dunia rapoposinggabeloNa lako ri posangu rarara nte i Kristus, bo i Kristus momba-balenggai pura-pura.

¹¹ Alatala novia mpengaya-ngaya nangoseaka patujuNa bo pobotusiNa mboto. Jadi, nangoseaka pobotusiNa lako ri lamba pamulana, Alatala nompelisi kita, apa patujuNa kita majadi todeaNa lako ri posangu rarata nte i Kristus. ¹² Haitu sampe kami toYahudi anu nokolu nanjarumaka i Kristus masipato mantoiya Alatala sabana kaogeNa anu nipokumaaka! ¹³ Bo ivesia muni komiu. Komiu najadi todea nu Alatala tempo niepemi bo niparasayamiu pepaduduki nakana, haitumo Kareba Belo anu nompopaisani ka komiu, komiu mamala rapakasalama. Komiu nompapasaya i Yesus, jadi Alatala nombadekei Nosa Gasana ka komiu anu nijanjiNa nggaulu. Nosa Gasana haitu tandana komiu mpuu-mpuu todea nu Alatala. ¹⁴ Nosa Gasana haitu pangangisita, ala rasanita Alatala mpuu-mpuu mombadekei ka kita pura-pura anu nijanjiNa ka todeaNa. Jadi, nisanita Alatala mpuu-mpuu mombakabasaka kita lako ri dunia nadaa hitu sabana kita todeaNa. Haitumo sampe masipato kita mantoiya kaoge nu Alatala anu nipokumaaka!

I Paulus nosambaya ala rasani ntopomparasaya belo nipakasadia nu Alatala ka todeaNa.

¹⁵ Jadi ane yaku nompekirika pura-pura belo nitari-mamiu, yaku mpuu-mpuu nosukuru nte Alatala! Nompamula lako ri tempo niepeku komiu nompapasaya i Yesus bo nompotove pura-pura todea nu Alatala, ¹⁶ yaku nasaro nosukuru nte Alatala sabana katuvumi nabelo haitu, bo yaku bate-batena nosambaya ka komiu. ¹⁷ Yaku nekakai nte Tuamata Alatala anu nakuasa bo naoge, anu nisomba nTuputa Yesus Kristus. Yaku nerapi ala Ia mombadekei Nosa Gasana ka komiu. Bo Nosa Gasana mompakanoto raramiu bo mompopaisani Alatala ka komiu sampe komiu mpuu-mpuu mosisani belo ante Alatala. ¹⁸ Kuperapi ala Ia mompakareme pekirimiu ala mpuu-mpuu rasanimiu kabelo anu nisarumakata lako nte Alatala anu nompokio kita majadi todeaNa. Kuperapi ala rasanimiu ka-

† Ia muni mpuu-mpuu nompakanoto rarata bo nompopaisani patujuNa ka kita. ATAU: ToveNa haitu nipopelabiNa ka kita nangoseaka pura-pura pangisaniNa bo notoNa.

belo bo kaoge nu belo nipakasadia nu Alatala radekei ka todeaNa bara maipia. ¹⁹ Yaku nerapi ala rasanimiu kaoge nu kuasaNa anu nipokumaaka, anu nombatungki kita topomparasaya Ia. ²⁰ Kuasa haitumo kuasa nabaraka nipakeNa tempo nipakatuvuNa mpanjili i Kristus lako ri kamateNa bo nidekeiNa kuasa ka Ia bo ponturo nibila ri pangganaNa ri suruga. ²¹ Kuasa nidekeiNa ka i Kristus naogepa pade pura-pura kuasa ntanina, nau kuasa pomarenta-pomarenta, nau kuasa ntomaoge, nau kuasa anu nisomba manusia, nau kuasa-kuasa nipokaeka manusia. I Kristus nakuasapa pade pura-pura anu nalanga panggana, nau anu naria sii-sii, nau anu maria ri tempo makava. ²² Pura-pura anu naria nipopekou nu Alatala nte i Kristus. Bo niang-gatakaNa i Kristus majadi Pakeni pura-pura anu naria, bo i Kristus nomporenta todea topomparasaya Ia. I Kristus nirapaka Balengga ntodea topomparasaya, ²³ bo kita todea topomparasaya nirapaka karoNa. Todea topomparasaya nipakagana i Kristus † anu nompakagana pura-pura nuapa naria, ri umba-umba ri dunia bo ri suruga.

Topomparasaya nidekeika katuvu nabaru sabana posangu rarara nte i Kristus

2 Sampesuvu-sampesuvu, dopame komiu nompapasaya i Kristus, komiu nireke namate sabana komiu batena nadosa bo nombaliunaka parenta-parenta nu Alatala. ² Komiu natuvu nangoseaka kabiasa-kabiasa nu manusia ri dunia hitu, haitumo komiu nangoseaka dota nu Magau Seta, pakeni nu kuasa-kuasa nadaa ri laerava. Iamo nombakuasai rara ntai ntona anu ledo natundu nte Alatala. ³ Bara ipia kita pura-pura nokainggu nasimbayu mpo tona haitu; kita muni natuvu nangoseaka mpengaya-ngaya dota rara nadaa. Kita aga novia anu nompakasana karota bo pekiri rara ntaita nadaa. Kakanana kita masipato rampabela pehuku nu Alatala sabana pokaingguta haitu. Kita nasimbayu mpo tona ntanina nadaa.

⁴ Tapi Alatala naasi mpuu mataNa nanggita kita. Naoge mpuu toveNa anu nipopelabiNa ka kita. ⁵ Tempo kita da nireke namate sabana ledo natundu nte Ia, Ia nompakatuvu mpanjili kita nosanggani-nggani ante i Kristus. Toramo! Komiu nipakasalama sabana kabelo rara nu Alatala! ⁶ Bo kita nianggatakaNa ala kita muni momporenta mosanggani-nggani ante i Yesus Kristus ri suruga sabana kita nosangu rara ante Ia. ⁷ Alatala novia ivesia ala ri tempo makava bo sampe ri kasae-saena, manusia manggita kaoge nu toveNa bo kabelo nu raraNa anu ledo ria kasimbayuna. ToveNa bo kabelo raraNa haitu nipopakitaNa ka kita ante anu nipovia i Yesus Kristus. ⁸ Lako ri pomparasayamiu i Kristus,

†† Todea topomparasaya nipakagana i Kristus. Todea topomparasaya kagana i Kristus.

komiu nipakasalama sabana kabelo rara nu Alatala. Haitu ledo asele pompasimbukumi mboto tapi pedekei nu Alatala bayangi. ⁹ Kita nipakasalama ledo sabana pompasimbukuta mboto ala ledo maria tona mangoe manguli, "Yaku hii nipakasalama sabana pompasimbukuku mboto!" ¹⁰ Kita hii nipajadi nu Alatala manusia nabaru anu nosangu rara nte i Yesus Kristus. Patuju nu Alatala novia ivehaitu ala kita mompakule mokainggu mabelo, mpo nipakatantuNa mami ka kita lako ri nggauluname.

ToYahudi bo tona ledo toYahudi nipopakasangu i Kristus

¹¹ Jadi, sampesuvu-sampesuvuku, toramo katuvumi bara ipia. Nangoseaka pompoanaka komiu, komiu ledo toYahudi. Panguli ntoYahudi komiu "tona nasomu", haitumo tona ledo todea nu Alatala. Ira toYahudi nanguli aga iramo todea nu Alatala sabana ira nisuna nangoseaka ada agamara. Tapi kakanana ada posuna haitu aga tanda nipovia nu manusia ri karora. ¹² Bara ipia, dopa nisanimiu i Kristus. Komiu mpo toangatana apa komiu ledo nosamporoa nte toYahudi anu nipelisi nu Alatala majadi todeaNa. Komiu ledo nanggava bagia riara pojanji nu Alatala ka todeaNa. Komiu aga natuvu bayangi riara dunia hitu bo ledo nisanimiu Alatala, bo ledo ria panjarumakamiu nuapa-nuapa. ¹³ Tapi sii-sii domo mpo bara ipia, sabana komiu nosangu raramo ante i Yesus Kristus. Bara ipia komiu nakavao lako nte Alatala, tapi sii-sii komiu nipakapara ante Ia sabana raa lako ri kamate i Kristus.

¹⁴⁻¹⁵ I Kristus mbotomo nompoppinggabelo kita. Ia nompopakasangu toYahudi bo tona ledo toYahudi. Ia nombadekei karoNa mboto rapatesi manjambei kita, bo ante kamateNa haitu nikabasakaNa kita lako ri Atura-atura agama Yahudi ante pura-pura parenta bo pepatudukina. Haitu nipoviaNa ala mompakaupu posieva anu nirapaka tembo anu nompogaa toYahudi bo tona ledo toYahudi. Jadi kami toYahudi bo komiu tona ledo toYahudi nipoposinggabeloNa ala kita majadi manusia nabaru anu nosangu rara ante Ia. Ivesiamo Ia nompoppinggabelo kita. ¹⁶ Lako ri kamateNa ri kayu salib, i Kristus nompopakasangu toYahudi bo tona ledo toYahudi, bo nompoppinggabelo pura-pura kita nte Alatala bo nompakaupu pura-pura posievata. ¹⁷ Haitumo sabana i Kristus nakava nompatolele kareba posinggabelo ka kita pura-pura, haitumo, ka komiu tona ledo toYahudi anu nakavao lako nte Alatala bara ipia, bo muni ka kami toYahudi anu napara nte Alatala. ¹⁸ Jadi, kita pura-pura, toYahudi bo tona ledo toYahudi, namala mosinggava nte Tuamata Alatala riara posambayata sabana anu nipovia i Kristus. Kita mamala mosinggava nte Ia ante petulungi Nosa Gasana sangu.

¹⁹ Jadi, sampesuvu-sampesuvu ledo toYahudi, bara ipia komiu aga nireke ntona toangatana, bo ledo todea nu Alatala. Tapi sii-sii domo ivesia. Sii-sii komiu nosamporoa nte todea nu Alatala. Komiu najadi nosambanua ante pura-pura ana-ana nu Alatala. ²⁰ Kita topomparasaya i Kristus nirapaka gana-gana nu banua nibangu nu Alatala. Suro-suro i Kristus bo nabinabi nirapaka pandasi nu banua haitu. I Yesus Kristus nirapaka vatu nu pandasi anu nelabi nopoko. ²¹ Iamo nombasunju pakabelo-belo bo nompakaroso banua haitu sampe najadi banua petupu anu nagasa, anu masipato raponturo nu Alatala. ²² Bo komiu muni *anu ledo toYahudi* nosangu rara nte i Kristus, jadi komiu muni nosanggani-nggani ante topomparasaya i Kristus ntanina najadi ponturo Nosa Gasana nu Alatala.

Pokarajaa i Paulus nanggeni Kareba Belo ka tona ledo toYahudi

3 Jadi, haitu pura-pura sabana yaku, Paulus, nosambaya ka Alatala. Yaku nitarunggu sabana nompatolele Kareba Belo i Yesus Kristus ka komiu tona ledo toYahudi. ² Natantu niepemiumo Alatala nombadekei ka yaku pokarajaa nompatolele Kareba Belo ka komiu *tona ledo toYahudi*. Pokarajaa haitu nidekeiNa ka yaku lako ri kabelo nu raraNa. ³ Ia mboto nompopaisani patujuNa ka yaku anu dopa nisani nu manusia bara ipia. (Nitulisiku sakide ri bavona, ⁴ bo ane rabacamiu, rasanimiu muni anu nipopaisani ka yaku, haitumo, patuju nu Alatala anu nipakadupa riara nggatuvu i Kristus.) ⁵ Ri tempo nggaulu nia haitu dopa nipopaisani ka manusia. Tapi sii-sii Nosa Gasana nu Alatala nompopaisani nia nu Alatala haitu ka kami suro-suroNa bo nabi-nabiNa. ⁶ Iveimo nia nipopaisaniNa: tona ledo toYahudi mantarima belo lako nte Alatala mosanggani-nggani ante toYahudi. Bo tona ledo toYahudi mosanggani-nggani nte toYahudi majadi sipa-sipa ri sangu karo, haitumo karo i Kristus. Bo ratarimara munimo pura-pura anu nijanji nu Alatala ka tona nosangu rara nte i Yesus Kristus. Pura-pura haitu ratarimara sabana niparasayara Kareba Belo.

⁷ Lako ri kabelo nu raraNa, Alatala nombadekei ka yaku pokarajaa nompatolele Kareba Belo. Bo lako ri kuasaNa anu nokarajaa riara ntaiku, nipopompakuleNa yaku mompapola pokarajaa haitu. ⁸ Yaku natueipa pade pura-pura todea nu Alatala ntanina. Tapi naupa ivesia, Alatala nabelo mpuu nte yaku bo nidekeiNa ka yaku pokarajaa nompatolele Kareba Belo ka komiu tona ledo toYahudi. Kareba haitu notesaki kabelo i Kristus anu naoge mpuu, ledo rapakuleta mombarekena. ⁹ Yaku nidekeika pokarajaa muni nompopaisani ka pura-pura tona berimba Alatala nompakadupa niaNa, *haitumo, niaNa nompopakasangu toYahudi bo tona ledo toYahudi lako ri posangu rarara*

nte i Kristus. Lako ri lamba pamulana, Alatala Topompajadi dunia hitu dopa nompopaisani niaNa haitu.

¹⁰ PatujuNa ala sii-sii pura-pura malaeka bo anu nakuasa ri langi mangisani notoNa nompasiayu mpengaya-ngaya, sabana rakitara niaNa haitu rapakadupa ante todea topomparasaya i Kristus.

¹¹ Alatala novia pura-pura haitu nangoseaka patujuNa anu nipakatantuNa mami lako ri lamba pamulana. Bo patujuNa haitu nipakadupaNa ante kakava nTuputa Yesus Kristus. ¹² Kita nompasaya i Kristus bo kita nosangu rara ante Ia, jadi domo makaja rarata mosinggava nte Alatala riaru posambayata, bo nisanita ratarimaNa. ¹³ Jadi, sampesuvu-sampesuvu, kuperapi nte komiu, nee maupu raramiu nangepe yaku nitarunggu, sabana pura-pura kasusa nirasaiku sii-sii mangeni belo ka komiu.

I Paulus nosambaya ala rasani ntopomparasaya kaoge nu tove i Yesus ka ira

¹⁴ Jadi, [ane yaku nantora kanoto nu Alatala bo niaNa lako ri lamba pamulana], yaku nantaputu nosambaya ri ngayo nTuamata Alatala. ¹⁵ Iamo Tuama nu pura-pura anu naria, nau kita ri dunia, nau isi suruga. ¹⁶ Naoge mpuu kuasa bo kabelo nu Alatala! Jadi kuperapi ala Ia mpuu-mpuu mompakaroso rara ntaimiu ante Nosa Gasana ¹⁷ sampe i Kristus bate-batena monturo riaru ntaimiu sabana komiu nompasaya Ia. Bo kuperapi ala katuvumiu rakuasai nu tove i Kristus bo toveNa haitu mokale riaru ntaimiu. ¹⁸⁻¹⁹ Kuperapi nte Alatala ala komiu mosanggani-nggani ante pura-pura todeaNa ntanina, mamala mangisani bo mombarasai kaoge nu tove i Kristus ka kita. Ledo rapakule nu manusia ntoto mombapaha tove i Kristus haitu bo ledo rapakuleta mombasuka kambasona. Kuperapi nte Alatala ala komiu bate-batena mombarasai tove i Kristus haitu riaru katuvumiu, ala mamala rapasialamiu pura-pura inggu nu Alatala.

²⁰ Alatala masipato rabilata! Nabaraka mpuu kuasaNa anu nombatulungi kita riaru katuvuta. Ante kuasaNa haitu, Alatala nompakule novia nelabipa pade pura-pura raperapita atau rapekirita. ²¹ Alatala masipato ratoiya ntodea topomparasaya. Ia masipato ratoiya sii-sii bo sampe ri kasae-saena sabana anu nipovia i Yesus Kristus. Amin!

Topomparasaya kana masintuvu

4 Jadi sampesuvu-sampesuvu, sabana haitu pura-pura, siimo petevai lako nte yaku anu nitarunggu ri sii sabana pomparasayaku i Pue Yesus. Yaku mpuu-mpuu nerapi ala komiu matuvu ante pokainggu masipato ka todea nu Alatala, apa komiu nipokioNa majadi todeaNa. ² Komiu kana matuvu ante ede rara. Komiu kana malusu raramiu, bo kana mandoe posabaramiu.

Nee makodi raramiu nte roa, tapi positulungimo sabana tovemiu. ³ Pasimbukumo ante mpuu-mpuu raramiu matuvu mosinggabelo. Nosa Gasu nu Alatala nompopakasangu kita pura-pura, jadi kita kana mombajagai kasintuvuta haitu. ⁴ Pura-pura kita topomparasaya i Kristus najadi sanga karo i Kristus. Bo sanga Nosa Gasu nu Alatala anu naria riaru ntaita pura-pura. Ivesia muni panjarumakata aga sanga, haitumo kita pura-pura nipokio nu Alatala matuvu mosanggani-nggani nte Ia sampe ri kasae-saena. ⁵ Aga i Yesus saitoNa Tuputa, bo aga sanga pomparasayata. Ivesia muni aga sanga patujuta nidu, *haitumo, rapopakitata kita topangoseaka i Kristus.*⁶ Aga saito Alatala, Tuamata pura-pura. Iamo nompasaya pura-pura, bo Iamo nompake kita pura-pura, bo Iamo nonturo riaru ntaita pura-pura.

⁷ Tapi *nau nadea kasimbayuta, pompakule nidekei nu Alatala ka kita ledo nasimbayu, sabana kita saito-saito nidekeika pompakule mokaarajaa ka i Kristus nangoseaka anu nipakatantuNa ka kita.* ⁸ Naria nitulisi riaru Buku Gasu *anu nombaboto pompakule haitu ivei: "Tempo Ia neore hau ri ponturo ri kalangana, Nadea tona nitavani nikenina. †* Bo Ia nompalele pedekei-pedekei ka manusia."

Mazmur 68:19

⁹ Nuapa batuana tesa-tesa haitu? Ane Ia neore hau ri ponturo ri kalangana, natantu dopame Ia neore, Ia nanau ri ponturo ri tambena ntotomo, haitumo, ri dunia hitu. ^{††10} Bo i Kristus anu nanau haitu, Ia muni neore hau ri ponturo anu nalangapa pade pura-pura anu ntanina ri langi, ala Ia mamala maria ri umba-umba. ¹¹ Iamo nompalele pedekei-pedekei ka kita. Sanu nidekeikaNa pompakule majadi suro, sanu nidekeikaNa pompakule majadi nabi anu mompasimbayu tesa nitarimana lako nte Alatala. Sanu muni nidekeikaNa pompakule majadi topompatolele Kareba Belo, bo ntanina nidekeikaNa pompakule manggeni-ka bo mompatuduki todea topomparasaya. ¹² NipaleleNa pedekei haitu ala kita todea nu Alatala rapakagana ala rapakuleta mantui pokarajaa nu Alatala. PatujuNa muni ala kita anu najadi karo i Kristus mantambai karosota, ¹³ sampe kaupuna kita pura-pura mpuu-mpuu mosangu rara sabana kita nompasaya Ana nu Alatala bo mpuu-mpuu nosisani nte Ia. Bo kita pura-pura mantambai manoto, bo pomparasayata mantambai maroso sampe domo makura nuapa-nuapa. Bo kita majadi nasimbayu mpo i Kristus mboto, nanoto bo naroso. ¹⁴ Ane ivesia kita, kita domo mpo ngana anu ledo nakaja rabagiu, atau sakaya kodi nito-

† *Nadea tona nitavani nikenina. Tempo nggaulu ane magau nanjili lako ri posieva, nipopakitana tona nitavani ala rasani ntodea ia mpuu-mpuu padagi.* †† *nanau ri ponturo ri tambena ntotomo, haitumo, ri dunia hitu. nanau ri ponturo ri tambena ntoto, haitumo, ri tambe ntana ri ponturo ntomate.*

mpesaka nu balumba bo niken nu piori hau tumai. Kita domo aga rataja hau tumai mangoseaka mpen-gaya-ngaya pepatuduki anu ledo nakana, bo domo kaliu-liu momparasaya tesa-tesa ntopebagiu anu natau gaga nodava, dava nipoviara mboto. Patujura, mompakasalandala kita. ¹⁵ Tapi kita kana mpuu-mpuu matuvu mangoseaka pepatuduki nakana bo kita kana mosimpotove. Ivesiamo mantambai karoso pomparasayata bo mantambai kanotota sampe kita majadi nasimbayu nte i Kristus.

I Kristus haitu, nirapaka Balenggata ¹⁶ bo kita todea topomparasaya nirapaka sipa nu karoNa. Ri karo manusia sipa nu karo nikuasai nu balengga. Sipa-sipa haitu niposidumpa pakabelo-belo bo niposiumpu ante uva ala majadi sangu karo. Bo ane pura-pura sipa haitu mokarajaa mangoseaka pompakule nidekei ka ia, njumangu karo haitu matuvu mabelo bo mantambai maroso. Ivesia muni kita topomparasaya. Kita pura-pura nosangu rara nte i Kristus bo Ia nompopakasangu kita. Jadi ane kita mosimpotove bo mositulungi, mantambai kabelona kasintuvuta bo karoso pangoseakata i Pue.

Topomparasaya i Kristus kana mombakabasaka katuvu njae bo mangoseaka katuvu nabaru

¹⁷ Jadi sampesuvu-sampesuvu, ante kuasa nidekei nTupu ka yaku, kuuli ka komiu, tumo matuvu mpo tona ledo nosisani ante Alatala! Ira aga nompekirika anu ledo ria gunana, ¹⁸ bo ledo nipahara nuapa-nuapa. Katuvu nabaru lako nte Alatala ledo naria nte ira sabana ledo ntoto nisanira pepatuduki nakana anu notesaki Alatala. Ledo nisanira sabana nakaa bagara. ¹⁹ Domo nisanira naeya sampe ira aga natuvu nangoseaka mpengaya-ngaya dota rarara nadaa. Nipodambara novia anu ledo masipato rapovia bo ledo ria rekera.

²⁰ Tapi ledo pokainggu ivehaitu nipatuduki i Kristus ka komiu. ²¹ Niepemieumo karebaNa, bo komiu nosangu rara nte Ia, jadi natantu komiu nipatudukika pepatuduki nakana anu notesaki i Yesus. ²² Haitumo, komiu nipatuduki mombakabasaka katuvu njaemiu ante pokainggu nituntunimiu tempo komiu dopa nomparasaya i Yesus. Dota rara nadaa nituntunimiu tempo haitu nombabagiu komiu bo nompakagero katuvumiu. ²³ Kana rakabasakamiu pokainggu njae haitu ala pekirimiu bo rara ntaimiu rapakabaru.

²⁴ Komiu kana matuvu mpo manusia nabaru anu nipa-jadi nu Alatala nangoseaka ingguNa mboto anu nanao bo mpuu-mpuu nagasa.

²⁵ Sampesuvu pura-pura, kita nipatuduki mokainggu manoa bo magasa, jadi tumo modava! Kita kana motesa makana ka sampesuvuta sampomparasaya apa kita pura-pura sipa nu karo i Kristus. ²⁶ Ane marau komiu, nee sampe rau raramiu mompakanavu komiu riar

dosa. Nee mombaboli rau rara sampe masolo eo, ²⁷ ala ledo maria loga nu Magau Seta mesua riar ngatuvumiu. ²⁸ Topangangga kana menonto mangangga. Ira kana mokarajaa ante palera mboto mompaelo katuvura ala mamala ira mantulungi tona ntanina napepa.

²⁹ Sampesuvu-sampesuvu, ane komiu motesa, nee rasovadakamiu tesa nadaa tapi sovadakamo tesa-tesa masipato, anu mombatulungi bo mompakaroso rara ntona ntanina. Tesa-tesa ivehaitu manggeni belo ka topangepena. ³⁰ Jadi, nee rapoviamiu anu mompakabuku rara Nosa Gasa nu Alatala. Toramo! Alatala nombadekei Nosa Gasa ka kita, tandana kita najadi todeaNa. Bo Nosa Gasana haitu muni najadi panggingisita ala rasanita kita mpuu-mpuu rakabasaka lako ri dunia nadaa hitu ngena. ³¹ Pakalipomo pura-pura dua rara. Nee magigi rara bo nee momboli rau rara. Nee mosipongare-ngare mosipakadaaka tesa bo nee mositunturaka. Nee mavuu matamiu nte roa. ³² Tapi kana mabelo raramiu nte roa bo mosipoasi mata. Komiu kana mosiampungi, nasimbayu mpo Alatala nombaampungi komiu sabana komiu nosangu rara nte i Kristus.

Matuvu riar reme

5 Alatala nompotove komiu bo komiu najadi ananaNa, jadi komiu kana mompasiala pokainggu nu Alatala. ² Bo komiu kana matuvu nompotove roa, nasimbayu mpo i Kristus nompotove kita. Lako ri toveNa haitu, nidekeiNa karoNa nipatesi ala mombatolosi kita. PoviaNa haitu nompakadamba rara nu Alatala nasimbayu mpo pesomba navangi nisomba ka Ia.

³ Komiu todea nu Alatala. Jadi ledo ntoto masipato komiu mosipogau ante tona ledo bereimiu mboto, atau mokainggu nabuga, atau mario mata bo ledo ria kabasa-basana. Nee sampe maria sabana raraika ntona komiu nokainggu ivehaitu. ⁴ Ledo muni masipato komiu mosovadaka tesa-tesa nasuloka bara tesa-tesa ledo ria gunana bara kuvava-kuvava anu ledo masipato. Aginapa sumbamiu rapakemiu manguli tari-ma kasi ka Alatala. ⁵ Toramo pakabelo-belo! Tona nosipogau nte tona ledo bereina mboto bo tona nokainggu nabuga ledo ntoto manggava bagia riar Poparenta nu Alatala bo i Kristus. Ivesia muni ante tona nario matana bo ledo ria kabasa-basana, sabana *anu niporiona haitu najadi anu nisombana bo* haitu nasimbayu kadaana nte topompakande tupu-tupu ntanina.

⁶ Jadi, nee komiu rabagiu ntona ante tesa-tesara anu ledo ria gunana, anu nanguli pokainggu ivehaitu ledo nasala. Toramo! Pokainggu ivehaitumo nompopeumba rau rara nu Alatala ka tona ledo natundu nte Ia.

⁷ Sabana haitu, nee mosimporoa ante tona nokainggu ivehaitu.

⁸ Komiu mboto natuvu ri kalandana bara ipia, tapi sii-sii komiu natuvu ri karemena sabana komiu nosangu rara ante i Pue. Jadi komiu kana matuvu ante pokainggu masipato ka tona anu natuvu ri karemena. ⁹ Apa inggu ntona anu natuvu ri karemena nabelo bo nanao bo ia namala raparasaya. ¹⁰ Pasimbukumo ala rasan-imi pokainggu nipokono nu Alatala. ¹¹ Nee rapasialamiu pokainggu ntona anu da natuvu ri kalandana, apa pokainggura haitu ledo ntoto naria gunana. Tapi komiu kana batena mokainggu mabelo ala katuvumiu majadi reme ka ira bo rasanira pokainggura nadaa. ¹² Apa pokainggu nipoviara nggalino haitu mpuu-mpuu nepakaeya, nau aga ratesa-tesa, naeya pura mata. ¹³ Pura-pura anu nalanda, ane ravanta nu reme, malanto rakita. ¹⁴ Bo pura-pura anu rapakalanto ivesia, mabali majadi mareme. † Haitumo batuana tesa niuli ivei:

“Pembangumo komiu anu namonjo.

Pembangumo lako ri tatanga ntomate,
Bo reme i Kristus mombavanta komiu.”

¹⁵ Sabana haitu, pekiri pakabelo katuvumiu; nee matuvu mpo tona nadoyo, tapi komiu kana matuvu mpo tona nanoto. ¹⁶ Pakemo loga naria nte komiu movia anu nabelo, sabana tempo sii-sii pokainggu manusia nadaa mpuu. ¹⁷ Jadi nee madoyo, tapi pasimbukumo mangisani bo movia anu nipodota i Pue rapoviamiu.

¹⁸ Nee malangu, apa haitu aga mompopeumba dota rara nadaa anu mompakagero katuvumiu. Tapi komiu kana rakuasai Nosa Gasa nu Alatala. ¹⁹ Posipakaroso raramiu, pakemo tesa-tesa lako ri Mazmur, bo dadedade nipake nantoiya Alatala bo dadedade nidekei nu Nosa Gasa ka komiu. Komiu kana madamba modade mombatoiya i Pue ante mpuu-mpuu raramiu. ²⁰ Komiu kana masaro motarima kasi nte Tuamata Alatala ka pura-pura anu najadi. Ulimo tarima kasi ka Ia sabana komiu nosangu rara nte Tuputa Yesus Kristus.

Pepatuduki ka topoberei

²¹ Pekoumo nte roamiu ntanina sampomparasaya sabana komiu nombabila i Kristus. ²² Mombine, pekoumo nte bereimiu langgai, nasimbayu nte pekoumiu nte i Pue ²³ sabana langgai nombabalenggai bereina mombine nasimbayu mpo i Kristus nombabalenggai todea topomparasaya. I Kristus mboto mompakasalama todea topomparasaya anu nirapaka sipa nu karoNa. ²⁴ Jadi kita todea topomparasaya nekou nte i Kristus, ivesia muni mombine kana mekou nte bereina riara mpengaya-ngaya.

† *Bo pura-pura anu rapakalanto ivesia, mabali majadi mareme ATAU: Apa rememo anu nompakalanto pura-pura.*

²⁵ Langgai, potovemo bereimiu mombine nasimbayu mpo i Kristus nompotove todea topomparasaya bo nombadekei karoNa rapatesi ala mompakasalama kita todea topomparasaya. ²⁶ PatujuNa ala kita majadi todea nu Alatala. Nipegasana kita nadosa sabana kita nomparasaya tesaNa bo kita nidiu nte uve tandana kita topangoseaka Ia. ²⁷ I Kristus novia ivesia ala kita todeaNa majadi masipato mantingayo Ia, nasimbayu mpo boti mombine anu nagaya mpuu ri panggita nu bereina, nagasa bo nabelo ntoto, anu ledo nakura nu apa-nuapa, bo ledo ria nuapa-nuapa rasalai. ²⁸ I Kristus nompotove todeaNa, ivesia muni langgai kana mompotove bereina nasimbayu mpo pompotovena karna mboto. Isema-sema nompotove bereina, batuana ia nompotove karna mboto. ²⁹ Ledo ria tona navuu matana ka karna mboto. Ia nompiara bo nombajagai karna pakabelo-belo nasimbayu mpo i Kristus muni nompiara bo nombajagai todeaNa. ³⁰ Haitu nipovia i Kristus sabana kita todea topomparasaya nireke sipa nu karoNa mboto. ³¹ Ri Buku Gasa nitulisi ivei: “Langgai kana mompalaisi tina tuamana bo matuvu mosangani ante bereina, bo ira randua kana majadi saito.” ³² Tesa hitu nakumba batuana, tapi anu nipatujuku ante tesa hitu iamo posinggapara i Kristus ante todeaNa. ³³ Tapi tesa hitu nosinggambela muni ante komiu topoberei. Pura-pura langgai kana mompotove bereina nasimbayu mpo pompotovena karna mboto, bo pura-pura mombine kana mompasimbuku mombabila bereina langgai.

Pepatuduki ka ngana-ngana bo tina tuamara

6 Ngana-ngana, komiu kana matundu nte tina tuamamiu sabana haitumo pokainggu masipato ka topomparasaya i Pue. ²⁻³ Bilamo tina tuamamiu ala komiu matuvu mabelo bo mandoe umurumiu ri dunia. Lako ri Sapulu Parenta nu Alatala, haitumo parenta pamulana anu nitambahi ante pojanji nabelo.

⁴ Komiu anu najadi tuama-tuama nu ngana, nee rapoviamiu anu mompakadua rara anamiu. Tapi piaramo ira. Patuduki bo popatora ira ante pepatuduki lako nte i Pue.

Pepatuduki ka batua bo madika

⁵ Sampesuvu-sampesuvu anu najadi batua, turusimo parenta nu tuamiu anu naria ri dunia hitu. Bilamo ira bo pekoumo nte ira ante mpuu-mpuu raramiu, nasimbayu mpo komiu nekou nte i Kristus mboto. ⁶ Nee aga mokaarajaa mabelo tempo komiu rakita nu tuamiu ala komiu ratoiya nu manusia. Tapi pokarajaamo ante mpuu-mpuu raramiu najadi batua i Kristus anu nangoseaka dota nu Alatala. ⁷ Pokarajaamo ante damba nu rara. Rekemo komiu nokarajaa ka i Pue, ledo aga ka manusia. ⁸ Pariaramo! Isema-sema novia nabelo,

nau ia batua atau ledo batua, kana rakavana balasina nabelo lako nte i Pue.

⁹ Bo komiu anu najadi tua atau madika, komiu muni kana mokainggu mabelo nte batuamui. Nee momparangga ira, sabana nisanimui mboto Tupumui bo Tupura aga saito. Iamo naria ri suruga bo Ia ledo nom-pelenje.

Pakemo pareva posieva lako nte Alatala mpo tantara i Kristus

¹⁰ Kaupuna, komiu kana maroso ante kuasa nitari-mamui lako ri kuasa nTupu anu nabaraka, apa komiu nosangu rara ante Ia. ¹¹ Pakemo pura-pura pareva posieva nidekei nu Alatala ka komiu, ala komiu mompakule mombatidamaka mpengaya-ngaya peeva noakala lako ri Magau nu Seta. ¹² Apa kita ledo nangeva manusia. Kita nangeva kuasa-kuasa bo pomarenta-pomarenta nadaa anu ledo nikita. Kita nangeva malaeka-malaeka nadaa anu nakuasa ri dunia hitu. Kita nangeva mpengaya-ngaya seta bo anu daa ri laerava. ¹³ Sabana haitu, pakemo pura-pura pareva posieva nidekei nu Alatala ala rapakulemiu mombatidamaka peeva nu balimui ri tempo posieva ntamo, sampe komiu da bate-batena meangga maroso maupu posieva haitu.

¹⁴ Jadi, komiu kana masadia mombatidamaka peeva balimui! Komiu kana matutu mangoseaka pepatuduki nakana. Haitumo sulepemui. Komiu kana mokainggu manoa. Haitumo baju asemui anu nombalenduti karomui. ¹⁵ Komiu kana masadia manggeni Kareba Belo anu nompoposinggabelo manusia ante Alatala. Haitumo sapatumui *anu nompakaroso peanggamui*.

¹⁶ Komiu kana maroo momparasaya Alatala riaru mpengaya-ngaya. Haitumo kaliavomui ratipalemui ala rapakulemiu mantenggu bo mompepaya mpengaya-ngaya mata pana apu † lako nte Magau Seta. Ane ma-

† *Ane toRoma nggaulu nosieva, dopame mopana, mata pana nipou nte anu narega bo mompakapapu. Kaliavora nibanggasi ntani ruru ala ledo mapapu ane mambela mata pana apu.*

roo pomparasayamui, rapakulemiu mombadagi pessori. ¹⁷ Komiu kana maroo manjarumaka Alatala mompakasalama komiu. Haitumo songgo bajamui anu mombalenduti balenggamiu. Bo komiu kana mompake Tesa nu Alatala. Haitumo guma nidekei Nosa Gasana ka komiu. ¹⁸ Komiu kana masaro mosambaya bo merapi tulungi nte Alatala. Nuapa-nuapa rapoviamui, posambayamo, nangoseaka pekeniaka Nosa Gasana nu Alatala. Komiu kana mainga bo nee maupu raramui mosambaya. Nggani-nggani mosambaya, sambayani pura-pura todea nu Alatala. ¹⁹ Bo posambayaka muni yaku ala tempo yaku motesa, Alatala mombadekei ka yaku tesa-tesa masipato, bo nau bara nuapa majadi, yaku mabia mompatolele Kareba Belo anu ledo nisani ntona nggaulu. ²⁰ Yaku niposumba i Yesus Kristus mompatolele Kareba Belo. Bo sii-sii yaku nitarunggu sabana mompatolele Kareba haitu. Jadi, posambayakamo yaku ala mabia yaku mompatolele Kareba Belo, sabana haitumo pokarajaa nidekei nu Alatala ka yaku.

Taba kaupuna

²¹ Dotaku ala rasanimui berimba katuvuku ri sii. Jadi haitu sampe nituduku i Tikhikus tou nte komiu. Ia sampesuvuta nipotoveku anu natutu nantulungi pokarajaa nTupu. ²² Ia nituduku tou nte komiu bo manguli anu najadi nte kami ri sii, ala raramui rapakavoe. ²³ Kuperapi Tuamata Alatala bo i Pue Yesus Kristus mompakatinonto raramui, bo mompakaroso pepotove bo pomparasayamui pura-pura. ²⁴ Kuperapi Alatala bate-batena nabelo nte pura-pura tona anu ledo naupu-upu nompotove Tuputa Yesus Kristus. Amin.

Taba lako nte yaku
Paulus

19-May-2009@12:42, Backup Description=19-May-2009@09:53, snave -

26-May-2009@11:04, Backup Description=26-May-2009@11:03, B Altork - ❖❖❖

Filipi

Vamba nu Tesa

Ngata Filipi ngata nisani ntodea ri propinsi Makedonia. Tempo i Paulus nolintiku propinsi Makedonia nompatolele Kareba Belo, ia paratama-tamana hau ri ngata Filipi. Nau nadea tona nangeva ia, kaupuna nadea muni nomparasaya i Yesus (Suro-suro 16). Naliu i Paulus nompalaisi Filipi, toFilipi nompakatu doi ka ia bara sako-ng-gani mombatulungi ia mompakapola pokarajaana.

Nitasere sapulu-mpae naupu i Paulus nompatolele Kareba Belo ri Filipi, ia nitarunggu ri ngata mbaso Roma. Niepe ntoFilipi ia nitarunggu, nipakatura vai doi petulungi ka ia. Doi haitu niken i ntoFilipi anu nosanga i Epafroditus. Nakava i Epafroditus ri Roma, nidekeinamo pedekei lako nte topomparasaya ri ngata Filipi ka i Paulus. Bara sako-mbula kakava i Epafroditus ri Roma, i Paulus nantudu ia manjili hau ri ngata Filipi, bo nitulisi-na sura hitu bo nidekeina ka i Epafroditus rakeni hau ri Filipi.

Sura hitu nitulisi i Paulus lako ri tarunggu. Niulina tarima kasi ka toFilipi sabana pedekeira haitu. Nipakadidina rarara ala ira matuvu mosangu rara ante pokainggu anu ledo mamala rasalai ntona, ala mantambai kadea ntona momparasaya Kareba Belo (1:27-2:18; 4:2-3). Nituduna ira mompasiala kaede rara i Kristus bo matuvu mabelo ri tatanga ntona nadaa ri dunia (2:1-18). Ia nompainga ira ka tona nokainggu nadaa bo nanggeni pepaduduki nasala (3:1-2, 17-19). Nipopatorana ka ira, ira nireke nanao ri panggita nu Alatala sabana pomparasaya i Kristus, ledo sabana pangoseakara ada-ada atau sabana ira tonuapa. Bo nipopatorana kabelo ratarima ntona anu mpuu-mpuu nangoseaka i Kristus.

Isi nu Sura

Tesa pantepuuna (1:1-2)

I Paulus notarima kasi nte Alatala sabana toFilipi, bo ia nosambaya ka ira (1:3-11)

Nau ia nitarunggu, nantambai kadea ntona nangepe bo nomparasaya Kareba Belo (1:12-26)

Nipopatorana ira matuvu mosangu rara bo mangoseaka jonjo i Yesus (1:27-2:18)

Nitesana nia nantudu i Timotius bo i Epafroditus hau ri ngata Filipi (2:19-3:1a)

Kana mainga ka tona anu nanggeni pepaduduki nasala (3:1b-4:1)

Kana mosangu rara bo mompakaroso pangoseaka i Kristus (4:2-9)

I Paulus nanguli tarima kasi sabana nitarimanamo doi nipakatu ntoFilipi (4:10-20)

Petabe kaupuna (4:21-23)

1 Sampesuvu-sampesuvu sampomparasaya anu nonturo ri ngata Filipi:

Sura hitu lako nte yaku i Paulus, bo i Timotius, batua-batua i Yesus Kristus. Kami notulisi ka komiu pura-pura anu nosangu rara ante i Yesus Kristus, bo muni ka pakeni ntodea topomparasaya bo topotulungi pakeni ntopomparasaya. ² Kami nerapi Tuamata Alatala bo Tuputa Yesus Kristus mombadekei belo ka komiu bo mompakatinonto raramiu.

I Paulus nosukuru nte Alatala bo nosambayani topomparasaya ri Filipi

³ Sampesuvu pura-pura, nggani-nggani yaku nantora komiu, niuliku tarima kasi ka Tupuku Alatala. ⁴ Bo nggani-nggani yaku nosambaya ka komiu pura-pura, yaku nosambaya ante damba raraku. ⁵ Yaku nosukuru sabana lako ri pamulana sampe sii-sii, komiu nasaro

nantulungi yaku nompatolele Kareba Belo lako nte Alatala. ⁶ Alatala mbotomo nompamula novia anu nabelo riarai ntaimiu. Bo niparasayaku poviaNa haitu rapakapolaNa sampe maupu, ri tempo kakava i Yesus Kristus mpanjili.

⁷ Masipato yaku mantora komiu pura-pura ivesia, apa komiu mpuu-mpuu nipotoveku bo komiu pura-pura nantulungi yaku novia pokarajaa nidekei nu Alatala ka yaku. Komiu nasaro nantulungi yaku, tempo yaku nitarunggu sii-sii, bo muni tempo yaku nanjaliku Kareba Belo bara ipia bo nompakalanto ka tona Kareba Belo mpuu-mpuu nakana. ⁸ Nalentora mpuu raraku nte komiu, apa pompotoveku komiu nasimbayu mpo pepotove i Yesus Kristus mboto. Nisani nu Alatala tesaku hitu nakana.

⁹ Jadi, iveimo pomperapiku nte Alatala, ala pepotovemiu mantambai, bo mantambai rasanimiu anu

nakana, bo mantambai kanoto mpekirimiu. ¹⁰ Ane ivesia komiu, rasanimiu mompelisi anu nabelopa rapoviamiu, bo katuvumiu majadi magasa bo ledo maria salamiu sampe i Kristus makava mpanjili. ¹¹ Bo pokainggumiu mpuu-mpuu majadi mabelo bo manoa sabana pokarajaa i Yesus Kristus riara nggatuvumiu, sampe madea mpuu tona mombabila bo mom-pakaoge Alatala.

Patuju katuvu i Paulus aga mompatolele Kareba Belo

¹² Sampesuvu-sampesuvu, kana rasanimiu, nau yaku nitarunggu ri sii, potarunggu yaku aga nompakantambai kadea ntona nangepe bo nomparasaya Kareba Belo. ¹³ Pura-pura tantara anu nombajagai banua nu Magau Mbaso bo pura-pura tona ntanina ri sii, nisanira yaku hii nitarunggu sabana yaku nokarajaa ka i Kristus. ¹⁴ Bo deanapa sampesuvu sampomparasaya ri sii nantambai karoso pomparasayara i Pue Yesus, sabana *nikitara Tupu nantulungi* yaku ri tarunggu sampe domo naeka ira, tapi nantambaimo kabiara nompatolele Tesa nu Alatala.

¹⁵ Naria bara sako-ndua tona nompatolele Kareba i Yesus Kristus sabana nasiriati nanggita yaku bo ira madota majadi padagi. Tapi naria muni tona ntanina nompatolele Kareba haitu ante patuju nabelo. ¹⁶ Ira haitumo nompatolele Kareba Belo sabana nipotovera yaku, apa nisanira yaku nianggataka nu Alatala ala kupopaisani ka tona Kareba Belo mpuu-mpuu nakana. ¹⁷ Tapi tona nasiriati pangane, ledo nagasa rarara nompatolele Kareba i Kristus sabana ira aga madota mompakaoge karora mboto. Nisarumakara poviara haitu mantambai kasusaku riara ntarunggu.

¹⁸ Tapi ledo makuya! Sabana nau bara berimba, nau nipovia ante patuju nabelo atau patuju nasala, asaa kareba i Kristus nipatolele. Haitumo nompakadamba raraku. ¹⁹ Bo yaku batena nadamba apa nisaniku, yaku rakabasaka sabana posambayamiu bo petulungi Nosa i Yesus Kristus. ²⁰ Yaku mpuu-mpuu nanjarumaka yaku ledo rapakaeya nokarajaa nompatolele Kareba i Kristus. Nisarumakaku yaku bate-batena mabia mosabi, nemopa sii-sii, ala nau mamate atau matuvu yaku, rakita ntona kaoge i Kristus riara nggatuvuku. ²¹ Apa, ane yaku matuvu, patujuku mompakaoge i Kristus, bo ane yaku mamate, nelabi belona ka yaku! ²² Tapi ane yaku da matuvu ri dunia hitu, yaku da mamala mokaarajaa anu noguna. Jadi domo nisaniku umbana kupelisi, matuvu atau mamate! ²³ Yaku nitaja mpekiri rongaya. Yaku mpuu-mpuu madota mompalaisi dunia hitu hau monturo mosanggani-nggani ante i Kristus, sabana haitumo nabelopa. ²⁴ Tapi nogunapa ka komiu ane yaku maboli ri dunia hitu ala mombatulungi komiu. ²⁵ Nisaniku nogunapa ka komiu, jadi sabana haitu, nisaniku yaku da matuvu bo mosinggava vai nte

komiu pura-pura ala komiu mantambai maroso bo madamba momparasaya i Yesus. ²⁶ Jadi, ane yaku manjili tou nte komiu, komiu mpuu-mpuu madamba mantoiya Yesus Kristus sabana yaku.

Pokaingguta kana mosinggambela ante Kareba Belo

²⁷ Jadi, nau bara nuapa majadi nte yaku, komiu kana matuvu ante pokainggu masipato ka topangoseaka Kareba Belo i Kristus. Komiu kana matuvu ivesia ala nau kita mosinggava atau ledo, kueue karebana komiu naroo nosangu rara bo nosangu pekiri bo singgani-nggani nompasimbuku nokarajaa ala madea tona momparasaya Alatala nangoseaka anu niuli riara Kareba Belo. ²⁸ Bo nee rapokaeka tona mangeva komiu. Apa kabiamiu haitu nompakalanto ka ira iramo rahuku nu Alatala bara maipia, tapi komiu rapakasalamaNa, sabana Alatalamo nombatulungi komiu. ²⁹ Apa Alatala nompaloga komiu nokarajaa nombatulungi i Kristus, haitumo, komiu ledo aga nipalogaNa momparasaya i Kristus, tapi nipalogaNa muni komiu mombarasai susa bo pari sabana komiu topomparasaya Ia. ³⁰ Apa komiu muni raeva ntona tempo komiu mompasimbuku mompatolele Kareba Belo, nasimbayu mpo anu nikitamiu najadi nte yaku bara ipia bo hitupa niepemi da najadi nte yaku sii-sii.

Komiu kana mompasiala kaede nu rara i Kristus

2 Jadi sampesuvu-sampesuvu, nisaniku narosomo pomparasayamiu sabana komiu nosangu rara ante i Kristus. Raramiu nipakavoe sabana komiu nipotoveNa. Komiu nasintuvu ante Nosa Gasa nu Alatala † bo komiu muni nosimpotove bo nosipoasi mata. ² Sabana haitu, kuperapi komiu mpuu-mpuu mompakadamba raraku ivei: matuvu mosimpotove, mosangu rara, mosangu pekiri bo mosangu patuju. ³ Nuapauapa rapoviamiu, nee aga mangelo kauntu mboto atau mantoiya karo mboto, tapi aginamo rapakaedemiu raramiu bo manguli roamiu naogepa pade komiu mboto. ⁴ Nee aga mompeili katuvumiu mboto, tapi peili muni katuvu roa ntanina.

⁵ Pekirimiu bo inggumiu kana masimbayu nte pekiri bo inggu i Yesus Kristus.

⁶ Nau Ia nasimbayu nte Alatala, ledo nirasaiNa Ia kana mantaamaka kakuasaNa bo nturoNa nalanga haitu.

⁷ Tapi lako ri dotaNa mboto nikabasakaNa pura-pura haitu bo najadi mpo batua.

Ia najadi nasimbayu nte manusia bo nikita ntona Ia natuvu mpo manusia.

⁸ Bo tempo Ia natuvu mpo manusia, Ia nompakaede raraNa

† *Komiu nasintuvu ante Nosa Gasa nu Alatala ATAU: Komiu nasintuvu sabana pekeniaka Nosa Gasa.*

bo natundu nte Alatala sampe namate,
nau sampe nipatesi nipaku ri kayu salib mpo tona nadaa.

⁹ Haitumo sabana Alatala nanganggataka Ia ri ponturo naogepa ri suruga

bo nombadekei kuasa ka Ia anu naogepa pade pura-pura kuasa ntanina.

¹⁰ Haitu nipovia nu Alatala ala pura-pura anu natuvu mombabila i Yesus.

Nau isi suruga, nau isi dunia, nau ira ri ponturo nto-mate,

pura-pura kana mantaputu mombasomba Ia,

¹¹ bo pura-pura ira mompangaku i Yesus Kristusmo Tupura.

Ivesiamo, ira mombabila bo mombatoiya Tuamata Alatala.

Kita kana matuvu mabelo ri tatanga ntona ledo nom-parasaya

¹² Jadi sampesuvu-sampesuvu nipotoveku, komiu nasaro nangoseaka pepatudukiku tempo yaku da nosanggani-nggani ante komiu. Jadi kuperapi komiu batena mangoseaka pepatudukiku, nemopa sii-sii kita nosinggavao. Alatala nompakasalama komiu bo nidekeiNa katuvu nabelo ka komiu. Jadi pasimbuku njuumo matuvu manoa, maeka mokainggu nadaa, sampe kaupuna katuvumiu nabelo haitu ledo makura nuapa-nuapa. ¹³ Apa Alatala mbotomo nokarajaa riarantaimiu nombadekei ka komiu dota rara bo pompakule mangoseaka dotaNa.

¹⁴ Nau bara nuapa rapoviamiu, nee mongau atau mosinggarau, ¹⁵ ala malanto ka pura-pura tona komiu ana-ana nu Alatala nabelo, anu ledo rasalai ntona. Komiu natuvu nanao ri tatanga manusia natenggo bo nadaa nasimbayu mpo betue-betue nombavanta kalandana. ¹⁶ Apa komiu nompatolele ka ira Kareba Belo anu namala manggeni ira matuvu mabelo sampe ri kasae-saena. Ane komiu matuvu ivesia, madamba mpuu raraku tempo i Kristus makava mpanjili, sabana katuvumiu haitu tandana naria mpuu asele pokarajaaku, bo ledo aga nalenge bayangi yaku nokarajaa ntamo ri tatangamiu bara ipia.

¹⁷ Pangoseakamiu i Kristus nirapaka pesombamiu ka Alatala anu mompakadamba raraNa. Tempo bara ipia, ane tona nombadekei pesomba ka Alatala, kana nombatoli uve anggur ala mompakagana pesombana. Ane rapana yaku rapatesi sabana pokarajaaku nompatolele Kareba Belo, raaku rarapaka uve anggur nitoli haitu, apa yaku nasadia mamate ane rapodota nTupu. Jadi, nau yaku rapatesi, ledo nakuya! Yaku batena manguli tarima kasi nte Alatala bo yaku muni madamba mpasanggani-nggani nte komiu. ¹⁸ Ivesia muni

komiu kana mosukuru bo madamba mpasanggani-nggani ante yaku.

I Timotius bo i Epafroditus

¹⁹ Ane rapodota i Pue Yesus, yaku nonia masalisa mombatudu i Timotius tou nte komiu, ala tempo ia manjili tumai, raraku rapakavoe mangepe karebamiu.

²⁰ Kutudu ia sabana ledo ria roaku ntanina ri sii nosangu pekiri nte yaku bo mpuu-mpuu nompekirika kabelomiu. ²¹ Pura-pura roaku ntanina aga nasesa nompekirika bagora mboto, ledo nompekirika dota i Yesus Kristus. ²² Nisanimiu mbotomo i Timotius namala raparasaya. Ia nokarajaa ntamo nosanggani-nggani ante yaku nompatolele Kareba Belo nasimbayu mpo ngana nantulungi tuamana. ²³ Jadi ane kusani nuapa majadi nte parakaraku ri sii, kutudu ia masalisa tou nte komiu. ²⁴ Bo ante petulungi nTupu, niparasayaku domo masae yaku mboto mamala tou nte komiu.

²⁵ Ane sampesuvuta i Epafroditus, anu nitudumiu bara ipia tumai mombatulungi yaku, nipekiriku kana kutudu manjili tou nte komiu vai ia. Ia roaku sampokarajaa anu nosanggani-nggani ante yaku nompatolele Kareba Belo i Kristus nau nieva ntona. ²⁶ Nalento raramo rarana nte komiu pura-pura, bo nasusa rarana sabana niepemiua ia nadua. ²⁷ Nakana mpuu ia nadua, sakidepa namate. Tapi nabelomo ia sabana Alatala naasi mataNa nanggita ia. Ledo aga ia nipoasi mata nu Alatala, yaku muni, apa ane i Epafroditus mamate mpuu, mantambai kasusa raraku. ²⁸ Haitu sampe yaku nasalisa mombatudu ia manjili tou nte komiu ala tempo komiu mosinggava ante ia, madamba raramiu bo domo masusa gaga pekiriku. ²⁹ Jadi tarimamo ia ante madamba apa ia sampesuvuta sampomparasaya. Bo bilamo pura-pura tona nokarajaa mpo ia ³⁰ apa sakidepa namate ia nompapola pokarajaa i Kristus. Ledo nto-to nipekirina katuvuna mboto sabana ia madota manjambei komiu mantulungi yaku ri sii.

Kita nireke nanao ri panggita nu Alatala, ledo sabana pangoseakata Atura-atura agama, tapi sabana pomparasayata i Yesus Kristus

3 Sampesuvu-sampesuvu, kapolana, komiu kana madamba sabana komiu nosangu rara ante i Pue Yesus. Ledo nalenge yaku nombasili anu nitulisiku ka komiu bara ipia, sabana yaku madota mompaiंगा komiu ala komiu ledo rabagiu ntona anu nanggeni pepatuduki nasala. ² Komiu kana mainga nte tona manggeni pepatuduki nadaa, anu noinggu mpo asu nasoa. Ira madota mompasuu komiu rasuna nangoseaka atura i Musa. *Pangulira kita kana rasuna ala mpuu-mpuu manoa ri panggita nu Alatala. Nee raparasayamiu!*³ Kakanana, kitamo anu nanao ri panggita nu Alatala, ledo ira, apa kita nombasomba Alatala

ante pekeniaka Nosa GasaNa. Kita nadamba sabana kita nosangu rara nte i Yesus Kristus, bo ledo nisarumakata pompasimbukuta mboto atau tonuapa kita, ala majadi manoa ri panggita nu Alatala.

⁴ Ane rapana kita mamala majadi manoa ri panggita nu Alatala sabana pompasimbukuta mboto atau tonuapa kita, yakumo hii mamalapa mangoe. Ane maria tona nompekiri ia mamala mangoe ka pompasimbukuna mboto atau tonuapa ia, nelabipa yaku! ⁵ Yaku nisuna tempo da noumuru valu-mbongi. Yaku nipoanaka ntoIsrael lako ri muli i Benyamin. Yaku toIbrani mpuu, bo yaku toFarisi anu mpuu-mpuu natutu nangoseaka pura-pura Atura nipapola Nabi Musa. ⁶ Nadidi mpuu raraku nangoseaka Atura agama Yahudi, sampe yaku nompandasa topomparasaya i Yesus. Pura-pura Atura haitu nioseakaku, ledo ria sangaya niliunakaku.

⁷ Bara ipia, pura-pura haitu nirekeku noguna. Tapi sii-siipa nirekeku ledo ria gunana, sabana yaku nanjarumaka i Yesus Kristusmo. ⁸ Ledo aga haitu, tapi pura-pura nirekeku ledo ria gunana ane rapoposisala ante anu nelabi kabelona, haitumo nosisani ante Tupuku i Yesus Kristus. Jadi nikabasakakumo pura-pura bo nirekeku mpo rumpu ala yaku mamala mosisani ante i Yesus Kristus ⁹ bo mpuu-mpuu mosangu rara ante Ia! Alatala nombareke yaku nanao ri panggitaNa, ledo sabana pangoseakaku Atura-atura agama, tapi sabana pomparasayaku i Kristus. Yaku najadi nanao ri panggita nu Alatala ledo lako ri pokaingguku, tapi lako nte Alatala mboto. Bo Alatala nompakanoa yaku lako ri pomparasayaku. ¹⁰ Naoge mpuu raraku mosisani ante i Kristus bo mombarasai kuasa anu nompakatuvu mpanjili Ia lako ri kamateNa. Bo yaku madota muni mombarasai susa bo pari nasimbayu mpo susa bo pari nirasaiNa, sampe bara yaku muni mamate masimbayu mpo Ia ¹¹ ala yaku muni mamala rapakatu-
vu mpanjili lako ri kamateku.

Pasimbukumo mosisani nte i Kristus bo majadi nasimbayu mpo Ia

¹² Ledo niuliku nikavaku puramo haitu bo ledo muni niuliku naganamo pangoseakaku i Kristus. Tapi yaku nompasimbuku ala yaku mpuu-mpuu mosisani nte i Yesus Kristus bo majadi nasimbayu mpo Ia, apa haitumo patujuNa nompokio yaku mangoseaka Ia. ¹³ Sampesuvu-sampesuvu, nisaniku yaku dopa nasimbayu ntoto nte i Kristus. Tapi naria anu nipoviaku: yaku nombalingasi pura-pura anu najadi bara ipia bo nompasimbuku manggava anu naria ri ngayoku. ¹⁴ Yaku mpo topangova anu ledo neili nompeinta anu ri puri tapi nangova nompetoto anu raalana. Yaku nompasimbuku njuu mangoseaka i Kristus, ala kukava hadia padagi radekei nu Alatala ka yaku ri suruga, haitu-

mo, nipokiokaNa kita matuvu mosangu rara nte i Yesus Kristus ri suruga sampe ri kasae-saena.

¹⁵ Jadi, kita toroso nomparasaya kana mosangu pekiri mompasimbuku mangoseaka i Kristus evamo niuliku pangane. Tapi ane maria pekirimiu da nosisala nte pekiriku, damo Alatala mboto mompakanoto raramiu. ¹⁶ Tapi anu nisanitamo kana batena raoseakata.

Mainga ka topanggeni agama anu nadaa pokaingguna

¹⁷ Sampesuvu pura-pura, pasialamo pokaingguku, bo pariarantai munimo pokainggu ntona ntanina anu natuvu nangoseaka jonjo kami. ¹⁸ Apa nadea ngganimo niuliku ka komiu bara ipia bo sii-sii kuuli vai ante tangi, nadeamo tona natuvu ante pokainggu nadaa. Niulira ira topomparasaya tapi pokainggura nadaa nompakalanto pesapuakara. Ledo niparasayara i Kristus namate ri kayu salib mombakabasaka kita lako ri kuasa nu dosa. ¹⁹ Tona ivehaitu ranavusaka ri narakaa, sabana aga dotara mboto anu nadaa nisombara. Anu nipoeya, haitumo nioera sabana aga anu ri dunia hitu nipekirikara. ²⁰ Tapi ledo ivesia pokaingguta, sabana kita todea nu suruga. Bo lako ri suruga muni makava Tuputa i Yesus Kristus, Topepakasalama anu nipopeata ante lentora nu rarata. ²¹ Tempo Ia makava, rabalikiNa karota nalente bo mamate, ala majadi masimbayu nte karoNa mboto anu nelabi kaogena bo ledo mamate. Namala rapoviaNa ivesia sabana kuasaNa naogepa pade pura-pura kuasa ntanina bo Iamo nombakuasai pura-pura anu naria.

Kita kana matuvu mosinggabelo bo mompakaroso pangoseakata i Pue

4 Jadi, sampesuvu-sampesuvu nipotoveku bo nipolentoraku. Komiu mpuu-mpuu nompakadambarakaru, bo nasana mpuu raraku sabana pomparasayamiu asele pokarajaaku nompatolele Kareba Belo. Nantora anu niuliku pangane, nee molengga-lengga momparasaya bo mangoseaka i Pue Yesus.

² Sampesuvuku i Euodia bo sampesuvuku i Sintike, yaku mpuu-mpuu merapi ala komiu mosangu rara anu masipato ka topomparasaya i Pue Yesus. ³ Bo ku-perapi muni nte vega rapaku i Sunsugos, tulungimo mombine randua pangane ala ira mosangu rara mpanjili. Ira nokarajaa ntamo ante yaku nompatolele Kareba Belo nasimbayu mpo i Klemens bo roa-roaku ntanina sampokarajaa. Sangara nitulisi riara Buku Katuvua, anu nompakatantu isema masipato matuvu mabelo sampe ri kasae-saena.

⁴ Sampesuvu pura-pura, kadambamo raramiu sabana komiu nosangu rara ante i Pue Yesus. Sangganipa kuuli ka komiu, kadambamo raramiu!

⁵ Kusarumaka pura-pura tona manggita kabelo raramiu. Toramo! Domo masae makava i Pue Yesus. ⁶ Nee makini raramiu riaru nuapa-nuapa, tapi kenimo pura-pura riaru posambayamiu. Perapimo anu niparaluumiu lako nte Alatala bo masaro manguli tarima kasi. ⁷ Bo ane radekeimiu kakini raramiu ka Alatala, radekeiNa katinonto ka komiu anu ledo rapakule nu manusia mompahana. Ia mompakatinonto raramiu bo pekirimiu sabana komiu nosangu rara ante i Yesus Kristus.

⁸ Kaupuna, sampesuvu-sampesuvu, tanondoakamo anu nakana, anu nanao, bo anu masipato rapakaoge. Pekirikamo anu nagasa, anu nagaya, bo anu nabelo raepe ntona. Tanondoakamo anu mpuu-mpuu nabelo, bo anu masipato ratoiya. ⁹ Anu nipegurumiu bo nitari-mamiu lako nte yaku, nau tesaku, nau jonjo nikitamiu riaru nggatuvuku, haitumo kana rapoviamiu. Bo ane haitu rapoviamiu, Alatala momporoa komiu bo mompakatinonto raramiu.

I Paulus nanguli tarima kasi ka toFilipi sabana pedekei nipakatura ka ira

¹⁰ Nadamba mpuu raraku nosangu rara nte i Pue Yesus sabana nau nasaemo kita nosinggavaoni, sii-sii nitulungimiu vaimo yaku. Ledo niuliku komiu ledo nantora yaku bara ipia. Nisaniku dopa ria logamiu mompakatu pedekeimiu ka yaku. ¹¹ Niuliku ivesia ledo sabana yaku napepa, apa naosamo raraku nau damo berimba katuvuku. ¹² Nisanikummo natuvu napepa bo nisaniku munimo natuvu nelabi. Nau bara nuapa najadi nte yaku, nisaniku nompakaosa raraku, nau tempo nabosu, nau tempo naara, nau yaku nelabi, nau yaku napepa. ¹³ Nipakuleku nantingayo nuapa-nuapa ante petulungi i Yesus Kristus anu nompakaroso yaku.

¹⁴ Naupa ivesia, nitulungimiu yaku riaru kasusaku ri sii bo anu nipoviamiu haitu nabelo. ¹⁵ Sampesuvu-sam-

pesuvu toFilipi, nisanimiu mbotomo tempo yaku paratama nompatolele Kareba Belo ka komiu bara ipia, bo nipalaisiku propinsi Makedonia, ledo ria topomparasaya ntanina nompakatu doi petulungi ka yaku. Aga komiu nombatande yaku bo nantulungi yaku nompapola pokarajaaku haitu. ¹⁶ Ledo aga haitu, tempo yaku da ri Makedonia ri ngata Tesalonika bo naria paraluuku, ledo aga sanggani komiu nompakatu pedekei ka yaku. ¹⁷ Yaku ledo aga madota mantarima pedekeimiu. Tapi yaku madota ala belo ratambai ka komiu lako ri poviamiu nabelo haitu. ¹⁸ Jadi, ala rasanimiu, nitarimaku puramo pedekei nipakatumiu, bo nelabi-labi! Pura-pura pedekei nipakatumiu nitari-makumo lako nte i Epafroditus. Sii-sii nagana puramo anu niparaluuku. Pedekeimiu haitu nasimbayu mpo pesomba navangi, anu nitarima nu Alatala bo nipo-damba raraNa. ¹⁹ Alatala nisombaku mompakagana ka komiu pura-pura anu niparaluumiu lako ri kakalumanaNa anu naoge mpuu, sabana anu nipovia i Yesus Kristus. ²⁰ Jadi ratoiyata Tuamata Alatala sampe ri kasae-saena. Amin!

Petabe kaupuna

²¹ Pakavote tabeku ka pura-pura topomparasaya i Yesus Kristus ri situ. Bo tarima tabe lako nte sampesuvuta sampomparasaya anu naria nosanggani-nggani ante yaku ri sii. ²² Tarima muni tabe lako nte pura-pura todea nu Alatala ri ngata hitu, nelabipa ira lako ri banua Magau Mbaso Kaisar. ²³ Kuperapi Tuputa Yesus Kristus bate-batena mabelo nte komiu. Amin.

Tabe lako nte kami,
Paulus bo Timotius

19-May-2009@12:42, Backup Description=19-May-2009@09:53, snave -
26-May-2009@11:04, Backup Description=26-May-2009@11:03, B Altork - ❖❖❖

Kolose

Vamba nu Tesa

Ngata Kolose sangu ngata ri propinsi Asia Kodi ledo nakavao lako ri ngata Efesus. I Paulus nokarajaa nompatolele Kareba Belo ri ngata Efesus labi rompae kasaena. Naupu sia naria topomparasaya lako ri ngata Efesus hau nompatolele Kareba Belo ri ngata Kolose sampe naria muni toKolose nomparasaya i Yesus. Bara sako-mpae kaliuna haitu, i Paulus nisuaraka riara ntarunggu ri ngata Roma sabana nompatolele Kareba Belo. Tempo ia da riara ntarunggu, nitulisina sura hitu ka toKolose.

I Tikhikus nanggeni sura hitu ka toKolose, bo niporoa i Onesimus. I Onesimus haitu batua anu nalai lako ri tuana bara ipia, bo ia nitudu i Paulus kana manjili nte tuana. Tuana i Filemon, toKolose. (Peinta Sura nitulisi i Paulus ka i Filemon.)

Riara sura ka toKolose hitu, i Paulus nompopainga ira naria guru-guru agama nompatuduki anu ledo nakana. Guru-guru haitu nanguli ane kita madota rapakasalama, ledo nagana aga momparasaya i Yesus, kita kana metupu muni nte anu nombakuasai langi bo tana evamo malaeka, bo kita muni paraluu rasuna nangoseaka ada agama Yahudi, bo kita paraluu mangoseaka ada-ada bo atura-atura ntanina. I Paulus nompopainga toKolose nee raparasaya pepatuduki nasala haitu. Niulina, nomparasaya i Yesus naganamo, sabana aga i Yesus nompakule nompakasalama manusia. Pepatuduki nikeni nu guru podava pangane, aga nompakasalandala tona apa pepatudukira ledo nompribavo i Yesus.

Riara sura hitu, i Paulus nompatuduki muni pokainggu mbana masipato ka topomparasaya i Yesus.

Isi nu Sura

Petabe (1:1-2)

I Paulus nanguli tarima kasi nte Alatala sabana pomparasaya bo pepotove ntoKolose, bo niposambayakana ira (1:3-14)

I Yesus naogepa pade pura-pura anu ntanina (1:15-23)

Pokarajaa i Paulus nompatolele Kareba Belo (1:24-2:5)

TESA NOPOKO: Topomparasaya kana matuvu ante pokainggu masipato ka tona nipakasalama i Yesus (2:6-7)

Nee rabagiu pepatuduki anu ledo nakana (2:8-23)

Topomparasaya kana mombakabasaka pokainggu njae, bo matuvu ante pokainggu nabaru (3:1-17)

Pepatuduki ka topoberei, ngana-ngana bo totua, batua bo tua (3:18-4:1)

Pepatuduki posambaya bo pokainggu nte tona ledo topomparasaya (4:2-6)

Petabe bo tesa-tesa kaupuna (4:7-18)

Petabe

1 ¹⁻² Sampesuvu-sampesuvu sampomparasaya ri ngata Kolose, todea nu Alatala anu naroo nosangu rara nte i Kristus:

Sura hitu lako nte yaku, i Paulus, anu nipelisi majadi suro i Yesus Kristus nangoseaka dota nu Alatala; bo lako nte i Timotius, sampesuvuta sampomparasaya. Nadea tabe kami. Kami merapi Tuamata Alatala mombadekei belo ka komiu bo mompakatinonto raramiu.

I Paulus notarima kasi nte Alatala sabana toKolose nomparasaya i Yesus bo nompotove todea topomparasaya

³ Nggani-nggani kami nosambaya ka komiu, kami nasaro nanguli tarima kasi nte Alatala, Tuama nTuputa Yesus Kristus, ⁴ sabana niepe kamimo komiu nomparasaya i Yesus Kristus bo nompotove pura-pura todea nu Alatala. ⁵ Komiu nomparasaya bo nepotove sabana komiu bate-batena nanjarumaka Alatala bo nantongoraka anu nipakasadiaNa ka komiu ri suruga. Anu nisarumakamiu haitu niepemiumo tempo Kareba Belo nipatolele ka komiu bara ipia. Kareba Belo haitu mpuu-mpuu nakana ⁶ bo natolele ri umba-umba ri

dunia sampe da kapantambai-mbaina kadea ntona nomparasaya i Yesus bo katuvura nipakabaru. Ivesia muni najadi ante komiu, nompamula lako ri tempo niepemi Kareba Belo bo mpuu-mpuu nirasaimiu kabelo nu Alatala. ⁷ Kabelo nu Alatala niepemi lako nte i Epafras, roa kami sampokarajaa nipotove kami. Ia batua i Kristus anu natutu nokarajaa nantulungi komiu. ⁸ Iamo nanguli ka kami, komiu nosimpotove sabana pekeniaka Nosa Gasa.

I Paulus nosambaya ka toKolose

⁹ Jadi nompamula lako ri tempo niepe kami karebamiu, kami nasaro nosambaya ka komiu. Kami nerapi nte Alatala ala Nosa GasaNa mombadekei noto bo pangisani ka komiu ala rasanimiu pura-pura dota nu Alatala ka komiu. ¹⁰ *Ane rasanimiu dota nu Alatala ka komiu*, mamala komiu matuvu ante pokainggu masipato ka topomparasaya i Pue, bo pura-pura inggumiu mompakadamba raraNa. Komiu mompakule movia mpengaya-ngaya anu nabelo, bo posisanimiu ante Alatala mantambai munimo.

¹¹ Kami nerapi ala Alatala mompakaroso raramiu ante pura-pura kuasaNa, nangoseaka barakaNa anu naoge mpuu, ala rapakulemiu mosabara nau bara nu apa majadi bo ledole molengga-lengga raramiu. ¹² Kami nerapi ala raramiu batena madamba manguli tarima kasi ka Tuamata Alatala, apa Iamo nompakasipto komiu manggava bagia lako ri anu nipakasadiaNa ka pura-pura todeana riarara PoparentaNa nareme. ¹³ Iamo nombakabasaka kita lako ri kuasa nalanda [†] bo nompajadi kita todeana ri Poparenta nu AnaNa nipotoveNa. ¹⁴ AnaNa haitu nantolosi kita, sampe dosata niampungi.

I Kristus naogepa pade pura-pura ntanina

¹⁵ Alatala ledole nikita. Tapi ane nisanita inggu bo kuasa nu AnaNa, nisanita muni inggu bo kuasa nu Alatala. Namala raulita AnaNa haitu Lumbua, haitumo kuasaNa nelabipa pade pura-pura anu nipajadi nu Alatala. ¹⁶ Apa Iamo nipopale nu Alatala nompajadi pura-pura anu naria ri suruga bo ri dunia, anu nikita, bo anu ledole nikita. Pura-pura malaeka nu Alatala bo seta-seta, pura-pura anu nakuasa bo anu nipakakuasa, nipajadi i Kristus ante kuasa nu Alatala, ala pura-pura haitu mombabila bo mompakaoge Ia.

¹⁷ Dopame naria dunia, naria mamimo i Kristus. Bo pura-pura anu naria, nikenikaNa bo nipasiayuNa ante kuasaNa. ¹⁸ Kita anu nomparasaya i Kristus namala rarapaka karoNa, bo i Kristus balenggata. Balenggata nompakasiayu karota, ivesia muni Ia nompakasiayu todeana topomparasaya Ia. Bo Iamo nombadekei katuvu nabaru ka kita. Iamo Lumbua; batuana, Iamo anu

[†] kuasa nalanda: haitumo kuasa Magau nu Seta.

paratama natuvu mpanjili lako ri kamatena. Sabana haitu pura-pura, Iamo naogepa pade pura-pura anu naria. ¹⁹ Dota nu Alatala mboto sampe pura-pura ingguNa bo kuasaNa naria muni nte AnaNa, bo ledole ria nakura. ²⁰ Bo dotaNa muni, AnaNa mompoposinggabelo pura-pura anu nipajadiNa nte Ia. Pura-pura anu nipajadi nu Alatala, nau ri dunia, nau ri suruga, pura-pura nosinggabelo mpanjili ante Ia sabana raa nu AnaNa anu natiti tempo Ia nipatesi ri kayu salib.

²¹ Bara ipia komiu muni natuvu nantubengosi Alatala. Komiu nangeva Alatala sabana pekirimiu bo pokainggumiu nadaa. ²² Tapi, sii-sii Alatala nompoposinggabelo mpanjili komiu ante Ia sabana kamate i Kristus. I Kristus nombadekei karoNa rapatesi ala komiu majadi magasa, bo komiu ledole masala atau makura ri panggitaNa. ^{††23} Jadi komiu kana batena momparasaya bo nee molengga-lengga. Nee radekei tona mombabagi komiu. Nee menonto manjarumaka anu nijanji nu Alatala ka komiu riarara Kareba Belo. Kareba Belo haitu niepemi mo bo nipatolele sampe ri njumangu dunia. Bo yaku muni, i Paulus, nianggataka najadi topompatolele Kareba haitu.

Pokarajaa i Paulus nantulungi todeana topomparasaya

²⁴ Sampesuvu-sampesuvu, sii-sii nadamba raraku nombarasai susa bo pari nikavaku sabana yaku nokarajaa nantulungi komiu. Apa yaku nombadupai ri karoku susa bo pari nipakatantu i Kristus kana kurasai. [‡] Bo susa bo pari nirasaiku nanggeni belo ka todeana topomparasaya. Pura-pura kita topomparasaya nirapaka karo i Kristus. ^{‡†25} Yaku nianggataka nu Alatala nantulungi todeana topomparasaya; niparasayakaNa yaku pokarajaa haitu ala kupasimbayu pura-pura karebaNa ka komiu tona ledole toYahudi. ²⁶ Kareba haitu nompakalanto nia nu Alatala anu dopa nipopaisani ka manusia lako ri nggaulunama, lako ri muli nu mulina, tapi sii-sii nipopaisaniNamo ka todeana, haitumo, tona nomparasaya Ia. ²⁷ Apa dota nu Alatala ala rasani ntodeana kabelo bo kaoge niaNa ka pura-pura manusia. NiaNa haitumo: i Kristus natuvu riarara ntaita, jadi nisanita kita mpuu-mpuu matuvu mabelo nte Alatala sampe ri kasae-saena.

²⁸ Jadi Kareba i Kristusmo nipatolele kami ka pura-pura tona. Nipake kami pura-pura noto anu naria riarara ntai kami nompopatora ira *anu ledole mabelo rapoviara bo nompatuduki ira movia anu nabelo*. Patuju kami ala

^{††} ala komiu majadi magasa, bo ledole masala atau makura ri panggitaNa. ATAU: ala komiu majadi magasa, bo ledole masala atau makura ane komiu rakeni mantingayo Alatala. [‡] Suro-Suro 9:16 ^{‡†} Apa yaku nombadupai ri karoku susa bo pari nipakatantu i Kristus kana kurasai. Bo susa bo pari nirasaiku haitu nanggeni belo ka todeana topomparasaya. Pura-pura kita topomparasaya namala rarapaka karo i Kristus. ATAU: Apa yaku nombadupai ri karoku susa bo pari nirasai i Kristus ala mombatulungi todeana. Todeana anu nomparasaya Ia namala rarapaka karoNa.

pura-pura ira mamala rakeni mantingayo Alatala bo pomparasayara ledo makura nuapa-nuapa ri panggitaNa sabana posangu rarara ante i Kristus. ²⁹ Haitumo sampe yaku nokarajaa ntamo, yaku mpuu-mpuu nompasimbuku nokarajaa ante kuasa nidekei i Kristus, apa kuasaNa riar nggatuvuku mpuu-mpuu naroso.

² Jadi, kana rasaniami yaku nompasimbuku mpuu nantulungi komiu bo tona ri ngata Laodikia, bo pura-pura tona anu dopa nosisani ante yaku. ² Yaku nompasimbuku ala raramiu pura-pura rapakaroso bo komiu mosangu rara bo mosimpotove. Apa ane ivesia, pomparasayamiu mpuu-mpuu maroso bo komiu ledo molengga-lengga sabana nisanimiumo anu nakana. Jadi komiu mosisani belo nte i Kristus, Iamo poko nia nu Alatala, nia anu nitabuniaka lako ri nggauluname. ³ I Kristusmo topompopaisani pura-pura noto bo pangisani nu Alatala anu dopa nisani ntona. ⁴ Patuju ntesaku hitu ala komiu ledo rabagiu ntona ante tesatesara anu mompakaluu raramiu. ⁵ Sabana nau yaku nakavao lako nte komiu, riar ntaiku yaku naria ri situ nte komiu. Bo nadamba mpuu raraku nangepe komiu nosangu rara bo ledo nolengga-lengga nomparasaya i Kristus.

Natuvu nosangu rara nte i Kristus

⁶ Sampesuvu-sampesuvu, nitarimamiumo i Yesus Kristus najadi Tupumiu. Jadi komiu kana batena matuvu mosangu rara ante Ia. ⁷ Katuvumiu nosangu rara nte Ia kana masimbayu mpo kayu nandate kalena, bo banua da kapombangu-banguna ri bavo pandasi naroso. Komiu kana mantambai karoso pomparasayamiu, evamo nipatuduki ka komiu. Bo komiu kana masaro mosukuru nte Alatala.

⁸ Komiu kana mainga, nee sampe komiu rabagiu ntona ante pepatuduki ledo nakana bo ledo ntoto no-guna. Apa pepatuduki haitu aga nangoseaka pekiri nu manusia, bo nopuna lako ri malaeka-malaeka nadaa anu nombakuasai dunia. † Pepatuduki haitu ledo nopuna lako nte i Kristus. ⁹ Apa nau i Kristus najadi manusia, pura-pura inggu bo kuasa nu Alatala naria riar karoNa bo ledo nakura nuapa-nuapa. ¹⁰ Bo komiu natuvu mpuu bo ledo nakura nuapa-nuapa sabana komiu nosangu rara ante i Kristus. I Kristus nalangapa nturoNa pade pura-pura anu nakuasa bo anu nomparenta ri suruga bo dunia.

¹¹ Kita nosangu rara ante i Kristus jadi kita nireke nisuna. Tapi posunata haitu ledo anu nipovia nu manusia ri karota tapi anu nipovia i Kristus riar ntaita. Batuana, kita nikabasaka lako ri kuasa nu dosa.

† Apa pepatuduki haitu aga nangoseaka pekiri nu manusia, bo nopuna lako ri malaeka-malaeka nadaa anu nombakuasai dunia. Apa pepatuduki haitu aga nopuna lako ri pekiri manusia bo nompatuduki komiu mangoseaka ada-ada bo atura-atura lako ri dunia hitu.

¹² Tempo kita nidiu tandana kita topangoseaka i Kristus, nireke kita namate bo nitana nosanggani-nggani ante i Kristus. Bo nireke muni kita nipakatuvu mpanjili nosanggani-nggani ante i Kristus, sabana kita nomparasaya kuasa nu Alatala anu nompakatuvu mpanjili i Kristus lako ri kamateNa.

¹³ Bara ipia *dopame komiu nomparasaya i Kristus*, komiu nireke namate sabana komiu nadosa bo ledo nangoseaka atura-atura nu Alatala. Tapi sii-sii, Alatala nompakatuvu komiu nosanggani-nggani nte i Kristus, bo pura-pura dosamiu niampunginamo. ¹⁴ Bara ipia kita masipato rahuku nu Alatala bo rapopogaa lako nte Ia sabana kita nombaliunaka parentaNa. Tapi tempo i Yesus nipaku ri kayu salib, domo nireke nu Alatala pombaliunakata bo nikabasakaNa kita lako ri atura-atura niliunakata haitu. Sabana haitu, domo paraluu kita rahuku. ¹⁵ Bo tempo i Yesus nipatesi nipaku ri kayu salib, nidagiNa pura-pura seta bo malaeka nadaa anu nakuasa. NilalakasiNamo kuasara nomparenta bo nipopakitaNa ka pura-pura isi dunia Iamo padagi bo ira nidaginamo.

¹⁶ Jadi sampesuvu-sampesuvu, nee rapariara tesa ntona madota mompasuu komiu mangoseaka ada nu agamara. Nipakasalara komiu sabana komiu nangande bara nanginu anu nipopali nangoseaka ada-ada, atau komiu ledo nangoseaka ada eo-eo mbaso agamara, eo mbaso kagero bula, bara eo-eo penonto. Nee rapariara tesara haitu ¹⁷ sabana atura-atura bo ada-ada ivehaitu aga nojalili anu belo makava nggapurina. Tapi anu nakava bo anu nijalili haitu, iamo i Kristus. ¹⁸ Jadi, *ane maria tona nompakasala komiu sabana ledo nioseakamiu pepatudukira*, nee rapariaramiu tesara, mbelaka komiu masalandala bo ledo manggava belo nijanji nu Alatala ka komiu. Tona haitu aga madota mompasuu komiu metiede rara bo mombasomba malaeka-malaeka. Ira nangoeka pangisanira sabana naria anu nikitara riar pangipi. Nalanga bayangi rarara, bo pepatudukira aga nopuna lako ri pekirira mboto anu nangoseaka dunia hitu. ¹⁹ Tona haitu domo nanjarumaka i Kristus. Tano mai, i Kristusmo nirapaka Balengga ntopomparasaya, bo kita anu nomparasaya nirapaka karoNa. I Kristusmo nompiara karoNa bo nompopakasangu todeana nasimbayu mpo uva bo oyu nipasiumpu bo nompoposidumpa buku-buku majadi sangu karo. Jadi Iamo nanggeniaka karoNa, haitumo todeana, nantambai naroso, nangoseaka dota nu Alatala.

Kita namate bo natuvu nosanggani-nggani nte i Kristus

²⁰ Namala raulita kita topomparasaya i Kristus namate nosanggani-nggani nte Ia, bo nikabasaka lako ri kuasa malaeka-malaeka nadaa anu nombakuasai

dunia. Jadi nakuya komiu da nangoseaka atura-atura ri dunia hitu nasimbayu mpo tona dopa nosisani nte i Kristus? ²¹ Nakuya komiu da nangoseaka atura-atura evamo: Nee manggingisi hitu! Nee rapetami kande a haitu! Nee mantui anu nipopali! ²² *Atura-atura ivehaitu ledo ria gunana ka kita sabana* atura haitu aga notesa kande a bo anu nipake sampalai bo nalipo. Kakanana atura-atura haitu aga nopuna lako ri parenta-parenta bo pepatuduki manusia. ²³ Atura-atura haitu nabelo mpuu ri panggita nu manusia, sabana topangoseaka atura-atura haitu nikita mpo tona natutu mpuu noagama; nipakaedera rarara bo nioseakara atura-atura anu nompandasa karora mboto. Tapi kakanana atura-atura haitu ledo ria gunana, sabana ledo nantulungi kita menonto novia anu nipodota rarata nadaa. †

3 Namala raulita kita topomparasaya i Kristus nipakatuvu mpanjili nosanggani nte Ia, *sabana Alatala nombadekei katuvu nabaru ka kita*. Jadi, pasimbukumo manggava anu nipasadia nu Alatala ka kita ri suruga, apa hamai i Kristus nonturo ri panggana nu Alatala. ² Pekirikamo katuvumiu nabaru nosanggani ante i Kristus ri suruga. Nee aga mompekirika katuvumiu ri dunia hitu. ³ Apa katuvumiu nadosa nireke namatemo. Bo katuvumiu nabaru dopa nikita ntoto, nasimbayu mpo kaoge i Kristus dopa muni nikita ntoto, apa Alatala dopa nompopakitana. ⁴ I Kristusmo nombadekei katuvu nabaru ka komiu. Tempo Ia meonga mpanjili ri dunia, kuasaNa bo kaogeNa rakita mpuu, bo kaoge katuvumiu nabaru rakita muni sabana komiu mosanggani-nggani nte Ia.

Kabasakamo pokainggu nadaa bo poviamo pokainggu mompakadamba rara i Kristus

⁵ Sabana haitu, kabasakamo pokainggu-pokainggu anu nopuna lako ri dunia nadaa hitu. Nee mosipogau ante tona ledo bereimiu mboto, nee movia pokainggu anu ledo masipato, nee mangoseaka dota raramiu nabuga bo dota-dota ntanina anu nadaa. Bo nee muni maoge rara manggava melabipa pade tona ntanina, sabana anu nipooge rarata haitumo najadi anu nisombata, bo haitu nasimbayu nte metupu nte tupu ntanina. ⁶ Pokainggu ivehaitumo nompopeumba rau rara nu Alatala [ka tona ledo natundu nte Ia.] ⁷ Bara ipia komiu muni da nokainggu ivehaitu, tempo komiu da nikuasai dota raramiu nadaa. ⁸ Tapi sii-sii kabasakamo pura-pura pokainggu nadaa. Nee marau, nee monasu, nee mompakadaa roa, nee metunturaka, bo nee sampe maria tesa-tesa nasuloka mesuvu lako ri sumbamiu. ⁹ Nee mosidavai. Kita kana mombakabasaka pokainggu ivehaitu sabana kita nikabasakamo lako ri

† *Tapi kakanana atura-atura haitu ledo ria gunana, sabana ledo nantulungi kita menonto novia anu nipodota rarata nadaa. ATAU: Tapi kakanana atura-atura haitu ledo ria gunana, sabana atura-atura haitu aga nanggeni kita nompakaosa dota rarata nadaa.*

katuvu njaeta bo lako ri pokainggu nadaa nioseakata tempo haitu, ¹⁰ bo nitarimatamo katuvu nabaru. Kita nipajadi nu Alatala manusia nabaru bo Ia bate-batena nombabaliki ingguta majadi masimbayu nte ingguNa mboto. PatujuNa ala kita mpuu-mpuu mosisani belo ante Ia. ¹¹ Kita najadi manusia nabaru, jadi domo ria posisalana toYahudi bo tona ledo toYahudi. Tona nisuna nangoseaka ada agama Yahudi bo tona ledo nisuna, nasimbayu ri panggita nu Alatala. Alatala ledo nompelenje bara tosangatana bara toribulu bara batua bara tona ledo nipobatua. I Kristusmo nopoko, bo Iamo nonturo riarantaita pura-pura.

¹² Sampesuvu-sampesuvu, kita nipotove nu Alatala bo nipelisiNa majadi todeana nagasa. Haitu sampe kita kana maasi matata manggita roa. Kita kana mabelo rara, maede rara, malusu rara, bo mosabara nte roa. ¹³ Nee raboli riarantesa nu roa. Ane maria kodi raramiu, posiampungimo. Ampungimo tona movia sala nte komiu ante mpuu-mpuu raramiu, nasimbayu mpo i Pue nombaampungidosisamiu. ¹⁴ Tapi nelabipa pade pura-pura pangane, kita kana mosimpotove. Sabana, ane kita todea topomparasaya nosimpotove, kita mpuu-mpuu nosangu rara.

¹⁵ I Kristus nompopinggabelo kita. Jadi nee rapoviata anu mombagerosi posinggabelo haitu, sabana kita nipokio nu Alatala ala kita pura-pura matuvu mosinggabelo mpo sipa-sipa nu karo sangu. Bo nee menonto motarima kasi nte Alatala. ¹⁶ Kareba anu notesaki i Kristus kana rapariarata bo ratanondoakata sampe mamala mosipatuduki bo mosipopatora, nangoseaka noto anu naria riarantaita. Podadekamo dade Mazmur lako ri Buku Gasa, bo dade-dade pantoiya Alatala bo dade-dade nidekei nu Nosa Gasa. Kita kana modade ante mpuu-mpuu rarata, manguli tarima kasi ka Alatala. ¹⁷ Bo nuapa-nuapa rapoviata bara raulita, rapoviata bo raulita muni anu masipato ka topomparasaya i Pue Yesus. Bo raulita munimo tarima kasi ka Tuamata Alatala sabana anu nipovia i Yesus ka kita.

Pepatuduki ka topoberei, ngana-ngana, totua, batua bo tuana

¹⁸ Sampesuvu-sampesuvu mombine, pekoumo nte bereimiu langgai. Haitumo masipato ka mombine anu nompapasaya i Pue Yesus.

¹⁹ Bo sampesuvu-sampesuvu langgai, potovemo bereimiu mombine, nee mokainggu makasara nte ia.

²⁰ Ngana-ngana, oseakamo pura-pura parenta tina tuamamiu sabana pokainggu haitumo nompakadamba rara nu Alatala.

²¹ Bo sampesuvu-sampesuvu anu najadi tuama nu ngana, nee rapakaduamiu rara nu ana-anamiu ala nee maupu rarara.

²² Sampesuvu-sampesuvu anu najadi batua, oseakamo pura-pura parenta nu tuamiu ri dunia hitu. Nee aga mangoseaka parentara tempo nikitara komiu ala komiu ratoiyara. Tapi oseakamo parentara ante rara mpuu-mpuu sabana komiu nombabila i Pue Yesus. ²³ Nuapa-nuapa raparentara ka komiu, poviamo ante mpuu-mpuu raramiu. Rekemo komiu ledo aga nokarajaa nantulungi manusia, tapi komiu nantulungi i Pue. ²⁴ Nisanimiumo i Pue mboto mombadekei tambo ka komiu anu nijanjiNa ka pura-pura topomparasaya Ia. Kakanana i Kristusmo tua anu nitulungimiu, bo komiu batuaNa. ²⁵ Tapi isema-sema movia anu nadaa rabalasi ante pehuku masipato ka daa nipoviana, sabana Tupu ledo nompelenje.

4 Sampesuvu-sampesuvu anu najadi tua. Komiu kana mokainggu masipato bo manoa nte batua-batuamiu. Toramo, komiu muni naria Tupumiu ri suruga!

Pepatuduki posambaya bo pokaingguta nte tona ledo nomparasaya

² Nee masau raramiu mosambaya. Pekiri pakabelo anu raulimiu ka Tupu, bo masaro manguli tarima kasi nte Ia. ³ Posambayaka muni kami ala Alatala mombadekei loga nabelo ka kami mompatolele karebaNa anu notesaki niaNa anu nipakadupa i Kristus. NiaNa haitu da nitabuniaka bara ipia, tapi sii-sii nipatoleleku-mo kareba i Kristus haitu. Bo sii-sii yaku nitarunggu sabana pokarajaaku nompatolele kareba haitu. ⁴ Jadi posambayamo ala mamala kupopaisani kareba i Kristus sampe rapaha ntona, sabana bago haitu kana kupovia.

⁵ Komiu kana mokainggu manoto ante tona dopa nomparasaya i Kristus. Pakemo pura-pura loga naria *mompopaisani i Kristus ka ira*.⁶ Ane komiu motesa nte ira, tesa-tesamiu kana malusu bo marasa raepe. Kana rasanimiu munimo cara masipato mesanaka pompekutanara.

Petabe bo tesa-tesa kaupuna

⁷ Sampesuvu-sampesuvu, ane makava i Tikhikus nte komiu, ratesana ka komiu pura-pura anu najadi nte yaku ri sii. Ia sampesuvuta sampomparasaya nipotoveta. Ia muni natutu nokarajaa ka Tupu bo ia roaku sampokarajaa nantulungi todea topomparasaya. ⁸ Ku-

tudu ia tou nte komiu ala rasanimiu kareba kami ri sii, bo ala rapakarosona raramiu. ⁹ Ia tou mosanggani ante i Onesimus, sampesuvuta anu nipotoveta bo ia namala raparasaya. Ia lako ri ngatamiu mboto. Ira randa manguli ka komiu nuapa pura najadi ri sii.

¹⁰ Tabe lako nte i Aristarkhus anu nosanggani ante yaku nitarunggu ri sii. Bo tabe lako nte i Markus sampesuvu i Barnabas. Toramo anu nitevaiku ka komiu bara ipia: ane ia tou nte komiu ri situ, tarimamo ia ante mabelo. ¹¹ Tabe muni lako nte i Yesus anu nidae i Yustus. Lako ri pura-pura toYahudi anu nomparasaya i Kristus, aga ira tatalu nokajaraa nte yaku sii-sii nange-lo tona majadi todea ri Poparenta nu Alatala. Ira mpuu-mpuu nantulungi yaku.

¹² Bo tabe muni lako nte i Epafras, batua i Yesus Kristus lako ri ngatamiu mboto. Ia bate-batena nekakai nte Alatala ante mpuu-mpuu rarana ala ledo molengga-lengga pomparasayamiu, bo ala komiu majadi topomparasaya anu ledo makura nuapa-nuapa ri panggita nu Alatala, bo ala komiu maroo mangoseaka pura-pura dota nu Alatala. ¹³ Yaku mboto nanggita ia nokarajaa ante mpuu-mpuu rarana nantulungi komiu anu nonturo ri ngata Kolose bo tona nonturo ri ngata Laodikia bo ngata Hierapolis muni. ¹⁴ Tabe muni lako nte Dokutoro Lukas anu nipotoveta, bo lako nte i Demas.

¹⁵ Pakavote tabe kami ka topomparasaya ri ngata Laodikia, bo ka i Nimfa bo todea topomparasaya anu nasiromu nosambaya ri banuana. ¹⁶ Maupu sura hitu rabaca ka komiu pura-pura, kuperapi rapakatumiui vai hau ri ngata Laodikia ala mamala rabaca ntodea topomparasaya hamai muni. Ivesia muni komiu kana mombabaca suraku anu rapapolara lako ri ngata Laodikia ka komiu. ¹⁷ Bo ulika i Arkhipus ivei: "Pakaupumo pokarajaa nidekei nu Alatala ka iko!"

¹⁸ Tabe lako nte yaku, i Paulus. Bagia hitu nitulisi ante paleku mboto. Toramo, yaku da nitarunggu.

Kuperapi Alatala bate-batena mabelo nte komiu pura-pura.

Tabe lako nte yaku,
Paulus

19-May-2009@12:42, Backup Description=19-May-2009@09:53, snave -
26-May-2009@11:04, Backup Description=26-May-2009@11:03, B Altork - ❖❖❖

1 Tesalonika

Vamba nu Tesa

Nggaulu ngata Tesalonika ibukota propinsi Makedonia. Nitasere roatu-njobu tona nonturo hamai. Sanu tupu ngata noagama Yahudi tapi deanapa tona ledo toYahudi bo ira aga netupu nte pinoito bo tupu-tupu anu ledo nakana. I Paulus, i Timotius, bo i Silas nanggeni Kareba Belo ka toTesalonika sampe naria bara sako-ndua ira nomparasaya i Yesus (peinta Suro-suro 17:1-9). Ledo nasae naliutaka haitu, i Paulus nte roana nipandasa ntona anu ledo nomparasaya i Pue. Jadi, ri bongina topomparasaya ri ngata Tesalonika nombatulungi i Paulus malai hau ri ngata santanina (peinta Suro-suro 17:10). Bara sakuya kasaena naliu haitu, i Paulus nalentora nte sampesuvuna sampomparasaya ri ngata Tesalonika bo madota hau mosinggava nte ira. Tapi ia dopa naloga hau mompeinta ira. Sia sampe nituduna i Timotius hau manjayo nte toTesalonika mompeinta pomparasayara bara naroso bara ledo (3:1-2). Nanjili i Timotius, pade nitulisi i Paulus sura hitu.

Nadea patuju i Paulus notulisi sura hitu. Nipopatorana toTesalonika berimba tesana bo pokaingguna tempo ia naria nte ira baipia (2:1-2). Nipakavoena rarara bo nipakadidina rara ntona nipandasa sabana pomparasayara (3:3-5). Nipatudukina ka ira pokainggu masipato ka topangoseaka i Yesus (4:1-12). Niulina ka ira anu majadi nte topomparasaya anu namatemo bo topomparasaya anu da natuvu ri eo kakava i Yesus mpanjili (5:13-17). Pura-pura pasal ri sura paratama ka toTesalonika notesa kakava i Yesus mpanjili (1:9-10; 2:19-20; 3:14; 4:13-17; 5:1-2, 23-34).

Isi nu Sura

Tesa pantepuuna (1:1)

Tesa i Paulus nte toTesalonika (1:2-3:13)

I Paulus notarima kasi nte Alatala sabana toTesalonika, bo nitoiyana pokainggura (1:2-10)

I Paulus nanjaliku karona mboto, nitesana pokarajaana ri ngata Tesalonika baipia bo nipopatorana pokaingguna nabelo ka ira (2:1-12)

I Paulus nanguli kalentorana bo madota mosinggava nte ira (2:13-3:13)

I Paulus nompangajari bo nompatuduki toTesalonika (4:1-5:28)

Nipangajarina ira mokainggu masipato ka topangoseaka i Yesus (4:1-12)

Nipatudukina ka ira anu majadi ri eo kakava i Yesus (4:13-5:11)

Nipatudukina ira matuvu mosinggabelo nte sampesuvura sampomparasaya (5:12-22)

Taba bo tesa kaupuna (5:23-28)

1 Sampesuvu-sampesuvu sampomparasaya ri ngata Tesalonika, todea nTuamata Alatala bo Tuputa i Yesus Kristus:

Sura hitu lako nte kami tatalu, i Paulus, i Silas †, bo i Timotius. Kami nerapi Alatala bate-batena mabelo nte komiu bo mompakatinonto raramiu.

I Paulus notarima kasi nte Alatala sabana toTesalonika

²³ Kami ledo nenonto notarima kasi nte Tuamata Alatala sabana komiu pura-pura, bo kami nasaro nosambaya ka komiu. Ane kami nosambaya, kami batena nantora pokarajaamiu ka Tupu, anu nipovi-amiu sabana pomparasayamiu. Nitora kami muni pompasimbukumiu nantulungi tona ntanina sabana

† Naskah basa Yunani: *Silvanus*. Sanga i Silas riara basa Latin 'Silvanus'.

pompotovemiu, bo nitora kami muni karoo raramiu nanjarumaka kakava nTuputa Yesus Kristus.

⁴ Sampesuvu-sampesuvu nipotove nu Alatala, nisani kami Alatala nompelisi komiu majadi todeaNa. ⁵ Apa tempo kami nompatolele Kareba Belo ka komiu, kami ledo aga notesa bayangi. Kami nompatolele kareba haitu ante kuasa bo petulungi Nosa Gasa nu Alatala, bo kami mboto nomparasaya riara ntai kami tesa haitu mpuu-mpuu nakana. Nipeintamiumo katuvu kami tempo kami nonturo nte komiu. Pura-pura nipovia kami ala manggeni belo ka komiu.

⁶ Bo tempo komiu nangepe Kareba Belo, ni-pasialamiu pokainggu kami bo pokainggu i Pue Yesus muni. Nau nipakasusa mpuu komiu, komiu nadamba nantarima Kareba Belo apa Nosa Gasa nu Alatala nompakadamba raramiu. ⁷ Jadi katuvumiu najadi jonjo

nipasiala ntopomparasaya i Yesus pura-pura ri propinsi Makedonia bo propinsi Akhaya. ⁸ Nompamula nte komiu, kareba i Yesus natolelemo sampe ri propinsi Makedonia bo Akhaya. Bo ledo aga haitu. Ri umbamba ngata niepe ntonamo tesa pomparasayamiu Alatala. Jadi, ledo paraluu kami motesaki pomparasayamiu, sabana ri umbamba nikalau kami, tesa haitu nisani ntonamo. ⁹ Ira mboto notesa ka kami berimba komiu toTesalonika nantarima kami tempo kami nakava nte komiu bara ipia. Bo nitesara muni berimba komiu nenonto netupu nte viata-viata bo nompamula netupu nte Alatala anu natuvu bo nakana. ¹⁰ Nitesara muni berimba komiu nanjarumaka kakava i Yesus, Ana nu Alatala lako ri suruga. Ia nipakatuvu nu Alatala mpanjili lako ri kamateNa. Bo Iamo nombakabasaka kita lako ri pehuku nu Alatala anu rapambela ka tona nadosa bara maipia.

I Paulus notesa pokarajaana ri ngata Tesalonika bara ipia

2 Sampesuvu-sampesuvu, nisanimiu mbotomo tempo kami nakava nte komiu bara ipia, kami ledo aga nalenge bayangi, tapi nariamo aselena. ² Dopame kami nakava ri ngatamiu, kami mpuu-mpuu nipandasa bo nipakadaa ntona ri ngata Filipi. Nisanimiu tesana. Nau nadea tona nangeva kami, tapi Tuputa nompakaroso rara kami ala kami ledo maeka mompatolele Kareba BeloNa ka komiu ri ngata Tesalonika. ³ Kami ledo nombaunaka komiu mangoseaka pepatuduki nasala. Ledo muni naria patuju nadaa riarantai kami bo ledo muni kami nopatuju mombabagiu tona. ⁴ Kami ledo notesa aga mompakadamba rara manusia. Kami notesa mompakadamba rara nu Alatala, sabana Iamo nomparesa rara ntai kami, bo Iamo nombareke kami masipato mompatolele Kareba Belo. ⁵ Nisanimiu mbotomo, ledo sangganiam kami nompattende komiu, bo ledo muni kami nombaakalani komiu ala mombatabuniaka patuju mompakauntu karo kami mboto. Nisani nu Alatalamo tesaku hitu nakana! ⁶ Kami ledo muni mbeki ratoiya ntona, bara komiu bara tona ntanina. Kakanana masipato kami merapi nte komiu, sabana kami mpuu-mpuu suro i Kristus. ⁷ Tapi ledo ivesia patuju kami. Tempo kami naria ri situ nte komiu bara ipia, pokainggu kami nalusu, nasimbayu nte mombine nombajagai ngana kodina. ⁸ Nambaso mpuu tove kami nte komiu, sampe kami nadamba mompatolele Kareba Belo ka komiu. Bo kami muni nasadia mantulungi komiu nau kami mamate, sabana kami mpuu-mpuu nompotove komiu! ⁹ Sampesuvu-sampesuvu, natantu da nitoramiu pompasimbuku kami bo kasusa kami bara ipia. Eo bongi kami nompasimbuku nokarajaa nompaelo mboto ala komiu le-

do masesa mompekirika katuvu kami tempo nompatolele Kareba Belo nu Alatala ka komiu.

¹⁰ Nisanimiu mboto kagasa katuvu kami nte komiu topomparasaya i Kristus. Pokainggu kami nagasa bo nanao, bo ledo ria nuapa-nuapa masipato rasalai. Nisanimiu bo nisani nu Alatala muni tesaku hitu nakana. ¹¹⁻¹² Nisanimiu mbotomo, kami nasaro nompatuduki komiu mpo totua langgai nompatuduki anana mboto. Kami nompakaroso raramiu bo nasaro nompopatora komiu matuvu mompakadamba rara nu Alatala. Apa Iamo nompokio komiu majadi todeana ri PoparentaNa bo mombarasai kaogeNa.

I Paulus nosukuru sabana Kareba Belo nitarima ntoTesalonika

¹³ Naria sangayapa ntanina sampe kami nasaro nontarima kasi nte Alatala. Sabana, tempo komiu nantari-ma Tesa nu Alatala nipatolele kami ka komiu, ledo nirekemiu aga tesa nu manusia. Tesa haitu nitari-mamiu mpo tesa lako nte Alatala mboto. Bo tesa haitu mpuu-mpuu tesa nu Alatala anu nokarajaa riarangatuvumiu topomparasaya i Kristus. ¹⁴ Sampesuvu-sampesuvu, *nisani kami Alatala nokarajaa riarangatuvumiu apa* pepandasa nirasai ntodea nu Alatala anu nompapasaya i Yesus Kristus ri bagia Yudea, nira-saimiu munimo. Komiu nipandasa roamiu sangata, nasimbayu mpo pepandasa roara simbo toYahudi anu ledo nompapasaya i Yesus. ¹⁵ ToYahudi anu ledo nompapasaya haitumo nompatesi i Pue Yesus bo nabi-nabi nu Alatala bo ira muni nompandasa kami. Ira nangeva pura-pura manusia bo Alatala ledo ntoto nadamba nte ira. ¹⁶ Niuliku ivesia sabana toYahudi haitu nasaro nombalava kami. Kami madota mompatolele Kareba Belo ka tona ledo toYahudi ala rasanira ira mamala rapakasalama. Tapi toYahudi pangane nombalava kami bo ivesiamo aga nantambai dosara sampe nadea gagamo. Bo sii-sii ira mambela pehuku nu Alatala.

I Paulus nalentora mosinggava nte toTesalonika

¹⁷ Jadi, sampesuvu-sampesuvu, nompamula lako ri tempo kita nogaa bara ipia, nalentora mpuu rara kami manggita komiu. Nau nogaa ri mata, riarantai ledo nalipo, bo kami batena nalentora nte komiu. Jadi kami nompasimbuku ante mpuu-mpuu rara mosinggava vai nte komiu. ¹⁸ Kami nonia mami tou nte komiu bara ipia. Yaku mboto bara sako-ngganimo nompasimbuku mosinggava nte komiu, tapi Magau Seta nasaro nombalava kami sampe dopa najadi. ¹⁹ *Naoge rara kami mosinggava nte komiu*, apa ane Tuputa Yesus Kristus meonga mpanjili bo kita mosinggava ri ngayoNa, komiumo majadi asele pokarajaa kami anu nisarumaka kami. Tempo haitu madamba mpuu rara kami sabana komiu, bo masana rara kami sabana pompara-

sayamiu. ²⁰ Mpuu-mpuu komiuno sampe kami rabila bo komiuno sampe nadamba mpuu rara kami.

I Paulus nombatudu i Timotius hau ri Tesalonika

3 Kaupuna domo nipakule kami nantaamaka kalentora rara kami. Jadi nipekiri kami agina kami bo i Silas maboli ri ngata Atena ² bo i Timotius sampesuvuta sampomparasaya nitudu kami tuou nte komiu. I Timotius roa kami nokarajaa ka Alatala. Ia nantulungi kami nompatolele Kareba Belo anu notesaki i Kristus. Ia nitudu kami tou mompakadidi raramiu bo mompakaroso pomparasayamiu ³ ala ledο maria saitoa komiu moura momparasaya sabana nipandasa. Kakanana nisanimiumo kita topomparasaya kana rapandasa, apa ivesia nipakatantu nu Alatala ka kita. ⁴ Tempo kami da nosanggani-nggani nte komiu bara ipia, niuli kami mamimo kana maria tona mompandasa kita sabana kita nomparasaya i Yesus. Bo nisanimiu ivesia mpuu najadi. ⁵ Jadi sia sampe nituduku i Timotius tou nte komiu, ala kusani berimba pomparasayamiu, sabana domo nipakuleku mantaamaka kalentora raraku nompekirika komiu. Nakini raraku nee-nee komiu bara mamala radagi nu Magau Seta ante pesori-pesorina sampe domo ria asele lako ri katiti nu ini kami nanggeni Kareba Belo ka komiu.

⁶ Tapi hitupa nanjilimo i Timotius lako ritu nte komiu, bo nitesana ka kami karebamiu anu nompakadamba rara kami, ivei: "ToTesalonika naroso pomparasayara, bo nosimpotove. Ira bate-batena nantora kita ante damba rara bo ira nalentora manggita kita nasimbayu mpo kita nalentora manggita ira." ⁷ Sampesuvu-sampesuvu nipotoveku. Nangepe kareba niken i Timotius haitu, navoemo rara kami. Nau nasusa rara kami bo nipandasa ntona, navoemo rara kami nangepe komiu batena naroso nomparasaya. ⁸ Apa mpuu-mpuu maosa rara kami ane komiu batena maroo mosangu rara nte i Pue.

⁹ Ane kami nosambaya ka Tuputa Alatala, nadamba mpuu rara kami nantora komiu! Kami nasaro notarima kasi nte Alatala sabana komiu, tapi eva ledο nagana rabalasi ka Ia kadamba rara nirasai kami. ¹⁰ Eo bongi kami nerapi nte Alatala ante mpuu-mpuu rara kami ala kami mamala mosinggava nte komiu bo mompatuduki anu dopa nipatuduki ka komiu ala mpuu-mpuu maroso pomparasayamiu.

I Paulus nosambayaka ToTesalonika

¹¹ Kami merapi Tuamata Alatala bo Tuputa i Yesus mobuka dala ka kami ala mosinggava ante komiu!

¹² Kami nerapi ala i Pue mantambai tovemiu sampe komiu mpuu-mpuu mosimpotove bo mompotove pura-pura tona, nasimbayu mpo kami mpuu-mpuu nompotove komiu. ¹³ Kami merapi Alatala mompakaroso

raramiu ala komiu magasa bo ledο makura nuapa-nuapa ri ngayo nTuamata Alatala tempo Tuputa i Yesus makava ante pura-pura todeaNu anu nagasa. †

Kita kana matuvu ante pokainggu mompakadamba rara nu Alatala

4 Kaupuna, sampesuvu-sampesuvu: bara ipia kami nompatuduki ka komiu pokainggu masipato rapoviamiu ala madamba rara nu Alatala. Bo nisaniku nipoviamiumo anu nipatuduki kami. Tapi kami merapi nte mpuu-mpuu rara bo mompopatora komiu ante kuasa nidekei i Pue Yesus ka kami: pasimbukumo hanupa matuvu nte pokainggu mompakadamba Alatala! ² Nisanimiu pepatuduki nidekei kami ka komiu ante kuasa lako nte i Pue Yesus. ³ Dota nu Alatala ala komiu majadi todeaNu nagasa, bo nee mosampaturu ante tona ledο bereimu mboto. ⁴ Pura-pura langgai ri tatangamiu kana matau mokainggu mabelo nte bereina †† ri panggita nu Alatala bo manusia. ⁵ Nee aga matuvu nte bereimiu mangoseaka dota nu rara mabuga, anu biasa najadi nte tona ledο nosisani nte Alatala. ⁶ Nee movia dosa ka sampesuvumiu sampomparasaya bo nee rabagiu ia ante mangala bereina, sabana Alatala mombahuku pura-pura tona nokainggu ivehaitu. Haitu pura-pura nipatuduki bo nipopatora kami ka komiu bara ipia. ⁷ Kita nipokio nu Alatala ledο matuvu mabuga, tapi nipokioNa matuvu magasa ante pokainggu anu mompakadamba raraNa. ⁸ Jadi isemasema nombasapuaka pepatuduki hitu, ledο manusia nisapuakana tapi Alatala anu nombadekei Nosa Gasana ka komiu nisapuakana.

⁹ Sampesuvu-sampesuvu, ledο paraluu kutulisi ka komiu posimpotove sampesuvu sampomparasaya, sabana Alatala mbotomo nompatuduki komiu mosimpotove. ¹⁰ Bo komiu nosimpotovemo nte pura-pura sampesuvu sampomparasaya ri njumangu propinsi Makedonia. Tapi kami mpuu-mpuu merapi nte komiu, tambaipa posimpotovemiu haitu! ¹¹ Pasimbukumo matuvu mosinggabelo nte tona ntanina, pasiayumo bagomiu mboto! Nee mombagalo bago ntona ntanina. Kara-jaamo pompaelomiu mboto nangoseaka anu niparenta kami ka komiu bara ipia. ¹² Ane komiu matuvu ivesia, komiu rabila ntona anu ledο nomparasaya i Kristus, bo komiu ledο motimbaloe nte tona ntanina.

I Paulus nompatuduki anu majadi nte topomparasaya ane mamate

¹³ Sampesuvu-sampesuvu, patuju kami ala rasanimiu mpuu anu majadi ante topomparasaya anu namatemo, ala ledο masusa raramiu mpo tona ntanina anu

† todeaNu anu nagasa ATAU: malaeka-malaekaNa †† Pura-pura langgai ri tatangamiu kana matau mokainggu mabelo nte bereina ATAU: Pura-pura langgai ri tatangamiu kana matau matuvu mombatidamaka dotana mboto.

ledo nanjarumaka matuvu mpanjili nosanggani-nggani nte Alatala. ¹⁴ Niparasayata i Yesus namate bo natuvu mpanjili. Haitumo sabana niparasayata muni pura-pura tona nomparasaya i Yesus bo namatemo rapakatuvu nu Alatala mpanjili, bo Alatala mompoposanggani ira nte i Yesus.

¹⁵ Siimo pepatuduki lako nte i Pue Yesus mboto rapapola kami ka komiu ivei: tempo i Pue Yesus makava mpanjili, kita anu da natuvu ledo mokolu ka roa-roata anu namatemo. ¹⁶ Tempo Alatala mombadekei parenta, tadulako malaeka mongare ante suara namangga bo tabue nu Alatala rapopomoni, tempo haitu i Pue Yesus mboto manau lako ri suruga. Bo topomparasaya i Kristus anu namatemo rapakatuvu mokolu. ¹⁷ Naupu haitu, kita da natuvu tempo haitu, raoretaka mosanggani-nggani ante ira riara kulimu mosinggava nte i Pue Yesus ri laerava, pade matuvu mosanggani-nggani ante i Pue sampe ri kasae-saena. ¹⁸ Sabana haitu, sampesuvu-sampesuvu, posipakavoemo raramiu ante pepatuduki hitu.

I Paulus nantudu ira mainga mompopea kakava i Yesus

5 Sampesuvu-sampesuvu, ledo paraluu kami motulisi ka komiu tempo bo tanggala kakava i Pue Yesus. ² Apa nisanimiu mboto kakava i Pue Yesus bara maipia masimbayu mpo kakava ntopangangga bongina tempo ledo nisani-sani ntona. ³ Tempo tona ledo nomparasaya Alatala aga manguli, "Katuvuta ri dunia nabelo pura, ledo ria nuapa-nuapa rapokaekata." Tapi ri tempo haitumo ledo rasani-sanira, sampesanika maropumo ira, masimbayu mpo dua nu mombine tempona moana. Ledo ntoto maria dala mombaleva pehuku.

⁴ Tapi komiu ledo natuvu ri kalandana *mpo tona ledo nisanina nuapa-nuapa*. Jadi komiu ledo rapakatikaja ane sampesanika i Yesus meonga mpo topangangga bongina. ⁵ Komiu pura-pura natuvu ri karemena, komiu nokainggu nabelo mpo tona nolipa eona. Kita ledo natuvu ri kalandana, kita ledo mpo tona nokainggu nadaa bongina. ⁶ Jadi kita kana mainga bo manoto rarata, nee mamonjo-monjo mpo tona da natuvu ri kalandana. ⁷ Apa tona anu aga namonjo bo nanginu sampe nalangu, namonjo bo nalangu bongina. ⁸ Tapi kita tona natuvu ri karemena. Jadi kita kana mompakanoto rarata. Kita kana bate-batena momparasaya Alatala bo mompotove tona ntanina ala kita maroso masimbayu mpo tantara nobaju ase. Kita kana maroo manjarumaka Alatala mompakasalama kita, ala kita maroso mpo tantara nosonggo baja. ⁹ Kita nipelisi nu Alatala, ledo ala rahukuNa, tapi ala rapakasalamaNa sabana petolo nTuputa Yesus Kristus. ¹⁰ Ia namate nombatolosi kita ala tempo Ia makava mpanjili, nau ki-

ta da natuvu atau namatemo, kita matuvu mosanggani-nggani ante Ia. ¹¹ Sabana haitu, sampesuvu-sampesuvu, posipakadidimo raramiu, bo posipakarosomo pomparasayamiu mpo anu nipoviamiumo.

Tesa kaupuna bo petabe

¹² Sampesuvu-sampesuvuku, kami merapi komiu mombabila pakeni-pakeni anu nokarajaa ntamo ri tatangamiu, haitumo ira anu nipelisi nu Alatala manggeniaka komiu bo mompatuduki komiu. ¹³ Bilamo ira bo potovemo ira ante mpou-mpou raramiu, sabana ira mpou-mpou nokarajaa nantulungi komiu. Bo komiu kana matuvu mosinggabelo ante roamiu pura-pura.

¹⁴ Kami merapi nte mpou-mpou rara, onteakamo tona namau nokarajaa. Pakarosomo rara ntona naeka. Tulungimo tona anu paraluu ratulungi. Posabaramo nte tona pura-pura. ¹⁵ Jagaimo ala ledo maria komiu mombabalasi pokainggu nadaa ante anu nadaa. Komiu kana masaro mompasimbuku movia anu nabelo ka roa-roamiu bo ka tona ntanina muni.

¹⁶ Komiu kana batena madamba. ¹⁷ Nee masau rara mosambaya. ¹⁸ Bo uli tarima kasi ka Alatala nau damo nuapa majadi, sabana haitumo dota nu Alatala ka komiu anu nosangu rara ante i Yesus Kristus.

¹⁹ Nee ralava pokarajaa Nosa Gasa nu Alatala. ²⁰ Nee mompandaente tesa ntona anu nompapola tesa nidekei nu Alatala ka ia. ²¹ Pekirikamo pakabelo-belo tesa-tesa haitu, *ala rasanimiu bara lako nte Alatala mpou bara ledo* bo oseakamo anu nabelo.

²² Petalilikamo pura-pura pokainggu nadaa.

²³ Kuperapi nte Alatala, topombadekei katuvua nabelo ka kita, ala Ia mboto mompakagasa katuvumiu sampe komiu mpou-mpou matuvu mpo todeana nagasa. Kuperapi Alatala mombajagai karomiu, rara ntaimiu, bo pekirimiu sampe ledo ntoto maria nuapanuapa rasalai tempo Tuputa Yesus Kristus makava mpanjili. ²⁴ Alatala nompokio komiu majadi todeana nagasa. Jadi, Ia mpou-mpou movia anu niperapita, sabana Ia namala raparasaya mompakadupa pojanjiNa.

²⁵ Sampesuvu-sampesuvu, tulungi posambayaka kami.

²⁶ Pakavote tabe bo tove kami ka pura-pura sampesuvuta sampomparasaya ri situ.

²⁷ Ante kuasa nidekei i Pue Yesus ka yaku, kuperapi mpou-mpou ala sura hitu rabacamiu ka sampesuvuta pura-pura sampomparasaya ri situ.

²⁸ Kuperapi Tuputa, Yesus Kristus bate-batena mabelo nte komiu pura-pura.

Tabe lako nte yaku,
Paulus

19-May-2009@12:42, Backup Description=19-May-2009@09:53, snave -

26-May-2009@11:04, Backup Description=26-May-2009@11:03, B Altork - ❖❖❖

2 Tesalonika

Vamba nu Tesa

Topangoseaka i Yesus ri ngata Tesalonika da naingu. Ledo nisanira berimba ntoto kakava i Yesus karongganina ngena (2:1-2). Sanu ira nanguli Eo Kakava i Pue najadimo, sanu ira domo nokarajaa apa nisarumakara domo masae makavamo i Pue (3:6, 11-12). Patuju i Paulus notulisi sura karanduana hitu ka toTesalonika nasimbayu nte patujuna ri sura paratamana. Nipakarosona rarara ala maroo momparasaya tempo rapandasa bo rapakasusa (1:4-10). Nipatudukikana ira anu majadi ri Eo Kakava i Yesus (2:1-12), bo niulikana ira matutu momparasaya i Yesus (2:13-15), nee masanda, bo ira kana mokarajaa mompaelo katuvura mboto (3:6-15).

Isi nu Sura

Tesa pamulana (1:1-2)

I Paulus nanguli tarima kasi ka Tupu sabana toTesalonika, bo nipakarosona rarara ala ira bate-batena momparasaya i Kristus nau nipandasa (1:3-12)

Nipatudukina ka ira anu majadi tempo i Yesus makava mpanjili (Pasal 2)

I Paulus nerapi nte toTesalonika mosambaya ka ia, bo nipopaingana ira, nee mamau (3:1-15)

Tesa kaupuna (3:16-18)

1 ¹⁻² Sampesuvu-sampesuvu sampomparasaya ri ngata Tesalonika, todea nTuamata Alatala bo Tuputa i Yesus Kristus:

Sura hitu lako nte kami tatalu, i Paulus, i Silas †, bo i Timotius. Kami nerapi Tuamata Alatala bo Tuputa Yesus Kristus mombadekei belo bo katinonto ka komiu.

I Paulus notarima kasi nte Alatala sabana katuvua nteTesalonika

³ Sampesuvu-sampesuvu, kami kana masaro motarima kasi nte Alatala sabana komiu. Kami masipato motarima kasi sabana pomparasayamiu nte i Yesus nantambai karosona, bo nantambai posimpotovemiu.

⁴ Sia sampe ri ngata-ngata ntanina kami nantoiya pokainggumiu ri ngayo ntodea topomparasaya i Yesus. Ante damba rara, kami nanguli ka ira, "Nabelo mpuu toTesalonika! Ira ledo nenonto nomparasaya i Kristus nau nipandasa bo nipakasusa ntona."

⁵ Jadi, lako ri karoo nu pomparasayamiu haitu, nisanita Alatala mpuu-mpuu nanao nombatangara manusia. Komiu nombatidamaka riaru kasusa bo kapari anu nambela komiu sabana pangoseakamiu Alatala, bo ivesiamo Alatala nompopakita komiu mpuu-mpuu masipato majadi todea ri PoparentaNa.

⁶ Alatala nanao, jadi rabalasiNa tona anu nompandasa komiu, ⁷ bo rakabasakaNa komiu lako ri kasusa nira-saimiu sii-sii, bo ivesia muni kami. RakabasakaNa pura

kita tempo i Pue Yesus manau lako ri suruga mosang-gani-nggani ante malaeka-malaekaNa nakuasa, ⁸ bo ante apu navaya-vaya. Ia manau mombahuku tona ledo nadota nompeili Alatala bo ledo nadota nangosea-ka Kareba Belo anu notesaki Tuputa Yesus. ⁹ Tona haitu rahuku nu Alatala sampe ri kasae-saena. Ira rapopogaa lako nte i Pue Yesus bo ledo rarasaira kaoge nu kuasaNa. ¹⁰ Pura-pura anu pangane majadi tempo i Pue Yesus makava mpanjili. Tempo haitu Ia rabila bo ratoiya ntodeaNa anu nagasa, pura-pura topomparasaya mokumaa bo madamba manggita Ia. Sampesuvu-sampesuvu, komiu muni mombabila bo mombatoiya Ia tempo haitu, sabana niparasayamiu-mo kareba nipatolele kami ka komiu.

I Paulus nosambaya ka toTesalonika

¹¹ Haitu sampe kami nasaro nosambaya ka komiu. Kami merapi ala Alatala mombatulungi komiu ala pokainggumiu majadi masipato ka tona nipokio nu Alatala majadi todeaNa. Kami merapi Alatala mombatulungi komiu ante kuasaNa ala pura-pura niamiu movia anu nabelo majadi mpuu, bo pura-pura pokarajaa nipoviamiu sabana pomparasayamiu rapapolamiu sampe maupu. ¹² Patuju kami nerapi ivesia ala Tuputa Yesus rabila bo ratoiya sabana pokainggumiu nabelo. Bo ala komiu muni rabila bo ratoiya i Yesus. Haitu pura-pura majadi sabana kabelo rara nTuamata Alatala bo i Pue Yesus Kristus.

† Ri naskah basa Yunani: i *Silvanus*. Sanga *Silvanus* nasimbayu nte sanga *Silas*. I *Silas* hitu roa i *Paulus* nitesaki ri *Suro-Suro*.

**Topesapuaka kana meumba ntani ruru dopame i
Yesus makava mpanjili ri dunia**

2 Kapolana, sampesuvu-sampesuvu. Kami madota motesa sakide ka komiu anu majadi tempo Tuputa Yesus Kristus makava mpanjili bo kita rapasiromu mosanggani-nggani ante Ia. Kami mpuu-mpuu merapi, ² nee masalisa gaga maingu atau masesa raramiu ane raepemiu tona manguli nakava mpanjilimo i Pue Yesus. Nee maingu, nau rauli ntona kareba haitu lako ri Nosa Gasa, bara raulira kami mboto bara anu nitulisi kami riara sura. ³ Nau bara berimba ntoto kareba haitu, nee sampe komiu rabagiu ntona, sabana dopame makava eo haitu, naria rongaya kana majadi ntani ruru. Pamulana, madea mpuu tona moura pomparasayara bo mombasapu Alatala. Bo karongayana, kana meumba Topesapuaka [†] anu ranavusaka riara narakaa bara maipia. ⁴ Ia mangeva Alatala bo malanga rarana mangoe. Raulina iamo naogepa pade pura-pura anu nisomba nu manusia bo anu niuli nu manusia "tupu". Ledo aga haitu, kaupuna ia mesua monturo riara Banua nu Alatala bo raulina iamo Alatala!

⁵ Sampesuvu-sampesuvu, natantu da nitoramiu yaku nompatuduki ka komiu pura-pura hitu tempo yaku da naria nosanggani-nggani ante komiu bara ipia. ⁶ Sii-sii dopa neonga Topesapuaka haitu sabana naria anu nombalava ia. Bo nisanimiumo anu nombalava peongana. Jadi ri tempo nipakatantu nu Alatala, meumbamo Topesapuaka haitu. ⁷ Sii-sii kuasa anu nompakadaa ia nompamulamo nokarajaa nggalino ri dunia. Tapi ia mboto dopa neumba sabana ia da nilava. Jadi, ralelakapa topelava haitu, ⁸ pade meumba Topesapuaka. Tapi tempo i Pue Yesus meonga ante kuasaNa nareme, kuasa nTopesapuaka malipo sanggani, bo i Pue Yesus mompatesi ia ante nosa lako ri sumbaNa.

⁹ Topesapuaka meumba ante kuasa mbaso lako ri Magau nu Seta bo rapoviana mpengaya-ngaya kabarak bo tanda-tanda nipokumaaka anu mombabagiu tona. ¹⁰ Rapakena mpengaya akala nadaa mombabagiu tona anu masipato mami mamate bo rapopogaa lako nte Alatala. Ira mamate bo rapopogaa lako nte Alatala sampe ri kasae-saena sabana ira ledo nadota mantarima bo mompotove pepatuduki nakana lako ri Alatala, anu nompakule mompakasalama ira. ¹¹ Haitu sampe Alatala mompakatu ka ira sangaya kuasa anu mombabagiu ira sampe raparasayara anu ledo nakana. ¹² Kaupuna pura-pura tona anu ledo nompasaya pepatuduki nakana bo aga nadamba novia anu nadaa rahuku nu Alatala.

**Komiu nipelisi nu Alatala majadi todeaNa, jadi
pakaroso pomparasayamiu**

¹³ Jadi, sampesuvu-sampesuvu nipotove i Pue, masipato kami masaro manguli tarima kasi ka Alatala sabana komiu. Sabana, Alatala nompelisi komiu lako ri ulu jadi ala komiu rapakasalamaNa. ^{††} Komiu nipakasalama ante kuasa Nosa Gasa anu nombabaliki komiu majadi todea gasa nu Alatala, bo komiu nipakasalama sabana pomparasayamiu pepatuduki nakana. ¹⁴ Alatala nompokio komiu majadi todeaNa lako ri Kareba Belo anu nipatolele kami ka komiu. PatujuNa ala komiu manggava bagia riara kuasa bo kaoge nTuputa Yesus Kristus. ¹⁵ Jadi, sampesuvu-sampesuvu, sabana haitu pura-pura, pakaroso pomparasayamiu. Kangisi pakaroso pepatuduki nipatolele kami ka komiu, anu nitesa kami ante sumba, bo anu nitulisi kami riara sura.

¹⁶⁻¹⁷ Alatala nompotove kita, bo lako ri kabelo nu raraNa, Ia ledo naupu-upu nompakavoe rarata, bo nidekeiNa ka kita panjarumaka nabelo. Jadi kuperapi Tuputa Yesus Kristus bo Tuamata Alatala mompakavoe bo mompakaroso raramiu ala tesamiu bo pokainggu-miu batena nabelo.

I Paulus nerapi toTesalonika mosambaya ka ia

3 Kapolana, sampesuvu-sampesuvu, posambayakamo kami. Perapi nte Alatala ala TesaNa masalisa matolele bo ratarima mabelo, mpo anu najadi nte komiu bara ipia. ² Posambayaka muni ala kami rakabasaka lako ri tolia ntona natenggo bo nadaa rarana, apa ledo pura-pura tona nompasaya Tesa nu Alatala.

³ Petulungi i Pue Yesus ledo maupu-upu! Ia batebatena mompakaroso raramiu bo mombajagai komiu lako ri kuasa Magau Seta. ⁴ I Pue Yesusmo nanggeniaka komiu, jadi nisani kamimo anu nipatuduki kami ka komiu, nioseakamiu sii-sii bo batebatena raoseakamiu. ⁵ Kuperapi i Pue Yesus manggeniaka komiu sampe komiu mpuu-mpuu mombarasai pepotove nu Alatala ka komiu, bo maroo raramiu riara kasusana nasimbayu mpo karoo rara i Kristus tempo Ia nipandasa.

I Paulus nompatuduki tona nee mamau mokerajaa

⁶ Sampesuvu-sampesuvu, ante kuasa nidekei i Pue Yesus Kristus ka kami, kami nompamenta komiu, nee ntoto mosimpovega ante sampesuvu sampomparasaya namau bo ledo nangoseaka pepatuduki nipatuduki kami ka komiu. ⁷ Nisanimiu mbotomo

[†] Topesapuaka: Peinta bali i Kristus ri 1 Yohanes 2:18.

^{††} Alatala nompelisi komiu lako ri ulu jadi ala komiu rapakasalamaNa ATAU: Alatala nompelisi komiu majadi tona paratama rapakasalama.

pokainggu kami bara ipia tempo kami nonturo nte komiu, kami ledo namau nokarajaa. Pokainggu kami haitu kana rapasialamiu. ⁸ Kami ledo nangande kan-dea anu ledo nibayari kami. Tapi bara eona bara bong-ina, kami nokarajaa ntamo ala ledo mompakasesa komiu. ⁹ Kakanana masipato kami merapi tulungi nte komiu. Tapi kami ledo nerapi tulungi sabana kami madota majadi jonjo anu mamala rapasialamiu. ¹⁰ Tempo kami da naria nte komiu bara ipia, kami nompamenta komiu ivei: "Isema-sema ledo madota mokarajaa, ledo mamala mangande!"

¹¹ Niuli kami ivesia sabana niepe kamimo naria bara sako-ndua komiu namau ri situ. Ira ledo nokarajaa nu-apa-nuapa, aga nabago nombaurusi bago ntona ntan-ina. ¹² Jadi ante kuasa nidekei i Pue Yesus Kristus ka kami, kami nompamenta bo mompapainga ira matinton-to mokarajaa bo mompaelo katuvura mboto!

¹³ Tapi komiu sampesuvu-sampesuvu, nee masau raramiu movia anu nabelo. ¹⁴ Ane rapana maria tona ledo madota mangoseaka tesa nitulisi kami riara sura hitu, tandaimo ira. Nee mosimpovega nte ira ala

kaupuna maeya matara. ¹⁵ Tapi nee mavuu matamiu nte ira. Popaingamo ira, apa ira sampesuvumiu sam-pomparasaya.

Tesa kaupuna

¹⁶ Kuperapi i Pue Yesus bate-batena mompakatinon-to raramiu riara mpengaya-ngaya, sabana Iamo puna katinonto. Kuperapi Ia momporoa komiu pura-pura.

¹⁷ Tabe lako nte yaku, Paulus. Tabe hitu nitulisiku mboto. Ivesiamo tanda mpale nitulisiku ri pura-pura suraku ala rasanimiu sura hitu mpuu-mpuu lako nte yaku. ¹⁸ Kuperapi Tuputa Yesus Kristus bate-batena mabelo nte komiu pura-pura.

Taba lako nte yaku,
Paulus

19-May-2009@12:42, Backup Descrip-
tion=19-May-2009@09:53, snave -

26-May-2009@11:04, Backup Descrip-
tion=26-May-2009@11:03, B Altork - ❖❖❖

1 Timotius

Vamba nu Tesa

I Paulus notulisi sura hitu ka i Timotius. I Timotius topomparasaya da namuda, nomporea bo nombatulungi i Paulus riaru pokarajaan ompatolele Kareba Belo. (Peinta Suro-suro 16:3; 17:14-15; 18:5; 19:22; 20:1-6). Tempo i Paulus notulisi sura hitu, i Timotius naria ri ngata Efesus bo i Paulus ri propinsi Makedonia. I Paulus madota hau ri ngata Efesus tapi nikitana bara da masae pade hau, jadi nitulisina sura hitu ka i Timotius (3:14-15). Riaru sura hitu, i Paulus nombatudu i Timotius mompapola pokarajaan nTupu ri ngata Efesus (1:3,18). Nituduna mombatagi tona nanggeni pepatuduki nasala (1:3-11; 4:1-6) apa ri ngata Efesus naria tona nanggeni pepatuduki anu nosisala nte Kareba Belo. Pepatudukira nompake tesa-tesa lako ri Atura agama nipapola Nabi Musa tapi pompakera tesa haitu nasala (1:7-8). Nantuntuni pepatudukira, kita ledo namala rapakasalama ane ledo nangoseaka atura-atura natantu, evamo nee moberei, nee mangande kandea nipopali (4:1-5). I Paulus nantudu i Timotius mangeva pepatuduki nasala haitu.

Naupu sia i Paulus nompatuduki i Timotius nompasiayu pokarajaan nTupu anu dopa nasiayu, evamo nosambaya (2:1-16), inggu masipato ka pakeni ntodea topomparasaya bo topotulungi pakeni (3:1-13), bo cara nabelo nombatulungi timbala napakasi (5:3-16). Naupu sia, i Paulus nompopatora i Timotius mojangai pokaingguna mboto ala mosinggambela nte pepatuduki nakana (6:2b-21).

Isi nu Sura

Tesa Pantepuuna (1:1-2)

I Paulus nantudu i Timotius mombatagi tona nanggeni pepatuduki nasala (1:3-20)

Nipatudukina pokainggu masipato ka topangoseaka i Pue Yesus (Pasal 2-3)

Nituduna mangeva pepatuduki ledo nakana (4:1-16)

Nipatudukina cara nompasiayu todea topomparasaya (4:17-6:2a)

Nipopatorana pokainggura kana mosinggambela nte pepatuduki nakana (6:2b-21a)

Taba Kaupuna (6:21b)

Petabe

1 ¹⁻² Timotius nipotoveku; iko mpuu-mpuu nirekeku anaku mboto sabana kita sampomparasaya: Sura hitu lako nte yaku Paulus, suro i Yesus Kristus. Yaku najadi suroNa nangoseaka parenta nu Alatala anu nompakasalama kita, bo nangoseaka parenta i Yesus Kristus anu nisarumakata.

Kuperapi Tuamata Alatala bo Tuputa Yesus Kristus mompoasi iko bo mombadekei belo bo katinonto ka iko.

I Paulus nompopatora i Timotius ka pepatuduki nasala

³ Kuperapi iko maboli ri ngata Efesus, mpo niuliku ka iko bara ipia tempo yaku nalai hau ri propinsi Makedonia. Apa ri situ naria bara sako-ndua tona ompatolele pepatuduki nasala, bo iko kana mombatagi ira ala domo rapatolelera pepatuduki haitu. ⁴ Ulika ira, tumo mompekirika tutura-tutura anu ledo nakana bo sunju-sunju muli ntotua nggaulu anu ledo ria kaupupuna.

Pura-pura haitu aga nanggeni tona mosinjanai, bo ledo nanggeni tona nangoseaka nia nu Alatala mompakasalama manusia sabana pomparasayara Ia.

⁵ Patuju parentaku hitu ala kita mosimpotove, ante tove neumba lako ri rara nagasa, pekiri rara ntai anu ledo nombasalai kita, bo pomparasayata i Kristus mpuu-mpuu nakana. ⁶ Naria bara sako-ndua tona domo nangoseaka pepatuduki haitu. Ira nasalandala lako ri pepatuduki nakana bo aga nosinjanaika anu ledo ria gunana. ⁷ Ira madota majadi guru Atura agama, tapi ira mboto ledo nisanira batua nu tesa-tesa nipakera. Nisarumakara ira napande nompakalanto batuan Atura agama, tano ledo nisanira patujuna.

⁸ Nisanita Atura-atura agama nipapola Nabi Musa nabelo asaa rapaketa mosinggambela nte patujuna.

⁹ Nisanita muni patuju nu Atura-atura haitu ledo mombatagi tona nanao. Tapi patuju Atura-atura haitu mombatagi tona nombaliunaka atura, tona nadaa, topesapuaka, tona nadosa, tona ledo natundu nte Alatala, tona aga nompekiri kasana dunia bo ledo nompeili agama, tona nompatesi tina tuamana

mboto, bo ka pura-pura topepatesi ntanina. ¹⁰ Atura haitu nipovia ka tona nosipogau nte tona ledo bereina mboto, tona nosipogau simbo langgai atau simbo mombine, topangae, topodava, sabi-sabi mpodava, bo ka isema-sema novia anu ledo nosinggambela nte pepatuduki nakana. ¹¹ Pepatuduki nakana haitu naria riaru Kareba Belo anu niparasaya ka yaku mompatolelena, haitumo Kareba Belo lako nte Alatala. Alatala naoge bo masipato ratoiya.

I Paulus notarima kasi nte Alatala sabana kabelo rara nu Alatala

¹² Yaku notarima kasi nte Tuputa Yesus Kristus sabana nipekiriNa yaku namala raparasaya mompatolele Kareba Belo, bo nidekeiNa kuasa ka yaku ala kupakule mombatui pokarajaa haitu. ¹³ Bara ipia yaku nanjalai i Yesus, yaku nompandasa bo nompakadaa topan-goseaka Ia. Tapi naupa ivesia, nipoasiNa yaku, sabana tempo haitu dopa niparasayaku Ia, dopa nisaniku poviaku haitu nadaa. ¹⁴ Naoge mpuu pepotove nTuputa nte yaku! Lako ri kabelo raraNa nipopompakuleNa yaku momparasaya Ia bo mompotove singgamanusiaku sabana yaku nosangu rara nte i Yesus Kristus.

¹⁵ Naria tesa nanguli ivei: "I Yesus Kristus nakava ri dunia ala mompakasalama tona nadosa." Tesa haitu nakana bo masipato ratarimata bo raparasayata mpuu. Bo yakumo nelabipa nadosa pade pura-pura tona ntanina. ¹⁶ Tapi haitumo sabana Alatala nompoasi yaku. NipoasiNa yaku ala i Yesus Kristus mompopakita posabaraNa anu ledo naupu-upu riaru nggatuvuku. Jadi yaku, tona nadosapa pade pura-pura tona ntanina, najadi jonjo ka tona ntanina ngena, ala ira muni momparasaya Ia bo manggava katuvua nabelo sampe ri kasae-saena. ¹⁷ Alatala masipato rabila bo ratoiyata sampe ri kasae-saena, apa Iamo Magau anu nomparenta sampe ri kasae-saena. Ia ledo mamate, ledo namala rakitata, aga Ia saito-itoNa Alatala nakana. Amin!

Petevai i Paulus ka i Timotius

¹⁸ Timotius, iko mpo anaku mboto! Oseakamo parenta-parenta kudekei ka iko, apa parenta hitu nosinggambela nte petevai nu Alatala anu nipasimbayu ntopanggeni agama ka iko bara ipia. Pariaramo petevai nu Alatala haitu ala maroso raramu mombatui pokarajaa nipakatantu ka iko. Pasimbukumo mombatui pokarajaa haitu masimbayu mpo tantara nabia neeva. ¹⁹ Pakaroso pomparasayamu, bo iko kana batebatena movia anu nisanimu nabelo ala iko ledo rasalala nu pekirimu. Naria bara sako-ndua tona domo nompeili anu nisanira nabelo rapoviara, sampe nageromo pomparasayara, ²⁰ evamo i Himeneus bo i Aleksander.

Nidekeikumo ira randua riaru kuasa Magau nu Seta ala rahuku, ala domo rasalaira Alatala.

Kita kana mosambaya ka topomparenta bo ka pura-pura tona

² Pamula-mulana kuuli ka pura-pura topangoseaka i Yesus, posambayaka pura-pura tona. Pekakai nte Alatala, perapi anu niparaluu ntona, bo motarima kasi nte Ia. ² Posambayaka muni magau-magau bo pura-pura tona anu nidekeika kuasa momparenta, ala kita mamala matuvu masiayu bo matinonto, bo ala kita maloga metupu nte Alatala bo mokainggu mabelo, anu masipato rabila ntona. ³ Nabelo ane kita mosambaya ivesia, bo nipokono nu Alatala Topompakasalama kita. ⁴ Ia madota ala pura-pura tona rapakasalama bo mangisani pepatuduki nakana, ⁵ haitumo, Alatala aga saito, bo aga saito muni topetariolo anu nompoposinggabelo Alatala bo manusia.

Topetariolo, Iamo i Yesus Kristus.

⁶ Ia manusia anu nombadekei karoNa mboto nipatesi mombatolosi pura-pura tona.

Ia namate ri tempo nipakatantu nu Alatala ala malanto rakitata dota nu Alatala mompakasalama pura-pura manusia.

⁷ Bo haitumo sabana yaku nianggataka nu Alatala majadi suroNa. NituduNa yaku hau mompatolele Kareba Belo ka tona ledo toYahudi. NituduNa yaku mompatuduki pepatuduki nakana ka ira ala raparasayara i Yesus. Anu nitesaku hitu nakana mpuu, yaku ledo no-dava!

Pokainggu masipato rapovia langgai bo mombine ri podade ntopomparasaya

⁸ Dotaku ala ri umba-umba topomparasaya nasiromu mombasomba Alatala, langgai mosambaya ante rara nagasa. Ledo masipato mosambaya ane narau rara atau nosinjanai.

⁹ Ivesia muni mombine. Ira kana mobaju masipato bo moada. Nee mompengaya-ngaya bulua. Nee mombavera karo ante ramba-ramba nasuli mpo bulava, mutiara bo baju nasuli-suli. ¹⁰ Aginapa mombine mombavera karora ante pokainggu nabelo anu masipato ka mombine anu natundu nte Alatala.

¹¹ Mombine kana mangepe pepatuduki ante malino bo ante ede rara. ¹² Ledo kupasipato mombine mompatuduki bara momparenta langgai. Mombine kana malino, ¹³ sabana tona paratama nipajadi nu Alatala iamo i Adam, bo naupu haitu pade nipajadiNa i Hawa. ¹⁴ Bo ledo i Adam nibagiu Magau nu Seta, tapi i Hawa nibagiu sampe niliunakana parenta nu Alatala. *Bo siamo sampe ia nandasa noana.*¹⁵ Tapi naupa ivesia,

† Peinta Kajadia 3:1-6

ane mombine maroo momparasaya i Yesus, mompove tona ntanina, bo matuvu nte pokainggu nabelo bo masipato, ia rapakasalama tempo moana †.

Pokainggu masipato ka tona raanggataka majadi pakeni ntodea topomparasaya

3 Nakana mpuu tesa nanguli ivei: "Isema-sema madota majadi pakeni ntodea topomparasaya, nipokonona pokarajaa anu nabelo mpuu." ² Tona masipato manggeniaka todea topomparasaya kana mabelo pokaingguna sampe ledo ria pokaingguna nuapa-nuapa rapakasala. Ia aga saito bereina bo nipakulena mombatidamaka dota rarana mboto. Nanoto pekirina bo naria adana. Ia nadamba nantarima torata riaru banuana bo nipakulena nompatuduki tona ntanina. ³ Ia ledo tolongu, bo ledo toposibaga. Tapi ia kana nalusu rarana bo natuvu nosinggabelo. Ia ledo muni aga nadoko ka doi. ⁴ Ia kana matau mompasiayu tona ri banuana mboto ante mabelo bo mompatuduki anana mboto matundu nte ia bo mombabila ia. ⁵ Apa ane ledo rapakulena mompasiayu tona ri banuana mboto, berimbamo rapakulena mompasiayu todea topomparasaya Alatala? ⁶ Ledo mamala tona dako nomparasaya i Kristus majadi pakeni ntopomparasaya, mbelaka malanga rarana bo rapambela pehuku nasimbayu mpo pehuku nipambela ka Magau nu Seta bara ipiame. ⁷ Tona najadi pakeni kana rareke tona nabelo ri panggita ntodea ledo topomparasaya. Apa ane ledo ivesia, tantu ia rasalai ntona sampe Magau nu Seta mompakanavu ia.

Pokainggu masipato ka tona raanggataka majadi topotulungi pakeni ntodea topomparasaya

⁸ Ivesia muni tona anu raanggataka majadi topotulungi pakeni ntodea topomparasaya. Ia kana nabelo pokaingguna bo nanao rarana, ledo nadoko doi bo ledo muni nabiasa gaga nanginu anu nepakalangu. ⁹ Ia kana maroo momparasaya pepatuduki nakana anu nipopaisani nu Alatala ka kita, bo kana mangoseaka pepatuduki haitu ante mpuu-mpuu rarana. ¹⁰ Dopame ia raanggataka, ia kana raparesa ntani ruru. Bo ane nikita ledo ria pokaingguna nasala, pade mamala ia raanggataka majadi topotulungi pakeni ntopomparasaya. ¹¹ Ivesia muni bereina †† kana mombine nabelo pokaingguna, ledo topetunturaka. Bo ia muni kana matau mantaamaka dota rarana mboto bo mokainggu nanao sampe namala raparasaya riaru mpengayangaya.

¹² Topotulungi pakeni ntopomparasaya kamba saito bereina. Kana rapakulena mompasiayu pakabelo

† ia rapakasalama tempo moana ATAU: ia rapakasalama lako ri pompoanaka saito ngana, haitumo i Yesus Kristus ATAU: ia rapakasalama ante poana. †† bereina ATAU: mombine anu nompatulungi pakeni ntodea topomparasaya.

anana bo tona ri banuana mboto. ¹³ Ane mabelo pokarajaa nompatulungi pokarajaa nTupu, tantu ia rabila ntona bo ia mantambai mabia mosabiki momparasayana i Yesus Kristus.

Patuju i Paulus notulisi sura hitu ka i Timotius

¹⁴ Timotius, nisarumakaku masalisa yaku tou mosinggava nte iko. Tapi naupa ivesia, nitulisiku sura hitu ka iko ¹⁵ mbelaka masae pade makava yaku, musanimomo pokainggu masipato ka pura-pura tona nireke nu Alatala ana-anaNa. Apa kitamo todea anu nombasomba Alatala anu Natuvu sampe ri kasae-saena. Kitamo nanggngisi bo nombajagai pepatuduki nakana lako nte Alatala ala ledo rabaliki ntona, nasimbayu mpo tinja bo pandasi nombatande pakaroso banua. ¹⁶ Nabelo mpuu pepatuduki nakana niparasayata, anu dopa nisani ntona nggaulu tapi sii-sii nipopaisani nu Alatala ka kita ivei:

Ia najadi manusia

bo Nosa Gasa nosabiki Ia mpuu-mpuu tona nipelisi nu Alatala.

Ia nikita nu malaeka nu Alatala

bo karebaNa nipatolele ka tona dopa nosisani nte Alatala.

Ia niparasaya ntona ri umba-umba ri dunia

bo Ia nianggataka hau ri suruga.

Nadea tona nangoseaka pepatuduki nasala

4 Nosa Gasa nu Alatala nanguli pakalanto ka kita anu majadi ri tempo hitu napara kaupnu dunia. Maria tona moura momparasaya pepatuduki nakana. Ira aga mangoseaka anu daa anu nombabagi tona, bo momparasaya pepatuduki lako ri seta-seta.

² Pepatuduki haitu rakeni ntona noagama ri sumba tapi kakanana aga topodava. Tona haitu nalanda rarara. Nantarimo pekirira, domo nisanira nompoposisala anu nabelo bo anu nadaa. ³ Nipatudukira tona nee moberei bo nee mangande kande nipopali. Tano kande haitu nipajadi nu Alatala rakande. Kita topomparasaya i Kristus, nisanita pepatuduki nakana, bo kande haitu namala rakandeta ante manguli tarima kasi nte Alatala. ⁴ Apa pura-pura nipajadi nu Alatala nabelo. Ledo ria nuapa-nuapa nipopali ane rakandeta ante manguli tarima kasi nte Alatala. ⁵ Kande haitu nagasa sabana Tesa nu Alatala nanguli nagasa bo sabana posambayata.

I Paulus nompakadidi rara i Timotius mangeva pepatuduki nasala

⁶ Ane mupatuduki pura-pura haitu pangane ka sampesuvuta sampomparasaya, iko majadi topokarajaa nabelo ka i Yesus Kristus. Bo iko mompakaroso raramu mboto ante Tesa nu Alatala anu niparasayata, bo

ante pepatuduki nakana anu nioseakamu sampe sii-sii. ⁷ Tapi kavaonimo tesa-tesa ledo noguna bo ledo nosinggambela nte pepatuduki nakana lako nte Alatala. Iko kana bate-batena mompasimbuku matuvu natundu nte Alatala. ⁸ Ane kita mompakaroso karota aga sakide gunana. Tapi ane kita mompakaroso rarata matuvu ante pokainggu nompakadamba Alatala, nadea mpuu gunana riaru mpengaya-ngaya. Apa raka-vata katuvu mabelo anu nijanji nu Alatala, nompamula sii-sii sampe ri kasae-saena.

⁹ Tesa pangane mpuu-mpuu nakana bo masipato ratarimata bo raparasayata pura. ¹⁰ Haitu sampe kita nompasimbuku mokarajaa ntamo mompatuduki pepatuduki nakana, sabana kita nanjarumaka Alatala anu Natuvu sampe ri kasae-saena. Iamo nompakule nompakasalama pura-pura manusia, nelabipa tona nompapasaya Ia.

¹¹ Pura-pura anu niuliku ka iko, mupatudukika ka todea, bo tudumo ira mangoseakana. ¹² Nee mupalamba tona mompandaente iko sabana iko da namuda. Tapi iko kana majadi jonjo ka topomparasaya riaru tesamu, pokainggumu, pepotovemu ka roa, pomparasayamu nte i Pue, bo kagasa katuvumu. ¹³ Papolamo mombaca Buku Gasa ka todea topomparasaya bo nee menonto mompakaroso pomparasayara bo mompatuduki ira sampe makava yaku. ¹⁴ Nee malinga mompake pompakule nidekei nu Nosa Gasa ka iko tempo tona nompasimbayu petevai lako nte Alatala ka iko bo pakeni ntopomparasaya nodika palera ri balenggamu. ¹⁵ Poviamo pura-pura pokarajaa haitu ante mpuu-mpuu rara ala rasani ntodea iko batena nantambai pangoseakamiau dota nu Alatala ka iko. ¹⁶ Jagaimo pokainggumu bo jagai muni pepatudukimu. Iko kana matutu movia pura-pura anu nipatudukiku ka iko. Apa ane mupovia ivesia, iko mboto rapakasalama bo topangepe pepatudukimu muni rapakasalama.

Pakeni agama kana malusu nte sampesuvu sampomparasaya

5 Nee makasara mangonteaka langgai anu natu-akapa pade iko, tapi popatoramo ia ante tesa nalusu nasimbayu mpo anu mupovia ka tuamamu mboto. Popatoramo langgai namuda nasimbayu mpo mupovia ka sampesuvumu mboto. ² Popatoramo mombine natuakapa pade iko nasimbayu mpo tinamu mboto. Popatoramo mombine namuda nasimbayu mpo mompatudukimu ka tueimu mboto, bo pakabelo ala pokainggumu bo pekirimu masipato.

Pepatuduki dala nabelo mombatulungi timbala topomparasaya

³ Bilamo bo tulungimo timbala-timbala anu mpuu-mpuu ledo ria tona nompeili ira. ⁴ Tapi ane maria anana bara tupuna, ira haitumo masipato rapatuduki mokolu mantulungi totuara mboto bo mombabalasi kabelo ntotuara. Haitumo pokainggu nabelo anu nompakadamba rara nu Alatala. ⁵ Timbala anu mpuu-mpuu natuvu saitona bo ledo mpuu naria isema-sema mompiarana, aga natuvu manjarumaka Alatala. Eo bongi ia nosambaya njuu nerapi tulungi nte Ia. ⁶ Tapi timbala anu natuvu aga nompesana-sana, ia mpo to-mate, nau karonu da natuvu. ⁷ Ulimo petevai-petevai hitu ka ira ala ira matuvu ante pokainggu anu ledo namala rasalai ntona. ⁸ Tapi ane maria tona ledo nantulungi sampesuvu-sampesuvuna, nemopa ira sambanua, tona haitu nompoara pepatuduki nakana. Nadaapa ia pade tona ledo nompapasaya.

⁹ Timbala anu masipato rasuaraka sangana riaru buku timbala ratulungi ntopomparasaya, aga mombine umuruna nagana onopulu mpae, anu nipoberei aga sanggani. ¹⁰ Bo nisani ntonamo pokaingguna nabelo. Jonjona: nipakambasona pakabelo anana, nadamba rarana nantarima torata riaru banuana, nijampangina topomparasaya, nitulungina tona nasusa, bo ia nabiasamo novia mpengaya-ngaya anu nabelo.

¹¹ Tapi nee rasuaraka sanga ntimbala da namuda riaru buku haitu. Sabana, ane dota rarara mompene sampe mombadagi dota rarana mangoseaka Kristus, ia madota rapoberei vai. ¹² Bo kaupuna ia mambela pehuku sabana ia nombaliunaka pojanjina *aga mokarajaa ka i Kristus*. ¹³ Ledo aga haitu, timbala namuda bara aga majadi tosanda bo aga manjajo-njajo mompene ri sou ntona. Ia ledo aga majadi tosanda ia muni manggeni tesa bo mombagalo urusa ntona ntanina bo motesa mpengaya-ngaya anu nadaa anu ledo masipato ratesa. ¹⁴ Haitu sampe niuliku timbala-timbala da namuda aginamo moberei vai bo moana bo mompakasiayu avura mboto ala nee radekei loga ka balita manjalai kita. ¹⁵ Niuliku ivesia sabana naria mamimo timbala nasalandala bo domo nangoseaka dota i Kristus, tapi aga nangoseaka dota Magau nu Setta.

¹⁶ Tapi ane mombine topomparasaya naria sampesuvuna natimbala, ia kana mombatulungi timbala haitu. Nee aga rapalambana todea sampomparasaya mantulungi timbala haitu. Ivesiamo, todea topomparasaya

† anu nipoberei aga sanggani ATAU: anu naroo nte bereina.

†† Tempo haitu, ane timbala ratulisi sangana riaru buku ratanda ntodea topomparasaya, ia kana mojanji domo moberei bo aga mokarajaa ka i Kristus nombatulungi todea topomparasaya. Jadi ane ia moberei vai, nireke niliunaka pojanjina.

mompakule mantulungi timbala-timbala anu mpuu-mpuu ledo ria tona nompeili ira.

Cara nabelo nombaurusi parakara-parakara nu pakeni ntopomparasaya

¹⁷ Pakeni ntodea topomparasaya anu nabelo pekeniakara, masipato rabila ronggani kadeana pade tona ntanina, nelabipa ira anu nompasimbuku mpuu nompatuduki bo nompatolele Tesa nu Alatala. ¹⁸ Masipato kita mombabila pakeni ntodea topomparasaya, sabana riara Buku Gasa niuli ivei: "Nee rapou sumba nu japi tempo ia noini pae." † Bo naria muni niuli ivei: "Topokarajaa masipato mantarima gajina." ††

¹⁹ Ane maria pakeni ntodea topomparasaya nirai ntona, nee mutarima ane ledo maria randua bara tatalu sabi mompakakana perai haitu. ²⁰ Tapi ane pakeni ntodea haitu mpuu-mpuu novia dosa, ia kana raonteaka ri ngayo ntodea ala topomparasaya ntanina maeka movia dosa.

²¹ Timotius, ri ngayo Alatala bo i Yesus Kristus bo malaeka-malaekana anu nipelisiNa, kuuli ka iko: oseakamo parenta-parenta nitesaku pangane ante noa rara. Nee mompelenje bo nee manjairaka. ²² Nee masalisa gaga mombadika palemu ri karo ntona manggangataka ia majadi pakeni ntopomparasaya. Paresa ntani ruru ingguna, apa ane ia movia dosa ngena, iko mo rapakasala. Nee sampe karomu matekeni nte dosa ntona ntanina. Jagaimo pokainggumu mboto ala iko batena matuvu ante pokainggu nagasa.

²³ Tumo aga uve nggoo muinu, tapi inu muni sakide uve anggur ala mompakulisi tailikomu, apa iko nasaro nadua.

²⁴ Naria tona nalantomo dosana nau dopa nitangara. Tapi dosa ntona ntanina damo riara potangara pade nalanto. Jadi nee masara gaga manggangataka tona majadi pakeni ntopomparasaya. ²⁵ Ivesia muni pokainggu nabelo, biasa nalanto nikita ntona. Tapi nau ledo nikita, kana rakita ngena, apa pokainggu nabelo ledo namala ratabuniaka.

6 Topomparasaya i Yesus anu najadi batua ntona kana mombabila bo matundu nte tuana ala Alatala ledo rasalai ntona bo pepatudukita nakana ledo rapakadaa ntona. ² Ane tuana mboto topomparasaya i Yesus, nee radekei batua haitu mompandaente tuana, sabana ira nosampesuvu sampomparasaya. Tapi ia kana mantambai kabelo pokarajaana sabana tua nitulungina haitu muni topomparasaya i Pue anu nipotovera.

Mainga ka guru-guru mpodava

Timotius, iko kana mompatuduki pura-pura pepatuduki hitu ka todea topomparasaya bo popatora

† Ulangan 25:4 †† Lukas 10:7

ka ira ala raoseakara. ³ Naria sanu tona nanggeni pepatuduki anu nosisala ante pepatudukita. Ledo nipokonora tesa-tesa nakana lako nte Tuputa Yesus Kristus bo ledo nipokonora pepatuduki anu nanggeni kita matuvu mangoseaka dota nu Alatala. ⁴ Tona haitu nalanga rarana. Ia netitau tapi ledo nisanina nuapauapau. Ia aga nagila nangelo saba bo nosinjanai ka batua nu tesa. Pepatudukira haitu aga nanggeni tona nasiriati, nosinggarau, nosiuli-uli, nosirai, ⁵ bo ledo naupu-upu nosipakadua rara. Nadaamo pekirira bo domo nisanira anu nakana. Nisarumakara makalumana ira ane moagama.

Nee mompotove doi

⁶ Nakana mami, ane noagama kita, naoge mpuu belo rakavata, asaa naosa rarata ante anu naria nte kita. ⁷ Apa tempo kita nipoanaka ledo ria nuapauapau nikenita riara dunia hitu, bo ane kita mamate ledo ria nuapauapau mamala rakenita lako ri dunia hitu. ⁸ Jadi ane maria kandeata bo pakeata, kana maosamo rara-ta. ⁹ Tapi tona madota majadi makalumana mambela pesori. Ia ratoliani mpengaya-ngaya dota rara nadaa bo nadoyo, bo dota-dota haitu mompakagero katuvuana, mompakavau ia, bo mompakaropu ia ¹⁰ sabana mompotove doi puna mpengaya-ngaya kadaa. Sanu tona nompasimbuku nangelo doi sampe nasalandalamo bo domo nioseakara pepatuduki nakana, bo aga mpengaya-ngaya kasusa nikavara anu mompakabuku rarara.

Petevai i Paulus ka i Timotius mboto

¹¹ Tapi iko batua nu Alatala. Nee mpuu mokainggu madaa ivehaitu! Pasimbukumo majadi tona nanoa ri panggita nu Alatala. Pasimbukumo matuvu mangoseaka dotaNa. Kana mupakaroso pomparasayamu, potovemo singgamanusiamu, tidamaka tempo nasusa, bo moinggu malusu. ¹² Pasimbukumo mpuu-mpuu mangoseaka pepatuduki i Kristus. Kingisi pakarosomo katuvu nabelo sampe ri kasae-saena. Apa patuju nu Alatala nompokio iko majadi todeaNa ala mukava katuvu nabelo haitu tempo nipangakumu pomparasayamu i Kristus ri ngayo ntodea.

¹³ Jadi, ri ngayo nu Alatala, anu nompakatuvu purapura anu naria, bo ri ngayo i Yesus Kristus anu nabia nompangaku tesa nakana ri ngayo i Pontius Pilatus, kuuli ka iko ivei: ¹⁴ Oseaka puramo parenta hitu ante mpuu-mpuu raramu bo ante pokainggu anu ledo masipato rasalai ntona, sampe makava mpanjili Tuputa i Yesus Kristus. ¹⁵ Ia makava ri tempo nipakatantu nu Alatala. Aga Alatalamo nakuasa, bo nambaso mpuu kaogeNa. Ia Magau nakuasapa pade pura-pura magau ntanina, bo Tupu anu nakuasapa pade pura-pura tupu ntanina. ¹⁶ Aga Ia saito-itoNa ledo mamate. Ia natuvu

riara reme anu ledo namala rakaparai. Ledo ria saitoa manusia nanggita Ia, apa ledo nipakule nu manusia manggita Ia. Iamo masipato rabila bo Iamo masipato momparenta sampe ri kasae-saena. Amin!

Pepatuduki ka tona nakalumana

¹⁷ Timotius, ulika tona nakalumana ri dunia hitu ala nee majadi malanga rarara bo nee aga manjarumaka mbara-mbara ri dunia anu sakide-sakide malipo. Ira kana manjarumaka Alatata anu nompopelabi-labi ka kita mpengaya-ngaya anu niparaluuta rapodambadambata. ¹⁸ Popatoramo tona nakalumana, mokainggu mabelo ala pokainggura nabelo haitu majadi kakalumanara. Ira kana majoi rara bo masadia mombatulungi tona ntanina. ¹⁹ Ane ivesia pokainggura, namala raulita ira nompasiromu kakalumana ri suruga, anu mamala rasarumakara ri tempo makava, bo rakavara katuvu nabelo sampe ri kasae-saena.

Pepatora bo petabe kaupuna

²⁰ Timotius, jagaimo pakabelo-belo pepatuduki nakana anu niparasaya nu Alatata ka iko ala ledo rabaliki ntona. Nee mompariara tesa ledo ria gunana bo ledonanggeni kita mangoseaka dota nu Alatata, bo tesa-tesa anu nosisala nte pepatuduki nakana. Tesa-tesa haitu niuli ntona "pangisani", tano ledo nakana. ²¹ Naria tona nangoseaka tesa haitu sampe nasalandalamo, bo domo nangoseaka pepatuduki nakana.

Kuperapi Tupu mombadekei belo ka komiu pura-pura. Amin.

Tabelako ri nte yaku,
Paulus

19-May-2009@12:42, Backup Description=19-May-2009@09:53, snave -
26-May-2009@11:04, Backup Description=26-May-2009@11:03, B Altork - ❖❖❖

2 Timotius

Vamba nu Tesa

Lako ri pura-pura sura nitulisi i Paulus, sura hitu kaupuna. Sura hitu nitulisina tempo ia nitarunggu ri kota Roma (1:8,16-17; 2:9). Nikitana naparamo gantana ia rahuku mate (4:6). Jadi nitulisina sura hitu ka i Timotius. I Timotius langgai muda anu nipotove i Paulus mpo anana mboto. Nasaemo i Timotius nosampokarajaa nte i Paulus bo nikeniakana todea topomparasaya ri ngata Efesus tempo sura hitu nipakatu ka ia.

Sura hitu petevai i Paulus kaupuna ka i Timotius. Niperapina i Timotius masalisa mosinggava nte ia (4:9,21) apa nalentoramo rarana nte i Timotius (1:3-5). I Paulus nompakadidi rara i Timotius ala rapoviana pokarajaa ni-parasaya nu Alatala ka ia ante mpuu-mpuu rarana (1:6-7) bo mantidamaka rara riara kasusana (1:8; 2:3-12). Nituduna i Timotius mompatuduki pepatuduki nakana (1:13; 2:2; 3:14), mombatagi tona nanggeni pepatuduki nasala (2:14-18; 3:1-9), bo mompasimbuku njuu mompatolele Kareba Belo bo movia pura-pura pokarajaa nTupu (4:1-2).

I Timotius nipopatora mombajagai pokaingguna mboto, bo rapasialana jonjo i Paulus, haitumo pomparasayana, posabarana, pepotovena, bo pantidamakana. Pepatuduki niepena lako nte i Paulus kana rapatudukina ka tona ntanina anu namala raparasaya bo mompakule mompatuduki tona ntanina (2:2).

Isi nu Sura

Tesa pantepuuna (1:1-2)

I Paulus nosukuru sabana pomparasaya i Timotius (1:3-5)

I Paulus nompakadidi rara i Timotius ala mabelo pokarajaana ka i Yesus (1:6-4:8)

I Paulus nerapi i Timotius masalisa mosinggava nte ia (4:9-15)

Nau i Paulus nitarunggu bo domo masae rahuku mate, ia bate-batena nanjarumaka Alatala (4:16-18)

Petabe (4:19-22)

Petabe

1 ¹⁻² Timotius, iko nipotoveku mpo anaku mboto: Sura hitu lako nte yaku, i Paulus. Nangoseaka dota nu Alatala, yaku nianggatakaNa majadi suro i Yesus Kristus ala mompatolele kareba anu nantesa katuvu mabelo sampe ri kasae-saena anu nijanji nu Alatala. Kita nanggung katuvu nabelo haitu sabana kita nosangu rara nte i Yesus Kristus.

Kuperapi Tuamata Alatala bo Tuputa Yesus Kristus mompoasi iko bo mombadekei belo bo katinonto ka iko.

I Paulus nosukuru nte Alatala sabana pomparasaya i Timotius

³ Yaku nosukuru nte Alatala anu nisombaku ante rara nagasa, nasimbayu mpo nipovia ntoutuaku ng-gaulu. Yaku nasaro nanguli tarima kasi ka Alatala sabana iko, bo eo bongi yaku nantora iko riara posambayaku. ⁴ Nitoraku kasusa raramu tempo kita nogaa bara ipia, bo nalentora mpuu raraku manggita iko ala yaku mpuu-mpuu madamba. ⁵ Yaku nosukuru nte

Alatala apa nitoraku iko nomparasaya i Yesus nte mpuu-mpuu raramu. Tupumu mombine i Lois, bo tina-mu, i Eunike anu nokolu nomparasaya. Bo nisaniku pomparasayamu nasimbayu nte pomparasayara.

I Paulus nompopatora i Timotius mpuu-mpuu mombakingisi Kareba Belo

⁶ Sabana haitu, kupopatora ka iko, iko kana mpuu-mpuu mompake mompakule nidekei nu Alatala ka iko tempo yaku nosambaya nombadika paleku ri karomu bara ipia. ⁷ Apa Nosa Gasa nipopanau nu Alatala ka kita ledo nompakaeka kita, tapi nompakaroso rarata, bo nompopompakule kita mombatidamaka dota rarata mboto bo mompotove singgamanusiata.

⁸ Jadi, nee maeya matamu motesaki Tuputa i Yesus, bo nee maeya matamu manggita yaku nitarunggu sabana pokarajaaku nompatolele Kareba i Yesus. Tapi iko kana masadia mantingayo kasusa nasimbayu mpo yaku sabana iko nompatolele Kareba Belo. Bo Alatala mombadekei kuasa ka iko mantingayo kasusa haitu.

⁹ Alatala nompakasalama kita bo nompokio kita majadi todeaNa nagasa. Kita nipakasalama ledo sabana pompasimbukuta mboto, tapi sabana nia nu Alatala

bo pepotoveNa. Ri lamba pamulana dopame dunia ni-pajadi, Alatala nonia mamimo mompopakita pepotoveNa ante anu rapovia i Yesus Kristus. ¹⁰ Bo sii-sii nakavamo i Yesus Kristus topompakasalama kita bo nikitata kambaso pepotove nu Alatala ka kita. Lako ri Kareba Belo nisanita i Kristus nombadagi kuasa kamate, bo nombadekei katuvua nabelo anu ledo maupu-upu. ¹¹ Yaku nianggataka nu Alatala majadi suroNa ala mompatolele bo mompatuduki Kareba Belo haitu *ka tona ledo toYahudi*.¹² Bo yaku nombarasai pura-pura kasusa riaru ntarunggu hitu sabana pokarajaaku nompatolele Kareba Belo. Tapi naupa ivesia, ledo naeya matak, sabana niposisanikumo i Yesus anu nisarumakaku, bo nisanikumo Ia nompakule nombajagai yaku † sampe ri Eo Potangara ri kaup, nu dunia.

¹³ Timotius, toramo pura-pura pepatuduki niepemu lako nte yaku. Pepatuduki haitu nakana mpuu bo kana majadi jonjo mupasiala bo mupatuduki ka tona ntanina. Pakaroso pomparasayamu bo potovemo singgamanusiamu sabana posangu raramu nte i Yesus Kristus. ¹⁴ Pepatuduki haitumo kakalumana niparasaya nu Alatala ka kita. Jadi ante petulungi Nosa Gasa anu naria riaru ntaita, jagaimo pepatuduki haitu. Nee radekei rabaliki ntona.

Kareba i Paulus

¹⁵ Nisanimu pura-pura topomparasaya lako ri propinsi Asia nompalaisi yaku. Nau i Figelus bo i Hermogenes, nalai munimo. ¹⁶ Tapi kuperapi i Pue Yesus maasi mataNa nte gi Onesiforus sambanua, sabana nadea ngganimo ia nakava nompakadamba raraku. Nau yaku nitarunggu, ledo naeya matana nanggita yaku. ¹⁷ Tempo ia nakava ri ngata Roma, nielo-elona yaku sampe nikavana. ¹⁸ Nisanimu nadea mpuu petulungina ka yaku ri ngata Efesus. Kuperapi i Pue Yesus mompoasi i Onesiforus ri Eo Potangara ri kaup, nu dunia.

I Timotius nipopatora mombatidamaka riaru kasusa

2 Jadi Timotius, anaku, pakaroso raramu ante petulungi nidekei nu Alatala lako ri kabelo rana ka kita anu nosangu rara nte i Yesus Kristus. ² Niepemu pepatudukiku bo nadea tona ntanina nangepe bo nosabikina muni. Jadi pepatuduki haitu kana mupatuduki ka tona anu namala raparasaya bo anu nompakule mompatuduki tona ntanina.

³ Iko tantara i Yesus Kristus nabelo. Jadi iko kana masadia mombarasai kasusa nosangani-nggani nte yaku. ⁴ Apa tantara nabelo ledo notingguka bago ntanina tempo ia nombatui bagona niparasayaka ia. Apa ia madota mompakadamba rara nu tadulakona. ⁵ Topo-

† Ia nompakule nombajagai yaku ATAU: Ia nompakule nombajagai Kareba Belo anu niparasayaNa ka yaku

more ledo mamala majadi padagi ane ia ledo matundu ri atura-atura nipakatantu. ⁶ Topotalua anu nokarajaa ntamo, iamo paratama masipato mantarima asele ntaluana haitu. ⁷ Tanondoakamo porapa pangane bo Tupu mompakanoto raramu ala mupaha pura-pura.

⁸ *Ane murasai kasusa*, toramo i Yesus Kristus, muli Magau Daud. Ia namate bo natuvu mpanjili evamo anu nitesa riaru Kareba Belo nipatoleleku. ⁹ Yaku hii nipandasa sabana nompatolele Kareba Belo haitu. Yaku nipou rante nasimbayu mpo tona nadaa. Tapi Tesa nu Alatala ledo namala rarante, kana matolele ri umba-umba. ¹⁰ Jadi yaku nombatidamaka mpengaya-ngaya kasusa ala mamala kutulungi tona nipelisi nu Alatala sampe ira muni mamala momparasaya i Yesus Kristus bo rapakasalama bo matuvu mabelo mosangani-nggani nte Alatala sampe ri kasae-saena. ¹¹ *Yaku nombatidamaka kasusa sabana* nakana mpuu tesa nanguli ivei:

“Ane kita namatemo nosangani-nggani ante Ia, Kita muni matuvu mosangani-nggani ante Ia.

¹² Ane kita nombatidamaka riaru kasusata, Kita momparenta mosangani-nggani ante Ia bara maipia.

Ane kita mombasapu Ia
Ia muni mombasapu kita.

¹³ Nau kita ledo natutu nomparasaya Ia
Ia bate-batena namala raparasaya, sabana anu niuli-Na kana rapakadupaNa mpuu.”

Pokainggu masipato ka batua nu Alatala mantingayo pepatuduki nasala

¹⁴ Popatoramo pura-pura tesaku hitu ka topomparasaya. Ri panggita nu Alatala anu nosabiki pura-pura, ulika ira nee mosinjanaika batua ntesa. Haitu ledo ntoto naria gunana bo aga mompakagero pomparasaya ntopangepe. ¹⁵ Tapi iko kana mompasimbuku mpuu-mpuu mokaarajaa mabelo ala madamba rara nu Alatala bo rarekeNa iko masipato mokaarajaa ka Ia. Pasimbukumo ala ledo maeya matamu manggita pokarajaamu tapi mupatuduki tesa nakana lako nte Alatala ante kakana-kanana. ¹⁶ Nee rapetalingai tesa-tesa anu ledo ria gunana bo ledo nombabila Alatala, sabana tesa-tesa ivehaitu ledo ntoto nangingeni tona mangoseaka dota nu Alatala. ¹⁷ Tesa ntona haitu nendai mpo dua bo nompakadaa katuvu ntona. I Himeneus bo i Filetus notesa ivehaitu. ¹⁸ Ira nasalandalamo lako ri pepatuduki nakana bo aga nompakagero pomparasaya ntona. Niulira naliumo pompakatuvu mpanjili tona namate. Pepatudukira haitu ledo ntoto nakana. ¹⁹ Tapi naupa ivesia, Tesa nu Alatala batena nakana bo namala raparasaya. Tesa nu Alatala naroso mpo pandasi nau ragoya ledo mogoya. Tesa nu Alatala haitu nitulisi ivei: “Nisani nTupu isema todeana.” Bo naria tesa

ntanina nanguli, "Isema-sema nanguli ia topangoseaka Tupu, kana menonto mokainggu nadaa."

²⁰ Riara banua mbaso naria mpengaya-ngaya pareva. Naria nipovia lako ri bulava bo salaka, tapi naria muni anu nipovia lako ri kayu bo tana lei. Pareva bulava bo salaka nipake mantande torata, tapi pareva ntanina nipake eo-eo. ²¹ Jadi ane tona mombakabasaka pura-pura pokaingguna nadaa, ia majadi masimbayu mpo pareva bulava bo salaka rapake mombatande torata. Batuana, ia majadi topokarajaa anu nagasa bo noguna ka Tupuna, bo ia masadia movia mpengaya-ngaya pokarajaa nabelo.

²² Jadi, nee mpuu mangoseaka dota-dota nu rara nadaa anu nipodamba ngana-ngana muda. Tapi pasimbukumo matuvu manoa ri panggita nu Alatala. Pakaroso pomparasayamu, potovemo singgamanusiamu, bo pasimbukumo matuvu mosinggabelo nte ira. Poviamo pura-pura haitu mosangani-ngani nte pura-pura tona anu nekakai nte i Pue ante rara nagasa. ²³ Nee mupesua potesa ntodoyo anu ledo nisanira pepatuduki nakana. Nisanimu mboto tesa ivehaitu aga mompopeumba posinjanai. ²⁴ Tapi batua i Pue Yesus ledo masipato mosinjanai nte tona. Ia kana malusu nte tona pura-pura. Ia kana mompakule mompatuduki ante nabelo, bo ia muni kana mosabara. ²⁵ Ia kana malusu rarana mompatuduki tona nangeva ia, mbelaka da mamala ira rakeni nu Alatala majea lako ri pokainggura nasala bo mangisani pepatuduki nakana. ²⁶ Ivesiamo ira majadi manoto mpanjili bo rakabasaka lako ri kuasa Magau nu Seta anu nombabagiui ira bo nompasuu ira mangoseaka dotana.

Mapara kaupu nu dunia manusia mantambai kadaana

3 Timotius, kana musani, ri tempo maparamo kaupu nu dunia madea mpuu kasusa ri dunia hitu. ² Tempo haitu madea tona aga mompotove karora mboto. Ira madoko doi, mamango, malanga rara, mantunturaka roa, bo ledo matundu nte totuara. Ledo rasanira motarima kasi, bo ledo rapeilira agama. ³ Ledo rasanira mepotove, ledo madota mosinggabelo, bo aga mompakadaa sanga ntona ntanina rapokonora. Ledo rapakulera mantaamaka dota nu rarara mboto. Ira mpuu-mpuu masoa bo mavuu matara manggita pura-pura anu nabelo. ⁴ Ira aga mombaakalani roa, ledo ria reker, bo pangulira iramo tona nataupa. Ledo raportovera Alatala, aga kasana karora mboto raportovera. ⁵ Pangoseakara ada-ada agama mpo tona natundu nte Alatala, tapi riara ntaira nipoarara kuasa nu Alatala *anu mompakule mombabaliki rarara nadaa.*

Timotius, nee mpuu mosimpovega nte tona nokainggu nadaa ivehaitu. ⁶ Sanu ira nanggeni pepatuduki ledo nakana hau ri banua ntona, bo niopara mombine-mombine nadoyo anu nadea

dosara bo nikuasai mpengaya dota rara nadaa.

⁷ Mombine-mombine haitu nasaro nekipaguru tapi ledo nipakulera nombapaha mpuu pepatuduki nakana lako nte Alatala. ⁸ Tona nanggeni pepatuduki anu ledo nakana haitu pekirira nadaamo bo pomparasayara ledo nakana. Ira mpuu-mpuu nangeva pepatuduki nakana, nasimbayu mpo i Yanes bo i Yambres [†] nangeva Nabi Musa nggaulu ante pangisanira. ⁹ Tapi ledo rapakulera mompapola pangevara pepatuduki nakana, sabana kadoyora haitu kana malanto rasani ntodea, nasimbayu nte anu najadi nte i Yanes bo Yambres nggaulu.

Tidamakamo mangoseaka isi Buku Gasa

¹⁰ Tapi, Timotius, nisanimumo yaku ledo nasimbayu nte tona pangane. Nipariaramumo pepatudukiku, nipasialamumo pokaingguku bo patuju katuvuku. Nisanimumo pomparasayaku, posabaraku, pepotoveku bo pantidamakaku riara kasusa. ¹¹ Nipeintamu mbotomo berimba yaku naroo tempo yaku nipandasa bo nipakasusa evamo najadi ri karoku ri ngata-ngata Antiokhia, Ikonium, bo Listra bara ipia. Yaku mpuu-mpuu nipandasa, tapi Tupu bate-batena nompakasalama yaku lako ri pura-pura kasusaku haitu.

¹² Pura-pura tona anu madota matuvu mangoseaka dota nu Alatala bo matuvu mosangu rara ante i Yesus Kristus, tantu rapandasa. ¹³ Tona nadaa bo topebagiu aga mantambai kadaana. Ira mombabagiui tona ntanina bo ira muni rabagiui.

¹⁴ Tapi iko, Timotius, kana bate-batena manggangisi pepatuduki nakana anu nipegurumu bo mpuu-mpuu niparasayamu. Nisanimu tona nompaguru haitu, nipaguruna nakana ka iko. ¹⁵ Lako ri kakodimu nisanimu isi Buku Gasa, bo Buku Gasa haitumo nompakanoto raramu sampe iko namala nomparasaya i Yesus Kristus bo rapakasalama. ¹⁶ Pura-pura tesa riara Buku Gasa nopuna lako nte Alatala mboto bo noguna mompatuduki anu nakana, mangonteaka tona nasala, mombatulungi tona mompakabelo pokainggura nadaa, bo mompatuduki tona matuvu manoa ri panggita nu Alatala. ¹⁷ Jadi Buku Gasa mompakagana pura-pura todea nu Alatala sampe rapakulera movia pura-pura pokainggu nabelo.

I Timotius nipopatora mombatidamaka rarana mokarajaa mompatolele Tesa nu Alatala

4 Timotius, petevai hitu niuliku nte mpuu-mpuu raraku. Makava tempona i Yesus Kristus makava mpanjili momparenta ri dunia hitu, bo ratangaraNa pura-pura manusia, tona da natuvu bo tona namate-

[†] i Yanes bo i Yambres: sanga nu pande mposibali mata anu nokarajaa ka Magau Firaun ri tana Mesir nggaulu. Peinta Pesuvu 7:10-12, 20-22; 8:6-7, 17-19.

mo. Jadi, kuuli ka iko ri ngayo nu Alatala bo i Yesus Kristus anu nanggita pura-pura poviata: ² Patolelele Tesa nu Alatala. Iko kana mompasimbuku mompatolele Tesa haitu nau bara ratarima ntona bara ledo. Popaisani ka tona ane masala pokainggura, onteakamo tona novia dosa, bo pakadidimo rarara mokainggu mabelo. Nee masau raramu mompatuduki ira. ³ Apa makava tempona bara maipia domo madota ira mangepe pepatuduki nakana. Raelora guru-guru anu mompatuduki pepatuduki anu marasa raepe. Patujura ala mamala raepera pepatuduki anu nosinggambela ante dota nu rarara mboto nadaa. ⁴ Ira mombaramu talingara ala domo raepera pepatuduki nu Alatala anu nakana, bo ira aga mompataa talingara mangepe tesa-tesa ledo nakana anu nipovia nu manusia. ⁵ Haitumo sampe niuliku ka iko, Timotius, iko kana mombakuasai karomu mboto nau bara nuapa majadi. Tidamakamo tempo nasusa. Pasimbukumo mompatolele Kareba Belo, bo povia puramo pokarajaa niparasaya nu Alatala ka iko.

⁶ Yaku nanguli petevai pangane apa nisaniku naramo janjiku. Bo tempo yaku rapatesi, kamateku rareke pesomba ka Alatala. ⁷ Nituntuniku belomo dala nipakatantu i Pue ka yaku; nipakaupukumo pokarajaa nidekeiNa ka yaku. Yaku ledo nolengga-lengga nomparasaya i Kristus sampe ri kaupuna. ⁸ Jadi hitupa nasadio hadia padagi ka yaku sabana katuvuku nompakadamba rara nu Alatala. I Pue Yesus Topotangara nanao, bo ri Eo Potangara ngena radekeiNa hadia haitu ka yaku, bo ledo aga ka yaku tapi ka pura-pura tona nompotove Ia bo nompopea kakavaNa.

Petevai-petevai kaupuna

⁹ Pasimbukumo masalisa tumai nte yaku, ¹⁰ apa domo nadaa tona nomporea yaku. I Demas nompalaisi yaku sabana ia aga nompotove katuvuna ri dunia hitu. Nalai rou ri ngata Tesalonikamo ia. Bo i Kreskes rou ri propinsi Galatia, bo i Titus rou ri bagia Dalmatia. ¹¹ Damo i Lukas naboli ri sii nte yaku. Ane tumai iko ngena, tuusaka muni i Markus, sabana ia mamala

mombatulungi pokarajaaku ri sii. ¹² Bo nituduku i Tikhikus hau ri ngata Efesus. ¹³ Ane tumai iko, keni baju ranindiku anu niboliku ri ngata Troas ri banua i Karpus. Bo keni tumai muni buku-bukuku, nelabipa buku-buku nipovia lako ri kulimba.

¹⁴ I Aleksander, pande nu tambaga, nadaa anu nadaa nipoviana ka yaku. Damo Tupu mombabalasi ia mosinggambela nte pokaingguna haitu. ¹⁵ Iko mboto kana mainga nte ia sabana nievana mpuu pepatudukita.

¹⁶ Tempo parakaraku nitangara paratama, ledo ria saitoa nombatulungi yaku; nepalaika puramo roa. Kuperapi Tupu ledo mombareke salara haitu. ¹⁷ Tapi i Pue Yesus nantulungi yaku, bo Ia nompakaroso yaku sampe nipakuleku mompatolele pura-pura Kareba Belo ka pura-pura tona anu ledo toYahudi ri sii. Kaupuna yaku nikabasaka lako ri kuasa ntona madota mompatesi yaku. ¹⁸ Bo niparasayaku i Pue bate-batena mombakabasaka yaku lako ri pura-pura anu nadaa bo manggeni yaku ante masalama mesua ri PoparentaNa ri suruga. Ia masipato rabila bo ratoiya sampe ri kasae-saena! Amin.

Petabe kaupuna

¹⁹ Pakavote tabeku ka i Priskila bo Akwila, bo ka gi Onesiforus sambanua. ²⁰ I Erastus naboli ri ngata Korintus bo i Trofimus nipalaisiku ri ngata Miletus sabana ia nadua. ²¹ Pasimbukumo tumai dopame tempo ranindi.

Nadea tabe lako nte i Ebulus, i Pudes, i Linus bo i Klaudia, bo lako nte pura-pura sampesuvuta sampomparasaya ri sii.

²² Kuperapi i Pue Yesus momporoa iko, Timotius. Kuperapi Ia bate-batena mabelo nte komiu pura-pura.

Taba lako nte yaku,
Paulus

19-May-2009@12:42, Backup Description=19-May-2009@09:53, snave - 26-May-2009@11:04, Backup Description=26-May-2009@11:03, B Altork - ❖❖❖

Titus

Vamba nu Tesa

I Titus ledo toYahudi, ia nasaemo nomparasaya i Kristus. Ia nosampokarajaa bo nosamporoa nte i Paulus. I Paulus nompakatu sura hitu ka i Titus tempo i Titus naria ri levuto Kreta. I Paulus nantudu i Titus maboli hamai ala ia manggeniaka topomparasaya hamai.

Patuju i Paulus notulisi sura hitu mantudu i Titus mompasiayu todea topomparasaya ri Kreta (1:5). Nipopatorana i Titus pokainggu mbana masipato rapovia ntona anu najadi pakeni ntopomparasaya (1:6-9). Nipatudukikana i Titus nuapa masipato rapatuduki ka topomparasaya i Kristus, rapana, nuapa rapatuduki ka to-tua, ka ana muda, ka tona nipobatua (2:1-10) bo pokainggu masipato ka pura-pura topomparasaya (3:1-11).

Isi nu Sura

Tesa pantepuuna (1:1-4)

Anu nitudu i Paulus ka i Titus (1:5-3:11)

Ane komiu nangangataka pakeni ntopomparasaya, pelisi tona nabelo pokaingguna (1:5-9) bo tona natau nombatagi tona nanggeni pepatuduki nasala (1:10-16)

Ulika topomparasaya pokainggura kana mosinggambela nte pepatuduki nakana (Pasal 2)

Popatora ka topomparasaya kana raturusira parenta nu pomarenta bo mokainggu mabelo (3:1-8)

Nee movega nte tona aga nompopogaa topomparasaya (3:9-11)

Tesa kaupuna bo tabe (3:12-15)

Petabe

1 Sampesuvuku i Titus:

Sura hitu lako nte yaku Paulus, batua nu Alatala bo suro i Yesus Kristus. Yaku nianggatakaNa bo nisuroNa mompakaroso pomparasaya ntona nipelisi nu Alatala. NituduNa muni yaku mompatuduki ira ala rasanira pepatuduki nakana, anu manggeni ira matuvu nangoseaka dota nu Alatala. ² Haitu nipoviaku ala ira mamala manjarumaka matuvu nte Alatala sampe ri kasae-saena. Dopame dunia hitu nipajadi nu Alatala, nijanjiNa todeaNa matuvu sampe ri kasae-saena. Alatala ledo nodava bo pojanjiNa namala raparasayata. ³ Sii-sii ri tempo nipakatantuNa mboto, nipopaisani nu Alatala mpuumo pojanjiNa haitu ka manusia riaru karebaNa anu nipatoleleku. Kareba Belo haitu niparasayaNa ka yaku bo nipatoleleku nangoseaka parenta nu Alatala, Topompakasalama kita.

⁴ Titus, iko mpuu-mpuu mpo anaku mboto, apa kita sampomparasaya. Kuperapi Tuamata Alatala bo i Yesus Kristus, Topompakasalama kita, mombadekei belo bo katinonto ka iko.

I Titus nitudu mangangataka pakeni ntopomparasaya anu nabelo pokainggura

⁵ Patujuku nantudu iko maboli ri levuto Kreta ala mpasiayu anu dopa nasiayu ri situ, bo manggataka pakeni ntodea topomparasaya ri pura-pura ngata, evamo anu niuliku ka iko bara ipia. ⁶ Tona masipato raang-gataka majadi pakeni ntodea topomparasaya, haitu-mo tona ledo naria pokaingguna namala rasalai ntona, bo aga saito bereina mombine. [†] Ana-anana kkana momparasaya i Kristus bo ledo niuli ntona ngana nesapuaka bara ngana ledo natumutoa.

⁷ Pakeni ntopomparasaya haitu topompasiayu todea nu Alatala. Jadi ia ledo novia pokainggu rasalai ntona. Ia ledo tona nalanga pekirina bara nasalisa narau, ledo topanginu, ledo toposibaga, bo ledo muni tona nadoko doi. ⁸ Tona raanggataka majadi pakeni ntopomparasaya kana majoi rarana mantarima torata riaru banuana, bo nompokono anu nabelo. Ia kana nanoto, nanoa, bo nagasa katuvuna, bo kana rapakulena mombatidamaka dota nu rarana mboto. ⁹ Ia kana maroo manggangisi pepatuduki nakana anu nipatudukita ka ia, apa pepatuduki haitu namala raparasaya. Ivesiamo rapakulena mompangajari topomparasaya mangoseaka pepatuduki nakana haitu, bo

[†] *aga saito bereina mombine ATAU: ia kana naroo nte bereina mombine.*

rapakulena muni mompopaisani sala ntona anu nombasapuaka pepatuduki haitu.

I Titus nitudu mombasalaraka tona nompatuduki anu nasala

¹⁰ Niuliku ivesia, sabana nadeamo tona nangeva pepatuduki nakana, nelabipa topanguli kita topomparasaya kana mangoseaka Atura-atura agama evamo ada suna †. Ira nombabagiu tona ntanina ante tesara anu ledo ria batuana. ¹¹ Tona ivehaitu kana ratagi, nee mpuu mudekei ira mompatuduki! Apa nadea pobanua ntona naingu nangepe pepatudukira anu ledo masipato. Patujura mompatuduki aga manggava doi ante akala ledo nabelo. ¹² Naria saito nabi lako nte toKreta mboto nanguli ivei:

“ToKreta bate-batena topodava. Ira nasimbayu kadaana nte binata nasoa; ira nadoko bo namau.”

¹³ Tesa nu nabi haitu nakana mami. Haitumo sampe iko kana mombasalaraka topomparasaya ri Kreta, ala ledo raoseakara pepatuduki nasala tapi pepatuduki nakana raoseakara. ¹⁴ Ulika ira tumo raparasayara tutura-tutura ntoYahudi anu nikarara mboto, bo nee mangoseaka atura-atura nipovia manusia anu nombasapuaka pepatuduki nakana. ¹⁵ Ane tona nagasa rarana, pura-pura poviana nagasa. Tapi ane tona nadaa pekirina bo ledo nomparasaya Alatala, ledo ria poviana nuapa-nuapa nagasa, sabana pekiri bo rara ntaira nadaa mami. ¹⁶ Pangulira ira nosisani ante Alatala, tapi pokainggura ledo nosinggambela nte tesara. Pokainggura aga nompakarunggu rara nu Alatala, bo ira ledo nadota natundu nte Alatala. Ledo nipakulera nokainggu nabelo.

Pokainggu masipato rapovia ntotua, ngana muda bo batua-batua

2 Iko, Titus, kana mompatuduki anu nosinggambela ante pepatuduki nakana ka tona. ² Ulimo ka totua-totua langgai ira kana mombakuasai karora mboto. Ira kana manoto bo matuvu nte pokainggu masipato ratoiya. Ira kana matutu mangoseaka pepatuduki nakana, ira kana mpuu-mpuu mompotove tona ntanina, bo mombatidamaka riarara kasusa.

³ Ivesia muni ante totua-totua mombine. Patudukimo ira matuvu nte pokainggu nagasa anu masipato rapovia ntona natundu nte Alatala. Ulika ira nee mombatunturaka tona ntanina, nee sampe majadi batua ntule. Ira kana mompatuduki tona ntanina matuvu mabelo. ⁴ Ivesiamo ira mamala mompatuduki nganangana mombine mompotove bereira bo ana-anara, ⁵ majadi manoto, bo ledo mogau sala, matutu mom-

pasiayu avura mboto, majadi tobelo rara, bo mekou nte bereira mboto. Ane mombine namuda mokainggu ivesia, ledo maria tona manjalai Tesa nu Alatala.

⁶⁻⁷ Ivesia muni mupatuduki ka ngana-ngana langgai. Ulika ira, ira kana mombakuasai karo mboto. Bo iko mboto kana mokainggu mabelo riarara mpengaya-ngaya ala iko majadi jonjo namala rapasiala ntona. Ane iko mompatuduki, patudukimo ante manoa bo ante mpuu-mpuu raramu. ⁸ Pakemo tesa-tesa nakana bo masipato, anu ledo mamala rasalai ntona. Ane mupatuduki ivesia, tona nangeva kita maeya matara, apa pura-pura anu niulimu nabelo. Ledo maria nuapa-nuapa nadaa anu namala rasalaira ka kita.

⁹ Patudukimo batua-batua ira kana matundu nte madikara. Ira kana mokerajaa mompakadamba rara nu madikara bo ira ledo mamala mesanai. ¹⁰ Ledo muni mamala ira mompelea mbara-mbara nu madikara, tapi ira kana manoa rarara ala rasani nu madikara ira mpuu-mpuu namala raparasaya. Ane batua anu najadi topomparasaya matuvu ivesia, todea manggita pokainggura nabelo bo mantoiya pepatuduki nakana anu notesaki Alatala, Topompakasalama kita.

Kita nipakasalama lako ri kabelo rara nu Alatala, jadi masipato kita matuvu ante pokainggu nabelo

¹¹ Iko kana mompatuduki tona matuvu nte pokainggu nabelo, sabana lako ri kabelo rara nu Alatala, nibukaNamo dala ala pura-pura manusia mamala rapakasalama. ¹² Lako ri kabelo raraNa, kita nipatudukiNa mombakabasaka pokaingguta ledo nipokonoNa bo dota nu rarata nadaa. Bo kita nipatudukiNa majadi manoto, manoa, bo matuvu mangoseaka dotaNa ri dunia sii-sii. ¹³ Apa ane kita da nonturo ri dunia, kita nanjarumaka kakava i Yesus anu mpuu-mpuu mompakasana rarata. Tempo haitu, pura-pura tona manggita kaoge i Yesus Kristus, Iamo Alatala toNeliu KaogeNa bo Topompakasalama kita. ¹⁴ I Kristus nombadekei karoNa nipatesi nanjambei kita ala mombasompo dosata. NikabasakaNa kita lako ri pura-pura pokaingguta nadaa, nipegasaNa kita bo nipataniNa kita majadi todeaNa mboto anu matutu nokainggu nabelo.

¹⁵ Jadi, Titus, patudukikamo pura-pura haitu ka topomparasaya i Kristus. Ulika ira mangoseaka pepatuduki haitu, bo ane ledo raoseakara, onteakamo ira. Nee maeya matamu, apa naria mami kuasamu mompatuduki ira. Nee rapalamba tona mompan-daente iko.

† topanguli kita topomparasaya kana mangoseaka Atura-atura agama evamo ada suna ATAU: tona noagama Yahudi bara ipia anu nomparasaya i Kristus.

†† kaoge i Yesus Kristus, Iamo Alatala toNeliu KaogeNa bo Topompakasalama kita ATAU: kaoge nu Alatala toNeliu KaogeNa bo i Yesus Kristus Topompakasalama kita.

Pokainggu masipato rapovia ntopomparasaya i Yesus

3 Popatoramo topomparasaya i Yesus ri situ, ira masipato matundu bo mangoseaka parenta nu pomarenta bo totua-totua ngata. Ira kana masadia mantui pura-pura pokarajaa nabelo. ² Ulika ira nee mositunturaka, bo nee mosinjanai. Ira kana moada bo malusu rara nte tona pura-pura.

³ Toramo, kita muni bara ipia da nalanda rarata nasimbayu mpo tona ledo nompapasaya i Yesus. Ledo nisanita dala nakana mosisani nte Alatala bo ledo nioseakata parentaNa. Katuvuta bara ipia nikuasai dota nu rarata nadaa bo kasana nu dunia anu ledo nabelo. Kita natuvu narau rara nanggita roa, nasiriati, bo nosipovuu mata nte tona ntanina. ⁴ Tapi nau kita nokainggu nadaa bara ipia, Alatala nompotove kita bo nipopakitaNa kabelo raraNa tempo nipakasalamaNa kita lako ri dosata. ⁵ Kita nipakasalamaNa, ledo sabana pokaingguta nanao, tapi sabana kaasi mataNa nanggita kita. Alatala nompakasalama kita ante nompakagasa kita bo nombalelaka dosata. Haitu nipoviaNa ante kuasa Nosa Gasa anu nombadekei katuvu nabaru ka kita bo nombabaliki rarata majadi nabelo. ⁶ Alatala nantudu i Yesus Kristus, Topompakasalama kita, mompopanau Nosa Gasa ka kita ante kajoi nu raraNa. ⁷ PatujuNa, ala kita anu najadi nanao ri panggitaNa lako ri kabelo raraNa, mamala manjarumaka matuvu mabelo sampe ri kasae-saena. ⁸ Tesa hitu mpuu-mpuu nakana.

Jadi yaku madota ala iko mompakaoto pepatuduki haitu, ala topomparasaya Alatala mompasimbuku mokainggu nabelo. Pepatuduki pangane nabelo bo noguna ka manusia. ⁹ Tapi naria muni tona aga nosibali-balika anu ledo ria gunana, bo notesaki sunju muli nu muli ntotua nggaulu anu nikarara mboto. Ira aga

nosinjanai bo nosinggarau ka atura-atura agama. Petalilikamo potesa-tesa ivehaitu, apa ledo ntoto naria gunana bo ledo nanggeni belo. ¹⁰ Ane maria tona nompoposibali todea topomparasaya, kana musalarka ia sanggani, bara ronggani. Ane rongganimo ia nisalarakamu bo ledo nepangala, tumo mosimporoa nte ia. ¹¹ Nisanimu tona ivehaitu nadaa pekirina bo nadaosa. Dosana mboto nompakalanto ia masipato rahuku.


Petevai-petevai kaupuna

¹² Ane makava i Artemas bara i Tikhikus anu kutudu tou nte iko ri situ ri Kreta ngena, pasimbukumo mosinggava nte yaku ri ngata Nikopolis, apa niaku monturo ri ngata Nikopolis sampe maupu tempo ranindi. ¹³ Pasimbukumo mantulungi i Zenas, guru agama, bo i Apolos, ala ira mamala mompapola polipara bo ledo makura nuapa-nuapa. ¹⁴ Sampesuvuta sampomparasaya kana masaro movia anu nabelo, ala mamala mombatulungi tona napepa. † Nee sampe katuvura ledo maria gunana.

¹⁵ Nadea tabe lako nte pura-pura sampesuvuta anu naria nte yaku ri sii. Pakavote tabe kami ka sampesuvuta sampomparasaya ri situ anu nompotove kami.

Kuperapi Alatala bate-batena mabelo nte komiu pura-pura.

Tabe lako nte yaku,
Paulus

19-May-2009@12:42, Backup Description=19-May-2009@09:53, snave -
26-May-2009@11:04, Backup Description=26-May-2009@11:03, B Altork - 

† ala mamala mombatulungi tona napepa. ala manggava anu niparaluura eo-eo.

Filemon

Vamba nu Tesa

Sura hitu nipakatu i Paulus ka i Filemon. I Filemon topomparasaya anu nakalumana bo nadea batuana. Ia nonturo ri ngata Kolose bo todea topomparasaya hamai nasiromu nosambaya ri banuana. Naria saito batuana nosanga i Onesimus. I Onesimus nalai lako nte madikana i Filemon, bo hau ri ngata mbaso Roma. Tempo haitu i Paulus nitarunggu ri ngata Roma sabana nompatolele Kareba Belo. Ledo nisanita berimba, tapi i Onesimus nosinggava nte i Paulus ri ngata Roma, bo ante pepatuduki bo petulungi i Paulus, i Onesimus nomparasaya i Yesus.

Naupu sia, i Paulus nantudu i Onesimus manjili hau nte madikana i Filemon, bo nipakatu muni sura hitu. Riaru sura hitu, i Paulus nerapi i Filemon mantarima mpanjili batuana i Onesimus. I Paulus nerapi i Filemon mantarima i Onesimus ante mabelo, domo aga mpo batuana tapi mpo sampesuvuna sampomparasaya.

Isi nu Sura

Petabe (1-3)

I Paulus nantoiya i Filemon sabana pepotovena bo pomparasayana (4-7)

I Paulus nerapi ala i Filemon mombaampungi i Onesimus mpanjili (8-22)

Petabe Kaupuna (23-25)

Petabe

1 Filemon, sampesuvu nipotove kami bo roa kami sampokarajaa:

Sura hitu lako nte yaku, i Paulus, anu nitarunggu sabana nompatolele kareba i Yesus Kristus, bo lako nte i Timotius sampesuvuta sampomparasaya. Sura hitu nitulisi ka iko, ² bo ka todea topomparasaya anu nasiromu nosambaya ri banuamu, bo ka i Apfia sampesuvuta mombine sampomparasaya, bo i Arkhipus, anu nosangani-nggani nte kami nompasimbuku nokarajaa ka Tupu.

³ Kuperapi Tuamata Alatala bo Tuputa Yesus Kristus mombadekei belo ka komiu bo mompakatinonto raramiu.

I Paulus nosukuru nte Alatala sabana pomparasaya bo pepotove i Filemon

⁴ Nggani-nggani yaku nosambaya ka iko, yaku nosukuru nte Tupuku Alatala ⁵ sabana niepeku karoso pomparasayamu i Pue Yesus bo niepeku muni kaoge pepotovemu ka pura-pura todeaNa. ⁶ Kita nosangu rara nte topomparasaya ntanina sabana pomparasayata i Yesus. Yaku nosambaya ala posangu raramu nte topomparasaya ntanina, manggeni iko mpuu-mpuu mombapaha mpengaya-ngaya belo naria nte kita anu nosangu rara nte i Kristus. ⁷ Sampesuvuku, nadamba mpuu yaku, bo raraku nipakaroso nangepe pepotove-

mu ka todea nu Alatala. Bo petulungimu mpuu-mpuu nompakasana rarara!

I Paulus nerapi i Filemon mombaampungi bo mantarima mpanjili i Onesimus

⁸ *Jadi, nanggita pepotovemu ka topomparasaya, naria anu kuperapi nte iko.* Kakanana, namala kuparenta iko movia anu masipato mupovia sabana kuasa nidekei i Kristus ka yaku. ⁹ Tapi nantora pepotovemu, aga kuperapi nte iko bo ledo kuparenta. Yaku hii natuamo [†] bo nitarunggu sii-sii sabana nompatolele kareba i Yesus Kristus. ¹⁰ Yaku, i Paulus, merapi ala mutarima mabelo i Onesimus, anu nipotoveku mpo anaku mboto. Ia nirekeku mpuu-mpuu anaku, sabana tempo yaku riara ntarunggu ri sii, yakumo nompatuduki ia nomparasaya i Yesus, nasimbayu mpo totua langgai nompatuduki anana. ¹¹ Bara ipia ia ledo noguna ka iko, tapi sii-sii ia mpuu-mpuu noguna, ledo aga ka iko tapi ka yaku muni. ^{††}

¹² Yaku mpuu-mpuu nompotove i Onesimus, bo sii-sii nituduku ia manjili tou nte iko. ¹³ Ane kuoseaka dotaku mboto, kutaamaka ia ri sii nte yaku ala ia manjambei karomu mantulungi yaku anu da nitarunggu ri sii sabana nompatolele Kareba Belo. ¹⁴ Tapi ledo kupokono mantaamaka ia ane ledo mupodota. Nipokonokupa iko movia anu nabelo haitu lako ri kavoe raramu mboto, bo ledo aga nipasuu.

[†] Yaku hii natuamo. Yaku hii niposumba i Kristus. ^{††} Sanga i Onesimus batuana "noguna."

¹⁵ Niuliku pogaamu nte i Onesimus sampariolo naja-di ala ia maria nte iko sampe ri kasae-saena. ¹⁶ Jadi siii ia domo aga batuamu, tapi nelabipa pade batua, haitumo, ia sampesuvuta sampomparasaya anu nipotoveta. Iyapa yaku nompotove ia, nemopa iko! Iko nompotove ia sabana ia batuamu, bo muni sabana ia sampesuvumu sampomparasaya.

¹⁷ Jadi, ane nirekemu yaku roamu sampomparasaya, kuperapi nte iko, tarima mpanjilimo i Onesimus nasimbayu mpo pantarimamu yaku. ¹⁸ Bo ane ia nompakarugi iko bara noinda nte iko, damo yaku mombat-angguna. ¹⁹ Yaku i Paulus, notulisi tesa hitu ante paleku mboto. Yaku mombabayari indana pura-pura ka iko. Kakanana iko mboto noinda nte yaku sabana lako nte yaku sampe iko nanggava katuvua nabaru. ²⁰ Sampesuvuku, kita nompapasaya i Kristus, jadi kuperapi ala iko movia anu noguna ka yaku, haitumo, tarima mpanjilimo i Onesimus ala madamba raraku sabana posampesuvuta sampomparasaya.

²¹ Yaku notulisi sura hitu ka iko sabana nisaniku iko movia anu niperapiku hitu. Bo ledo aga haitu, nisaniku

iko movia melabipa pade anu niperapiku. ²² Naria vai sangupa kuperapi nte iko, tulungi pakasadia ka yaku ponturo ri banuamu, sabana nisarumakaku posambayamiu pura-pura raepe nu Alatala bo yaku rak-abasaka lako ri tarunggu bo mamala mosinggava vai nte iko.

Petabe kaupuna

²³ Tabe lako nte i Epafra, anu nosanggani-nggani ante yaku riarar ntarunggu sabana nompatolele kareba i Yesus Kristus. ²⁴ Tarima muni tabe lako nte roaku sampokarajaa, haitumo i Markus, i Aristarkhus, i Demas bo i Lukas. ²⁵ Kuperapi komiu pura-pura mombarasai kabelo rara nTuputa Yesus Kristus.

Tabe lako nte yaku,
Paulus

19-May-2009@12:42, Backup Description=19-May-2009@09:53, snave -
26-May-2009@11:04, Backup Description=26-May-2009@11:03, B Altork - ❖❖❖

Ibrani

Vamba nu Tesa

Sura hitu nitulisi ka toYahudi anu nomparasaya i Yesus. Ira nabiasa muni niuli toIbrani. Ira mpuu-mpuu nipandasa ntona sabana pomparasayara i Yesus sampe naria sanu ira nasadia noura pomparasayara bo nesua agama Yahudi mpanjili. Jadi haitu sampe topotulisi sura hitu notulisi ka ira ala mompakaroso pomparasayara ala ira ledo moura momparasaya i Yesus.

Ledo nisanita ntoto isema kakanana notulisi sura hitu. Nadea tona nanguli i Paulus topotulisi sura hitu, tapi naria tona ntanina nanguli i Barnabas atau i Apolos topotulisina.

Topotulisi sura hitu nombatentei Pojanji Nabaru anu nidekei nu Alatala ante kakava i Yesus ri dunia. Niulina Pojanji Nabaru haitu nabelopa pade Pojanji Nokolu anu nioseaka ntona noagama Yahudi. Nipopatorana ka ira nee moura momparasaya sampe rapambela pehuku anu masipato ka tona novia anu nadaa.

Sura hitu nompakalanto i Yesus Ana nu Alatala, bo Ia naogepa pade Nabi Musa bo nabi-nabi ntanina. Ia naogepa pade malaeka-malaeka nTupu, bo pakeni-pakeni agama Yahudi nggaulu. I Yesusmo naogepa pade pura-pura anu naria ri langi bo tana. Bo Ia nianggataka najadi Pakeni nTopanggeni Pesomba nabelopa pade pura-pura topanggeni pesomba agama Yahudi. Iamo topanggeni pesomba anu nombasompo dosa bo nompakalali dosa nu manusia, ante nombadekei karoNa mboto nipatesi manjambei kita.

Topotulisi sura nompakalanto kita kana maroo momparasaya ala mompakadamba rara nu Alatala. Nitesana jonjo-jonjo pomparasaya ntotua ntoYahudi nggaulu ala mompakaroso pomparasaya ntopombaca sura hitu. Bo nipakalantona pokainggu masipato ka tona nipakasalama i Yesus.

Isi nu Sura

Pantepuuna: i Kristus nompasimbayu Tesa nu Alatala ka manusia (1:1-4)

I Yesus naogepa pade topanggeni pojanji nu Alatala nokolu (1:5-7:28)

I Yesus naogepa pade malaeka-malaeka nu Alatala (1:5-2:18)

I Yesus naogepa pade Nabi Musa bo i Yosua (3:1-4:13)

I Yesus Pakeni nTopanggeni Pesomba sampe ri kasae-saena (4:14-7:28)

I Yesus Pakeni nTopanggeni Pesomba anu nompasiayu pojanji nu Alatala anu nabaru (8:1-10:18)

Pojanji nu Alatala Nokolu nisambe Pojanji Nabaru anu nabelopa (8:1-9:10)

Pokarajaa i Yesus najadi Pakeni nTopanggeni Pesomba nabelopa pade pokarajaa ntopanggeni pesomba agama Yahudi nggaulu (9:11-10:18)

Pokainggu masipato ka tona nipakasalama i Yesus (10:19-13:25)

Kita kana maroo momparasaya, nee moura (10:19-39)

Jonjo-jonjo ntona nomparasaya sampe nipokonoo rara nu Alatala (Pasal 11)

Kita kana maroo momparasaya tempo nipandasa, bo nee mompoara kabelo Pojanji nu Alatala nabaru (12:1-29)

Pokainggu anu nompakadamba rara nu Alatala bo tesa kaupuna (Pasal 13)

Ana nu Alatala nompasimbayu Tesa nu Alatala ka manusia

1 Tempo nggaulu, nadea ngganimo Alatala nompasimbayu tesaNa ante mpengaya-ngaya cara ka nabi-nabi anu nompapola tesaNa haitu ka totuata nggaulu. ²Tapi ri tempo nggapuri hitu AnaNa mbotomo nompasimbayu tesaNa ka kita. AnaNa haitu nipopale nu Alatala nompajadi dunia, bo Alatala nompakatantu AnaNa haitumo masipato majadi tupuna pura-pura

anu naria. ³AnaNa haitu nompopakita kuasa bo kaoge nu Alatala, bo Ia nasimbayu nte Alatala. Iamo nombakuasai bo nompiara mpengaya-ngaya ri dunia ante tesaNa nakuasa. Naupu Ia nombakabasaka manusia lako ri dosa, Ia nonturo ri ponturo magau ri suruga ri panggana nu Alatala toNeliu KaogeNa.

⁴Jadi Ia nipakalanga ntotopa pade malaeka-malaeka nu Alatala, bo nturo nidekei nu Alatala ka Ia naogepa pade nturo nu malaeka-malaeka.

I Yesus naogepa pade malaeka-malaeka nu Alatala

⁵ Nalantomo kaoge i Yesus apa ledo ria sanggania Alatala notesa ka malaekaNa ivei:
"Ikomo AnaKu, eo hitu Yaku najadi TuamaMu!"

Mazmur 2:7

Bo ledo ria sanggania Alatala nanguli ka malaekaNa ivei:

"Yaku majadi TuamaMu, bo Iko majadi AnaKu."

2 Samuel 7:14

Tapi niuliNa ivehaitu ka AnaNa mboto. ⁶ Bo tempo Alatala nombatudu Ana lumbuaNa makava ri dunia hitu, niuliNa muni ivei:

"Pura-pura malaeka kana mombasomba AnaKu."

Mazmur 97:7

⁷ Alatala nombatesa malaeka-malaekaNa ivei:

"Yaku nompajadi malaeka-malaekaKu nasimbayumpo piori.

Ira nasimbayumpo apu narega."

Mazmur 104:4

⁸ Tapi niuliNa ka AnaNa ivei:

"Ikomo Alatala, bo poparentaMu maroo sampe ri kasae-saena,

Iko moparenta todeaMu ante rara nanao.

⁹ Iko nompotove pokainggu nanao

bo navuu mataMu nanggita pokainggu natenggo.

Jadi haitu sampe Yaku, TupuMu Alatala nompelisi Iko, bo nibilaKu Iko bo nipakadambaKu raraMu nelabipa pade roa-roaMu."

Mazmur 45:7-8

¹⁰ Bo Alatala nanguli muni ka AnaNa ivei:

"Pue, Iko nompajadi dunia ri ulu jadina,

Bo langi muni asele mpaleMu.

¹¹ Langi bo tana kana malipo,

bo magero mpo baju naranta,

Tapi Iko bate-batena maria.

¹² Langi bo tana ratikaMu nasimbayumpo buya.

Bo rasambe ante baruna nasimbayumpo baju narantamo nisambe ante baruna.

Tapi Iko ledo ntoto mabali,

Katuvumu ledo ria kaupunupuna."

Mazmur 102:26-28

¹³ Bo ledo ria sanggania Alatala nanguli ka malaekaNa mpo niuliNa ka AnaNa ivei:

"Ponturomo ri sabingga ngganaKu sampe Kupopekou pura-pura baliMu nte Iko."

Mazmur 110:1

¹⁴ Jadi, isema kakanana malaeka-malaeka nTupu? Ira pura-pura topotulungi Alatala anu nisuroNa mantulungi bo manggeniaka tona rapakasalamaNa.

Pariaramo pakabelo-belo kareba nombatesaki carana manusia rapakasalama

2 I Yesus naogepa pade malaeka. Sabana haitu, kita kana manggangisi pakabelo-belo pepatuduki niepeta ala kita ledo masalandala lako ri dala nakana.

² Atura nTupu anu nipapola nu malaeka-malaeka ka totuata nggaulu, nakana bo kana raoseaka. Isema-sema nombaliunaka Atura haitu atau ledo nangoseaka Atura haitu, nikavana pehuku nangoseaka poviana.

³ *Ane ivesia nte Atura nTupu*, nemopa Kareba Belo anu nipatolele i Yesus! Kareba haitu nombatesaki carana kita mamala rapakasalama. Kareba haitu nelabipa kabalona pade Atura nipapola malaeka-malaekaNa nggaulu. Jadi ane ledo rapeilita kareba haitu, berimbamo kita makabasaka lako ri pehuku? Kareba haitu pamulana nipatolele i Pue Yesus mboto. Tona anu nangepe Ia nompakalanto ka kita, kareba haitu mpuu-mpuu nakana bo namala rasarumakata. ⁴ Bo Alatala mboto nompakalanto kareba nipatolelera mpuu-mpuu nakana. Apa nipoviaNa mpengaya-ngaya kabaraka bo tanda nipokumaaka, bo nipaleleNa pompakule lako ri Nosa Gasana nangoseaka dotana mboto.

I Yesus najadi manusia ala mantulungi kita

⁵ Ledo malaeka-malaeka nanggava kuasa lako nte Alatala moparenta ri dunia nabaru bara maipia, haitumo dunia nitesata ri sii. ⁶ Kuasa haitu nidekei nu Alatala ka manusia. Naria tesa ri Buku Gasa nompakalanto manusia rapakakuasa ivei:

"O Pue Alatala, nuapa manusia sampe masipato ratoraMiu?

Ira aga manusia, nuapa sabana nipariaraMiu?

⁷ Komiumparitambe manusia sampalai lako ri malaeka.

Komiumpakaoge manusia bo nombadekei nturo nibila ka ira.

⁸ Bo Komiumbadekei kuasa ka manusia ala rakusaira pura-pura anu naria."

Mazmur 8:5-7

Jadi ane niuli Alatala nombadekei kuasa ka manusia moparenta pura-pura anu naria, batuana, ledo ria sangayaa ledo nidekeiNa rakusai nu manusia. Sii-sii dopa nikitata manusia nombakuasai pura-pura anu naria. ⁹ Tapi nikitata i Yesus nakuasa! Ia niparitambe sampalai lako ri malaeka *nasimbayumpo manusia* ala Ia rapatesi mombasambe pura-pura manusia. Haitu nipoviaNa sabana Alatala nompotove kita. Bo sii-sii Alatala nompakaoge Ia bo nidekeiNa ka Ia nturo nibila sabana Ia nombarasai susa bo pari sampe namate.

¹⁰ Alatalamo anu nompajadi mpengaya-ngaya bo mpengaya-ngaya haitu nipajadiNa nangoseaka dotana mboto. PatujuNa ala madea tona majadi ana-

anaNa bo manggava bagia ri kaogeNa. Haitumo sampe masipato nipalambaNa i Yesus nombarasai kasusa bo kapari ala i Yesus majadi Topepakasalama anu ledo nakura nuapa-nuapa, anu nobuka dala ala manusia namala rapakasalama. ¹¹ I Yesus nompegasa katu-vuta nadosa. Kita anu nipegasaNa bo Ia anu nompegasa kita nosangu Tuama. Haitu sampe i Yesus ledo naeya mataNa nanguli kita sampesuvuNa. ¹² Ia nanguli ka Alatala ivei:

“Pue, kana Kupatolele karebaMiu ka sampesuvu-sampesuvuKu.

Tempo ira nasiromu metupu, Kutoiya Komiu.”

Mazmur 22:23

¹³ Bo i Yesus nanguli muni ivei:

“Yaku manjarumaka Alatala.”

Bo sangganipa niuliNa ivei:

“Siimo Yaku nosanggani-nggani ante ana-ana nidekei nu Alatala ka Yaku.”

Yesaya 8:17-18

¹⁴ Kita anu niuli i Yesus ana-ana, aga manusia biasa anu mamate. Jadi haitu sampe i Yesus muni najadi manusia bo nombarasai pura-pura anu nirasaita. Ia najadi manusia ala Ia mamala mamate mompakaropu kuasa Magau nu Seta anu nombakuasai kamatea.

¹⁵ Ante nompakaropu kuasa Magau nu Seta, nikabasakaNa tona anu natuvu mpo batua kasae ngatuvura ri dunia hitu sabana naeka ka kamate.

¹⁶ Natantumo ledo malaeka nitulungiNa, aga kita muli i Abraham. ¹⁷ Haitu sampe Ia kana najadi nasimbayu ntoto ante kita sampesuvu-sampesuvuNa. Ane Ia nasimbayu ntoto nte kita, Ia namala majadi Pakeni nTopanggeni Pesomba anu naasi mataNa nanggita todeaNa bo natutu nombatui pokarajaa nidekei nu Alatala ka Ia, sampe dosa manusia namala nisompo.

¹⁸ I Yesus mboto nombarasai kasusa bo kapari tempo nipesori, jadi Ia nompakule nombatulungi tona nipesori.

I Yesus naogepa pade Nabi Musa

3 Jadi, sampesuvu-sampesuvuku anu nipelisi nu Alatala bo nipokioNa matuvu mabelo ri suruga. Pekirimo pakabelo-belo i Yesus hitu. Ia nisuro nu Alatala najadi Pakeni nTopanggeni Pesomba ri agama nioseakata. ² Ia natutu novia anu nipakatantu nu Alatala ka Ia nasimbayu mpo Nabi Musa natutu nokarajaa nantulungi todea nu Alatala, anu nirapaka banua nu Alatala. ³ Topombangu banua nireke naogepa pade banua nibanguna. Ivesia muni i Yesus masipato manggava pebila naogepa pade Nabi Musa. ⁴ Pura-pura banua, naria topoviana. Tapi topovia mpengaya-ngaya Iamo Alatala. ⁵ Ane Nabi Musa, ia natutu nokarajaa ka Alatala nantulungi todeaNa, nasimbayu mpo potudua nombatulungi riaru banua

nu tuana. Pura-pura anu nipovia i Musa nogambara anu rapopaisani nu Alatala ri tempo makava. ⁶ Tapi i Kristus ledo aga potudua, Ia Ana nu Alatala mami anu natutu nompasiayu pura-pura todea nTuamaNa. Bo kitamo nireke todea nu Alatala asaa kita naroo nomparasaya bo ledo nolengga-lengga nanjarumaka i Yesus ante damba rara sampe ri kaupuna.

Nee rapakakaata bagata ane raepeta tesa nu Alatala

⁷ Jadi, epemo tesa lako ri Nosa Gasa nu Alatala nanguli ivei:

“Ane raepemiu suara nu Alatala eo hitu,

^{8,9} nee rapakakaamiu bagamiu

mpo totuamiu nggaulu nesapuaka ri karava bai.

Alatala nanguli:

‘Patapulu mpae kasaena nikitara kabaraka-kabaraka nipoviaKu.

Tapi naupa ivesia, ira nasaro nompesori Yaku bo nombaoa rau raraKu.

¹⁰ Haitu sampe narau mpou raraKu nanggita ira

bo niuliKu, ira nasaromo nasalandala,

bo ledo nipokonora nangoseaka parentaKu.

¹¹ Nagigi mpou raraKu sampe Yaku nosumpa ivei:

Ira ledo ntoto mamala mesua ri ngata Kudekeika ira bo ledo mamala ira menonto mosanggani-nggani ante Yaku.’”

Mazmur 95:7-11

¹² Jadi sampesuvu-sampesuvuku, komiu kana mainga ala nee maria komiu majadi madaa bo ledo momparasaya sampe motubengosi Alatala anu natuvu sampe ri kasae-saena! ¹³ Tapi eo-eo komiu kana mosipakaroso rara ala ledo maria komiu rabagiu nu dosa sampe bagamiu majadi makaa. Posipakaroso raramiu ane komiu da natuvu ri tempo niuli ri Buku Gasa “eo hitu”, batuana, kamba da naria loga. ¹⁴ Apa kita manggava bagia lako ri pura-pura anu naria nte i Kristus asaa anu niparasayata lako ri pamulana bate-batena raparasayata sampe ri kaupuna bo ledo molengga-lengga. ¹⁵ Hitumo patuju ntesa niuli ri bavona ivei:

“Ane raepemiu suara nu Alatala eo hitu,

nee rapakakaamiu bagamiu mpo totuamiu nggaulu anu nesapuaka.”

Mazmur 95:7-8

¹⁶ Jadi, isema nangepe suara nu Alatala bo nesapuaka? Tantu pura-pura ira anu nikeni Nabi Musa nesuvu lako ri tana Mesir. ¹⁷ Bo isema niporau rara nu Alatala patapulu mpae kasaena? Natantumo ira haitu muni anu novia dosa ri karava bai sampe namate hamai. ¹⁸ Alatala nojanji ivei: “Ira ledo ntoto mamala menonto mosanggani-nggani ante Yaku!” Isema nipatuju nu Alatala? Natantumo ira anu ledo natundu nte Ia. ¹⁹ Jadi, nalantomo ka kita ira ledo namala nenonto

nosanggani-nggani nte Alatala sabana ira ledo nomparasaya.

Menonto mosanggani-nggani ante Alatala

4 Sampesuvu-sampesuvu, da naria pojanji nu Alatala nombadekei loga ka kita menonto mosanggani-nggani ante Ia. Haitu sampe kita kana mainga ala nee maria saitoa kita maboli. ² Apa kita muni nangepe Kareba Belo nu Alatala nasimbayu mpo totuata nggaulu. Tapi kareba niepe ntotuata ledo ria gunana ka ira, sabana aga niepera bayangi, ledo ni-parasayara kareba haitu. ³ Kita anu nomparasaya mamala menonto mosanggani-nggani ante Alatala, tapi ira ledo. Apa nikitata tesa nu Alatala ri bavona:

“Nagigi mpuu raraKu sampe Yaku nosumpa ivei:
Ledo ntoto Kudekei ira menonto mosanggani-nggani ante Yaku.”

Mazmur 95:11

Ira ledo mombarasai kabelo penonto nu Alatala naupa penonto haitu nasadiamo lako ri lamba pamulana tempo Alatala naupu nompajadi dunia bo pura-pura isina. ⁴ Nalantomo penonto haitu nasadia lako ri pamulana, sabana naria tesa ri Buku Gasa nanguli eo kapapituna ivei:

“Ri eo kapapituna Alatala nenontomo lako ri pura-pura bagoNa.”

Kajadia 2:2

⁵ Ri tesa nu Alatala niepeta pangane, “Ledo ntoto Kudekei ira mesua ri ngata haitu bo menonto mosanggani-nggani ante Yaku.” ⁶ Jadi tona pamulana anu nangepe kareba nabelo haitu ledo nirasaira kabelo penonto nu Alatala, sabana ira ledo nomparasaya. Tapi patuju nu Alatala, kana maria tona menonto mosanggani-nggani ante Ia. ⁷ Jadi haitu sampe Alatala nompakatantu loga ntanina anu niuliNa “eo hitu” ala manusia radekei loga menonto mosanggani-nggani ante Ia. Noatu-atu mpae naliu i Musa, pade Magau Daud notulisi tesa nu Alatala nitulisiku ri bavona ivei:

“Ane raepemiu suara nu Alatala eo hitu, nee rapakakaamiu bagamiu.”

Mazmur 95:7-8

⁸ Tempo nokolu i Yosua nanggeni toIsrael nesua ri tana Kanaan anu nijanji nu Alatala ka ira. Tapi haitu ledo nireke “nenonto nosanggani-nggani ante Alatala”, sabana ri puri pade nitesa nu Alatala loga ntanina menonto mosanggani-nggani ante Ia. ⁹ Jadi da nariapa loga ka kita todea nu Alatala menonto mosanggani-nggani ante Ia nasimbayu mpo penontoNa ri eo kapapituna. ¹⁰ Nalantomo haitu, apa isema-sema menonto mosanggani-nggani ante Alatala menontomo lako ri pokarajaana nasimbayu mpo Alatala muni nenonto lako ri pura-pura pokarajaanNa bara ipia. ¹¹ Sabana haitu, kita kana mompasimbuku ante rarata mpuu-

mpuu ala kita mamala menonto mosanggani-nggani ante Alatala. Nee sampe maria tona ledo radekei mombarasai kabelo haitu sabana ledo nomparasaya, evamo najadi nte toIsrael nggaulu.

¹² Tesa nu Alatala tesa natuvu bo nakuasa. Tesa haitu natadapa pade guma nomata ntimali apa Tesa haitu namala mantosu sampe ri pantaa nyawa bo rara ntai manusia, nasimbayu mpo guma nantosu sampe ri posidumpa nu buku bo unto nu buku. Tesa haitu namala nombabuka bo nomparesa pekiri bo patuju rara ntai manusia. ¹³ Nau aga sangaya anu nipajadi nu Alatala, ledo ria sangua ledo nikitaNa. Pura-pura nalanto nikitaNa. Bo kita kana mompangaku pura-pura pokaingguta ka Ia bara maipia.

I Yesus Pakeni nTopanggeni Pesomba anu nantulungi kita

¹⁴ Jadi nariamo Pakeni nTopanggeni Pesomba anu naoge mpuu, Iamo i Yesus, Ana nu Alatala. Ia noliu ri langi bo nesua ri suruga ri ngayo nu Alatala ala mantulungi kita. Jadi kita kana maroo momparasaya bo nee menonto mangaku i Yesusmo Tuputa. ¹⁵ Ia Pakeni nTopanggeni Pesomba anu nangisani kalenteta, sabana Ia mboto mombarasai mpengaya pesori nasimbayu mpo kita, tapi Ia ledo novia dosa. ¹⁶ Sabana haitu, nee maeka. Kita kana mabia mosinggava nte Alatala riaro posambayata apa Alatala nabelo raraNa bo nipo-toveNa kita. Ane kita mekitulungi nte Ia, kita rapoasiNa bo ratulungiNa ri tempo niparaluuta.

5 Pura-pura Pakeni nTopanggeni Pesomba nipelisi lako nte todea bo nianggataka manjambei todea mantingayo Alatala. Pokarajaara haitu, manggeni pedekei-pedekei ka Alatala bo pesomba-pesomba anu majadi posompo dosa. ² Pakeni-pakeni nTopanggeni Pesomba aga manusia muni bo nadea kalentera. Haitumo sabana nalusu rarara nantulungi tona nadoyo bo nasalandala. ³ Jadi ane nikenira pesomba ka Alatala mombasompo dosa ntodea, kana rakenira muni posompo ka dosara mboto.

⁴ Ledo ria saitoa tona nanganggataka karonna mboto majadi Pakeni nTopanggeni Pesomba, tapi ia nipelisi bo nianggataka nu Alatala, nasimbayu mpo i Harun nggaulu nipelisi bo nianggataka nu Alatala majadi Pakeni nTopanggeni Pesomba ka toYahudi. ⁵ Ivesia muni i Kristus. Ledo nianggatakaNa mboto karoNa majadi Pakeni nTopanggeni Pesomba anu nibila. Tapi Ia nipelisi bo nianggataka nu Alatala. Alatala nanguli ivei:

“Ikomo AnaKu, apa eo hitu Yaku najadi TuamaMu.” †

Mazmur 2:7

⁶ Bo niuliNa muni ri bagia ntanina ivei:

† Tesa hitu tesa nombalanti atau nanganggataka.

“Iko Topanggeni Pesomba sampe ri kasae-saena, nasimbayu mpo i Melkisedek.”

Mazmur 110:4

⁷ Tempo i Yesus da naria ri dunia Ia nosambaya ante buku rara bo nekakai nerapi tulungi nte Alatala anu nompakule mompakasalama Ia lako ri kamateNa. Bo posambayaNa niepe nu Alatala sabana Ia batena nekou nte Alatala bo ledo nangoseaka dotaNa mboto. ⁸ Naupa i Yesus Ana nu Alatala, Ia kana nombarasai kasusa bo kapari ala rasaniNa mpuu-mpuu batuana matundu nte Alatala. ⁹ Naganapa pura-pura haitu nira-saiNa, Ia najadi puna katuvua nabelo sampe ri kasae-saena ka pura-pura tona matundu nte Ia. ¹⁰ Bo Ia ni-angगतaka nu Alatala najadi Pakeni nTopanggeni Pesomba nasimbayu mpo i Melkisedek, Pakeni nTopanggeni Pesomba nggaulu.

Kita kana mantambai karoso pomparasayata, nee aga metaa ri pepatuduki pamulana

¹¹ Da nadeapa mbeki kuuli mombatesa i Yesus bo i Melkisedek ka komiu, tapi nakaja ratentei ka komiu sabana nakumba mpuu pompahamiau meguru pepatuduki nakana. ¹² Kakanana temponamo komiu majadi guru mompatuduki tona ntanina, sabana nasaemo komiu nomparasaya i Yesus. Tapi komiu da noparaluu guru mompatuduki ka komiu pepatuduki pamulana lako ri Tesa nu Alatala, komiu dopa nasadia nantarima pepatuduki kapolana. Komiu nasimbayu mpo ngana kodi da netomi, anu dopa nasadia mangande kandeana naka! ¹³ Isema-sema da netomi, batuan da nangana. Dopa nisanina mompoposisala anu nakana bo anu nasala. ¹⁴ Tapi kandeana naka aga nikande ntona nambasomo, haitumo tona nipakabi-asamo karonna mompoposisala anu nabelo bo anu nadaa.

6 Jadi sampesuvu-sampesuvu, nee kita aga mompekirika pepatuduki agama Kristen pamulana. Tapi aginamo kita meguru pepatuduki kapolana. Nee aga mombasili pepatuduki pamulana, evamo majea lako ri pokainggu nadaa anu ledo ria gunana, bo pepatuduki mompapasaya Alatala. ² Nee aga mombasili pepatuduki ada pediu, atau ada mombadika pale ri balengga ntona merapi belo ka ira. Nee aga mombasili pepatuduki matuvu mpanjili lako ri kamatea bara maipia atau pepatuduki pehuku sampe ri kasae-saena. *Nee aga mombasili-sili pepatuduki pamulana haitu, kana ratambaipa!*³ Kamaimo, kita meguru pepatuduki kapolana. Bo ane i Pue mompaloga, haitumo rapoviata!

⁴ Sampesuvu-sampesuvu, toramo! Ledo ria dala manggeni tona majea mpanjili ane ratunggaira mombakabasaka pomparasayara. Apa bara ipia ira natuvu riara reme nu Alatala. Nitarimaramo belo lako ri suru-

ga, bo nitarimara munimo Nosa Gasa nu Alatala. ⁵ Nirasairamo Tesa nu Alatala nabelo bo nirasairamo kuasa lako ri dunia baru nu Alatala. ⁶ Tapi ane rak-abasakara pomparasayara naupa pura-pura haitu nirasaira, ledo ria dala manggeni ira majea mpanjili lako ri dosara. Apa ane ivesia rapoviara, nasimbayu mpo nipakura mpanjili i Pue Yesus ri kayu salib, bo nanjalai Ia ri ngayo ntodea.

⁷ Tana nadea nggani nambela uda bo nombadekei asele noguna ka topokarajaan, tana haitu rapoporasi nu Alatala. ⁸ Tapi ane tana haitu aga mompakatuvu jono bo karui, ledo ntoto ria gunana. Tana haitu domo masae rapindasi nu Alatala. Bo kaupuna tana haitu rapalabu pakaupu.

⁹ Sampesuvu-sampesuvu nipotoveku, naupa ivesia tesaku, niparasaya kamimo komiu ledo mpo tana rapindasi haitu. Niparasaya kami naria asele nabelopa nte komiu, haitumo pomparasayamiau bo pokainggumiu masipato ka tona nipakasalama. ¹⁰ Alatala ledo natenggo raraan, Ia ledo malinga raraan ante poviamiu bo pepotovemiu. Nipopakitamiau tovemiu ka Ia tempo komiu nombatulungi sampesuvumiu sampomparasaya, nompamula lako ri nggaulunama sampe siii. ¹¹ Dota kami, ala komiu pura-pura mompasimbuku mokainggu ivehaitu sampe ri kaupuna ala komiu mpuu-mpuu manggava pura-pura anu nisaru-makamiau lako nte Alatala. ¹² Nee sampe komiu majadi masanda, tapi pasialamo jonjo ntona anu nomparasaya Alatala bo nosabara nompopea sampe nikavara anu nijanjiNa ka ira.

Anu nijanji nu Alatala natantumoma madupa

¹³ Tempo Alatala nombadekei pojanji ka i Abraham, Ia nompakaroso pojanjiNa haitu bo nosumpa nte Sangana mboto, sabana ledo ria tona ntanina nalangapa pade Ia. ¹⁴ NiuliNa, “Yaku nojanji, mpuu-mpuu Kudekei belo ka iko, bo Kupakadea mulimu.” ¹⁵ I Abraham nosabara nompopea, jadi nitarimanamo anu nijanji nu Alatala ka ia.

¹⁶ Ane kita manusia nojanji, kita nosumpa nte sanga naogepa pade karota mboto, bo haitu nompakaroso tesata ala raparasaya ntona, bo domo maria posisanai. ¹⁷ Ivesia muni ante Alatala. Ia nadota nompopakita pojanjiNa ledo ntoto mabali. Ia nadota nompopakitana ka tona masipato mantarima anu nijanjiNa. Jadi Ia nosumpa ala nompakaroso pojanjiNa. ¹⁸ Pojanji bo posumpaNa haitu ledo mabali. Alatala ledo ntoto nodava. PatujuNa nojanji ivesia ala kita anu nekisaliku nte Ia maroso rarata sampe kita maroo manjarumaka anu nijanjiNa haitu. ¹⁹ Ane mantamo talonto sakaya, natantumoma sakaya haitu ledo maave. Ivesia muni kita: ane maroso panjarumakata ledo masalandala kita. Ledo mabali panjarumakata sabana

anu nisarumakata haitumo i Pue Yesus. Ia naria ri Tombi Nelabi Kagasana † ri suruga, bo ²⁰Ia nokolu nesua hamai mompakasadia dala ka kita. Ia nianggataka najadi Pakeni nTopanggeni Pesomba sampe ri kasae-saena, nasimbayu mpo i Melkisedek.

I Melkisedek naogepa pade topanggeni pesomba lako ri valaa i Lewi

7 I Melkisedek haitu magau ngata Salem bo topanggeni pesomba ka Alatala anu Nelabi KageNa. Tempo i Abraham nanjili lako nombadagi magau-magau ri tana Kanaan, i Melkisedek hau nosinggava nte i Abraham bo nerapi Alatala nombadekei belo ka ia. ²Naupu haitu i Abraham nombabagi pura-pura mbara-mbara nialasina lako ri magau-magau, bo nidekeina sabagia lako ri sapulu bagia ka i Melkisedek. Sanga i Melkisedek haitu, batuana “Magau Nanao,” bo ia muni Magau ngata Salem anu naria batuana “Magau Topanggeni Posinggabelo.” ³I Melkisedek ledo notina, ledo notuama, ledo nisani totuana. Katuvuna ledo ria pamulana bo ledo muni naria kaupuna. Ia nasimbayu mpo Ana nu Alatala, bo ia bate-batena topanggeni pesomba sampe ri kasae-saena.

⁴Jadi pekirimo kaoge i Melkisedek hitu! I Abraham, tuama ntotuata nggaulu, nombadekei ka ia sabagia lako ri sapulu bagia pura-pura mbara-mbara tobelona nialasina lako ri magau-magau anu nidagina. ⁵Nangoseaka Atura-atura agama Yahudi, tona lako ri valaa i Lewi anu najadi topanggeni pesomba masipato radekeika sabagia lako ri sapulu bagia lako ri panggava ntodea toIsrael. Nangoseaka Atura-atura agama, aga topanggeni pesomba masipato mangala haitu lako nte sampesuvura toIsrael naupa ira pura-pura muli i Abraham. ⁶Tapi i Melkisedek, naupa ia ledo lako ri valaa i Lewi, nidekeika sabagia lako ri sapulu bagia lako ri pura-pura mbara-mbara niago i Abraham lako ri magau-magau haitu, bo ia nerapi Alatala nombadekei belo ka i Abraham anu nidekeika pojanji nu Alatala. ⁷Nisanita pura-pura tona niperapika belo naedepa pade tona anu nerapi belo ka ia. Jadi i Melkisedek naogepa pade i Abraham.

⁸Ivesia muni i Melkisedek naogepa pade topanggeni pesomba lako ri valaa i Lewi. Ane topanggeni-topanggeni pesomba haitu anu nibagika sabagia lako ri sapulu bagia, ira manusia biasa anu namate. Tapi nangoseaka Buku Gasa, i Melkisedek anu nibagika i Abraham sabagia lako ri sapulu bagia, ledo namate tapi batena natuvu. ⁹I Lewi totua nu pura-pura topanggeni pesomba anu masipato radekeika sabagia lako ri sapulu bagia lako ri todea toYahudi. Tapi naupa i Lewi dopa nipoanaka tempo i Abraham nombadekei sabagia lako ri sapulu bagia ka i Melkisedek, namala

† Peinta Ibrani 9:1-8.

rauli i Lewi mboto nombadekei sabagia lako ri sapulu bagia tempo haitu. ¹⁰Sabana, ia nariamo riaro karo ntotuana i Abraham tempo i Melkisedek nosinggava nte i Abraham.

I Kristus najadi Pakeni nTopanggeni Pesomba nasimbayu mpo i Melkisedek, bo Ia naogepa pade topanggeni pesomba lako ri valaa i Lewi

¹¹Tempo Alatala nombadekei Atura-atura agama ka toIsrael, nianggatakaNa tona lako ri valaa i Lewi majadi topanggeni pesomba anu momparenta todea mangoseaka Atura haitu. Tapi pokarajaa ntopanggeni pesomba haitu ledo nompakule mompakanoa manusia ri panggita nu Alatala. Jadi haitumo sampe paraluu raanggataka tona ntanina majadi topanggeni pesomba. Topanggeni pesomba haitu nasimbayu mpo i Melkisedek, bo domo mpo i Harun muli i Lewi anu najadi topanggeni pesomba ntoIsrael pamulana. ¹²Jadi ane topanggeni pesomba lako ri valaa i Lewi rasambe, natantumato atura-atura nikeniakara kana rasambe muni. ¹³⁻¹⁴Topanggeni pesomba nitesa pangane Iamo Tuputa Yesus. Nisanita Ia lako ri valaa i Yehuda, ledo lako ri valaa i Lewi. Bo ledo ria muli i Yehuda anu najadi topanggeni pesomba. Ledo ria sangganian i Musa nanguli tona lako ri valaa i Yehuda majadi topanggeni pesomba.

¹⁵Nalantomo *topanggeni pesomba lako ri valaa i Lewi bo Atura-atura agama nisambeimo* sabana sii-sii nariamo ntanina topanggeni pesomba anu nasimbayu mpo i Melkisedek. ¹⁶Ia najadi topanggeni pesomba ledo nangoseaka atura-atura nggaulu anu nompakatan-tu muli isema masipato majadi topanggeni pesomba. Tapi Ia najadi topanggeni pesomba sabana Ia nakuasa bo katuvuna ledo ria kaupu-upuna. ¹⁷Apa riaro Buku Gasa naria tesa nanguli ivei:

“Iko topanggeni pesomba sampe ri kasae-saena nasimbayu mpo i Melkisedek.”

Mazmur 110:4

¹⁸Jadi sii-sii Atura-atura agama nokolu nisambe nu Alatala sabana ledo ria kuasana bo ledo ria gunana. ¹⁹Batuana, Atura-atura agama ledo ntoto nompakule manggeni tona majadi manoa ri panggita nu Alatala. Tapi sii-sii naria sangaya dala nabelopa nipopaisani ka kita. Ane raoseakata dala hitu kita mamala mosisani belo nte Alatala.

²⁰Nisanita i Yesus naogepa pade topanggeni pesomba lako ri valaa i Lewi sabana Alatala mboto nosumpa tempo i Yesus najadi topanggeni pesomba. Alatala ledo nosumpa tempo muli i Lewi nianggataka najadi topanggeni pesomba. ²¹Tapi tempo i Yesus nianggatakaNa, Ia nosumpa. NiuliNa ka i Yesus ivei:

“Yaku nosumpa bo ledo ntoto mabali pekiriKu, Iko topanggeni pesomba sampe ri kasae-saena.”

²² Lako ri posumpa haitu, nalantomo pojanji nu Alatala nabaru nabelopa pade pojanji njae. Apa i Yesusmo namala nompakatantu pojanji haitu mpuu-mpuu madupa.

²³ Bo naria sangayapa sabana i Yesus naogepa pade topanggeni pesomba lako ri valaa i Lewi. Tona lako ri valaa i Lewi anu najadi topanggeni pesomba kana madea, sabana ira kana mamate pura sampe ledorapakulera mompapola pokarajaara. ²⁴ Tapi i Yesus batena natuvu. Haitu sampe Ia batena nokarajaa mpo topanggeni pesomba. PokarajaaNa ledorolinja nte tona ntanina. ²⁵ Jadi haitumo sampe Ia nompakule nompakasalama sampe ri kasae-saena tona nikenina natundu nte Alatala. Apa i Yesus batena natuvu nompasaliku ira ri ngayo nu Alatala.

²⁶ Jadi i Yesusmo Pakeni nTopanggeni Pesomba anu nompakule nombatulungi kita. Ia nagasa, ledor ntoria salaNa atau dosana. Ia nitaniaka lako ri tona nadosa, bo Ia nioretaka sampe ri ponturo nalangapa pade pura-pura anu naria ri langi, haitumo ri suruga. ²⁷ Ia ledor nasimbayu ante Pakeni nTopanggeni Pesomba ntanina. Eo-eo nikenira ntani ruru pesomba posompo ka dosara mboto, pade namala nikenira pesomba posompo ka dosa ntodea. Tapi i Yesus nanggeni pesomba aga sanggani tempo nidekeiNa karoNa mboto rapatesi mantolo dosa manusia. Pesomba haitu ledor paralu rasilisampe ri kasae-saena. ²⁸ Nangoseaka Atura-atura agama Yahudi, tona nalente bo nadosa nianggataka najadi Pakeni nTopanggeni Pesomba, apa ira aga manusia biasa. Tapi naliu Atura-atura haitu, Alatala nojanji ante sumpa, bo nangoseaka pojanji haitu, nianggatakaNa AnaNa mboto majadi Pakeni nTopanggeni Pesomba. Bo AnaNa haitu nipajadi Topetolo anu ledor nakura nu apa-nuapa sampe ri kasae-saena.

Pojanji nokolu nisambe ante pojanji nu Alatala nabaru anu nabelopa

8 Patuju ntesaku pangane ivei: Naria mamimo Pakeni nTopanggeni Pesomba ivehaitu nte kita. Ia nonturo ri suruga ri panggana nu Alatala anu Neliu KaogeNa. ² Ia nantui pokarajaa mpo Pakeni nTopanggeni Pesomba ri Tombi Nelabi Kagasana, haitumo ri Tenda nTupu mpuuna ri suruga, anu nipovia nu Alatala ledor povia nu manusia.

³ Pura-pura Pakeni nTopanggeni Pesomba nianggataka ala manggeni pedekei bo pesomba ka Alatala. Jadi i Yesus muni paralu maria pesomba rakeniNa ka Alatala. ⁴ Ane rapana Ia ri dunia hitu, Ia ledor ntoto majadi topanggeni pesomba, sabana nariamo topanggeni pesomba anu nanggeni pesomba ka Alatala nangoseaka Atura-atura agama Yahudi.

Mazmur 110:4 ⁵ Pokarajaa nipoviara kakanana aga gambar bo vayo lako ri anu naria ri suruga. Haitu sampe tempo Nabi Musa nggaulu nasadia novia Tenda nTupu ri karava bai, Alatala nompopatora ka ia ivei: "Toramo! Pura-pura haitu kana mupovia mangoseaka jonjo nipopakitaku ka iko ri bavo nu bulu." ⁶ Tapi i Yesus nanggava pokarajaa nanggeni pesomba anu nabelopa pade pokarajaa ntopanggeni pesomba ri dunia hitu anu nangoseaka Atura-atura agama nggaulu. Bo ivesia muni pojanji nabaru anu nipasiayuNa ri olo nu Alatala bo manusia nelabipa kabelona pade pojanji nokolu, sabana pojanji nabaru nipovia nangoseaka janji-janji tobelona.

⁷ Ane rapana pojanji pamulana haitu ledor nakura, natantu ledor paralu rasambe ante pojanji ntanina anu nabelopa. ⁸ Alatala mboto nanggita kakura ntodea toYahudi sampe niuliNa ivei:

"Pariaramo! Kana makava tempona bara maipia Yaku movia pojanji nabaru ante toIsrael bo valaa i Yehuda.

⁹ Pojanji haitu ledor masimbayu mpo pojanji nipovitaKu nokolu ante totuara nggaulu tempo Yaku nanggeni ira nesuvu lako ri tana Mesir. Ira ledor naroo nangoseaka pojanji haitu. Jadi haitu sampe domo nipeiliKu ira.

¹⁰ Tapi iveimo pojanji Kupovia ante toIsrael ri tempo makava: Kuboli atura-aturaKu riarapekirira, bo Kutulisi atura-atura haitu riarantaira. Yaku majadi Alatala nisombara bo ira majadi todeaKu.

¹¹ Bo ira domo paralu mompatuduki roa-roa bo sampesuvu-sampesuvura mosisani ante Alatala, sabana ira pura-pura, nau totua, nau ngana, mosisani ante Yaku.

¹² Yaku mombaampungi salara, bo dosa-dosara domo Kutora."

Yeremia 31:31-34

¹³ Ri tesaNa pangane, Alatala nombatesa pojanji nabaru, jadi nipakalantoNa pojanji nokolu natuamo bo domo rapake. Anu domo nipake bo natuamo natantu domo masae malipomo.

Cara metupu nangoseaka pojanji nu Alatala nokolu

9 Riarape pojanji nu Alatala nokolu haitu naria atura-atura anu nompakatantu cara metupu nte Alatala, bo naria muni tenda petupu nipovia nu manusia.

² Sangu tenda nipataka, riarana naria rontombi. Ri tombi koluna naria kada mpoindo bo meja ante roti nipesomba ka Alatala. Tombi haitu niuli Tombi Nagasa.

³ Bo ri bengokae povombo anu nipotombi, naria tombi niuli Tombi Nelabi Kagasana. ⁴ Ri tombi haitu naria meja potunju dupa nipovia lako ri bulava bo nar-

ia muni Peti Pojanji anu nilapisi bulava. Riara Peti haitu naria kura bulava pomboli roti manna bo toko polipa i Harun anu nosepe bo natuvu bara ipia. † Naria muni rompeka vatu noisi Sapulu Parenta nu Alatala. ⁵ Bo ri bavo nu Peti Pojanji haitu naria randua anu nipovia nolenje mpo malaeka anu niuli Kerub. Kerub haitu tandana karia nu Alatala hamai. Kapira nantaungo potutui nu Peti haitu anu niuli ponturo pantolo dosa. Tapi haitu pura-pura ledo paraluu ratentei pakalanto ri sii.

⁶ Iweimo cara pompakasiayu tombi riaru Tenda nTupu: eo-eo topanggeni pesomba nesua ri tombi koluna mantui bagora. ⁷ Tapi aga Pakeni nTopanggeni Pesomba saitona nidekei mesua ri tombi karontombina anu niuli Tombi Nelabi Kagasana, bo haitu aga sanggani sampae. Tempo ia mesua kana rakenina raa rapesombana mombasompo dosana mboto bo dosa ntodea anu ledo nitunggaira. ⁸ Lako ri atura haitu Nosa Gasa nu Alatala nompopaisani ka kita ivei: ane da naria Tenda pamulana haitu, batuana dopa nibuka dala mesua sampe ri ngayo nu Alatala ri Tombi Nelabi Kagasana. ⁹ Haitu muni naria batuana ka kita sii-sii, haitumo pedekei-pedekei bo pesomba-pesomba nipesomba ntona nangoseaka atura-atura pojanji nokolu, ledo nakuasa mompakagasa rara nta ntopesomba ri panggita nu Alatala. ¹⁰ Atura-atura haitu aga nosinggambela ante kande, panginu bo mpengaya ada pediu. Atura-atura haitu aga nosinggambela ante karota, ledo nosinggambela ante rara ntaita, bo atura-atura haitu aga nipake sampe makava tempona Alatala movia pojanji nabaru.

Cara metupu nte Alatala anu niken i Yesus, nabelopa pade cara nipakatantu riaru Pojanji nokolu

¹¹⁻¹² Tapi i Kristus nakava mpo Pakeni nTopanggeni Pesomba anu nanggeni kabelona nirasaita mamimo. Ia noliu riaru Tenda nTupu anu nelabi kaogena bo nelabi kabelona pade Tenda nTupu ri dunia hitu, bo nesua ri Tombi Nelabi Kagasana ri suruga. Tenda nTupu ri suruga haitu ledo nipovia mpale manusia, batuana, ledo nopuna lako ri dunia hitu. Tempo i Kristus nesua ri Tenda haitu aga sanggani sampe ri kasae-saena. Ia ledo nanggeni raa ntovau lakina atau raa ana japi rapesombaNa, tapi raaNa mboto nikenina. Ivesiamo Ia nombakabasaka kita lako ri dosata sampe ri kasae-saena. ¹³ Nangoseaka pojanji nokolu, raa lako ri tovau bo japi lakina bo avu lako ri ana japi anu nipalabu rapesomba ka Alatala nikamburoroi ka tona naruto ala ira majadi magasa. Jadi iyapa raa bo avu haitu mamala mompakagasa karo ntona naruto, ¹⁴ nemopa raa i Kristus anu nelabipa kabisana! I Kristus nombadekei karoNa mboto ka Alatala najadi pesomba anu

† Toko i Harun nosepe bo natuvu, tandana iam nipelisi nu Alatala majadi topanggeni pesomba. Peinta Bilangan 17:1-11.

ledo ria kakurana. Haitu nipoviaNa ante petulungi Nosa Gasa, anu naria sampe ri kasae-saena. Raa i Kristus mompakagasa rara ntaita lako ri pokaingguta ledo ria gunana ala kita mamala metupu nte Alatala anu natuvu sampe ri kasae-saena.

¹⁵ Haitu sampe i Kristus najadi topetariolo anu mompasiayu pojanji nu Alatala nabaru ala tona nipelisi nu Alatala mamala mantarima belo nijanjiNa sampe ri kasae-saena. Apa i Kristus namate nombatolosi dosa nipovia tempo pojanji nokolu da nipake.

¹⁶ Ane maria sura pojanji pobagi kakalumana, natan-tumo kakalumana dopa namala rabagi ane topovia sura dopa namate. ¹⁷ Sabana isi sura haitu dopa mamala raoseaka ane da natuvu topovia sura. Ane namate topoviana, pade namalamo rapake. ¹⁸ Ivesia muni pojanji nu Alatala pamulana: ane dopa nipatiti raa binata nisambale, dopa namala rapake. ¹⁹ Pamulana, i Musa nompopaisani ka todea toYahudi pura-pura parenta anu naria riaru Atura-atura nu Alatala. Naupu haitu nialana raa ana japi bo tovau lakina nisambale bo nialana ante uve. Naupu haitu nialana sepi-sepi nu kavoko hisop anu nipou ante lui bulu bim-ba nalei. Nitomena ri raa bo nivembasikana Buku Parenta-Parenta bo todea. ²⁰ Niulikana ira, "Hitumo raa mompakaasa pojanji nipakatantu nu Alatala ka komiu." ²¹ Bo ivesia muni i Musa nombavembasi raa ri Tenda nTupu bo pura-pura gana rapake metupu nte Alatala ala majadi magasa. ²² Kakanana, nangoseaka Atura-atura agama Yahudi sakidepa pura-pura anu naria nipakagasa ante raa. Bo ane ledo ria katiti nu raa, dosa ledo namala raampungi.

Raa binata ledo mompakalali dosa, tapi raa i Yesus mompakalali dosata sampe ri kasae-saena

²³ Jadi Tenda nTupu bo pura-pura ganana anu nogambarai anu naria ri suruga, kana nipakagasa ivesia. Tapi anu naria ri suruga, paraluu rapakagasa ante pesomba anu nelabipa kabelona. ²⁴ Sabana, i Kristus ledo nesua ri tenda petupu ri dunia anu nipovia mpale manusia, anu nogambarai Tenda nTupu mpuuna ri suruga. Tapi Ia nesua ri suruga bo hamai Ia batena mantingayo Alatala ala mantulungi kita.

²⁵ Mpaem-paem Pakeni nTopanggeni Pesomba Yahudi nesua ri Tombi anu Nelabi Kagasana nanggeni raa lako ri sangu binata, ledo raana mboto. Tapi i Kristus aga sanggani nombadekei karoNa mboto najadi pesomba. ²⁶ Apa ane rapana mpenggani-nggani Ia mesua, batuana mpenggani-nggani muni Ia kana mombarasai kasusa bo kapari nompamula lako ri lamba pamulana. Tapi kakanana, ri tempo sii-sii anu napa-kaupu dunia Ia nakava aga sanggani mompakalali dosata ante nombadekei karoNa mboto nipatesi.

²⁷ Alatala mompakatantu manusia mamate aga sang-

gani, bo maupu haitu ratangara. ²⁸ Jadi ivesia muni i Kristus namate aga sanggani majadi pesomba pompakalali dosa ntodea. Naupu haitu Ia makava sangganipa, ledo mompakalali dosa, tapi mompakasalama tona nalentora nompopea kakavaNa.

10 Atura-atura agama Yahudi aga gambara. Riara Atura-atura haitu dopa nisanita mpuu kabelo rakavata lako nte i Kristus. Aga vayona nikitata, ledo lenjena mpuu. Mpaie-mpaie tona nakava nanggeni pesomba nasimbayu rapesomba ka Alatala, nangoseaka Atura-atura haitu. Tapi pesomba-pesomba haitu ledo ntoto nompakule manggeni tona majadi nanao ri panggita nu Alatala. ² Ane rapana dosa ntona anu nanggeni pesomba haitu, mpuu-mpuu rapakalali, natantumo domo rakenira pesomba ka Alatala, sabana rasanira dosara niampungimo bo domo rarasaira nadosa. ³ Tapi kakanana ledo ivesia. Pesomba nikeni ntona mpaie-mpaie aga nompopatora ka ira, ira nadosa. ⁴ Sabana, raa lako ri japi lakina bo tovau lakina ledo ntoto nompakalali dosa.

⁵⁻⁶ Haitu sampe tempo i Kristus nakava ri dunia hitu, Ia nanguli ka Alatala ivei:

“O Pue Alatala, ledo nipodotaMiu pesomba bo pedekei,

Ledo nipokonoMiu pesomba nipalabu bo pedekei-pedekei nidekei raposompo dosa.

tapi naria karoKu mboto nipakasadiaMiu.

⁷ Pade niuliKu, ‘Siimo Yaku, O Pue Alatala, nasadiamo Yaku movia dotaMiu

nasimbayu mpo anu nitulisi riara Buku Gasa anu nombatesaki Yaku.’”

Mazmur 40:7-9

⁸ Ri bavona, i Kristus nanguli Alatala ledo nompokono pesomba bo pedekei, ledo muni nipokonoNa pesomba nipalabu bo pedekei-pedekei nidekei raposompo dosa. I Kristus notesa ivesia nau pesomba bo pedekei haitu nikeni ka Alatala nangoseaka Atura-atura agama Yahudi. ⁹ Naupu niuliNa ivesia, nitambaiNa vai tesaNa ivei: “Siimo Yaku, O Pue Alatala. Nasadiamo Yaku movia dotaMiu.” Jadi, sabana haitu, nisanita pesomba-pesomba nangoseaka Atura agama Yahudi nilelaka nu Alatalamo bo nisambeina ante pesomba i Kristus.

¹⁰ Bo i Kristus nangoseaka dota nu Alatala, haitumo nidekeiNa karoNa mboto majadi pesomba posompo dosa. Pesomba haitu aga sanggani, ledo paralu rasili, apa naganamo sampe ri kasae-saena. Ivesiamo dosata pura-pura nipakalali.

¹¹ Eo-eo topanggeni pesomba agama Yahudi neangga nantui pokarajaara. Nadea nggani nikenira pesomba-pesomba nasimbayu ka Alatala. Tapi pesomba haitu ledo ntoto nompakule mompakalali dosa. ¹² Tapi aga sangu pesomba nikeni i Kristus, haitumo karoNa mboto nidekeiNa rapatesi majadi pesomba posompo dosa. Bo pesombaNa haitu nompakule mompakalali

dosa sampe ri kasae-saena. Naupu nanggeni pesomba haitu, Ia nonturo ri panggana nu Alatala. ¹³ Bo sii-sii Ia nompopea sampe Alatala mompopekou pura-pura baliNa nte Ia. ¹⁴ Jadi lako ri pesombaNa sangu, i Kristus nompakalali dosata, bo nompakanoa kita ri panggita nu Alatala sampe kita domo makura nuapa-nuapa sampe ri kasae-saena.

¹⁵ Nosa Gasa nu Alatala muni nompopaisani pojanji nabaru ka kita. NipapolaNa tesa nu Alatala ivei:

¹⁶ “Iveimo pojanji Kupovia ante ira ri tempo makava:

Kuboli atura-aturaKu riara pekirira,
bo Kutulisi riara ntaira.

¹⁷ Dosa-dosa bo pokainggu nadaa domo Kutora.”

Yeremia 31:33-34

¹⁸ Jadi ane dosa-dosa bo pokainggu nadaa niampungimo, natantu domo paralu pesomba posompo dosa.

Kita kana mabia manggaparai Alatala riara posambayata bo metupu nte Ia

¹⁹ Jadi sampesuvu-sampesuvu, hitupa kita domo paralu makaja rarata manggaparai Alatala riara posambayata bo metupu nte Ia. Namala rauli kita namala mesua sampe ri Tombi Nelabi Kagasana sabana raa lako ri kamate i Yesus. ²⁰ I Yesus nombabuka dala nabaru ka kita, dala anu nanggeni katuvua nabelo. *Ri Tenda nTupu bara ipia, dala hau riara Tombi Nelabi Kagasana nilava kae povombo.* Tapi i Kristus nombabuka dala ka kita, domo ria nuapa-nuapa nombalava kita manggaparai Alatala riara posambayata bo metupu nte Ia, apa i Yesus nombadekei karoNa mboto rapatesi mombasompo dosata. ^{†21} Bo Ia najadi Pakeni nTopanggeni Pesomba anu nanggeniaka todea nu Alatala. ²² Jadi kita kana metupu nte Alatala ante rarata naliangu bo pomparasayata ledo nolengga-lengga. Apa rara ntaita nipakagasamo ante raa i Kristus, jadi nisanita domo ria salata. Kita nidiu ante uve gasa, tandana kita nipakagasaNamo. ^{†23} Kita kana bate-batena manjarumaka i Yesus, kita nangaku Iamo Tuputa. Nee molengga-lengga apa nisanita Alatala namala raparasaya mompakadupa pojanjiNa. ²⁴ Bo kita kana mompekirika berimba kita mamala mosipakaroso rara sampe kita pura-pura mosimpotove bo mokainggu nabelo. ²⁵ Nee menonto masiromu metupu mosanggani-nggani, mpo kabiasa ntona sanu. Tapi kita kana mosipakaroso rara, nelabipa sii-sii sabana nisanita nparamo kakava i Yesus.

† *Tempo namate i Kristus, kae povombo ri Banua nu Alatala nabite, tandana kita namala mesua riara Tombi Nelabi Kagasana, haitumo kita mboto namala nanggaparai Alatala riara posambayata bo metupu nte Ia bo domo paralu topanggeni pesomba.* †† *Ri ada nanganggataka topanggeni pesomba ntoYahudi, ira nivembasi raa ala mompatani ira ka Alatala (peinta Pesuvu 29:21) pade nandiu ala magasa. Dopame topanggeni pesomba mompalabu pesomba, kana ratoposi ntani ruru palera bo kadara. (Peinta Pesuvu 29:4; 30:17-21; 40:30-32.)*

Nee moura momparasaya

²⁶ Ane ratunggaita bate-batena movia dosa naliu nitarimata pepatuduki nakana, ledo ria pesomba mompakalali dosa haitu. ²⁷ Ane ivesia pokaingguta, damo aga maviora rarata mompopea pehuku bo apu narega mpuu anu mompalabu tona nangeva Alatala. ²⁸ Isemasema nombasapuaka Atura-atura agama nipapola Nabi Musa nggaulu, ane naria randua bara tatalu sabi nanguli ia nasala, ia nihuku mate bo ledo ria ampu. ²⁹ Ane ivesia pehuku ka tona nombasapuaka Atura agama, nemopa ka tona anu nompojejea Ana nu Alatala. Tona haitu nompandaente raa i Yesus, tano raa haitumo nompakaasa pojanji nu Alatala bo mompakalali dosana. Bo tona haitu muni nanjalai Nosa Gasa anu nompopaisani pepotove nu Alatala ka todeaNa. ³⁰ Nisanitamo Alatala nanguli ivei: "Yakumo topombabalasi. Yaku mombahuku ira." Bo niuliNa muni, "Tupu mombatangara todeaNa." ^{†31} Natantumo maviora mpuu rara ntona anu mambela pehuku lako nte Alatala anu natuvu sampe ri kasae-saena!

³² Tapi sampesuvu-sampesuvu, toramo katuvumiu tempo bara ipia. Tempo komiu dako nantarima reme lako nte i Pue, nadea susa bo pari nirasaimiu. Tapi naupa ivesia, komiu batena momparasaya. ³³ Sanggani-sanggani komiu nislai bo nipakadaa ntona ri ngayo ntodea. Naria muni komiu nantulungi roa anu nipovia ntona ivehaitu, sampe komiu muni nombarasai kasusara. ³⁴ Komiu muni naasi mata nompороа bo nantulungi tona nitarunggu. Bo tempo mbarambaramiu niago ntona komiu batena nadamba, sabana nisanimiu naria kakalumanamiu nelabipa kabela ri suruga anu nainti sampe ri kasae-saena.

³⁵ Jadi, sampesuvu-sampesuvu, nee menonto momparasaya, sabana ane maroo komiu momparasaya, mambaso mpuu tambomiu bara maipia. ³⁶ Komiu kana mosabara ala maupu komiu movia dota nu Alatala, komiu mantarima anu nijanjiNa. ³⁷ Sabana riaru Buku Gasa nitulisi ivei:

"Domo ntoto masae, Ia anu makava haitu, makava mpuumo.

Ia ledo mombasoro-soro kakavaNa haitu.

³⁸ Bo todeaKu anu nanao ri panggitaKu, iramo matuvu mabelo sabana pomparasayara.

Tapi ane moura ira, domo Kupodamba."

Habakuk 2:3-4

³⁹ Sampesuvu-sampesuvuku, kita hitu ledo topoura sampe rapambela pehuku, tapi kita momparasaya Alatala bo nanggava katuvua nabelo sampe ri kasae-saena.

Pomparasaya

11 Ane kita momparasaya, batuana nisanitamo anu nisarumakata mpuu-mpuu rakavata. Nau dopa nikitata, nariamo katantuna riaru ntaita anu haitu mpuu-mpuu majadi. ² Lako ri pomparasaya ntona nggaulu, ira nipodamba nu Alatala. ³ Lako ri pomparasayata, nisanita dunia nipajadi nu Alatala ante TesaNa. Jadi, anu nikita nipajadi lako ri anu ledo nikita.

Jonjo pomparasaya i Habel, i Henokh, bo i Nuh

⁴ Lako ri pomparasaya i Habel, pesomba nikenina ka Alatala nabelopa pade pesomba nikenin tuakana i Kain. Lako ri pomparasayana haitu, i Habel nitarima nu Alatala mpo tona nanao apa nalantomo pesombana nipodamba nu Alatala. Bo nau namatemo ia, da nariapa tesana bo jonjo pomparasayana.

⁵ Lako ri pomparasaya i Henokh, ia ledo namate tapi nioretaka nu Alatala lako ri dunia hitu. Ia nielo-elo tapi ledo ria nikava ntona sabana ia niore nu Alatala lako ri dunia hitu. Naria tesa ri Buku Gasa nompakalanto dopame i Henokh niore, katuvuna nipodamba nu Alatala. ⁶ Ledo ria saitoa namala rapodamba nu Alatala ane ledo ria pomparasayana. Apa isema-sema madota metupu nte Alatala, kana raparasayana naria Alatala. Bo kana raparasayana muni Alatala mombadekei belo ka tona nangelo Ia ante rara mpuu-mpuu.

⁷ Lako ri pomparasaya i Nuh, ia natundu nte Alatala. Alatala nompopaisani ka i Nuh maria uve oge ngena mompakagero dunia. Jadi, nau dopa nikitana kajadia haitu, nioseakana parenta nu Alatala bo nipoviana kapala mbaso ala ira sambanua masalama. Lako ri pomparasayana haitu, pura-pura manusia ntanina ri dunia nireke nu Alatala masipato rahuku sabana ira ledo momparasaya. Tapi i Nuh nireke nu Alatala nanao sabana pomparasayana.

Jonjo pomparasaya i Abraham

⁸ Lako ri pomparasaya i Abraham, nioseakana parenta nu Alatala. Alatala nompokio ia bo nituduNa hau ri ngata nakavao. Alatala nojanji ngata haitu majadi bagia i Abraham. Jadi, nau dopa nisanina ri umba ngata rakalauna haitu, nipalaikanamo ngatana mboto nangoseaka parenta nu Alatala. ⁹ Lako ri pomparasayana, ia nonturo mpo topesovo ri ngata nijanji nu Alatala ka ia. Hamai ia da nonturo ri tenda, bo ivesia muni mulina i Ishak bo i Yakub. Alatala nojanji ngata haitu majadi bagiara, nasimbayu mpo nijanjiNa ka i Abraham. ¹⁰ I Abraham nosabara nonturo ri tenda mpo topesovo sabana ia da nantongoraka ponturo ri ngata anu maria sampe ri kasae-saena, ngata niponia bo nibangu nu Alatala.

† *Ulangan 32:35-36*

¹¹ Lako ri pomparasaya i Abraham bo i Sara, ira nanggava kuasa nomuli, naupa i Abraham natuamo bo i Sara nagampa. Haitu najadi sabana nisani i Abraham Alatala namala raparasaya mompakadupa pojanjiNa. ¹² Tempo haitu karo i Abraham domo nompakule momuli sabana ia natua ntotomo. Tapi naupa ivesia, nadea mulina, ledo rapakuleta mobila kadeana. Kadeana nasimbayu mpo kadea nu betue ri langi bo bone ri talinti.

¹³ Ira pura-pura pangane batena nomparasaya sampe namate, nau ledo nitarimara mboto anu nijanji nu Alatala. Namala raulita nikitara nggavao kadupana. Nisanira kadupana da masaepa, tapi naupa ivesia nadamba rarara bo ledo nonggai rarara nantongoraka kadupana pojanji nu Alatala. Niulira dunia hitu ledo ponturora nakana, ira aga topesovo bo topanjayo ri dunia hitu. ¹⁴ Tona notesa ivesia nompakalanto ira da nangelo ponturo majadi bagiara mboto. ¹⁵ Ledo ngata nipalaisira bara ipia nipolentorara. Apa ane rapana ngata haitu nipolentorara, nariamo loga ka ira manjili ri ngatara haitu. ¹⁶ Tapi ira nalentoraka ngata anu nabelopa, haitumo ngata ri suruga. Jadi Alatala ledo naeya mataNa ane Ia niuli Tupura apa naria mami ngata nipakasadiaNa ka ira.

¹⁷⁻¹⁸ Lako ri pomparasaya i Abraham, ia nasadia nombadekei anana i Ishak majadi pesomba ka Alatala tempo pomparasayana niuji nu Alatala. Bara ipia Alatala nojanji ka i Abraham ivei: "Lako ri Ishakmo iko manggava muli nijanjiKu ka iko." Tapi naupa ivesia, i Abraham nasadia mombasambale i Ishak, anana saito-itona †, majadi pesomba ka Alatala. ¹⁹ Nipekirina Alatala nompakule mompakatuvu mpanjili tomate. Jadi namala rauli i Abraham nantarima anana mpanjili lako ri kamatena.

Jonjo pomparasaya i Ishak, i Yakub bo i Yusuf

²⁰ Lako ri pomparasaya i Ishak, niperapina Alatala mombadekei belo ka anana i Yakub bo i Esau, haitumo niperapina belo rakavara ri tempo makava. ^{††21} Bo lako ri pomparasaya i Yakub, tempo damo kamatena, niperapina Alatala mombadekei belo ka ana-ana i Yusuf. Bo ia netidanda ri tokona bo nombasomba Alatala.

²² Lako ri pomparasaya i Yusuf, tempo damo kamatena, ia nanguli Alatala manggeni toIsrael mesuvu lako ri tana Mesir bara maipia. Bo nitevaina anu rapoviara ka karobatana tempo ira malai lako ri Mesir.

Jonjo pomparasaya i Musa

²³ Lako ri pomparasaya ntina tuama i Musa, tempo i Musa nipoanaka, nitabuniakara talu-mbula kasaena sabana nikitara ia ngana nagaya. *Nau Magau Mesir nompamenta pura-pura ngana langgai ntoIsrael kana rapatesi*, ledo naeka ira nangeva parenta nu magau.

²⁴ Lako ri pomparasaya i Musa, tempo ia nambasomo, ia ledo nadota rauli tupu nu Magau Mesir.

²⁵ Nipokononapa mombarasai kasusa bo kapari mosanggani-nggani ante todea nu Alatala pade mombarasai kasana aga sampalai lako ri katuvu nadosa.

²⁶ Niparasayana Magau Topepakasalama anu nijanji nu Alatala makava bara maipia. Nipekirina nabelopa ia rasalai sabana pomparasayana pade manggava pura-pura kakalumana ri Mesir. Nipekirina ivesia sabana ia bate-batena nanjarumaka belo radekei nu Alatala ka ia bara maipia.

²⁷ Lako ri pomparasaya i Musa, nipalaisina tana Mesir. Ia ledo naeka ka Magau Mesir nau narau mpuu rara Magau. I Musa batena naroo rarana, apa eva nikitana Alatala anu ledo nikita. ²⁸ Lako ri pomparasayana, nituduna toIsrael movia ada Paskah. Niparentana ira mombadika raa ri vambara ala malaeka anu nanggeni kamatea ledo mompatesi ana lumbuara mosanggani-nggani ante ana lumbua ntoMesir.

Jonjo pomparasaya ntona ntanina

²⁹ Lako ri pomparasaya ntoIsrael, ira nombavote Tasi Lei nasimbayu mpo nolipa ri tana bai. Tapi tempo toMesir nompasimbuku mevote mombaraga toIsrael, ira aga nalodo rantasi.

³⁰ Lako ri pomparasaya ntoIsrael, nilintikura ngata Yerikho pitu-eo kasaena sampe nadungga tembo ngata haitu. ³¹ Bo lako ri pomparasaya i Rahab, mombine bajinga, nitarimana nabelo mata-mata ntoIsrael riara banuana. Jadi ia ledo nipatesi nosinggani-nggani ante toYerikho anu ledo natundu nte Alatala,

³² Sampesuvu-sampesuvuku, da nadeapa jonjo ntanina mamala kutesa, tapi ledo nagana tempoku mante-sa pakalanto hanupa pomparasaya i Gideon, i Barak, i Simson, i Yefta, i Daud, i Samuel bo nabi-nabi ntanina.

³³ Lako ri pomparasayara, sanu ira nombadagi magau-magau. Nipoviara dota nu Alatala jadi nitarimara anu nijanji nu Alatala ka ira. Sanu ira nombaramu nganga nu singa. ³⁴ Sanu ira nompepaya apu narega mpuu, bo nadea ngganimu ira nikabasaka lako ri tona nasadia mombatimbe ira. Tempo ira nalente, nipakaroso mpanjili. Ira najadi naroso riara posieva sampe nipakulera nombadagi tantara-tantara ntosangatana.

³⁵ Lako ri pomparasayara, mombine-mombine nanggi-ta mpanjili tona-tonara anu nipakatuvu mpanjili lako ri kamatena.

† anana saito-itona: *Nau naria ana i Abraham anu nipoanaka batua mombine, anana i Ishak nireke anana saito-itona sabana ia nipoanaka berei i Abraham nangoseaka pojanji nu Alatala.* †† *Peinta Kajadia 27:27-29, 38-40.*

Tapi naria muni tona ntanina nompalamba karora nipandasa sampe namate sabana pomparasayara. Ira ledo nadota rakabasaka lako ri kasusa haitu apa ira madota rapakatuvu mpanjili bo manggava katuvua nabelopa. ³⁶ Naria muni tona nipongei-ngeika bo nicambu pakandasa, bo naria tona nibalanggu bo nisuaraka riara ntarunggu. ³⁷ Naria muni tona nirempe watu sampe namate bo naria tona nigaragaji pakapudu, bo naria tona nipatesi ante guma. Ira nolinja-linja nangelo katuvua, bo pakeara aga kulimba nu bimba bo tovau. Ira mpuu-mpuu napepa, ira nipakasusa bo nipandasa. ³⁸ Ira nolipa-lipa ri karava bai bo ri buluna. Ira aga nonturo ri beka-beka ntana bo ri bolo-bolo watu. Haitu pura-pura najadi nte ira sabana pomparasayara. Kakanana, dunia nadaa hitu ledo masipato raponturora!

³⁹ Ira pura-pura nipodamba nu Alatala sabana pomparasayara. Nau ivesia, dopa nitarimara pura-pura anu nijanji nu Alatala, ⁴⁰ sabana naria nia nabelopa nipakasadia nu Alatala ka kita pura-pura. PatujuNa ala ira mompopea sampe kita pura-pura mosanggani-ngani rapajadi magasa bo ledo makura nuapa-nuapa.

Jonjo pomparasaya i Yesus

12 Jadi namala raulita, pura-pura ira pangane nombatiku kita bo nompakaroso rarata ante posabira. Sabana haitu, kita muni kana mombatedaka pura-pura anu nompopekai rarata bo dosa anu nekan-taka nte kita. Kita kana maroo rarata mangoseaka dala nipakatantu nu Alatala ka kita, nasimbayu mpo topan-gova ri posilumba. ² Kita kana mangova mompetoto i Yesus, sabana Iamo nanggeni kita nomparasaya bo Iamo nompompakule kita bate-batena momparasaya sampe ri kaupuna. I Yesus nombatidamaka kasusa bo kapari tempo nipaku ri kayu salib. Ri mata ntodea, namate ri kayu salib nepakaeya. Tapi ledo nipekirikaNa eyaNa, sabana nitorana kadamba nipakasadia ka Ia. Bo sii-sii Ia nonturo ri gadera magau ri panggana nu Alatala. ³ Pekirikamo kasusa nirasai i Yesus. Ia nieva ntona nadosa anu mpuu-mpuu navuu matara nte Ia. Pekirikamo Ia ala ledo masau raramiu bo ledo maupu raramiu momparasaya.

Kasusa bo kapari nirasaita nipaloga nTuamata Alatala ala mompatuduki kita bo mompakagasa katuvuta

⁴ Sampesuvu-sampesuvu, dopa ria komiu nipatesi rira pompasimbukumiu nangeva dosa. ⁵ Nee rakalingasimiu tesa lako ri Buku Gasa anu nompangajari kita, nasimbayu mpo totua nompangajari ngana-ngana, ivei:

“Anaku, nee rasapuaka pepatuduki nTupu.

Nee maupu raramu ane raonteakaNa iko.

⁶ Sabana Tupu nompatuduki bo nomparajea pura-pura tona nipotoveNa.

Ia noparajea pura-pura tona nipangakuNa ana-anaNa.”

Ayub 5:17, Amsal 3:11-12

⁷ Jadi sampesuvu-sampesuvu, komiu kana mombatidamaka riara kasusa bo kapari nirasaimiu. Tarimamo haitu mpo pepatuduki lako nte Tuamamiu Alatala, sabana komiu nirekeNa ana-anaNa mboto. Berimba? Naria ngana ledo niboba bo nipatuduki ntuanama? Natantumo ledo ria! ⁸ Alatala nompatuduki bo nomparajea pura-pura tona nirekeNa ana-anaNa. Jadi ane komiu ledo nipatudukiNa, batuana komiu ledo ana-anaNa mpuu, komiu aga ana-ana vone. ⁹ Kapolana, tuamata ri dunia nombaboba bo nompatuduki kita bo kita nombabila ira bo nekou nte ira. Ane ivesia, natan-tumo kana meliupa pekouta nte Alatala, Tuamata ri suruga ala kita matuvu mabelo. ¹⁰ Tuamata ri dunia hitu nombaboba bo nompatuduki kita sampalai, nangoseaka anu nirekera nabelo. Tapi Alatala nompatuduki kita ala manggeni belo ka kita. PatujuNa ala kita majadi magasa masimbayu mpo Ia. ¹¹ Tantu tempo kita niboba bo nipatuduki, kita ledo nadamba tapi aga nasusa. Tapi ane rapariarata pepatuduki haitu, kaupuna kana maria aselena riara nggatuvuta, haitumo kita matuvu mangoseaka dota nu Alatala bo matinonto rarata.

¹² Sabana haitu, sampesuvu-sampesuvu, pakaroso palemiu namaga bo pakaroso taputumiu noridi. ¹³ Osemo dala nalumbu ala kadamiu nakejo ledo matepakodu, tapi maroso mpanjili.

Kita masipato matuvu ante pokainggu nagasa sabana kitamo nidekeika nu Alatala PojanjiNa nabaru

¹⁴ Komiu kana mompasimbuku matuvu mosinggabelo ante pura-pura tona. Bo pasimbuku muni matuvu magasa, sabana tona ledo nagasa katuvuna ledo ntotto mamala manggita i Pue. ¹⁵ Jagaimo! Nee sampe maria komiu moura momparasaya bo mompoara kabelo rara nu Alatala. Nee sampe maria tona majadi mpo tuda-tuda nelangu ri tatangamiu, anu nompakasusa todea ante racuna, sampe nadea tona nikeni rira dosa. ¹⁶ Nee sampe maria tona mosipogau nte tona ledo bereina mboto. Bo nee sampe maria tona moinggu mpo i Esau, apa ia aga nompekirika kasana karonu ri dunia hitu bo ledo nipekirikana dota nu Alatala. Kalumbuana † nisulakana sanjuraya kande. ¹⁷ Nisanimiu mbotomo, naupu sia, tempo ia nerapi kalumbuana haitu lako nte tuamana, ia nipoara ntuanama naupa niperapina nte tangi. Domo nikavana dala mombabaliki sala nipoviana.

† Kalumbuana haitu belo rakavana lako nte tuamana sabana ia ana lumbua. *Peinta Kamus.*

Pojanji nu Alatala nokolu ri Bulu Sinai nosisala mpuu nte PojanjiNa purina ri Bulu Sion

¹⁸ Sampesuvu-sampesuvu, ledo nirasaimiu anu nira-sai ntoIsrael nggaulu tempo nitarimara Pojanji nu Alatala nokolu. Ira nakava nantingayo bulu anu namala ratui, haitumo Bulu Sinai nikavaya nu apu. Nikitara landa mpirika bo kulimu, bo nirasaira poiri narimboso. ¹⁹ Niepera moni tabue namangga mpuu bo niepera suara notesa. Nangepe suara haitu, naeka mpuumo ira sampe niperapira ante mpuu-mpuu ala suara haitu domo motesa ka ira. ²⁰ Apa ledo nipakulera nangepe parenta nitesa nu suara haitu, ivei: "Ane maria komiu atau binatangiu makava mombatui bulu hitu, ia kana rarempe ante vatu sampe mamate."[†] ²¹ Anu nikitara hamai mpuu-mpuu nompakaviora rarara sampe i Musa nanguli, "Yaku mpuu-mpuu naeka bo nolete."

²² Tapi ledo ivesia komiu. Komiu nantarima pojanji nu Alatala nabaru, komiu nantingayo Bulu Sion, ngata nu Alatala anu matuvu sampe ri kasae-saena, haitumo ngata Yerusalem ri suruga. Komiu nantingayo nenjobu-njobu malaeka anu nasiromu madamba-damba. ²³ Bo komiu nantingayo todea topomparasaya Alatala. Ira nireke ana-ana lumbua nu Alatala ^{††} bo sanga-sangara nitulisi riaru buku nu Alatala ri suruga. Komiu nantingayo Alatala, Topotangara pura-pura manusia. Bo komiu nantingayo nyawa-nyawa ntona nanao anu namatemo, anu najadi nagasa. ²⁴ Bo komiu muni nantingayo i Yesus, Topetariolo anu nompasiayu pojanji nabaru haitu. Bo komiu nantingayo raa nipatiti i Yesus anu nabelopa pade raa i Habel. [‡]

Nee mompoara belo nu Pojanji nabaru

²⁵ Jadi sampesuvu-sampesuvu, pakabelo-belo, nee sampe komiu ledo madota mangepe tesa niuli nu Alatala ka komiu. Apa isema-sema ledo nadota mangepe pepatora nu Alatala anu nipapola Nabi Musa ri dunia bara ipia, ira ledo rakabasaka lako ri pehuku nu Alatala. Nemopa kita anu nangepe Ia notesa lako ri suruga! Ane kita ledo madota mangepe Ia, natantumo kita muni ledo rakabasaka lako ri pehukuNa. ²⁶ Tempo nggaulu ri Bulu Sinai suara nu Alatala namangga sampe nombagoya tana. Tapi sii-sii Ia nojanji ivei: "Sangganipa bara maipia kana Kugoya tana, bo ledo aga tana tapi langi muni."^{‡‡} TesaNa "sangganipa" haitu, batuana, pura-pura anu nipajadiNa kana ragoy-

[†] Pesuvu 19:12-13 ^{††} ana-ana lumbua nu Alatala: Ana lumbua ntoYahudi nireke ana pokona. Ia nanggava nadeapa mbara-mbara bo nadeapa belo pade tueina. Pura-pura ana-ana nu Alatala nireke ana lumbuaNa sabana pura-pura nanggava belo masipato ka ana lumbua. [‡] Raa i Habel nerapi ala dosa ntuakana rabalasi, (peinta Kajadia 4:8-10), tapi raa i Yesus nombampungi dosata. ^{‡†} Hagai 2:7

aNa bo rapakalipoNa ala aga anu ledo nogoya maboli.

²⁸ Jadi haitu sampe kita masipato manguli tarima kasi nte Alatala, sabana Ia nombadekei loga ka kita majadi todea riaru PoparentaNa bo PoparentaNa haitu ledo ntoto mogoya. Bo kita kana metupu nte Alatala ante cara nipodambaNa. Kita kana mekou nte Ia bo maeka movia anu ledo nipokonoNa. ²⁹ Apa Alatala anu nisombata, mombahuku tona nompoara kabeloNa, nasimbayu mpo apu mepalabu.

Pokainggu anu nompakadamba Alatala

13 Komiu topomparasaya, jadi komiu kana batebatena mosimpotove mpo tona nosampesuvu.

² Nee makaja raramiu mantarima torata makava ri banuamiu naupa torata haitu ledo nisanimiu, sabana nariamo sanu tona nantarima bo nantande torata ledo nisanira, tano mai toratara haitu malaeka nu Alatala. ³ Toramo bo tulungimo tona nitarunggu evamo komiu mboto nitarunggu nosanggani-nggani ante ira. Bo toramo bo tulungimo tona nipakasusa sabana pomparasayara, evamo kasusamiu mboto.

⁴ Ponjamboko kana rabilamiu pura-pura. Nee mompakagero ponjambokomiu ante mompogau tona ledo bereimiu mboto, sabana Alatala mombahuku tona nompogau tona ledo bereina mboto.

⁵ Nee mompotove doi gaga sampe komiu aga natuvu mangelo doi. Tapi kana maosa raramiu ante anu naria nte komiu. Apa Alatala mboto nanguli ivei: "Ledo ntoto Kupalaisi iko."^{‡‡} Haitu sampe kita mabia manguli ivei:

"Tupumo Topotulungi yaku, jadi ledo maeka yaku. Ledo ria nuapa-nuapa mamala rapovia ntona ka yaku."

Mazmur 118:6

Pasialamo pokainggu pakeni-pakenimiu bo matundu nte ira

⁷ Pekirikamo katuvu pakeni-pakeni anu nanggeni Tesa nu Alatala ka komiu bara ipia. Pariarantaimo jonjo katuvura bo kamatera, bo pasialamo pomparasayara. ⁸ Toramo! I Yesus Kristus ledo nabali-bali, lako ri nggauluname sampe sii-sii bo sampe ri kasae-saena. ⁹ Nee sampe komiu masalandala lako ri pepatuduki nakana ante mangoseaka mpengaya-ngaya pepatuduki anu nontani lako ri pomparasayata, evamo pepatuduki atura-atura pangande. Nadea tona bara ipia nangoseaka atura-atura pangande, tapi atura haitu ledo nanggeni belo ka topangoseakana. Aginapa kita mompakaroso rarata mompekirika kabelo rara nu Alatala, apa haitumo anu nanggeni belo ka kita.

¹⁰ Kita topomparasaya naria lanta pesomba, haitumo kayu salib i Kristus anu namate nombasompo dosata.

^{‡‡} Ulangan 31:6,8; Yosua 1:5

Topanggeni pesomba ri Banua Petupu ntoYahudi nita-gi mangande bau lako ri binata nisambale raposompo dosa. Ivesia muni tona da nangoseaka atura-atura pesomba agama Yahudi, ledo mamala manggava belo lako ri kamate i Kristus. ¹¹ Nangoseaka Atura-atura agama Yahudi, raa lako ri binata nisambale majadi pesomba posompo dosa, kana rakeni nu Pakeni nTopanggeni Pesomba riara Tombi Nelabi Kagasana. Bo karobata nu binata haitu kana rapalabu ri savaliku ngata. ¹² Ivesia muni najadi ante i Yesus. Ia nikeni ri savaliku bobaa ngata Yerusalem bo nipatesi. Ia namate ala raaNa majadi pesomba posompo dosa anu nompakalali dosa ntodeaNa. ¹³ Sabana haitu, kita kana mesuvu hau nte Ia ri savaliku ngata, nasadia rasalai nosanggani-nggani nte Ia. Batuana, kita kana mombakabasaka anu nioseakata nggaulu bo aga momparasaya i Yesus, nau bara isema manjalai kita. ¹⁴ Apa ri dunia hitu ledo ria ponturota naroo, tapi kita nanjarumaka ponturo nabelopa ri suruga ri tempo maka-va.

¹⁵ Jadi ante petulungi i Yesus, kita kana masaro manggeni pesombata ka Alatala. Kita kana mombat-oiya Ia bo manguli tarima kasi ka Ia, apa haitumo nireke pesombata. ¹⁶ Bo nee rakalingasita mositulungi bo movia anu nabelo, sabana haitu muni nireke pesombata anu nompakadamba rara nu Alatala.

¹⁷ Oseakamo parenta-parenta nu pakeni-pakenimiu bo pekoumo nte ira, sabana iramo nombajagai pomparasayamiu. Makava tempona bara maipia ira kana manguli pakalanto ri ngayo nu Alatala berimbana komiu nikeniakara. Jadi pekoumo nte ira ala ira mala mantui pokarajaa haitu ante damba nu rara. Ane

† Basa Yunani: Naria lanta pesombata anu ledo nasimbayu nte lanta pesomba riara Banua Petupu ntoYahudi. Bo topanggeni pesomba nokarajaa ri Banua Petupu ntoYahudi ledo namala mangande kande nipesomba ri lanta pesombata haitu.

komiu ledo mekou, aga masusa rarara bo haitu ledo manggeni belo ka komiu.

¹⁸ Sampesuvu-sampesuvu, posambayakamo kami. Nisani kami, rara ntai kami nagasa apa kami batena madota mokainggu nabelo riara mpengaya-ngaya.

¹⁹ Bo kuperapi ante mpuu-mpuu raraku ala komiu momposambayaka yaku, ala yaku masalisa rakeni nu Alatala manjili tou nte komiu.

Tesa kaupuna

²⁰⁻²¹ Alatala nompakatuvu mpanjili Tuputa Yesus lako ri kamateNa. Jadi Ia najadi Topoevu nakuasa anu nompoevu kita bimba-bimbaNa. RaaNa nipatiti nompakaasa pojanji nu Alatala ante kita, bo pojanji haitu rapake sampe ri kasae-saena. Kuperapi Alatala, puna katuvua nabelo, mompakagana pura-pura anu nabelo niparaluumiu, ala rapakulemiu movia dotaNa. Kuperapi Ia manggeni komiu movia anu nipokonoNa ante petulungi i Yesus Kristus. Iamo masipato ratoiyata bo rabilata sampe ri kasae-saena. Amin!

²² Sampesuvu-sampesuvu, kuperapi nte komiu posabaramo mangepe tesa nitulisiku hitu, sabana suraku hitu ledo nandoe ntoto. ²³ Kana rasanimiu, sampesuvuta i Timotius nikabasakamo lako ri tarunggu. Ane masalisa ia tumai nte yaku, kukeni ia mosanggani-nggani nte yaku tou mosinggava nte komiu.

²⁴ Pakavote tabe kami ka pura-pura pakenimiu bo ka pura-pura todea nu Alatala ri situ. Bo tarimamo tabe lako nte sampesuvuta sampomparasaya ri propinsi Italia.

²⁵ Kuperapi Tupu mombadekei belo ka komiu pura-pura.

19-May-2009@12:42, Backup Description=19-May-2009@09:53, snave -

26-May-2009@11:04, Backup Description=26-May-2009@11:03, B Altork -

Yakobus

Vamba nu Tesa

Topotulisi sura hitu i Yakobus. I Yakobus hitu bara tuei i Pue Yesus (Matius 13:55; Galatia 1:19). I Yakobus hitu pakeni ntodea topomparasaya anu nisani ntodea ri ngata Yerusalem (Suro-Suro 21:18; Galatia 2:9). Sura hitu nitulisina ka topomparasaya Alatala nakamburaka ri njumangu dunia (1:1).

Riara sura hitu, i Yakobus nombatesa pokainggu ntona anu mpuu-mpuu noagama ri panggita nu Alatala (1:27). Niulina: ane raulita kita nomparasaya Alatala tapi ledo nioseakata dotaNa, pomparasayata haitu ledo ria gunana (2:14-26). Riara sura hitu nadea pangajari rakavata anu noguna riara nggatuvuta eo-eo.

Isi nu Sura

Pantepuuna (1:1)

Pomparasaya bo noto pompekiri (1:2-8)

Tona napakasi bo tona nakalumana (1:9-11)

Pesori (1:12-18)

Epemo bo poviamo (1:19-27)

Nee mompelenje (2:1-13)

Pomparasaya kana mosinggeni nte pokainggu nabelo (2:14-26)

Potesa masipato ka topomparasaya (Pasal 3)

Topomparasaya kana matundu nte Alatala (4:1-5:6)

Mpengaya-ngaya pangajari (5:7-20)

1 Sura hitu lako nte yaku, i Yakobus. Yaku batua nu Alatala bo batua i Pue Yesus Kristus. Nadea tabe ka komiu todea nu Alatala ri njumangu dunia. †

Kana madamba tempo nipesori, bo perapi noto lako nte Alatala

² Sampesuvu-sampesuvu, ane komiu mambela mpengaya kasusa bo pesori, kana madamba raramiu.

³ Sabana, nisanimiu ane maroo pomparasayamiu tempo nipesori, komiu majadi maroso bo rapakulemiu mantingayo nuapa-nuapa. ⁴ Bo ane komiu bate-bate-na momparasaya sampe ri kaupuna, pomparasayamiu mpuu-mpuu majadi maroso bo ledo makura nuapa-nuapa.

⁵ Ane makura noto pompekirimiu, perapimo lako nte Alatala. Bo radekeiNa pompekiri nanoto niperapimiu, sabana najoi raraNa nombadekei noto ka pura-pura tona. Ledo ntoto natove raraNa. ⁶ Tapi ane komiu merapi nte Alatala, komiu kana mpuu-mpuu momparasaya bo nee monggai raramiu. Apa tona nonggai rarana nasimbayu mpo balumba ri tasi niburu mpoiri hau tumai. ⁷⁻⁸ Tona ivehaitu nopenga pekirina, ledo natantu nuapa rapoviana. Haitumo sampe ia ledo ma-

† *nadea tabe ka komiu todea nu Alatala ri njumangu dunia. Ri naskah basa Yunani: nadea tabe ka sapulu randua valaa ntoIsrael ri njumangu dunia.*

mala manjarumaka manggava nuapa-nuapa lako nte Tupu.

Tona napakasi bo tona nakalumana

⁹ Sampesuvu-sampesuvu sampomparasaya, ane komiu mapepa, kana madamba raramiu, sabana nau napakasi katuvumiu, Alatala nompakaoge komiu.

¹⁰ Ane komiu makalumana, kana madamba muni raramiu, sabana Alatala nompakaede raramiu. Apa nisanimiu tona nakalumana nasimbayu mpo sese nggavoko, aga sampalai katuvura. ¹¹ Tempo peindo nu eo napane, kavoko haitu nalele sampe naronto sese-na, bo naronto puramo rambana. Ivesia muni ante tona nakalumana. Sanggani tempo riara popaelona, mamate muni ia.

Kana maroso pomparasaya tempo nipesori

¹² Nabelo mpuu tona naroso rarana riara kasusa bo pesori! Ane maroso rarana sampe ri kaupu pesori haitu, Alatala nombadekei katuvu nabelo ka ia sampe ri kasae-saena. Katuvu nabelo haitu nijanji nu Alatala ka tona nompotove Ia. ¹³ Ane kita rapesori movia anu nadaa, nee raulita pesori haitu nakava lako nte Alatala. Haitu ledo nakana, apa Alatala ledo mamala rapesori movia anu nadaa, bo ledo muni Ia mompesori kita

movia anu nadaa. ¹⁴ Pura-pura tona nipesori movia anu nadaa tempo ia nitaja bo nikeni dota pompekirina mboto anu nadaa. ¹⁵ Ane dota pompekirina nadaa haitu raoseakana, ia madosa. Ane ia batena movia dosa, ia mamate bo rapopogaa lako nte Alatala sampe ri kasae-saena.

¹⁶ Sampesuvu-sampesuvu nipotoveku, nee rabagiu! *Alatala ledo nompesori kita movia anu nadaa.* ¹⁷ Pura-pura pedekei nabelo, anu ledo ria galona nadaa, naka-va lako nte Alatala ri suruga. Ia nompajadi pura-pura anu nareme ri langi. Vayo-vayo najadi lako ri reme haitu nasaro nabali, tapi Ia ledo nabali. Ia bate-batena nabelo. ¹⁸ Lako ri dotaNa mboto Ia nompajadi kita majadi ana-anaNa ala kita maogepa pade pura-pura anu ntanina nipajadiNa bo rapatani ka Ia mboto. Kita najadi ana-anaNa sabana kita nompariara tesaNa nakana.

Kana raoseakata tesa nu Alatala, ledo aga raepeta bayangi

¹⁹ Sampesuvu-sampesuvu nipotoveku, pariaramo pakabelo-belo tesaku hitu. Kita kana masadia mangepe, tapi nee kaliu-liu motesa, bo nee masalisa marau. ²⁰ Apa ane kita marau, ledo rapakuleta movia belo anu mompakadamba rara nu Alatala. ²¹ Jadi, kabasaka puramo kabiasamiau naruto bo nadaa. Pakaede raramiu bo pariaramo tesa nu Alatala anu nitudaNa riarantaimiu. Apa tesa haitu nakuasa mompakasalama komiu.

²² Jadi oseakamo tesa nu Alatala, bo nee aga raepe bayangi. Apa ane aga raepe bayangi, komiu nombabagiu karomiu mboto. ²³ Isema-sema nangepe tesa nu Alatala bo ledo nioseakana, ia nasimbayu mpo tona nanggita lenjena mboto ri pompevayo; ²⁴ nalaipa ia, nalingamo rarana berimba lenjena mboto. ²⁵ Atura nu Alatala nagana mpuu bo naria kuasana mombakabasaka manusia lako ri dosa. Isema-sema nompariara pakabelo-belo bo batena nangoseaka Atura nu Alatala, bo ledo aga neepe bayangi bo nalinga, iamo radekeika nu Alatala belo riarabara nuapa-nuapa rapoviana.

²⁶ Isema-sema nanguli iamo tona naroso poagamana, bo ledo nijagaina tesana, ia nombabagiu karonamboto. Agamana ledo naria gunana. ²⁷ Tapi poagama nakana, anu ledo rasalai nTuamata Alatala, haitumo nantulungi ngana-ngana pailu bo timbaltimbala nasusa, bo nombajagai karo mboto ala ledo mangoseaka pokainggu nadaa nipovia ntona anu ledo nosisani nte Alatala.

Topomparasaya ledo nompelenje

2 Sampesuvu-sampesuvuku, komiu nompapasaya i Yesus Kristus, Tuputa nakuasa, jadi nee aga mompelenje. ² Rapana komiu masiromu mosambaya bo

makava tona nakalumana nompake sinji bulava bo baju naramba. Bo makava muni saito tona napakasi nobaju ranta. ³ Rapana komiu aga mombabila tona naramba bajuna bo manguli ka ia, "Kamaimo, Tua. Monturo ri ponturo nabelo hitu." Tapi tona napakasi aga raulikamiau, "Peangga situmo iko, bara ponturomo ri jaula ri sii." ⁴ Batuana komiu nompoposisala singgamanusiamiu bo najadi topotangara anu nadaa pekiri-na.

⁵ Sampesuvu-sampesuvu nipotoveku, epemo pakabelo-belo! Tona napakasi ri dunia hitu nipelisi nu Alatala. Nau ledo nadea kakalumanara ri dunia hitu, ira nipelisi nu Alatala majadi tona naoge pomparasayara. Iramo majadi todea riarapoparenta nu Alatala nangoseaka anu nijanjiNa ka tona nompotove Ia. ⁶ Tapi nau ivesia, da nisalaimiupa ira bo tona nakalumana nibilamiau. Tano mai, tona nakalumana nantamanaka komiu bo nangumbunjai komiu hau ri ngayo ntopotangara! ⁷ Tona nakalumanamo nanjalai sanga anu nipakaogeta, haitumo sanga nTuputa!

⁸ Nabelo pokaingguta ane nioseakata atura nu Magauta anu nibacata riarabuku Gasa ivei: "Potovemo roamiu nasimbayu mpo pompotovemiu karomiu mboto." ⁹ Ane komiu aga nompelenje tona, komiu novia dosa, apa niliunakamiau atura nu Alatala.

¹⁰ Apa ane rapasimbukuta mangoseaka pura-pura atura nu Alatala, bo nau aga sangaya raliunakata, nasimbayu mpo niliunakata pura-pura atura haitu. ¹¹ Rapana. Alatala nanguli, "Nee mobualo", bo niuliNa muni, "Nee mepatesi". Jadi nau komiu ledo nobualo, tapi ane mepatesi, komiu muni najadi topombaliunaka atura nu Alatala. ¹² Jadi komiu kana mombajagai pakabelo-belo tesamiau bo pokainggumiu. Apa komiu nangoseaka atura nu Alatala anu nakuasa mombakabasaka manusia lako ri kuasa dosa. ¹³ Isema-sema ledo naasi matana nanggita roana, Alatala ledo maasi mataNa manggita ia. Ane tona naasi matana nanggita roana, ledo paraluu ia maeka apa ia ledo rahuku nu Alatala.

Pomparasaya kana mosinggeni nte pokainggu nabelo

¹⁴ Sampesuvu-sampesuvuku, nuapa gunana kita nanguli kita nompapasaya Tupu, tano pokaingguta ledo nangoseaka dotaNa? Mamala pomparasaya ivehaitu mompakasalama kita? ¹⁵ Rapana maria roa sampomparasaya nandasa sabana ledo ria ponapana bo ledo nagana kandeana eo-eo. ¹⁶ Bo rapana kita aga manguli ka ia, "Pakabelo-belo ri dala! Kusarumaka komiu manggava ponapa nabelo bo kande rakande sampe mabosu." Tapi ane kita ledo mompakagana ka ia anu niparaluuna riaranggatuvuna, tesata haitu ledo ntoto naria gunana! ¹⁷ Ivesia muni ante pomparasaya. Ane raulita kita nompapasaya Tupu, tano pokaingguta

ledo nangoseaka dotaNa, pomparasaya ivehaitu ledoria gunana!

¹⁸ Bara rauli ntona ivei: naria tona nanjarumaka pomparasayana. Bo naria muni tona nanjarumaka pokaingguna. Tapi kuuli ka komiu, ledora rapakulemiu mompopakita pomparasayamiu ka yaku ane ledora nabelo pokainggumiu. Tapi ante pokaingguku nabelo, rasanimumo yaku mpuu-mpuu nomparasaya.

¹⁹ Komiu nomparasaya aga saito Alatala. Haitu nabelo, tapi seta-seta muni nomparasaya Alatala aga saito bo ira nolete naviora! ²⁰ Nadoyo mpuu komiu ane raulimiu naganamo pomparasaya bayangi, ledora paraluu mokainggu nabelo! Ledoria gunana pomparasaya ivehaitu. ²¹ Toramo Nabi Abraham, totuata nggaulu. Ia nireke nanao ri panggita nu Alatala sabana pokaingguna nabelo, haitumo tempo nidekeina anana i Ishak ka Alatala ri bavo lanta pesomba. ²² Lako rahaitu nisanita pomparasaya Nabi Abraham nasinggeni ante pokaingguna, bo pokaingguna haitu nompakalanto ia mpuu-mpuu nomparasaya. ²³ Jadi haitu nompakadupa tesa nitulisi ri Buku Gasa ivei:

"I Abraham nomparasaya Alatala, bo lako ri pomparasayana haitu ia nireke nanao ri panggita nu Alatala."

Kajadia 15:6

Haitumo sabana Nabi Abraham niuli vega nu Alatala.

²⁴ Jadi sampesuvu-sampesuvu, nalantomo ka kita, tona nireke nanao ri panggita nu Alatala sabana *pomparasayana nasinggeni nte* pokaingguna nabelo, ledora aga pomparasayana bayangi.

²⁵ Ivesia muni tesa i Rahab, bajinga *lako ri ngata Yerikho* nggaulu. Ia nireke nanao ri panggita nu Alatala sabana pokaingguna. I Rahab nantarima mata-mata ntoYahudi riaru banuana bo nitulungina ira nalai lako ri ngata haitu moliu ri dala ntanina. ²⁶ Jadi, sampesuvu-sampesuvu, ane domo naria nosa ri karota, namatemo kita, bo domo naria gunana. Ivesia muni pomparasayata. Ane pomparasayata ledora nasinggeni ante pokainggu nabelo, pomparasayata haitu nasimbayupmo tomate, domo naria gunana.

Topomparasaya kana mombajagai tesana

3 Sampesuvu-sampesuvuku, nee madea komiu madota majadi guru agama, apa nisanimiu mantamopa potangara nu Alatala ka guru pade ka tona ntanina. ² Kita pura-pura nasaro novia mpengayangaya pokainggu nasala. Tapi tona ledora sanggani nasala tesana, iamo tona nagasa, bo nipakulena nombakuasai pura-pura dota nu rarana.

³ *Anu nakodi namala nombakuasai anu nambaso.* Kita nombadika sama nakodi ri nganga jara mbaso alaroseakana dotata bo kita namala nomparenta jara haitu. ⁴ Ivesia muni kapala rantasi. Nau nambaso

mpuu kapala bo narimboso poiri, kapala haitu mamala ragoliaka nu guli nantuntuni dota ntopompajala kapala haitu. ⁵ Ivesia muni ante dilata. Naupa dilata nakodi, namovo mpuu pekeniakana! Nau pangale naluo mpuu, namala rakande nu apu sakide. ⁶ Ivesia muni tesa nisovadaka nu dilata. Tesata nasimbayukadaana ante apu. Dilata nompopesuvu mpengayangaya anu nadaa, nelabipa pade sipa-sipa ntanina ri karota. Tesa-tesa nisovadaka nu dilata nasimbayupmo apu lako ri narakaa nompakadaa pura-pura katuvuta.

⁷ Pura-pura binata mamala rapakanondo, bara tonji, bara binata nenjoyo, bara bau riaru nu uve. Bo naria mami tona natau nompakanondo ira. ⁸ Tapi ledoria saitoa tona nompakule nombakuasai dila manusia! Dila manusia haitu nadaa mpuu, ledora namala nikuasai. Tesa-tesa nisovadaka nu dilata nasimbayupmo racu nepakamate. ⁹ Ante tesata kita nombatoiya Tuamata Alatala, bo ante tesata muni kita nopindasi singgamanusiata anu nipajadi nu Alatala nangoseaka lenjeNa mboto! ¹⁰ Lako ri sumba nesuvu posukuru bo tesa-tesa pepindasi. Sampesuvu-sampesuvuku, ledora masipato dilata mombasovadaka singgani-nggani anu nabelo bo anu nadaa. ¹¹ Ledora naria mata nu uve nompopesuvu uve namoli bo uve napai nosinggani-nggani! ¹² Ivesia muni ante kayu. Ledoria kayu ara novua vua zaitun, bo ledora muni naria anggur novua vua ara. Mata nu uve napaga ledora muni nompopesuvu uve namoli. *Jadi ane kita nombatoiya Alatala bo mombapindasi singgaroata, ledora masipato!*

Noto pompekiri nabelo nakava lako nte Alatala

¹³ Ane maria nte komiu tona nabelo pekirina bo nanoto rarana, ia kana mompopakita notona ante pokaingguna nabelo. Noto pompekirina haitu kana rapopakitana ante pokainggu nabelo anu neumba lako ri kaede rarana, mpo masipato ka tona nanoto rarana. ¹⁴ Tapi ane komiu aga nasiriati, bo aga nompekirika karomiu mboto, nee rakalanga raramiu bo manguli nanoto pekirimiu. Apa inggumiu haitu nosisala ante pepatuduki nakana. ¹⁵ Noto pompekiri ivehaitu ledora nopuna lako nte Alatala, tapi aga nopuna lako ri dunia nadaa hitu, lako ri dota rarata nadaa, bo lako ri seta-seta. ¹⁶ Ane naria tona nasiriati bo aga nompekirika karona mboto, natantu naria muni posinggarau bo mpengayangaya pokainggu nadaa.

¹⁷ Tona naria noto pompekirina anu nopuna lako nte Alatala, iamo tona nagasa rarana, ledoria pokainggunanadaa. Ia natuvu nosinggabelo ante tona ntanina bo nalusu rarana. Ia ledora nasombo tapi nasadia nantarima tesa lako nte tona ntanina. Naasi mpuu matana nanggita roana napakasi, bo nadea poviana nabelo. Ia ledora nompelenje, bo nanao rarana. ¹⁸ Ane tona natuvu nosinggabelo nte roa bo nompoposinggabelo tona

† Yosua 2:1-21

ntanina, masae-sae madea tona mangoseaka dota nu Alatala.

Kita kana matundu nte Alatala, nee mangoseaka dota rarata nadaa

4 Nakuya sampe komiu nosinjanai bo nosinggarau? Posinjanai bo posinggarau neumba lako ri dota raramiu anu nadaa. Dota rara nadaa haitu nosieva riaru ntaimiu sampe nanggeni komiu novia nadaa. ² Nau naoge raramiu manggava, ledο nikavamiu anu nipodotamiu, jadi komiu nepatesi. Komiu nasiriati ka mbara-mbara ntona ntanina, tapi ledο nikavamiu. Jadi komiu nosinggarau bo nosinjanai. Sampesuvu-sampesuvu, ledο nikavamiu anu nipodotamiu sabana ledο niperapimiu nte Alatala. ³ Tapi nau damo niperapimiu, ledο muni nikavamiu, sabana patujumiu nerapi nasala. Komiu aga nomperapi anu mompakasana karomiu mboto.

⁴ Komiu nasimbayu mpo topobualo apa komiu ledο natutu nangoseaka Alatala. Ledο nisanimiu? Ane rapoinota anu nipodota ntona nadaa ri dunia hitu, kita majadi bali nu Alatala. Isema-sema mompoino anu nipoino ntona nadaa ri dunia hitu, ia nompajadi karonu mboto bali nu Alatala. ⁵ Nee rapekirimiu anu niuli ri Buku Gasa ledο nakana. Niuli ivei: Alatala nompajadi rara ntaita tapi rara ntaita haitu nadea mpuu nipoinona. ⁶ Tapi Alatala nombatulungi kita lako ri kabelo nu raraNa. Bo petulungiNa haitu naogepa pade pura-pura anu nipoinota. Haitumo sampe naria tesa nitulisi riaru Buku Gasa ivei: "Alatala nangeva tona nalanga rarana, tapi tona naede rarana nipoasiNa." ††

⁷ Sampesuvu-sampesuvu, komiu kana matundu nte Alatala. Evasimo Magau nu Seta, bo malai ia lako nte komiu. ⁸ Pekitulungimo nte Alatala bo Alatala mpuumpuu nombatulungi komiu. Komiu topovia dosa, tumo movia dosa. Komiu toporompenga pekiri, pakasangumo pekirimiu mangoseaka Alatala. ⁹ Komiu kana mpuumpuu manjoso raramiu bo motumangi masusa rara mantoraka dosamiu. Ledο mabelo komiu mongiri bo madamba, kana masusa rara bo motumangi. ¹⁰ Komiu kana mompakaede raramiu ri ngayo nu Alatala bo Ia mompakaoge komiu.

Nee mompakasala roa sampomparasaya

¹¹ Sampesuvu-sampesuvu, nee mosisalai. Isema-sema nanjalai bo nompakasala roana sampomparasaya, ia nanjalai bo nompakasala atura nu Alatala. Ane komiu mompakasala atura nu Alatala, natantumο komiu ledο topangoseaka atura, tapi topotangara atura haitu. ¹² Kakanana aga Alatala nakuasa mom-

† Alatala nompajadi rara ntaita tapi rara ntaita haitu nadea mpuu nipoinona. Alatala nompajadi rara ntaita bo rara ntaita haitu nipoinoNa mpuu. †† Amsal 3:34

badekei atura ka manusia bo mompakasala manusia. Aga Ia nakuasa mompakasalama kita, bara mombahuku kita. Jadi ledο masipato kita mompakasala roata sampomparasaya!

Nee rakalingasi dota nu Alatala riaru niata

¹³ Sampesuvu-sampesuvu anu nalanga rara, epemo tesaku hitu! Komiu nanguli, "Eo hitu bara maile kami manggalivo hau ri anu bo monturo sumai sampae kasaena modaga bo mompaelo doi." ¹⁴ Tapi ledο nisanimiu nuapa majadi riaru nggatuvumiu maile! Katuvumiu ri dunia hitu nasimbayu mpo sumoa, sampalai kodi nikita, nalipomo. ¹⁵ Aginapa komiu manguli ivei: "Ane rapodota nTupu, kami matuvu bo movia anu hitu, bara anu haitu." ¹⁶ Tapi ledο ivesia tesamiu. Komiu aga nalanga raramiu bo nangoe ka poviamiu mboto. Pokainggu ivehaitu nadaa!

¹⁷ Ane nisanita anu nabelo paraluu rapoviata, tapi ledο nipoviata, kita nadosa.

Pepainga ka tona nakalumana

5 Sampesuvu-sampesuvu anu nakalumana, epemo tesaku! Komiu kana mantete motumangi, apa komiu rapambela kasusa bo kapari! ² Kakalumanamiu malipo. Ponapamiu rakande nu saipa. ³ Bulava bo sala-ka nipasiromumiu rakande ntagara. Bo kakalumanamiu natagara haitu majadi tandana komiu aga nompasiromu mbara-mbara nadea ri dunia tano naparamo kaupu nu dunia Siamu sabana sampe mandasa mpuu komiu, nasimbayu mpo anu nikande nu apu! ⁴ Topokarajaa ri taluamiu ledο nitambomiu. Peintamo kandasara! Topokarajaa haitu nekakai nerapi tulungi bo pekakaira niepe nTupu Alatala anu nakuasa. ⁵ Komiu nasimbayu mpo japi nipakaboya rasambale. Katuvumiu ri dunia nelabi kaganana bo doimiu aga nipakemiu nompebasa masana-sana ri dunia hitu. Tapi kaupuna komiu rahuku. ⁶ Haitu mpuumpuu majadi sabana komiu nombahuku bo nompatesi tona anu ledο nasala bo ledο nompakule mangeva komiu.

Kana mosabara tempo nipandasa, apa domo masae makava Tupu

⁷ Sampesuvu-sampesuvuku, komiu kana mosabara sampe makava Tupu. Peintamo posabara ntopotuda, ira nompopea sampe naria vuana nisarumakara. Ira nosabara nompopea uda anu mompakatuvu tuda-tudara. ⁸ Komiu muni kana mosabara bo maroo rara, apa naparamo eo kakava nTupu. ⁹ Nee mongalu bo mosipakasala, ala komiu ledο rahuku nu Alatala. Toramo! Domo masae makavamo Ia nombatangara manusia.

¹⁰ Sampesuvu-sampesuvu, oseakamo jonjo nabi-nabi nggaulu anu nompasimbayu tesa nu Alatala. Ira bate-

na nosabara bo naroo rarara tempo nombarasai kasusa bo kapari. ¹¹ Iramo niuli ntona nasana sabana karoo rarara tempo nirasaira susa bo pari. Nisanimumo tesa posabara Nabi Ayub nggaulu. Ia naroo rarana riarara kasusa bo kapari, bo kaupuna Tupu nompakabelo mpanjili katuvuna. Apa Tupu nabelo ranaNa bo naasi mpuu mataNa nanggita kita!

Nee mosumpa

¹² Sampesuvu-sampesuvu, paraluu mpuu rapari-aramiu hitu: nee mompakaroso tesa ante sumpa. Nee mosumpa manggasangai langi bara tana bara nuapanuapa ntanina. Ane patujumiu manguli iyo, naganamo raulimiu "iyo". Ane patujumiu manguli ledo, naganamo raulimiu "ledo". Nee mosumpa ala komiu ledo rahuku nu Alatala.

Pepangajari mosambaya

¹³ Ane maria komiu nambela kasusa, ia kana mosambaya. Ane maria tona nadamba, ia kana modade mantoiya Tupu. ¹⁴ Ane maria tona nadua, ia kana mompokio topanggeni agama mosambaya ka ia. Ira kana mombagese tona nadua haitu ante lana bo mekakai nte Tupu. ¹⁵ Ane ira mosambaya bo mpuu-mpuu mom-

parasaya, Tupu mompakabelo dua ntona haitu. Bo ane maria dosa nipoviana, Tupu mombaampungi ia. ¹⁶ Haitumo sabana komiu kana mangaku salamiu, bo mosiposambayaka, ala duamiu rapakabelo.

Posambaya ntona nanao nabisa mpuu. ¹⁷ Toramo Nabi Elia nggaulu. Ia manusia biasa, nasimbayu mpo kita. Ia nosambaya ante mpuu-mpuu rarana ala ledo mauda. Bo mpuu-mpuu ledo nauda talu-mpae santanga kasaena. ¹⁸ Naupu sia, nosambaya vai ia pade naka-va uda lako ri langi bo tuda-tuda ntona naria vaimo aselena.

¹⁹ Sampesuvu-sampesuvuku. Ane maria roamiu nasalandala lako ri pepatuduki nakana, bo maria roana manggeni ia manjili ri dala nakana, haitumo pokainggu nabelo. ²⁰ Tona nompakeni roana nadosa haitu manjili lako ri dalana nasala, ia mompakasalama roana haitu lako ri pehuku nu Alatala sampe ri kasae-saena, bo dosana nadea raampungi.

Taba lako nte yaku,
Yakobus

19-May-2009@12:42, Backup Description=19-May-2009@09:53, snave -
26-May-2009@11:04, Backup Description=26-May-2009@11:03, B Altork - ❖❖❖

1 Petrus

Vamba nu Tesa

Topotulisi sura hitu i Petrus, saito lako ri sapulu randua anaguru i Yesus. Nipakatuna sura hitu ka topomparasaya anu nonturo ri bagia Asia Kodi. (Peinta gambarana ngata ri kuli nu buku.) Tempo haitu ira nombarasai kasusa bo kapari sabana ira nangoseaka i Yesus. Jadi patuju sura hitu ala mompakaroso pomparasayara ala mosabara riara kasusa haitu. I Petrus nompopatora ka ira Kareba Belo anu nombatesa i Yesus Kristus. Ia namate, natuvu mpanjili, bo makava mpanjili. Nipopatorana pura-pura belo rakavara sabana anu nipovia i Kristus, jadi haitumo sabana naria panjarumakara naroso. Niulina patuju nu kasusa haitu ala rasani kaliangu nu pomparasayara, bo niulina rakavara tambo tempo i Yesus makava mpanjili. Jadi ira kana mosabara bo maroo rarara tempo nirasaira kasusa, nangoseaka jonjo i Kristus.

Niulina muni ane kita nombarasai kasusa bo kapari sabana nangoseaka i Yesus, kita kana mekou nte Alatala bo matutu mokainggu nabelo (4:19). Bo mpengaya-ngaya pepatuduki ntanina nitulisina ala mompakaroso rarata manjarumaka Alatala, bo mokainggu mabelo anu masipato ka todea nu Alatala.

Isi nu Sura

Petabe (1:1-2)

Alatala kana ratoiya sabana nidekeiNa ka kita panjarumaka naroso (1:3-12)

Kita nipatuduki mokainggu mabelo sabana kita todea nu Alatala (1:13-2:10)

Pepatuduki mokainggu nabelo riara dunia nadaa; mekou nte pomarenta; pepatuduki ka potudua, topoberei, bo pura-pura topomparasaya (2:11-3:12)

Pepatuduki ka tona nombarasai susa bo pari sabana pangoseakara i Kristus (3:13-4:19)

Pepatuduki ka pakeni ntodea topomparasaya bo ka todea biasa (5:1-11)

Petabe kaupuna (5:12-14)

Petabe

1 ¹⁻² Sampesuvu-sampesuvu anu nipelisi majadi todea nu Alatala bo nonturo mpo topesovo nasimptare ri umba-umba ri propinsi Pontus, Galatia, Kapadokia, Asia bo Bitinia:

Sura hitu lako nte yaku i Petrus, suro i Yesus Kristus. Kuperapi Alatala mpuu-mpuu mabelo nte komiu bo mompakatinonto raramiu.

Komiu nipelisi nTuamata Alatala majadi todeaNa nangoseaka niaNa mboto lako ri lamba pamulana. Bo Nosa Gasa nompakajadi komiu todea nagasa, nipatani ka Alatala, ala komiu matundu nte i Yesus Kristus bo dosamiu raampungina sabana raaNa natiti ri kayu salib.

Kita masipato mantoiya Alatala sabana nidekeiNa panjarumaka naroso ka kita

³ Masipato kita mombatoiya Alatala, Tuama nTuputa Yesus Kristus! Nambaso mpuu asi mataNa ka kita, sampe nidekeiNa katuvu nabaru ka kita. Bo katuvu nabaru haitu nitarimata sabana i Yesus Kristus ni-

pakatuvu mpanjili lako ri kamateNa. Haitumo sabana panjarumakata naroso. ⁴ Kita nanjarumaka manggava belo nipakasadia nu Alatala ka pura-pura todeaNa. Belo haitu ledo magero, ledo mapopo, ledo mabali, bo nijagaiNa ri suruga ka kita. ⁵ Sampesuvu-sampesuvu, komiu masipato mantarima belo haitu, sabana komiu nomparasaya i Yesus. Bo komiu batena nijagai nu Alatala ante kuasaNa ala komiu mamala mombarasai belo anu nasadiamo radekeiNa ka komiu ri kaupu nu dunia.

⁶ Komiu kana madamba-damba sabana belo nisaru-makamiu haitu. Komiu kana madamba naupa sii-sii tempo komiu da natuvu ri dunia komiu nombarasai kasusa bo nambela mpengaya-ngaya pesori. ⁷ Patuju nu pesori-pesori haitu ala rasani kaliangu pomparasayamiu. Bulava nigonu ante apu ala rasani bara maria galona bara ledo. Pomparasayamiu noalipa pade bulava anu namala magero. Jadi pomparasayamiu kana rapesori muni ante mpengaya pesori. Bo ane pomparasayamiu mpuu-mpuu maliangu, komiu ratoiya bo rabila bo rapakaoge tempo i Yesus Kristus makava mpanjili ri dunia. ⁸ Nau ledo nikitamiu Ia bara ipia, komiu nompotove Ia. Bo nau ledo nikitamiu

miu Ia sii-sii, tapi komiu batena nomparasaya Ia. Bo kadamba raramiu naoge mpuu sampe ledo rapakule mombasovadakana. ⁹ Nadamba mpuumo raramiu sabana nitarimamiumo asele pomparasayamiu, haitumo komiu nipakasalama lako ri pehuku sampe ri kasae-saena.

¹⁰⁻¹¹ Nabi-nabi nu Alatala nggaulu nangelo pakabelo-belo ala rasanira berimba Alatala mompakasalama manusia. Nibotora belo nidekei nu Alatala ka komiu, anu nirasaimiu sii-sii. Nosa Gasa i Kristus riaru ntaira nompopaisani ka ira kasusa bo kapari anu mambela ka i Kristus, bo nipopaisaniNa muni kuasa bo kaoge rakava i Kristus maliu kasusa bo kapari haitu. Tapi dopa nisani nu nabi-nabi berimba kadupa nu tesa-tesa nibotora. Haitumo sampe niparesara pakabelo-belo ala rasanira tempona bo berimba kadupana pura-pura anu nibotora haitu. ¹² Bo Alatala nompakalanto ka ira anu nibotora haitu ledo nosinggambela ante ira mboto tapi nosinggambela ante komiu anu natuvu sii-sii. Kajadia-kajadia nibotora haitu, nipatolele ntopanggeni Kareba Belo ka komiu sii-sii. Nikenira kareba haitu ante petulungi Nosa Gasa nu Alatala, anu nipopanau lako ri suruga. Kakanana malaeka-malaeka nTupu mboto nadota mangisani batuana kajadia-kajadia pangane anu nipatolele ka komiu.

Kita nipokio nu Alatala ala kita matuvu magasa

¹³ Sampesuvu-sampesuvu, naria mamimo panjaru-makata naroso. Sabana haitu, komiu kana mompakan-oto raramiu bo mainga, bo maroo manjarumaka belo radekei ka komiu tempo i Yesus Kristus makava mpanjili. ¹⁴ Komiu kana matuvu mpo ana-ana nu Alatala anu natundu nte Ia. Nee mangoseaka dota raramiu nadaa anu nombakuasai komiu tempo komiu da natuvu ri kalandana. ¹⁵ Tapi komiu kana magasa ri mpengayangaya anu nipoviamiu, sabana Alatala muni nagasa bo Iamo nompokio komiu majadi todeaNa. ¹⁶ Apa naria tesa nu Alatala riaru Buku Gasa nanguli, "Komiu kana mokainggu magasa, sabana Yaku nagasa." †

¹⁷ Sampesuvu-sampesuvu, komiu nanggasangai Alatala Tuamamiu tempo komiu nosambaya. Jadi komiu kana matuvu mekou nte Ia ane komiu da nonturo mpo topesovo ri dunia hitu. Apa Iamo mombat-angara pura-pura tona nangoseaka pokainggura mboto bo Ia ledo nompelenje. ¹⁸ Pekoumo nte Alatala sabana nisanimiu mbotomo sompo nibayariNa mombakabasaka komiu lako ri katuvumiu nggaulu. Katuvumiu ledo ria gunana haitu, nipasialamiu lako nte ntoutua nggaulu. Tapi Alatala nombakabasaka komiu lako ri katuvumiu nokolu haitu. Sompo ledo nibayariNa ante mbara-mbara anu ledo nainti evamo bulava atau salaka ¹⁹ tapi nibayariNa ante anu nelabi noali, haitu-

† *Imamat 11:44-45; 19:2*

mo raa i Kristus. I Kristus nireke mpo ana bimba nadoli bo ledo nasala nisambale manjambei komiu. ²⁰ Dopame dunia nipajadi, Ia nipakatantu nu Alatala mami majadi topantolo dosa manusia. Bo ri tempo sii-sii napara kaupnu nu dunia Ia nakava ri dunia hitu mompakasalama komiu. ²¹ Iamo sampe komiu nomparasaya Alatala. Alatala nompakatuvu mpanjili Ia lako ri kamateNa bo nombadekei kuasa bo kaoge nipokumaaka ka Ia. Jadi haitumo sampe komiu nomparasaya bo nanjarumaka Alatala.

²² Sampesuvu-sampesuvu, katuvumiu nipakagasamiu sabana komiu nangoseaka pepatuduki nakana. Haitumo sampe komiu namala nompotove sampesuvumiu sampomparasaya ante rara naliangu. Sabana haitu, posipotovemo ante rara mpuu-mpuu.

²³ Apa komiu nipajadi nu Alatala manusia nabaru, bo katuvumiu nabaru haitu ledo nopuna lako ri manusia anu mamate. Katuvumiu nabaru nopuna lako nte Alatala anu ledo mamate. Komiu nanggava katuvu nabaru haitu sabana komiu nomparasaya Tesa nu Alatala anu natuvu bo naroo sampe ri kasae-saena.

²⁴ Riaru Buku Gasa nitulisi ivei:

"Katuvu manusia pura-pura nasimbayu mpo kavoko, bo pura-pura kuasa bo kagayana mpo sese nggavoko.

Kavoko haitu nalele bo sesena naronto.

²⁵ Tapi Tesa nu Alatala bate-batena sampe ri kasae-saena."

Yesaya 40:6-8

Tesa nu Alatala haitumo Kareba Belo anu nipatolele ka komiu.

2 Sampesuvu-sampesuvu, nikavamiumo katuvu nabaru. Sabana haitu, tumo mokainggu nadaa. Nee modava. Nee aga mabelo ri sumba, nee masiriati bo nee mompakadaa tona ntanina. ² Ngana kodi dako nesuvu naino rarana nantomi uve njusu ntinana. Ivesia muni komiu kana maino rara mangepe Tesa nu Alatala anu najadi kandeana nagasa ka nyawamiu. Ivesi-amo posisanimiu nte Alatala mantambai maroso, sampe ratarimamiu pura-pura belo nipakasadiaNa ka tona nipakasalamaNa. ³ Komiu kana maino ka Tesa nu Alatala, apa nirasaimiu mamimo kabelo rara i Pue.

I Yesus nirapaka vatu pandasi naroso bo kita mpo vatu-vatu niposisunju ri bavona

⁴ Jadi pekoumo nte i Yesus! †† Ia nirapaka vatu natuvu anu nipoara nu manusia sabana nisarumakara ledo ria gunana. Tapi Alatala nompelisi vatu haitu sabana haitu vatu tobelona ri panggitaNa. ⁵ Komiu muni nasimbayu mpo vatu-vatu natuvu, jadi dekei Alatala mompake komiu majadi banua petupu ka Ia. Bo riaru banua petupu haitu komiu majadi mpo topanggeni pesom-

†† *Jadi pekoumo nte i Yesus! Basa Yunani: Manggaparai Ia!*

ba, anu natuvu nipatani ka Alatala. Bo komiu namala metupu nte Ia ante pekeniaka Nosa Gasu. Petupumiu haitu najadi pesomba anu rapokonoa rara nu Alatala sabana anu nipovia i Yesus Kristus. ⁶ Apa riaru Buku Gasu naria tesa nu Alatala ivei:

“Epemo! Yaku nompelisi sangu vatu noali mpuu bo vatu haitu nituuKu ri ngata Sion majadi vatu pandasi nelabi karosona.

Isema-sema manjarumaka vatu haitu, ledo ntoto manjoso rara.”

Yesaya 28:16

⁷ I Kristus, anu nirapaka vatu haitu, noali mpuu ka komiu topomparasaya. Tapi ane tona ledo nomparsaya, ia nasimbayu mpo anu nitulisi riaru Buku Gasu ivei:

“Vatu nipoara ntopovia banua, vatu haitumo anu nopokopa ka banua haitu.”

Mazmur 118:22

⁸ Bo naria tesa ntanina ri Buku Gasu ivei:

“Vatu haitu nompakatepasunu tona. Vatu haitu nompakadungga ira.”

Yesaya 8:14-15

Ira natepasunu sabana ira ledo nadota nangoseaka Tesa nu Alatala, bo haitumo bagiara nipakatantu nu Alatala ka ira.

⁹ Tapi sampesuvu-sampesuvu, komiu ledo mpo ira haitu. Komiumo todea nipelisi nu Alatala. Komiumo nipelisi majadi mpo topanggeni pesomba anu mantulungi magau. Komiumo todeaNa nipatani ka Ia, komiumo najadi bagiaNa. Komiu nipelisi nu Alatala mompatolele panggaviaNa anu nipokumaaka ka tona ntanina. Iamo nompokio komiu mesuvu lako ri kalandana ala matuvu riaru karemeNa anu nabelo mpuu. ¹⁰ Bara ipia komiu ledo todeaNa, tapi sii-sii komiu najadi todeaNamo. Bara ipia komiu ledo nipoasi mataNa, tapi sii-sii nirasaimiumo asi nu mataNa!

Kita kana matuvu ante pokainggu masipato ka tona najadi batua nu Alatala

¹¹ Sampesuvu-sampesuvu nipotoveku, katuvuta ri dunia hitu nasimbayu mpo topesovo bo torata anu nonturo aga sampalai. Jadi yaku mpuu-mpuu nerapi nte komiu, nee raoseakamiu dota rara nadaa anu batena nangeva nyawamiu *nangoseaka dota nu Alatala*. ¹² Komiu kana matuvu ante pokainggu nabelo mpuu ri tatanga ntona ledo nosisani nte Alatala. Ane mabelo pokainggumiu, nau rasalaira komiu bo raulira komiu novia anu nadaa, tapi kaupuna kana rapan-gakura nabelo pokainggumiu, bo ratoiyara Alatala tempo Ia makava.

¹³ Pekoumo nte pura-pura topoparenta nipakatantu nu manusia, sabana haitumo nipodota i Pue. Pekoumo nte magau mbaso apa ia nalangapa ntur-

ona. ¹⁴ Bo pekoumo nte gubernur-gubernur sabana iramo nipopale nu magau mbaso mombahuku tona nadaa bo mombatoiya tona nabelo pokaingguna.

¹⁵ Alatala nompokono komiu mokainggu nabelo ala tona nadoyo anu ledo nisanina nuapa-nuapa domo mabia manjalai komiu, apa malantomo pesalaira haitu ledo nakana. ¹⁶ Komiu kana matuvu mpo tona nikabasaka lako ri pehuku nu dosa. Tapi nee sampe haitu majadi loga ka komiu movia anu nadaa! Komiu kana matuvu mpo batua nu Alatala anu natundu nte Ia. ¹⁷ Bilamo pura-pura tona. Potovemo sampesuvumiu sampomparasaya. Pekoumo nte Alatala bo bilamo magau!

Kana mosabara riaru kasusa: jonjo lako ri katuvu i Yesus Kristus

¹⁸ Komiu anu najadi potudua kana mekou nte tuamiu bo mpuu-mpuu mombabila ia, nau ia tona nanondo bo nalusu rara, nau ia tona nasoa. ¹⁹ Ane komiu rapan-dasa nau komiu ledo nasala, bo komiu mosabara riaru kasusa haitu sabana nitoramiu dota nu Alatala, komiu ratoiya nu Alatala. ²⁰ Ane komiu raboba sabana komiu nasala, bo ane komiu mosabara riaru kasusa haitu, ledo masipato komiu ratoiya nu Alatala! Tapi ane komiu rapandasa sabana pokainggumiu nabelo, bo ane komiu mosabara riaru kasusa haitu, komiu mpuu-mpuu ratoiya nu Alatala. ²¹ Alatala nompokio komiu mosabara riaru kasusa, nau komiu ledo nasala. Apa i Kristus nombarasai kasusa ala manggeni belo ka komiu, bo nidekeiNa jonjo ka komiu ala komiu mompasiala pokaingguNa. ²² Ia ledo sanggania novia dosa, ledo sanggania Ia nodava. ²³ Tempo Ia nislai ntona, ledo nibalasiNa. Tempo Ia nipandasa, Ia ledo nesava. Tapi Ia aga nanjarumaka Alatala, Topotangara nanao anu manjaliku Ia. ²⁴ I Yesus mbotomo nanjimbuka dosa-dosata tempo Ia nipaku ri kayu salib, ala kita rakabasaka lako ri kuasa nu dosa bo matuvu mangoseaka dota nu Alatala. Bo kita nipakabelomo lako ri baka-baka i Kristus. ²⁵ Tempo bara ipia, komiu mpo bimba-bimba nasalandalamo. Tapi sii-sii komiu nipopanjlilimo nte Topoevu anu nombajagai katuvumiu.

Pepatuduki ka topoberei

3 Ivesia muni komiu totua-totua mombine kana mekou nte bereimiu langgai. Apa ane bereimiu ledo nomparsaya tesa nu Alatala, pekoumiu haitu mamala mompakeni ia momparasaya. Ledo paraluu raulimiu nuapa-nuapa ka ia, ² sabana ane rakitana komiu nekou nte Alatala bo nokainggu nagasa, ia muni madota momparasaya. ³ Nee sampe kagayamiu aga ri savalikuna, evamo nompegaya buluamiu bara nompake ramba-ramba bulava bara pakea nasuli-suli. ⁴ Tapi kagayamiu kana mopuna lako riaru ntaimiu, hai-

tumo lako ri inggumiu nalusu bo natinonto. Haitumo kagayana anu ledo ntoto malipo bo noali mpuu ri panggita nu Alatala. ⁵ Mombine-mombine nagasa anu nanjarumaka Alatala tempo nggaulu, nekou nte bereira langgai. Ivesiamo nipakagayara karora. ⁶ Jon-jona, i Sara nanturusi anu niuli i Abraham ka ia bo nanggasangai i Abraham “i tua”. Bo komiu masimbayu nte i Sara ane komiu batena mokainggu mabelo bo ledo maeka ka nuapa-nuapa.

⁷ Ivesia muni komiu totua-totua langgai. Komiu kana matuvu mosangani-nggani ante bereimiu ante pokainggu nanoto. Toramo, mombine ledo nasimbayu karosona ante langgai. Bilamo ira sabana ira muni nidekeika nu Alatala katuvua nabelo sampe ri kasae-saena nasimbayu mpo komiu langgai. Bilamo ira ala ledo maria nuapa-nuapa mombalava posambayamiu.

Kita pura-pura kana matuvu mosangu rara bo batena movia anu nabelo

⁸ Jadi sampesuvu-sampesuvu, kupapolamo tesaku. Komiu pura-pura kana mosangu pekiri bo mosangu rara. Posimpotovemo mpo tona nosampesuvu. Komiu kana mosipoasi mata bo nee malanga rara. ⁹ Ane maria tona movia anu nadaa nte komiu, nee rabalasi ira ante anu nadaa. Ane rasalai ntona komiu, nee rapesava. Agina komiu merapi Alatala mombadekei belo ka ira. Apa komiu nipokio nu Alatala manggeni belo ka tona ntanina, ala komiu manggava belo lako nte Ia. ¹⁰ Riaru Buku Gasa nitulisi ivei:

“Isema-sema madota matuvu madamba bo mombarasai katuvua mabelo, ia kana mombajagai dilana ala nee motesa anu nadaa bo nee modava.

¹¹ Ia kana mombakabasaka pokaingguna nadaa bo movia anu nabelo.

Ia kana mangelo posinggabelo bo mompasimbuku matuvu mosinggabelo ante tona ntanina.

¹² Apa Tupu batena nompariara tona nanao anu nangoseaka dotaNa, bo Tupu nasaro nangepe posambayara.

Tapi nievaNa tona nokainggu nadaa.”

Mazmur 34:13-17

Kana mosabara ane mombarasai kasusa sabana pokaingguta nabelo

¹³ Ane komiu masaro mokainggu nabelo, isema movia anu nadaa ka komiu? ¹⁴ Tapi nau komiu mombarasai kasusa sabana pokainggumiu nabelo, mauntu mpuumo komiu! Nee maeka ka tona, bo nee makini raramiu. ¹⁵ Tapi bilamo i Kristus riara ntaimiu bo pakaoge Ia sabana Ia Tupumiu nagasa. Bo ane rapekutana ntona komiu, nuapa sabana komiu nanjarumaka i Pue, komiu kana masadia mesana ka ira.

Bo pesanamiu haitu kana rapovia ante ede rara bo ante tesa-tesa nalusu. ¹⁶ Bo komiu kana matuvu ante rara ntai nagasa, mbelaka maria tona manjalai pokainggu nabelo nipoviamiu sabana pangoseakamiu i Kristus, ira kana maeya mboto.

¹⁷ Aginapa kita mombarasai kasusa sabana pokaingguta nabelo, ane ivesia mami dota nu Alatala, pade mombarasai kasusa sabana pokaingguta nadaa. ¹⁸ Apa i Kristus muni nombarasai kasusa nau ledo novia anu nadaa. Ia aga sanggani namate nombasompo dosa manusia nagana sampe ri kasae-saena. Ia ledo nasala, tapi Ia namate nanjambei kita anu nasala, ala momposinggabelo kita ante Alatala. Ia nipatesi tapi nipakatuvu mpanjili ante kuasa Nosa Gasa nu Alatala. ¹⁹ Pade Ia nikenika nu Nosa Gasa hau nompatolele Tesa lako nte Alatala † ka nyawa-nyawa ntomate anu nitarunggu ri ponturo ntomate, ²⁰ haitumo nyawa ntona anu ledo natundu nte Alatala †† tempo Nabi Nuh nggaulu. Tempo Nabi Nuh da novia kapala, naoge mpuu posabara nu Alatala mompopea ira majea lako ri dosa-dosara. Tapi tempo uve nanggabuntu nompakalodo isi dunia, aga uvalu tona nesavi kapala haitu. Bo kapala haitu noliu ri uve oge sampe ira uvalu nipakasalama.

²¹ Uve oge haitu nirapaka ada pediu anu nompakasalama kita sii-sii. Ada pediu haitu ledo ada pompegasa tapa lako ri karota, tapi tandana kita topan-goseaka i Yesus. Ada haitu nireke pojanjita nte Alatala ala kita mangoseaka Ia sabana niampungina dosata. ‡ Bo niampungina mpuu dosata sabana i Yesus natuvu mpanjili lako ri kamateNa. ²² Bo i Yesus neore hau ri suruga bo sii-sii nonturo ri ponturo nibila ri panggana nu Alatala bo nomporenta nosangani-nggani nte Ia. Bo pura-pura malaeka bo topoparenta bo tonakuasa ri laerava natundu nte Ia.

Topomparasaya kana matuvu mangoseaka dota nu Alatala

4 Kristus mboto nombarasai kasusa bo kapari tempo Ia natuvu ri dunia hitu. Jadi haitumo sabana komiu muni kana mompakaroo raramiu ala masadia mombarasai kasusa bo kapari nasimbayu mpo Ia. Apa isema-sema nombarasai kasusa bo kapari ri karona mboto domo nadota novia dosa. †² Jadi da natuvu ri-

† Ia nipatesi tapi nipakatuvu mpanjili ante kuasa Nosa Gasa nu Alatala. ¹⁹ Pade Ia nikenika nu Nosa Gasa hau nompatolele Tesa lako nte Alatala/ATAU: KaroNa nipatesi tapi nyawaNa nipakatuvu ¹⁹ bo nyawaNa hau nompatolele Tesa lako nte Alatala. †† hau nompatolele Tesa nu Alatala ka nyawa-nyawa ntomate anu nitarunggu ri ponturo ntomate ²⁰ haitumo nyawa ntona anu ledo natundu nte Alatala/ATAU: hau nompatolele Tesa nu Alatala ka malaeka-malaeka nitarunggu, ²⁰ haitumo malaeka anu ledo natundu nte Alatala. ‡ ada haitu nireke pojanjita nte Alatala ala kita mangoseaka Ia sabana niampungina dosata. ATAU: ada haitu nireke pomperapita nte Alatala ala raampungina dosata. †† domo nadota novia dosa. domo ria posidaina nte dosa.

ara dunia hitu, komiu kana matuvu mangoseaka dota nu Alatala, nee mangoseaka dota rara manusia anu nadaa. ³ Apa naganamo logamiu bara ipia nangoseaka pokainggu-pokainggu ntona ledos nosisani nte Alatala. Bara ipia komiu aga natuvu nangoseaka dota raramiu nadaa ante pokainggu naruto, komiu nabiasa nalan-gu-langu, komiu nasiromu nangande mpebasa bo nanginu, bo komiu nompakande tupu-tupu ntanina, pokainggu anu nepakarunggu. ⁴ Tapi sii-sii nahera roa-roamiu sabana komiu domo nangoseaka ira nompebasa nokainggu nadaa ante ledos ria rekena, bo haitumo sabana nisalaira komiu. ⁵ Tapi makava tempona, ira kana mompangaku poviara nadaa haitu ri ngayo nu Alatala. Bo Alatala nasadiamo mombatangara pura-pura tona, nau tona da natuvu bo muni tona namatemo. ⁶ Haitumo sampe Kareba Belo nipatolele muni ka tona namatemo. Ira namatemo sabana pehuku nu Alatala, nasimbayu nte pura-pura manusia ntanina. Tapi Kareba Belo nipatolele ka ira ala nyawara mamala matuvu mabelo mangoseaka dota nu Alatala.

Topomparasaya kana matuvu mosangu rara bo mositulungi

⁷ Naparamo kaupu nu dunia. Jadi komiu kana mainga bo mompakanoto raramiu ala komiu mamala mosambaya. ⁸ Tapi anu nelabi nopoko, komiu kana mpuu-mpuu mosimpotove. Apa ane kita mompotove roata, kita masadia muni mombaampungu tona ntanina. ⁹ Komiu kana majole mantarima torata riaru banuamiu bo nemo mongau-ngau.

¹⁰ Kita simbo nidekeika pompakule ledos nasimbayu lako nte Alatala, bo kita kana mompake pakabelo pompakule nipatava ka kita mombatulungi tona ntanina. ¹¹ Jonjona, isema-sema nidekeika pompakule mompasimbayu Tesa nu Alatala kana motesa mpo tona niposumba nu Alatala mboto. Isema-sema nidekeika pompakule mantulungi tona ntanina, kana mantulungi ante karoso nidekei nu Alatala ka ia. Pake-mo pompakule-pompakule haitu ala nau damo nuapa majadi, Alatala ratoiya bo rabila sabana anu nipovia i Yesus Kristus ri katuvumiu. Alatalamo nakuasa bo masipato ratoiya bo rabila sampe ri kasae-saena. Amin!

Pepatuduki ka tona nombarasai susa bo pari sabana pangoseakara i Kristus

¹² Sampesuvu-sampesuvu nipotoveku, nee mahera komiu nombarasai susa bo pari nantamo mpuu, mpo kapane nu apu. Haitu najadi mompakaliangu pomparasayamiu. Nee mahera bo nee rapekirimiu kasusa nirasaimiu haitu ledos ria kasimbayuna. ¹³ Kakanana komiu kana madamba, sabana komiu nombarasai kasusa bo kapari nasimbayu mpo anu nirasai i Kristus

mboto. Apa ane komiu nombarasai susa bo pari mpo nirasai i Kristus, mambaso mpuu kadamba nu raramiu tempo Ia makava mpanjili. Tempo haitu, kaoge i Kristus anu nipokumaaka rapopakita ka pura-pura manusia. ¹⁴ Ane komiu rasalai ntona sabana komiu nangoseaka i Kristus, kana masana mpuumo komiu. Apa ane komiu rasalai sabana pomparasayamiu, batuana Nosa Gasu nu Alatala anu nakuasa, naria mpuu riaru nggatuvumiu. ¹⁵ Nee sampe maria komiu mombarasai kasusa sabana nepatesi bara nangangga bara novia anu nadaa atau nombagalo urusa ntona ntanina. ¹⁶ Tapi ane komiu mombarasai kasusa sabana komiu topomparasaya, nee maeya matamiu. Ulimo tarima kasi ka Alatala, apa komiu mpuu-mpuu topangoseaka i Kristus.

¹⁷ Nakavamo tempona Alatala mombatangara pura-pura manusia. Bo kita todeana mboto mokolu ratangaraNa. Ane kita todeana mokolu ratangaraNa natan-tu mantamo mpuumo pehukuNa ka tona ledos nadota nomparasaya Kareba Belo lako nte Ia! ¹⁸ Riaru Buku Gasu nitulisi ivei:

"Iyapa tona nanao nakaja rapakasalama,
Nemopa tona nadosa anu ledos natundu nte Alatala!"

Amsal 11:31

¹⁹ Jadi sampesuvu-sampesuvu, ane dota nu Alatala komiu kana mombarasai kasusa bo kapari, nee menonto movia nabelo. Sarumakamo Alatala manjaliku komiu. Apa Iamo nompajadi komiu, bo Ia namala raparasaya mompakadupa pojanjiNa ka komiu.

Pepatuduki ka pakeni ntodea topomparasaya bo ka todea biasa

5 Naria muni anu kuuli ka komiu pakeni ntodea topomparasaya! Yaku nabia notulisi ka komiu sabana yaku muni pakeni ntopomparasaya, bo yaku mboto nanggita kasusa bo kapari nirasai i Kristus bara ipia. Bo ane i Kristus makava mpanjili bo mompopakita kuasaNa bo kaogeNa ka pura-pura manusia, yaku muni manggava bagia ri kuasaNa bo kaogeNa haitu. Jadi yaku mpuu-mpuu nerapi nte komiu ² ala komiu mompiara todea nu Alatala anu niparasayaka komiu, nasimbayu mpo topoevu mompiara bimba-bimbana. Piaramo ira ante damba rara, nangoseaka dota nu Alatala, nemo mpo tona nipasuu. Bo nee aga mangelo untu ka karomiu mboto, tapi tuimo pokarajaa haitu sabana komiu mpuu-mpuu madota mantulungi todea topomparasaya. ³ Bo nee damo dota-dota mompatundu topomparasaya anu niparasayaka komiu, tapi nabelopa komiu majadi jonjo anu masipato rasialara. ⁴ Bo tempo i Kristus, Topoevu Nopoko, makava mpanjili ri dunia, radekeiNa ka komiu tambo, haitumo bagia ri kuasaNa bo kaogeNa anu ledos maupu-upu. †

⁵ Ivesia muni komiu da namuda. Komiu kana mekou nte totua. Bo komiu topomparasaya pura-pura kana mompakaede raramiu bo mositulungi. Apa nitulisi rira Buku Gasa:

“Alatala nangeva tona nalanga rarana, tapi nipoasiNa tona naede rarana.”

Amsal 3:34

⁶ Jadi sampesuvu-sampesuvu, pakaedemo raramiu, bo pekoumo nte Alatala naroso ala rabilaNa komiu ri tempo nipakatantuNa. ⁷ Dekeimo pura-pura kakini raramiu ka Ia apa Ia bate-batena nompariara komiu.

⁸ Komiu kana mainga bo manoto rara, sabana balimiu, Magau nu Seta hau tumai nasimbayu mpo singa nongao-ngao nompengavu tona rasakana. ⁹ Tapi nee raepe ia! Aginamo komiu batena momparasaya bo mangoseaka Alatala apa nisanimiu mbotomo topomparasaya ri umba-umba ri dunia nombarasai susa bo pari nasimbayu mpo komiu muni. ¹⁰ Komiu kana mombarasai susa, tapi ledo masae. Maliu haitu Alatala mboto mompakagana nuapa-nuapa nakura nte komiu. Ia mompakaroo raramiu sampe ledo maria tona ntanina mamala mompopolengga atau mompopoura pomparasayamiu. Alatala mpuu-mpuu mompakaroso komiu apa nabelo mpuu raraNa bo Iamo nompokio komiu manggava bagia ri kuasaNa bo kaogeNa sampe ri kasae-saena sabana komiu nosangu

† *basa Yunani: radekeiNa ka komiu songgo magau (mahkota) bo penggilana ledo mabali-bali*

rara ante i Kristus. ¹¹ Iamo nakuasa sampe ri kasae-saena. Amin!

Petabe kaupuna

¹² Yaku notulisi sura nambuku hitu ante petulungi i Silas †, sampesuvuta sampomparasaya. Nisaniku ia namala raparasaya. Patujuku notulisi sura hitu ala mompakaroso raramiu bo mompakalanto ka komiu Alatala mpuu-mpuu nompotove bo nombatulungi kita evamo nitesaku pangane. Jadi komiu kana batena manjarumaka pepotoveNa haitu.

¹³ Tabe lako nte sampesuvumiu sampomparasaya anu naria ri sii ri ngata Babilon ††. Ira muni nipelisi nu Alatala nasimbayu mpo komiu. Bo tabe muni lako nte anaku i Markus. ¹⁴ Posipakabotemo tabe ante tove, mpo tona nosampesuvu sampomparasaya.

Kuperapi Alatala mombadekei katinonto ka komiu pura-pura anu nosangu rara ante i Kristus.

Tabe lako nte yaku,
Petrus

19-May-2009@12:42, Backup Description=19-May-2009@09:53, snave -

26-May-2009@11:04, Backup Description=26-May-2009@11:03, B Altork - ❖❖❖

† *i Silas biasa muni niuli Silvanus †† ngata Babilon: nantuntuni panggava ntona anu nangisani Buku Gasa, ngata Babilon haitu ngata Roma.*

2 Petrus

Vamba nu Tesa

Sura i Petrus karanduana hitu nipakatu ka pura-pura todea topomparasaya. Tempo haitu, nadea guru agama nompatuduki pepatuduki nasala. Pepatudukira haitu nanggeni tona nokainggu nadaa. Jadi i Petrus nompaigna topomparasaya ka guru-guru mpodava ivehaitu. Niulina topomparasaya kana mompasimbuku mokainggu nabelo, anu masipato ka tona nipokio majadi todea nu Alatala. Bo topomparasaya kana manggangisi pepatuduki nakana ala ledo matekeni mangoseaka pepatuduki nasala. Pepatuduki nakana haitu nipasimbayu ntona anu nanggita i Kristus bo nangepe mboto tesaNa.

Guru-guru mpodava nanguli i Yesus ledo makava mpanjili ri dunia hitu (3:3-4). Jadi nipakalantona i Yesus mpuu-mpuu makava mpanjili mompakaropu dunia nadaa hitu (3:10). Alatala nosabara nte tona nadaa. DotaNa ala pura-pura manusia manggava loga majea lako ri dosara (3:10). Sia sampe i Yesus dopa nakava mpanjili.

Isi nu Sura

Petabe (1:1-2)

Kita kana mantambai pokainggu nabelo (1:3-21)

Kita kana mainga ka guru-guru mpodava (Pasal 2)

I Yesus mpuu-mpuu makava mpanjili ri dunia (3:1-13)

Pokainggu masipato ka kita topompopea kakava i Yesus mpanjili ri dunia (3:14-18)

Petabe

1 Sampesuvu-sampesuvuku anu mpuu-mpuu nomparasaya i Yesus Kristus, nasimbayu mpo kami. Iamo Alatala bo Topompakasalama kita, anu nompopompakule pura-pura kita nomparasaya sabana Ia nanoa bo ledo nompelenje.

Sura hitu lako nte yaku, i Simon Petrus. Yaku batua bo suro i Yesus Kristus. ² Kuperapi Alatala bate-batena mombadekei katinonto bo belo ka komiu, sabana komiu nosisani belo ante Ia bo ante Tuputa Yesus.

Katuvuta kana masipato ka tona nipelisi bo nipokio nu Alatala

³ Alatala nompake barakana mboto mombadekei pura-pura niparaluuta ala rapakuleta matuvu mangoseaka dotaNa. Nitarimata pura-pura haitu sabana kita nosisani ante Alatala, anu nompokio kita mombarasai kaogeNa bo kabeloNa. ⁴ Ivesia muni Alatala nombadekei ka kita pedekei-pedekei nijanjiNa, anu nabelo mpuu bo nelabi noguna. Ane rapaketa pedekei-pedekei haitu, domo raoseakata dota rarata nadaa ri dunia hitu anu nompakagero katuvu manusia, bo rapakuleta mompasiala inggu nu Alatala mboto.

† mombarasai kaogeNa bo kabeloNa. lako ri kaogeNa bo kabeloNa.

⁵ Alatala nabelo mpuu nte komiu, jadi haitumo sabana komiu kana mpuu-mpuu mompasimbuku ala pomparasayamiu mosinggeni nte pokainggu nabelo. Bo kana rasanimiu dota nu Alatala. ⁶ Komiu kana mombakuasai karomiu mboto bo mosabara nau bara nuapa majadi. Komiu kana batena matuvu mangoseaka dota nu Alatala, ⁷ bo mosimpotove nte sampesuvumi sampomparasaya. Bo komiu kana mompotove pura-pura tona. ⁸ Ane komiu noinggu ivehaitu bo mantambaipa, posisanimiu ante Tuputa Yesus Kristus mpuu-mpuu maria gunana, bo maria asele mabelo riarara nggatuvumiu. ⁹ Tapi tona ledo noinggu ivehaitu, pekirina nasimbayu mpo tona naburo matana, nalingamo rarana dosana nipegasa bara ipia.

¹⁰ Jadi sampesuvu-sampesuvu, pasimbuku mpuumo mokainggu mabelo ala malanto komiu mpuu-mpuu nipelisi nu Alatala bo nipokioNa majadi todeaNa. Ane inggu-inggu pangane ratambaika pomparasayamiu, natantu ledo ntoto moura pomparasayamiu, ¹¹ bo Alatala mboto mantarima komiu ante mabelo riarara Poparenta anu naroo sampe ri kasae-saena, haitumo Poparenta nTuputa Yesus Kristus, Topompakasalama kita.

Patuju i Petrus notulisi sura hitu

¹² Jadi sampesuvu-sampesuvu, nisanimiumo pura-pura anu nitesaku pangane, bo komiu naroo nan-

†† ledo moura pomparasayamiu ATAU: ledo manavu riarara dosa.

goseaka pepatuduki nakana anu nitarimamiu. Tapi naupa ivesia, yaku bate-batena mompopatora ka komiu pura-pura anu nitesaku haitu. ¹³ Nipekiriku ane yaku da natuvu †, masipato kupakaroso raramiu ante pepatoraku hitu. ¹⁴ Apa nisanikumomo domo masae yaku mamate ††, nangoseaka anu niuli nTuputa Yesus Kristus ka yaku. ¹⁵ Jadi kupasimbuku ala nau mamatemo yaku, komiu bate-batena mantora pura-pura tesa haitu.

I Petrus bo suru-suro ntanina nanggita kaoge i Kristus

¹⁶ Kami nompatuduki ka komiu kuasa nTuputa Yesus Kristus bo kakavaNa mpanjili ri dunia hitu. Pepatuduki kami haitu ledo nangoseaka patesa-patesa nipovia nu manusia. Tapi kami mboto nanggita kaogeNa anu nipokumaaka. ¹⁷ Apa kami mboto naria nosangangi-nggani nte Ia ri bavo nu bulu bara ipia tempo Ia nibila bo nipakareme nTuamata Alatala. Bo suara nu Alatala anu Neliu KaogeNa nanguli ivei: "Hitumo AnaKu nipotoveKu, Iamo nompakadamba raraKu." ¹⁸ Kami mboto nangepe suara lako ri suruga tempona kami nosangangi-nggani ante i Yesus ri bavo nu bulu nagasa. †

¹⁹ Naupu nikita kami anu najadi ri bulu haitu, nalanto mpuumo ka kami tesa nipasimbayu nu nabi-nabi nu Alatala nggaulu mpuu-mpuu nakana. Nabelo mpuu ane rapariaramiu tesa nu nabi-nabi haitu, sabana tesara nasimbayu mpo poindo nombavanta kalandana. Pariaramo tesara haitu sampe i Yesus makava mpanjili ri dunia mombavanta komiu ante remeNa, nasimbayu mpo eo bo betue pompaeo nebonda nombavanta dunia. ²⁰ Tesa nopoko kana ratoramiu haitumo: tesa-tesa niuli nu nabi-nabi riaru Buku Gasa, ledo mamala rabatuasi aga nangoseaka panggava mboto. ²¹ Apa nabi-nabi nombaboto tesa ledo nangoseaka dota nu manusia. Tapi Nosa Gasa nu Alatala nombakuasai tona ala rapasimbayura tesa lako nte Alatala mboto.

Topomparasaya kana mainga nte guru-guru mpodava

2 Tempo nggaulu naria nabi-nabi mpodava neumba ri tatanga ntodea nu Alatala. Bo ivesia muni siii, guru-guru mpodava meumba ri tatangamiu. Rak-enira pepatuduki nasala anu mompakagero pomparasaya ntona, bo rasapura i Kristus Tupura anu nombakabasaka ira lako ri kuasa nu dosara. Poviara mboto sampe ira rahuku masalisa. ² Nadea tona mompasiala pokainggu nu guru-guru gahaitu anu nangoseaka dota nu rarara nadaa. Bo pepatuduki nakana rasalai

† yaku da natuvu. Naskah basa Yunani: yaku da naria riaru tenda hitu. †† yaku mamate. Naskah basa Yunani: yaku mombalelaka tendaku. ‡ Matius 17:5 †† bulu nagasa: haitumo ri bulu tempo Nabi Musa bo Nabi Elia neonga nte i Yesus. Peinta Matius 17:1-5; Markus 9:2-7; Lukas 9:28-35. †† ledo namala rabatuasi aga nangoseaka panggava mboto ATAU: ledo aga panggava nu nabi mboto.

ntona sabana pokainggura haitu. ³ Guru-guru mpodava haitu nadoko doi. Haitu sampe ira aga mangelo untu lako nte komiu ante tesa-tesa ledo nakana, anu nikarara mboto. Tapi pehuku ka ira nasaemo nipakatantu. Ira rahuku nu Alatala bo tempona ledo raso-ro-soro.

⁴ Toramo! Alatala ledo nombakabasaka malaekamalaekana mboto lako ri pehuku tempo ira novia dosa, tapi ninavusakana ira riaru narakaa. Ira nisuaraka riaru bolo nalanda bo nirante hamai mompopea tempona ira rahuku ri Eo Potangara bara maipia.

⁵ Ivesia muni tempo Nabi Nuh. Alatala ledo nombakabasaka isi dunia nggaulu lako ri pehuku tempo nipakaropuNa ante uve oge sampe namate puramo tona ledo nangoseaka dotaNa. Aga i Nuh sambanua, haitumo aga ira uvalu nipakasalama sabana i Nuh nompatolele ka todea ira kana mokainggu mabelo bo mangoseaka dota nu Alatala. ⁶ Ivesia muni ante ngata Sodom bo Gomora. Alatala nombahuku tupu ngata nadaa haitu ante nompalabu ngatara. Haitu najadi pepatora ka tona ri puri anu ledo nangoseaka dota nu Alatala. ⁷ Tapi i Lot nipakasalamaNa lako ri pehuku haitu sabana ia tona nabelo. Nasusa mpuu rarana nanggita pokainggu nabuga bo naruto nipovia ntona nadaa haitu. ⁸ Apa i Lot haitu tona nabelo. Ia nonturo ri tatangara bo eo-eo nikitana bo niepena poviara nadaa sampe nasusa mpuumo rarana.

⁹ Jadi lako ri tesa pangane, nisanita Alatala nompakule mompakasalama topangoseaka dotaNa tempo ira manggava pesori. Bo nipakuleNa muni mombatavani tona nadaa sampe ira rahuku ri Eo Potangara.

¹⁰ Tona rahukuNa ivesia, nelabipa tona natuvu nangoseaka dota rarara nadaa bo nabuga, bo tona nanyapuaka kuasa nu Alatala mompamenta ira.

Pokainggu nu guru-guru mpodava

Guru-guru mpodava haitu nabia mpuu bo nalanga rarara. Ledo naeka ira nanjalai malaekamalaekana anu nipokumaaka. ¹¹ Malaekamalaekana nu Alatala narosopa bo nakuasapa pade guru-guru mpodava haitu. Tapi naupa ivesia, malaekamalaekana haitu ledo nanjalai malaekamalaekana nadaa ri ngayo nu Alatala ante tesa nadaa. ¹² Tapi guru-guru mpodava haitu nanjalai nuapa-nuapa ledo nisanira. Ira nasimbayu nte binata nasoa, anu aga nipoanaka rasaka bo rapatesi. Ira ledo nompekiri, aga natuvu nangoseaka dota-dota anu naria nte ira. Jadi lako ri pokainggura nadaa haitu, guru-guru mpodava kana rapakaropu nasimbayu nte binata-binata nasoa. ¹³ Ira rabalasi ante kasusa sabana nipakususara tona ntanina.

Nau eona, nadamba guru-guru mpodava novia mpengaya-ngaya nompakaosa dotara nadaa. Ira nan-

††† Kajadia 6:1-7:24 ††† Kajadia 19:24 § Kajadia 19:1-16

gande nosanggani nte komiu mpo tona nabelo, tano pokainggura mpuu-mpuu nepakaeya! Ira aga nadamba nompebasa nangoseaka dota rarara nadaa. ¹⁴ Ira bate-batena naino mompogau sambara mombine nikitara. Ledo nabasa-basa ira novia dosa! Ira nombaopa tona ledo naroso pomparasayana ala movia dosa. Bo najadi kabiasara nario mata ante ledo ria kabasa-basana. Ira mpuu-mpuu tona nasurukavu! ¹⁵ Nipalaisiramo dala nakana bo nasalandalamo ira. Nipasalara pokainggu i Bileam ana i Beor nggaulu. Ia aga naino ka doi rakavana lako ri poviana nadaa. ¹⁶ Keledai nipesavi i Bileam aga binata anu ledo notesa. Tapi Alatala nombadekei kuasa ka keledai haitu notesa ante suara manusia, bo keledai haitu nangontea i Bileam, nabi nadoyo. Jadipa domo nipapola i Bileam niana nadaa haitu.

¹⁷ Guru-guru mpodava haitu nasimbayu mpo mata nu uve naotimo. Ira nasimbayu mpo kulimu vuri aga niburu mpoiri narimboso. Alatala nompakasadia ponturo nalanda mpirika ka ira. ¹⁸ Apa ira nombasovadaka ante nalanga rara, tapi tesa-tesara ledo ria gunana. Ante tesara niopara tona dako nenonto novega nte roara nadaa pokaingguna. Tona haitu niopara ante nompadidisi dota rarara nadaa ala raoseakara mpanjili pokainggu nadaa anu dako nikabasakara. ¹⁹ Guru-guru haitu nojanji ivei: "Ane raoseakamiu pepatuduki kami, komiu makabasaka lako ri atura-atura! Komiu mamala movia nuapa-nuapa rapodotamiu." Tapi nau nilira makabasaka, ira mboto nikuasai pokainggu-pokainggu anu nompakarugi manusia. Apa tona nidagi dota rarana nadaa, batuana ia nipobatua nu dota rarana haitu.

²⁰ Mandasa mpuumo ira! Apa bara ipia ira mpuu-mpuu nosisani nte Tuputa Yesus, Topompakasalama kita, sampe ira nikabasakamo lako ri pokainggu nadaa anu nompakagero manusia ri dunia hitu. Tapi naupusia, ira nipemala bo nikuasai nu pokainggu-pokainggu nadaa haitu mpanjili. Kaupuna, nelabipa kandasa katuvura pade ri pamulana. ²¹ Aginapa ledo sangganian rasanira dala nakana, pade rasanira bo maupu sia aga rakabasakara parenta-parenta nu Alatala nipatolele ka ira. ²² Anu najadi nte ira nasimbayu nte porapa nanguli ivei: "Asu nekubu, nikandena mpanjili," bo "Bavu dako nandiu notampo mpanjili." ††

I Yesus mpuu-mpuu makava mpanjili ri dunia hitu

3 Sampesuvu-sampesuvu nipotoveku, hitumo suraku karanduana ka komiu. Riara suraku karanduana hitu muni yaku nompasimbuku mompopatora ka komiu pepatuduki nakana ala pekirimiu batena magasa. ² Patujuku, ala ratoramiu tesa-tesa niboto nu nabi-nabi nu Alatala nggaulu, bo ala ratoramiu muni

parenta-parenta lako nte Tuputa Yesus, Topepakasalama. ParentaNa nipasimbayu nu suro-suroNa anu nakava nte komiu.

³ Anu nopoko kana ratoramiu, ri tempo napara kaupu nu dunia kana meumba tona nikuasai dota rarara mboto anu nadaa. Ira mompongeika komiu ⁴ bo manguli, "I Yesus nojanji makava mpanjili ri dunia. Tapi ledo ria nakava. Tantu ledo majadi, sabana lako ri tempo kamate ntotuata nggaulu sampe sii-sii, dunia hitu ledo nabali-bali. Pura-pura bate-batena nasimbayu lako ri lamba pamulana tempo dunia nipajadi sampe sii-sii." ⁵ Tona notesa ivesia, nitunggaira nombakalingasi anu najadi bara ipia, haitumo, Alatala nompajadi langi nggaulu ante tesaNa, bo ante tesaNa muni tana nipajadiNa lako ri uve bo kabatana neumba lako ri tatanga nu uve. ⁶ Bo nikalingasira muni Alatala nompakaropu isi dunia nggaulu ante uve, haitumo ante uve oge anu nanggabuntu nompakalodo isi dunia. ⁷ *Sii-sii ledo nikitata anu nabali* tapi langi bo tana anu naria sii-sii nijagai ante kuasa tesa nu Alatala sampe rapakaropu ante apu bara maipia. Sii-sii dunia da nijagai sampe Eo Potangara bara maipia tempo pura-pura tona anu ledo nangoseaka dota nu Alatala rahuku.

⁸ Tapi, sampesuvu-sampesuvu nipotoveku, nee rakalingasimiu tesa hitu: Ri panggita nTupu, sanjobu mpae nasimbayu mpo saeo, bo saeo nasimbayu mpo sanjobu mpae. ⁹ Nadea tona nanguli i Pue nokalera nompakadupa pojanjiNa makava mpanjili ri dunia. Tapi Ia ledo nokalera. Ia dopa nakava sabana Ia nosabara nte komiu, Ia madota ala ledo maria saitoa tona rahuku sampe ri kasae-saena. DotaNa, ala pura-pura tona manggava loga majea lako ri dosara. ¹⁰ Tapi i Pue Yesus mpuu-mpuu makava mpanjili! KakavaNa ledo rasani-sani ntona, nasimbayu mpo kakava ntopangangga. Ri eo haitu langi malipo sangganian ante moni mamangga mpuu mpo suu nu apu oge. Bo pura-pura anu naria ri langi maropu rakande nu apu, bo dunia ante pura-pura isina malipo sangganian ‡.

¹¹ Jadi sampesuvu-sampesuvu, ane pura-pura anu naria kana maropu ivesia, berimbamo kita? Natantum kita masipato mangoseaka dota nu Alatala bo matuvu ante pokainggu magasa. ¹² Apa kita hii nantongoraka Eo Potangara nipakatantu nu Alatala. Jadi kita kana mompasimbuku matuvu magasa ala Eo haitu masalisa makava. Ri Eo haitu langi maropu rakande nu apu bo pura-pura anu naria ri langi magonu ante kapanena. ¹³ Tapi kita mompopea anu nijanji nu Alatala, haitumo langi nabaru bo tana nabaru, raponturo ntona nanao.

† Peinta Bilangan 22:2-35. †† Amsal 26:11

‡ malipo sangganian ATAU: rapalabu sangganian ATAU: rakava nTupu masadia ratangara.

Pokainggu masipato ka kita topompopea kakava i
Yesus

¹⁴ Sampesuvu-sampesuvu nipotoveku, komiu nom-
popea kajadia-kajadia haitu, jadi pasimbukumo ala
pokainggumiu mabelo bo ledο maria anu rasalai atau
mepakaeya ri panggita nu Alatala. Bo pasimbukumo
matuvu mosinggabelo ante Ia. ¹⁵ Toramo, posabara
nTupu nombadekei loga ka manusia rapakasalama.
Ivesia muni nitulisi nu sampesuvuta i Paulus nipotove-
ta. Surana haitu nitulisina nangoseaka noto nidekei nu
Alatala ka ia. ¹⁶ Ri pura-pura surana, pepatudukina
nasimbayu nte anu nitulisiku ri bavona. Naria muni
sanu tesana nakaja sakide rapaha. Tesana haitu nabi-
asa nitenggoaka ntona ledο natau bo tona ledο
naroso pomparasayara. Ivesia muni nitenggoakara isi
ntanina lako ri Buku Gasa. Tapi ira kana rahuku nu
Alatala sabana pokainggura haitu.

¹⁷ Jadi sampesuvu-sampesuvu nipotoveku, nisanimiu
mamimo kana maria tona mombatenggoaka tesa nu
Alatala. Haitu sampe komiu kana mainga ala komiu le-
do rakeni nu guru-guru mpodava mangoseaka
pepatuduki nasala sampe domo maroso pompara-
sayamiu. ¹⁸ Tapi komiu kana mantambai mosisani belo
ante Tuputa Yesus Kristus, Topepakasalama, bo man-
tambai mombarasai kabelo raraNa riara nggatuvumiu.
Iamo masipato ratoiyata bo rabilata, sii-sii bo sampe ri
kasae-saena. Amin.

Tabe lako nte yaku,
Petrus

19-May-2009@12:42, Backup Descrip-
tion=19-May-2009@09:53, snave -
26-May-2009@11:04, Backup Descrip-
tion=26-May-2009@11:03, B Altork - ❖❖❖

1 Yohanes

Vamba nu Tesa

Sura paratama nitulisi i Yohanes, anaguru i Yesus anu najadi pakeni ntopomparasaya. Nantuntuni tesa ntopomparasaya nggaulu, i Yohanes notulisi sura paratama hitu lako ri ngata Efesus, bo nipakatuna ka todea topomparasaya ri propinsi Asia Kodi. Tempo haitu natuamo i Yohanes.

Tempo i Yohanes notulisi sura hitu, naria guru-guru agama anu nanggeni pepatuduki nasala. Pangulira, i Kristus ledo najadi manusia mpuu, aga lenjena mpo manusia. Niulira muni nau pokaingguta madaa, ledo nakuya, sabana aga karota nadaa, ledo kita. Tapi i Yohanes nanguli pepatudukira haitu nasala. Ia nompopaisani ka kita i Yesus Ana nu Alatala anu mpuu-mpuu najadi manusia. Ane kita nosisani nte Alatala, kita menonto movia dosa bo mangoseaka parentaNa. Isema-sema nomparasaya i Kristus bo nompotove Alatala, kana rapotovena muni sampesuvuna.

Sura hitu nitulisi ala kita matuvu mosangu rara nte Alatala bo nte AnaNa i Yesus Kristus. Nitulisi muni ala kita mainga bo ledo mantuntuni pepatuduki nasala, anu mamala mompakagero katuvuta sampe ledo natuvu nosangu rara nte Alatala.

Naria patuju ntanina sampe i Yohanes notulisi sura hitu. Niulina ri 5:13, "Yaku notulisi sura hitu ka komiu topomparasaya Ana nu Alatala, ala rasanimiu mpuu komiu matuvu mabelo sampe ri kasae-saena." Ane ni-parasayata i Yesus, kita domo maeka nte Alatala (2:28; 3:19-22; 4:16-18; 5:14).

Isi nu Sura

Pantepuuna (1:1-4)

Kana matuvu riaru reme (1:5-2:29)

Ana-ana nu Alatala bo ana-anu Magau nu Seta (Pasal 3)

Pepatuduki nu Alatala bo pepatuduki nabi-nabi mpodava (4:1-6)

Kita kana mosimpotove (4:7-21)

Tona nomparasaya i Yesus ledo nantuntuni pokainggu nadaa ri dunia (Pasal 5)

I Yesus Kristusmo Tesa nu Alatala, anu nombadekei katuvua nabelo

1 Tesa nu Alatala † anu nombadekei katuvua nabelo naria mamimo lako ri lamba pamulana, bo haitumo ratesa kami riaru sura hitu. Ia niepe kami bo nikita kami mboto. Ia nisabiki kami bo Ia natuvu singgani nte kami. ² Tempo Ia naria ri dunia, nikita kami Ia. Bo sii-sii kami nompasimbayu ka komiu anu nikita kami. Kami nosabiki Iamo anu nombadekei katuvua nabelo sampe ri kasae-saena. Ri lamba pamulana Ia naria nosanggani-nggani ante Tuamata Alatala bo Ia natuvu ri dunia hitu nte kami. ³ Anu nikita kami bo anu niepe kami, haitu munimo rapatolele kami ka komiu ala komiu mosangu rara nte kami. Bo kita pura mamala matuvu mosangu rara ante Tuamata Alatala bo AnaNa i Yesus Kristus. ⁴ Kami notulisi sura hitu ka komiu ala rarata mpuu-mpuu madamba.

Alatala reme

⁵ Hitumo kareba niepe kami lako nte i Yesus bo rapatolele kami ka komiu: Alatala reme bo ledo ntoto naria kalandana nte Ia. ⁶ Ane raulita kita nosangu rara ante Alatala, tano mai kita aga natuvu ri kalandana, kita nodava, bo kita ledo natuvu nangoseaka dota nu Alatala. ⁷ Tapi ane kita natuvu riaru reme nasimbayu mpo Alatala naria riaru reme, kita natuvu nosangu rara nte roa, bo Alatala mombalelaka pura-pura dosata sabana raa nu AnaNa i Yesus anu namate ala dosata mamala raampungu.

⁸ Ane raulita ledo ria dosata, kita nombabagiu karota mboto. Haitu tandana ledo ntoto nioseakata dota nu Alatala. ⁹ Tapi ane kita mombanoa dosa-dosata ri ngayo nu Alatala, raampunguNa dosata bo rapakagasaNa rarata lako ri pura-pura anu nadaa. Apa *ivesia nijanjiNa ka kita* bo Ia namala rasarumaka mompakadupa pojanjiNa, bo movia anu nanao. ¹⁰ Tapi ane raulita ledo sanggania kita novia dosa, haitu nasim-

† Tesa nu Alatala, Iamo i Kristus.

bayu ante nompopodava Alatala. Kita aga nombasapuaka tesaNa, bo ledo ntoto nipariarata.

I Yesus topombasaliku kita

2 Sampesuvu-sampesuvu nipotoveku, patujuku notulisi sura hitu ka komiu ala nee rapoviamiu dosa. Tapi ane maria tona movia dosa, naria saito topombasaliku, Iamo i Yesus Kristus anu nanoa. Iamo mombasaliku kita ri ngayo nTuamaNa Alatala. ² I Yesus namate nombatanggu dosa-dosata. Bo ledo aga dosata nitangguNa, tapi pura-pura dosa manusia.

³ Ane raoseakata parenta-parenta nu Alatala, haitumo tandana kita nosisani belo ante Ia. ⁴ Tona nanguli ia nosisani belo ante Alatala, tapi ledo nioseakana parenta-parenta nu Alatala, tona haitu topodava. Ledo ntoto nioseakana dota nu Alatala. ⁵ Tapi isema-sema nangoseaka parenta nu Alatala, tona haitumo mai mpuu-mpuu nompotove Alatala. Haitumo tandana kita mpuu-mpuu natuvu nosangu rara ante Alatala. ⁶ Isema-sema nanguli ia natuvu nosangu rara ante Alatala, kana rapasialana katuvu i Kristus.

Parenta nabaru: kita kana mosimpotove

⁷ Sampesuvu-sampesuvu nipotoveku, ledo parenta nabaru kutulisi ka komiu, tapi parenta njae anu nisanimiu lako ri pantepuuna pomparasayamiu i Kristus. Parenta njae haitu kareba niepemi nokolu, haitumo, kita kana mosimpotove. ⁸ Naupa ivesia, parenta haitu nireke parenta nabaru, bo kabaruna mpuu-mpuu niki-ri katuvu i Kristus bo ri katuvumiu. Apa i Kristus reme nakana lako nte Alatala bo reme haitu nevanta riaru kalandana sampe kalandana nompamula nalipo. ⁹ Isema-sema nanguli ia natuvu riaru reme tapi navuu matana nte sampesuvuna sampomparasaya, tona haitu bate-batena da riaru kalandana sampe sii-sii. ¹⁰ Tona nompotove sampesuvuna, iamo natuvu riaru reme sampe ledo naria nuapa-nuapa ante ia anu mamala mompakanavu ia riaru dosa. ¹¹ Tapi tona navuu matana nte sampesuvuna sampomparasaya, ia batena naria riaru kalandana. Ia nasimbayu mpo tona noli-ri riaru kalandana, bo ledo nisanina hau ri umba rakalauna sabana kalandana haitu nompakaburo matana sampe ia ledo namala nekita.

¹² Yaku notulisi hitu ka komiu, ngana-ngana, sabana dosamiu niampungimo lako ri kamate i Yesus.

¹³ Yaku notulisi hitu ka komiu, totua-totua, sabana komiu nosisanimo ante i Yesus anu naria mamimo lako ri lamba pamulana.

Yaku notulisi hitu ka komiu, kabilasa bo randaa anu nangoseaka i Yesus, sabana nidagimiumo Magau nu Seta.

† ledo naria nuapa-nuapa ante ia anu mompakanavu ia riaru dosa ledo naria pokainguna mompakanavu roana riaru dosa.

¹⁴ Yaku notulisi hitu ka komiu, ngana-ngana, sabana komiu nosisanimo ante Tuamata, Alatala.

Yaku notulisi hitu ka komiu, totua-totua, sabana komiu nosisanimo ante i Yesus anu naria lako ri lamba pamulana.

Yaku notulisi hitu ka komiu, kabilasa bo randaa sabana pomparasayamiu narosomo. Nipariaramiumo Tesa nu Alatala, bo nidagimiumo Magau nu Seta.

¹⁵ Jadi nee mompotove dunia hitu, bo nuapa-nuapa riarana. Isema-sema nompotove dunia hitu, ledo nipotove Alatala. ¹⁶ Apa pura-pura riaru dunia, evamo dota rarata nadaa, anu nikitata bo nipoino rarata, bo pura-pura anu nompakalanga rarata, haitu puramo ledo nopuna lako nte Alatala tapi aga nopuna lako ri dunia nadaa. ¹⁷ Dunia bo pura-pura anu naria riarana anu nipoino manusia magero, tapi isema-sema nangoseaka dota nu Alatala, matuvu mabelo sampe ri kasae-saena.

Bali i Kristus

¹⁸ Sampesuvu-sampesuvu nipotoveku, naparamo kaupu dunia. Niepemiuno bara ipia, kana meonga saito anu niuli Bali i Kristus. Bo sii-sii nadeamo tona neumba nobali ka i Kristus. Haitu tandana naparamo kaupu dunia. ¹⁹ Bali-bali i Kristus nesuvu lako nte kita, tapi kakanana ira ledo nosangu pomparasaya ante kita. Ane ira mpuu-mpuu nosangu pomparasaya ante kita, natantu ira da mosangani-nggani ante kita. Tapi nipalaikaramo kita, jadi nisanita ira ledo mpuu nosangu pomparasaya ante kita. ²⁰ Tapi nitarimamiumo Nosa Gasa nu Alatala, anu nipopanau i Yesus Kristus. Haitu sampe komiu pura-pura nangisani pepatuduki nakana. ²¹ Yaku notulisi sura hitu ka komiu ledo sabana ledo nisanimiu pepatuduki nakana. Nisanimiumo pepatuduki nakana. Bo nisanimiu munimo ledo naria dava riaru pepatuduki nakana. ²² Jadi, isema-sema nanguli i Yesus ledo Magau Topepakasalama anu nijanji nu Alatala, iamo mai topodava. Ia munimo bali i Kristus, apa nisapuna Alatala bo AnaNa. ²³ Isema-sema nombasapu Ana nu Alatala, nisapuna muni TuamaNa Alatala. Tapi isema-sema nompomparasaya Ana nu Alatala, nitarimana muni Alatala.

²⁴ Jadi pariaro pakabelo-belo pepatuduki niepemi lako ri pantepuuna pomparasayamiu i Kristus. Ane pepatuduki haitu mpuu-mpuu rapariaraimiu, komiu bate-batena matuvu mosangu rara nte Ana nu Alatala bo Alatala, TuamaNa. ²⁵ Hitumo nijanjiNa ka kita: Kita matuvu mabelo sampe ri kasae-saena.

²⁶ Tesa hitu nitulisiku ka komiu apa bali-bali i Kristus nompasimbuku mompatuduki anu nasala ka komiu.

²⁷ Tapi kakanana domo paraluu tona ntanina mompatuduki komiu, sabana nitarimamiumo Nosa Gasa anu nipopanau i Kristus. Bo Nosa Gasa haitumo naroo

riara ntaimiu bo nompatuduki ka komiu pura-pura anu paraluu rasanimiu. PapatudukiNa haitu nakana pura, ledο naria dava. Sabana haitu, komiu kana maroo matuvu mosangu rara nte i Kristus nangoseaka anu nipatuduki Nosa Gasa ka komiu.

²⁸ Jadi sampesuvu-sampesuvu nipotoveku, kita kana maroo matuvu mosangu rara nte i Kristus ala ledο maeya matata mantingayo Ia, bo ledο maeka rarata tempo Ia makava mpanjili ri dunia. ²⁹ Nisanimumo i Kristus batena nangoseaka dota nu Alatala. Sabana haitu kana rasanimiu muni, isema-sema nangoseaka dota nu Alatala, iamo ana nu Alatala.

Kita ana-ana nu Alatala

3 Namovo mpuu kaoge tove nu Alatala ka kita sampe kita niuliNa ana-anaNa! Bo kita mpuu-mpuu ana-anaNa mami. Tona ledο nomparasaya i Yesus ledο nisanira kita ana-ana nu Alatala, sabana ira mboto ledο nosisani ante Alatala. ² Sampesuvu-sampesuvu nipotoveku, kita sii-sii ana-ana nu Alatala mami, tapi dopa nipopaisani ka kita berimba katuvuta ri tempo makava. Anu nisanita, tempo i Kristus makava mpanjili, kita majadi masimbayu mpo Ia, apa rakitata mpuu lenjeNa. ³ Isema-sema manjarumaka majadi masimbayu mpo i Kristus, ia kana mombajagai pokaingguna ala katuvuna mpuu-mpuu magasa masimbayu mpo katuvu i Kristus.

⁴ Isema-sema novia dosa, ia muni nombaliunaka parenta nu Alatala, sabana pokaingguna nombaliunaka parenta nu Alatala, haitumo niuli dosa. ⁵ Nisanimumo patuju i Yesus nakava ri dunia ala Ia mompakalali pura-pura dosa manusia. Bo nisanimiu muni Ia mboto ledο ntoto nadosa. ⁶ Jadi isema-sema natuvu nosangu rara nte Ia, domo novia dosa. Tapi isema-sema batena novia dosa, ledο niparasayana mpuu i Yesus bo ledο nosisani belo nte Ia.

⁷ Sampesuvu-sampesuvu nipotoveku, nee rapaloga tona mombabagiu komiu. Toramo! Isema-sema batena novia dota nu Alatala, iamo tona nanao ri panggita nu Alatala nasimbayu mpo i Kristus nanao ri panggita nu Alatala. ⁸ Tapi isema-sema batena novia dosa, ia nangoseaka dota Magau nu Seta, sabana Magau nu Seta nadosa mami lako ri lamba pamulana. Patuju kakava Ana nu Alatala ri dunia ala mompakaropu povia Magau nu Seta.

⁹ Tona najadi ana-ana nu Alatala domo batena novia dosa, sabana ana-ana nu Alatala kana manjava inggu nTuamara. Domo mamala ira batena movia dosa sabana ira najadi ana-ana nu Alatalamo. ¹⁰ Hitumo posisalana ana-ana nu Alatala bo ana-ana Magau nu Seta: isema-sema ledο novia dota nu Alatala bo ledο nompotove sampesuvuna, ia ledο ana nu Alatala.

Kita kana mosimpotove

¹¹ Iveimo kareba niepemiū lako ri pantepuuna pomparasayamiū i Kristus: kita kana mosimpotove. ¹² Nee kita mompasiala inggu i Kain nangoseaka dota Magau nu Seta bo nompatesi tueina mboto. Nuapa sabana i Kain nompatesi tueina mboto? Sabana pokainggu i Kain nadaa bo ia nasiriati nanggita pokainggu ntueina nanao.

¹³ Jadi sampesuvu-sampesuvuku, nee mokumaa ane tona ledο nomparasaya i Yesus navuu matara nanggita komiu. ¹⁴ Ane kita nompotove sampesuvuta, nisani-ta kita domo rapopogaa lako nte Alatala bo nikavata-mo katuvua nabelo sampe ri kasae-saena. Tapi isema-sema ledο nompotove sampesuvuna sampomparasaya, ia kana rapopogaa lako nte Alatala. ¹⁵ Isema-sema navuu matana nanggita sampesuvuna, ia haitumo nasimbayu ante topepatesi. Nisanimumo, topepatesi ledο manggava katuvua nabelo sampe ri kasae-saena.

¹⁶ Nanggita pokainggu i Yesus, nisanitamo mosimpotove. Ia namate nanggeni belo ka kita. Jadi kita muni kana masadia mamate mantulungi sampesuvuta.

¹⁷ Isema-sema nagana katuvuna bo nikitana sampesuvuna napepa, tapi ledο nadota ia mantulungi sampesuvuna haitu, natantumο ledο ntoto nipotovena Alatala. ¹⁸ Sampesuvu-sampesuvu nipotoveku, nee aga mompotove sampesuvuta sampomparasaya ri sumba. Kita kana mompotove mpuu bo kita kana mompopakita tove haitu ante pokainggu nabelo.

Ane kita nosimpotove, ledο makaja rarata mosambaya ka Alatala

¹⁹ Jadi ane kita nompotove sampesuvuta ante rarata mpuu-mpuu, nisanita kita mpuu-mpuu ana-ana nu Alatala, bo rarata mamala matinonto tempo kita nosambaya ka Alatala. ²⁰ Tapi nau rarata ledο matinonto mantora salata, kita mamala mompakatinonto rarata, sabana nisani nu Alatala puramo katuvuta, bo pompoasiNa kita naogepa pade rara ntaita anu nompakasala kita. ²¹ Jadi sampesuvu-sampesuvu nipotoveku, ane rara ntaita ledο nompakasala kita, ledο makaja rarata merapi nte Alatala. ²² Bo nuapa-nuapa raperapita nte Ia, natantu radekeiNa ka kita, sabana kita nanturusi parenta-parentaNa bo pokaingguta nompakadamba raraNa. ²³ Hitumo niparentaNa ka kita: kita kana momparasaya AnaNa, i Yesus Kristus. Bo kita kana mosimpotove nangoseaka parenta i Kristus mboto ka kita. ²⁴ Isema-sema nanturusi parenta nu Alatala, iamo natuvu nosangu rara ante Alatala bo Alatala muni nonturo riara ntaina. Bo nisanita Alatala nosangu rara ante kita sabana Nosa Gasa nidekeiNa naria riara ntaita.

Kana rapoposalata tona nikenika Nosa Gasa bo tona nikenika Magau nu Seta

4 Sampesuvu-sampesuvu nipotoveku, nee kaliu-liu raparasayamiu pura-pura tona nanguli naria Nosa Gasa nu Alatala nte ira. Tapi peintaka ruru, ala rasaniamiu bara Nosa Gasa mpuu naria nte ira, bara ledο. Niluku ivesia apa nadeamo nabi mpodava ri umba-umba ri dunia sii-sii. ² Hitumo tandana ala rasanita isema nikuasai Nosa Gasa nu Alatala: isema-sema nomparasaya i Yesusmo Magau Topepakasalama nakava ri dunia najadi manusia, tona haitumo naria Nosa Gasa lako nte Alatala. ³ Tapi isema-sema ledο nomparasaya i Yesus nakava ri dunia najadi manusia, tona haitu ledο naria Nosa Gasa nu Alatala nte ia. Tona haitu nikuasai pekiri lako ri Bali i Kristus. Niepemiumo Bali i Kristus makava, bo hitupa nariamo ia riarā dunia.

⁴ Sampesuvu-sampesuvu nipotoveku, komiumo ana-ana nu Alatala bo nidagimiumo nabi-nabi mpodava gahaitu, sabana Nosa Gasa nu Alatala anu riarā ntaimiu nakuasapa pade Magau nu Seta anu nombakuasai pekiri ntona ledο nangoseaka dota nu Alatala. ⁵ Nabi-nabi mpodava gahaitu ledο nangoseaka dota nu Alatala. Haitu sampe pepatudukira nangoseaka pekiri ntona ri dunia anu ledο nangoseaka dota nTupu, bo nadamba tona nompotalingai pepatudukira. ⁶ Tapi kita hitumo ana-ana nu Alatala, jadi isema-sema nosisani belo ante Alatala nompotalingai pepatudukita. Tapi isema-sema ledο nomparasaya i Yesus, ledο nipetalingaina pepatudukita. Jadi haitumo tandana ala rasanita isema nikenika Nosa Gasa lako nte Alatala anu nakana bo isema nikenika pekiri lako nte Magau nu Seta mpodava.

Alatala puna nu tove

⁷ Sampesuvu-sampesuvu nipotoveku, kita kana mosimpotove sabana tove nopuna lako nte Alatala. Isema-sema nepotove, iamo ana nu Alatala, bo nosisani belo ante Alatala. ⁸ Tapi isema-sema ledο nepotove, ia dopa nosisani belo ante Alatala, sabana Alatala puna nu tove. ⁹ Alatala nompopaisani toveNa ka kita ivei: nituduNa AnaNa saito-itoNa tumai ri dunia ala kita mamala matuvu mabelo sampe ri kasae-saena. ¹⁰ Povia nu Alatala haitu nompopaisani tove nakana ka kita. Iveimo tove nakana: ledο kita nokolu nompotove Alatala tapi Alatala nokolu nompotove kita. Ia nompotove kita sampe nituduNa AnaNa mboto tumai mamate mombasambei kita ala dosata namala raampunggi.

¹¹ Sampesuvu-sampesuvu nipotoveku, naoge mpuu tove nu Alatala ka kita! Jadi kita muni kana mosimpotove. ¹² Dopa naria saitoa manusia nanggita Alatala. Tapi ane kita mosimpotove, haitumo tandana Alatala

naria riarā ntaita, bo toveNa ka kita mpuu-mpuu naria aselena riarā nggatuvuta. †

¹³ Alatala nombadekei Nosa Gasana ka kita. Sia sampe nisanita kita natuvu nosangu rara ante Alatala bo Ia natuvu riarā ntaita. ¹⁴ Ledο aga haitu. Kami ana-anaguru i Yesus nikita kamimo Ia, Ana nu Alatala, bo kami nosabiki Iamo nitudu nTuamaNa Alatala tumai ri dunia majadi Topompakasalama manusia. ¹⁵ Isema-sema nomparasaya i Yesusmo Ana nu Alatala, iamo natuvu nosangu rara ante Alatala, bo Alatala natuvu riarā ntaina. ¹⁶ Jadi haitumo sampe nisanita bo nisaru-makata Alatala nompotove kita.

Toramo! Alatala puna nu tove, jadi isema-sema nepotove, ia bate-batena natuvu nosangu rara ante Alatala, bo Alatala bate-batena natuvu riarā ntaina. ¹⁷ Ane kita nompotove sampesuvuta sampomparasaya, haitumo tandana kita mpuu-mpuu nompotove Alatala sampe ledο makaja rarata mantingayo Ia ri Eo Potangara ri kaupu dunia. Ledο makaja rarata mantingayo Ia sabana pokaingguta ri dunia hitu masimbayu mpo pokainggu i Kristus. ¹⁸ Ane mpuu-mpuu nirasaita tove nu Alatala nte kita, kita domo maeka nte Alatala. Apa tove nu Alatala ka kita nompakaroso rarata sampe kita domo maeka nte Ia. Ane kita naeka nompekirika Eo Potangara ri kaupu nu dunia, batuana dopa nisanita mpuu Alatala nompotove kita.

¹⁹ Kita nepotove sabana Alatala nokolu nompotove kita. ²⁰ Isema-sema nanguli ia nompotove Alatala, tano mai navuu matana nanggita sampesuvuna sampomparasaya, ia mai topodava! Ane ia ledο nompotove sampesuvuna anu nikitana, natantumo ledο mamala ia mompotove Alatala anu ledο nikitana. ²¹ Apa iveimo parenta i Kristus ka kita: "Isema-sema nompotove Alatala, kana raportovena muni sampesuvuna sampomparasaya."

Kita nombadagi kuasa nadaa ri dunia

5 Isema-sema nomparasaya i Yesusmo Magau Topepakasalama anu nijanji nu Alatala, iamo nireke ana nu Alatala. Bo isema-sema nompotove Tuamata Alatala, natantu nipotovena muni roa-roana anu najadi ana-ana nu Alatala. ² Hitumo tandana ala rasanita kita nompotove roa-roata anu najadi ana-ana nu Alatala: kita nompotove Alatala bo nangoseaka parenta-parentaNa. ³ Apa ane nipotoveta Alatala, natantu raoseakata parenta-parentaNa. Bo parenta-parentaNa ledο nakaja raoseaka, ⁴ sabana isema-sema najadi ana nu Alatala nompakule nombadagi kuasa nadaa ri dunia. Nidagitamo kuasa nadaa ri dunia hitu ante pomparasayata. ⁵ Isema nompakule nombadagi

† toveNa ka kita mpuu-mpuu naria aselena riarā nggatuvuta ATAU: kita mpuu-mpuu nompotove Alatala.

kuasa nadaa ri dunia hitu? Aga tona nomparasaya i Yesus Ana nu Alatala.

Talu-ngaya anu nompakatantu i Yesus Ana nu Alatala

⁶I Yesus Kristus nakava ri dunia. Ia nidiu i Yohanes Topediu bo natitimo raaNa tempo Ia namate ri kayu salib. Ia ledo aga nidiu tapi Ia namate muni bo raaNa natiti. † Nosa Gasa mboto nompakalanto ka kita i Yesusmo Ana nu Alatala. Bo anu niuli Nosa Gasa nakana mpuu. ⁷⁻⁸Jadi, ivesiamo Alatala nompakalanto ka kita i Yesusmo AnaNa: Nosa Gasa nosabiki i Yesus Ana nu Alatala. Bo anu najadi tempo Ia nidiu bo tempo Ia namate, haitu muni nompakalanto Ia Ana nu Alatala. Talu-ngaya hitu nasimbayu posabira, haitumo, i Yesus Ana nu Alatala. ††⁹Ane ri potangara, kita nomparasaya posabi manusia. Tapi posabi nu Alatala narosopa pade posabi manusia, bo Ia mboto nosabi nompakatantu i Yesusmo AnaNa. ¹⁰Isema-sema nomparasaya Ana nu Alatala, nisanina nakana mpuu posabi nu Alatala. Tapi isema-sema ledo nomparasaya Alatala, batuana ia nompopodava Alatala sabana ledo niparasayana posabi nu Alatala nombatesa AnaNa. ¹¹Iveimo posabi nu Alatala: nidekeiNa ka kita katuvu nabelo sampe ri kasae-saena, bo AnaNa, i Yesus puna nu katuvu nabelo. ¹²Jadi, isema-sema natuvu nosangu rara ante Ana nu Alatala, ia matuvu mabelo sampe ri kasae-saena. Tapi isema-sema ledo natuvu nosangu rara ante Ia ledo matuvu mabelo sampe ri kasae-saena.

Katuvu nabelo sampe ri kasae-saena

¹³Yaku notulisi sura hitu ka komiu topomparasaya Ana nu Alatala, ala rasanimiu mpuu komiu matuvu mabelo sampe ri kasae-saena.

† Nitulisi ri naskah basa Yunani: Yesus Kristus, Iamo nakava ante uve bo raa. Ia ledo nakava ante uve bayangi tapi Ia nakava ante uve bo raa. †† Sanu naskah njae: Jadi ri suruga naria talu-ngaya nosabiki i Yesusmo Ana nu Alatala. Talu-ngaya haitumo Alatala, Tesa nu Alatala, bo Nosa Gasa nu Alatala. Nasimbayu posabira tatalu haitu. Ri dunia naria muni talu-ngaya anu nompakatantu i Yesusmo Ana nu Alatala, haitumo posabi Nosa Gasa, pombadiu i Yesus, bo kamate i Yesus.

¹⁴Ledo nakaja rarata nosambaya ka Alatala, apa nisanita Ia mompetalingai perapita, asaa perapita nangoseaka dotaNa. ¹⁵Bo nisanita ane Ia mompetalingai perapita, natantumo ratarimata anu niperapita lako nte Ia.

¹⁶Sampesuvu-sampesuvuku, ane rakitamiu roamiu sampomparasaya novia dosa anu ledo mompopogaa ia lako nte Alatala sampe ri kasae-saena, komiu kana mosambaya ka roamiu haitu. Posambayamo ala *ia majea* bo Alatala mombadekei ka ia katuvu mabelo sampe ri kasae-saena. Tona niuliku hitu, tona novia dosa anu ledo mompopogaa ia lako nte Alatala sampe ri kasae-saena. Naria muni dosa anu mompopogaa tona lako nte Alatala. Ledo paraluu raposambayakamiu tona novia dosa haitu. ¹⁷Pura-pura pokainggu nasala niuli dosa. Tapi naria muni dosa anu ledo mompopogaa tona lako nte Alatala sampe ri kasae-saena.

¹⁸Nisanita ane tona najadi ana-ana nu Alatala, ira domo batena novia dosa, sabana i Yesus Ana nu Alatala nombajagai ira bo Magau nu Seta ledo nompakule mombadagi ira. ¹⁹Nisanita kita najadi ana-ana nu Alatala, bo nisanita tona ledo nomparasaya i Yesus nikuasai Magau nu Seta. ²⁰Nisanita muni i Yesus, Ana nu Alatala, nakava ri dunia hitu mompakanoto rarata ala kita mamala mosisani belo ante Alatala anu nakana. Kita natuvu nosangu rara nte Alatala anu nakana sabana kita natuvu nosangu rara nte AnaNa, i Yesus. Iamo Alatala anu nakana bo Iamo mombadekei katuvua nabelo sampe ri kasae-saena.

²¹Sampesuvu-sampesuvu nipotoveku. Jagaimo, nee metupu nte tupu-tupu anu ledo nakana.

Taba lako nte yaku,
Yohanes

19-May-2009@12:42, Backup Description=19-May-2009@09:53, snave -

26-May-2009@11:04, Backup Description=26-May-2009@11:03, B Altork - ❖❖❖

2 Yohanes

Vamba nu Tesa

Sura hitu nitulisi i Yohanes, pakeni ntopomparasaya. Nitulisina ka "Nina ntali ana nipelisi nu Alatala". Haitu bara nijalilika sangu kasiromu topomparasaya.

Ri sura hitu i Yohanes nompopatora kita kana mosimpotove, bo kita kana mainga apa nadea topebagiu nanggeni pepatuduki nasala.

Isi nu Sura

Pantepuuna (1-3)

Kana mosimpotove (4-6)

Mainga ka pepatuduki nasala (7-11)

Tesa kaupuna (12-13)

1 Nina ntali ana, anu nipelisi nu Alatala: †
Sura hitu lako nte yaku, i Yohanes, pakeni nteodea topomparasaya. Yaku mpuu-mpuu nompotove komiu. Ledo aga yaku tapi pura-pura topangisani pepatuduki nakana lako nte Alatala, nompotove komiu muni. ² Kami nompotove komiu sabana komiu nosangani-nggani nte kami nompomparasaya pepatuduki nakana, anu naria riara ntaita sampe ri kasae-saena. ³ Tuamata Alatala bo i Yesus Kristus, Ana nu Alatala, mombadekei belo ka kita bo mompoasi kita bo mompakatinonto rarata. Haitu bagiata sabana kita nangisani pepatuduki nakana bo nosimpotove.

Kita kana mangoseaka pepatuduki nakana bo mosimpotove

⁴ Nadamba mpuu raraku nangepe naria ana-anamiu natuvu nangoseaka pepatuduki nakana, anu niparenta nTuamata Alatala ka kita. ⁵ Jadi kuperapi mpuu-mpuu nte komiu, Ina, kita pura-pura kana mosimpotove. Anu nitulisiku hitu ledo parenta nabaru, tapi parenta nidekei ka kita lako ri pamulana kita nompomparasaya i Yesus. ⁶ Iveimo anu niuli tove: kita kana matuvu mangoseaka parenta nu Alatala anu niepeta lako ri pamulana: Kita kana matuvu mosimpotove.

⁷ Nadeamo topebagiu neumba bo hau ri njumangu dunia. Ledo niparasayara i Yesus nakava ri dunia naja-di manusia. Ira haitumo nombabagiu tona ntanina bo nangeva i Kristus. ⁸ Jadi komiu kana mainga! Nee sampe anu nipatuduki kami ka komiu ledo maria ase-

† Nina ntali ana nirapaka sangu kasiromu topomparasaya.

lena. Pasimbukumo mangoseaka pepatuduki nakana ala rakavamiu pura-pura belo nipakasadia nu Alatala ka komiu.

⁹ Isema-sema nasalandala lako ri pepatuduki nakana bo ledo nioseakana pepatuduki i Kristus, ia ledo nosangu rara nte Alatala. Tapi isema-sema naroo nangoseaka pepatuduki i Kristus, ia nosangu rara nte Tuamata Alatala bo i Yesus, Ana nu Alatala. ¹⁰ Jadi, ane makava tona nte komiu mompatolele pepatuduki nosisala ante pepatuduki i Kristus, nee ratarimamiu tona haitu riara banuamiu. Nee rakadambanakamiu ira, ¹¹ sabana isema-sema mombakadambanaka ira, nasimbayu mpo niporoana ira novia anu nadaa.

Tesa kaupuna

¹² Da nadeapa anu kutesa ka komiu, tapi nipekiriku nabelopa domo kutulisi ri sura. Yaku nonia tou nte komiu, jadi nabelopa kita mosinggava bo motesa ri mata, ala rarata mpuu-mpuu madamba mpasangani-nggani.

¹³ Nadea tabe lako nte ana-ana nu sampesuvumiu †† ri sii anu nipelisi nu Alatala.

Tabe lako nte yaku,
Yohanes

19-May-2009@12:42, Backup Description=19-May-2009@09:53, snave -
26-May-2009@11:04, Backup Description=26-May-2009@11:03, B Altork - ❖❖❖

†† ana-ana nu sampesuvumiu: nirapaka todea topomparasaya.

3 Yohanes

Vamba nu Tesa

Sura hitu nitulisi i Yohanes ka vegana i Gayus, pakeni ntodea topomparasaya. I Yohanes nantoiya i Gayus apa i Gayus nantulungi topomparasaya ntanina. Tapi i Yohanes nompakasala topanggeni agama nosanga i Diotrefes, apa ia tolanga rara bo ledo nangoseaka parenta i Yohanes. I Yohanes nompainga i Gayus, pakabelo-belo nte i Diotrefes.

Isi nu Sura

Pantepuuna (1-4)

I Gayus nitoiya (5-8)

I Diotrefes nipakasala (9-10)

I Demetrius nitoiya (11-12)

Tesa kaupuna (13-15)

1 Gayus, vega nipotoveku:

Sura hitu lako nte yaku, i Yohanes, pakeni ntopomparasaya. Yaku mpuu-mpuu nompotove iko.

²Vegaku, kuperapi nte Alatala, ala katuvumu mabelo bo karomu maroso, nasimbayu mpo karoso pomparasayamu.

³Nadamba mpuumo raraku, sabana bara sako-ndua topomparasaya nakava nte yaku nanguli iko naroo nompapasaya pepatuduki nakana. Niulira iko mpuu-mpuu natuvu nangoseaka pepatuduki nakana. ⁴Ledo ria anu nompakadamba raraku nelabipa pade nangepe kareba nanguli ana-anaku natuvu nangoseaka pepatuduki nakana.

I Gayus nitoiya

⁵Vegaku, pokainggumu nosinggambela nte pomparasayamu tempo iko nantulungi sampesuvuta sampomparasaya anu nesai nte iko. Nau iko dopa nosisani ante ira, iko batena nombatulungi ira. ⁶Riara podade kami ri sii, nitesara kabelo nu raramu nantulungi ira. Jadi kuperapi, ane mesai vai ira nte iko, tulungimo ira mompapola polipara, ala madamba rara nu Alatala.

⁷Apa sampesuvuta haitu nanggeni kareba i Kristus bo ledo ria nuapa-nuapa nitarimara lako nte tona anu ledo nosisani nte Alatala. ⁸Jadi, masipato kita topomparasaya mombatulungi ira, bo ane nitulungita ira, nasimbayu mpo niporoata muni ira nompatolele pepatuduki nakana lako nte Alatala.

I Diotrefes bo i Demetrius

⁹Nariamo sura nitulisiku ka topomparasaya hamai, tapi i Diotrefes ledo nadota nangoseaka tesaku. Patu-

juna, ia mboto majadi pakeni ntopomparasaya. ¹⁰Ane makava ri situ yaku, kana kupakalanto ka komiu pura-pura anu nipoviana, sabana poviana haitu ledo ntoto nabelo. Nadea mpuu tesa dava niulina nompakadaa sanga kami. Bo ledo aga haitu. Tempo roa-roata sampomparasaya nakava nanggeni Kareba Belo, ledo nadota ia nantarima ira ri banuana. Bo nitagina muni topomparasaya ntanina mantarima ira. Isema ledo nantuntuni tesana haitu, nipopalaina lako ri kasiromu ntodea topomparasaya, ledo nipalogana ira mantuntuni podade.

¹¹Vegaku, nee mupasiala pokainggu nadaa, tapi pasialamo pokainggu nabelo. Isema-sema novia anu nabelo, iramo ana-ana nu Alatala. Tapi isema-sema novia anu nadaa, ledo ntoto nosisani nte Alatala. ¹²Pura-pura tona nantoiya i Demetrius. Lako ri pokaingguna nanao, nisaniramo ia nangoseaka pepatuduki nakana. Kami muni nantoiya ia, bo nisanimu nuapa-nuapa niuli kami, namala raparasaya.

Tesa kaupuna

¹³Da nadeapa tesa kutesa ka iko, tapi nipekiriku nabelopa domo kutulisi ri sura. ¹⁴Nisarumakaku domo masae, yaku tou mosinggava nte iko bo mamala kita motesa ri mata.

¹⁵Kuperapi Alatala mompakatinonto raramu. Nadea tabe lako nte roa-roata ri sii. Pakapola tabe kami ka roa-roata ri situ.

Tabe lako nte yaku,
Yohanes

19-May-2009@12:42, Backup Description=19-May-2009@09:53, snave -

26-May-2009@11:04, Backup Description=26-May-2009@11:03, B Altork - ❖❖❖

Yudas

Vamba nu Tesa

Sura hitu nitulisi i Yudas, sampesuvu i Yakobus. I Yudas hitu bara tuei i Yesus (Matius 13:55). Sura hitu nompopatora topombaca ala mainga ka guru-guru mpodava. Guru-guru mpodava haitu nanguli ira topomparasaya, tano pepatuduki nasala nikenira. I Yudas nompakadidi rara ntopomparasaya maroo mangoseaka pepatuduki nakana, bo bate-batena momparasaya i Yesus. Isi sura hitu nasimbayu sakide ante isi .

Isi nu Sura

Petabe (1-2)

Patuju nu sura: mainga ka guru-guru mpodava anu nombabaliki Kareba Belo (3-4)

Pehuku nu Alatala ka guru-guru mpodava (5-16)

Pepatora mompakaroso pomparasayata (17-23)

Posambaya mombatoiya Alatala (24-25)

1 Sampesuvu-sampesuvu anu nipokio nTuamata Alatala majadi todeaNa:

Komiu mpuu-mpuu nipotove nu Alatala, bo nija-gaiNa sampe i Yesus Kristus makava mpanjili. Sura hitu lako nte yaku, i Yudas, batua i Yesus Kristus bo sampesuvu i Yakobus. ² Kuperapi ala komiu ledo maupupu mombarasai tove nu Alatala, bo ala Ia mabelo nte komiu bo mompakatinonto raramiu.

Mainga ka guru-guru mpodava anu nombabaliki Kareba Belo lako nte Alatala

³ Sampesuvu-sampesuvu nipotoveku, naoge mpuu raraku motulisi sura ka komiu, mombatesa kabelona nirasaita pura-pura anu nipakasalama i Yesus. Tapi nirasaike eva naria anu nompasuu yaku mombabaliki niaku haitu. Apa naria tona anu nanggeni pepatuduki nasala nte kita. Sia sampe niuliku aginamo kutulisi sura mompakaroso raramiu ala komiu mompasimbuku mpuu mangeva tona anu madota mombabaliki pepatuduki nakana. Pepatuduki nakana nipasimbayu nu Alatala ka pura-pura todeaNa. Bo pepatuduki haitu aga sanggani nidekei nu Alatala sampe ri kasae-saena bo ledo namala rabaliki. ⁴ Nariamoo bara sako-ndua tona nesua nggalino-lino ri tatangata ntopomparasaya. Pangulira ira sampesuvuta sampomparasaya, tano mai ira ledo nangoseaka dota nu Alatala. Pangulira ledo makuya kita mangoseaka dota rarata nadaa, apa Alatala nompotove kita bo raampungina salata haitu. Tapi pepatuduki haitu ledo ntoto nakana, ira aga nombatenggoaka pepatuduki anu nombatesa kabelo nu Alatala. Nisapura i Yesus Kristus saito-itoNa Magau bo Tuputa. Lako ri nggaulunama pehuku ra-

pambela ka ira nipakatantu mamimo bo nitulisi riaru Buku Gasa.

Nggaulu Alatala nombahuku manusia bo malaeka anu nokainggu nadaa, bo rahukuNa muni guru-guru mpodava anu natuvu sii-sii

⁵ Nau nisanimumo pura-pura hitu, kana kupopatora ka komiu pehuku nu Alatala ka tona novia nadaa. Nggaulu, Tupu nombakabasaka todeaNa toYahudi lako ri tana Mesir. Tapi naupu sia, naria sanu ira ledo nomparasaya sampe nipatesiNamo ira ri karava bai. ^{†6} Tora muni malaeka-malaeka nTupu nggaulu. Sanu ira ledo naosa rarara nte kuasa nipakatantu nu Alatala ka ira, sampe nipalaisira ponturora ri suruga. Ira nitarunggu nu Alatala ri ponturo nalanda mpirika bo nipou ante rante anu ledo namala rapudusi. Bo ira ledo rakabasa-ka sampe makava tempona ira rahuku ri Eo Potangara bara maipia. ⁷ Tora munimo tupu ngata Sodom bo Gomora nggaulu bo ngata-ngata ri sinjorina. Ira nasimbayu nte malaeka-malaeka pangane, haitumo ira muni ledo nabasa-basa nosipogau nte tona ledo bereira mboto bo nangoseaka pokainggu nabuga ntoto. Ngatara nipalabusi ante apu rapopatora ka pura-pura tona, pokainggu nadaa rahuku ante apu sampe ri kasae-saena. ^{††}

⁸ Nau naria jonjo pehuku nu Alatala ka tona nadaa pangane, guru-guru mpodava gahaitu batena novia nadaa. Pangipi-pangipira niulira lako nte Alatala, tano mai ledo nakana. Pangipira haitu nanggeni ira novia dosa anu nompakaruto karora mboto. Ira nompan-daente kuasa nu Alatala bo nanjalai malaeka anu

[†] Bilangan 14:26-35; 1 Korintus 10:5-11; Ibrani 3:16-4:2 ^{††} Kaja-dia 19:24-25

nipokumaaka ri suruga. ⁹ Tano i Mikhael mboto, nau ia tadulako malaeka nu Alatala, ledo nabia nanjalai Magau nu Seta. Tempo kamate i Musa, i Mikhael bo Magau nu Seta nosinjanaika isema mangala karobata i Musa. Nirasai i Mikhael ledo masipato ia manjalai Magau nu Seta. Ia aga nanguli, "Damo Tupu mombahuku iko!" ¹⁰ Tapi guru-guru mpodava haitu nanjalai mpengayangaya anu ledo nisanira. Ira nasimbayu mpo binata-binata anu ledo namala nompekiri. Anu nirasaira, haitumo nioseakara ante ledo ria rekena. Bo pokainggura haitumo sampe ira rahuku nu Alatala. ¹¹ Mandasa mpuu ira! Nipasialara katuvu i Kain nggaulu *anu nasiriati bo navuu matana nte tueina.*[†] Nipasialara nto to sala i Bileam anu nasadia movia nuapa-nuapa asaa manggava doi. ^{††} Bo pangevara Alatala nasimbayu mpo peeva i Korah [‡] nggaulu, sampe ira muni masipato rahuku nu Alatala. ¹² Tempo komiu nasiromu nangande nosanggani-nggani mantora posangu raramiu nte i Kristus, guru-guru mpodava gahaitu aga nepakaeya. Ledo naeya matara nompebasa nangande bo aga nompekirika karora mboto. Ira ledo ntoto ria gunana, nasimbayu mpo kulimu vuri anu ledo najadi uda, aga niburusi mpoi. Bo ira nasimbayu mpo kayu ledo novua ri tempo mpovuana, mpo kayu nitovo bo nipekalesi sampe namate mpuu. ¹³ Ira nasimbayu mpo balumba mbaso niburu mpoi, bo pokainggura anu nepakaeya nasimbayu mpo rumpu bo bura natapa nitompesaka ri talinti. Ira nasalandala lako ri dala nakana nasimbayu mpo betue-betue mpolinja ri langi ledo nangoseaka dala nipakatantu ka ira. Jadi nipakasadia nTupumo ponturo nalanda mpirika ka ira sampe ri kasae-saena.

¹⁴ I Henokh, muli kapitu-ntapina lako nte i Adam, nombaboto pehuku nu Alatala ka guru-guru mpodava gahaitu ivei:

"Epemo! Tupu makava bara maipia ante monjobu-njobu malaekana ¹⁵ mombatangara pura-pura manusia. Ia mombahuku pura-pura topesapuaka sabana pesapuakara.

Ia mombahuku topesapuaka nadosa haitu sabana tesa nadaa nisovadakara nanjalai Ia."

¹⁶ Guru-guru mpodava gahaitu batena nongau bo nompakasala tona ntanina. Ira natuvu nangoseaka dota rarara nadaa. Ira nangoe nompakalanga karora mboto bo notesa namomi ala raoseaka ntona dotara.

Pepatora mompakaroso pomparasaya

¹⁷ Sampesuvu-sampesuvu nipotoveku, toramo tesa niuli nu suro-suro nTuputa i Yesus Kristus bara ipia. ¹⁸ Niulira ivei: "Ane maparamo kaupu nu dunia, kana meumba topesapuaka anu mompongei-ngeika pomparasayata. Ira aga mangoseaka dota rarara nadaa bo ledo raoseakara dota nu Alatala." ^{†††} Tona haitumo nompakagero kasintuvu ntopomparasaya. Ira nikuasai dota-dota rarara nadaa, bo Nosa Gasu nu Alatala ledo ntoto naria nte ira.

²⁰ Sampesuvu-sampesuvu nipotoveku, posipakaroso pomparasayamo komiu nangoseaka pepaduduki nakana, sabana pepaduduki niparasayata haitu nagasa mpuu. Bo posambayamo ante pekeniaka Nosa Gasu nu Alatala. ²¹ Komiu kana bate-batena matuvu mantora pepotove nu Alatala ka komiu. Bo tongorakamo kakava nTuputa i Yesus anu mombadekei katuvu nabelo sampe ri kasae-saena ka kita sabana kabelo raraNa.

²² Komiu kana mompoasi tona da nolengga-lengga pomparasayara. ²³ Naria tona ntanina damo kasalandalana. Tulungimo ira ala ira rapakasalama lako ri pehuku, nasimbayu mpo porabutakamiu tona lako ri apu. Bo poasi munimo tona nikuasai dota rarara nadaa. Tulungi ira manjili ri dala nakana, tapi jagaimo, mbelaka komiu matekeni mangoseaka pokainggura nadaa. Potovemo tona nadosa tapi povuu matamo pokainggura.

Posambaya mantoiya Alatala

²⁴ Ratoiyatamo Alatala sabana Ia nakuasa nombajagai kita ala ledo rakabasakata pomparasayata. Ia nakuasa manggeni kita hau ri suruga mantingayo Ia riar kaogeNa, bo ledo maria salata, bo melabi kadamba rarata. ²⁵ Aga Ia saito-itoNa Alatala. Iamo nompakasalama kita sabana anu nipovia nTuputa Yesus Kristus. Jadi ratoiyatamo Ia, apa Iamo Alatala anu nelabi kaogeNa, Magau nipokumaaka. Iamo nabaraka bo nakuasa lako ri lamba pamulana, sampe sii-sii, bo sampe ri kasae-saena! Amin!

Taba lako nte yaku,
Yudas

19-May-2009@12:42, Backup Description=19-May-2009@09:53, snave -
26-May-2009@11:04, Backup Description=26-May-2009@11:03, B Altork - ◆◆◆

[†] Kajadia 4:3-8; 1 Yohanes 3:12 ^{††} Bilangan 31:15-16 [‡] Bilangan 16:1-35

^{††} 2 Petrus 3:3

Pompakita

Vamba nu Tesa

Isi buku hitu notesaki pompakita nipopakita i Yesus Kristus ka anaguruNa i Yohanes. NipopakitaNa anu majadi ri karoNa mboto bo nte manusia ri dunia. Jadi i Yesusmo Topompopakita, bo Ia muni tona nipopakita riara panggita hitu. Pamulana, Ia nipopakita mpo Ana nu Manusia anu nolipa ri olo kada-kada mpoindo (pasal 1:9-20). Naupu haitu Ia nipopakita mpo Ana Bimba neangga ri sinjori Gadera Kamagaua nu Alatala ri suruga (pasal 5:6-14). Naupu sia, Ia nipopakita mpo Tadulako nesavi jara bula (Pasal 19:11-16). Bo kaupuna, Ia nipopakita mpo Ana Bimba anu nomparenta nosangani-nggani nte Alatala ri ngata nu Alatala, haitumo Yerusalem nabaru (pasal 21:22-23, 22:1-5).

Buku hitu nitulisi tempo topomparasaya mpuu-mpuu nipandasa sabana pomparasayara i Yesus. Tempo haitu pura-pura todea Roma niparenta mombasomba Magau Mbaso Roma anu niuli Kaisar. Naria sanu topomparasaya nipatesi sabana ira ledo nadota nombasomba Magau haitu, niulira aga i Yesusmo Tupura, ledo Magau Kaisar. Tapi naria muni sanu noura nomparasaya sabana naeka rarana. Jadi, patuju nu tesa riara buku hitu ala mompakaroso rara ntopomparasaya ala ledo moura momparasaya i Yesus nau rapandasa.

Isi buku hitu nipasimbayu ka i Yohanes ante bara sako-ngaya pompakita. Nadea bunga nu tesa, jalili, bo pora-pa nipake ri pompakita hitu. Nakaja nombapaha batuana pura-pura, tapi pepatuduki nopoko bo nalanto, ivei: Nau damo rapandasa topomparasaya i Yesus, nee kita moura momparasaya. Sabana, i Yesus nipakakuasa nu Alatala bo kaupuna radagiNa Magau nu Seta bo pura-pura baliNa ntanina bo momparenta sampe ri kasae-sae-na. Bo kita anu bate-batena nangoseaka Ia manggava belo ri dunia nabaru bo momparenta mosangani-nggani nte Ia.

Riara buku hitu bara sako-mpapitu nipakatantu, evamo:

Pitu-ngaya belo nijanji (1:3, 14:13, 16:15, 19:9, 20:6, 22:7,14)

Pitu-ngaya potoiya Alatala (5:14, 7:12)

Pitu-ngata bo papitu nosa nu Alatala (1:4,11)

Pitu-nggada poindo (1:12) pitu-angu betue (1:16)

Pitu-mpopulu sura (5:1)

Pitu-angu tandu bo pitu-angu mata (5:6)

Pitu-angu tabue (8:21)

Pitu-angu songgo magau (12:3)

Pitu-ngaya pepandasa niisi riara pitu-ntonga tubu (15:6-7)

Papitu balengga bo papitu magau (17:9-10)

Bo naria muni ntanina. Lamoro papitu haitu nirapaka anu nagana bo ledo nakura nuapa-nuapa.

Isi nu Buku

Pantepuuna bo petabe (1:1-8)

Pompakita Pamulana: (1:9-3:22)

I Yesus nipopakita mpo Ana nu Manusia anu nolipa ri olo pitu-nggada poindo (1:9-20)

Petevai-petevai ka topangoseaka i Yesus ri pitu-ngata (Pasal 2-3)

Pompakita Karanduana: (4:1-16:21)

I Yesus nipopakita mpo Ana Bimba anu neangga ri sinjori Gadera Kamagaua nu Alatala ri suruga (Pasal 4-5)

Ana Bimba nombabuka pitu-mpopulu sura nibaluu (6:1-8:5)

Pitu-angu tabue nipopomoni (8:6-11:19)

Papitu tanda nirapaka anu majadi ngena (Pasal 12-16)

Pompakita Katataluna: (17:1-20:15)

I Yohanes nanggita mombine bajinga nosanga Babel (17:1-19:10)

I Yesus nipopakita mpo Tadulako nesavi jara bula nombadagi baliNa (19:11-21:8)

Pompakita Kaampuna: I Yohanes nanggita boti mombine nasadia rapoberei nu Ana Bimba, sangana Yerusalem Nabaru (21:9-22:5)
Petevai-petevai kaupuna (22:6-21)

Pantepuuna

1 Isi buku hitu notesaki kajadia-kajadia anu majadi bara maipia, anu nipopaisani nu Alatala ka i Yesus Kristus. I Yesus nitudu nu Alatala mompopaisani kajadia haitu ka topangoseaka Ia ala rasanira anu domo masae majadimo. Jadi i Yesus nombatudu malaekana hau mompopaisani anu majadi haitu ka batuaNa i Yohanes. ² Bo yaku, i Yohanes, nompasimbayu pura-pura anu nikitaku, haitumo tesa lako nte Alatala bo anu nipopaisani i Yesus Kristus.

³ Masana mpuu tona anu mombabaca tesa-tesa niboto riaru buku hitu ka todea, bo masana muni tona mangepe bo mompariara anu nitulisi riarana. Apa domo masae pura-pura kajadia nitesa ri sii mpuu-mpuu kana majadi.

Petabe lako nte i Yohanes ka todea topomparasaya ri pitu ngata

⁴ Sampesuvu-sampesuvu sampomparasaya anu nonturo ri pitu ngata ri propinsi Asia †. Yaku i Yohanes, merapi komiu mantarima katinonto bo belo lako nte Alatala anu nariamo lako ri lamba pamulana, bo naria sii-sii, bo maria sampe ri kasae-saena. Bo kuperapi ratarimamiu belo bo katinonto lako nte papitu Nosa nu Alatala anu naria ri ngayo Gadera Kamagaua nu Alatala, ††⁵ bo lako nte i Yesus Kristus. Iamo sabi anu namala raparasaya, Iamo tona paratama nipakatuvu mpanjili lako ri kamateNa. Iamo nomparenta pura-pura magau riaru dunia. Ia nompotove kita bo nombakabasaka kita lako ri dosata ante raa kamateNa. ⁶ Kita nipajadiNa todea riaru poparentaNa, kita nipajadiNa topanggeni pesomba anu manggeni pesomba ka TuamaNa Alatala. Masipato i Yesus ratoiya bo rabila, bo masipato Ia momparenta sampe ri kasae-saena! Amin!

⁷ Peintamo! Ia makava nibungu kulimu. ‡ Ia rakita ntona pura-pura, nau ira anu nombatosu usuNa. †† Bo pura-pura valaa manusia ri dunia motumangi mpojea manggita Ia. Haitu mpuu-mpuu majadi! Amin!

† propinsi Asia: Sii-sii niuli Torokii atau Turki. Peinta gambaran ngata ri kuli buku hitu. †† papitu Nosa nu Alatala: Peinta Yesaya 11:2; Zakharia 4:2,10; Pompakita 3:1; 4:4; 5:6. ‡ nibungu kulimu: Nabi Daniel nggaulu nombaboto anu nolenje mpo manusia makava nibungu kulimu. Peinta Daniel 7:13. †† ira anu nombatosu usuNa: Nabi Zakharia nggaulu nombaboto toYahudi (haitumo muli i Daud bo tupu ngata Yerusalem) motumangi mpojea manggita tona nitosu usuna. I Yesus nitosu usuna tempo Ia namate ri kayu salib. Peinta Zakharia 12:10 bo Yohanes 19:34.

⁸ Tupu Alatala nanguli, "Yakumo hii Pamulana bo Kaupuna. Yaku naria mamimo lako ri lamba pamulana, Yaku naria sii-sii bo Yaku batena maria sampe ri kasae-saena. Yakumo toNeliu KakuasaKu."

Pompakita paratama (1:9-3:22)

I Yesus nipopakita Ana Manusia nolipa ri olo mpoindo pitu-nggada

⁹ Yaku hii i Yohanes, sampesuvumi sampomparasaya. Yaku nombarasai susa bo pari nasimbayu ante pura-pura topangoseaka i Yesus, bo yaku muni najadi todea riaru PoparentaNa nasimbayu ante pura-pura topangoseaka i Yesus, bo yaku muni nosabara tempo nipandasa, nasimbayu ante pura-pura topangoseaka i Yesus. Yaku nitaniaka ri levuto Patmos, sabana nompatolele Tesa nu Alatala bo pepatuduki i Yesus. ¹⁰ Ri eo petupu yaku nikuasai Nosa Gasa nu Alatala, bo niepeku suara lako ri puriku namangga mpo moni ntabue. ¹¹ Suara haitu nanguli ivei: "Tulisimo anu mukita bo pakatu ka todea topomparasaya nonturo ri pitu ngata, haitumo ngata-ngata Efesus, Smirna, Pergamus, Tiatira, Sardis, Filadelfia bo Laodikia. ‡"

¹² Nangepe haitu, neili yaku mompeintaka isema notesa ka yaku. Tempo yaku neili, nikitaku papitu kada mpoindo bulava. ¹³ Ri olo kada mpoindo haitu naria saito tona, lenjena mpo Ana nu Manusia. Baju nipa-suaNa nandoe nakava ri kadaNa, bo bambaraNa nibeve bulava. ¹⁴ BalenggaNa bo buluaNa naramputi mpo kapa bo salju. Bo mataNa narega mpo vaya nu apu. ¹⁵ KadaNa nenggila mpo tambaga nitunu ri apu. Bo suaraNa namangga mpo soo nu uve oge. ¹⁶ Ri pale ngganaNa naria pitu-angu betue, bo lako ri ngangaNa nesuvu samata guma nomata ntimali bo natada mpuu. Bo lenjeNa mpo vanta nu eo natongo.

¹⁷ Nikitakupa Ia, kaliu-liu nadungga ntuobomo yaku ri ngayoNa mpo tomate. Tapi Ia nombatuu pale ngganaNa ri karoku bo nanguli ka yaku, "Nee maeka. Yakumo hii Pamulana bo Kaupuna. ¹⁸ Yakumo hii anu Natuvu. Bara ipia Yaku namatemo. Tapi peintamo, sii-sii Yaku natuvu mpanjili sampe ri kasae-saena. Yakumo nakuasa nantipale gunji kamatea bo ponturo ntomate. ¹⁹ Jadi, tulisimo pura-pura anu nikitamu, nau anu najadi sii-sii, nau anu majadi bara maipia. ²⁰ Dopa nisanimu batuana pitu-angu betue nikitamu ri pale ngganaKu hitu bo pitu nggada poindo bulava. Jadi ku-

‡‡ Peinta gambaran ngata ri kuli nu buku hitu.

pakalanto batuana ivei: pitu-angu betue haitu nirapaka papitu malaeka anu nanggeniaka todea topomparasaya anu nonturo ri pitu-ngata. Bo pitu nggada poindo bulava haitu nirapaka todea topomparasaya anu naria ri pitu-ngata haitu.”

Petevai ka todea topomparasaya ri ngata Efesus

2 Bo Ana nu Manusia nombatudu yaku motulisi ka malaeka anu nanggeniaka todea topomparasaya ri ngata Efesus ivei:

“Hitumo tesa lako nte Yaku anu nantipale pitu-angu betue ri pale ngganaKu bo nolipa ri olo pitu-nggada poindo bulava.

² NisaniKu pura-pura pokainggumiu. Komiu natutu nokarajaa ka Yaku bo komiu nosabara tempo nipandasa sabana nomparasaya Yaku. NisaniKumo komiu ledo nasituju ante pokainggu ntona nadaa. Tona nom-pangaku karona suro-suroKu tano ledo nakana, ni-paresamiu pokainggura sampe nalantomo ira topodava. ³ Komiu mpuu-mpuu nosabara. Komiu nipandasa ntona sabana pomparasayamiu, bo ledo naupu raramiu nangoseaka Yaku.

⁴ Tapi naria sangaya inggumiu anu ledo nipodambaKu. Komiu domo nompotove Yaku mpo bara ipia tempo komiu dako nomparasaya. ⁵ Nakavao ntotomo kanavumiu! Haitu sampe Kuuli ka komiu, pakabelo-belo! Kajeamo komiu, bo poviamo mpo anu nipoviamiu ri pamulana. Ane ledo majea komiu, Kualasi kada mpoindo bulavamiu lako ri ponturona. ⁶ Tapi nau ivesia, naria sangaya inggumiu nipokonoKu, haitumo navuu matamiu nanggita pokainggu ntona anu nangoseaka pepatuduki i Nikolaus, anu nipovuu mataKu muni.

⁷ Isema-sema naria talingana epemo pakabelo-belo anu niuli Nosa Gasa nu Alatala ka todea topomparasaya ri umba-umba ngata. Isema-sema padagi kana Kudekei mangande vua lako ri Kayu Katuvua [†] anu naria riaru Pampa nu Alatala ri suruga.”

Petevai ka todea topomparasaya ri ngata Smirna

⁸ Naupu haitu nitudu Ana nu Manusia vai yaku motulisi ka malaeka anu nanggeniaka todea topomparasaya ri ngata Smirna ivei:

“Hitumo tesa lako nte Yaku anu niuli Pamulana bo Kaupuna, anu namatemo bo natuvu mpanjili.

⁹ NisaniKu kasusa bo kapari nirasaimiu. NisaniKu komiu mpuu-mpuu napepa, tapi kakanana komiu nakalumana riaru pomparasayamiu. NisaniKu komiu nislai ntona anu nompangaku karona toYahudi tano ledo nakana. Ira aga todea nu Magau nu Seta.

[†] Kayu Katuvua: Kayu Katuvua nikava ri Pampa Eden nggaulu-name. Isema-sema mangande vua kayu haitu ledo mamate tapi matuvu sampe ri kasae-saena. Peinta Kajadia 2:9; 3:22-24.

¹⁰ Tapi nee maeka komiu mantingayo kasusa bo kapari anu domo masae kana rarasaimiu. Pariaramo! Magau nu Seta mompopesua sanu komiu hau rantarunggu bo mompesori komiu ala moura pomparasayamiu. Komiu rapandasa sapulu eo kasaena. Tapi nee maupu raramiu momparasaya Yaku nau komiu rapatesi, sabana Kudekei ka komiu hadia padagi, haitumo komiu matuvu mabelo sampe ri kasae-saena.

¹¹ Isema-sema naria talingana epemo pakabelo-belo anu niuli Nosa Gasa nu Alatala ka todea topomparasaya ri umba-umba ngata. Isema-sema padagi ledo ntoto mambela pehuku anu niuli kamatea karongganina ^{††}.”

Petevai ka todea topomparasaya ri ngata Pergamus

¹² Naupu haitu Ana nu Manusia nombatudu yaku motulisi ka malaeka anu nanggeniaka todea topomparasaya ri ngata Pergamus ivei:

“Hitumo tesa lako nte Yaku anu naria guma nomata ntimali bo natada mpuu.

¹³ NisaniKumo ngata niponturomiu, haitumo ri ngata ponturo Magau nu Seta. Tapi naupa ivesia, naroso pomparasayamiu Yaku. Tempo sabiKu nosanga i Antipas nipatesi ri ngatamiu, komiu ledo nesapu nomparasaya Yaku. I Antipas haitu sabiKu bo ia bate-bate-na nomparasaya Yaku sampe ia nipatesi ntona ri ngatamiu, haitumo ri ngata nikuasai Magau nu Seta.

¹⁴ Tapi da nariapa bara sako-ngaya inggumiu anu ledo nipodambaKu. Naria tona nte komiu nangoseaka pepatuduki i Bileam nggaulu. I Bileam nompatuduki Magau Balak mompakanavu toIsrael riaru dosa [‡]. Nipatudukina ia mompakeni ira mangande kandea nipopali sabana nipakande ka tupu-tupu ntanina, bo nompatuduki ira ledo makuya mosipogau nte tona ledo bereina mboto. ¹⁵ Bo naria muni nte komiu anu nangoseaka pepatuduki i Nikolaus. ¹⁶ Jadi Kuuli ka komiu, kajeamo lako ri dosamiu! Ane ledo majea komiu, Yaku masalisa makava nte komiu bo mangeva ira ante guma anu naria ri ngangaKu.

¹⁷ Isema-sema naria talingana epemo pakabelo-belo anu niuli Nosa Gasa nu Alatala ka todea topomparasaya ri umba-umba ngata. Isema-sema padagi, Kudekei ka ia roti Manna anu nitabuniaka ^{‡‡}. Bo Kudekei muni vatu nabula simbo sangu ka ira. Ri vatu

^{††} kamatea karongganina: Peinta Pompakita 20:6,14. [‡] Peinta Bilangan 22:1-6; 25:1-3. ^{‡‡} Roti Manna anu nitabuniaka: Roti nipopanau nTupu ka toIsrael ri karava bai bara ipia niuli roti manna. Peinta Pesuvu 16:13-16. Nabi Musa nitudu nTupu mombadika sanu manna ri kura bo raboli riaru Peti Pojanji. Peinta Pesuvu 16:31-35. Nantuntuni tesa ntoYahudi nggaulu, kura nte manna haitu nitabuniaka Nabi Yermia ri bolo vatu ri Bulu Nebo tempo Banua nu Alatala nigerosi 586 mpae dopame nipoanaka i Kristus. Niulira manna nitabuniaka haitu batena ratabuniaka sampe makava Magau Topepakasalama anu nijanji nTupu. Bo tempo haitu, rapakandeNa todeaNa ante roti manna.

nabula haitu nitulisi sanga nabaru anu ledo ntoto nisani ntona ntanina, aga tona mantarima vatu nabula haitu mangisanina.”

Petevai ka todea topomparasaya ri ngata Tiatira

¹⁸ Bo nitudu Ana nu Manusia vai yaku motulisi ka malaeka anu nanggeniaka todea topomparasaya ri ngata Tiatira ivei:

“Hitumo tesa lako nte Yaku, Ana nu Alatala anu nomata narega mpo apu bo nokada nenggila mpo tambaga.

¹⁹ NisaniKumo pura-pura pokainggumiu. NisaniKu tovemiu bo pomparasayamiu nte Yaku. NisaniKu bagomiu nantulungi Yaku bo komiu nosabara tempo nipandasa. Bo nisaniKu bagomiu nantulungi Yaku siisii nabelopa pade anu nipoviamiu tempo komiu dako nomparasaya Yaku.

²⁰ Tapi da nariapa sangaya pokainggumiu anu ledo ntoto nipodambaKu. Haitumo mombine anu nosanga i Izebel † anu nompangaku karona nabi. Komiu nompaloga ia nompatuduki bo nombabagiu topangoseaka Yaku. Ia nompatuduki ira mosipogau ante tona ledo bereira mboto bo mangande kande nipopali sabana nipakande ka tupu-tupu ntanina. ²¹ NidekeiKumo loga ka ia majea lako ri pokaingguna nadaa haitu, tapi ia ledo ntoto nadota majea. ²² Jadi epemo! Yaku mompakadua ia sampe ia aga maturu ri paturuna. Bo tona nangoseaka pokaingguna nobualo ††, Kupambela susa bo pari nadaa, ane ledo menonto ira nangoseaka pokaingguna. ²³ Bo ana-anana Kupatesi sampe malanto ka pura-pura topomparasaya, Yakumo anu nomparesa pekiri bo rara ntai manusia, bo Yakumo anu mombabalasi komiu saito-saito nangoseaka pokainggumiu.

²⁴ Tapi naria muni komiu toTiatira ledo nangoseaka pepatuduki nadaa haitu bo ledo nadota neguru anu niuli ntona ‘pangisani Magau nu Seta anu nalonto.’ Kuuli ka komiu ivei: Ledo Kutambai parenta-parenta ntanina ka komiu. ²⁵ Kingisi pakarosomo pepatuduki anu naria nte komiu sampe Yaku makava mpanjili.

²⁶⁻²⁷ Isema-sema padagi bo mangoseaka dotaKu sampe ri kaupuna, Kudekeika kuasa nasimbayu mpo nitarimaKu lako nte TuamaKu. Kudekei kuasa ka ira momparenta manusia ri umba-umba ri dunia. Ira momparenta ante ase poboba. Bo rapakaropura balira nasimbayu mpo tona norupusaka kura tana. ²⁸ Bo Kudekei ka ira betue Pompaeo. ††

²⁹ Isema-sema naria talingana epemo pakabelo-belo anu niuli Nosa Gasu nu Alatala ka todea topomparasaya ri umba-umba ngata.”

† Izebel: 1 Raja-Raja 16:31; 21:25. †† nobualo: riaru Buku Gasu nobualo nirapaka tona anu nangoseaka tupu-tupu ntanina, bo ledo natutu nangoseaka Alatala. † ase poboba bo kura tana: Peinta Mazmur 2:8-9. †† betue Pompaeo: Peinta Pompakita 22:16.

Petevai ka todea topomparasaya ri ngata Sardis

3 Ana nu Manusia netudu vai ala kutulisi ka malaeka anu nanggeniaka todea topomparasaya ri ngata Sardis ivei:

“Hitumo tesa lako nte Yaku anu nombakuasai papitu Nosa nu Alatala †† bo anu nantipale pitu-angu betue.

NisaniKumo pura-pura pokainggumiu. Komiu nireke ntona topomparasaya naroso, tano pomparasayamiu haitu namatemo. ² Pembangumo! Pakarosomo pomparasayamiu anu damo sakide. Dopame mamate pomparasayamiu anu damo sakide, pakaroso mami-mo. Apa nikitaKu lako ri pura-pura pokainggumiu, nau sangaya dopa ria nagana ri panggita nu Alatala. ³ Jadi toramo pepatuduki niepemi bo nitarimamiu bara ipia. Oseakamo pepatuduki haitu bo kajeamo lako ri dosamiu. Ane ledo mainga komiu, sampesanika Yaku makavamo mombahuku komiu. Yaku makava mpo topangangga, ledo rasaniamiu maipia Yaku makava.

⁴ Tapi da nariapa nte komiu ri ngata Sardis bara sako-ndua tona nombajagai pakeara sampe ledo nata-pa. Iramo anu mamala molipa mosangani-nggani ante Yaku mopakea mputi, sabana iramo anu masipato molipa ante Yaku. ⁵ Isema-sema padagi kana radekeika baju mputi. Bo sangara ledo Kupakalipo lako ri Buku Katuvua, tapi Kusaliku ri ngayo nTuamaKu bo malaeka-malaekaNa.

⁶ Isema-sema naria talingana epemo pakabelo-belo anu niuli Nosa Gasu nu Alatala ka todea topomparasaya ri umba-umba ngata.”

Petevai ka todea topomparasaya ri ngata Filadelfia

⁷ Ana nu Manusia netudu vai ala kutulisi ka malaeka anu nanggeniaka todea topomparasaya ri ngata Filadelfia ivei:

“Hitumo tesa lako nte Yaku anu nagasa bo nanoa. Yakumo nantipale gunji nu vamba Poparenta Magau Daud. ††† Ane Yaku mombaungge vamba, ledo ria saitoa tona mamala mombatutuina, bo ane Yaku mombatutui vamba ledo muni maria saitoa tona mamala mombaunggena.

⁸ NisaniKumo pura-pura pokainggumiu. NisaniKu munimo ledo naroso ntoto pomparasayamiu, tapi komiu natutu nangoseaka tesaKu bo ledo nisapumi Yaku. Epemo! Yaku nobuka ka komiu sanga vamba, bo ledo ria saitoa tona mamala mombatutuina. ⁹ Naria tona najadi todea Magau nu Seta anu nanguli iramo toYahudi, tano mai ledo, aga davara. Tapi epemo! Ira

†† papitu Nosa nu Alatala: peinta Pompakita 1:4. ††† gunji Poparenta Magau Daud: gunji nirapaka kuasa, haitumo kuasa ri Poparenta Magau Daud. Peinta Yesaya 22:22. Alatala nojanji ka Magau Daud mulina batena majadi magau sampe ri kasae-saena. I Yesus muli Magau Daud. Peinta Matius 1:1, Lukas 2:4.

kana Kupopantaputu ri ngayomiu. Bo raulira Yaku mpuu-mpuu nompotove komiu.

¹⁰ Komiu nangoseaka parentaKu anu nanguli pakaroo rara bo mosabara tempo nipandasa. Sabana haitu, Kusaliku komiu lako ri kasusa makava ri njumangu dunia mompesori tona nonturo ri dunia. ¹¹ Domo masae Yaku makava! Jadi kingisi pakarosomo pepatuduki nipatuduki ka komiu ala komiu manggava hadia padagi lako nte Alatala. Nee sampe maria tona mangago hadia haitu lako nte komiu.

¹² Isema-sema padagi, ia masimbayu mpo tinja naroso ri banua nTuamaku Alatala. Ia matetida ri suruga sampe ri kasae-saena. Bo ri karona Kutulisi sanga nTuamaku Alatala, bo sanga nu ngata nTuamaku Alatala, haitumo Yerusalem nabaru anu manau lako nte Tuamaku Alatala ri suruga. † Bo sangaKu mboto nabaru kana Kutulisi ri karona.

¹³ Isema-sema naria talingana, epemo pakabelo-belo anu niuli Nosa Gasu nu Alatala ka todea topomparasaya ri umba-umba ngata.”

Petevai ka todea topomparasaya ri ngata Laodikia

¹⁴ Ana nu Manusia netudu vai ala kutulisi ka malaeka anu nanggeniaka todea topomparasaya ri ngata Laodikia ivei:

“Hitumo tesa lako nte Yaku anu nipoposanga ‘Amin’, haitumo sabi natutu notesa anu nakana. Yakumo Tupu †† nu pura-pura anu nipajadi nu Alatala.

¹⁵ NisaniKumo pura-pura pokainggumiu. Komiu ledobaliKu bo ledomuni topangoseaka Yaku. Aginamokomiu nompoara atau nompoyo. ¹⁶ Tapi komiu aganetanggode, ledonompoara, ledonompoyo. ‡ Sabana haitu Kuteveulusaka komiu lako ri ngangaKu. ¹⁷ Komiu nanguli, ‘Kami hii nakalumanamo, nagana puramokatuvu kami, domo kami paraluu nuapa-nuapa.’ Tapi kakanana ledonisanimiu katuvumiu mboto! Komiu nelabi napakasi. Katuvumiu aga nipoasi mata ntona. Komiu napakasi mpuu, naburo matamiu, bo novuloamo komiu. ¹⁸ Haitu sampe Kutevai ka komiu ivei: Alimo bulava nipakagasa riara apu lako nte Yaku ala komiu mpuu-mpuu makalumana ri panggitaKu. Bo alimunimo pakea mputi lako nte Yaku, ala komiu mamala mopakea bo ledomaeya matamiu rakita ntona komiu novuloa. Bo alimunimo pakuli ragese ri matamiu ala komiu mamala mekita mpanjili.

¹⁹ Isema-sema nipotoveKu, Kuonteaka bo Kujeani alampopatuduki ira. Haitu sampe Kuuli ka komiu, pakadidi raramiu bo kajeamo lako ri dosamiu. ²⁰ Peintamo!

† ngata Yerusalem nabaru: Pompakita 21:9-22:5. †† Yakumo Tupu Yakumo puna ATAU: Yaku nipopale nu Alatala mompajadi pura-pura anu naria. ‡ basa Yunani: 15 NisaniKumo pura-pura pokainggumiu. Komiu ledonaranindi bo ledomuni napane. Aginapa komiu maranindi atau mapane. ¹⁶ Tapi komiu aga nalongo, ledonaranindi, ledonapane.

Hitumo Yaku neangga nombatanede-nede ri vamba. Ane maria tona mangepe suaraKu bo mombabuka vamba, Yaku mesua nte ia bo mangande mosangganinggani ante ia. ††

²¹ Isema-sema padagi, ia Kupaloga monturo moparenta mosanggani nte Yaku ri Gadera KamagauaKu, nasimbayu mpo Yaku muni najadi padagi bo sii-sii nonturo bo noparenta nosanggani-nggani nte TuamaKu ri GaderaNa.

²² Isema-sema naria talingana, epemo pakabelo-belo anu nitesa Nosa Gasu nu Alatala ka todea topomparasaya ri umba-umba ngata.”

Pompakita karanduana (4:1-16:21)

I Yesus nipopakita mpo Ana Bimba neangga ri sinjori Gadera Kamagaua nu Alatala ri suruga

4 Naupu haitu naria vai anu nipopakita ka yaku. Nikitaku sanga vamba natebuka ri suruga. Bo niepeku suara pamulana anu notesa ka yaku pangane, kamanggana mpo moni ntabue. Nangulimo suara haitu ka yaku, “Pompene tumai! Kupopakita ka iko anu majadi maliu anu nikitamu pangane.” ² Sampesanika yaku nikuasai Nosa Gasu nu Alatalamo bo nikenina yaku hau ri suruga. Nakava hamai, nikitaku sanga Gadera Kamagaua, bo naria saito Toponturo ri Gadera haitu. ³ Toponturo haitu lenjeNa damo nenggila mpen-gaya-ngaya surana mpo mata sinji anu nosanga vatu yaspis, bo vatu sardis. Naria muni tirauve nagavu mpo vatu zamrud nombalili Gadera haitu. ⁴ Bo naria muni ropulu bo ampa gadera ntanina nantiku Gadera pangane. Gadera ntanina haitu niponturo ntotua ropulu bo ampa. Ira nopakea mputi bo nosonggo bulava. ⁵ Lako ri Gadera Kamagaua pangane nesuvu kila damo mparea nevanta, bo gente nu guru damo nosinjaleva poguna. Ri ngayo Gadera haitu naria muni pitu-angu sulo narega. Pitu-angu sulo haitu batuana papitu Nosa nu Alatala. ††6 Bo ri ngayo Gadera haitu naria muni sangaya nikitaku eva tasi nevayo mpo kaca.

Ri sia naria ampa Anu Natuvu, nombatiku Gadera haitu. Nadea mpuu matara, ri njumangu karora naria mata, ri ngayora bo ri bengora. ⁷ Anu Natuvu pamulana lenjena mpo singa, bo karanduana lenjena mpo japi lakina. Katataluna lenjena mpo manusia, bo kaampana lenjena mpo love mbaso tempo nevoru. ⁸ Anu Natuvu haitu simbo aono kapina, bo ri njumangu karora naria mata, nau ri tambe kapira muni. Eo bongi ira ledonenonto nodade, “Nagasa, nagasa, nagasa
Tupu Alatala Neliu KakuasaNa.

†† mangande mosanggani-nggani nte ia: mosimpovega rapa nte ia. Peinta 1 Yohanes 1:3. †† papitu Nosa nu Alatala: Peinta Pompakita 1:4.

Ia naria mamimo lako ri lamba pamulana,
bo sii-sii Ia naria.

Bo Ia batena maria sampe ri kasae-saena."

⁹Anu Natuvu haitu nombatoiya bo nombabila bo nosukuru nte Toponturo ri Gadera Kamagaua anu natuvu sampe ri kasae-saena. Tempo ira netoiya ivesia,
¹⁰ropulu bo ampa totua haitu nantaputu sampe ri tana ri ngayo nToponturo haitu. Ira nombasomba Ia anu natuvu sampe ri kasae-saena, bo nialara songgo bulava lako ri balenggara mboto bo nituura ri ngayo Gadera Kamagaua nu Alatala, tanda pobilara Ia. Bo nilira ivei:

¹¹"O, Alatala, Tupu kami,
aga Komiu masipato ratoiya bo rabila kami.
Aga Komiumo nakuasa,
Komiumo nompajadi pura-pura anu naria.
Bo lako ri dotaMiu mboto sampe pura-pura haitu nipajadi bo naria."

Sura nibaluu nivole nu Ana Bimba

5 Naupu haitu nikitaku santau sura nibaluu ri pale nggana nToponturo ri Gadera Kamagaua haitu. Sura haitu nitulisi ntimali bo nipulu pitu-mpopulu ala ledo mamala rabuka ntona. ²Bo nikitaku naria saito malaeka naroso mpuu nakava nekutana ante suara namangga, "Isema masipato mombabuka populu sura bo mombavole sura hitu?" ³Tapi ledo ntoto ria saitoa masipato mombabuka sura haitu bo mombabaca isina, nau ri suruga, nau ri dunia, nau ri tambe ntana. ⁴Nanggita haitu, notumangi yaku nonjodu-njodu bo nasusa mpuu raraku sabana ledo ntoto naria saitoa tona masipato mombabuka bo mombabaca isi nu sura haitu. ⁵Nanggita yaku notumangi, naria saito totua lako nte ira ropulu bo ampa haitu nanguli ka yaku, "Nee motumangi! Peintamo! Nariamo padagi. Sangana Singa lako ri valaa i Yehuda, Muli Magau Daud †. Iamo masipato mombabuka sura pitu-mpopulu haitu."

⁶Naupu haitu nikitaku sangu Ana Bimba †† neangga ri sinjori Gadera Kamagaua bo nipatiku nu ampa Anu Natuvu bo totua-totua gahaitu. Ri karoNa nikitaku bela baka, belana tempo Ia nipatesi nggaulu. Ri balenggaNa naria papitu tanduNa bo mataNa muni pitu-angu. Pitu-angu mataNa haitu, batuana papitu Nosa nu Alatala anu nituduNa hau ri njumangu dunia. ⁷Bo nekaparaimo Ana Bimba haitu mangala sura nibaluu lako ri pale nggana nToponturo ri Gadera Kamagaua. ⁸Tempo Ana Bimba nangala sura haitu, nantaputumo ampa Anu Natuvu, bo ropulu bo ampa totua ri ngayoNa mombasomba Ia. Ri palera saito-saito nar-

† Singa lako ri valaa i Yehuda: Peinta Kajadia 49:9-10. muli Magau Daud (basa Yunani: Kale i Daud); batuana Magau Topepakasalama anu neumba lako ri muli Magau Daud. Peinta 2 Samuel 7:12-13; Yesaya 11:10; Pompakita 22:16. †† Ana Bimba: Yesaya 53:7; Yohanes 1:29; Pompakita 11:10; 22:16

ia kacapi bo tubu bulava niisi dupa anu navangi mpuu. Dupa haitu nirapaka posambaya ntodea nu Alatala.

⁹Totua-totua gahaitu nodade sanggayu dade nabaru ka Ana Bimba ivei:

"Komiumo masipato mangala sura haitu bo mombabuka populuna.

Sabana, Komiu nipatesi bo ante raa nggamateMiu haitu

nitoloMiu manusia lako ri njumangu dunia majadi todea nu Alatala,

haitumo tona lako ri pura-pura ngata,
bo lako ri pura-pura valaa bo tona lako ri mpengayangaya basa ri dunia.

¹⁰Ira nipajadiMiu magau bo topanggeni pesomba anu nanggeni pesomba ka Tuputa Alatala.

Bo ira moparenta mpo magau ri dunia hitu."

¹¹Naupu haitu nipeintaku, bo niepeku suara malae-ka nadea, nonjobu-njobu bo nojuta-juta kadeana. Ira nombatiku Gadera Kamagaua nosanggani-nggani ante ampa Anu Natuvu bo ropulu bo ampa totua. ¹²Bo nodademo ira ante suara namangga ivei:

"Ana Bimba anu nipatesi nggaulu,
masipato ratesata kuasaNa bo kakalumanaNa, no-
toNa bo kabarakaNa.

Iamo masipato rabila bo ratoiya bo rapakaoge."

¹³Pade niepeku munimo suara nu pura-pura anu natuvu ri suruga, ri tana, ri tambe ntana, rantasi, bo pura-pura anu natuvu nodade ivei:

"Toponturo ri Gadera Kamagaua bo Ana Bimba haitu masipato ratoiya bo rabila bo rapakaoge,
bo kuasaRa masipato ratesata sampe ri kasae-saena."

¹⁴Bo nepasiosemo ampa Anu Natuvu haitu, "Amin, nakana mpuu!" Bo nantaputumo totua-totua gahaitu sampe ri tana mombasomba Alatala.

Pitu-mpopulu sura nibuka nu Ana Bimba

6 Naupu haitu nikitaku Ana Bimba nombabuka populu paratama. Pade niepeku saito lako ri ampa Anu Natuvu haitu notesa ante suara namangga mpo moni guru kede. Niulina, "Kamaimo!" ²Nipeintaku, naria sangu jara bula. Topesavina nanggangisi pana bo nidekei ka ia songgo, mpo songgo nipoposonggoka tona padagi riarar mposieva. Bo haimo ia mpo tadulako mombadagi balina.

³Naupu haitu, Ana Bimba nombabuka populu karanduaana bo niepeku Anu Natuvu karanduaana nanguli, "Kamaimo!" ⁴Bo nesuvu munimo sangu jara nalei buluna. Topesavi jara haitu nidekeika kuasa mpoposonggarau manusia ri dunia ala ira mosipatesi. Bo ia nidekeika guma nambaso samata.

⁵Naupu haitu Ana Bimba nombabuka populu katataluna. Bo niepeku Anu Natuvu katataluna nanguli, "Kamaimo!" Nipeintaku, naria munimo sangu jara

navuri buluna, bo topesavi jara haitu nanggungisi daci potimba *tandana mapepa kande*.⁶ Naupu haitu niepeku suara lako ri olo ampa Anu Natuvu pangane nanguli, "Ali nu gando salite nasimbayu nte gaji saeo, bo ali labu nu ose talu-lite nasimbayu muni nte gaji saeo. Aga nee rapakagero talua zaitun bo talua anggur!"

⁷ Naupu haitu Ana Bimba nombabuka populu kaampama. Bo niepeku suara lako ri Anu Natuvu kaampama nanguli, "Kamaimo!"⁸ Naliu haitu nikitaku sangu jara navaa buluna! Topesavi jara haitu nosanga "Kamatea." Bo anu netuntuni ri purina nosanga "Ponturo Ntomate." Ira randua haitu nidekeika kuasa mombabagi ampa pura-pura manusia ri dunia bo mompatesi sabagia. Naria sanu namate tempo posieva, naria sanu namate tempo nu ara, naria sanu namate tempo dua timboro, bo naria muni sanu namate nikande binatabinata nasingi ri dunia.

⁹ Naupu haitu Ana Bimba nombabuka populu kaalimana. Bo nikitaku ri tambe Lanta Pesomba naria nyawa-nyawa ntona namate anu nipatesi sabana nompatolele Tesa nu Alatala bo ledo nenonto notesaki pomparasayara i Yesus.¹⁰ Ira nongare sanggani ante suara namangga mpuu, "O Pue, Komiu nelabi nakuasa! Komiu nagasa bo nanao! Sakuyapa kasaena pade ratangaraMiu bo rabalasiMiu tona nadaa ri dunia nompatesi kami?"¹¹ Naupu haitu, ira saito-saito nidekeika santonga baju mputi. Bo nangulimo Alatala ka ira, "Posabaramo sampalaipa sampe magana kadeana roamiu sampokarajaa, haitumo sampesuvumi sampomparasaya anu rapatesi nasimbayu mpo komiu."

¹² Naupu sia, nikitaku Ana Bimba nombabuka populu kaaonona. NibukaNapa, nalingu mbasomo bo mata nu eo najadi navuri mpo karu vuri. Bo bula najadi nalei njumangu mpo raa.¹³ Bo betue-betue nanavu sampe ri tana nasimbayu mpo vua kayu naleso naronto lako ri pantakana tempo niburu mpoi ri narimboso.¹⁴ Bo langi nekonjo nasimbayu mpo ompa nibaluu. Bo pura-pura bulu bo pura-pura levuto rara ntasi nolinja lako ri ponturora.¹⁵ Tempo haitu hau puramo tona ri dunia netabuni riaro bolo-bolo vatu bo ri kele-kele vatu ri buluna, haitumo magau-magau ri dunia, topoparenta-topoparenta, tadulako-tadulako, tona nakalumana, tona naroso, pura-pura tona najadi batua bo tona biasa.¹⁶ Nongaremo ira ka bulu-bulu bo vatu-vatu, "Ivumo kami! Tabuniakamo kami ala domo rakita mata nToponturo ri Gadera Kamagau haitu. Ivumo kami ala kami ledo rapambela rau rara nu Ana Bimba!"

¹⁷ Apa nakavamo eo nipoviora rara manusia, tempo Alatala bo Ana Bimba mompopakita rau raraRa. Nau saitoa ledo maria mompakule mombatidamaka rapambela rau rara haitu!

Batua-batua nu Alatala nimere ala ledo mambela kasusa-kasusa makava

⁷ Naupu haitu, nikitaku ampa malaeka neangga ri pata-njulapa dunia. Ira nombataamaka piori rim-boso lako ri pata-njulapa dunia ala piori haitu ledo meburu ri tasi bo ri kabatana bo ri kayu-kayu.² Bo nikitaku munimo saito malaeka ntanina nesuvu lako ri mpandakena. Nikenina mere lako nte Alatala anu Natuvu. Bo nongaremo ia ante suara namangga ka ampa malaeka pangane, anu nidekei nu Alatala ka kuasa mompakagero kabatana bo tasi.³ Niulina, "Nepa ruru rapakageromiu tasi bo kabatana bo kayu-kayu dopame kami mombamere kire ntopangoseaka Alatala ala ira ledo rapambela kasusa-kasusa haitu."

⁴ Bo niepeku kadea ntona nimere kirera, saatu pata-pulu bo pata-njobu. Ira lako ri muli sapulu randua ana i Yakub anu niuli toIsrael.⁵ Lako ri mulira sapulu randua valaa i Israel niala simbo sapulu ronjobu kadeana. Lako ri muli i Yehuda sapulu ronjobu nimere. Ivesia muni lako ri muli i Ruben sapulu ronjobu, lako ri muli i Gad sapulu ronjobu,⁶ muli i Asyer sapulu ronjobu, muli i Naftali sapulu ronjobu, muli i Manasye sapulu ronjobu,⁷ muli i Simeon sapulu ronjobu, muli i Lewi sapulu ronjobu, muli i Isakhar sapulu ronjobu,⁸ muli i Zebulon sapulu ronjobu, muli i Yusuf sapulu ronjobu, bo lako ri muli i Benyamin sapulu ronjobu muni.

I Yohanes nanggita manusia nadea mpuu

⁹ Naupu haitu, naria vai anu nipopakita ka yaku. Nikitaku nadea mpuu manusia, ledo rapakule ntona mombabila kadeana! Ira topomparasaya lako ri njumangu dunia, lako ri pura-pura ngata, lako ri pura-pura valaa, bo tona lako ri pura-pura basa ri dunia. Ira neangga ri ngayo Gadera Kamagau nu Alatala bo ri ngayo Ana Bimba. Ira nopakea mputi pura bo novenggo-venggo tava, tandana nadamba rarara.¹⁰ Bo nongaremo ira ante suara namangga,

"Kamaimo kita mombatoiya bo mombabila Alatala anu nonturo ri Gadera Kamagau!

Kamaimo kita mombatoiya bo mombabila Ana Bimba, sabana Iramo nompakasalama kita!"

¹¹ Pura-pura malaeka muni neangga nombatiku Gadera Kamagau, bo totua-totua, bo ampa Anu Natuvu. Pura-pura ira nantaputu sampe ri tana ri ngayo Gadera Kamagau nombasomba Alatala.¹² Niulira,

"Amin! Ratoiyata Tuputa Alatala! Rapakaogeta Ia!

Ratesata kanotoNa, raulita tarima kasi ka Ia.
Rabilata Ia bo ratesata kuasaNa bo kabarakana
sampe ri kasae-saena. Amin!"

¹³ Naupu sia, naria saito totua lako nte ira ropulu bo
ampa haitu nompekutana nte yaku ivei: "Isema tona
nopakea mputi gahaitu? Lako ri umba ira?"

¹⁴ Nesanamo yaku, "Tua, ledo nisaniku, komiu
nangisanina."

Bo nangulimo ia ka yaku, "Ira gahaitumo tona ni-
pakasalama tempo pepandasa anu nelabi mpuu
kadaana. Nitoposira pakeara sampe naramputi ante
raa nu Ana Bimba, haitumo, dosara niampungi.

¹⁵ Haitu sampe ira neangga ri ngayo Gadera Kama-
gaua nu Alatala. Eo bongi ira ledo nenonto netupu bo
nombasomba Alatala riaru Banua nu Alatala. Bo Alata-
la anu nonturo ri Gadera KamagauaNa haitu nosang-
gani-nggani ante ira ala mombalendu ira. ¹⁶ Ira ga-
haitu domo mombarasai ara ntai bara bai ntambolo.
Bo ira domo muni rapapusi mata nu eo bara mom-
barasai eo mpane. ¹⁷ Sabana, Ana Bimba anu naria ri
sinjori Gadera Kamagaua nu Alatala haitu nompoevu
ira. Ia nombanini ira hau ri mata uve anu nombadekei
katuvua nabelo. Bo Alatala mboto nompaisi pura-pura
uve mata lako ri matara *mombaondopi ira*."

Ana Bimba nombuka pompulu kapapituna

8 Tempo Ana Bimba nombabuka populu kapapitu-
na, nalino njii riaru suruga nitasere santanga jaa
kasaena. ² Bo nikitaku papitu malaeka neangga ri
ngayo nu Alatala. Ira nidekeika pitu-angu tabue.

³ Naupu haitu naria saito malaeka ntanina nakava
neangga ri ngayo Lanta Pesomba. Malaeka haitu
nanggeni santonga tubu bulava rapotunju dupa.
Nadea dupa nidekei ka ia ratunjuna majadi pesomba
ka Alatala nosanggani-nggani ante posambaya nto-
dea nu Alatala pura-pura. Bo nitunjuna dupa haitu ri
Lanta Pesomba anu nipovia lako ri bulava. Lanta haitu naria
ri ngayo Gadera Kamagaua nu Alatala. ⁴ Tempo malae-
ka nombatunju dupa haitu, ununa nosumoa ri ngayo
nu Alatala nosanggani-nggani ante posambaya
ntodea nu Alatala. ⁵ Naupu haitu nialana tubu potunju
dupa haitu bo niisina ante ruti nu apu lako ri bavo Lan-
ta Pesomba. Bo nitedakana hau riaru dunia.
Nitedakanapa ruti nu apu haitu, nepogumo guru kede
bo kila damo mpavende bo najadimo lingu.

Papitu tabue nipopomoni

⁶ Naupu haitu papitu malaeka nidekeika pitu-angu
tabue pangane, nompakasadia mompopomoni tabue-
na saito-saito.

† nitoposira pakeara sampe naramputi ante raa Ana Bimba: Bat-
uana, Alatala nompakalali dosara sabana i Yesus nipatesi bo raaNa
natiti. Peinta 1 Yohanes 1:7.

⁷ Bo malaeka pamulana nompopomoni tabuena.
Kaliu-liu nauda esi bo apu nogalo raa sampe ri tana bo
naromba mpuu. Bo sabagia lako ri tatalu bagia tana
naupu sanggani nikande nu apu, sampe napapu saba-
gia lako ri tatalu bagia kayu-kayu bo pura-pura kavoko
naramata.

⁸ Naupu haitu malaeka karanduana nompopomoni
tabuena. Kaliu-liu naria anu mpo bulu mbaso napapu
nitedaka rantasi. Bo sabagia lako ri tatalu bagia tasi
nabali najadi raa. ⁹ Bo namate sangganimo sabagia
lako ri tatalu bagia anu natuvu riaru ntasi. Bo naropu
munimo sabagia lako ri tatalu bagia kapala nolipa
rantasi.

¹⁰ Naupu haitu malaeka katataluna nompopomoni
tabuena. Kaliu-liu nanavumo sangu betue mbaso lako
ri langi, narega mpo sulo. Betue haitu nanavu nam-
bela sabagia lako ri tatalu bagia binangga bo mata nu
uve ri dunia. ¹¹ Sanga betue haitu "Napai". Jadi sam-
petuu betue haitu, sabagia lako ri tatalu bagia binang-
ga bo mata nu uve haitu najadi napai. Bo nadea
manusia namate sabana nanginu uve napai haitu.

¹² Naupu haitu malaeka kaampuna nompopomoni
tabuena. Kaliu-liu naria anu nambela mata nu eo, bula
bo betue-betue, sampe nalipomo sabagia lako ri tatalu
bagia remera. Jadi, pata-jaa ri eona, mata nu eo ledo
nareme, bo ivesia muni bula bo betue-betue tempo
nabongi.

¹³ Naupu haitu nitingoaku bo nikitaku sambaa tonji
love nevero ri laerava. Niepeku love haitu notesa ante
suara namangga. Niulina, "Mandasamo! Mandasamo!
Mandasamo tona nadaa nonturo ri dunia tempo
malaeka tatalupa mompopomoni tabuera ngena."

9 Naupu haitu malaeka kaalimana nompopomoni
tabuena. Nomonipa tabue haitu, nikitaku sangu
betue lako ri langi nanavu ri tana. Betue haitu nidekei-
ka gunji vamba nu lovu anu ledo rapakule mantuvu
kandalana. ² Naupu betue haitu nombabuka vamba
lovu, nesuvumo unu nu apu oge lako riaru lovu ndala
haitu, nasimbayu mpo unu ntalua luu nitunju ntona.
Bo mata nu eo bo laerava najadi nalanda sabana unu
oge nesuvu lako riaru lovu ndala haitu. ³ Bo lako riaru
unu haitu nesuvumo nggaboro-nggaboro hau notagu
ri tana. Nggaboro-nggaboro haitu nipopompakule
mompandasa manusia, nasimbayu mpo supitole anu
naria ri dunia. ⁴ Nggaboro gahaitu nitagi mompaka-
mate kavoko bara kayu bara tuda-tuda ntanina riaru
dunia. Aga manusia ledo naria mere nu Alatala ri kire-
na nipaloga rapandasa nggaboro gahaitu. ⁵ Nggaboro
gahaitu ledo muni nipaloga mompatesi manusia ri
dunia. Ira aga nipaloga mompandasa ira pakadaa li-
ma-mbula kasaena. Dua nirasai manusia anu nipan-
dasa nggaboro haitu, nasimbayu mpo dua nirasai
ntona nisii nu supitole. ^{††6} Lima-mbula kasaena, manu-
sia nipandasa nggaboro gahaitu nandasa mpuu nira-

saira sampe nompasimbuku mamate, tapi ledo namate. Ira mpuu-mpuu madota mamate, tapi ledo namate.

⁷ Karo nggaboro gahaitu nasimbayu mpo jara nipesavi ntona mosieva. Ri balenggara naria sangaya nolenje mpo songgo bulava. Bo lenjera nasimbayu nte lenje nu manusia. ⁸ Bulua nggaboro gahaitu nasimbayu mpo bulua mombine. Bo ngisira mpo ngisi singa. ⁹ Bambarara nitutui nu ruke-ruke mpo baju ase. Bo moni kapira mpo moni doka nadea mpuu niumbu jara nangova hau ri posieva. ¹⁰ Lelo nggaboro gahaitu nasimbayu mpo lelo nu supitole, bo bisa nu lelona haitu nasimbayu mpo bisa pesii nu supitole. Ri lelora haitu naria bisa mompakandasa manusia lima-mbula kasaena. ¹¹ Naria saito magau najadi pakenira, iamo malaeka anu nakuasa mombabuka vamba lovu anu ledo rapakule mantuvu kandalana haitu. Sangana riaru basa Ibrani, i Abadon, bo riaru basa Yunani i Apolion. Batuana, Toperopu.

¹² Pepandasa pamulana naliumo, tapi epemo! Da nariapa rongaya pepandasa ntanina makava.

¹³ Naupu haitu malaeka kaaonona mompopomoni tabuena. Bo niepeku naria suara notesa lako ri pata-njoki Lanta Pesomba nipovia lako ri bulava anu naria ri ngayo nu Alatala. ¹⁴ Suara haitu nanguli ka malaeka kaaonona ivei: "Volemo ampa malaeka anu nisoo ri Binangga Efrat † haitu." ¹⁵ Jadi nivolenamo malaeka ampa haitu. Malaeka ampa haitu nipakasadia mamimo lako ri nggaulunamo bo ira nompopea gantana ri mpae bo bula bo ri eo bo jaa nipakatantumo mompatesi sabagia lako ri tatalu bagia manusia ri dunia. ¹⁶ Tantara-tantara nojara nantuntuni ira haitu roatu jutta kadeana. Nisaniku kadeana sabana naria tona nanguli ka yaku.

¹⁷ Riaru panggitaku nikitaku jara-jara bo topesavina. Topesavi jara haitu nobaju ase. Bajura haitu nalei mpo vava nu apu, bo nagavu mpo uve ntasi, bo nakuni mpo vatu colonggata. Balengga nu jara gahaitu mpo balengga nu singa, bo lako ri sumbara nesuvu apu, unu nu apu, bo vatu colonggata narega. ¹⁸ Sabagia lako ri tatalu bagia manusia ri dunia nipatesi ante talungaya pepandasa, haitumo ante apu, unu nu apu, bo vatu colonggata narega nesuvu lako ri sumbara. ¹⁹ Bo ri lelo nu jara gahaitu naria sangaya nolenje mpo balengga nu ule neteo. Ante lelora, nipandasara manusia. Jadi jara gahaitu mompandasa bo mompatesi manusia ante sumbara bo ante lelora.

²⁰⁻²¹ Manusia ntanina anu ledo namate riaru pepandasa-pepandasa haitu, ledo ntoto najea lako ri pokainggura nadaa. Haitumo, ira ledo nadota nenonto

†† nisii nu supitole: pesii nu supitole nitesa hitu nadua ntoto, mpo pekiki lipa bonto. † Binangga Efrat: sanga binangga mbaso napara ngata Babilon bo Asyur. Tupu ngata haitu bali ntoYahudi nggaulu. Peinta Kajadia 15:18; Pompakita 16:12.

nepatesi, bo ledo nadota nenonto nombadoti tona. Ira ledo nadota nenonto nosipogau ante tona ledo bereira mboto, bo ira ledo ntoto nadota nenonto nangangga. Ira ledo muni nenonto nombasomba seta-seta bo anu nipoviara mboto, evamo pinoito-pinoito nipoviara lako ri bulava, salaka, tambaga, vatu, bo kayu. Pinoito haitu ledo naria matana mekita bo ledo muni naria talingana meepe bo ledo nokada sampe mamala molipa.

I Yohanes nanggita malaeka nanggangisi buku kodi

10 Naupu haitu nikitaku malaeka ntanina anu naroso mpuu nanau lako ri suruga. Ia nibungu kulimu bo balenggana nilili ntirauve. Lenjena mpo kareme nu eo bo kadana mpo tinja, nenjela mpo vava nu apu. ² Kada ngganana nombajeje tasi bo kada njidina nombajeje kabatana. Ri palena naria sangu buku kodi natebukamo. ³ Bo nongaremo ia ante suara namangga, mpo kamangga suara nu singa. Nongarepa malaeka haitu, nepogumo pitu-angu guru ante moni namangga, notesa mpo manusia. ⁴ Naupu pitu-angu guru haitu notesa, yaku madota motulisi anu niuli nu guru haitu. Tapi naria suara lako ri suruga nombatagi yaku ivei: "Tabuniakamo tesa niuli nu guru pitu-angu haitu! Nee mutulisi tesara!"

⁵ Naupu haitu malaeka nikitaku pangane anu nombajeje tasi bo kabatana, nanganggataka pale ngganana hau ri langi. ⁶ Bo nojanjimo ia ante sanga nu Alatala anu natuvu sampe ri kasae-saena, anu nompajadi langi, tana bo tasi bo pura-pura isina. Nanguli malaeka haitu, "Tempona domo rakonto-konto. ⁷ Ane malaeka kapapituna mompopomoni tabuena, tempo haitumo Alatala mompakadupa niaNa nasaemo nitabuniakana. Kadupana haitu niuliNa ka batuaNa nggaulu, haitumo nabi-nabi anu nompasimbayu tesaNa."

⁸ Naliu haitu suara niepeku lako ri suruga pangane nanguli vaimo ka yaku, "Koi ala buku kodi anu natebukamo anu nikangisi nu malaeka anu nombajeje tasi bo kabatana."

⁹ Jadi hau yaku nanggaparai malaeka haitu bo niuliku ka ia, "Dekei ka yakumo buku kodi tutu."

Nangulimo ia ka yaku, "Alamo bo kande pakaupu buku hitu. Riaru ntaimu buku hitu murasai mapai, tapi riaru ngangamu murasai namomi mpo manisa." ††

¹⁰ Bo nialakumo buku kodi lako ri pale malaeka haitu, bo nikandeku sampe naupu. Ri ngangaku nira-saiku namomi mpo manisa. Tapi niomekupa, napaimo nirasaiku ri tailikoku. ¹¹ Naupu haitu yaku nitudu vaimo, "Iko kana mompasimbayu tesa lako nte Alatala anu notesaki anu majadi nte magau-magau ‡ bo todea

†† Yehezkiel 2:8-3:4 ‡ tesa nu Alatala anu notesaki anu majadi nte magau-magau ATAU: tesa nu Alatala ka magau-magau

lako ri mpengaya-ngaya ngata bo valaa, bo topotesa mpengaya-ngaya basa.”

Randua suro nu Alatala

11 Naupu haitu nidekei ka yaku sanggato kayu nolenje mpo kayu poreke. Bo yaku niparenta nu Alatala ivei: “Koimo reke BanuaKu *ri ngata Yerusalem* bo Lanta Pesomba. Bo bila muni sakuya kadea ntona netupu riaru BanuaKu haitu. ² Tapi nee mureke kalu-ona doyata ri savaliku BanuaKu, sabana doyata haitu nidekei ka tona ledon omparasaya i Yesus. Talu-mpae santanga kasaena ira mombakuasai ngataKu Yerusalem. ³ Tempona haitu Kusuro randua tona mompasimbayu tesaKu. Ira mompake baju nipovia lako ri karu mpo tona nasusa rarana, bo ira mompasimbayu tesaKu talu-mpae santanga ^{††} kasaena.”

⁴ Randua suro haitu nirapaka ronggayu kayu zaitun bo roangu kada mpoindo [‡] anu neangga ri ngayo nu Alatala, Tupu nu njumangu dunia. ⁵ Ane maria tona madota mompakadaa ira, maria apu mesuvu lako ri ngangara bo mompakaropu bali-balira gahaitu. Ivesi-amo isema-sema madota mompakadaa ira rapatesi ante apu haitu. ⁶ Ira randua haitu makuasa mantaa-maka uda ala ledon mauda sakuya kasaena ira mompasimbayu tesa lako nte Alatala. Ira muni makuasa ri mata-mata nu uve ala mombabali uve-uve haitu majadi raa. Bo ira makuasa mompandasa manusia ri dunia ante mpengaya-ngaya pepandasa maipia rapodotara *ala manusia majea lako ri dosara*.

⁷ Ane maupumo ira randua mompasimbayu tesa nu Alatala, makavamo binata nadaa mangeva ira. Binata nadaa haitu anu mesuvu lako riaru lovu anu ledon rapakule mantuvu kandalana. Ia mombadagi randua tona pangane bo mompatesi ira. ⁸ Bo karobatara randua haitu matepalamba nggoo ri dala jama ri ngata mbaso, haitumo ri ngata anu nipompatesi i Yesus ri kayu salib. Ngata mbaso haitu nirapaka Sodom bo Mesir nggaulu *sabana nadaa mpuu tupu ngata haitu*. ⁹ Talu-mbongi santanga kasaena karobatara randua ledon radekei ratana ri dayo, aga rakita ntona lako ri njumangu dunia, lako ri pura-pura ngata, bo lako ri pura-pura basa ri dunia. ¹⁰ Manggita haitu, tona nadaa nonturo ri dunia madamba mpuu. Ira mosusa madambadamba bo mosidekeika hadia, sabana namatemo tona randua haitu anu mpuu-mpuu nompandasa topon-turo ri dunia.

¹¹ Tapi nikitaku naliu talu-mbongi santanga, naria mpanjili nosara lako nte Alatala. Natuvu mpanjilimo

[†] *Talu-mpae santanga nasimbayu nte patapulu rombula bo nasimbayu nte sanjobu roatu onopulu (1.260) eo. Tempo haitu tempo pepandasa nadaa. Peinta Daniel 7:25; 12:7; Pompakita 11:2-3; 12:6; 13:5.* ^{††} *talu-mpae santanga: sanjobu roatu onopulu (1.260) eo.* [‡] *kayu zaitun, kada mpoindo: Tona randua haitu tona nipelisi nu Alatala mombatulungi Ia. Tona haitu niboto Nabi Zakharia nggaulu. Peinta Zakharia 4:1-3, 11-14.*

ira bo kaliu-liu neangga ri sia. Nanggita ira natuvu mpanjilimo, naviora puramo tona nadea gahaitu.

¹² Naupu haitu nariamo suara namangga lako ri suruga nanguli ka ira randua, “Kamaimo! Peore tumaimo!” Bo neore mpuumo ira hau ri suruga nibungu kulimu bo pura-pura balira nanggita peorera haitu.

¹³ Eva nisuka, ri tempo haitu muni najadimo lingu mbaso. Bo nageromo sabagia lako ri sapulu bagia ngata mbaso haitu, bo pitu-njobu tona namate sabana lingu mbaso haitu. Nanggita haitu naviora mpuumo rara ntona da natuvu ri sia, bo niulira, “Nambaso mpuu kuasa nu Alatala anu naria ri suruga!”

¹⁴ Jadi naliumo pepandasa karanduana. Epemo! Domomasae pepandasa katataluna muni kana majadi.

Tabue kapapituna nipopomoni

¹⁵ Naupu haitu malaeka kapapituna nompopomoni tabuena. Bo kaliu-liu nariamo suara-suara ri suruga nongare ante namangga mpuu ivei:

“Sii-sii pura-pura poparenta ri dunia hitu najadi poparenta nTuputa

bo poparenta nu Magau Topepakasalama anu nijanji nu Alatala.

Ia momparenta sampe ri kasae-saena!”

¹⁶ Bo ropulu bo ampa totua anu nonturo ri gaderara ri ngayo nu Alatala nantaputu sanggani sampe ri tana mombasomba Alatala. ¹⁷ Niulira,

“O, Pue Alatala, neliu mpuu KakuasaMiu!

Bo Komiu naria mamimo lako ri lamba pamulana bo bate-batena naria sii-sii!

Kami notarima kasi nte Komiu apa nipopakitaMiumo kuasaMiu naoge.

Nompamulamo Komiu nomparenta!

¹⁸ Tona ledon nosisani nte Komiu narau bo nangeva Komiu.

Tapi nakavamo gantana Komiu mompopakita rau nu raraMiu ka ira.

Nakavamo gantana Komiu mombatangara tona namate.

Bo nakava munimo gantana Komiu mombadekei tambo ka batua-batuaMiu,

haitumo, nabi-nabi anu nompasimbayu tesaMiu, bo ka pura-pura todeaMiu, ira anu nombabila Komiu, nau tona biasa, nau tona naoge katuvuna.

Nakavamo gantana Komiu mombahuku tona anu nompakaropu manusia ri dunia hitu.”

¹⁹ Naupu haitu natebukamo vamba Banua nu Alatala ri suruga bo riaru banua haitu nikitaku Peti Pojanji ^{‡†} nu Alatala. Tempo haitu kila damo mparea bo guru kede damo mpapedi. Najadimo lingu mbaso ante uda esi naromba mpuu.

^{‡†} *Peti Pojanji: Peti haitu pomboli vatu nitulisi Sapulu Parenta bara ipia. Peinta Ulangan 10:1-5.*

Mombine ante ule naga

12 Naliu haitu, neumbamo tanda ri langi anu mpuu-mpuu nipokumaaka. Naria saito mombine nopakea mata nu eo. Ia neangga ri bavo nu bula, bo ri balenggana naria songgo nipovia lako ri sapulu randua betue. ² Mombine haitu natiana, damo kapoanana bo ia nongare-ngare sabana dua poanana. ³ Bo neumba munimo tanda ntanina ri langi anu mpuu-mpuu nipokumaaka. Naria sangaya ule mbaso nalei, sangana ule naga. [†] Ule naga haitu nobalengga papitu bo notandu sapulu. Pura-pura balenggana naria songgo magau. ⁴ Lelo nu ule naga haitu nangumbunjai sabagia lako ri tatalu bagia betue ri langi, bo nitedakana ri tana. Ia neangga ri ngayo nu mombine ranja mpoana haitu. Patujuna mangome ana nu mombine haitu mesuvu. ⁵ Bo mombine haitu noanaka saito ngana langgai. Ngana haitumo mompamenta njuman-gu dunia ante ase poboba. ^{††} Dopa nakapo ngana haitu niome nu ule naga, sampesani ngana haitu niagosimo lako nte tinana bo nikeni hau nte Alatala bo Gadera KamagauaNa ri suruga. ⁶ Naupu haitu nalaimo mombine hau ri karava bai. Ri sia ia nonturo ri ponturo nipakasadia nu Alatala mamimo ka ia. Ri ponturo haitu ia nipiara talu-mpae santanga kasaena. [‡]

Magau nu Seta nidagi bo nipopalai lako ri suruga

⁷ Naria posieva riaru suruga. Tadulako malaeka nTupu nosanga i Mikhael ante malaeka-malaekana nomporea ia nangeva ule naga haitu. Bo ule naga haitu nitulungi malaeka-malaekana muni nangeva gi Mikhael. ⁸ Tapi ule naga ante malaekana nidagimo bo domo nipaloga nonturo ri suruga. ⁹ Jadi ule naga haitu nipopalai lako ri suruga bo nitedaka hau ri dunia nosangani-nggani ante malaeka-malaeka anu nantulungi ia. Ia haitumo Ule Ntua anu nosanga Topangadu atau Magau nu Seta, anu nombabagi manusia ri njumangu dunia.

Dade Padagi

¹⁰ Naupu haitu niepeku suara riaru suruga namanga mpuu nanguli,

“Sii-sii nakavamo gantana Alatala mompakasalama todeana.

Sii-sii nipopakitaNamo kuasaNa, nompamulamo Ia nompamenta mpo Magau.

Sii-sii nakavamo Magau Topepakasalama anu nipelisi nu Alatala mompopakita kuasaNa,

[†] ule naga: binata nolenje mpo timposu atau ule tapi nambaso mpuu. Riaru buku hitu ule naga nirapaka Magau nu Seta. Peinta Pompakita 20:2-3. ^{††} mompamenta ante ase poboba: Batuana, mompamenta ante kuasa bo ledo maasi mataNa nte topangeva Ia. Peinta Mazmur 2:8-9; Pompakita 2:26-27. [‡] sanjobu roatu bo onopulu (1.260) eo kasaena. Peinta catatan kaki anu nompakalanto 11:2.

sabana Magau nu Seta nipopalaime lako ri suruga, Magau nu Seta haitumo anu nompangadu todea sampomparasaya eo bongi ri ngayo nTuputa Alatala.

¹¹ Tapi todea sampomparasaya haitu nombadagi Magau nu Seta ante kuasa lako ri raa nu Ana Bimba anu namate nombasompo dosara.

Bo nidagira ia ante pepatuduki i Yesus nipatolelera. Bo ledo nipotovera katuvura, ledo ntoto nenonto nompapasaya nau sampe rapatesi.

¹² Sabana haitu, kana madamba mpuu komiu toponturo ri suruga.

Tapi mandasamo komiu toponturo ri tana bo ri tasi sabana nanaumo Magau nu Seta tou nte komiu.

Bo nagigi mpuumo rarana sabana nisanina logana mebagiu damo sampalai.”

¹³ Nisani nu ule nagapa ia nitedaka ri dunia, niraganamo mombine anu dako noanaka ngana langgai pangane. ¹⁴ Tapi mombine haitu nidekeika randua kapi nambaso mpo kapi ntonji love ala ia mamala mevoru hau ri ponturo nipakasadia ka ia ri karava bai. Hamai ia rapiara talu-mpae santanga kasaena, bo ia ralenduti ala ledo mamala rakuyasi nu ule naga haitu. ¹⁵ Ule naga haitu nombasuparaka uve oge mpo binangga lako ri ngangana hau nombaraga mombine haitu ala mombaavesaka ia. ¹⁶ Tapi tana nantulungi mombine haitu. Kaliau-liu nebeka tana bo uve oge anu nisuparaka nu ule naga naupu pura nisondena. ¹⁷ Nagigi mpuumo rara nu ule naga haitu nanggita mombine, sampe ia hau mombaeva muli-muli nu mombine haitu ntanina, haitumo tona natutu nangoseaka parenta-parenta nu Alatala bo bate-batena nanggagisi pepatuduki i Yesus. ¹⁸ Naupu haitu neanggamo ule naga haitu ri bivi ntasi. ^{‡‡}

Binata nadaa nesuvu lako riaru ntasi

13 Naliu haitu nikitaku sangu binata nadaa nesuvu lako rantasi. Binata haitu notandu sapulu bo nobalengga papitu. Pura-pura tanduna naria songgo mpo songgo magau, bo ri pura-pura balenggana nitulisi tesa-tesa nompandaente Alatala. ² Binata nikitaku haitu nolenje mpo taveve mbaso niuli tutul, bo kadana mpo kada nu beruang, bo sumbana mpo sumba nu singa. Bo ule naga nombadekei karosona mboto bo gadera kamagauana bo kuasana naoge ka binata haitu. ^{‡‡‡} Sangu lako ri pitu-angu balengga binata haitu naria bela baka oga anu rapomatena. Tapi bela haitu natoromo. Jadi pura-pura manusia ri dunia nokumaa mpuu nanggita binata nadaa haitu, bo nosimpagomo ira nangoseaka ia. ⁴ Nisombara ule naga sabana ia nombadekei kuasa ka binata nadaa haitu, bo nisombara muni binata nadaa. Niulira, “Ledo ntoto naria

^{‡†} neanggamo ule naga ri bivi ntasi: sanu naskah njae nanguli: yaku neangga ri bivi ntasi. ^{‡‡} tutul, beruang, singa: Peinta Daniel 7:2-7.

kasimbayuna binata hitu! Ledo ria saitoa mabia mangeva ia!"

⁵ Binata nadaa haitu nidekeika kuasa notesa, bo ia nangoe bo nompandaente Alatala. Nidekei muni ia no-parenta bo novia dotana mboto talu-mpae santanga kasaena. ^{†6} Jadi ia nompakalanga karon a mboto, bo nompakasimbayu karon a nte Alatala. Ia nanjalai Alatala, bo nipandaentena muni Gadera Kamagaua nu Alatala ri suruga bo pura-pura anu nonturo hamai. ⁷ Ia nipaloga muni mangeva todea nu Alatala bo mombadagi ira. Bo nidekei muni kuasa ka ia momparenta manusia ri njumangu dunia, haitumo tona ri pura-pura ngata, bo valaa, bo tona lako ri pura-pura basa ri dunia. ⁸ Pura-pura manusia nonturo ri dunia mombasomba binata haitu, haitumo pura-pura tona anu ledo nitulisi sangara riara Buku Katuvua dopame dunia nipajadi. Buku haitu naria nte Ana Bimba anu nipatesi.

⁹ Jadi, isema-sema naria talingana epemo pakabelo-belo tesa hitu:

¹⁰ Isema-sema nipakatantu ratavani, kana ratavani-mo.

Isema-sema nipakatantu rapatesi ante guma, kana rapatesi ante gumamo.

Anu nopoko ri sii, todea nu Alatala kana maroo tempo nipandasa bo nee moura momparasaya.

Binata nadaa ntanina nesuvu lako riara ntana

¹¹ Naliu haitu nikitaku sangaya binata nadaa ntanina neumba lako ri tana. Binata haitu notandu randua mpo tandu nu ana bimba, tapi suaranya mpo suara ule naga. ¹² Binata nadaa karanduana ^{††} haitu mpo nabi nipo-suro nu binata nadaa pamulana. Jadi pura-pura kuasa nu binata pamulana haitu nipajala nu binata karanduana. Pura-pura manusia ri dunia nipasuuna mombasomba binata pamulana anu naria bela baka oga anu natoromo. ¹³ Binata karanduana haitu novia tanda-tanda nipokumaaka. Ri ngayo ntona pura-pura nipopanauna apu lako ri langi nanavu ri tana. ¹⁴ Nipoviana tanda-tanda haitu ante kuasa nidekei nu binata pamulana ka ia ala mombabagiu tona nonturo ri dunia. Nituduna ira movia bo mompopeangga sanga pinoito nambaso nolenje mpo binata pamulana, anu nitimbe pakaoga tapi ledo namate. ¹⁵ Binata karanduana nidekeika kuasa mompopoinosa pinoito haitu sampe pinoito haitu namala motesa. Bo pinoito haitu momparenta isema-sema ledo madota mombasomba ia kana rapatesi. ¹⁶ Pura-pura tona nipasuu nu binata karanduana haitu ramere ri pale nggana atau ri kirera, nau tona biasa, nau tomaoge, nau tona nakalumana nau tona napakasi, nau tona najadi batua nau madikamadika. ¹⁷ Ledo ria saitoa tona namala mangali atau

[†] talu-mpae santanga: haitumo, 42 bula kasaena. Peinta catatan kaki anu nompakalanto 11:2. ^{††} binata nadaa karanduana: niuli muni nabi mpodava. Peinta Pompakita 16:13; 19:20.

mompobalu nuapa-nuapa ane ledo naria tanda haitu ri palena atau ri kirena, haitumo sanga nu binata pamulana atau lamoro anu norapaka sangana haitu.

¹⁸ Kita paraluu noto ala rasanita batuana tesa pangane. Tona natau rasanina mombareke lamoro-lamoro lako ri sanga binata haitu, apa lamoro haitu nira-paka sanga manusia saito. Lamorona haitu onoatu onopulu bo aono.

Ana Bimba ante todeaNa ri Bulu Sion

14 Naliu haitu naria vai anu nipopakita ka yaku. Nikitaku Ana Bimba neangga ri bavo Bulu Sion nosanggani-nggani ante saatu patapulu bo pata-njobu tona. Bo sanga nu Ana Bimba bo sanga nTua-maNa Alatala nitulisi ri kirera. ² Bo niepeku moni namangga lako ri suruga mpo soo nu uve oge bo mpo pogu guru kede. Moni haitu mpo moni nu kacapi nidui. ³ Tona saatu patapulu pata-njobu haitu nodade dade nabaru ri ngayo nu Alatala bo ri ngayo ampa Anu Natuvu bo totua-totua anu nombatiku Gadera Kamagaua nu Alatala. Dadera haitu ledo namala nipegu-ru ntona ntanina aga ira saatu patapulu bo pata-njobu anu nitolo nu Ana Bimba lako ri dunia. ⁴ Ira haitumo nasimbayu mpo tona ledo sanggani nosampaturu ante mombine, nagasa mpuu pokainggura. [‡] Ira nangoseaka Ana Bimba ri umba-umba nikalauNa. Iramo nitoloki lako nte pura-pura manusia ri dunia bo nipatani ka Alatala bo ka Ana Bimba, nasimbayu mpo tona nombadekei asele ntalua pamulana ka Alatala. ⁵ Ira ledo sanggani nodava, bo nau aga sakide ledo ntoto naria salara.

Tatalu malaeka nompopatora manusia

⁶ Bo nikitaku saito malaeka ntanina nevoru ri laerava. Ia nanggeni Kareba Belo anu ledo nabali sampe ri kasae-saena ka pura-pura manusia ri dunia, haitumo ka tona ri pura-pura ngata, ri pura-pura valaa, bo lako ri pura-pura basa ri dunia. ⁷ Notesamo ia ante suara namangga, "Bilamo Alatala, bo tesamo kaogeNa! Apa nakavamo tempona Alatala mombatangara manusia! Petupumo nte Alatala anu nompajadi langi, tana bo tasi bo pura-pura mata nu uve!"

⁸ Naupu haitu naria malaeka karanduana nantuntuni malaeka paratama. Nangulimo ia, "Nageromo! Nageromo ngata mbaso Babel! Sabana, tupu ngata haitu nompakalangu tona lako ri umba-umba ngata ante uve anggurra, haitumo nikenira ira mompasiala pokainggura nadaa bo nabuga!"

⁹ Naupu haitu naria malaeka katataluna nantuntuni malaeka karanduana pangane. Nongaremo ia ante

[‡] Batuana: 1) Ira nasimbayu mpo kabilasa, dopa nosampaturu nte mombine, ATAU: 2) langgai anu ledo sanggani nobualo, ATAU: 3) tona netupu aga nte Alatala, ledo sanggani netupu nte tupu ntanina.

suara namangga mpuu ivei: "Isema-sema nombasomba binata nadaa ante pinoitona bo nantarima mere nu binata haitu ri kirena bara ri palena, ¹⁰ tona haitu rapokarau nu Alatala bo ledο ntoto rakurangiNa pehuku ka ira! Pehuku haitu nirapaka tona nipainu panginu napai mpuu, bo ledο niposigalo ante uve! Ira pura-pura rapandasa riaru apu bo vatu-vatu colonggata narega ri panggita malaeka-malaeka nagasa bo Ana Bimba. ¹¹ Unu nu apu mompandasa ira bo ledο maupu-upu mounu sampe ri kasae-saena. Eo bongi ledο ria kaupū-upuna pepandasa ka ira sabana nisombara binata nadaa haitu ante pinoitona bo nitarimara tanda sanga nu binata haitu ri karora.

¹² Anu nopoko ri sii, todea nu Alatala kana maroo momparasaya bo mosabara tempo mombarasai susa, haitumo ira anu nangoseaka parenta-parenta nu Alatala bo ledο nenonto momparasaya i Yesus."

¹³ Naupu haitu niepeku suara lako ri suruga nanguli, "Tulisimo tesa hitu: mompamula sii-sii nabelo mpuumo tona natutu momparasaya i Pue sampe namate."

Bo nesanamo Nosa Gasa nu Alatala, "Nakana mpuu tutu. Domo rarasaira kasusa bo kapari, bo maria tambodekei ka ira nangoseaka panggaviara."

Manusia ri dunia nihuku

¹⁴ Naupu sia, naria vai anu nipopakita ka yaku. Naria kulimu nabula bo ri bavo nggulimu haitu naria saito tona nonturo, lenjena mpo Ana nu Manusia. Ri balenggaNa naria songgo bulava bo ri palena naria samata are ntada. ¹⁵ Naupu haitu naria malaeka ntanina nesuvu lako ri Banua nu Alatala ri suruga. Bo nongaremo ia ante suara namangga ka tona nonturo ri bavo kulimu haitu, ivei: "Pakemo aremu tutu, bo posombemo, sabana temponamo mosombe! Manusia ri dunia nasadimo rahuku!" ¹⁶ Jadi tona nonturo ri bavo nggulimu haitu nompake arena bo nisombenamo isi dunia.

¹⁷ Naupu haitu nikitaku saito malaeka ntanina nesuvu lako ri Banua nu Alatala ri suruga. Ia muni nantipale samata are ntada. ¹⁸ Bo nakava saitopa malaeka ntanina lako ri Lanta Pesomba. Iamo nakuasa nombaurusi apu ri Lanta Pesomba haitu. Nongaremo ia ante suara namangga ka malaeka anu nantipale are ntada, ivei: "Pakemo aremu tutu bo tentesimo vua anggur ri dunia, natasamo vuana." ¹⁹ Jadi nipake nu malaeka haitu mpuumo arena nombatentesi vua anggur haitu lako ri valaana, bo nitendeakana hau riaru pompea vua anggur. Poviana haitu nirapaka tempo Alatala mompopesuvu rau raraNa ka tona nadaa pokaingguna. ²⁰ Jadi vua anggur haitu nipea ri pompea vua anggur ri savaliku ngata. Bo noilimo raa lako ri pompea haitu mpo binangga kaogena, kakavao poiili

raa haitu talu-atu kilo † kakavaona bo kandalana nitasere sametere santanga ††.

Dade ntona padagi

15 Naupu haitu, nikitaku ri suruga naria sangayapa tanda nambaso anu nipokumaaka. Naria papitu malaeka ante pitu-ngaya pepandasa kaupuna. Ante pepandasa haitu maupumo rau rara nu Alatala mompokarau manusia ri dunia. ² Bo naria sangaya nikitaku eva tasi nevayo mpo kaca bo nogalo apu. Bo ri bivi ntasi haitu nikitaku tona dea neangga. Tona gahaitumo nombadagi binata nadaa sabana ira ledο ntoto nombasomba ia, bo ledο nombasomba pinoito binata haitu, bo ledο nombatarima mere nu binata haitu, haitumo lamoro nirapaka sangana. Pura-pura ira neangga ri bivi ntasi haitu nantipale kacapi nidekei nu Alatala ka ira. ³ Bo nipodadekaramo dade Nabi Musa ‡, batua nu Alatala nggaulu. Bo nipodadekaramuni dade mombabila Ana Bimba ivei:

"O Pue Alatala, neliu mpuu KakuasaMiu!

PoviaMiu naoge bo mpuu-mpuu nipokumaaka.

Komiumo Magau nu pura-pura manusia ri dunia!

Pura-pura pokaingguMiu nakana bo nanao.

⁴ Pue, pura-pura manusia mekou nte Komiu.

Pura-pura tona mombabila bo mombatoiya kaoggeMiu,

sabana aga Komiu mpuu-mpuu nagasa.

Pue, pura-pura tona ri dunia makava mombasomba Komiu,

sabana nisanira pura-pura pobotusiMiu nanao."

Papitu malaeka ante pitu-ntonga tubu niisi rau rara nu Alatala

⁵ Naupu haitu nikitaku tona nangungge Banua nu Alatala ri suruga, ante Tenda nTupu riarana. ^{†6} Bo lako riaru Banua nu Alatala haitu nesuvumo papitu malaeka nanggeni pitu-ngaya pepandasa kaupuna. Pakeara nipovia lako ri kae naramputi nenggila, bo bambarara nibeve bulava. ⁷ Neongapa malaeka haitu, saito lako nte ampa Anu Natuvu nombadekei ka ira pitu-ntonga tubu bulava naponu ante rau rara nu Alatala, Alatala anu natuvu sampe ri kasae-saena. ⁸ Bo Banua nu Alatala ri suruga kaliu-liu naponu ante unu nu apu anu nesuvu lako ri kaoge bo kuasa nu Alatala. Ledo ria saitoa namala mesua riaru Banua haitu ane dopa naupu papitu pepandasa anu niken nu malaeka papitu haitu.

† talu-atu kilo: basa Yunani: sanjobu onoatu stadia. †† sametere santanga: basa Yunani: kandalana sampe ri sama nu jara. ‡ dade Nabi Musa: peinta Pesuvu 15:1-18. †† Nikitaku tona nangungge Banua nu Alatala ri suruga ante Tenda nTupu riarana. Nikitaku tona nangungge Tombi Nelabi Kagasana riaru Banua nu Alatala. ATAU: Nikitaku tona nangungge Banua nu Alatala, haitumo Tenda nTupu.

Isi nu tubu pitu-ntonga nibusaka riaru dunia

16 Naupu haitu niepeku suara namangga lako riaru Banua nu Alatala ri suruga nanguli ka papitu malaeka, "Koimo, busaka isi tubu-tubu naponu ante rau rara nu Alatala tutu ri dunia."

² Nangepe haitu, haumo malaeka pamulana nombabusaka isi tubuna ri dunia. Bo sampesanika neumbamo bisu-bisu nadaa anu nadua mpuu ri karo ntona pura-pura anu naria mere binata nadaa haitu bo ri pura-pura tona anu nombasomba pinoitona.

³ Naupu sia malaeka karanduana nombabusaka isi tubuna riaru ntasi. Bo tasi haitu najadi mpo raa mate sampe pura-pura anu natuvu riaru ntasi, namate.

⁴ Naupu haitu malaeka katataluna nombabusaka isi tubuna ri pura-pura binangga bo mata-mata nu uve. Bo pura-pura uve haitu nabali najadi raa. ⁵ Naliu haitu niepeku suara malaeka anu nombakuasai uve nanguli, "O, Pue Alatala, Komiu naria mamimo lako ri pamulana

bo sii-sii bate-batena naria.

Komiu toGasa,

Nanoa mpuu pobotusiMiu,

⁶ Apa tona gahaitu nompatesi bo nompakatiti raa nu nabi-nabiMiu

bo raa ntodeaMiu.

Tapi sii-sii Komiu nombabalasi ira ante nompopainu raa ka ira.

Masipato mamimo pehuku hitu ka ira!"

⁷ Naupu sia, niepeku suara lako ri Lanta Pesomba nanguli,

"O Pue Alatala, ivesia mamimo!

Nakana bo nanoa mpuu pehuku nipambelaMiu! Neliu mpuu KakuasaMiu."

⁸ Naliu haitu, malaeka kaampana nombabusaka isi tubuna ri mata nu eo. Bo mata nu eo haitu nidekeika kuasa mompalabu manusia ante kapanena mpo apu.

⁹ Manusia gahaitu nipakaboa pane nu mata eo. Bo ira nombasalai Alatala sabana Iamo nomparenta pepandasa haitu rapambela ka ira. Tapi ira ledo ntoto nadota majea lako ri poviara nadaa, ira ledo nadota mombabila bo mombatoiya kaoge nu Alatala.

¹⁰ Naupu haitu malaeka kaalimana nombabusaka isi tubuna ri ponturo binata nadaa. Sampesanika pura-pura ngata niparenta nu binata haitu najadi nalanda mpuu. Bo pura-pura todeana nanggiki dila sabana kandasara. ¹¹ Ira nombasalai Alatala anu naria ri suruga sabana nadua mpuu nirasaira bo nadaa mpuu bisu-bisu ri karora. Tapi ira ledo najea lako ri pokaing-gura nadaa.

¹² Naupu haitu, malaeka kaaonona nombabusaka isi tubuna ri binangga mbaso nosanga Binangga Efrat. Bo kaliu-liu naotimo uve ri binangga haitu ala masadia

dala raose nu magau-magau anu makava lako ri bagia pandakena. ¹³ Bo nikitaku tatalu seta nolenje mpo tumpa. Ira sanggayu-sanggayu nesuvu lako ri nganga nu ule naga, lako ri nganga binata nadaa bo lako ri nganga nabi mpodava. ¹⁴ Ira tatalu haitu nosa nu seta-seta anu novia tanda-tanda nipokumaaka. Ira hau mosinggavaka pura-pura magau ri njumangu dunia bo mompokio ira masiromu meeve ri eo mpepakavio- ra, haitumo tempo Alatala toNeliu KakuasaNa, mombadagi pura-pura baliNa ri dunia.

¹⁵ Bo nangulimo i Yesus, "Pariaramo! Yaku makava ri tempo ledo nisani-sanimiu nasimbayu mpo topan-gangga. Mabelo mpuu tona batena mainga bo mombajagai pakeana ala tempo Yaku makava ledo maeya matana mpo tona novuloa nelaya ri ngayo ntodea."

¹⁶ Jadi seta-seta haitu nompasiromu magau-magau ante tantara-tantarara lako ri umba-umba ri dunia, ri ponturo niuli riaru basa Ibrani, "Harmagedon."

¹⁷ Naupu haitu malaeka kapapituna nombabusaka isi tubuna hau ri laerava. Bo niepeku suara namangga lako ri Gadera Kamagau nu Alatala ri BanuaNa nanguli, "Naupumo!" ¹⁸ Bo noreamo kila bo guru kede damo nosinjaleva poguna, bo najadimo lingu mbaso. Lako ri pamulaname manusia nipajadi nu Alatala ri dunia sampe tempo hitu, dopa ntoto naria karimbosona lingu ivehaitu. Naroo mpuu lingu mbaso haitu.

¹⁹ Bo ngata mbaso nosanga ngata Babel nabingga tatalu bagia. Bo nagero sanggani pura-pura ngata mbaso ri njumangu dunia. Bo Alatala nombabalasi kadaa ntoponturo ri ngata mbaso Babel haitu. Ia nompopainu pakaupu uve anggur nu rauNa ka ira. Batuana, Ia mpuu-mpuu nompokarau ira bo ledo ntoto naria kaondo-ondoNa. ²⁰ Tempo lingu haitu, pura-pura levuto riaru ntasi nalipo sanggani bo bulu-buluna domo naria. ²¹ Bo naria vatu-vatu esi nambaso mpuu nanavu lako ri langi nombarunju manusia. Kantamo nu vatu esi haitu nitasere nte limapulu kilo kantamona sangu. Nanggita haitu manusia nanjalai Alatala sabana nadaa mpuu pepandasa uda esi haitu.

Pompakita Katataluna (17:1-21:8)

Ngata Babel nirapaka bajinga nompakeni tona nobualo

17 Naupu haitu, saito lako ri papitu malaeka anu nantipale tubu-tubu pangane nakava nte yaku bo nanguli ka yaku, "Kaimo, kupopakita ka iko pehuku rapambela ka bajinga nakuasa, haitumo ngata mbaso nibangu napara binangga nadea. ² Magau-magau ri dunia nakava nosipogau nte mombine haitu. Bo mombine haitu nompopainu tona nonturo ri dunia ante uve anggur napai anu nepakalangu. Batuana, ia nom-

padidi ira nompasiala pokaingguna nadaa bo nabuga.[†]

³ Naupu haitu yaku nikuasai Nosa Gasa nu Alatala bo niken nu malaeka haitu hau ri karava bai. Hamai nikitaku saito mombine nesavi binata nalei buluna. Ri njumangu karo nu binata haitu nitulisi tesa-tesa anu nompandaente Alatala. Binata haitu muni nobalengga papitu bo notandu sapulu.⁴ Mombine pangane nompake baju nalei nogalo nakamumu anu niparika ante ramba-ramba bulava, mutiara bo vatu-vatu sinji naga-gaya bo nasuli alina. Ri palena naria sangu boda bulava niisi panginu nadaa bo naruto anu nirapaka pokaingguna nabuga.⁵ Ri kirena nitulisi sanga ledon nisan ntona batuana, ivei:

NGATA BABEL ANU NAKALUMANA

TINA NU PURA-PURA BAJINGA

PONTURO NTOPOVIA MPENGAYA-NGAYA POKAING-
GU NARUTO

⁶ Bo nikitaku mombine haitu nalangu sabana nanginu raa ntodea nu Alatala. Batuana, nadidi rarana nompatesi tona nompasaya i Yesus bo nompatolele karebaNa. Nokumaa mpuu raraku nanggita mombine haitu.

⁷ Bo nangulimo malaeka haitu ka yaku, "Nakuya iko nokumaa nanggita mombine haitu? Kupakalanto ka iko anu nirapaka mombine haitu bo binata nipesavina anu nobalengga papitu bo notandu sapulu.⁸ Da nokolu, binata nikitamu haitu da naria natuvu, tapi siii-sii domo naria. Tapi ia meumba mpanjili bara maipia lako riarah lovuh anu ledo rapakule mantuvu kandalana. Malih haitu ia rahuku sampe ri kasae-saena. Bo tona natuvu ri dunia anu ledo nitulisi sangarah riarah Buku Katuvua dopame dunia nipajadi nu Alatala, ira mpuu-mpuu mokumaa manggita binata haitu. Sabana, da nokolu binata haitu natuvu, siii-sii domo naria, tapi meumba mpanjili bara maipia.

⁹ Ri siii kita paraluh pekiri manoto. Pitu-angu balengga nu binata nadaa anu nipesavi nu mombine haitu nirapaka papitu bulu nipombabangu ngata. Bo papitu balengga haitu muni nirapaka papitu magau.¹⁰ Alima lako ri magau-magau haitu domo nomparenta. Saito da nomparenta bo magau kapapituna dopa nompamula nomparenta. Tapi ane ia makava, aga sampalai ia radekei nomparenta.¹¹ Binata anu natuvu nokolu bo siii-sii domo naria, ia haitumo magau kauvaluna. Tapi ia muni saito lako ri magau papitu pangane. Kaupuna ia kana rahuku sampe ri kasae-saena.

¹² Sapulu-anguna tandu nikitamu haitu nirapaka sapulu magau anu dopa nompamula nomparenta. Ira radekeika kuasa moparenta mosangani-nggani ante binata haitu sajarah kasaena.¹³ Ira mosangu pekiri mombatulungi binata nadaa haitu. Ira natundu nte bi-

nata haitu bo pura-pura karoso bo kuasa poparentarah nipakarah movia dota nu binata nadaa haitu.¹⁴ Bo ira mosieva ante Ana Bimba. Tapi Ana Bimba mombadagi ira sabarah Iamoh Tupu nu pura-pura tupu bo Magau nu pura-pura magau. Bo nosangani-nggani ante Ana Bimba haitu maria muni topangoseaka-topangoseaka Ia anu nipokioNa bo nipelisiNa, anu natutu nangoseaka Ia."

¹⁵ Naupu haitu nanguli vai malaeka ka yaku, "Binangga nadea nikitamu pangane naparah mombine bajingah, nirapaka tona ri njumangu dunia, todeah-todeah lako ri umba-umba ngata, bo topobasa mpengayah-ngayah basah ri dunia.¹⁶ Makava temponah binata nadaa bo sapuluh magau nikitamu pangane mavuu matarah nanggita mombine bajingah. Ira mombaago pura-pura nuarah narah nte ia bo ravuloasarah. Bo rakandesarah isih karah mombine haitu bo rapalaburah karobatarah riarah apuh sampe maupuh.¹⁷ Haitu pura-pura kana majadi sabarah Alatalamoh nompakasangu pekiri nu magau sapuluh movia niah nu Alatala mboto. Ia nompakasangu rararah mombadekei kuasarah ka binata nadaa haitu alah binata haitu moparentah sampe madupah pura-pura anu nitesah nu Alatala.¹⁸ Bo mombine nikitamu haitu nirapakah ngata mbasoh^{††} anu nomparentah magauh-magauh ri dunia."

Kagero nu ngata Babel nipatolele lako ri surugah

18 Naupu malaekah pangane notesah, nikitaku saito malaekah ntaninah nanauh lako ri surugah. Naogeh mpuu kuasarah, boh lako ri karemenah njumangu dunia nareme.² Nongaremo ia ante suarah namanggah, "Nageromoh! Nageromoh ngata mbasoh Babel! Nompamulah siii-sii ngata haitu majadi ponturo nu setah-setah, boh ponturo mpengayah-ngayah anu nadaah, boh ponturo mpengayah tonjih naruto anu nipovuu mata nu manusiah.

³ Nageromoh ngata Babel sabarah tupu ngata Babel nompakenih tona lako ri njumangu dunia nanginuh panginuh napaih anu nepakalangu.

Batuana, nipakenirah tona mompasialah pokainggurah nadaah boh nabugah.

Purah-purah magauh ri dunia nompasialah pokainggunah nabugah.

Bo topopagolih-topopagolih ri dunia najadi nakalumana puramoh sabarah nompobaluh mpengayah-ngayah mbarah-mbarah nasulih kah tupu ngata Babel anu ledoh riah kabasah-basarah."

⁴ Naupu haitu, niepeku suarah ntaninah lako ri surugah nangulih,

[†] Ri Buku Gasa pokaingguh nabugah boh nobualoh biasah nirapakah tona anu netupuh nte tupu-tupu ntaninah boh ledoh nte Alatalah.

^{††} ngata mbasoh: tupu nu ngata haitu najadi nakalumana lako ri posialirah nte magauh-magauh ri dunia.

“Umba komiu, topangoseaka Yaku. Pesuvumo komiu lako riaru ngata hitu!

Nee ratuntunimiu dosa-dosa ntupu ngata hitu ala pehuku rapambela ka ira ledo mambela komiu!

⁵ Sabana, nadea mpuumo dosara haitu, notumuvu sampe ri langi.

Bo sii-sii kadaara nipeinta nu Alatalamo.

⁶ Jadi povia munimo ka tupu ngata hitu nasimbayu mpo nipoviara ka tona ntanina.

Balasimo ira ronggani kadeana lako ri pura-pura pokainggura nadaa.

Isimo bodara ante panginu ronggani kapaina pade panginu nipakasadiara ka tona ntanina.

⁷ Pakasadia ka ira pepandasa bo kasusa masipato nte pokainggura nompakalanga rara bo mompebasa-basa kasana karora mboto.

Sabana, ira bate-batena notesa riaru ntaira ivei:

‘Yaku hii natuvu mpo madika.

Yaku ledo timbala,

bo yaku ledo ntoto mombarasai kasusa bo kapari.’

⁸ Sabana haitu, riaru saeo

ira rarumpa pepandasa-pepandasa evamo kamatea, kasusa rara, bo kamate ara.

Ngatara haitu mapapu sanggani rakande nu apu, sabana nakuasa mpuu Tupu Alatala anu nombahuku tupu ngata haitu.”

Kagero nu ngata Babel nitangisi ntona riaru dunia

⁹ Magau-magau ri dunia, anu nompesana-sana ante tupu ngata Babel bo nangoseaka pokaingguna nabuga, tempo rakitara unu nu apu ri ngata napapu haitu, motumangi mpojea ira sabana kagero ngata haitu. ¹⁰ Ira aga meangga meantoaka nggavao manggita unu nu apu haitu, apa naeka ira rapendai kasusa anu nombarumpa ngata mbaso haitu. Ira manguli, “Oranga! Oranga! Nandasa mpuumo tupu ngata mbaso moitu, ngata Babel anu naroso mpuu!

Aga riaru sajaa nipambela pehuku nu Alatala komiu!”

¹¹ Bo topopagoli-topopagoli ri dunia motumangi bo mabuku rarara mantoraka ngata Babel sabana domo maria tona mangali balu-balura. ¹² Domo maria topangali bulava, salaka, vatu-vatu sinji nasuli bo mutiara nipobalura. Domo muni maria topangali pakea nipovia lako ri kae nalusu, kae sutra, kae nalei bo nakamumu nasuli. Domo maria topangali mpengaya-ngaya pareva nipovia lako ri kayu navangi bo pareva-pareva nipovia lako ri kayu nasuli alina. Bo domo maria topangali pareva-pareva nipovia lako ri tambaga, ase, bo lako ri vatu pualam. ¹³ Domo maria topangali kayu momi, rampa-rampa ntanina, bo lana vangi, mur bo dupa. Domo maria topangali uve anggur, lana zaitun, labu

gando bo ose. Ivesia muni japi, bimba, jara, kareta bo tona rapobatua, domo raali ntupu ngata Babel.

¹⁴⁻¹⁵ Topopagoli-topopagoli gahaitu manguli, “Pura-pura anu nipoino raramiu domo ntoto naria.

Nalipo puramo kakalumanamiu bo anu nompakasana katuvumiu,

domo rakavamiu mpanjili.”

Topopagoli-topopagoli najadi nakalumana sabana nompobalu mbara-mbara nasuli ka tupu ngata Babel,

aga meangga meantoaka nggavao manggita ngata haitu sabana maviora rarara mambela kasusa anu nombarumpa ngata haitu. Ira motumangi mpojea

ante rara masusa. ¹⁶ Ira mongare-ngare,

“Oranga! Oranga! Nandasa mpuumo tupu ngata mbaso moitu!

Tupu ngata Babel nabiasa nompake pakea nipovia lako ri kae nalusu,

bo lako ri kae nakamumu bo nalei

anu niparika ramba-ramba bulava, vatu-vatu sinji anu nasuli bo mutiara.

¹⁷ Tapi aga riaru sajaa kakalumana nadea mpuu haitu naropu sanggani.”

Bo pura-pura topompajala kapala, ante topokarajaa riarana, bo pura-pura topesavi kapala ante pura-pura

tona anu nopaelo katuvura ri tasi, meangga mepen-toaka nggavao manggita ngata haitu. ¹⁸ Tempo raki-

tara unu nu apu molumura lako ri ngata mbaso nipal-abu haitu, ira mongare-ngare, “Ledo ria ngata ntanina

ri dunia nasimbayu mpo ngata mbaso moitu!” ¹⁹ Ira mombakamburaka sovu ntana ri balenggara sabana

kasusa rarara. Ira mantete motumangi bo manguli,

“Oranga! Oranga! Nandasa mpuumo tupu ngata

mbaso moitu!

Lako ri kakalumana ntupu ngata Babel haitu, pura-pura tona naria kapalana rarantasi najadi nakalumana.

Tapi peintamo! Aga riaru sajaa naropu sangganimo pura-pura kakalumanara haitu!”

²⁰ Bo nanguli malaeka,

“Umbamo komiu toponturo ri suruga! Pakadambamo raramiu!

Pakadambamo raramiu todea nu Alatala mosang-gani-nggani ante suro-suroNa bo nabi-nabiNa!

Sabana, tupu ngata mbaso Babel nihuku nu Alatalamo!

NibalasiNamo pokainggura nadaa nte komiu.”

Ngata Babel domo maria

²¹ Naupu haitu nikitaku saito malaeka naroso mpuu nombaanggataka sangu vatu mbaso bo nitedakana hau rantasi. Bo niulina,

“Ngata Babel ngata mbaso haitu rapakaropu sang-gani, domo maria,

nasimbayu mpo vatu hitu nitedaka rantasi domo rakava mpanjili.

²² Domo raepe moni musi lako nte topomore kacapi, bara moni ntopodade ri ngata haitu.

Domo raepe musi ntoposuli bara topotavusi tabue.

Domo maria topande movia bara nuapa-nuapa ri ngata haitu,

bo moni nu pogili domo raepe riarana.

²³ Domo maria reme poindo rakita riarana,

bo domo raepe suara boti langgai bo boti mombine madamba-damba.

Topopagoli-topopagoli lako ri ngata haitu najadi tomaoge ri dunia.

Bo ante pangisani nadaa, tupu ngata haitu nom-babagiu pura-pura manusia ri dunia."

²⁴ Tupu ngata Babel kana rahuku sabana ri ngata haitumo raa nu nabi-nabi bo todea nu Alatala nipakatitira.

Bo raa lako ri kamate ntona ntanina pura-pura anu nipatesi riara dunia hitu kana rapasau ka tupu ngata Babel haitu.

Kagero nu ngata Babel nipodamba isi suruga

19 Naupu haitu yaku i Yohanes, nangepe moni mpo suara ntona dea novoo nongare-ngare ri suruga. Niulira,

"Haleluya! Ratoiyamo Alatala! Sabana Iamo nom-pakasalama kita.

Iamo Alatala anu naoge bo nakuasa!

² Ratoiyamo Ia sabana pombabotusiNa nakana bo nanao.

NihukuNamo bajinga haitu,

anu nompakadaa dunia apa nipakenina tona ntanina nosipogau ante ia.

Nipesava nu Alatalamo mombine haitu sabana pompatesina topangoseaka Alatala."

³ Bo nongare munimo tona dea haitu,

"Haleluya! Ratoiyamo Alatala,

sabana unu nu apu nompalabu ngata haitu molumura sampe ri kasae-saena, ledo ria kaupupuna!"

⁴ Bo ropulu bo ampa totua bo ampa Anu Natuvu haitu nantaputu nombasomba Alatala anu nonturo ri Gadera KamagauaNa. Niulira, "Amin! Ratoiyamo Alatala!"

⁵ Naupu haitu naria suara lako ri Gadera Kamagaua haitu nanguli,

"Umba komiu pura-pura topangoseaka Alatala!

Toiyamo Tuputa Alatala!

Toiyamo Ia, komiu anu natundu nte Ia,

nau tona biasa nau tona naoge katuvuna!"

Posusa Poboti nu Ana Bimba

⁶ Naupu haitu niepeku mpo suara ntona dea novoo mpo soo nu uve oge bo mpo moni guru kede. Non-garemo ira,

"Toiyamo Alatala! Sabana, Tuputa Alatala nomparenta pura-pura anu naria!

Neliu mpuu KakuasaNa!

⁷ Kamaimo kita modade ante damba rara.

Kamaimo kita mantoiya kaogeNa.

Sabana, nakavamo eo ponika Ana Bimba.

Boti mombine nasadiamo ranika.

⁸ Ia nidekeika pakea mputi nalusu nenggila rapakena."

(Pakea nalusu nidekei ka mombine haitu nirapaka pokainggu-pokainggu nanao anu nipovia ntodea nu Alatala.)

⁹ Naupu sia, nangulimo malaeka haitu ka yaku,

"Tulisimo hitu: Nabelo mpuumo tona nigaga hau ri posusa ponika Ana Bimba." Bo niulina munimo, "Tesa-tesa hitu lako nte Alatala bo nakana mpuu!"

¹⁰ Nangepe tesa haitupa, nantaputumo yaku sampe ri tana ri ngayo malaeka haitu mombasomba ia. Tapi nangulimo ia ka yaku, "Nemo! Nee rasomba yaku.

Sombamo Alatala! Sabana yaku hii aga batua nu Alatala nasimbayu mpo iko bo nasimbayu mpo sampesuvumu sampomparasaya anu naroo nanggangisi

pepatuduki nakana nipopaisani i Yesus. Apa

pepatuduki nakana nipopaisani i Yesus, haitumo poko nu tesa ntona anu nompasimbayu tesa lako nte Alatala." †

I Yesus nipopakita mpo Topesavi jara bula hau mosieva

¹¹ Naupu haitu nikitaku suruga natebuka. Riara suruga nikitaku sangu jara bula. Topesavi jara haitu nosanga "Tona Natutu bo Nanao." Ia Topotangara bo Topeeva nanao. ¹² MataNa narega mpo vava nu apu bo ri balenggaNa nadea songgo magau. Ri karoNa naria

sanga nitulisi, tapi aga Ia mboto nangisani sanga

haitu. ¹³ Baju ndoe nipasuaNa nilome ri raa. Bo Ia

nidae "Tesa nu Alatala." ¹⁴ Tantara-tantara nu suruga

anu nombatuntuni Ia nesavi jara bula pura. Pakeara

nipovia lako ri kae mputi nalusu bo nagasa. ¹⁵ Bo lako

ri ngangaNa nesuvu samata guma natada. Ante guma

haitu Ia mombadagi tona pura-pura riara dunia anu

nangeva Ia, bo Ia momparenta ira ante ase poboba. Ia

mombajeje-jeje pakaoya vava anggur ri pompea

anggur nu Alatala anu Neliu KakuasaNa. Batuana, Ia

† *Apa pepatuduki nakana nipopaisani i Yesus, haitumo poko nu tesa ntona anu nompasimbayu tesa lako nte Alatala. Sabana,*

pepatuduki nakana nipopaisani i Yesus, haitumo anu nombadekei

kuasa ka tona mompasimbayu tesa lako nte Alatala.

mompopakita rau rara nu Alatala ka tona nadaa. ¹⁶ Ri bajuNa bo ri timpuNa nitulisi sangaNa ivei:

MAGAU NU PURA-PURA MAGAU, TUPU NU PURA-PURA TUPU.

Binata nadaa bo nabi mpodava nidagi nTopesavi jara bula

¹⁷ Naupu haitu, nikitaku saito malaeka neangga ri mata nu eo. Nongaremo ia ante suara namangga nompokio pura-pura tonji nevero ri laerava, “Kamaimo komiu pura-pura, mangande ri posusa mbaso nipakasadia nu Alatala! ¹⁸ Kamaimo mangande isi ntomate, haitumo magau-magau bo tadulako-tadulako, bo isi tantara-tantara nabia. Kamaimo komiu mangande isi ntopesavi jara bo isi jarara, bo isi manusia pura-pura, haitumo batua, madika, tona naoge katu-vuna, bo tona biasa.”

¹⁹ Naupu haitu nikitaku binata nadaa pangane bo magau-magau ri dunia ante tantarana nasiromu ala mosieva ante Topesavi jara bula bo tantaraNa. ²⁰ Tapi binata nadaa nisaka sanggani ante nabi mpodava bo ira randua nitedaka nggatuvu riarantasi apu anu navaya ante vatu-vatu colonggata navaya. Nabi mpodava haitumo [†] novia tanda-tanda nipokumaaka ante kuasa nidekei nu binata nadaa ka ia. Ante tanda-tanda nipokumaaka, ia nombabagi tona nimerere ante tanda nu binata nadaa bo tona nombasomba pinoitona. ²¹ Jadi naupu sia, Topesavi jara bula nompatesi pura-pura tantara nu binata nadaa, nitimbeNa ira ante guma nesuvu lako ri ngangaNa. Bo nakava mpuumo tonji-tonji nangande isi karobata ntomate haitu sampe nabasa.

Magau nu Seta nirante

²⁰ Naupu haitu, nikitaku saito malaeka nanau lako ri suruga. Ri palena naria gunji vamba nu lovu anu ledo rapakule mantuvu kandalana. Bo nitipalena muni sanganterante nambaso. ² Nisakana ule naga haitu anu niuli Ule Ntua, atau Topangadu atau Magau nu Seta. Bo ule haitu sanjobu mpaemo kasaena nirante-na. ³ Nitedakana ule haitu riarantasi lovu anu ledo rapakule mantuvu kandalana haitu. Naupu haitu nigunjina bo nimerena vamba lovu haitu ala ule naga ledo mamala mesuvu nombabagi manusia sampe magana tempoma sanjobu mpaemo kasaena. Malihaitu ia kana rakabasaka mpanjili sampalai.

Pembangu ntomate pamulana bo poparenta sanjobu mpaemo kasaena

⁴ Naupu haitu nikitaku bara sako-angu gadera kamagau. Bo tona nonturo ri gadera haitu nidekeika kuasa

[†] nabi mpodava: binata nadaa karanduana anu nantulungi binata nadaa paratama. Peinta Pompakita 13:13-14.

mombatangara. Bo nikitaku muni nyawa-nyawa ntona namate nitampa balenggara sabana ira batena nompatolele pepatuduki nakana anu nipopaisani i Yesus, bo batena nompatolele Tesa nu Alatala. Ira ledo muni nombasomba binata nadaa bo pinoitona, bo ira ledo muni nantarima mere binata haitu ri kirera bara ri palera. Ira gahaitu natuvu mpanjili bo nomparenta mpo magau nosanggani-nggani ante i Kristus sanjobu mpaemo kasaena. ⁵ Haitumo niuli pembangu ntomate pamulana. Tomate ntanina dopa matuvu mpanjili ane dopa maupu sanjobu mpaemo haitu. ⁶ Nabelo mpuu tona rapakatuvu mpanjili tempo pembangu ntomate pamulana, apa iramo todea nu Alatala. Ira ledo mambela pehuku niuli kamatea karongganina. Tapi ira majadi topanggeni pesomba ka Alatala bo ka i Kristus. Bo ira nomparenta mpo magau mosanggani-nggani ante i Kristus sanjobu mpaemo kasaena.

Magau nu Seta nihuku

⁷ Ane maupumo sanjobu mpaemo, Magau nu Seta rakabasaka lako riarantaru ngguna *ri lovu ndala haitu*, ⁸ bo ia hau nombabagi tona ri njumangu dunia, haitumo ngata-ngata bo todea-todea niuli Gog bo Magog ^{††}. Magau nu Seta haitu mompasiromu tona gahaitu mangeva Alatala bo topomparasaya. Kadea ntona rapasiromu mpo bone ri bivi ntalinti, ledo rapakule mombabilana. ⁹ Ira mompesayoki dunia bo makava lako ri umba-umba dunia mombatiku ngata nipotove nu Alatala, haitumo ponturo ntodea nu Alatala. Tapi apu manau lako ri langi mopalabu ira pura-pura sampe maupu. ¹⁰ Maupu haitu Magau nu Seta anu nombabagi ira ratedaka riarantasi apu navaya ante vatu-vatu colonggata narega. Haitumo ponturo nipotedaka binata nadaa bo nabi mpodava nokolu. Hamai, eo bongi ira rapandasa sampe ri kasae-saena.

Tomate nitangara

¹¹ Naupu haitu nikitaku sanganterante Gadera Kamagau nabula bo nambaso. Bo nikitaku muni Toponturo ri Gadera haitu. Nariapa Ia ri sia, nalipo singganimo dunia, bo domo naria nikita. ¹²⁻¹³ Bo nikitaku tona namate neangga ri ngayo Gadera haitu, haitumo, tomaoge bo tona biasa, tona namate nalodo rantasi, tona ntanina anu namate janjina, pura-pura tona lako ri ponturo ntomate. Ira pura-pura neangga ri ngayo Gadera Kamagau nu Alatala haitu. Bo buku-buku nitimpamo bo niparesa. Riarantasi buku-buku haitu nitulisi pura-pura pokainggu ntona namate. Jadi pehuku ka ira nipakatantu nangoseaka pokainggu-pokainggura nitulisi riarantasi buku-buku. Bo naria buku ntanina nitim-

^{††} Gog bo Magog: nirapaka ngata-ngata bo todea-todea anu nangeva Alatala. Ri Yehezkiel 38-39, i Gog magau ri ngata Magog anu nangeva todea nu Alatala.

pa muni anu niuli Buku Katuvua. ¹⁴⁻¹⁵ Isema-sema ledo nitulisi sangana riara Buku Katuvua haitu, nitedaka riara ntasi apu. Haitumo niuli kamatea karongganina, pehuku riara ntasi apu. Naupu haitu domo ria kamatea bo domo ria ponturo ntomate, apa kamatea bo ponturo ntomate nitedaka riara ntasi apu.

Dunia nabaru

21 Naupu haitu nikitaku dunia nabaru. Langi pamulana bo tana pamulana naliumo, bo domo ria tasi. ² Bo nikitaku muni ngata nu Alatala, ngata Yerusalem nabaru nanau lako nte Alatala ri suruga. Nagaya mpuu ngata haitu mpo boti mombine nopakea nagaya nasadia raala boti langgai. ³ Bo niepeku suara namangga lako ri Gadera Kamagaua nu Alatala haitu nanguli, "Pariaramo! Sii-sii ponturo nu Alatala nosanggani-nggani ante manusia. Ia monturo ri tatangara bo ira majadi todeaNa. Bo Ia mboto mosanggani-nggani ante ira bo majadi Alatala rasombara. ⁴ Ia mbotomo mombapaisi pura-pura uve mata lako ri matara. Domo maria tona mamate, domo maria tona masusa rarara bara motumangi, bo domo maria tona madua. Sabana, dunia nokolu domo naria."

⁵ Naupu haitu nangulimo Toponturo ri Gadera Kamagaua, "Pariaramo! Sii-sii Yaku nompakabaru pura-pura anu naria." Bo niuliNa munimo ka yaku, "Tulisimo anu Kutesa, sabana tesa hitu mpuu-mpuu nakana bo namala raparasaya."

⁶ Bo niuliNa ka yaku, "Naupu puramo! Yakumo hii Pamulana bo Kaupuna. Yaku nompamula bo Yaku muni nompakaupu. Isema-sema nabai tambolona Kudekeika uve lako ri mata nu uve anu nombadekei katuvua nabelo sampe ri kasae-saena. Uve haitu Kudekei bayangi, ledo paraluu rabayari. ⁷ Isema-sema padagi, rakavana pura-pura anu niuliKu pangane. Bo Yakumo majadi Alatalara bo ira majadi anaKu. ⁸ Aga tona naeka mangoseaka Yaku, atau ledo niparasayana Yaku, bo tona nadaa pokaingguna, topepatesi, tona nokainggu nabuga, topedoti, tona nombasomba tupu-tupu ntanina, bo pura-pura topodava, ira pura-pura kana rahuku riara ntasi apu anu navaya ante vatu-vatu colonggata. Haitumo niuli kamatea karongganina."

Pompakita Kaampana (21:9-22:5)

I Yohanes nanggita ngata Yerusalem nabaru

⁹ Naupu haitu nakavamo saito malaeka lako nte ira papitu anu nantipale tubu-tubu niisi ante pitu-ngaya pepandasa kaupuna. Nangulimo ia ka yaku, "Kaimaimo, kupopakita ka iko boti mombine anu rapoberei nu Ana Bimba." ¹⁰ Bo yaku nikuasai Nosa

Gasa nu Alatala bo niken nu malaeka hau ri bavo bulu anu nambaso bo nalanga. Lako ri bavo bulu haitu nituduakana ka yaku ngata nu Alatala anu nosanga ngata Yerusalem nanau lako nte Alatala ri suruga. ¹¹ Ngata haitu nareme mpuu ante kareme nu Alatala mboto. Karemena damo nenggila mpo mata sinji nasuli alina, mpo vatu yaspis anu nevayo mpo kaca. ¹² Ngata haitu ntiku-ntiku nitembo nakumba bo nalanga. Tembo haitu sapulu randua bobaana bo sapulu randua malaeka. Pura-pura bobaa simbo naria malaeka nombajagaina. Ri bobaa haitu naria nitulisi sanga-sanga nu ana i Israel nggaulu anu najadi sapulu randua valaa ntoYahudi. ¹³ Tembo kumba haitu pata-njulapa bo sanjulapa-sanjulapa tatalu bobaana: tatalu ri mpandakena, tatalu ri mpanauna, tatalu ri tasina, bo tatalu ri puluna. ¹⁴ Tembo ngata haitu nipopeangga ri bavo sapulu rolonta vatu pandasi bo ri vatu pandasi haitu naria nitulisi sanga sapulu randua suro nu Ana Bimba.

¹⁵ Malaeka anu notesa ante yaku haitu nantipale sambesa toko poreke nipovia lako ri bulava raporeke kambaso ngata haitu ante tembo bo bobaana. ¹⁶ Ngata haitu pata-njulapa. Kandatena nasimbayu nte kaluona. Malaeka haitu nombareke ngata haitu ante toko porekena. Kandatena ronjobu pata-atu kilo. † Kaluona bo kalangana nasimbayu ante kandatena. ¹⁷ Nirekena munimo tembo ngata haitu. Kalangana †† onopulu metere. ‡ Poreke nipake malaeka nasimbayu mpo poreke nipake manusia. ¹⁸ Tembo ngata haitu nipovia lako ri vatu-vatu yaspis, anu nenggila nalei bo nagavu. Ngata haitu nipovia lako ri bulava anu ledo ria galona, sampe damo nenggila mpo kaca nevayo.

¹⁹ Vatu-vatu pandasi ngata haitu nivera ante sapulu rongaya vatu nasuli alina, salonta sangaya muni vatu-na. Lonta pamulana nivera ante vatu yaspis navoe bo nevayo mpo kaca. Lonta karanduana nivera ante vatu nilam anu nagavu mpo uve ntasi nandala. Lonta katataluna nivera ante vatu mirah naputi bo nevayo. Lonta kaampana nivera ante vatu zamrud nosura mpo pae. ²⁰ Lonta kaalimana nivera ante vatu unam anu nisai nabula bo nalei. Lonta kaonona nivera ante vatu sardis anu nalei tua. Lonta kapapituna nivera ante vatu ratna cempaka anu narangguni mpo bulava. Lonta kauvaluna nivera ante vatu beril anu nosura nakunikuni. Lonta kasasiona nivera ante vatu krisolit anu nakuni mpuu. Lonta kasapuluna nivera ante vatu krisopras anu nosura mpo palapa loka. Lonta kasapulu sanguna nivera ante vatu lazuardi anu nagavu mpo langi. Bo lonta kasapulu randuana nivera ante vatu kecubung anu nakamumu bo nevayo.

²¹ Bo sapulu randua bobaa haitu nipovia lako ri sapulu randua mutiara, sangu bobaa sangu mutiarana. Bo

† Basa Yunani: 12.000 stadia. †† kalangana ATAU: kakumbana.
‡ Basa Yunani: 144 hasta.

dala riaru ngata haitu nipovia lako ri bulava anu ledo ria galona, damo nenggila mpo kaca neyayo.

²² Ledo ria banua petupu nikitaku riaru ngata haitu sabana Alatala toNeliu KakuasaNa, bo Ana Bimba mboto najadi Banua Petupu ri ngata haitu. ²³ Bo ngata haitu ledo paraluu reme nu eo bara reme nu bula, sabana reme lako nte Alatala nompakaremena, bo Ana Bimba najadi poindona. ²⁴ Pura-pura manusia ri dunia matuvu riaru karemena. Bo magau-magau ri dunia manggeni kakalumanara hau riaru ngata haitu.

²⁵ Bobaa-bobaa ngata haitu bate-batena natebuka, ledo ntoto nateupi-upi sabana ri ngata haitu ledo ria bongina. ²⁶ Pura-pura manusia makava mombasomba bo manggeni kakalumanara mesua riaru ngata haitu.

²⁷ Tapi anu naruto bo tona novia nadaa bo topodava ledo ntoto mamala mesua riaru ngata haitu. Tona mamala mesua hamai aga tona nitulisi sangana riaru Buku Katuvua nu Ana Bimba.

22 Bo malaeka haitu nompopakita ka yaku, Yohanes, sangu binangga, uvena damo nenggila mpo kaca neyayo. Bo uvena nombadekei katuvua nabelo. Binangga haitu nemata lako ri Gadera Kamagau nu Alatala bo Ana Bimba, ² bo noili ri tatanga dala ngata haitu. Ri tinggi binangga ntimali-mali naria kayu-kayu niuli "Kayu Katuvua †". Kayu haitu novua sapulu ronggani sampae, sambula sanggani novua. Bo tava kayu haitu nipopakuli mompakabelo tona ri njumangu dunia. ^{††} Riaru ngata haitu domo naria nuapanuapa nipindasi nu Alatala. Gadera Kamagau nu Alatala bo Ana Bimba naria riaru ngata haitu. Bo pura-pura topangoseaka Ia metupu ri ngayoNa. ⁴ Bo ira manggita lenjeNa mpuu. Bo sangaNa ratulisi ri kirera pura-pura. ⁵ Domo maria bongina. Tupu ngata haitu domo paraluu poindo bara reme nu eo mombavanta ira, sabana reme lako nte Alatala mbotomo mombavanta ira. Bo ira mompamenta mpo magau sampe ri kasae-saena.

Domo masae i Yesus makava

⁶ Naupu haitu, nangulimo malaeka pangane ka yaku, "Pura-pura tesa pangane mpuu-mpuu nakana bo namala raparasaya. Alatala nombadekei Nosa Gasana ka pura-pura nabiNa, haitumo, todeana anu nompasimbayu tesa lako nte Ia. Iamo nombatudu malaekana tumai nombatuduaka ka topangoseaka Ia anu domo masae majadi."

⁷ Bo nangulimo i Yesus, "Pariaramo! Domo masae makavamo Yaku. Nabelo mpuumo tona nompariara anu niboto ri buku hitu!"

⁸ Yaku i Yohanes nanggita bo nangepe pura-pura kajadia pangane. Naupu yaku nangepe bo nanggita

† Kayu Katuvua: Kayu hitu nikava ri Pampa Eden nggaulu. Peinta Kajadia 2:9; 3:22-24. †† tava kayu nipopakuli: Peinta Yehezkiel 47:12.

haitu pura-pura, nantaputumo yaku sampe ri tana mombasomba malaeka anu nombatuduaka pura-pura kajadia haitu ka yaku. ⁹ Tapi malaeka haitu nombatagi yaku, "Nemo! Nee rasomba yaku! Sombamo Alatala! Apa yaku hii aga batua nu Alatala nasimbayu mpo iko bo roa-roamu nabi bo tona natutu nangoseaka tesa-tesa nitulisi riaru buku hitu."

¹⁰ Bo niulina munimo ka yaku, "Nemo mutabuniaka tesa niboto riaru buku hitu, apa domo masae majadi mpuumo. ¹¹ Isema-sema nadaa pokaingguna, palambamo ia batena movia nadaa. Isema-sema naruto pokaingguna, palambamo ia batena movia anu naruto. Isema-sema nanoa, palambamo ia masaro movia anu nanoa. Isema-sema nagasa rarana, palambamo ia batena movia anu nagasa."

¹² Bo nanguli munimo i Yesus, "Pariaramo! Domo masae makavamo Yaku manggeni tambo bo Kubalasi pura-pura tona nangoseaka pokainggura. ¹³ Yakumo hii Pamulana bo Kaupuna. Yakumo Pompamulana bo Panggaupuna. Yakumo nompamula bo Yakumo nompakaupu."

¹⁴ Nabelo mpuumo tona notoposi pakeana sampe nagasa, apa iramo rapaloga mangande vua lako ri Kayu Katuvua. Iramo rapaloga mesua riaru ngata haitu mangose bobaa. ¹⁵ Tapi tona nadaa, topedoti, tona nogau sala ante tona ledo bereina mboto, topepatesi, tona netupu nte tupu ntanina, topodava bo pura-pura tona nompokono dava, ponturora pura-pura aga ri savaliku ngata haitu.

¹⁶ "Yaku i Yesus, nombatudu malaekaKu hau mompaisani petevaiKu hitu ka komiu todea topangoseaka Yaku. Yakumo hii muli bo valaa Magau Daud. Yakumo hii betue pompaeo anu nareme."

¹⁷ Nosa Gasa bo boti mombine anu nasadia rapoberei nu Ana Bimba haitu nanguli, "Kamaimo!" Bo pura-pura tona nangepe tesa hitu kana manguli, "Kamaimo!" Isema-sema nabai tambolona, kamaimo! Isema-sema madota, kamaimo manginu uve anu nombadekei katuvua. Uve haitu nidekei bayangi, ledo paraluu raali.

Tesa kaupuna

¹⁸ Yaku i Yohanes, nompopainga ka pura-pura topangepe tesa pombaboto nitulisi riaru buku hitu, Alatala mantambai ka ia pepandasa-pepandasa nitesaki riaru buku hitu. ¹⁹ Bo isema-sema mompakalipo isi tesa pombaboto ri buku hitu, Alatala mangala bagiana, haitumo, ia ledo radekei mangande vua lako ri Kayu Katuvua bo ledo radekei mesua riaru ngata nu Alatala mpo niuli riaru buku hitu.

²⁰ Bo i Yesus anu nompasimbayu pura-pura tesa hitu nanguli, "Nakana! Domo masae makavamo Yaku!"

Amin! Maranata! † Kakavamo, Pue Yesus!
²¹ Kuperapi i Pue Yesus mombadekei belo ka pura-
pura todea nu Alatala. Amin.

† *Maranata: batuana, kakavamo!*

19-May-2009@12:42, Backup Descrip-
tion=19-May-2009@09:53, snave -
26-May-2009@11:04, Backup Descrip-
tion=26-May-2009@11:03, B Altork - ❖❖❖